

New Testament

Digo Language

Digo - Bible - New Testament

Mathayo	3	
Mariko	63	
Luka	109	
Johana	179	
Mahendo	233	
Arumi	298	
1 Akorintho	328	
2 Akorintho	357	
Agalatia	375	
Aefeso	386	
Afilipi	396	
Akolosai	403	
1 Athesalonike	410	
2 Athesalonike	416	
1 Timothi	420	
2 Timothi	428	
Tito	434	
Filemoni	438	
Aebrania	440	
Jakobo	462	
1 Petero	469	
2 Petero	477	
1 Johana	482	
2 Johana	489	
3 Johana	490	
Juda	491	
Maono	494	

Digo - Bible - New Testament

Mathayo

Mathayo 1

- ¹Hino ni adisi ya Jesu Masihi. Iye kala ni chivyazi cha Daudi, na chivyazi cha Brahimu.
- ²Brahimu wavyala Isaka, Isaka achivyala Jakobo, naye Jakobo achivyala Juda na nduguze.
- ³Juda achivyala Perezi na Zera, ambao nine yao kala ni Tamari. Perezi kala ni isengbwa wa Hezironi, naye Hezironi achivyala Rami.
- ⁴Rami achivyala Aminadabu, Aminadabu achivyala Nashoni, naye Nashoni achivyala Salmoni.
- ⁵Salmoni na mchewe Rahabu avyala Boazi, naye Boazi na mchewe Ruthu avyala Obedi, naye Obedi achivyala Jese.
- ⁶Jese wakala isengbwa wa Mfalume Daudi. Daudi naye wavyala Selemani na mchetu ambaye kala ni mkpwaza Uria.
- ⁷Selemani wavyala Rehoboamu, Rehoboamu achivyala Abiya, naye Abiya achivyala Asa.
- ⁸Asa wavyala Jehoshafati, Jehoshafati achivyala Joramu, naye Joramu achivyala Uzia.
- ⁹Uzia wakala isengbwa wa Jothamu, Jothamu achivyala Ahazi, naye Ahazi achivyala Hezekia.
- ¹⁰Hezekia wakala isengbwa wa Manase, Manase achivyala Amoni, naye Amoni achivyala Josia.
- ¹¹Josia wavyala Jekonia na nduguze. Hinyu ndio wakati Ayahudi ariphohalwa achiphirikpwa tsi ya Babeli.
- ¹²Bada ya Ayahudi kuhalwa kuphirikpwa Babeli, Jekonia wavyala Shealtieli, naye Shealtieli kala ni isengbwa wa Zerubabeli.
- ¹³Zerubabeli wavyala Abiudi, Abiudi achivyala Eliakimu, naye Eliakimu achivyala Azori.
- ¹⁴Azori wavyala Zadoki, Zadoki wakala isengbwa wa Akimu, naye Akimu achivyala Eliudi.

¹⁵Eliudi wavyala Eliazari, Eliazari achivyala Mathani, naye Mathani achikala isengbwa wa Jakobo.

¹⁶Jakobo wakala isengbwa wa Yusufu, mlumengbwa wa Maryamu. Naye Maryamu wakala ninengbwa wa Jesu, aihwaye Masihi.

¹⁷Kpwa hivyo vivyazi vyosi kula Brahimu hadi Daudi ni vivyazi kumi na vine. Kula Daudi hadi Ayahudi kuhalwa kuphiya Babeli ni vivyazi kumi na vine. Bada ya Ayahudi kuhalwa kuphirikpwa Babeli hadi wakati wa kuvyalwa Masihi ni vivyazi kumi na vine.

¹⁸Kuvyalwa kpwa Jesu Masihi kpwakala hivi. Maryamu nine wa Jesu ariphokala wende wa Yusufu, kabla taadzangbwe kala phamwenga, waphaha mimba kpwa uwezo wa Roho wa Mlungu.

¹⁹Yusufu ariphomanya kukala wendewe ana mimba, wapanga kumricha chisiri-siri kpwa mana kala ni mutu wa haki, naye kayalonda kumuifya.

²⁰Bada ya kuririkana dzambo hiro, malaika wa Mlungu wamuedzera ndosoni, achimuamba, "Yusufu, chivyazi cha Daudi, usiogophe kumhala Maryamu akale mcheo, mana ana mimba kpwa uwezo wa Roho wa Mlungu.

²¹Iye andadzivugula mwana wa chilume, naye undamuiha Jesu, kpwa kukala iye ndiye ndiyeokola atue kula dambini."

²²Phahi gosi higa gahendeka ili neno rogombwa ni Mlungu kutsupira nabii ritimie, roamba:

²³"Lolani, mwanamwali andaphaha mimba, andadzivugula mwana wa chilume, nao andamuiha Imanueli." Manage ni, "Mlungu a phamwenga naswi."

²⁴Yusufu aripholamuka usingizini wahenda vira malaika wa Mlungu arivyolagiza. Wamhala Maryamu,

²⁵lakini kayalala naye hadi ariphodzivugula. Wadzivugula mwana wa chilume, ndipho Yusufu achimhasa dzina ra Jesu.

Mathayo 2

¹Phahi, Jesu wavyalwa hiko Bethlehemu, mudzi urio jimbo ra Judea. Siku na hizo, Herode ndiye kala ni mfalume. Bada ya Jesu kuvyalwa, kpwapwedza atu hiko Jerusalem, mudzi mkpwulu. Atu hano kala ni ajuzi a nyenyezi kula mlairo wa dzuwa.

²Achiuza, "A kuphi mwana achiyevyalwa, mfalume wa Ayahudi? Sino hwaona nyenyeziye iriphotsembuka na vino hukedza kumuabudu."

³Herode ariphosikira higo, iye phamwenga na atu anji a Jerusalem ainjirwa ni wasi-wasi sana.

⁴Phahi waaiha akulu a alavyadzi-sadaka na alimu a Shariya, achiauza, "Masihi andavyalwa kuphi?"

⁵Nao achimuamba, "Andavyalwa Bethlehemu, mudzi wa Judea kama Mlungu arivyoamba kutsupira kpwa Maandiko ga nabii:

⁶'Bethlehemu sio mudzi usiofwaha hiko Juda, mana mfalume andatuluka kula kuko, naye andakala mrisa wa atu angu Aiziraeli.' "

⁷Phahi Herode waaiha njama hara ajuzi a nyenyezi achilonda kumanya hasa ni wakati gani iriphotsembuka hira nyenyezi.

⁸Naye achiahuma hiko Bethlehemu achiamba, "Phiyani mkamuendze na mchimuona nireherani habari ili nami nkamuabudu."

⁹Bada ya kusikiza yuya mfalume, agbwira njira achiphiya vyao. Hira nyenyezi ambayo kala akaiona, yatsembuka tsona mbere zao. Ichialongoza hadi ichiima dzulu ya phahali phokala yuya mwana.

¹⁰Ariphoiona, atu hinyo ahererwa sana.

¹¹Na bada ya kuinjira mura nyumbani amuona mwana na nine Maryamu, nao achimsujudiya na achimuabudu. Badaye avugula mikoba yao achilavya zawadi za ye mwana za zahabu, uvumba na manemane.

¹²Nao achikahazwa ndosoni asiuye kpwa Herode, kpwa hivyo achiuya kpwao na njira yanjina.

¹³Hara atu ariphouka, malaika wa Mlungu wamtsembukira Yusufu ndosoni achimuamba, "Unuka uchimbire phamwenga na hiye mwana na nine mphiye Misiri. Na msagale kuko hadi ndiphokuambirani muuye, mana Herode anamuendza hiye mwana ili amuolage."

¹⁴Yusufu wavumbuluka achifunganya, achimhala yuya mwana na nine, achiuka usiku kpwa usiku kuphiya Misiri.

¹⁵Nao asagala hiko Misiri hadi Mfalume Herode ariphofwa. Higa gosi gahendeka ili ritimie rira neno ra Mlungu rogombwa ni nabii, roamba, "Nikaiha mwanangu kula hiko Misiri."

¹⁶Phahi Herode ariphoona akachengbwa ni hara ajuzi a nyenyezi, watsukirwa sana. Achihuma asikarie hiko Bethlehemu na vidzidzi vya phephi, ili akaolage ana osi a chilume kula mtsanga hadi wa miaka miiri. Mana hangu aambirwe ni hara ajuzi a nyenyezi kala ikatsupa kama miaka miiri kula iriphoonewa.

¹⁷Chisha maneno arigogomba Mlungu kutsupira nabii Jeremia gatimia:

¹⁸"Sauti yasikirika hiko Rama, ya chiriro na sonono. Raheli anaririra anae na anarema kunyamazwa mana kandaona tsona."

¹⁹Bada ya chifo cha Herode, Yusufu watsembukirwa ni malaika wa Mlungu ndosoni, wakati achere hiko Misiri.

²⁰Achiambwa, "Hala mcheo na mwanao wuuke hipha wuuye Iziraeli, mana hara kala analonda kumuolaga mwana afwa."

²¹Phahi Yusufu wafunganya achihala mwana na nine achiuya Iziraeli.

²²Lakini Yusufu ariphosikira kukala Arikelao, mwana wa Herode, ndiye mtawala wa Judea waogopa kuphiya hiko. Naye bada ya kukahazwa ndosoni waphiya jimbo ra Galilaya,

²³ambako wakpwendasagala mudzi wa Nazareti. Gahendeka hivyo ili gara gogombwa ni manabii kuhusu Masihi gatimie. Mana manabii aamba, "Andaihwa Mnazareti."

Mathayo 3

¹Bada ya miaka minji, hiko weru wa jimbo ra Judea kpwatsembuka mutu yeandza kazi ya kuhubiri. Mutu hiye kala anaihwa Johana M'batizadzi.

²Kala achiamba, "Tubuni! Mana Mfalume yela kpwa Mlungu a phephi kpwedzatawala atue."

³Johana ndiye ambaye habarize zagombwa ni nabii Isaya ariphoamba, "Kuna mutu anakota likululu hiko weruni kuaambira atu: 'Tayarishani njira ya Bwana na muigolose.' "

⁴Johana wavwala vwazi rotengezwa na nyoya za ngamia, na kala achidzifunga mkanda wa chingo chununi. Chakuryache chakala ndzije na asali.

⁵Phahi atu anji amlunga kula Jerusalemu na jimbo rosi ra Judea na tsi iriyo kanda-kanda ya muho wa Joridani.

⁶Ariphotubu dambi zao, waabatiza muho wa Joridani.

⁷Lakini ariphoona Mafarisayo na Masadukayo anji aredza abatizwe, waambira, "Eeh, nyoka mwi! Mnataka kuchimbira adabu ya Mlungu yedzayo bila ya kutubu kpweli! Hiyo siyo sababu ndzuri ya kukala mnataka m'batizwe!

⁸Ichikala mnataka nikubatizeni, kpwandza galuzani mahendo genu muonyese kukala n'kpweli mkagaluka.

⁹Na msidzichenge mkaamba, 'Sino huna haki kpwa kukala hu ana a Brahimu.' Nakuambirani kpweli kala Mlungu anaweza kugaluzi hata mawe higa gakakala ana a Brahimu.

¹⁰Hata vivi sambu hukumu ya Mlungu i tayari, dza mbadzo iriyo tayari kubwaga muhi. Chila muhi usiovyala matunda manono undakatwa utsuphiwe mohoni."

¹¹Ndipho Johana ariphogomba na atu osi, achiamba, "Mimi nakubatizani na madzi, kuonyesa mkaricha dambi zenu. Lakini aredza mutu ambaye ana uwezo zaidi yangu, ambaye mimi sifwaha hata kumvula virahuvye. Naye andakubatizani na Roho wa Mlungu na moho.

¹²Iye ana lungore mkpwononi, naye andapheha nganu na aitiye chitsagani. Lakini maphephe andagatsupha mohoni, moho usiofwa."

¹³Chisha Jesu wakpwedza kula jimbo ra Galilaya achipiya muho wa Joridani kokala Johana, ili akabatizwe.

¹⁴Lakini Johana wakahala, achiamba, "Mbona we uredza kpwangu? Mimi ndimi nifwahaye kpwedza kpwako unibatize."

¹⁵Ela Jesu achimuamba, "Richa vikale hivyo. Mana hivyo ndivyo hulondwavyo kuhenda ili huhende vira Mlungu alondavyo." Phahi Johana wakubali.

¹⁶Jesu ariphomala kubatizwa, watuluka mura madzini. Ariphotuluka tu, mlunguni kpwafwenuka naye achiona Roho wa Mlungu anatsereza dza mfwano wa njiya na achedzagbwa dzuluye.

¹⁷Chisha kpwatuluka sauti kula mlunguni ichiamba, "Hiyu ni mwanangu nimmendzaye, naye ananihamira sana."

Mathayo 4

¹Alafu Jesu walongozwa ni Roho wa Mlungu kuphiya hiko weruni ili Shetani apate kumjeza.

²Bada ya kufunga siku arubaini usiku na mutsi, Jesu wasikira ndzala.

³Phahi Shetani wamtsolokera achimuamba, "Ichikala kpweli u Mwana wa Mlungu, gaambire gano mawe gagaluke mikahe."

⁴Lakini achiamba, "Yaandikpwa, 'Atu taishi kpwa chakurya bahi, ela kpwa chila neno rilero kpwa Mlungu.' "

⁵Chisha Shetani wamhala achimphirika hadi Jerusalemu, mudzi mtakatifu, achendamuimisa chirere cha Nyumba ya Kuvoya Mlungu.

⁶Achimuamba, "Ichikala u Mwana wa Mlungu, tina ugbwe, mana yaandikpwa, 'Mlungu andalagiza malaikae akurinde sawa-sawa,' na, 'Malaikae andakuunula, ili usedze ukakpwala dziwe.' "

⁷Jesu achimjibu achiamba, "Piya yaandikpwa kukala, 'Usimjeze Bwana Mlunguo.' "

⁸Chisha Shetani wamhala Jesu hadi dzulu ya mwango mure, achimuonyesa unono wa falume zosi za dunia.

⁹Naye achimuamba, "Uchinisujudiya n'ndakupha hivi vyosi."

- ¹⁰Phahi Jesu wamuamba, "Niukira hipha, Shetani we! Mana yaandikpwa, 'Muabudu Bwana Mlunguo bahi na umhumikire iye macheye.' "
- ¹¹Mara mwenga Shetani wamricha, na malaika achedzamterya Jesu.
- ¹²Johana kala akatiywa jela. Jesu ariphosikira habari hizo, wauya Galilaya.
- ¹³Wauka Nazareti achiphiya Kaperinaumu, mudzi wa kanda-kanda ya Ziya ra Galilaya, piya mudzi hinyo kala u seemu ya Zabuloni na Naftali.
- ¹⁴Higa gahendeka ili ritimie rira neno ra Mlungu rogombwa ni nabii, roamba:
- ¹⁵"Sikizani, mwi atu a tsi za kabila ra Zabuloni na Naftali, tsi zirizo kanda-kanda ya njira ya kuphihira ziyani na kuvuka muho wa Joridani, Sikizani mwi atu msiokala Ayahudi msagalao hiko Galilaya.
- ¹⁶Dzagbwe atu enu anaishi jizani, andaona mwangaza mkpwulu. Tsona dzagbwe anaishi tsi ya chilungu-lungu cha jiza ra chifo, mwangaza undaang'arira."
- ¹⁷Jesu ariphokala hiko Kaperinaumu waandza kuhubiri achiamba, "Tubuni! Mana Mfalume yela kpwa Mlungu a phephi kpwedzawala atue!"
- ¹⁸Jesu ariphokala ananyendeka kanda-kanda ya Ziya ra Galilaya, waona ndugu airi a chilume, Simoni ambaye piya anaihua Petero na nduguye Anderea. Atu hinya kala anatsupha chimia ziyani mana kala ni avuvi.
- ¹⁹Phahi waambira, "Nilungani! N'ndakuhendani avuvi a atu."
- ²⁰Saa iyo-iyo aricha vimia vyao achimlunga.
- ²¹Jesu ariphosengera mbere waona ndugu anjina airi, Jakobo na nduguye Johana anangbwa a Zebedayo. Aho na ise yao kala a dauni anashona vimia vyao. Phahi Jesu waaiha.
- ²²Phapho hipho amricha ise yao phamwenga na ro dau, achimlunga Jesu.
- ²³Jesu wanyendeka Galilaya yosi kuno anafundza masinagogini mwao na kutangaza habari ndzuri kuhusu utawala wa Mlungu, na kuphoza atu anji ariokala na makongo na unyonje wa chila aina.
- ²⁴Ngumaye yavuma na ichienea hadi seemu yosi ya jimbo ra Siria. Atu amrehera akongo a chila aina, a kulumwa sana, a kupagaliwa ni pepho, a chifwafwa na a kuphola vilungo, naye achiaphoza.
- ²⁵Makundi ga atu anji gamlunga-lunga. Ganjina kala gala mumo Galilaya na kula Dekapoli, ganjina kula Jerusalem na Judea yosi na ganjina kula seemu ya kuvuka muho wa Joridani.

Mathayo 5

- ¹Jesu ariphoona atu anazidi kpwedza, wapanda gambani achendasagala. Nao anafundzie achimlunga.

- ²Chisha achiandza kuafundza, achiamba:
- ³"Baha adzimanyao kukala ni agayi a chiroho, mana Mlungu andaakubali akale atue.
- ⁴Baha asononekao, mana Mlungu andaapha pore.
- ⁵Baha apole, mana Mlungu andaapha tsi ikale yao.
- ⁶Baha ahirikao na ndzala na chiru ya kuhenda vira Mlungu alondavyo, mana Mlungu andaamvunisa.
- ⁷Baha aonerao ayawao mbazi, mana Mlungu andaaonera mbazi.
- ⁸Baha ario na moyo safi, mana andamuona Mlungu.
- ⁹Baha apatanishao atu, mana andaihwa ana a Mlungu.
- ¹⁰Baha aphahao mashaka kpwa kuhenda vira Mlungu alondavyo, mana Mlungu andaakubali akale atue.
- ¹¹Baha mwimwi mlaphizwao, mzulumiwao na mzigbwao na chila aina ya uyi kpwa sababu yangu.
- ¹²Mana gago mhenderwago ndigo atu arigoahendera manabii ariokala kabla ya mwimwi. Phahi hererwani na mpige njerejere mana Mlungu wakuikirani zawadi kulu hiko mlunguni."
- ¹³Jesu waenderera kugomba, "Mwimwi mu munyu wa atu a dunia. Lakini uchibanangika taufwaha na tauweza kuhendwa ukafwaha tsona, ela utsuphiwe uvyogbwe-vyogbwe.
- ¹⁴Mwimwi mu mwangaza umwirikao atu a dunia yosi. Mudzi uriodzengbwa gambani taufwitsika.
- ¹⁵Vivyo hivyo takuna aasaye taa na kuifwinika bakuli, ela nkuyiika dzulu ili chila mmwenga ariye nyumbani aone mwangaza.
- ¹⁶Phahi namwi mwangaza wenu naung'arire atu, ili aone mahendo genu manono na kumtogola Sowe yenu ariye mlunguni."
- ¹⁷"Msifikiriye kukala nákpwedza kugaluzza Shariya za Musa na mafundzo ga manabii, hata! Sedzere kugaluzza, ela nakpwedza ili nigatimize.
- ¹⁸Nakuambirani kpweli: Kabla mlunguni na duniani kusika, takuna hata arufu mwenga au seemu ndide ya Shariya ndiyouswa bii hadi yosi ikamilike.
- ¹⁹Kpwa hivyo avundzaye mwenga kahi ya hizi shariya ndide na akafundza ayae kuzivundza andakala mdide kahi za atu a Mlungu. Lakini azigbwiraye na kuzifundza ayae, Mlungu andamtala kukala muhimu kahi za atu a Mlungu.
- ²⁰Phahi nakuambirani, msiphohenda vira Mlungu alondavyo zaidi ya Mafarisayo na alimu a Shariya, tamndajaliwa kukala atu a Mlungu bii."

²¹"Mwasikira kukala akare enu aambwa, 'Usiolage mutu!' Na, 'Yeyesi ndiyeolaga myawe andahukumiwa.'

²²Lakini mino nakuambirani kukala mutu achireyera myawe, n'lazima ahukumiwe. Azarauye mfuasi myawe anafwaha kuphirikpwa mbere za baraza ra azehe. Na mutu ndiyelaphiza myawe andakala mashakani mana anaweza kuphirikpwa mohoni.

²³Phahi uchikala unalavya sadaka kpwa Mlungu, na utambukire kala wamkosera myao,

²⁴iriche mwandzo uphiye mkarye suluhu ndipho wedze ulavye sadakayo.

²⁵Mshitakio achikala anakuphirika kotini phahana naye mapema wakati mchere mo njirani mnaphiya kotini. Mana usiphohenda hivyo andakuphirika kpwa jaji, naye jaji achikuhukumu andakulavya kpwa asikari ukafungbwe jela.

²⁶Nami nakuambira wazi, kundatuluka hadi uriphe faini yosi tse-tse-tse."

²⁷"Mwasikira kukala yaambwa, 'Usizini!'

²⁸Lakini mino ndimi nakuambirani kukala mutu achiona mchetu na achimuaza, phahi hiye ni kukala akazini na yuya mchetu mwakpwe moyoni.

²⁹Ichikala dzitsoro ra kulume ndiro rikuhendaro ukahenda dambi risekule uritsuphe! Mana ni baha ukale na tsongo kuriko mwirio wosi kutsuphiwa mohoni.

³⁰Na ichikala mkpwonoo wa kulume ndio ukuhendao ukahenda dambi, ukate wuutsuphe! Mana baha ukose mkpwono mmwenga kuriko mwirio wosi utsuphiwe mohoni."

³¹"Piya yaambwa, 'Mutu ndiyemricha mchewe, naamuphe cheti kuonyesa kukala akamricha.'

³²Lakini mino nakuambirani kukala, mutu ndiyericha mchewe kpwa sababu yoyosi yanjina isiphokala uzindzi, anamhenda hiye mchetu ahende dambi ya uzindzi achilólwa tsona. Na yeyesi ndiyelóla mchetu hiye piya andakala anazinga."

³³"Mwasikira kukala akare enu aambwa, 'Usivundze naziri, ela n'lazima ulavye nazirizo mbere za Mwenyezi Mlungu.'

³⁴Lakini mino nakuambirani kukala: Msilaphe tse. Msilaphe kuhadza mlunguni mana ni chihi cha Mlungu,

³⁵wala kuhadza dunia mana ni phahaliphe pha kuikira magulu. Tsona msilaphe kuhadza Jerusalemu mana ni mudzi wa Mlungu ariye ni Mfalume mkpwulu.

³⁶Piya usilaphe kuhadza chitswacho mana kuweza kugaluzi nyere mwenga kukala nyereru wala ikale nyiru.

³⁷Kpwa hivyo uchiamba, 'N'kpweli,' naikale n'vivyo kpweli. Na uchiamba, 'Sivyo,' vikale sivyo. Mana chochosi ndichozidi maneno higa mairi chila kpwa Shetani."

³⁸"Mwasikira kukala yaambwa, 'Mutu achikudunga dzitso nawe mdunge. Achikung'ola dzino nawe mng'ole.'

³⁹Lakini mino nakuambirani, mutu achikuhendera uyi usiriphize. Mutu achikupiga ndzeya hino mgaluzire yanjina nayo apige.

⁴⁰Na mutu achikushitaki kotini kpwa analonda kuhala shatiro, muphe hata yo kandzuyo.

⁴¹Mutu achikulazimisha umtsukurire mzigowe kilomita mwenga, phahi mtsukurire kilomita mbiri.

⁴²Akuvoyaye chitu muphe, na hiye alondaye kukuaphasa usimriche akauka mikono mihuphu."

⁴³"Mwasikira kukala yaambwa, 'Mmendze myao na umzire mvihao.'

⁴⁴Lakini mino nakuambirani kukala, amendzeni aviha enu na muavoyere ambao anakuzulumuni,

⁴⁵ili mkale dza Sowe yenu ariye mlunguni. Mana nkuhenda dzuware riang'arire atu anono na ayi, na mvula ikanya kpwa atu a haki na asio haki.

⁴⁶Kpwani ichikala mnamendza hara anaokumendzani bahi mndaphaha zawadi yani? Mana hata makarani ga kodi nkumendza asena ao!

⁴⁷Na ichikala mlamusa asena enu bahi, ro jeni rindakala rhiphi? Mana hata atu asiommanya Mlungu nkuhenda dza vivyo.

⁴⁸Kpwa hivyo kalani akamilifu, dza Sowe yenu ariye mlunguni arivyo mkamilifu."

Mathayo 6

¹"Dzimanyirireni msedze mkahenda mahendo genu ga haki mbere za atu, ili muonekane mnahenda manono. Mchihenda hivyo, Sowe yenu ariye mlunguni kandakutuzani.

²Kpwa mfwano, wakati unalavya zaka, usimanyise atu anjina uhendaro, dza anafiki anavyohenda ndani ya sinagogi na barabarani, ili atogolwe ni atu. Nami nakuambirani kpweli kukala atu aho aphaha kare zawadi zao.

³Lakini ichikala unalavya zaka, lavya chisiri-siri hata msenao asimanye.

⁴Naye Sowe, aonaye garigo sirini, andakutuza."

⁵"Wakati mnavoya msikale dza anafiki. Mana anamendza kuvoya wima ndani ya sinagogi na maganikoni, ili atu aaone. Nakuambirani kpweli kukala atu hinyo aphaha kare zawadi zao.

- ⁶Ela wakati unavoya, injira mwako chumbani ufunge mryango, chisha uvoye Sowe usiyemuona. Naye Sowe, aonaye garigo sirini, andakutuza.
- ⁷Tsona mnaphovoya msidziayuse na maneno manji dza atu asiomanya Mlungu ahendavyo. Mana nkufikiri kukala mavoyo gao gandasikizwa kpwa sababu ya maneno gao manji.
- ⁸Msikale dza atu hinyo, mana Sowe yenu anamanya mlondaro kabla tamdzangbwem'voya.
- ⁹Phahi mwimwi voyani hivi: Baba, uriye mlunguni, dzinaro nariogophewe.
- ¹⁰Utawalao nauonekane wazi, na ulondaro rihendeke himu duniani dza irivyo hiko mlunguni.
- ¹¹Huphe ihi rero chakurya cha kuhutosha.
- ¹²Na husamehe makosa gehu, dza viratu hunavyosamehe ahukosao.
- ¹³Usihuriche hukatiywa dambini ni Shetani, lakini hutivye na mambo mai.
- ¹⁴Mana mchisamehe ayawenu, Sowe yenu ariye mlunguni piya andakusameheni.
- ¹⁵Lakini msiphosamehe, naye Sowe yenu kandasamehe makosa genu.”
- ¹⁶”Wakati mkafunga, msikundze nyuso dza anafiki. Mana atu hinyo nkudziika na sonono ili amanywe kukala akafunga. Nami nakuambirani kpweli kukala atu hinyo aphaha kare zawadi zao.
- ¹⁷Ela uwe uchifunga, singa uso na udzipake mafuha chitswani,
- ¹⁸ili kufungako kusimanywe ni atu, ela kumanywe ni Mlungu bahi ambaye kaonekana. Hipho Sowe aonaye garigo sirini, andakutuza.”
- ¹⁹”Msidziikire akiba zenu hipha duniani, ambapho adudu na ng'andu ni kuibananga ama aivi ni kuvundza nyumba akaiya.
- ²⁰Ela dziikireni akiba hiko mlunguni, ambako takuna adudu wala ng'andu ibanangayo, wala aivi taaweza kufika akaiya.
- ²¹Mana hipho uikapho akibayo ndipho ambapho rohoyo inalonda ikale.”
- ²²”Matso ni taa ya mwiri. Phahi matso gachikala mazima, mwiri wosi undakala na mwanga.
- ²³Ichikala mwanga ambao ni ukale mwako mwirini taumo, phahi hiro jizare rinakala ra kutisha!”
- ²⁴”Takuna mutu awezaye kuumikira matajiri airi. Mana achienda vivyo, andamendza mmwenga na amzire yuya wanjina. Mmwenga andamhendera kazi vinono na amzarau yuya wa phiri. Tamuweza kuumikira Mlungu na kuno mnahumikira mali.

- ²⁵Phahi nakuambirani, msidzitiye wasi-wasi kuhusu maisha genu, kala mndaryani, mndanwani, wala kuhusu miri yenu mndavwalani. Hakika maisha ni muhimu kuriko chakurya, na mwiri ni muhimu kuriko nguwo.
- ²⁶Lolani nyama a mapha: taaphanda, taavuna, wala taaika chitsagani. Ela Sowe yenu ariye Mlunguni nkuarisa. Dze, mwi si mu a samani kuriko aho?
- ²⁷Ni ani awezaye kudzienjerezera maisha kpwa kuhenda wasi-wasi, hata dzagbwe ni dzisaa dzimwenga tu?
- ²⁸Na kuhusu nguwo, kpwa utu wani mna wasi-wasi? Lolani maruwa ga tsakani gameravyo. Tagahenda kazi wala tagashona nguwo,
- ²⁹ela nakuambirani, hata Mfalume Selemani mwenye na utajiriwe wosi, kayapambwa vinono dza ruwa mwengarapho.
- ³⁰Eeh, mwi atu mkuluphirao chidide mwi! Ichikala Mlungu anaweza kupamba nyasi ambazo rero mnazona na muhondo zinatyiwa moho, dze si zaidi mwi?
- ³¹Kpwa hivyo msikale na wasi-wasi wa kuamba, 'Hundayani na hundanwani? Wala hundavwalani?'
- ³²Mana gosi higo ni kuendzwa ni atu asiommanya Mlungu, ela Sowe yenu ariye mlunguni anamanya mnataka vitu hivyo.
- ³³Phahi, dzilavyeni kpwa Mlungu Mfalume wenu kpwandza na mhende haki na go ganjina gosi andakuenjerezani.
- ³⁴Phahi msidzitiye wasi-wasi kuhusu muhondo, mana muhondo indadzimanya yenye. Tabu za siku mwenga zinatocha kpwa siku hiyo."

Mathayo 7

- ¹"Msihukumu ayawenu, msedze mkahukumiwa ni Mlungu.
- ²Kpwa sababu mnavyohukumu ayawenu namwi mndahukumiwa vivyo. Na chipimo mpimiracho ayawenu, ndicho ndichopimirwa mwimwi.
- ³Kpwa utu wani unalola chifusi dzitsoni mwa myao, lakini kuona gongo zima ririro mwako dzitsoni?
- ⁴Unawezadze kumuamba myao, 'Hebu nikuuse chifusi mwako dzitsoni,' na kuno una gongo zima mwako dzitsoni?
- ⁵Mnafiki we! Andza kutuluza gongo ririro mwako dzitsoni, ndipho undaona vinono hata utuluze chifusi chiricho dzitsoni mwa myao.
- ⁶Msitsuphire madiya vitu vya Mlungu gasedze gakakung'atani. Piya msitsuphire nguluwe lulu zenu asedze akazivyoga-vyoga."
- ⁷"Voyani namwi mndahewa; endzani namwi mndaphaha; pigani hodi namwi mndavugurirwa.

- ⁸Mana avoyaye n'kuhewa, aendzaye nkuphaha, na apigaye hodi nkuvugurirwa.
- ⁹Ni yuphi kahi-kahi yenu ambaye mwanawe achim'voya bofulo, andamupha dziwe?
- ¹⁰Hebu achim'voya ng'onda andamupha nyoka?
- ¹¹Ichikala mwimwi achina-dambi, mnamanya kuapha ana enu vitu vinono, dze si zaidi Sowe yenu ariye mlunguni, iye nkuapha atu vitu vinono osi am'voyao.
- ¹²Vyo mlondavyo atu akuhendereni, namwi ahendereni dza vivyo. Mana higo ndigo mafundzo ga Shariya na Maandiko ga manabii.”
- ¹³"Mchilonda kuona uzima, humirani mryango mphutsu. Mana mryango uphiyao mohoni ni mpana na njiraye i wazi, nao ni anji aihumirao.
- ¹⁴Ela mryango wa kuinjirira uzimani ni mphutsu na njiraye si rahisi, nao aionao na kuigbwira ni achache.
- ¹⁵Dzimanyirireni na manabii a handzo edzao kpwenu kpwa upore dza mang'ondzi lakini mwao mioyoni ni mabawa masiru.
- ¹⁶Mndaamanya kpwa mahendo gao. Mdzangbweona muhi wa miya ukavyala zabibu, hebu mngololi ukavyala tende? Ng'o!
- ¹⁷Phahi, muhi mnono nkuvyala matunda manono, lakini muhi mui nkuvyala matunda mai.
- ¹⁸Muhi mnono tauweza kuvyala matunda mai, na muhi mui tauweza kuvyala matunda manono.
- ¹⁹Chila muhi usiovyalato nkukatwa, ukapigbwa maiyi na kutiywa moho.
- ²⁰Phahi, manabii a handzo mndaamanya kpwa mahendo gao.
- ²¹Si chila mmwenga aniihaye, 'Bwana, Bwana,' andakala mmwenga katika ufalume wangu, ela ni yuya atimizaye alondago Baba ariye mlunguni.
- ²²Siku hiyo ya hukumu anji andaniamba, 'Bwana, sino hwatabiri kpwa uwezoo, piya huchituluzo pepo na kuhenda vilinje vinji kpwa uwezoo!'
- ²³Nami n'ndaambira wazi-wazi, 'Sikumanyani tse. Niukirani hipha mwi atu ayi!'
- ²⁴Kpwa hivyo, chila mutu asikiraye higa maneno gangu na kugalunga andakala dza mutu wa marifwa yedzenga nyumbaye dzulu ya mwamba.
- ²⁵Phahi mvula iriphonya, miho yafurika, na phuto richiipiga hira nyumba. Lakini taiyagbwa mana kala ikadzengbwa dzulu ya mwamba.
- ²⁶Ela asikiraye maneno gangu na asigalunge andakala dza mutu mzuzu yedzenga nyumbaye difwirini.

²⁷Phahi mvula iriphonya, miho yafurika, na phuto richiipiga hira nyumba. Nayo ichigbwa na msindo mkpwulu sana.”

²⁸Jesu ariphomala kufundza mambo higa, atu osi aangalazwa ni mafundzoge,

²⁹mana wafundza dza mutu ariye na uwezo, wala si dza alimu ao a Shariya.

Mathayo 8

¹Jesu ariphomala kufundza, watsereera kula gambani, kuno kundi kulu ra atu kala rinamlunga-lunga.

²Phahi phakala na mutu mmwenga ambaye kala ana mahana. Mutu hiye wakpwezachita mavwindi mbere za Jesu achimuamba, "Bwana, uchimendza, unaweza kunitakasa.”

³Naye Jesu wagolosa mkpwonowe achimguta yuya mutu wa mahana, achimuamba, "Ehe! Nalonda, takasika." Saa iyo-iyo yuya mutu wa mahana achiphola.

⁴Chisha Jesu achimuamba, "Sikiza, usimuambire mutu yeyesi! Ela phiya ukadzionyese kpwa Mlavyadzi-sadaka, na ulavye sadaka dza viratu Musa arivyologiza, ili ukale ushahidi kpwa atu kala ukaphola kpweli.”

⁵Badaye, Jesu waphiya mudzi wa Kaperinaumu. Ariphokala anainjira mudzi hinyo, mkpwulu wa jeshi ra Chirumi wamlunga achim'voya amterye.

⁶Achiamba, "Bwana, mtumishi wangu arere hiko kaya kadziweza, analumwa sana mana ana ukongo wa kuphola vilungo.”

⁷Jesu achimuamba, "Haya nkasikira n'ndakpwedza nimphoze.”

⁸Lakini yuya mkpwulu wa jeshi wamuamba, "Bwana, sifwaha kukukaribisha mwangu nyumbani. Nakuvoya ugombe neno tu, na mtumishi wangu andaphola.

⁹Mana hata mimi ni tsini ya akulu angu, nami nina asikari ambao a tsini yangu. Nchimuamba mmwenga, 'Phiya phatu fulani!' Anaphiya; na wanjina nchimuamba, 'Ndzoo!' Aredza. Piya nchimuamba mtumishi wangu, 'Henda utu fulani!' Naye anahenda.”

¹⁰Jesu ariphomsikira, waangalala na achiaambira hara atu kala akamlunga achiamba, "Nakuambirani kpweli kukala sidzangbweona mutu ariye na imani dza ihi mumu tsi ya Iziraeli.

¹¹Nakuambirani kukala atu anji kula mlairo wa dzuwa na mtswerero wa dzuwa andakpwedza karamuni phamwenga na Brahimu, Isaka na Jakobo na atu osi ariotsambulwa ni Mlungu.

¹²Lakini o Aiziraeli ariotsambulwa ni Mlungu andatsuphiwa kondze jizani ambako andarira na kusaga meno.”

- ¹³Naye Jesu achimuamba yuya mkpwulu wa jeshi, "Phiya vyako, na indakala uchivyoamini." Naye mtumishiwe achiphola wakati uho.
- ¹⁴Jesu ariphofika nyumbani kpwa Petero, wakpwendakuta mtsedza mchetu wa Petero arere chitandani ana homa kali.
- ¹⁵Wamguta mkpwono yuya mchetu, na homa richiphola; achiunuka achiandza kumhumikira.
- ¹⁶Iriphofika dziloni wareherwa atu anji okala ana pepho; naye achiatuluza pepho kpwa uwezo wa nenore. Piya waphoza atu osi ambao kala ni akongo.
- ¹⁷Phahi gosi higa gahendeka ili ritimie rira neno ra Mlungu rogombwa ni nabii Isaya, roamba, "Wahuusira unyonje wehu na makongo gehu."
- ¹⁸Phahi Jesu ariphoona kukala kundi kulu ra atu rikamzunguluka, waambira anafundzie avuke ng'ambo ya ziya.
- ¹⁹Saa iyo-iyu mwalimu mmwenga wa Shariya waphiya kpwa Jesu achendamuamba, "Mwalimu, mino n'ndakulunga kokosi ndikophiya."
- ²⁰Jesu wamuamba, "Makala gaishi winani, na nyama a mapha ana nyumba zao, lakini mimi, Mutu Yela Mlunguni, sina phatu pha kuika mbavu."
- ²¹Mwanafundzi wanjina achimuamba, "Bwana, niricha kpwandza nkazike baba ndipho nedze nikulunge."
- ²²Ela Jesu achimuamba, "Nilunga na ariche atu ambao taamkuluphira Mlungu adzishugulishe na mambo dza higo."
- ²³Phahi Jesu ariphoinjira dauni, anafundzie amlunga.
- ²⁴Ariphokala anaphiya, kpwazuka phuto kali sana hiko ziyani, hata maimbi gachiandza kufwinika dau. Lakini wakati ganahendeka, Jesu kala arere.
- ²⁵Anafundzie akpwendamlamusa, kuno anaamba, "Bwana, hutivye, hunahoha!"
- ²⁶Naye achiaambira, "Mwi atu msioamini, mbona mu aoga?" Phahi waunuka na achidemurira rira phuto na go maimbi, nako kuchihurira hu.
- ²⁷Hara atu achiangalala, achiuzana, "Ni mutu wa viphi yuno ambaye anasikizwa hata ni phuto na maimbi?"
- ²⁸Ariphofika ng'ambo ya ziya, uphande wa jimbo ra Gadara, Jesu wakutana na atu airi ariotuluka kula vikurani. Atu hinyo ka akapagaliwa ni pepho na kala anatisha hata taphana ariyekubali kutsupira njira hiyo.
- ²⁹Nao achikota likululu achiamba, "Hukakukosani we Mwana wa Mlungu? Dze, ukedzahutesa kabla ya wakati kufika?"
- ³⁰Phephi na phapho kala phana chaa cha nguluwe anji chinarisa.

³¹Phahi hara pepho am'voya ruhusa Jesu achimuamba, "Ichikala undahulavya mirini mwa hinya atu, huinjize mura nguluweni."

³²Jesu achiaambira, "Haya phiyani." Hara pepho atuluka achendainjira hara nguluwe. Chaa chosi chatserera fuli mteremukoni, chichiinjira ziyani, na nguluwe osi achihoha.

³³Hara arisa a nguluwe ariphoona hivyo azola kuphiya mudzini, achendasema gosi chigohendeka na gara goaphaha hara atu okala akapagaliwa ni pepho.

³⁴Phahi atu a mudzi wosi akpwedza kpwa Jesu, na ariphomuona am'voya auke tsi yao.

Mathayo 9

¹Phahi Jesu wapanda dau achivuka ziya achiuya kpwao Kaperinaumu.

²Hipho atu amreha mutu yekala akaphola mwiri mzima, akamlaza chitandani. Naye Jesu ariphoona hara atu vira amuaminivyo, wamuamba yuya mkpwongo, "Usiogophe mwanangu! Mana ukasamehewa dambizo."

³Na alimu anjina a Shariya adziuza, "Mutu hiyu anakufuru Mlungu."

⁴Lakini Jesu wamanya maazo gao, achiauza, "Ni kpwa utu wani mnaaza mai mwenu mioyoni?"

⁵Ni riphi ra rahisi, ni kumuamba mutu, 'Ukasamehewa dambizo,' hebu ni kuamba, 'Unuka unyendeke?'

⁶Ela nalonda nikuonyeseni kukala mimi, Mutu Yela Mlunguni, nina uwezo himu duniani wa kusamehe dambi." Chisha achimuamba yuya mkpwongo, "Unuka, hala chitandacho uphiye kpwako kaya."

⁷Hiye mkpwongo waunuka, achiphiya kaya.

⁸Hara atu ariphoona gara, aangalala na achitishirwa. Achimtogola Mlungu yemupha mwanadamu uwezo dza hinyo.

⁹Jesu ariphokala anaphiya vyakpwe wamuona karani wa kodi aihwaye Mathayo, asegere phakpwe ofisini, achimuamba, "Nilunga." Mathayo waunuka achimlunga.

¹⁰Badaye, Jesu na anafundzie aphiya nyumbani kpwa Mathayo, kpwendarya. Na ariphokala asegere anarya, makarani ga kodi na atu anjina anji ariokala achiharirwa kukala ni achina-dambi akpwezarya phamwenga nao.

¹¹Mafarisayo ariphoona hivyo, achiauza anafundzie, "Mbona mwalimu wenu anarya phamwenga na makarani ga kodi na achina-dambi anjina?"

¹²Lakini Jesu ariphosikira, waamba, "Azima taana haja ya mganga, ela akongo ndio ario na haja ya mganga.

- ¹³Haya dzibazeni mafundzo higa ga Mlungu gaambago, 'Nilondacho ni atu akale na mbazi wala si kunipha sadaka bahi.' Mana siyakpwezaiha atu adzionao ana haki, ela nákpwezaiha achina-dambi."
- ¹⁴Alafu anafundzi anjina a Johana akpwedza kpwa Jesu, achimuamba, "Sisi na Mafarisayo hukufunga, kpwa utu wani anafundzio taafunga?"
- ¹⁵Jesu achiamba, "Dze, ajeni a harusini nkukala na sonono wakati bwana arusi a phamwenga nao? Hata! Ela wakati uredza ambapho bwana arusi andauswa asikale phamwenga nao. Hinyo ndio wakati ndiphofunga.
- ¹⁶Tsona, takuna ariyeshona chiraka chiphya nguwo ya kare, mana hicho chiraka chichiandza kuuyirana, hiyo nguwo ya kare indazidi kuahuka.
- ¹⁷Wala uchi muphya tauweza kutiywa viriba vya kare; mana hivyo viriba vindaahuka, uchi umwagike na vyo viriba vindakala tavina mana. Ela uchi muphya utiywa viriba viphya ili uchi na viriba visibanangike."
- ¹⁸Jesu ariphokala acheregomba nao, phatsoloka chilongozi mmwenga wa sinagogi achilavya ishima mbereze, achimuamba, "Mwanangu mchetu akadosa roho visambi-sambi, ela uchedzam'bandikira mkpwonoo, andafufuka."
- ¹⁹Phahi Jesu waunuka achiphya naye, nao anafundzie achimlunga.
- ²⁰Ariphokala charoni, mchetu mmwenga, ambaye kala ni mkpwongo wa mruwo kpwa miaka kumi na miiri, wamlunga Jesu nyuma achiguta mutse wa nguwoye.
- ²¹Mana kala akagomba mwakpwe moyoni, "Nichiguta nguwoye tu, n'ndaphola."
- ²²Phahi ariphoguta o mutse wa nguwo, Jesu wagaluka, na ariphomuona yuya mchetu wamuamba, "Dziphe moyo, mayo, kpwa sababu ya kunikuluphira, ukaphola." Mchetu hiye achiphola saa iyo-iyo.
- ²³Alafu Jesu wafika kaya kpwa yuya chilongozi wa Chiyahudi achiinjira nyumbani. Ariphoona apigadzi ngoma za hanga na atu anji anarira kpwa sonono,
- ²⁴achiaamba, "Ukani hipha! Mana hiyu msichana kafwere, arere tu." Lakini hara atu achimtseka.
- ²⁵Phahi atu osi ariphotuluzwa kondze, Jesu wainjira ndani, achendamgbwira mkpwono yuya msichana, naye achiunuka.
- ²⁶Nazo habari hizi zagota lalo zima.
- ²⁷Jesu waphiya vyakpwe na himo njirani walungbwa-lungbwa ni vipofu airi ariokala anakota likululu kumuamba, "Mwana wa Daudi, huonere mbazi!"
- ²⁸Jesu ariphoinjira nyumbani, hara vipofu airi amlunga ko ndani, naye Jesu achiauza, "Dze, mnaamini kukala nina uwezo wa kukuphozani?" Nao achiamba, "Ehe, Bwana."

- ²⁹Ndipho Jesu achiaguta matso, kuno anaamba, "Navikale kulengana na kuamini kpwenu."
- ³⁰Matso gao gavuguka achiona. Jesu waakahaza kpwa usiru, "Msimuambire mutu yeyesi dzambo hiri!"
- ³¹Lakini o auka na achendagoteza habari za Jesu tsi ndzima.
- ³²Hara atu airi ariphokala anauka, atu anjina amreha mutu yekala bwibwi mana kala akapagaliwa ni pepho.
- ³³Phahi Jesu wamtuluzza yuya pepho, naye yuya bwibwi achiandza kugomba. Atu anji aangalala, achiamba, "Dzambo dza hiri tahudzangbweriona kuku Iziraeli."
- ³⁴Ela Mafarisayo achiamba, "Anatuluza pepho kpwa uwezo wa mkpwulu wa pepho."
- ³⁵Jesu wanyendeka midzi na vidzidzi vyosi vya seemu hiyo. Wakala achifundza ndani ya sinagogi na kutangaza habari ndzuri kuhusu utawala wa Mlungu, kuno anaphoza chila aina ya makongo na unyonje.
- ³⁶Phahi ariphoona atu makundi makundi, waaonera mbazi kpwa sababu kala ana wasi-wasi na kala taana mutu wa kuaterya dza mang'ondzi gasigo na mrisa.
- ³⁷Chisha achiaambira anafundzie, "Mavuno ni manji ela avunadzi ni achache.
- ³⁸Phahi, m'voyeni Mlungu, Bwana mchina-munda, ahume ahendadzi-kazi zaidi edze avune mwakpwe mndani."

Mathayo 10

- ¹Jesu waiha anafundzie kumi na airi achiapha uwezo wa kutuluza pepho, na kuphoza chila aina ya makongo na unyonje.
- ²Higa ndigo madzina ga hara mitume kumi na airi. Kpwandza ni Simoni, ambaye dzina ranjina ni Petero, na nduguye Anderea; Jakobo mwanangbwa wa Zebedayo, na nduguye Johana;
- ³Filipu na Batholomayo; Tomasi na Mathayo yekala karani wa kodi; Jakobo mwana wa Alfayo, na Thadayo;
- ⁴Simoni ambaye piya ka achihiwa "Mpiganiadzi Uhuru", na Juda Iskarioti ambaye mwisho wamsalata Jesu.
- ⁵Jesu waahuma hara anafundzie kumi na airi, achialagiza achiamba, "Msiphiye majimbo ga atu asiokala Ayahudi, wala msiinjire midzi ya Asamariya,
- ⁶ela phiyani kpwa atu a Iziraeli, arioangamika dza mang'ondzi.
- ⁷Mphiyapho tangazirani atu hivi, 'Mfalume yela kpwa Mlungu a phephi kpwedzatawala atue.'

- ⁸Kaphozeni akongo a mahana na akongo anjina, kafufuleni ariofwa, na kutuluza pepho. Mwachewa bure kpwa hivyo kalavyeni bure.
- ⁹Wakati mnaphiya msihale pesa yoyosi,
- ¹⁰mkoba, nguwo yanjina, virahu vyanjina wala bakora. Mana mhendadzi-kazi n'lazima ahewe poshoye.
- ¹¹Chila muinjirapho mudzi ama chidzidzi, endzani ndiyekukaribishani msagale naye hadi ndiphouka.
- ¹²Muinjirapho nyumbani mwa enyezi enu, alamuseni.
- ¹³Na ichikala achina-nyumba hiyo anafwaha, phahi amani yenu naikale phamwenga nao. Ela ichikala taafwaha, phahi amani yenu mndauka nayo.
- ¹⁴Mchikosa mutu wa kukukaribishani hebu wa kukusikizani, tulukani nyumba au mudzi hinyo. Wakati mnatuluka, kukutani vumbi ra mwenu maguluni kuaonyesa kala akahenda makosa kpwa kusakusikizani.
- ¹⁵Nakuambirani kpweli kukala, siku ya hukumu atu a mudzi hinyo andatiywa adabu kali kuriko hira ndiyophaha atu a midzi ya Sodoma na Gomora.”
- ¹⁶"Sikizani! Nakuhumani mphiye, namwi mndakala dza mang'odzi gaphiyago kahi ya mabawa. Kpwa hivyo kalani erevu dza tsungula na apole dza njija.
- ¹⁷Dzimanyirireni na atu dza hinyo, mana andakuphirikani mkashitakiwe mbere ya vilongozi a chidini, na andakuchapani viboko ndani ya masinagogi gao.
- ¹⁸Namwi mndagbwirwa mphirikpwe mbere za atawala na afalume kpwa sababu yangu, ili mphahe kunishuhudiya kpwa atu hinyo na atu asio Ayahudi.
- ¹⁹Na mnaphogbwirwa na kuphirikpwa mbere zao, msitange-tange ra kpwendagomba wala ndivyogomba. Gosi ga kugomba mndahewa wakati uchifika.
- ²⁰Kpwa sababu si mwimwi mndiogomba, ela Roho wa Sowe yenu ariye mwenu mioyoni.
- ²¹Mutu andafyakatsira nduguye aolagbwe, baba andamfyakatsira mwanawe, nao ana andaagalukira avyazi ao aafyakatsire ili aolagbwe.
- ²²Atu osi andakuzirani kpwa sababu yangu. Lakini ndiyevumirira hadi mwisho andaokolwa.
- ²³Mchiteswa ni atu a mudzi mmwenga, ukani mphiye mudzi wanjina. Mana nakuambirani kpweli tamdamala midzi yosi ya Iziraeli kabla ya mimi, Mutu Yela Mlunguni, kuuya.
- ²⁴Mwanafundzi kashinda mwalimuwe, wala mtumishi kushinda tajiriwe.

- ²⁵Phahi mwanafundzi naatosheke kukala dza mwalimuwe, na mtumishi dza tajiriwe. Ichikala mkpwulu wa nyumba anaihwa Belizebuli, dze hara atue, taandaihwa na madzina mai zaidi?"
- ²⁶"Kpwa hivyo msiaogophe atu, mana takuna chochosi chofwitsika ambacho tachindamanyikana wazi, wala takuna dzambo ra siri ambaro tarindamanyikana.
- ²⁷Mambo ninagokuambirani jizani gagombeni mutsi, na muambirwago pokopoko gatangazeni mbere za atu.
- ²⁸Msiogophe atu, kpwa sababu atu nkuolaga mwiri bahi lakini taaweza kuolaga roho. Baha kumuogopha Mlungu awezaye kubananga mwiri phamwenga na roho mohoni.
- ²⁹Mnamanya kala mberya airi anaguzwa pesa chache. Ela takuna hata mberya mmwenga awezaye kufwa bila ya ruhusa ya Sowe yenu.
- ³⁰⁻³¹Hata nyere zenu za vitswani zosi Mlungu anazimanya isabuye. Phahi, msiogophe, mana mwimwi mna samani zaidi kuriko mberya anji!
- ³²Yeyesi ndiyedzimanyisa wazi mbere za atu kala ni mfuasi wangu, nami piya n'ndamkubali mbere za Baba ariye mlunguni.
- ³³Lakini ndiyenitsamalala mbere za atu, nami piya n'ndamtsamalala mbere za Baba ariye mlunguni.
- ³⁴Msione kukala nákpwedzahenda atu aelewane himu duniani. Sedzerereha maelewano, ela nákpwedzareha kondo.
- ³⁵Mana nákpwedzatanya mutu na ise, mwana mchetu na nine, na mkpwaza-mwana na nine vyala.
- ³⁶Atu a mwako nyumbani andakala maaduigo.
- ³⁷Mutu amendzaye ise ama nine zaidi kuriko mimi kafwaha kukala mwanafundzi wangu. Amendzaye mwanawe zaidi kuriko mimi kafwaha kukala mwanafundzi wangu.
- ³⁸Tsona asiyekala tayari kugaya na kunilunga, kafwaha kukala mfuasi wangu.
- ³⁹Mutu amendzaye maishage himu duniani andaangamiza maishage ga milele, ela aangamizaye maishage ga himu duniani kpwa sababu yangu, andagaokola."
- ⁴⁰"Ndiyekuphokerani ananiphokera mimi, na aniphokeraye, anamphokera hiye ariyenihuma.
- ⁴¹Aphokeraye nabii kpwa kukala anamanya mjeni hiye ni nabii, andaphokera tuzo ra nabii. Aphokeraye mutu wa haki kpwa kukala anammanya ni mutu wa haki, andaphokera tuzo ra mutu wa haki.

⁴²Mutu ndiyemupha angaa chikombe cha madzi ga kunwa mmwengawapho wa afuasi hinya ambao si muhimu, ela kpwa sababu ni mfuasi wangu, nakuambirani kpweli andatuzwa."

Mathayo 11

¹Jesu ariphomala kulagiza anafundzie kumi na airi, wauka achendafundza na kutangazira atu a midzi yanjina ya Galilaya ujumbewe.

²Phahi, wakati hinyo Johana kala a jela. Aripfosikira mambo gahendwago ni Jesu, wahuma anafundzie

³akamuuze, "Dze, we ndiwe hiye Muokoli ugodzerwaye, hebu hugodze mutu wanjina?"

⁴Na Jesu achiaamba, "Phiyani mkamsemurire Johana mchigogasikira na kugaona:

⁵Vipofu anaona, viswere ananyendeka, akongo a mahana anaphozwa, masito anasikira, atu a kufwa anafufulwa, na achiya anasemurirwa habari ndzuri kula kpwa Mlungu.

⁶Tsona muambireni kukala mutu yeyesi asiye na wasi-wasi nami waajaliwa."

⁷Anafundzi a Johana ariphokala anauka, Jesu wagomba na rira kundi ra atu kuhusu Johana, achiamba, "Mriphophiya weruni kpwendamsikiza Johana, mwaona myaonani? Dze, mwakpwendalola nyasi zifwihavyo na phuto?

⁸Ichikala si hivyo, sambu ka mchalolani? Hebu ka mchalola mutu wa kuvwala nguwo ndzuri? Hata! Atu avwalao nguwo nono akala madzumba ga chifalume.

⁹Haya niambirani, kala mchalolani? Kala mchalola nabii? Ehe! Ni kpweli kabisa, tsona nakuambirani iye ni zaidi ya nabii.

¹⁰Hiye ndiye ambaye neno ra Mlungu raandikpwa kumhusu, Mlungu phoamba, 'N'ndatanguliza mhumwa wangu mberezo, ambaye andakutengezera njirayo.'

¹¹Nakuambirani kpweli kukala, takudzangbwetsembuka mutu kahi ya anadamu osi ariye muhimu kuriko Johana M'batizadzi. Lakini mutu yeyesi ariye mfuasi wangu, hata yuya wa tsini kabisa, ni muhimu zaidi kuriko Johana.

¹²Hangu Johana M'batizadzi aandze kusemurira neno ra Mlungu na kubatiza atu hadi sambu, ujumbe kuhusu utawala wa Mlungu unapingbwa sana na hinyo apinzani anahenda bidii ya kuwaangamiza.

¹³Mana kabla ya Johana kpwedza, manabii osi na Shariya za Musa zatabiri kuhusu wakati hinyu.

¹⁴Na ichikala mndakubali, phahi Johana ndiye Elija yetabiriwa ni manabii kukala andauya.

¹⁵Ariye na masikiro, naasikire!

¹⁶Lakini n'ndaafananisha na chitu chani atu a siku hizi? Aho ni dza anache asegero cheteni analaumu kundi ranjina:

¹⁷'Hwakupigirani ngoma za arusi, lakini tamfwihire. Huchikupigirani ngoma ya chifudu, ela tamyasononeka.'

¹⁸Johana ariphokpwedza, wafunga na kanwere uchi, na atu kala achimuamba, 'Pepho zamtiya koma.'

¹⁹Nriphokpwedza mimi, Mutu Yela Mlunguni, narya na kunwa, nao atu ananiamba, 'Mloleni, hiye mroho na mlevi, msena wa makarani ga kodi na achina-dambi anjina!' Lakini ikima ya Mlungu nkuhakikishwa kala ni kpweli kpwa mahendo ga atue."

²⁰Phahi Jesu waandza kulaumu atu a midzi ambayo wahenda vilinje vinji, kpwa sababu taayatubu dambi zao.

²¹Achiamba, "Shaka hiro, mwi atu a midzi ya Korazini na Bethisaida! Mana kala vilinje vyohendwa kpwenu, vyahenderwa atu a midzi ya Tiro na Sidoni, atue angekala atubu chitambo, akavwala magunia na kudzipaka ivu kuonyesa akatubu.

²²Ela nakuambirani kukala siku ya hukumu mwimwi mndaphaha hukumu kali kuriko ya atu a Tiro na Sidoni.

²³Na mwimwi atu a Kaperinaumu, dze mndadzikarya hadi mfike mlunguni? Hata! Mndatserezwa hadi kuzimu, mana kalapho vilinje vyohenderwa mwimwi vyahendwa mudzi wa Sodoma, phahi mudzi hinyo ungekala uchereko.

²⁴Lakini nakuambirani kukala siku ya hukumu Mlungu andaatiya adabu kali zaidi kuriko atu a Sodoma."

²⁵Wakati hinyo Jesu waamba, "Baba Mlungu, Bwana wa dzulu mlunguni na duniani, nakushukuru kpwa sababu waafwitsa atu a ilimu na marifwa mambo higa na uchiang'azira atu akuluphirao dza anache.

²⁶Eeh, ni sawa Baba, mana hivyo ndivyo vyokuhamira.

²⁷Baba wanipha uwezo wa mambo gosi. Takuna animanyaye mimi Mwana isiphokala Baba, wala takuna ammanyaye Baba Mlungu isiphokala Mwana na mutu yeyesi ambaye Mwana nkutsambula kumfwenurira.

²⁸Ndzoni kpwangu mwimwi mosi mgayao na kuremererwa ni mizigo miziho, nami n'ndakuoyezani.

²⁹Gbwirani mzigo wangu na mdzifundze kula kpwangu; mana mimi ni mpole na wa mbazi, namwi roho zenu zindaoya.

³⁰Mana mafundzo gangu ga rahisi, na mzigo wangu tauremera."

Mathayo 12

- ¹Wakati uho, Jesu na anafundzie atsapira minda ya nganu Siku ya Kuoya. Phahi hara anafundzie kala ana ndzala na achikala anakata masuche ga nganu, achigaphulula na kurya.
- ²Lakini Mafarisayo ariphoona gara gahendekago amuamba Jesu, "Lola! Anafundzio anahenda dzambo ambaro si shariya kpwehu sisi Ayahudi kuhenda Siku ya Kuoya."
- ³Jesu achiauza, "Kale tamdzangbwesoma arivyohenda Mfalume Daudi na ayae ariphosikira ndzala?"
- ⁴Wainjira hema ra kumuabudu Mlungu achendarya mabofulo gotengbwa kpwa kazi ya Mlungu. Chishariya, iye na ayae kala taaruhusiwa kugarya isiphokala alavyadzi-sadaka bahi.
- ⁵Hebu tamdzangbwesoma kukala alavyadzi-sadaka nkuhenda kazi ndani ya Nyumba ya Kuvoya Mlungu Siku ya Kuoya? Wakati anahenda hivyo nkukala anavundza shariya, ela taayaisabiwa kukala na makosa.
- ⁶Phahi nakuambirani kukala hipha phana mkpwulu kuriko Nyumba ya Kuvoya Mlungu.
- ⁷Kala mnamanya mana ya Maandiko higa gaambago, 'Nilondacho ni atu akale na mbazi wala si kunipha sadaka bahi,' msingeahukumu asio na makosa.
- ⁸Mana mimi, Mutu Yela Mlunguni, nina uwezo wa mambo gosi ga Siku ya Kuoya."
- ⁹Chisha Jesu wauka hipho na achendainjira sinagogi ra nyo Mafarisayo.
- ¹⁰Himo ndani kala mna mutu wa kufuwa mkpwono. Na kpwakukala hara Mafarisayo kala anaenda chizigbwa cha kumshitakira Jesu, amuuza, "Dze, ni shariya kuphoza mutu Siku ya Kuoya?"
- ¹¹Ela Jesu achiauza, "Ni ani kahi yenu ambaye ng'ondzire richigbwa dibwani Siku ya Kuoya karituluza?"
- ¹²Sambi ni yuphi ariye na mana zaidi, mutu hebu ng'ondzi? Phahi ni shariya kumhendera mutu mambo manono Siku ya Kuoya."
- ¹³Chisha wamuamba yuya mutu, "Golosa mkpwonoo." Naye achiugolosa uchikala mzima dza hura wanjina.
- ¹⁴Hipho Mafarisayo atuluka kondze na achendapanga njama ya kumuolaga.
- ¹⁵Ela ye wamanya mipango yao na achiuka hipho. Atu anji amlunga-lunga naye achiphoza atu osi ariokala akongo;
- ¹⁶chisha achiaonya asimuambire mutu yeyesi kumhusu.
- ¹⁷Phahi wahenda hivi ili ritimie rira neno ra Mlungu rogombwa ni nabii Isaya:

- ¹⁸"Lolani mtumishi wangu yemtsambula, nammendza sana na moyo wangu unahamirwa kpweli-kpweli. Naye n'ndamupha Roho wangu, na andatangaza hukumu ya haki kpwa mataifa gosi.
- ¹⁹Kandalumbana na mutu wala kuakotera likululu, tsona kandatanga na hoyo barabarani.
- ²⁰Kandaavundza mioyo anyonje au asio na nguvu, hadi ndiphohenda haki itawale;
- ²¹na atu asio Ayahudi andamkuluphira."
- ²²Phahi, Jesu wareherwa mutu yekala na pepho zomhenda chipofu na bwibwi. Achimphoza hata achiandza kugomba na kuona.
- ²³Atu osi okala hipho aangelala, achiamba, "Dze, akale yuno ndiye Mwana wa Daudi?"
- ²⁴Ela Mafarisayo ariphosikira swali hiro, aamba, "Mutu hiyu anatuluza pepho kpwa uwezo wa Shetani, mkpwulu wa pepho."
- ²⁵Jesu wamanya maazo gao, ndipho achiaambira, "Tsi yoyosi ambayo vilongozie anapingana, tsi hiyo taindadumu, tsona mudzi wowosi ama nyumba iganyanayo makundi kupingana, nkutsamuka.
- ²⁶Ichikala Shetani anadzituluza mwenye, hino inaonyesa kukala ufalumewe unadziganya. Phahi kpwa kpweli ufalume hinyo taundaweza kudumu.
- ²⁷Sambi mino ichikala ninatuluza pepho kpwa uwezo wa Shetani, mkpwulu wa pepho osi, dze afuasi enu nkutuluza pepho kpwa uwezo wa ani? Phahi afuasi enu anakuonani kala mna makosa.
- ²⁸Lakini kpwa kukala ninatuluza pepho kpwa uwezo wa Roho wa Mlungu, phahi manyani kukala mtawala wa ufalume wa Mlungu akedza kpwenu.
- ²⁹Hebu, mutu anawezadze kuinjira nyumba ya mutu wa mkpwotse ili amfute malize, bila ya kumfunga mikowa kpwandza? Mana hipho ndipho ndophaha nafwasi ya kumfuta malize.
- ³⁰Yuya ambaye ka uphande wangu, manyani ananipinga; na hiye ambaye tahukusanya phamwenga, manyani anatsamula.
- ³¹Kpwa hivyo nakuambirani, atu andasamehewa chila dambi na kufuru, lakini yeyesi ndiyekufuru Roho wa Mlungu kandasamehewa bii!
- ³²Piya, yeyesi ndiyegomba maneno kunipinga mimi, Mutu Yela Mlunguni, andasamehewa; ela ndiyegomba maneno kumpinga Roho wa Mlungu kandasamehewa, hipha sambu na wakati wedzao."

- ³³Jesu achienderera kugomba, achiamba, "Mchiroroma muhi vinono mndaphaha matunda manono, ela msiphouroroma vinono, mndaphaha matunda mai. Mana muhi nkumanyikana kpwa matundage.
- ³⁴Mwi ana a nyoka! Mnawezadze kugomba manono ichikala mwi enye mu ayi? Mana mutu nkugomba gachigoodzala mwakpwe moyoni.
- ³⁵Mutu mnono nkutuluza manono kula kpwa akibaye nono na mutu mui nkutuluza mai kula kpwa akibaye mbii.
- ³⁶Phahi nakuambirani kukala siku ya hukumu atu andalazimika kueleza kuhusu chila neno risirofwaha arirogomba.
- ³⁷Mana manenogo manono gandakuhenda uhukumiwe kukala wa haki, na manenogo mai gandakuhenda uhukumiwe kala una makosa."
- ³⁸Chisha alimu anjina a Shariya na Mafarisayo anjina amuamba Jesu, "Mwalimu hunalonda huone dalili ya chilinje kula kpwako kuonyesa uwezoo."
- ³⁹Lakini achiaambira, "Mwi chivyazi cha atu ayi msiokala aaminifu! Mnalonda dalili! Hata! Tamndaonyeswa isiphokala iratu yohenderwa nabii Jona.
- ⁴⁰Mana viratu Jona arivyokala siku tahu, usiku na mutsi, ndani ya uhumbo wa dzing'onda kulu; ndivyo piya mimi, Mutu Yela Mlunguni, n'ndakala kuzimu siku tahu.
- ⁴¹Siku ya hukumu atu a Ninawi andaima phamwenga na atu a chivyazi hichi, nao andachishitaki kpwa makosa gao. Mana atu a Ninawi atubu dambi zao kpwa sababu ya mahubiri ga Jona, lakini sambu, mimi n'riye hipha ni mkpwulu kuriko Jona.
- ⁴²Vivyo hivyo siku hiyo, malikia wa kula tsi ya Mwakani andaima phamwenga na atu a chivyazi hichi, naye andachishitaki kpwa makosa gao. Mana wala mwisho wa dunia kpwedzasikiza maneno ga marifwa ga Selemani, lakini sambu, mimi n'riye hipha ni mkpwulu kuriko Selemani, namwi tamnisikiza."
- ⁴³Jesu waenderera kugomba achiamba, "Pepho achimtuluka mutu, nkuphiya weruni achaenda phahali pha kuoya. Ela asiphophaha,
- ⁴⁴nkudziamba, 'N'ndauya kpwangu nyumbani kpwa kare n'rikokala.' Phahi achedzakuta phara phatu ni phahuphu, phaphyerwa na chila chitu chaikpwato,
- ⁴⁵chisha nkuphiya achahala pepho ayae sabaa ayi zaidi kuriko iye, na achamuinjira yuya mutu na akaishi himo. Hipho, hali ya yuya mutu nkukala mbii zaidi kuriko hira ya mwandzo. Na hivyo ndivyo ndivyokala atu a chivyazi hichi chii."
- ⁴⁶Na ariphokala acheregomba na hara atu, nine na nduguze a chilume akpwezaima kondze, mana kala analonda kubisha naye.

⁴⁷Phahi mutu fulani ariyekala hipho wamuamba Jesu, "Bwana! Mayoo na enenu aimire kondze analonda kubisha nawe."

⁴⁸Lakini wamuamba yuya mutu, "Mayo ni ani? Na enehu ni aphi?"

⁴⁹Phahi waoloha anafundzie, na achiamba, "Lolani, hinya ndio mayo na enehu!"

⁵⁰Mana yeyesi ahendaye alondago Baba ariye mlunguni, ndiye mwenu na mayo."

Mathayo 13

¹Siku hiyo hiyo, Jesu watuluka himo nyumbani na achiphiya ufuwo wa ziya ra Galilaya, ambako wakpwendasagala achifundza atu.

²Sambi kpwa vira umati mkpwulu kala ukamzunguluka, wapanda dauni achisagala. Nao atu osi achiima ufuwo wa ziya.

³Naye achiaambira mambo manji kpwa kuhumira ndarira. "Sikizani! Mkurima mmwenga waphiya kpwakpwe mndani kpwendakumbira mbeyuze.

⁴Ariphokala anakumbira, mbeyu zanjina zagbwa njirani, zichitsotwa ni nyama a mapha.

⁵Mbeyu zanjina zagbwa dzulu ya mawe kokala na mtsanga mchache. Zichimera upesi, kpwa sababu mtsanga kala sio munji.

⁶Lakini kuriphokala na dzuwa kali, hira mimea yanyala, ichifwa kpwa vira miziye kala i dzulu-dzulu.

⁷Mbeyu zanjina zagbwa zichimera phamwenga na mbeyu za miya. Phokala zinakula, miya nayo yakula, hipho, hira mimea ichilingbwa-lingbwa ni hira miya.

⁸Zanjina zagbwa mtsanga wa nguvu, zichikulato na zichivyala masuche ga tembe salasini, ganjina ga tembe sitini na ganjina hata ga tembe gana."

⁹Chimarigizo Jesu waamba, "Ariye na masikiro, naasikire!"

¹⁰Chisha anafundzi aphiya kpwa Jesu na achendamuuza, "Kpwa utu wani uchigomba na atu hinyo unahumira ndarira?"

¹¹Achiaambira, "Mwimwi mwaajaliwa kumanya siri za ufalume ambao Mlungu wanipha, lakini hano ayawenu taayaajaliwa.

¹²Mana yeyesi asikiraye ujumbe kuhusu ufalume wangu na aukubali, Mlungu andamjaliya zaidi; ela asikiraye ujumbe huno na aureme, andaangamiza chila chitu, hata cho chidide aricho nacho.

¹³Ndiyo mana nagomba nao na ndarira, kpwa sababu ana matso lakini taaona, ana masikiro ela taasikira, wala taaelewa.

¹⁴Nao utabiri wa nabii Isaya unatimia, uambao: 'Atu hano andakala anasikiza, lakini taandaelewa, na andakala analola lakini taandaona.

- ¹⁵Mana achili zao tazigbwira mafundzo, aziba masikiro na achifwinya matso gao. Asingehenda hivyo angekala aona na matso, angesikira na masikiro gao, angeelewa na achili zao na kunigalukira, phahi nami ningeaphoza.'
- ¹⁶Lakini matso na masikiro genu gaajaliwa, mana ganaona na kusikira.
- ¹⁷Nakuambirani kpweli kukala manabii anji na atu a haki anji aaza kuona mgaonago mwimwi lakini taagaonere, piya achiaza kusikira higa msikirago mwimwi ela taayagasikira."
- ¹⁸"Phahi, sikizani mana ya ndarira ya mkurima.
- ¹⁹Mutu asikirapho ujumbe kunihusu na asiuelewe, ni kukala Shetani akedza akahala chira chichophandwa mwakpwe moyoni; hinyu ni mfwano wa mbeyu yogbwa njirani.
- ²⁰Mbeyu iriyogbwa dzulu ya mawe kokala na mtsanga mchache ni dza mutu asikiraye ujumbe na mara mwenga akauphokera na raha.
- ²¹Lakini neno hiro tarimenya ndani, mana mutu hiyu nkurigbwira kpwa muda tu. Tabu na mateso ganaphozuka kpwa sababu ya hiro neno, nkuricha kuamini mara mwenga.
- ²²Zira mbeyu zirizogbwa kpwenye miya ni mfwano wa mutu asikiraye neno, lakini mambo ga dunia, na tamaa za mali nkpwedzalinga-linga rira neno hata rikakala tarivyala.
- ²³Zira mbeyu zogbwa mtsanga wa nguvu, ni mfwano wa mutu asikiraye neno chisha akarielewa. Naye nkuvyala matunda, dza viratu mbeyu vyovyala masuche ga tembe gana, ganjina tembe sitini na ganjina salasini."
- ²⁴Jesu waambira atu ndarira yanjina, achiamba, "Ufalume ambao Mlungu wanipha unaelezwa ni ndarira hino. Mutu mmwenga waphanda mbeyu nono mwakpwe mndani.
- ²⁵Usiku mmwenga, wakati chila mmwenga kala arere, kpwakpwedza adui wa yuya mutu achedzaphanda mbondo mo murimo na nganu na achiphiya vyakpwe.
- ²⁶Phahi nganu iriphokula na kuandza kulavya masuche, mbondo nazo zaandza kuonekana.
- ²⁷Atumwa a yuya mchina-munda aphiya kpwakpwe, achendamuamba, 'Bwana, hwakuphandira mbeyu nono mura mndani, vino zira mbondo zalaphi?'
- ²⁸Yuya mchina-munda achiamba, 'Hiye yehenda hivyo ni adui.' Alafu hara atumwa achimuamba, 'Dze, hukazing'ole?'
- ²⁹Naye achiaambira, 'Hata, msihende hivyo, mana mng'olapho mbondo mnaweza kung'ola nganu piya.

- ³⁰Ziricheni zikule phamwenga na nganu hadi wakati wa kuvuna. Alafu n'ndaambira ahendadzi-kazi akusanye mbondo azifunge mabutsa mabutsa na azitiye moho, ndipho ahale hira nganu ayiike chitsagani mwangu.' "
- ³¹Jesu waambira atu ndarira yanjina, achiamba, "Ufalume ambao Mlungu wanipha ni dza tembe ya mgandi, ambayo mutu mmwenga waitsupha mwakpwe mndani.
- ³²Hata dzagbwe tembe yenye ni ndide kuriko mbeyu zosi, lakini ichimera inakala muhi mkpwulu sana, hata nyama a mapha akadzenga nyumba zao dzulu ya zira pandaze."
- ³³Jesu piya wahumira ndarira hino kuambira atu kukala, "Ufalume ambao Mlungu wanipha ni dza amira chache ambayo mchetu waitiya unгани, na unga wosi pishi tahu uchiumuka."
- ³⁴Jesu wagomba na umati wa atu mambo higa gosi kpwa kuhumira ndarira. Nako takuna neno hata mwenga arirogomba bila kuhumira ndarira.
- ³⁵Higa gahendesa Maandiko gatimie gaambago: "N'ndagomba namwi kpwa kuhumira ndarira. N'ndaeleza mambo garigofwitswa hangu dunia iriphoubwa."
- ³⁶Jesu ariphorichana na rira kundi ra atu, wainjira nyumbani. Chisha anafundzie achedzamuamba, "Tafadhali huambire mana ya mbondo himo mndani."
- ³⁷Phahi Jesu waambira, "Mkurima yephanda zira mbeyu nono ni mimi, Mutu Yela Mlunguni.
- ³⁸Nao munda ni dunia, nazo zira mbeyu nono ni hara amkuluphirao Muokoli yela kpwa Mlungu; mbondo nazo ni hara alongozwao ni Shetani.
- ³⁹Yuya adui ariyephanda mbondo ni Shetani. Mavuno ni wakati wa mwisho wa dunia, nao avunadzi ni malaika.
- ⁴⁰Viratu mbondo ikusanywavyo na kutiywa moho, ndivyo ndokala siku ya mwisho.
- ⁴¹Mimi, Mutu Yela Mlunguni, ndiphouya kutawala dza mfalume n'ndahuma malaika angu, akusanye kula ufalume wangu osi ariohenda dambi na osi ariosababisha anjina kuhenda dambi.
- ⁴²Nao andatsuphiwa ziya ra moho, ambako andarira na kusaga meno.
- ⁴³Ela hinyo a haki andang'ala dza dzuwa katika ufalume wa Ise yao. Ariye na masikiro, naasikire!"
- ⁴⁴"N'ndakuelezani vira ambavyo mutu anaweza kukubali ukpweli kunihusu na kukala mmwenga katika ufalume ambao Mlungu wanipha. Mutu mmwenga waona amana yokala ikafwitswa mndani, na achiona baha aifwitse zaidi. Na kpwa raha ariyokala nayo wakpwendaguza chila chitu arichokala nacho, achedzagula hura munda.

⁴⁵Tsona, utawala wa Mlungu unafananishwa na mutu mmwenga yekala anahenda bishara ya mawe ga samani.

⁴⁶Siku mwenga wakpwendaona dziwe ra samani kulu sana. Phahi, wauya achendaguza chila chitu arichokala nacho, achedzarigula rira dziwe!"

⁴⁷"Chisha, ufalume ambao Mlungu wanipha unaelezwa ni ndarira hino. Avuvi akpwendahega chimia madzini na achigbwira ng'onda a aina zosi.

⁴⁸Chira chimia chiriphoozala ng'onda, avuvi achivweha kondze na achiandza kutsambula ng'onda anono, achiatiya tengani, na hara asiofwaha achiatsupha.

⁴⁹Phahi, hivyo ndivyo ndokala siku ya mwisho. Malaika andakpwedza atenge atu ayi kanda na a haki,

⁵⁰andatsupha atu ayi ndani ya ziya ra moho. Na mumo, andarira na kusaga meno.

⁵¹Dze, mambo gano gosi mnagaelewa?" Nao achiamba, "Oho."

⁵²Chisha Jesu achienjereza kuamba, "Kpwa hivyo, yeyesi amanyaye Shariya za Musa, na ambaye akamkuluphira Muokoli yela kpwa Mlungu ni dza mchinyumba alavyaye vitu vya kare na viphya kula chumbani aikamo vituvye vya samani."

⁵³Jesu ariphomala kugomba ndarira hizi, wauka

⁵⁴achiuya kpwao Nazareti, mudzi arikorerwa. Phahi ariphofika hiko, wainjira sinagogini na achiandza kufundza, na nyo atu ariphosikira mafundzoge, aangalala achiamba, "Waphahaphi marifwa gano na uwezo wa kuhenda vilinje?"

⁵⁵Dze, yuno si mwana wa yuya fundi wa mbao? Dze, nine si Maryamu, na nduguze alume si Jakobo, Yusufu, Simoni na Juda?

⁵⁶Si nduguze achetu osi husagala nao? Sambu, mambo gosi gano yuno mwanache wagaphahaphi?"

⁵⁷Phahi taayafwahirwa, achimrema. Chisha Jesu achiaambira, "Nabii nkutogolwa chila phahali, isiphokala phao laloni na phao kaya."

⁵⁸Jesu wahenda vilinje vichache phahali hipho, kpwa sababu ya kusakuluphira kpwao.

Mathayo 14

¹Phahi siku zizo hizo, Herode mtawala wa jimbo ra Galilaya, wasikira sifwa za Jesu

²na achiaambira atumishie, "Hiye n'lazima akale ni Johana M'batizadzi! Akafufuka ndiyo sababu anaweza kuhenda vilinje vinji."

- ³⁻⁴Hipho mwandzo Herode kala akalagiza Johana agbwirwe na afungbwe jela, kpwa sababu Johana kala achimuambira Herode kala chishariya ni makosa sana kumlóla Herodiya ambaye kala ni mkpwaza nduguye Filipu.
- ⁵Herode kala analonda kumuolaga Johana, lakini achiogopha atu, mana kala anaamini kukala ni nabii.
- ⁶Lakini wakati wa kusherekea kumbukumbu ya kuvyalwa kpwa Herode, mwana mchetu wa Herodiya wafwiha vinono mbere za ajeni osi. Naye Herode piya achihamirwa
- ⁷hata achimuahidi yuya msichana kpwa kulapha kumupha chochosi ndichovoya.
- ⁸Yuya msichana bada ya kuambirwa ni nine, waamba, "Nalonda uniphe chitswa cha Johana M'batizadzi ndani ya chano."
- ⁹Mfalume ariphosikira hivyo wasononeka, lakini kpwa vira kala akalapha mbere za ajeni, walagiza areherwe.
- ¹⁰Phahi achihuma asikari akamkate chitswa Johana hiko jela.
- ¹¹Nacho chitswa chichireherwa yuya msichana ndani ya chano, naye achimphirikira nine.
- ¹²Anafundzi a Johana akpwedzahala mwiriwe na achendauzika; chisha achendamuambira Jesu.
- ¹³Jesu ariphosikira habari hizo, wapanda dau achiphiya phahali phokala taphana atu ili akakale macheye. Lakini makundi ga atu kula vidzidzi vinji ariphomanya kura ariko, anyendeka achimlunga kuko.
- ¹⁴Jesu ariphotuluka dauni waona rira kundi kulu ra atu. Naye waonera mbazi na achiphoza atu osi ariokala akongo.
- ¹⁵Dziloni iriphofika anafundzie akpwendamuamba, "Mwalimu, hipha ni kure na midzi na jiza rinaanda. Aambire hinya atu aphiye midzini ili akagule chakurya."
- ¹⁶Lakini Jesu achiamba, "Si lazima aphiye; ariseni mwimwi."
- ¹⁷Nao achimjibu, "Huna mabofulo matsano na ng'onda airi bahi!"
- ¹⁸Jesu achiamba, "Hebu nireherani."
- ¹⁹Chisha waambira hara atu asagale nyasini. Alafu achihala gara mabofulo matsano na hara ng'onda airi, achilola dzulu mlunguni achimshukuru Mlungu. Ariphomala kuvoya, wamega-mega gara mabofulo achiapha anafundzie aaganyire hara atu.
- ²⁰Atu osi arya kumvuna. Chisha anafundzie achitsola-tsola masaza goodzaza kaphu kumi na mbiri.

- ²¹Na hara ariorya kala ni kama alume elufu tsano bila ya kuolanga achetu na anache.
- ²²Bada ya higa tu, Jesu waambira anafundzie apande dau amtanguliye kuvuka ng'ambo. Lakini ye mwenye achibaki ko nyuma kuaambira atu auye makpwao.
- ²³Bada ya kulagana na hara atu, waphiya gambani macheye kpwendavoya Mlungu. Iriphofika dziloni, Jesu wakala kuko macheye hadi usiku.
- ²⁴Wakati hinyo dau kala rikafika kure sana, naro kala rinasukpwa-sukpwa ni maimbi mana phuto kala rinapiga kula ko kala anaphiya.
- ²⁵Wakati wa dzogolo kuika, Jesu waalunga anafundzie kuno ananyendeka dzulu dzulu ya madzi.
- ²⁶Nao ariphomuona, achikota likululu kpwa wuoga, achiamba, "Ni tsunusi!"
- ²⁷Lakini saa iyo-iyo Jesu achiaambira, "Msikakame, ni mimi! Msitishirwe!"
- ²⁸Alafu Petero wamuiha achiamba, "Bwana, ichikala ni uwe kpweli, niamba ninyendeka dzulu ya madzi kpwedza kuko uriko."
- ²⁹Achiambwa, "Haya, ndzoo!" Phahi Petero watuluka mura dauni na achinyendeka dzulu dzulu ya madzi kuphiya kura kpwa Jesu.
- ³⁰Lakini ariphoona zira tsulu za maimbi, watishirwa na achiandza kuhoha. Phahi wakota likululu achiamba, "Bwana nitivya!"
- ³¹Jesu wagolosa mkpwono mara mwenga achimgbwira, chisha achimuamba, "Mutu usiyeamini, we! Kpwa utu wani ukakala na wasi-wasi?"
- ³²Nao ariphopanda dauni, rira phuto rahurira.
- ³³Chisha atu osi mura dauni amuabudu na achiamba, "Kpwa kpweli uwe u Mwana wa Mlungu!"
- ³⁴Bada ya kuvuka ziya, atuluka tsi kavu seemu za Genesareti.
- ³⁵Atu a seemu hiyo ariphomtambukira kala ni Jesu, aeneza habari hiyo seemu yosi ya phephi, na achimrehera atu osi ariokala akongo.
- ³⁶Jesu wavoywa aruhusu akongo agute hata dzagbwe ni pindo ra nguwoye ili aphozwe, nao osi arioriguta aphola.

Mathayo 15

- ¹Siku mwenga, Mafarisayo na alimu a Shariya anjina akpwedza kula Jerusalem kumuza Jesu,
- ²"Anafundzio nkuvundza mila hurizorichirwa ni akare ehu. Mana wakati anarya taatsukutsa mikono yao kama mila ziambavyo. Mbona nkuhenda hivyo?"

- ³Jesu achiaamba, "Mbona mwi mnavundza shariya ya Mlungu kpwa kulunga mila zenu?"
- ⁴Mana Mlungu walavya shariya achilagiza, 'Ogopha sowe na mayoo,' na chisha achiamba, 'Yeyesi alaphizaye ise au nine, n'lazima aolagbwe.'
- ⁵Lakini mwi mnaamba kukala mutu achimuamba ise au nine, 'Cho n'richo nacho kpwa kukuteryani nkachilavya sadaka kpwa Mlungu,' phahi kana lazima tsona ya kumterya ise.
- ⁶Phahi, kpwa sababu ya mila zenu, mnazarau malagizo ga Mlungu.
- ⁷Mbavi mu anafiki mwi! Nabii Isaya wagomba kpweli kukuhusuni ariphotabiri ujumbe hinyu kula kpwa Mlungu:
- ⁸'Atu hinya nkuniogopha na maneno bahi, ela mioyo yao i kure nami.
- ⁹Kuniabudu kpwao takuna mana, mana anafundza atu alunge mafundzo ga chibinadamu tu badala ya Shariya za Mlungu.' "
- ¹⁰Jesu ariphomala kugomba na hara Mafarisayo, waaiha rira kundi ra atu achiaambira, "Hebu niphundzani na mmanyenine ninagokuambirani!"
- ¹¹Chimtiyacho mutu najisi sicho chira aryacho. Ela ni chira chilacho mwakpwe kanwani, hicho ndicho chimtiyacho mutu najisi."
- ¹²Chisha anafundzie amlunga achendamuaamba, "Dze, unamanya kukala hara Mafarisayo achiphosikira manenogo akatsukirwa?"
- ¹³Lakini naye achiamba, "Baba ariye mlunguni andang'ola chila mmea ambao kauphandire.
- ¹⁴Msidzishugulishe na hinyo vilongozi vipofu. Chipofu achilongoza chipofu myawe, osi airi andavoromoka dibwani."
- ¹⁵Alafu Petero wamuamba Jesu, "Hueleze mana ga hira ndarira ya mutu atiywavyo najisi."
- ¹⁶Jesu achiauza, "Hata mwimwi piya bado tamuelewa?"
- ¹⁷Kpwani tammanya kukala chochosi chiinjiracho kanwani nkutsupira ndanini na badaye chikanyewa!
- ¹⁸Lakini maneno mai galago kula kanwani, asiliye ni moyoni, nago ndigo gamhendesago mutu kukala najisi.
- ¹⁹Mana moyoni mwa mutu, ndimo asili ya maazo mai, gamhendago akaolaga, akahenda uzembe, udiya, wivi, ushahidi wa handzo, na lisengenyo.
- ²⁰Higa ndigo gamtiyago mutu najisi. Lakini kurya chakurya bila kutsukutsa mikono kama mila ziambavyo takumtiya mutu najisi."
- ²¹Jesu ariphouka hiko Galilaya, waphiya seemu za midzi ya Tiro na Sidoni.

- ²²Phahi, mchetu mmwenga wa Chikanani wa tsi hiyo wakpwedza kpwa Jesu, achipiga kululu achiamba, "Bwana, Mwana wa Daudi, nionera mbazi! Mwanangu mchetu ana pepho m'baya."
- ²³Lakini Jesu kayamgombekiza neno rorosi. Anafundzie achedzamuamba, "Muambire aphiye vyakpwe, kpwa sababu anahulunga-lunga na kuhupigira kululu."
- ²⁴Phahi Jesu waamba, "Mino siyahumwa kpwa atu asiokala Aiziraeli lakini nahumwa kpwa atu osi a Iziraeli arioangamika dza mang'ondzi."
- ²⁵Lakini yuya mchetu wakpwedzachita mavwindi mbere za Jesu achimuamba, "Bwana, niterya!"
- ²⁶Naye Jesu achimuamba, "Si vinono kuhala chakurya cha anache na kuchitsuphira madiya."
- ²⁷Lakini yuya mchetu achimuamba, "Ni kpweli Bwana, ela amba madiya nkurya pukupuku zigbwazo kula mezani pha matajiri gao."
- ²⁸Hipho Jesu wamuamba, "Mayo, kuluphiroro ni kulu, navikale vyo ulondavyo." Saa iyo-iyoy, mwanawe achiphola.
- ²⁹Jesu wauka hipho achiphiya na kanda-kanda ya ziya ra Galilaya. Chisha achiphiya gambani, achendasagala kuko.
- ³⁰Kundi kulu ra atu ramlunga richimphirikira virema, viswere, vipofu, mabwibwi na akongo anjina anji. Akongo osi aikpwa mbere za maguluge, naye achiaphoza.
- ³¹Atu aangelala ariphoona mabwibwi ganagomba, virema akauyato, viswere ananyendeka na vipofu anaona. Nao achimtogola Mlungu wa Iziraeli.
- ³²Phahi Jesu waiha anafundzie, achiaambira, "Naaonera mbazi atu hinya mana nkakala nao siku tahu, na sambu taana chakurya. Simendze niause na ndzala asedze achahirika njirani."
- ³³Anafundzie achimuamba, "Phano weruni hundaphahaphi chakurya cha kutosha cha kurisa kundi rosi hiri?"
- ³⁴Jesu achiauza, "Kpwani mna mabofulo mangaphi?" Nao achiamba, "Huna mabofulo sabaa na ng'onda achache."
- ³⁵Phahi Jesu waambira atu osi asagale.
- ³⁶Chisha achihala gara mabofulo sabaa na hara ng'onda na achimshukuru Mlungu. Achigamega-mega, alafu achiapha anafundzie, nao achiaganyira atu.
- ³⁷Atu osi achirya kumvuna. Bada ya kurya anafundzie achitsola-tsola masaza goodzaza mabweko sabaa.
- ³⁸Na jumula ya atu ariorya kala ni alume elufu ne bila ya kuolanga achetu na anache.

³⁹Bada ya Jesu kulagana na hara atu, wapanda dauni achiphiya seemu za Magadani.

Mathayo 16

¹Siku mwenga, Mafarisayo na Masadukayo aphiya kpwa Jesu kpwendamhega achili, achimuamba aahendere dalili ya chilinje kuonyesa kala uwezowe ula mlunguni.

²Naye achiaamba, "Ichifika dziloni mkuamba, 'Hali ya hewa indakala nono muhondo mana mlunguni ku kundu!'

³Na ichifika ligundzu mkuamba, 'Kundakala na phuto rero mana mlunguni ku kundu na maingu manji.' Phahi mwimwi mkumanya hali ya hewa kpwa kulola mlunguni kurivyo, lakini kuna mambo ambago ganahendeka hivi sambu wala tamanya manage.

⁴Mwimwi chivyazi cha atu ayi msiokala aaminifu! Mnalonda dalili! Hata! Tamndaonyeswa isiphokala iratu yohenderwa Jona." Phahi Jesu waaricha hara atu achiphiya vyakpwe.

⁵Phahi ariphomala gago Jesu na anafundzie apanda dauni achivuka ng'ambo ya phiri ya ro ziya ra Galilaya. Nao anafundzi kala akayala kutsukula mabofulo.

⁶Jesu achiaambira, "Dzimanyirireni na unafiki wa Mafarisayo na Masadukayo, ambao ni dza amira."

⁷Lakini o abisha enye kpwa enye achiamba, "Anagomba higo kpwa sababu tahutsukurire mabofulo."

⁸Ela Jesu waamanya agombago, achiaambira, "Mwi atu mrio na imani chache, mbona mnabisha kuhusu kusakala na mabofulo?"

⁹Dze, tamdzangbweelewa? Si mnatambukira gara mabofulo matsano hurigoapha atu elufu tsano. Badaye, mwatsola-tsola kaphu ngaphi za masaza?

¹⁰Na gara mabofulo sabaa goapha atu elufu ne, mwatsola-tsola mabweko mangaphi ga masaza?

¹¹Pho sambu mbona tamuelewa kukala sigombere kuhusu mabofulo? Phahi nakuambirani mdzimanyirire na amira ya Mafarisayo na Masadukayo!"

¹²Ndipho nao achielewa kukala akaambira adzimanyirire si amira itiywayo mabofuloni, ela ni kuhusu mafundzo ga Mafarisayo na Masadukayo.

¹³Jesu ariphofika phephi na mudzi wa Kaisaria Filipi, wauza anafundzie, "Atu nkuamba mino, Mutu yela Mlunguni, ni ani?"

¹⁴Nao achimuamba, "Anjina nkuamba u Johana M'batizadzi, anjina nkuamba u nabii Elija, anjina nkuamba u nabii Jeremia au mmwenga wa manabii."

- ¹⁵Jesu achiauza, "Dze, mwino, mnaamba mino ni ani?"
- ¹⁶Simoni Petero achimuamba, "Uwe ndiwe Masihi, Mwana wa Mlungu ariye moyo."
- ¹⁷Naye Jesu achimuamba, "Waajaliwa Simoni mwana wa Jona, mana higo ugombago si mwanadamu achiyekumanyisa, ela ni Baba ariye mlunguni.
- ¹⁸Nami nakuamba, n'ndakuiha Petero. Atu ndionikuluphira, n'ndaahenda akale atu angu, nawe undakala ndiwe dziwe ra msingi. Na hata nguvu za kuzimu taziweza kuvundza kanisa rangu.
- ¹⁹N'ndakupha uwezo wa kutawala atu a ufalume ambao Mlungu wanipha. Chochosi ndichokahaza himu duniani chindakala chikakahazwa hiko mlunguni, na chochosi ndichokubali himu duniani chindakala chikakubaliwa hata hiko dzulu mlunguni."
- ²⁰Chisha waakahaza sana anafundzie asimubambire mutu yeyesi kukala iye ndiye Masihi.
- ²¹Kula wakati hinyo Jesu waandza kubisha na anafundzie wazi-wazi, achiamba, "N'lazima nipiye Jerusalemu ili nikateswe ni akulu a alavyadzi-sadaka, alimu a Shariya, na vilongozi anjina a Chiyahudi. N'ndaolagbwa lakini siku ya hahu n'ndafufulwa."
- ²²Phahi Petero wamhala Jesu kanda achimdemurira achimuamba, "Bwana dzambo hiri tarindakuphaha."
- ²³Lakini Jesu achimgalukira Petero, achimuamba, "Hebu niukira, Shetani wee! Unanizuwiya nisihende nilondwago nihende, mana maazogo ni ga chibinadamu bahi, sigo ga chimlungu."
- ²⁴Chisha Jesu achiaambira anafundzie, "Yeyesi amendzaye kukala mwanafundzi wangu n'lazima ariche njiraze mwenye, akale tayari kugaya kpwa kutsukula msalabawe, na anilunge.
- ²⁵Mana yeyesi ndiyelonda kuokola maishage himu duniani andaangamiza maishage ga milele; ela aangamizaye maishage ga himu duniani kpwa sababu yangu, andagaokola.
- ²⁶Lakini indaafwahani mutu achiphaha utajiri wosi wa dunia ndzima, ela asiphahe uzima? Ama mutu anaweza kulavya chitu chani chikale badili ya uzima?
- ²⁷Mana mimi, Mutu Yela Mlunguni, n'ndakpwedza phamwenga na malaika angu. N'ndakpwedza na utukufu ulao kpwa Baba. Na hipho ndipho ndiphomripha chila mmwenga kulengana na mahendoge.
- ²⁸Nakuambirani kpweli kukala, phapha phana anjina ambao taandafwa hadi anione mimi, Mutu Yela Mlunguni, nkedza dza Mfalume."

Mathayo 17

¹Bada ya siku sita Jesu wauka na Petero, Jakobo na Johana ndugungbwa wa Jakobo, achiambuka nao mwango mure achendakala machiyao.

²Ariphokala hiko, Jesu wagaluka mbere za anafundzie; usowe wang'ala dza dzuwa, nazo nguwoze zichikala nyereru za kung'ala-ng'ala.

³Gafula Musa na Elija atsembuka na achibisha naye.

⁴Chisha Petero achimuamba Jesu, "Bwana, ni vinono sisi kukala hipha. Uchimendza n'ndadzenga vibanda vihahu; chimwenga chako, cha phiri cha Musa, na cha hahu cha Elija."

⁵Wakati acheregomba, kpwatserera ingu dzereru richiafwinika na kuchituluka sauti kula mo inguni ichiamba, "Hiyu ni mwanangu; nammendza naye ananihamira sana. Msikizeni!"

⁶Hara anafundzi ariphosikira hivyo, atishirwa sana hata achigbwa chimabumabu.

⁷Lakini Jesu wakpwedza phara kala aripho achiaguta na achiamba, "Unukani, msiogophe!"

⁸Na ariphounula uso, taonere mutu wanjina yeyesi ela Jesu macheye.

⁹Wakati kala anatsrerera kula mwangoni, Jesu waakahaza hara anafundzi achiamba, "Mambo higa mchigogaona, msigaambire mutu hadi mimi, Mutu Yela Mlunguni, ndiphofufulwa."

¹⁰Chisha anafundzie achimuza, "Mbona alimu a Shariya anaamba ati n'lazima Elija edze kabla ya Mutu Yela Mlunguni?"

¹¹Jesu achiaambira, "Ni kpweli Elija n'lazima edze atayarishe mambo gosi.

¹²Lakini nakuambirani kukala Elija wakpwedza kare, nao taayamtambukira, ela atu achimtesa vira arivyolonda. Na kpwa njira hiyo andanigayisa mimi, Mutu Yela Mlunguni."

¹³Ndipho anafundzi achimanya kukala Jesu kala anagomba kuhusu Johana M'batizadzi.

¹⁴Jesu na anafundzie ariphofika ko kurikokala ro kundi ra atu, mutu mmwenga waphiya achendamchitira mavwindi mbereze.

¹⁵Achiamba, "Bwana, muonere mbazi mwanangu wa chilume mana ana chifwafwa, tsona anagaya sana. Mara nyinji nkugbwa mohoni au madzini.

¹⁶Nami nkamrehera anafundzio lakini taakaweza kumphoza."

¹⁷Jesu ariphosikira waamba, "Aa! Mwi atu msiolunga manono na kusamkuluphira Mlungu! N'ndakala namwi hadi rini? N'ndakuvumirirani hadi rini? Hebu mreheni hipha ye mvulana."

¹⁸Chisha Jesu wamdemurira yuya pepho achituluka, naye mwanache achiphola saa iyo-iyo.

¹⁹Badaye hara anafundzi amlunga Jesu wakati kala a macheye, achendamuuza, "Kpwa utu wani sino tahukaweza kumtuluzwa yuya pepho?"

²⁰Achiaambira, "Ni kpwa sababu tamilyaamini. Nakuambirani kpweli kalapho mna imani, hata dzagbwe ni ndide dza tembe ya mgandi, mngeweza kuuambira hinyu mwango, 'Ng'oka hipha uphiye kura,' nao ukang'oka ukaphiya. Takuna sichowezekana kpweni.

[²¹Lakini aina hino ya pepho katuluka isiphokala kpwa kufunga na kuvoya bahi.]

²²Anafundzie ariphokala akakusanyika phamwenga hiko Galilaya, Jesu waambira, "Wakati ukafika mimi, Mutu Yela Mlunguni, niyalaviwa kpwa anadamu

²³ambao andaniolaga. Lakini siku ya hahu bada ya kuolagbwa n'ndafufulwa." Anafundzi ariphosikira higo asononeka sana.

²⁴Jesu na anafundzie ariphofika Kaperinaumu, makarani ga kodi ya Nyumba ya Kuvoya Mlungu amlunga Petero achendamuuza, "Samba yuno mwalimu wenu, nkuripha kodi ya Nyumba ya Kuvoya Mlungu?"

²⁵Petero achiamba, "Eeh, nkuripha." Phahi Petero ariphoinjira mura nyumbani, kabla kadzangbwegomba neno, Jesu wamuza, "Simoni, we uonadze? Afalume a dunia nkukusanya maripho au kodi kula kpwa ano ani? Kula kpwa arisi ao hebu kula kpwa anjina?"

²⁶Petero achiamba, "Kula kpwa anjina." Phahi Jesu wamuamba, "Kpwa hivyo arisi taahusika.

²⁷Hata hivyo nahusiakosere, phiya ziyani ukalowe. Na ng'onda wa kpwandza ndiyemgbwira, mfwenule kanwa, undaona feza. Ihale ukariphe kodiyo na yangu."

Mathayo 18

¹Wakati hinyo anafundzi amlunga Jesu, achendamuuza, "Kahi ya osi ariokubali kukala atu a Mlungu, ni ani mkpwulu zaidi?"

²Phahi Jesu wamuiha mwanache mdide, achimuimisa mbere zao,

³na achiamba, "Nakuambirani kpweli, mwimwi msiphogaluka na kunikuluphira dza anache adide tamndakala atu angu katika ufalume ambao Mlungu wanipha.

⁴Yeyesi ndiyenyenyekela dza hiyu mwanache, hiye ndiye mkpwulu kahi za atu angu.

⁵Na yeyesi ndiyemkaribisha mwanache dza hiyu kpwa sababu yangu, ananikaribisha mimi.

⁶Lakini shakare yeyesi ndiyehenda mmwenga wa hinya adide anikuluphirao kuhenda dambi; mutu hiye baha afungbwe lala kulu singoni na akatsuphiwe chivwa cha bahari.”

⁷“Shaka rani ro ra atu ahendesao ayawao akahenda dambi! Majaribu dza higo n'lazima gakale, lakini shakare hiye ndiyegareha.

⁸Na mkpwonoo ama chiguluchochi chichikuhenda uhende dambi, chikate uchitsuphe. Ni baha kuinjira uzima wa milele na mkpwono mmwenga au chigulu chimwenga, kuriko kukala na mikonoyo na magulugo mairi na kutsuphiwa mohoni, moho uakao milele.

⁹Na dzitsoro richikuhenda uhende dambi, ring'ole uritsuphe. Ni baha kuinjira uzima wa milele na tsongo, kuriko kukala na matsogo mairi na kutsuphiwa mohoni, moho uakao milele.”

¹⁰“Dzimanyirireni! Msizarau hinya adide, hata mmwenga. Nakuambirani kukala siku zosi malaika ao a mbere za Baba hiko dzulu mlunguni.

[¹¹Mana mimi, Mutu Yela Mlunguni, nákpwedza kuokola arioangamika.]

¹²Dze mnaonadze? Mutu achikala na mang'ondzi gana, alafu mwenga riangamike, andahendadze? Si andaricha gara tisaini na tisiya hiko marisani, na akaendze rira chiroangamika?

¹³Nakuambirani kpweli hiro ng'ondzi achiriphaha, rindamhenda ahererwe zaidi kuriko gara tisaini na tisiya ambago tagaangamikire.

¹⁴Vivyo hivyo Sowe yenu ariye mlunguni kamendze hata mmwenga wa hano adide aangamike.”

¹⁵“Mfuasi myao achikukosera, mlunge ukamuambire makosage ichikala ni uwe na iye bahi. Achikusikira mndakala mkaphahana, tsona undakala ukamuuyiza njira ya sawa.

¹⁶Asiphokusikira, hala mutu mmwenga au airi ukale phamwenga nao, ili 'chila kosa rihakikishwe ni mashahidi airi au ahahu.’

¹⁷Achirema kuasikiza, naambirwe afuasi ayae. Achikubali ni vinono, achirema kuasikiza, phahi mtsukurireni dza mutu ambaye si mmwenga wa atu a Mlungu.

¹⁸Nakuambirani kpweli kukala chochosi ndichokahaza himu duniani, chindakala chikakahazwa hiko mlunguni, na chochosi ndichokubali himu duniani, chindakala chikakubaliwa hata hiko dzulu mlunguni.

¹⁹Tsona nakuambirani kukala airi ama zaidi hipha duniani achiphahana na kuvoya kuhusu dzambo rorosi, phahi Baba ariye mlunguni andakuhenderani.

²⁰Kpwa mana atu airi ama zaidi achikala phamwenga kpwa sababu ni afuasi angu, nami n'ndakala phamwenga nao.”

- ²¹Chisha Petero wamlunga Jesu achendamuaamba, "Bwana, mfuasi myangu anikosere mara ngaphi ndipho nisimsamehe? Dze hata mara sabaa?"
- ²²Jesu achiamba, "Siamba mara sabaa bahi, ela sabini mara sabaa.
- ²³Ndarira hino inaeleza afuasi angu alondwavyo kusameheana. Mfalume mmwenga wakata shauri kumanya isabu ya pesaze arizoapha atumishie.
- ²⁴Aripoandza kuhenda isabu, wareherwa mutu yekala na deni ra maelufu ga pesa.
- ²⁵Kpwa vira kala kaweza kuripha rira deni, tajiriwe walagiza aguzwe ye mwenye, mchewe, anae na vitu vyosi arivyokala navyo ili ariphe rira deni.
- ²⁶Phahi yuya mtumishi wamgbwerera maguluni tajiriwe na achimuamba, 'Bwana, nivumirira nami n'ndakuripha deniro rosi.'
- ²⁷Ndipho yuya tajiri achimuonera mbazi yuya mtumishiwe achimsamehe rira deni, chisha achimricha achiphiya vyakpwe.
- ²⁸Lakini yuyatu mtumishi ariyesamehewa deni, ariphouka, wakutana na mtumishi myawe ambaye kala anamdai pesa chache. Phahi wamgbwira umiro na achimuamba, 'Niripha deni rangu!'
- ²⁹Hiye mtumishi myawe wagbwa chimabumabu, achimuamba, 'Nivumirira nami n'ndakuripha!'
- ³⁰Lakini ye warema, achendamtiya jela myawe hadi ndiphoripha rira denire.
- ³¹Phahi hinyo atumishi anjina aripoona mambo higo, asononeka sana, na achendasema na tajiri wao.
- ³²Yuya tajiri wamwiha yuya mtumishi na achimuamba, 'Uwe u mtumishi mui sana! Wanivoya nikusamehe, nami nchikusamehe deniro rosi.
- ³³Dze, che si sawa kumuonera mbazi mtumishi myao dza nrivyokuonera mbazi?'
- ³⁴Phahi yuya mfalume watsukirwa sana, achimlavya kpwa asikari a jela akatiwe adabu hadi ndiphoripha denire rosi."
- ³⁵Chimarigizo Jesu waamba, "Naye Baba ariye mlunguni andakuhenderani vivyo chila mmwenga ambaye kandamsamehe mfuasi myawe moyo kutsuka."

Mathayo 19

- ¹Jesu ariphomala kugomba higo, wauka seemu ya Galilaya, achiphiya seemu ya Judea, ng'ambo ya Muho wa Joridani.
- ²Atu makundi makundi amlunga kuko, naye achiaphozera akongo ao.
- ³Mafarisayo anjina akpwendamuuza ili kumhega achili, achiamba, "Dze, shariya inamruhusu mutu kumricha mchewe kpwa kosa rorosi?"

- ⁴Jesu achiaambira, "Dze, tamdzangbwesoma Maandikoni kukala iye ariyeumba atu hipho mwandzo waumba mlume na mchetu,
- ⁵na achiamba, 'Kpwa sababu hiyo mlume andaricha ise na nine, agbwirane na mchewe, nao osi airi andakala mwiri mmwenga.'
- ⁶Phahi atu hinyo si airi tsona ela ni mwiri mmwenga. Kpwa hivyo ariounganishwa ni Mlungu, mwanadamu asiatenganishe."
- ⁷Lakini hara Mafarisayo achimuuzi, "Sambi kpwa utu wani Musa walagiza kukala mlume amuphe mchewe cheti cha talaka na amriche?"
- ⁸Jesu achiamba, "Musa wakuruhusuni kuricha achetu enu kpwa sababu ya mioyo yenu mifu. Ela taiyakala hivyo kula mwandzo.
- ⁹Lakini nakuambirani, mlume yeyesi ndiyericha mchewe, isiphokala kpwa sababu ya uzembe, phahi achilóla mchetu wanjina anazinga."
- ¹⁰Anafundzie achimuamba, "Ichikala mambo ga mutu na mchewe ga hivyo, phahi baha kusalóla kamare!"
- ¹¹Lakini Jesu achiaambira, "Mnafikiri chila mutu anaweza kusala bila ya kulóla? Hata chidide, ni hara ambao Mlungu waakubaliya kusalóla ndio anaweza.
- ¹²Mana kuna anjina ambao taalóla kpwa sababu avyalwa taaokola, anjina ahenda tulwa ni anadamu ayawao, na kuna anjina nkurema kulóla ili amuhumikire Mlungu bahi. Awezaye kugbwira fundzo hiri naarigbwire."
- ¹³Chisha atu amrehera Jesu anache adide ili aakire mikono na kuavoyera. Anafundzie achiademurira hara atu,
- ¹⁴lakini Jesu achiaamba, "Aricheni hinyo anache adide edze kpwangu, wala msiazuwiye, mana atu ambao n'ndahewa ni Mlungu kuatawala ni dza hinya anache."
- ¹⁵Naye achiabandikira mikono kpwa kuajaliya, chisha achiuka.
- ¹⁶Barobaro mmwenga wakpwedza kpwa Jesu achimuuzi, "Mwalimu, nihende chitu chani chinono ili Mlungu aniphe uzima wa milele?"
- ¹⁷Jesu achimuamba, "Mbona unaniuzi kuhusu chitu chinono? Kuna Mmwenga bahi ariye mnono. Ela uchilonda kuinjira uzimani, gbwira malagizo ga Shariya."
- ¹⁸Yuya barobaro achiuzi, "Ni malagizo gaphi?" Jesu achiamba, "Usiolage mutu, usizini, usiye, usizige myao na dzambo ra handzo,
- ¹⁹muogophe sowe na mayoo na mmendze myao dza vyo udzimendzavyo mwenye."
- ²⁰Yuya barobaro achimuamba, "Higo gosi nágalunga. Dze, nihendeni zaidi?"

²¹Jesu achimuamba, "Uchilonda kukala bila lawama, phiya ukaguze malizo na pesaze ukaziganyire achiya, nawe undakala na akiba hiko mlunguni. Chisha ndzo unilunge."

²²Yuya barobaro ariphosikira higo, waphiya vyakpwe na kureya, mana kala ana mali nyinji.

²³Phahi Jesu waambira anafundzie, "Nakuambirani kpweli kukala ni vigumu sana tajiri kukala mmwenga katika ufalume ambao Mlungu wanipha.

²⁴Tsona nakuambirani kukala ni rahisi zaidi ngamia kutsapira na tundu ya sindano kuriko tajiri kukala mmwenga katika ufalume wangu."

²⁵Hara anafundzi ariphosikira hivyo aangelala sana, achimuza Jesu, "Pho sambini ano ani ambao anaweza kuokolwa?"

²⁶Lakini Jesu waalolato na achiamba, "Dzambo hiri tariwezekana kpwa anadamu, ela kpwa Mlungu chila chitu chinawezekana."

²⁷Chisha Petero achiamba, "Dze sino? Kpwani hwaricha vitu vyehu vyosi huchikulunga hukale anafundzio! Vino hundaphahani?"

²⁸Jesu achiamba, "Nakuambirani kpweli, wakati mimi, Mutu Yela Mlunguni, ndiphosagarira chihi cha endzi cha utukufu, mwimwi mrionilunga mndasagarira vihi kumi na viiri vya chifalume kutawala mbari kumi na mbiri za Iziraeli.

²⁹Na yeyesi arichaye mudziwe ama ndugu alume na achetu, ise ama nine, anae ama minda, kpwa ajili ya dzina rangu, andaphaha mara gana zaidi, na Mlungu andamupha uzima wa milele.

³⁰Lakini anji ambao ni a kpwandza andakala a mwisho, na anji a mwisho andakala a kpwandza."

Mathayo 20

¹"Phahi ufalume ambao Mlungu wanipha unaelezwa ni ndarira hino. Mchina-munda mmwenga warauka chiti achendaenda atu a vibaruwa.

²Ariphopatana na hara vibaruwa kuaripha maripho ga kutwa, waaphirika akarime mundawe wa mizabibu.

³Yuya mchina-munda wauka tsona achihiya cheteni kama saa tahu za ligundzu, achendaona atu anjina aimire bila ya kazi yoyosi.

⁴Achiaambira, 'Mwimwi piya phiyani mkahende kazi munda wa mizabibu, nami n'ndakuriphani haki yenu.'

⁵Phahi hinyo atu aphiya. Yuya mchina-munda waphiya tsona cheteni kpwendalola vibaruwa anjina wakati wa saa sita na saa tisiya.

- ⁶Wauya tsona muda wa saa kumi na mwenga achiona atu anjina aimire hipho cheteni. Na achiauza, 'Mbona muimire hipha kutwa ndzima bila ya kazi?'
- ⁷Nao achimuamba, 'Kpwa sababu tahuphahire mutu wa kuhupha chibaruwa.' Yuya mchina-munda achiaambira, 'Haya, phiyani mkahende kazi munda wangu wa mizabibu.'
- ⁸Dziloni, yuya mchina-munda wa mizabibu wamuiha mwiiki wa pesa na achimuamba, 'Iha vibaruwa osi uariphe haki yao, kuandzira hara a mwisho na umarigize na hara a mwandzo.'
- ⁹Phahi akpwedza hara kala akahewa kazi saa kumi na mwenga, nao achiriphiwa maripho ga kutwa chila mmwenga.
- ¹⁰Hara arioandza kazi mwandzo ariphokpwezariphiwa haki yao, aona andahewa zaidi, lakini nao piya ariphiwa maripho ga kutwa chila mmwenga.
- ¹¹Ariphophokera pesa zao, aandza kumnung'unikira yuya mchina-munda.
- ¹²Amuamba, 'Hinya vibaruwa uchioareha mwisho, akahenda kazi saa mwenga bahi. Mbona ukaaripha sawa na sisi huchiohenda kazi ngumu ya kutwa ndzima na dzuwa kali?'
- ¹³Lakini achimuamba yuya mmwenga, 'Msena wangu, sikakuzulumu hata chidide! Kpwani tahukapatana maripho ga kutwa?'
- ¹⁴Hala hakiyo uuke. Nkamendza kumupha hiyu wa mwisho sawa na uwe.
- ¹⁵Dze, nikale sina haki ya kuhenda nilondavyo na pesa zangu? Dze, uzuri wangu unawonera chidzitso?' "
- ¹⁶Chimarigizo Jesu waamba, "Phahi a mwisho andakala a kpwandza na a kpwandza andakala a mwisho."
- ¹⁷Jesu ariphokala anaphiya Jerusalemu, himo njirani, wahala hara anafundzi kumi na airi achihiya nao njama, achiaambira,
- ¹⁸"Sikizani, vivi hunaphiya Jerusalemu, ambako mimi, Mutu Yela Mlunguni, n'ndalaviwa kpwa akulu a alavyadzi-sadaka na alimu a Shariya, nao andanihukumu nikaolagbwe.
- ¹⁹Chisha andanilavya kpwa atu asio Ayahudi. Nao andanizemerera, andanichapa viboko na anikote msalabani. Lakini siku ya hahu n'ndafufuka."
- ²⁰Bada ya muda, mkpwaza Zebedayo waphiya kpwa Jesu phamwenga na anae, achendachita mavwindi mbereze amvoye chitu.
- ²¹Jesu achimuuza, "Unalondani?" Hiye mchetu achiamba, "Niahidi kukala ndiphoandza kutawala dza Mfalume ariyetsambulwa ni Mlungu, hinya anangu airi, mmwenga asagale uphandeo wa kulume na wanjina uphandeo wa kumotso."

²²Lakini achiaambira, "Tammanya m'voyaro. Dze, mnaweza kugaya dza vivyo ndivyogaya mimi?" Nao achimuamba, "Hunaweza."

²³Jesu achiaambira, "Mndagaya dza vivyo ndivyogaya, lakini kusagala uphande wangu wa kulume au wa kumotso siyo kazi yangu kupanga. Dzambo hiro andahewa hara ambao aikirwa ni Baba ariye mlunguni."

²⁴Hara anafundzi kumi anjina ariphosikira hivyo, aareyera hara ndugu airi.

²⁵Lakini Jesu waiha anafundzie osi phamwenga na achiaambira, "Mnamanya kukala atawala a himu duniani nkutawala atu ao chinguvu-nguvu, na hinyo vilongozi nkuatawala atu ao na uwezo wao.

²⁶Lakini kpwenu mwimwi taindakala hivyo. Amendzaye kukala mkpwulu n'lazima akale mtumishi wa ayae,

²⁷na amendzaye kukala wa kpwandza n'lazima akale mtumwa wa ayae.

²⁸Vivyo hivyo mimi, Mutu Yela Mlunguni, sedzere kuhenderwa, ela nákpwedza kuhendera na kulavya maisha gangu ili gakale maripho ga kukombola atu anji."

²⁹Jesu na anafundzie ariphokala anauka mudzi wa Jeriko, kundi kulu ra atu ramlunga-lunga.

³⁰Phakala na vipofu airi asegere kanda-kanda ya barabara. Na ariphosikira kukala Jesu anatsapa na phapho, aandza kukota likululu kuno anaamba, "Bwana, Mwana wa Daudi, huonere mbazi!"

³¹Rira kundi ra atu richiademurira richiaambira anyamale, lakini azidi kukota likululu, "Bwana, Mwana wa Daudi, huonere mbazi!"

³²Phahi Jesu waima, achiaiha na kuauza, "Mnalonda nikuhendereni utu wani?"

³³Nao achiamba, "Bwana, hunalonda huuvugule matso huone."

³⁴Phahi Jesu waaonera mbazi, achiaguta matso, na saa iyo-iyo achiona, nao achimlunga-lunga.

Mathayo 21

¹Jesu na anafundzie ariphofika phephi na Jerusalemu afika Bethifage, hiko Mwango wa Mizeituni. Chisha Jesu achihuma anafundzie airi

²achiaambira, "Phiyani hadi mudzi wa hipho mbere na saa iyo-iyo mndaona punda akafungbwa na mwanawe. Avuguleni mnirehere.

³Na mutu achikuuzani chochosi, muambeni, 'Bwana ana haja nao,' naye andakurichirani mara mwenga."

⁴Dzambo hiri rahendeka ili ritimie rira neno ra Mlungu rogombwa ni nabii, roamba,

⁵"Aambireni atu a Jerusalemu: 'Lolani, mfalume wenu aredza! Ni mpole na akapanda mwana-punda.' "

⁶Hara anafundzi aphiya achendahenda viratu achivyolagizwa ni Jesu.

⁷Achimrehera yuya punda na mwanawe, achihandika nguwo zao dzulu ya yuya mwana-punda naye Jesu achipanda achisagala.

⁸Kundi kulu sana ra atu rahandika nguwo zao barabarani, anjina avundza makalala ga mitende achigahandika barabarani.

⁹Makundi gosi ga atu, kundi rokala mbere na rira ririrokala nyuma, gakota likululu gachiamba: "Naatogolwe Mwana wa Daudi!" "Naajaliwe iye edzaye kpwa dzina ra Mwenyezi Mlungu!" "Mlungu ariye dzulu mlunguni naatogolwe!"

¹⁰Jesu ariphokala anainjira Jerusalemu, mudzi wosi wadedemuka. Atu achikala anauzana, "Yuno ni ani?"

¹¹Rira kundi richiamba, "Hiyu ni Jesu, nabii kula Nazareti mudzi wa Galilaya."

¹²Badaye Jesu wainjira Nyumba ya Kuvoya Mlungu, achizoresa atu ariokala anahenda bishara himo ndani. Achipendula-pendula meza za hara okala anabadilisha pesa na vihi vya hara okala anaguza njiya.

¹³Achiaambira, "Maneno ga Mlungu gaandikpwa, 'Nyumba yangu indaihwa nyumba ya mavoyo.' Lakini mwino mnaihenda kukala mwamdzifwitso wa aivi!"

¹⁴Vipofu na viswere anji amlunga hiko ndani ya Nyumba ya Kuvoya Mlungu, naye achiaphoza.

¹⁵Nao akulu a alavyadzi-sadaka na alimu a Shariya aona viliinje virivyohendwa ni Jesu. Piya achisikira kululu za anache himo ndani ya Nyumba ya Kuvoya Mlungu ambao kala anaamba, "Naatogolwe Mwana wa Daudi!" Kpwa hivyo achitsukirwa,

¹⁶nao achimuza Jesu, "Dze, ukale kusikira gano gagombwago ni hano anache?" Ela Jesu achiamba, "Ehe, nagasikira! Dze, tamdzangbwesoma Maandiko kuhusu mambo higo? 'Wahumira anache adide na atsanga ili udziphahire nguma kamili.' "

¹⁷Phahi Jesu waaricha hara atu achituluka kondze ya mudzi na achiphiya Bethania ambako wakpwendalala.

¹⁸Ligundzu chiti Jesu ariphokala anauya Jerusalemu, wasikira ndzala.

¹⁹Waona muhi uihwao mtini kanda-kanda ya njira, achiaphuka kpwendalola tini, lakini kayakuta chochosi ela makodza mahuphu. Alafu waulani hura muhi achiamba, "Kundavyala tsona bii!" Na phapho hipho hinyo muhi wanyala uchiuma.

²⁰Anafundzie ariphoona higo, aangalala achiamba, "Ni kpwa utu wani huno muhi ukauma gafula?"

- ²¹Naye Jesu achiaambira, "Nakuambirani kpweli, mchimkuluphira Mlungu bila wasi-wasi, mnaweza kuhenda hivyo. Tsona mnaweza hata kuwambira mwango hinyu, 'Ng'oka ukadzitiye baharini,' na kpweli gakahendeka.
- ²²Namwi mchiamini, mndaphokera chochosi ndichom'voya Mlungu."
- ²³Jesu wauya Nyumba ya Kuvoya Mlungu, nao akulu a alavyadzi-sadaka na vilongozi anjina a Chiyahudi amlunga wakati kala anafundza, achimuuza, "We, gano unagohenda, unahenda kpwa uwezo wa ani? Ni ani yekupha uwezo huno?"
- ²⁴Achiaambira, "Mimi piya n'ndakuuzani swali, na mchinijibu, nami n'ndakuambirani nahenda mambo higa kpwa uwezo wa ani.
- ²⁵Uwezo wa Johana wa kubatiza walaphi? Dze, wala kpwa Mlungu hebu wala kpwa atu?" Phahi, aphiya njama, achendabisha enye kpwa enye, "Huchiamba, 'Wala mlunguni,' andahuamba, 'Sambi mbona tamyamkuluphira?'
- ²⁶Na huchiamba, 'Wala kpwa atu,' hundaphaha tabu mana atu osi anakubali kukala Johana kala ni nabii."
- ²⁷Phahi amuamba Jesu, "Tahumanya." Naye achiaambira, "Wala nami sindakuambirani nahenda mambo higa kpwa uwezo wa ani."
- ²⁸Jesu waenderera kugomba achiamba, "Hebu mnaonadze? Kpwakala na mutu yekala na ana airi a chilume. Walunga mwanawe mvyere achendamuamba, 'Mwanangu, rero phiya ukahende kazi ko munda wa mizabibu.'
- ²⁹Yuya mwana achimuamba ise, 'Sindaphiya!' Lakini badaye achigaluza nia, achendahenda kazi.
- ³⁰Halafu baba achimuamba mwanawe mdide vivyo, naye achimuamba, 'Haya Baba nkasikira!' Lakini kayakpwendahenda hira kazi.
- ³¹Dze, ni ani kahi ya hara ana airi yehenda vira alondavyo ise?" Nao achimuamba, "Yuya mwanawe mvyere." Phahi, Jesu achiaambira, "Nakuambirani kpweli kukala, makarani ga kodi na malaya anatubu na kukala atu a Mlungu badala ya mwimwi.
- ³²Mana Johana wakpwedza kpweni ili akuonyeseni kusagala vira Mlungu alondavyo, wala tamyamuamini. Ela makarani ga kodi na malaya (atu ambao anaharirwa ni achina-dambi) aamuamini, na hata bada ya kuona gosi higo, mwi tamyatubu na kumuamini."
- ³³Jesu achiamba, "Sikizani ndarira yanjina. Kpwakala na mutu mmwenga yephanda mizabibu mwakpwe mndani. Achiizungulusira lichigo, achitsimba pahali pha kuminyira zabibu, na piya achidzenga uringo. Chisha hura munda achiukodishira akurima, naye mwenye achiphiya tsi yanjina.

³⁴Wakati wa kuvuna zabibu uriphofika, yuya mchina-munda wahuma atumishie aphiye kpwa hara akurima ariokodisha mundawe, ili akahewe fungure ra mavuno.

³⁵Lakini hara akurima aagbwira hara atumwa; mmwenga achimpiga, wanjina achimuolaga, na wanjina achimpiga mawe.

³⁶Alafu wahuma atumwa anjina anji kuriko hara a kpwandza, na hara akurima achiahenda dza viratu hara a kpwandza.

³⁷Mwisho waahumira mwanawe mwenye, achifikiri achiamba, 'Hakika hiyu andamuogopa, mana ni mwanangu.'

³⁸Ela hara akurima ariphomuona hiye mwanawe aambirana, 'Hiyu ni mwanawe ndiyemrisi. Nahumuolageni ili huale urisiwe!'

³⁹Phahi amgbwira, achimtuluza kondze ya hura munda wa mizabibu, na achendamuoalaga.

⁴⁰Dze! Ye mchina-munda achedza, andaahendadze hara akurima ariokodisha hura munda?"

⁴¹Hara atu achimuamba, "Andaaolaga hara atu ayi, na hinyo munda aukodishe akurima anjina ambao andamupha fungure wakati wa kuvuna."

⁴²Hipho Jesu waambira, "Hakika mnamanya Maandiko higa ga Mlungu gaambago: 'Dziwe roremewa ni adzengi, ndipho rikakala dziwe kulu ra msingi. Mwenyezi Mlungu ndiye yehenda dzambo hiri, naro rinahuangalaza!'

⁴³Kpwa hivyo nakuambirani kukala Mlungu andajaliya atu anjina kukala atue, mana hinyo andahenda vira Mlungu alondavyo.

[⁴⁴Ndiyegbwa dzulu ya dziwe hiro andavundzika-vundzika, na ndiyegbwererwa ni hiro dziwe andasagbwa-sagbwa.]"

⁴⁵Mafarisayo na akulu a alavyadzi-sadaka, ariphosikira hizo ndariraze, amanya kukala anagomba kuhusu aho,

⁴⁶phahi alonda kumbwira Jesu kpwa nguvu ili amtiye jela. Lakini achiogopa atu mana aho kala anaamini kukala iye ni nabii.

Mathayo 22

¹Jesu waenderera kugomba nao kuhumira ndarira, achiamba,

²"Njira ya Mlungu kutsambula atue inaelezwa ni ndarira hino. Mfalume mmwenga wamhendera mwanawe karamu ya arusi.

³Achihuma atumishie akaihe atu arioalikipwa edze arusini. Lakini hinyo arioalikipwa arema kpwedza.

- ⁴Hipho wahuma atumishi anjina, achiaambira, 'Aambireni hara arioalikipwa: Sambu karamu i tayari, nátsindza ndzau na ndama za kunona; chila chitu chi tayari. Ndzeni arusini!'
- ⁵Lakini hara arioalikipwa agapuza, chila mmwenga walunga shugulize. Mmwenga waphiya kpwakpwe mndani na wanjina achipiya kpwakpwe dukani.
- ⁶Anjina achiagbwira hara atumishi achiatesa, na chisha achiaolaga.
- ⁷Mfalume ariphosikira hivyo, watsukirwa sana. Achihuma asikarie akaolage hara atu ayi na kuocha mudzi wao.
- ⁸Chisha achiaambira atumishie, 'Chakurya cha arusi chi tayari, lakini arioalikipwa kala taafwaha.
- ⁹Sambu phiyani hiko mdzini na yeyesi ndiyemuona barabarani muambireni edze arusini.'
- ¹⁰Hara atumishi aphiya chila njira, achiareha atu osi, anono na ayi. Nyumba ya arusi ichiodzala ajeni.
- ¹¹Lakini mfalume ariphoinjira kulola hara ajeni, waona mutu mmwenga ambaye kala kavwarire nguwo ya arusi.
- ¹²Phahi achimuza, 'Msena wangu, ukainjiradze muno bila nguwo ya arusi?' Lakini yuya mutu kayagomba chitu.
- ¹³Chisha mfalume waambira atumishie, 'Mfungeni mikono na magulu mkamtsuphe kondze jizani, ambako andarira na kusaga meno.' "
- ¹⁴Chimarigizo Jesu waamba, "Mana atu anji nkualikipwa, ela atsambulwao ni achache."
- ¹⁵Chisha Mafarisayo aphiya njama, achendapanga njira ya kungbwira Jesu kpwa sababu ya manenoge.
- ¹⁶Phahi ahuma afuasi ao na hara a chikundi cha Herode, nao achendamuamba, "Mwalimu, hunamanya kukala uwe u mutu muaminifu, na unafundza kpweli kuhusu Mlungu alagizago, nawe kulunga maoni ga atu mana cheo si chochosi kpwako.
- ¹⁷Hebu huambire unaonadze. Dze, shariya zehu zinahuruhusu kuripha kodi kpwa Kaisari, Mtawala wa Chirumi? Huriphe hebu husiriphe?"
- ¹⁸Lakini Jesu wamanya maazo gao mai, achiaambira, "Mwi anafiki, mbona mnanipima achili?"
- ¹⁹Nionyesani hira pesa ya kuriphira kodi." Nao achimrehera hira pesa.
- ²⁰Ariphoihewa achiauzi, "Sura hino na dzinare ni ra ani?"

- ²¹Nao achimuamba, "Ni ya Kaisari." Ndipho achiaambira, "Phahi, vya Kaisari mupheni Kaisari, na vya Mlungu, mupheni Mlungu."
- ²²Ariphosikira hivyo, aangalala. Phahi achimricha, na achiphiya vyao.
- ²³Siku hiyo hiyo Jesu watsolokerwa ni Masadukayo anjina. Nao Masadukayo ni kundi ra Ayahudi asioamini kukala atu achifwa andafufulwa.
- ²⁴Agomba achimuamba, "Mwalimu, Musa waamba mutu achilóla alafu achifwa bila ya kuphaha ana, nduguye n'lazima ahale ufwa hiye gungu, na amvyarire ana yuya mufwa.
- ²⁵Phahi kpwakala na ndugu sabaa ambao hwaishi nao. Wa mwandzo walóla mchetu, achifwa bila ya kuvyala naye ana. Hiye gungu achihalwa ufwa ni ndugungbwa wa yuya mufwa.
- ²⁶Phahi hiye wa phiri wafwa kabla ya kuphaha mwana. Wa hahu naye dza vivyo, hadi achisira osi sabaa.
- ²⁷Mwisho, yuya mchetu naye piya wafwa.
- ²⁸Dze, siku ya kufufulwa atu, yuya mchetu andakala mkpwaza ani? Mana ndugu osi amlóla."
- ²⁹Lakini Jesu waambira, "Mwimwi Masadukayo mnakosera mana tammanya Maandiko wala uwezo wa Mlungu.
- ³⁰Mana siku ya kufufulwa, atu andakala dza malaika hiko mlunguni ambao taalóla wala taalólwa.
- ³¹Na kuhusu atu kufufulwa, dze, tamdzangbwesoma gara ambago muambirwa ni Mlungu? Iye waamba,
- ³²'Mimi ni Mlungu wa Brahimu, Isaka na Jakobo.' Kpwa hivyo, iye si Mlungu wa atu ariofwa, lakini ni Mlungu wa ario moyo."
- ³³Na atu osi ariphosikira higo, aangalazwa ni mafundzoge.
- ³⁴Mafarisayo ariphosikira kukala Jesu waahendesha Masadukayo anyamale, akutana.
- ³⁵Mmwenga wao, yekala ni mwanashariya, wamuuza Jesu swali kumhega achili.
- ³⁶Waamba, "Mwalimu, ndani ya Shariya za Musa ni shariya iphi iriyo muhimu sana?"
- ³⁷Naye Jesu achiamba, " 'Mmendze Bwana Mlunguo chikpweli-kpweli na moyoo wosi, na rohoru rosi, na achilizo zosi.'
- ³⁸Hiyo ndiyo shariya ya kpwandza na ya muhimu sana.
- ³⁹Na ya phiri yoigana na hiyo ya kpwandza, ni hino yaambayo, 'Mmendze myao dza vyo udzimendzavyo mwenye.'

- ⁴⁰Shariya zosi za Musa na mafundzo ga manabii zinategemea shariya hizi mbiri.”
- ⁴¹Mafarisayo ariphokala achere phamwenga, Jesu waaauza,
- ⁴²"Kpwani mwino mnamanyani kuhusu Masihi? Ni chivyazi cha ani?" Nao achimuamba, "Ni chivyazi cha Mfalume Daudi.”
- ⁴³Jesu achiaambira, "Sambi inawezekanadze Daudi wagomba kpwa uwezo wa Roho wa Mlungu achimuiha, 'Bwana?' Mana wagomba achiamba:
- ⁴⁴'Mwenyezi Mlungu wamuamba Bwana wangu, Sagala uphande wangu wa kulume, phatu pha ishima kulu sana, hadi nihende maaduigo gakugbwerere maguluni.'
- ⁴⁵Ichikala Daudi anamuiha hiye mutu, 'Bwana wangu,' vinakaladze akale ni chivyaziche?"
- ⁴⁶Taphana ariyeweza kumjibu neno. Na hangu siku hiyo atu osi aogopha kumuuzwa maswali zaidi.

Mathayo 23

- ¹Chisha Jesu wagomba na hura umati wa atu phamwenga na anafundzie, achiamba,
- ²"Mnaona, alimu a Shariya, na Mafarisayo ndio ohala nafwasi ya Musa. Kazi yao ni kukufundzani na kukuelezani shariya ziambavyo.
- ³Phahi gbwirani na mhende chochosi ndichokuambirani. Ela msilunge gara ahendago, mana taahenda gara agombago.
- ⁴Atu hinya nkufunga mizigo miziho ya Shariya ambazo ni vigumu kuzilunga, na akaahika ayawao. Lakini o enye taamendze kugolosa hata chala kuterya atu kuitsukula.
- ⁵Ela nkuhenda mahendo gao gosi ili aonewe ni atu. Nkuvwala vibandiko vipana virivyo na maandishi ga Shariya chilanguni na mikononi, na nkuhenda pindo za kandzu zao nyire.
- ⁶Atu hinya nkumendza kusagala vihi vya mbere-mbere karamuni na masinagogini.
- ⁷Piya nkumendza kulamuswa na ishima mbere za atu, na kuihwa, 'Alimu' ni atu osi.
- ⁸Msiruhusu atu anjina akpwiheni 'Alimu', mana mosi mu ndugu na mwalimu wenu ni Mmwenga bahi.
- ⁹Wala msihe mutu yeyesi hipha duniani 'Baba', mana Sowe yenu ni Mmwenga bahi, naye a mlunguni.

- ¹⁰Wala msiaruhusu atu akuiheni 'Bwana', mana mna bwana mmwenga bahi, naye ndiye Yetsambulwa Kuokola Atu.
- ¹¹Ariye mkpwulu kuriko mosi mwenu kundini n'lazima akale mtumishi wa anjina.
- ¹²Adzikipwezaye andatserezwa, na adzitserezaye andakpwezwa.
- ¹³Shaka rani ro, mwi alimu a Shariya na Mafarisayo, anafiki mwi! Mnafungira ayawenu miryango ya mlunguni, mana mwimwi enye tamuinjira, wala tamuaruhusu ayawenu alondao kuinjira, ainjire.
- [¹⁴Shaka rani ro, mwi alimu a Shariya na Mafarisayo, anafiki mwi! Mkuzulumu magungu na kudzihenda kukala mu atu anono kpwa kuvoya mavoyo mare. Kpwa hivyo mndaphaha adabu kali sana.]
- ¹⁵Shaka rani ro, mwi alimu a Shariya na Mafarisayo, anafiki mwi! Mkuhenda vyaro vya baharini na tsi za kure ili mphahe mutu mmwenga alunge dini yenu. Lakini mchiphaha, mkumhenda akale mui zaidi na kuinjirakpwe mohoni kukale mara mbiri ya mwimwi enye.
- ¹⁶Shaka rani ro, mwi vilongozi vipofu! Mnadzichenga kukala mutu achilapha kuhadza Nyumba ya Kuvoya Mlungu hata asiphotimiza chilaganeche nkukala kana neno. Ela achilapha kuhadza zahabu iriyo ndani ya Nyumba ya Kuvoya Mlungu, ni asivundze chilagane arichochiika.
- ¹⁷Vipofu apumbavu mwi! Ni chiphi cha mana zaidi: zahabu hebu Nyumba ya Kuvoya Mlungu ihendayo hiyo zahabu kukala takatifu?
- ¹⁸Piya mkugomba mkaamba, mutu yeyesi ndiyelapha kuhadza phatu pha kulavira sadaka si chitu; ela achilapha kuhadza sadaka ichiyoikpwa dzuluye, ni asivundze cho chilaganeche arichochiika.
- ¹⁹Mwi vipofu! Ni chiphi cha mana zaidi: hira sadaka, au phatu pha kulavira sadaka ambapho nkuhenda hira sadaka kukala takatifu?
- ²⁰Phahi yeyesi alaphaye kuhadza phatu pha kulavira sadaka nkulapha kpwa hipho phatu pha kulavira sadaka, na chochosi chirichoikpwa dzuluze.
- ²¹Na alaphaye kuhadza Nyumba ya Kuvoya Mlungu nkulapha kpwa hiyo nyumba na Mlungu asagalaye himo ndani.
- ²²Na alaphaye kuhadza mlunguni nkulapha kuhadza chihi cha endzi cha Mlungu na iye achisagariraye.
- ²³Shaka rani ro, mwi alimu a Shariya na Mafarisayo, anafiki mwi! Mkulavya fungu ra kumi ra chikatsu, iliki, na bizari nyembamba ambavyo ni vilungo bahi, na kuno mnaricha haki, mbazi, na kuluphiro ambago ni mambo muhimu ga Shariya. Higo ndigo mlondwago kuhenda, bila ya kuzarau higo ganjina.

- ²⁴Vilongozi vipofu mwi! Mkutuluza indzi chikombeni, lakini mkamiza ngamia mzima!
- ²⁵Shaka rani ro, mwi alimu a Shariya na Mafarisayo, anafiki mwi! Mbona mnatsukutsa vikombe na sahani kondze macheye, na ndani mnakuricha kunaodzala unyang'anyi na uchoyo.
- ²⁶We Mfarisayo chipofu! Amba tsukutsa chikombe ndani kpwandza nako kondze piya kundakala safi.
- ²⁷Shaka rani ro, mwi alimu a Shariya na Mafarisayo, anafiki mwi! Mana mu dza mbira zopakpwa chokaa kondze na zinaonekana nono, ela ndani zikaodzala misoza na lovu.
- ²⁸Phahi namwi mnaonekana atu a haki, lakini ndani mkaodzala unafiki na uyi.
- ²⁹Shaka rani ro, mwi alimu a Shariya na Mafarisayo, anafiki mwi! Mnadzenga mbira za manabii ga kare na kupamba vikuta vya atu a haki,
- ³⁰kuno mnaamba, 'Kala sisi hwaishi wakati wa akare ehu, husingegbwirana nao kuolaga manabii!'
- ³¹Kpwa hivyo mnadzishuhudiya kukala mu chivyazi cha atu arioolaga manabii.
- ³²Haya, marigizani mwi enye hira kazi yoandzwa ni atumia enu!
- ³³Nyoka a sumu mwi! Mndahepadze hukumu ya kutiywa mohoni?
- ³⁴N'ndakureherani manabii, atu okala na marifwa, na alimu; lakini anjina mndaaolaga na anjina kuakota misumari. Piya anjina mndaachapa viboko mwenu masinagogini na kuatesa chila mudzi.
- ³⁵Kpwa hivyo mndatiywa adabu kpwa sababu ya atu osi arioolagbwa ariokala bila lawama: kula Abeli ambaye kayakala na lawama hadi Zakariya mwana wa Barakiya, ambaye mwamuolaga mbere za Nyumba ya Kuvoya Mlungu, kahi-kahi ya hiyo nyumba na phatu pha kulavira sadaka.
- ³⁶Nakuambirani kpweli, chivyazi chichi tachindakosa kutiywa adabu hizo zosi."
- ³⁷Jesu waenderera kugomba, achiamba, "Eeh, mwi atu a Jerusalemu! Mkuolaga manabii na kuapiga mawe ariohumwa kpweni. Mara nyingi náaza kukuikani phamwenga dza kolo ra kuku rifwinikavyo anae mwakpwe maphani, lakini mwi mwakahala!
- ³⁸Haya sikizani, mkarichirwa mudzi wenu enye na vivi ni muhuphu.
- ³⁹Nakuambirani kukala, tamndaniona tsona hadi wakati ndiphokpwedzaamba, 'Wajaliwa iye edzaye kpwa dzina ra Mwenyezi Mlungu.' "

Mathayo 24

- ¹Jesu watuluka Nyumba ya Kuvoya Mlungu, na ariphokala anaphiya vyakpwe, anafundzie amlunga achimuonyesa madzengo ga Nyumba ya Kuvoya Mlungu.
- ²Lakini Jesu waamba, "Hebu lolani, mnaona madzengo gosi higa! Nakuambirani kpweli, taphana hata dziwe mwenga ndirosala dzulu ya ranjina; chila chitu chindabomolwa."
- ³Jesu wakpwendasagala dzulu ya Mwango wa Mizeituni, na anafundzie amlunga achikala naye machiyao. Nao achimuza, "Huambire mambo higo gandakala rini? Ni dalili yani ambayo indaonyesa kpwedzako na mwisho wa dunia?"
- ⁴Naye Jesu achiaambira, "Dzimanyirireni msedze mkachengbwa.
- ⁵Mana kundakpwedza anji ahumire dzina rangu, nao andachenga atu anji, aambe, 'Mimi ndiye hiye Yetsambulwa ni Mlungu!'
- ⁶Mndasikira habari za viha na ndziye-ndziye za viha, lakini msitishirwe, mana higa n'lazima gakale, lakini mwisho wa dunia undakala taudzangbwe.
- ⁷Tsi mwenga indapigana na tsi yanjina, mfalume mmwenga andapigana na mfalume wanjina. Kundakala na ndzala na dunia indasumba kpwatu kunji.
- ⁸Mambo higa ni dza viratu mwandzo wa utsungu wa mayo alondaye kudzivugula.
- ⁹Chisha andakuphirikani kpwa atu ambao andakutesani na kukuolagani. Atu osi asiomkuluphira Mlungu dunia ndzima andakuzirani kpwa sababu yangu.
- ¹⁰Na anji andaricha kunikuluphira; andasalatana na andazirana.
- ¹¹Kundazuka manabii anji a handzo na andachenga atu anji.
- ¹²Na kpwa sababu ya kuenjerezeka uyi, mendzwa ya atu anji indaphunguka.
- ¹³Lakini ndiyevumirira hadi mwisho ndiye ndiyeokolwa.
- ¹⁴Hiyo habari ndzuri kuhusu ufalume ambao Mlungu wanipha indatangazwa dunia ndzima, ili ikale ushuhuda kpwa atu osi. Na ndipho mwisho wa dunia undafika.
- ¹⁵Kundakpwedza wakati muone 'Chitu cha najisi cha kubananga.' Chogombwa ni nabii Danieli chiimire pho phatu phatakatifu." (Msomadzi naamanye manage.)
- ¹⁶"Wakati hinyo, ario Judea naachimbirire myangoni.
- ¹⁷Ndiyekala kondze ya nyumba naasiuye mwakpwe nyumbani kuhala chitu.
- ¹⁸Na ariye mndani naasiuye kaya kpwedzahala nguwoze.
- ¹⁹Shaka rani ro achetu a mimba na amwisao siku hizo!
- ²⁰Voyani Mlungu ili siku ya kuchimbira kpweni kusikale majira ga mnyevu wala Siku ya Kuoya!

- ²¹Mana wakati hinyo kundakala na tabu kulu ambazo tazidzangbwekala kula mwandzo wa dunia hadi rero, wala tazindahendeka tsona.
- ²²Ela Mlungu wapanga kare kuphunguza siku za mateso kpwa ajili ya atu ariotsambula. Kala Mlungu kahendere hivyo, takungesala mutu.”
- ²³Jesu waenderera kuamba, "Siku hizo mutu achikuambirani, 'Lolani, Yetsambulwa ni Mlungu hiyu hipha!' au, 'Hiye hiko!' msimsikize.
- ²⁴Mana kundazuka manabii ga handzo na atu ambao andadziamba ni hiye Yetsambulwa ni Mlungu. Andahenda vilinje na maajabu ili aachenge atu na hata ichiwezekana piya aangamize atu ariotsambulwa ni Mlungu kukala afuasi angu.
- ²⁵Sikizani, nakuambirani chimbere mambo higa kabla tagadzangbwe kuhendeka.
- ²⁶Phahi atu achikuambirani, 'Lolani, akaonewa hiko weruni,' msiphiye; na achikuambirani, 'Lolani, akadzifwitsa chumbani,' wala msiaamini bii.
- ²⁷Mana mimi, Mutu Yela Mlunguni, kuuya kpwangu kundakala dza viratu limeme ring'alavyo kula mlairo wa dzuwa hadi mtswerero wa dzuwa.
- ²⁸Sababu pho phosi pharipho na lufu, ndipho phagbwapho nderi.
- ²⁹Phahi bada ya mateso ga siku kusira tu, dzuwa rindakala jiza, na mwezi taundang'ala; nyenyezi zindagbwa kula dzulu, na nguvu za dzulu mlunguni zindasumbiswa.
- ³⁰Chisha dalili ya Mutu Yela Mlunguni indaonewa mlunguni, na hipho makabila gosi ga dunia ndzima gandarira kuno anaona mimi, Mutu Yela Mlunguni, niredza na maingu kula mlunguni na nguvu na utukufu munji.
- ³¹Nami n'ndahuma malaika angu na gunda ra sauti kulu sana, nao andakusanya ariotsambulwa kula chila phahali duniani, pembe hadi pembe.
- ³²Dzifundzeni kula kpwa mfwano hinyu wa mtini: Panda za mtini zinaphotula, mkumanya wakati wa kuvuna u phephi.
- ³³Namwi mchiona mambo higa gosi ganahendeka, manyani kukala mimi, Mutu Yela Mlunguni, ni phephi na kuuya.
- ³⁴Nami nakuambirani kpweli, chivyazi hichi tachindasira kabla ya mambo higa gosi kuhendeka.
- ³⁵Dzulu mlunguni na dunia kundasika, lakini maneno gangu gandakalako milele na milele.”
- ³⁶Jesu waenderera kuaambira, "Lakini takuna mutu amanyaye siku wala saa indakala rini hata akale malaika a mlunguni wala Mwana. Baba macheye ndiye amanyaye.
- ³⁷Vivyo vyokala wakati wa Nuhu, ndivyo ndivyokala wakati mimi, Mutu Yela Mlunguni, ndiphouya.

- ³⁸Mana wakati hinyo kabla ya mafuriko makulu, atu kala achirya na kunwa, kala achilóla na kulólwa, hadi siku Nuhu ariphoinjira ndani ya hira safina.
- ³⁹Nao taamanyire kala kundahendekani hadi mafuriko gariphokala, gachiaolaga osi bu. Vivi ndivyo ndivyokala wakati mimi, Mutu Yela Mlunguni, ndiphouya.
- ⁴⁰Wakati hinyo alume airi andakala mndani, mmwenga andahalwa na wanjina andarichwa.
- ⁴¹Achetu airi andakala anasaga phamwenga, mmwenga andahalwa na wanjina andarichwa.
- ⁴²Phahi, dzimanyirireni mana tammanya siku ndiyouya Bwana wenu.
- ⁴³Lakini mmanye: Kalapho mchina-nyumba anamanya saa ngaphi za usiku edzerayo muivi, angechesa kurinda na asingekubali nyumbaye ivundzwe.
- ⁴⁴Kpwa hivyo mwimwi piya n'lazima mkale tayari, kpwa sababu tammanya saa ndizokpwedzera mimi, Mutu Yela Mlunguni."
- ⁴⁵Jesu achienderera kuamba, "Kalani dza mtumishi muaminifu na wa marifwa, ambaye tajiriwe nkumupha kazi ya kuimirira nyumbaye na kuapha atumishi ayae chakurya wakati unaofwaha.
- ⁴⁶Ni baha hiye mtumishi ambaye siku tajiriwe achedza, andakutwa anahenda hivyo.
- ⁴⁷Phahi nakuambirani kpweli, tajiriwe andamhenda mwimirizi wa malize zosi.
- ⁴⁸Lakini mtumishi mui achiamba, 'Tajiri wangu andakaa kuuya,'
- ⁴⁹naye aandze kuapiga atumishi ayae, na kurya na kunwa phamwenga na alevi.
- ⁵⁰Phahi yuya tajiriwe ndiphouya siku asiyomtarajiya na saa asiyoimanya,
- ⁵¹andamtiya adabu kali sana, na andamuika kundi mwenga na anafiki, ambako atu andarira na kusaga meno."

Mathayo 25

- ¹Jesu waamba, "Wakati mimi, Mutu Yela Mlunguni, ndiphouya kutawala ufalume ambao Mlungu wanipha, undaelezwa na ndarira hino. Siku mwenga, vyandama kumi ahala taa zao, achendamchinjira bwana arusi.
- ²Kahi-kahi yao, atsano akala azuzu na atsano achikala alachu.
- ³Mana hara vyandama azuzu ahala taa zao, lakini taayatsukula mafuha,
- ⁴lakini hara alachu atsukula taa zao na tupa za mafuha.
- ⁵Kpwa vira bwana arusi wachelewa kpwedza, hara vyandama asenukira na achilala.

- ⁶Lakini usiku wa manane kpwakala na hoyo rosikirwa kuamba, 'Hiye bwana arusi aredza; phiyani mkamchinjire.'
- ⁷Phahi hara vyandama kumi alamuka achitayarisha taa zao.
- ⁸Nao hara azuzu achiaambira hara alachu, 'Hupheni mafuha genu sababu taa zehu zinafwa.'
- ⁹Lakini hara alachu achiaambira, 'Hata! Tagandatosha sisi na mwimwi; ni baha mphiyeye dukani mkagule genu.'
- ¹⁰Phahi hara vyandama azuzu ariphouka kpwendagula mafuha, bwana arusi wakpwedza. Hara ambao kala a tayari ainjira phamwenga naye dzumba ra arusi, chisha mryango uchifungbwa.
- ¹¹Badaye hara vyandama anjina piya auya achedzaamba, 'Bwana, bwana, huvugurire!'
- ¹²Lakini naye achiaamba, 'Nakuambirani kpweli kukala sikumanyani.' "
- ¹³Chimarigizo Jesu waamba, "Phahi chesani, mana tammanya siku wala saa ambayo mimi, Mutu Yela Mlunguni, n'ndauya."
- ¹⁴Jesu achienderera kugomba, achiamba, "Kuuya kpwangu kundakala dza hivi. Mutu mmwenga wapanga kuphiya charo. Phahi waiha atumishie achiapha madaraka ga kuimirira malize,
- ¹⁵naye achimupha chila mmwenga kulengana na uwezowe. Mmwenga wamupha mifuko mitsano ya zahabu, wanjina achimupha mifuko miiri ya zahabu, wanjina achimupha mfuko mmwenga wa zahabu. Chisha achihiya charoche.
- ¹⁶Mara mwenga yuya yephokera mifuko mitsano waandza bishara nayo, naye achiaphaha mifuko mitsano zaidi.
- ¹⁷Vivyo hivyo yuya wa mifuko miiri waphaha fwaida ya mifuko miiri zaidi.
- ¹⁸Lakini yuya ariyehewa mfuko mmwenga wakpwendatsimba dibwa, achiufwitsa.
- ¹⁹Bada ya muda mure, yuya bwana wauya, achedzahenda isabu ya mahumizi na mapato phamwenga na atumishie.
- ²⁰Phahi yuya kala akaphaha mifuko mitsano ya zahabu wakpwedza kuno akatsukula mifuko mitsano zaidi, achiamba, 'Bwana, wanipha mifuko mitsano ya zahabu, lakini nkakurehera mifuko mitsano zaidi, ndiyo fwaida nriyophaha.'
- ²¹Yuya bwana achimuamba, 'Wahendato! U mtumishi mnono tsona muaminifu. Kpwa sababu wakala muaminifu wa mambo madide, n'ndakupha garigo makulu. Ndzo husherekee phamwenga.'
- ²²Naye yuya yehewa mifuko miiri piya wakpwedza, achiamba, 'Bwana, wanipha mifuko miiri ya zahabu vino hala mifuko miiri zaidi ndiyo fwaida nriyophaha.'

- ²³Yuya mutu achimuamba, 'Wahendato! U mtumishi mnono tsona muaminifu. Kpwa sababu wakala muaminifu wa mambo madide, n'ndakupha garigo makulu. Ndzo husherekee phamwenga.'
- ²⁴Chisha yuya kala akahewa mfuko mmwenga wa zahabu wakpwedza, achiamba, 'Bwana, namanya kukala uwe u mutu mufu, ukuvuna ambapho kuphandire, na ukukusanya phahali ambapho mutu wanjina wakumbira.
- ²⁵Kpwa hivyo náogopha, nchifwitsa mfukoo dibwani. Phahi, hala mfukoo wa zahabu.'
- ²⁶Lakini yuya bwana achimuamba, 'We mtumishi mui na mvivu! Unamanya kukala nkuvuna phahali ambapho siphandire, na nkukusanya phahali ambapho siyakumbira.
- ²⁷Phahi uwe kala waika zahabu yangu bengi, nami nriphouya ningeiphaha na fwaida.
- ²⁸Kpwa hivyo halani hinyo mfuko wa zahabu ario nao mumuphe hiye ariye na mifuko kumi ya zahabu.
- ²⁹Mana ariye na chitu na kuchihumira andaenjerezwa akale na vinji. Lakini asiyehumira chitu chidide aricho nacho, hata chicho chindahalwa.
- ³⁰Na kuhusu mtumishi hiyu asiye na fwaida, mhaleni mukamtsuphe kondze jizani ambako andarira na kusaga meno.' "
- ³¹Jesu waenderera kugomba achiamba, "Wakati mimi, Mutu Yela Mlunguni, ndiphouya na utukufu phamwenga na malaika osi, hipho ndipho ndiphosagarira chihi changu cha endzi cha utukufu.
- ³²Atu a mataifa gosi andakusanyika mbere zangu nami n'ndaatanya dza viratu mrisa atanyavyo mang'ondzi na mbuzi.
- ³³N'ndaika atu a haki uphande wangu wa kulume, na hara atu ayi uphande wa kumotso.
- ³⁴Chisha n'ndaambira hara atu ario uphande wa mkpwono wa kulume, 'Ndzoni mosi mrioajaliwa ni Baba, phokerani majaliwa mrigotengezerwa hangu kuumbwa kpwa dunia.
- ³⁵Mana nákala na ndzala, namwi mchinipha chakurya, nákala na chiru, namwi mchinipha madzi ga kunwa, nákala mjeni namwi mchinikaribisha.
- ³⁶Tsona nákala sina nguwo, namwi mchinivwika, nákala mkpwongo, namwi mchedza mchinilola, nákala jela, namwi mchedzanilamusa.'
- ³⁷Hipho hara atu a haki andaniamba, 'Bwana, ni rini huriphokuona una ndzala huchikupha chakurya, ama ni rini huriphokuona una chiru naswi huchikupha madzi ga kunwa?

³⁸Ni rini huriphokuona u mjeni huchikukaribisha, hebu ni rini huriphokuona kuna nguwo naswi huchikuvwika?

³⁹Ni rini huriphokuona mkpwongo ama busu naswi huchedza kulola?’

⁴⁰Nami n'ndaambira, 'Nakuambirani kpweli, chila chitu mrichomhendera mmwenga wa hinya enehu adide, mwanihendera mimi.'

⁴¹Chisha n'ndaambira hara ario uphande wa kumotso, 'Ukani mbere zangu mwimwi mriolaniwa! Phiyani moho wa milele uriotengezerwa Shetani na malaikae.

⁴²Mana nákala na ndzala, namwi tamyanipha chakurya, nákala na chiru, namwi tamniphere madzi,

⁴³nákala mjeni, namwi tamyanikaribisha. Tsona nákala sina nguwo, namwi tamyaniwika, nákala mkpwongo, namwi tamyaniwarisa na nákala jela, namwi taphana yekpwezaniwika.'

⁴⁴Hipho nao andaniamba, 'Bwana, ni rini huriphokuona una ndzala au chiru, u mjeni au bila nguwo, phokala mkpwongo au busu, naswi huchikuricha bila ya kukuterya?’

⁴⁵Nami n'ndaambira, 'Nakuambirani kpweli, chila chitu mrichorema kuhendera mmwenga wa hinya adide, mwarema kunihendera mimi.'

⁴⁶Alafu atu ayi andainjira mateso ga milele, ela hara a haki andainjira uzima wa milele."

Mathayo 26

¹Jesu ariphomala kufundza mambo higa gosi, waambira anafundzie,

²"Mnamanya kukala bada ya siku mbiri hundakala na Sukukuu ya Pasaka, na mimi, Mutu Yela Mlunguni, n'ndalaviwa ili nikakotwe misumari msalabani."

³Phahi akulu a alavyadzi-sadaka na vilongozi a Chiyahudi akutana dzumbani mwa Kayafa, yekala Mlavyadzi-sadaka Mkpwulu.

⁴Akpwendahenda njama ya kumgbwira Jesu chiwerevu ili amuolage.

⁵Lakini asikizana kukala dzambo hiro risihendeke wakati wa sukukuu, sedze atu akahenda fujo.

⁶Jesu ariphokala hiko chidzidzi cha Bethania, wainjira nyumbani mwa Simoni, yekala na mahana.

⁷Wakati Jesu kala asegere anarya chakurya, phakpwedza mchetu yekala akatsukula tupa ya marashi ga samani kulu, achimmwagira chitswani.

⁸Anafundzie ariphoona vira, atsukirwa sana na achiamba, "Hasara hino n'yani?"

⁹Marashi higa che ganaweza kuguzwa pesa nyinji na hizo pesa zikahewa agayi!"

- ¹⁰Jesu ariphogamanya go kala anagagomba, achiaambira, "Kpwa utu wani mnamyuga yuno mchetu? Akanihendera dzambo ra mana sana.
- ¹¹Mana siku zosi, agayi mndakala nao, lakini mino sindakala namwi siku zosi.
- ¹²Hiyu mchetu akaumwagira mwiri wangu marashi kuutayarisha kpwa mazishi gangu.
- ¹³Nakuambirani kpweli kukala kokosi dunia ndzima ndikotangazwa hiyo habari ndzuri, dzambo hiri achirohenda hiyu mchetu rindahadzwa kpwa kumtambukira."
- ¹⁴Chisha, Juda Iskarioti, ambaye piya ka ni mwanafundzi wa Jesu, waphiya kpwa akulu a alavyadzi-sadaka,
- ¹⁵achendaauza, "Nchikuphani Jesu, mndaniphani?" Nao achimhesabira vipande salasini vya feza achimupha.
- ¹⁶Na kula wakati hinyo Juda waandza kuendza nafwasi ya kumsalata Jesu.
- ¹⁷Siku ya kpwandza ya Sukukuu ya mikahe isiyotiywa amira, anafundzi amlunga Jesu achimuza, "Unalonda hukakutayarishire chakurya cha Pasaka kuphi?"
- ¹⁸Naye achiaambira, "Phiyani hiko mudzini mndamuona mutu fulani, mumuambe, 'Mwalimu anaamba, wakati wangu u phephi; n'ndarya Pasaka phamwenga na anafundzi angu mwako nyumbani.' "
- ¹⁹Phahi hara anafundzi ahenda vyo arivyolagizwa, na achendatayarisha chakurya cha Pasaka.
- ²⁰Kuriphofika dziloni, Jesu wasagala arye chakurya phamwenga na anafundzie kumi na airi.
- ²¹Na ariphokala anarya, Jesu waamba, "Nakuambirani kpweli, mmwenga wenu andanialata."
- ²²Anafundzie ariphosikira hivyo, asononeka sana, na achiandza kumuza mmwenga mmwenga, "Dze! Bwana, ikale ni mimi?"
- ²³Jesu achiamba, "Atsotsaye mkahe bakuli mwenga nami ndiye ndiyenialata.
- ²⁴Mimi, Mutu Yela Mlunguni, n'ndafwa kama Maandiko gaambavyo, lakini shaka hiro hiye ndiyenialata! Baha kala mutu hiye kavyarirwe."
- ²⁵Juda, yemsalata, achimuza, "Dze! Mwalimu, ikale ni mimi?" Jesu achimjibu, "Ehe, ni uwe."
- ²⁶Jesu ariphokala anarya na anafundzie, wahala mkahe na achimshukuru Mlungu. Chisha achiumega-mega na achiapha anafundzie, achiamba, "Halani murye; hinyu ni mwiri wangu."

- 27-28** Tsona wahala chikombe cha uchi wa zabibu, achimshukuru Mlungu, na achiapha, achiamba, "Hinyu ni mlatso wangu ambao unaika chilagane cha Mlungu na atue, nao unamwagbwa kpwa fwaida ya atu anji ili asamehewe dambi. Nwani mosi.
- 29** Nakuambirani, sindanwa tsona uchi wa zabibu hadi siku hiyo ndiphounwa luphya phamwenga namwi ndiphokpwezatawala dza Mfalume yetsambulwa ni Baba."
- 30** Bada ya kuimba wira wa kumtogola Mlungu, auka achiphiya Mwango wa Mizeituni.
- 31** Chisha Jesu waambira anafundzie, "Usiku hinyu wa rero mwimwi mosi mndakala na wasi-wasi nami na kuniricha, mana Mlungu anaamba katika Maandikoge, 'N'ndampiga mrisa, nago mang'ondzi gandatsamukana.'
- 32** Lakini bada ya kufufulwa, n'ndakutanguliyani kuphiya Galilaya."
- 33** Ela Petero achimuamba, "Hata osi achikala na wasi-wasi nawe na kukuricha, mino sindakuricha bii!"
- 34** Naye Jesu achimuamba, "Nakuambira kpweli kukala usiku hinyu wa rero, kabla ya dzogolo kuika, undanitsamalala mara tahu."
- 35** Petero achimuamba, "Hata ichikala ni kufwa, nahufwe hosi, lakini sindakutsamalala bii!" Chisha hara anafundzi osi achigomba dza vivyo.
- 36** Chisha Jesu wauka phamwenga na anafundzie hadi phahali phaihwapho Gethesemane, achiaambira, "Sagalani hipha nami naphiya phara mbere nkavoye."
- 37** Achimhala Petero na anangbwa airi a Zebedayo. Hipho waandza kusononeka,
- 38** achiaambira, "Yo sonono nriyo nayo, naona indanirya! Phahi kalani hipha hucheseni phamwenga."
- 39** Na ariphosengera mbere chidide, wagbwa chimabumabu, chisha achivoya, "Baba, nakuvoya ichiwezekana, uniusire mateso chigonilenga; lakini sio nimendzavyo mimi, ela ulondavyo uwe."
- 40** Alafu achiauyira hara anafundzi ahahu na achiakuta arere. Achimlamusa Petero achimuamba, "Kpwani tamuweza kukala matso phamwenga nami hata dzagbwe ni dzisaa dzimwenga?"
- 41** Chesani kuvoya ili Shetani asedze akakutiyani dambini, mana roho inamendza kuhendato, lakini mwiri tauweza."
- 42** Jesu wauka tsona mara ya phiri kpwendavoya, achiamba, "Baba, ichikala mateso tagaweza kuuswa kpwa ganiphahe, phahi ulondago nagakale."
- 43** Ariphouya tsona achiakuta arere, mana kala akashindwa ni usingizi.
- 44** Phahi waaricha na achendavoya mara ya hahu achigomba maneno garatu gara.

- ⁴⁵Chisha achiauyira hara anafundzie, na achialamusa kuno anaamba, "Mbona mchererere na kuoya? Sikizani! Saa ikafika, na mimi, Mutu Yela Mlunguni, ni phephi na kulaviwa kpwa atu a dambi.
- ⁴⁶Unukani, huphiyeni vyehu. Lolani, mutu ndiyenisalata aredza."
- ⁴⁷Jesu ariphokala acheregomba, Juda, mmwenga wa hara anafundzie kumi na airi, wakpwedza na kundi kulu ra atu okala akatsukula panga na marungu. Atu hinyo kala akahumwa ni akulu a alavyadzi-sadaka na vilongozi a Chiyahudi.
- ⁴⁸Hiye yelonda kumsalata Jesu kala akaapha dalili achiamba, "Ye ndiyemdonera kumlamusa ndiye iye; mgbwireni."
- ⁴⁹Phahi Juda mara mwenga wamsengerera Jesu, achimuamba, "Uonadze, Mwalimu?" Chisha achimdonera.
- ⁵⁰Jesu achimuamba, "Msena wangu, timiza uchirorilunga." Hipo hara atu achedza achimgbwira Jesu.
- ⁵¹Mmwenga wa hara ariokala na Jesu, watsomola upanga achimkata sikiro mtumwa wa Mlavyadzi-sadaka Mkwulu.
- ⁵²Chisha Jesu achimuamba, "Hai! Hai! Uyiza upangao chowani, mana yeyesi ahumiraye upanga, andaolagbwa na panga.
- ⁵³Mkale tammanya kukala naweza kum'voya Baba na sambu akanirehera zaidi ya asikari elufu kumi na mbiri a malaika?
- ⁵⁴Lakini nchihenda hivyo gara Maandiko ambago ganaamba higa ni gahendeki, gandatimiadze."
- ⁵⁵Wakati hinyo hinyo Jesu wauza rira kundi ra atu ambao kala akedzamgbwira, "Mbona mkedza na panga na marungu avi mkedzagbwira muivi? Kala nchisagala na kufundza ndani ya Nyumba ya Kuvoya Mlungu chila siku, mbona tamuyanigbwira?
- ⁵⁶Lakini gosi higa gahendeki ili ritimie rira neno ra Mlungu rogombwa ni manabii." Hipo anafundzie osi amricha achichimbira.
- ⁵⁷Phahi hara ariomgbwira Jesu amphirika kaya kpwa Kayafa, yekala Mlavyadzi-sadaka Mkwulu, ambako kala kukakutana alimu a Shariya na vilongozi a Chiyahudi.
- ⁵⁸Naye Petero wamlunga kpwa kure hadi muhala wa nyumba ya Mlavyadzi-sadaka Mkwulu. Aripoinjira ndani, wasagala phamwenga na arindzi ili aone mambo ndigokala.
- ⁵⁹Phahi akulu a alavyadzi-sadaka na ngambi yosi yaendza mashitaka ga handzo ga kumshitakira Jesu ili aphahe kumuolaga.

⁶⁰Hata dzagbwe mashahidi manji ga handzo gadzilavya, lakini taayaphaha. Mwisho akpwedza mashahidi airi,

⁶¹nao achiamba, "Mutu hiyu waamba kukala anaweza kubomola Nyumba ya Kuvoya Mlungu na akaidzenga tsona kpwa siku tahu."

⁶²Phahi Mlavyadzi-sadaka Mkwulu waima, na achimuza Jesu, "Ikale kuna ra kudzihehera kuhusu mashitaka ga hinya atu?"

⁶³Ela Jesu wanyamala zi. Mlavyadzi-sadaka Mkwulu achimuamba, "Nakulagiza kpwa Mlungu ariye hai ugombe kpweli, huambire ichikala uwe ndiwe Masihi, yani Mwana wa Mlungu!"

⁶⁴Jesu achimuamba, "Kama uchivyogomba. Tsona nakuhakikishirani mosi kukala hangu sambi mndaniona mimi, Mutu Yela Mlunguni, nisegere mkpwono wa kulume wa Mwenyezi Mlungu, phatu pha ishima kulu sana, na chisha mndaniona nichedza dzulu ya maingu."

⁶⁵Hipho, Mlavyadzi-sadaka Mkwulu wakpwanyula nguwoze, na achiamba, "Akakufuru! Kuna haja yani ya mashahidi zaidi? Samba mkasikira enye achivyogomba!"

⁶⁶Hebu mnaonadze?" Nao achimuamba, "Hiye ni wa kuolagbwa!"

⁶⁷Alafu amtsitsira mahe ga uso kuno anampiga, na anjina achimuwanga makofi,

⁶⁸na kumuza, "We Masihi, ichikala u nabii kpweli, huambire achiyekupiga ni ani?"

⁶⁹Petero kala asegere kondze mhalani. Phahi mtumishi wa chichetu wamlunga Petero achendamuamba, "Hata uwe wakala phamwenga na Jesu wa Galilaya."⁷⁰Lakini warema mbere za atu osi, achiamba, "Simanya unaambadze."⁷¹Alafu Petero ariphokala anatuluka bomani, waonewa ni mtumishi wa chichetu wanjina hipho mryangoni, naye achiaambira atu ariokala hipho, "Mutu hiyu akakala phamwenga na Jesu wa Nazareti."

⁷²Phahi wamtsamalala tsona na achihendalapha, achiamba, "Mutu hiye simmanyanya bii."

⁷³Bada ya muda, atu ariokala aimire hipho amlunga Petero achendamuamba, "Hakika uwe piya u myawao, mana magombigo ganaonyesa."

⁷⁴Phahi waandza kudzilani na kulapha achiamba, "Mutu hiye simmanyanya tse-tse-tse!" Mara mwenga dzogolo richiika.

⁷⁵Naye Petero achitambukira maneno goambirwa ni Jesu, kukala, "Kabla dzogolo kuika, undanitsamalala mara tahu." Phahi watuluka kondze, achendarira kpwa sonono.

Mathayo 27

- ¹Chiti kuriphocha, akulu osi a alavyadzi-sadaka na vilongozi a Chiyahudi akata shauri ya kumuolaga Jesu.
- ²Amfunga mikowa, achimphirika kpwa Pilato, mkpwulu wa jimbo ra Chirumi.
- ³Juda, ambaye kala akamsalata Jesu, ariphoona akahukumiwa kunyongbwa, wajuta na achiuyiza vira vipande salasini vya feza kpwa akulu a alavyadzi-sadaka na vilongozi a Chiyahudi.
- ⁴Achiamba, "Nákosa kpwa kulavya mlatso wa mutu asiye na makosa." Lakini nyo achiamba, "Ganahuhusuni go? Hiyo ni shauriyo."
- ⁵Juda wazitsupha zira pesa ndani ya Nyumba ya Kuvoya Mlungu, achituluka achendadzifunga lugbwe.
- ⁶Akulu a alavyadzi-sadaka ahala zira pesa, achiamba, "Si shariya kuika pesa hizi mfuko wa Nyumba ya Kuvoya Mlungu, kpwa vira zariphiwa kpwa kumwaga mlatso."⁷Phahi apanga azihumire kugula munda wa mfinyangi ili phakale phahali pha kuzikira ajeni.
- ⁸Ndiyo mana munda hinyo uihwa Munda wa Mlatso hadi rero.
- ⁹Chisha maneno arigogomba Mlungu kutsupira nabii Jeremia gatimia goamba, "Ahala vipande salasini vya feza, samani ya yuya ambaye atu a Iziraeli akampigira bei,
- ¹⁰achizihumira kugula munda wa mfinyangi, dza Mlungu arivyonilagiza."
- ¹¹Jesu waimiswa mbere za mkpwulu wa jimbo, naye achimuuza, "We ndiwe Mfalume wa Ayahudi?" Jesu achimuamba, "Kama uchivyogomba."
- ¹²Lakini akulu a alavyadzi-sadaka na vilongozi ariphokala anamshitaki, kagombere neno.
- ¹³Chisha Pilato achimuuza, "Ukale kusikira go mashitaka manji anagokushitakira?"
- ¹⁴Lakini ye kayajibu neno; phahi hiye mkpwulu wa jimbo achiangalala sana.
- ¹⁵Kawaida chila Sukukuu ya Pasaka mkpwulu wa jimbo kala nkuavugurira mfunbwa mmwenga yetsambulwa ni atu.
- ¹⁶Wakati hinyo kpwakala na mfunbwa mmwenga yemanyikana sana, na dzinare ni Baraba.
- ¹⁷Phahi kundi ra atu ririphokala rikakutana, Pilato waambira, "Nikuvugurireni yuphi? Mnataka Baraba hebu Jesu aihwaye Muokoli?"
- ¹⁸Wagomba hivyo mana kala akamanya kukala akamreha Jesu kpwakpwe kpwa sababu ya chidzitso.

- ¹⁹Pilato ariphokala asegere chihi cha hukumu, mchewe wahuma ujumbe achiamba, "Usidziinjize katika mambo ga mutu hiye wa haki, mana nkagaya sana ndosoni kywa sababuye."
- ²⁰Lakini wakati hinyo akulu a alavyadzi-sadaka na vilongozi a Chiyahudi achiabembeleza atu avoye kuvugurirwa Baraba, lakini Jesu anyongbwe.
- ²¹Mkwulu wa jimbo wauza tsona, "Kahi ya hinya airi, ni ani mtakaye nikuvugurireni?" Nao achimuamba, "Baraba!"
- ²²Pilato achiauza, "Sambi, yuno Jesu aihwaye Muokoli, nimhendedze?" Nao osi achiamba, "Naakotwe msalabani!"
- ²³Ela Pilato achiauza, "Kpwa utu wani? Kpwani wahenda uyi wani?" Lakini nyo achizidi kukota likululu, achiamba, "Naakotwe msalabani!"
- ²⁴Phahi, Pilato ariphoona hata akahendadze kandasikirwa na kywa vira fujo kala rikaandza, wahala madzi achitsukutsa mikono mbere za rira kundi ra atu, achiamba, "Mino sina lawama dzulu ya mlatso wa mutu hiyu asiye na kosa; shauri yenu enye."
- ²⁵Atu osi achiamba, "Mlatsowe nauwiswe sisi na ana eh!"
- ²⁶Hipho Pilato waavugurira Baraba, lakini achilagiza Jesu achapwe viboko sana, chisha achimlavya akakotwe msalabani.
- ²⁷Chisha asikari a mkwulu wa jimbo amuinjiza Jesu ndani ya dzumba ra mkwulu wa jimbo ra Chirumi, nao achiiha ayawao osi achimzunguluka.
- ²⁸Achimvula nguwo, achimvika kandzu ya kundu, rangi ya chifalume.
- ²⁹Tsona achisuka chiremba cha miya, achimvika chitswani, na achimuikira mlawa mkpwonowe wa kulume. Achichita mavwindi mbereze, achimnyetera achimuamba, "Mfalume wa Ayahudi! Kala na maisha mare!"
- ³⁰Amtsitsira mahe, chisha achimfuta hura mlawa achimchapa nao chitswani.
- ³¹Bada ya kumnyetera, amvula hira kandzu, achimvika nguwoze. Chisha achimphirika kpwendakotwa msalabani.
- ³²Hara asikari ariphokala anamphirika Jesu akakotwe msalabani, himo njirani akutana na mutu mmwenga yehwa Simoni. Mutu hiye kala ni mwenyezi wa mudzi wa Kirene. Phahi amlazimisha hiye mutu atsukule msalaba wa Jesu
- ³³hadi phahali phaihwapho Gologotha, manage ni "Zekeya ra Chitswa."
- ³⁴Hipho atu ajaribu kumupha mtsanganyiko wa uchi wa zabibu na dawa ya kuusa mavune, lakini Jesu ariphotata achirema kuunwa.
- ³⁵Na bada ya kumkota misumari msalabani, achipiga kura kuganya nguwoze ili amanye ni ani ndiyephaha.

- ³⁶Alafu asagala phapho kumrinda.
- ³⁷Dzulu ya chitswache phaikpwa chibao cha shitakare ambacho kala chikaandikpwa Hiya ni Jesu, Mfalume wa Ayahudi.
- ³⁸Phamwenga naye, akora airi akotwa misalabani, mmwenga uphandewe wa kulume na wanjina uphande wa kumotso.
- ³⁹Atu okala anatsupa phahali hipho amlaphiza na kusuka-suka vitswa
- ⁴⁰na kuamba, "We wadzikarya vya kukala unaweza kubomola Nyumba ya Kuvoya Mlungu na kuidzenga tsona kpwa siku tahu. Sambu amba dzitivye. Ichikala u Mwana wa Mlungu, amba tserera kula msalabani!"
- ⁴¹Vivyo hivyo akulu a alavyadzi-sadaka, phamwenga na alimu a Shariya na vilongozi anjina nao amnyetera achiamba,
- ⁴²"Waokola anjina, lakini kaweza kudziokola mwenye! Hangbwe ni Mfalume wa Iziraeli! Phahi, naatserere kula msalabani naswi humuamini.
- ⁴³Anamkuluphira Mlungu; haya, Mlungu naamtivye ichikala anammendza. Mana waamba ati, 'Mlungu wanitsambula nikale Mwanawe.' "
- ⁴⁴Hata hara aivi ariokotwa phamwenga naye, piya nao amlaphiza.
- ⁴⁵Kpwakala na jiza tsi ndzima kula saa sita za mutsi hadi saa tisiya.
- ⁴⁶Iriphofika kama saa tisiya, Jesu warira likululu, achiamba, "Eloi, Eloi, lema sabakthani?" Manage ni, "Mlungu wangu, Mlungu wangu, mbona ukaniricha?"
- ⁴⁷Atu anjina ariokala akaima phephi ariphosikira hivyo aamba, "Mutu hiyu anamuiha Elija."
- ⁴⁸Mmwenga wao wazola achendahala demu achirivwika ndani ya uchi wa ngbwadu, achirigbwadzika mgongoni. Chisha achimupha Jesu afyondze.
- ⁴⁹Ela anjina achiamba, "Mriche, hulole ichikala Elija andakpwedza amtivye."
- ⁵⁰Phahi Jesu warira tsona kpwa sauti kulu, achikata roho.
- ⁵¹Wakati hinyo hinyo paziya ya Nyumba ya Kuvoya Mlungu yaahuka manungu mairi, kula dzulu hadi photsi. Tsi ndzima ichisumba, miamba ichiahuka,
- ⁵²mbira zichifwenuka, na atu anji a Mlungu ariofwa achifufulwa.
- ⁵³Na bada ya Jesu kufufuka, atu hinyo atuluka mbirani achiphiya mudzi mtakatifu wa Jerusalem, na achiatsembukira atu anji.
- ⁵⁴Phahi, asikari okala anarinda Jesu na mkpwulu wa hara asikari, ariphoona tsi irivyosumba na gara mambo gachivyohendeka, atishirwa sana achiamba, "Hakika mutu hiyu ni Mwana wa Mlungu!"

- ⁵⁵Piya kala phana achetu anji ambao kala achimlunga-lunga Jesu na kumhumikira hangu ariphokala Galilaya. Achetu hinyo kala aimire kure chidide analola,
- ⁵⁶ambao anjina kala ni Maryamu kula Magidala, Maryamu ninengbwa wa Jakobo na Yusufu, phamwenga na mkpwaza Zebedayo.
- ⁵⁷Iriphofika dziloni, watsoloka tajiri mmwenga yeihwa Yusufu. Tajiri hiye kpwao kala ni mudzi wa Arimathaya, naye piya kala ni mwanafundzi wa Jesu.
- ⁵⁸Waphiya kpwa Pilato achendavoya ruhusa ahewe mwiri wa Jesu, naye Pilato achilagiza ahewe.
- ⁵⁹Yusufu achihala hura mwiri achiulinga shanda safi,
- ⁶⁰achiuzika ndani ya mbiraye nyipha ambayo kala akaitsonga mwambani. Chisha achibwiningiza mryango wa mbira na dziwe kulu, na badaye achiphiya vyakpwe.
- ⁶¹Maryamu kula Magidala na yuya Maryamu wanjina kala asegere kulola kura mbirani.
- ⁶²Siku ya phiriye, ambayo kala ni Siku ya Kuoya, akulu a alavyadzi-sadaka na Mafarisayo amlunga Pilato,
- ⁶³achendamuamba, "Muishimiwa, hunatambukira kukala yuya wa handzo kabla ya kufwa waamba, 'Bada ya siku tahu n'ndafufuka.'
- ⁶⁴Kpwa hivyo lagiza asikari akarinde hira mbira hadi siku ya hahu, ili anafundzie asedze akamuiya, akaambira atu, 'Akafufuka.' Hiri handzo ra mwisho rindakala iyi zaidi kuriko rira ra kpwandza."
- ⁶⁵Pilato achiaambira, "Halani asikari; mkahakikishe hiyo mbiraye inarindwato."
- ⁶⁶Phahi, aphiya achendatiya alama dzulu ya rira dziwe na achiricha asikari arinde.

Mathayo 28

- ¹Bada ya Siku ya Kuoya, wakati kala kuchere chimirimiri cha siku ya Jumapili, Maryamu kula Magidala na yuya Maryamu wanjina aphiya kpwendalola hira mbira.
- ²Gafula tsi yasumba sana, mana malaika wa Mlungu watsereera kula mlunguni, achendapingilisa rira dziwe, achirisagarira.
- ³Hiye malaika waonekana dza limeme na mavwazige kala ni mereru dza bafuta.
- ⁴Arindzi a hira mbira akakama kpwa wuoga na achigbwa achikala avi akafwa.
- ⁵Lakini yuya malaika waambira hara achetu, "Msiogophe! Ninamanya kukala mnamuendza Jesu ariyekotwa misumari msalabani.

- ⁶Hipha kapho, mana akafufuka dza viratu arivyogomba. Ndzoni mlole phahali phokala akalazwa.
- ⁷Namwi phiyani upesi mkaambire anafundzie kukala akafufuka, na hivi sambu akakutanguliyani kuphiya Galilaya ambako mndamuona. Msiyale nchivyokuambirani.”
- ⁸Phahi auka upesi phara mbirani na wuoga kuno akahererwa sana, achizola kpwendaambira anafundzie.
- ⁹Mara mwenga Jesu achikutana nao, na achiaambira, "Mkalamukadze, ano mayo?" Hara achetu amlunga, achimgbwira maguluge achimuabudu.
- ¹⁰Chisha Jesu achiaamba, "Msiogophe! Phiyani mkaambire enehu aphiye Galilaya, na andaniona kuko.”
- ¹¹Hara achetu ariphokala anaphiya vyao, arindzi anjina a mbira aphiya mudzini kpwendalavya habari kpwa akulu a alavyadzi-sadaka kuhusu mambo gosi gohendeka mbirani.
- ¹²Phahi, hinyo akulu a alavyadzi-sadaka akutana na vilongozi anjina a Chiyahudi. Bada ya kubisha nao, achiahonga pesa nyinji hara asikari,
- ¹³achiaambira, "Mwimwi mndaamba, 'Anafundzie akedza usiku na akamuiya wakati sino che hurere.’
- ¹⁴Na mkpwulu wa jimbo achigasikira higa, sino hundagomba naye hata akubali kukala tamuna makosa.”
- ¹⁵Phahi hara asikari ahala zira pesa, na achihenda viratu arivyolagizwa. Habari hizi zaenea hiko kpwa Ayahudi hadi rero.
- ¹⁶Hara anafundzi kumi na mmwenga aphiya Galilaya hiko gambani ambako kala akalagizirwa ni Jesu.
- ¹⁷Ariphomuona, amuabudu, dzagbwe kala ana wasi-wasi taamini kukala ni iye.
- ¹⁸Chisha Jesu waasengerera phara kala aripho, achiaambira, "Náhewa uwezo wosi dzulu mlunguni na duniani.
- ¹⁹Kpwa hivyo phiyani mkahende makabila gosi ganilunge. Muabatize kpwa dzina ra Baba, ra Mwana, na ra Roho wa Mlungu,
- ²⁰mkaafundze alunge chila chitu nrichokulagizani. Hakika nami n'ndakala phamwenga namwi siku zosi, hadi mwisho wa dunia.”

Mariko

Mariko 1

- ¹Hino ni Injili kuhusu Jesu Masihi, Mwana wa Mlungu. Habarize zaandza,
- ²viratu irivyoandikpwa ni manabii, Mlungu phoamba: "N'ndatanguliza mhumwa wangu mberezo, ambaye andakutengezera njirayo.
- ³Mutu hiye anakota likululu hiko weruni kuaambira atu: 'Tayarishani njira ya Mwenyezi Mlungu na muigolose.' "
- ⁴Phahi kpwapwedza Johana M'batizadzi hiko weruni naye kala anahubiri na kuambira atu abatizwe achiamba, "Tubuni dambi m'batizwe, ili Mlungu akusameheni."
- ⁵Atu anji kula jimbo ra Juda na mudzi wa Jerusalemu amlunga Johana ili asikize mahubirige. Ariphotubu dambi zao, waabatiza muho wa Joridani.
- ⁶Johana kala achivwala vwazi rotengezwa na nyoya za ngamia na kala achidzifunga mkanda wa chingo chununi. Chakuryache chakala ndzije na asali.
- ⁷Kala achiatangazira atu kukala, "Ye edzaye bada ya mimi ana uwezo zaidi yangu, ambaye mimi sifwaha hata kuvula virahuvye.
- ⁸Mino nakubatizani na madzi; lakini iye andakubatizani na Roho wa Mlungu."
- ⁹Wakati hinyo Jesu wakpwedza kula Nazareti, mudzi wa jimbo ra Galilaya, na Johana achim'batiza muho wa Joridani.
- ¹⁰Saa iyo-iyu Jesu ariphotuluka mura madzini, waona mlunguni kukafwenuka, na Roho wa Mlungu anatserera na mfwano dza wa njiya, achedzagbwa dzuluye.
- ¹¹Chisha kpwatuluka sauti kula mlunguni ichiamba, "Uwe ndiwe mwanangu nikumenzaye, nawe unanihamira sana."
- ¹²Saa iyo-iyu Jesu walongozwa ni Roho wa Mlungu kuphiya hiko weruni.
- ¹³Phahi wakala hiko siku arubaini, iye na nyama a weruni bahi. Wakati wosi uho, Jesu wajezwa ni Shetani, lakini malaika achedzamterya.
- ¹⁴Sambi bada ya Johana kutiywa jela, Jesu waphiya jimbo ra Galilaya achendatangaza habari ndzuri kula kpwa Mlungu.
- ¹⁵Waamba, "Wakati ukafika, na Mfalume yela kpwa Mlungu a phephi kpwedzawala atue. Tubuni na muamini hizo habari ndzuri."
- ¹⁶Siku mwenga Jesu ariphokala anatsupa na kanda-kanda ya Ziya ra Galilaya, waona atu airi, Simoni na nduguye Anderea. Atu hinya kala anatsupha chimia ziyani mana kala ni avuvi.
- ¹⁷Phahi waambira, "Nilungani! N'ndakuhendani avuvi a atu."

- ¹⁸Na saa iyo-iyo aricha vimia vyao achimlunga.
- ¹⁹Jesu ariphosengera mbere chidide, waona Jakobo na nduguye Johana, anangbwa a Zebedayo. Kala a dauni anashona vimia vyao.
- ²⁰Saa iyo-iyo Jesu waaiha, achimrichira ise yao ro dau phamwenga na ahendadzi-kazi na achimlunga Jesu.
- ²¹Jesu na hara ariotsambula aphiya hadi mudzi wa Kaperinaumu na Siku ya Kuoya iriphofika Jesu wainjira sinagogini achiandza kufundza.
- ²²Atu aangalazwa ni mafundzoge, mana wafundza dza mutu ariye na uwezo, wala si dza alimu a Shariya.
- ²³Saa iyo-iyo mumo Sinagogini kala mna mutu wa pepho.
- ²⁴Wakota likululu achiamba, "Unamini wee, Jesu wa Nazareti? Ukedzahumarigiza? Nakumanya! Uwe u Mutu wa Haki yela kpwa Mlungu."
- ²⁵Lakini Jesu wamdemurira yuya pepho, achimuamba, "Nyamala, na utuluke!"
- ²⁶Phahi yuya pepho wamkakamisa yuya mutu, achikota likululu ndipho achituluka.
- ²⁷Atu osi aangalala na achiuzana enye kpwa enye, achiamba, "Ni utu wani huno? Hebu, ni mafundzo maphya ga uwezo! Hata anademurira pepho nao anamsikira!"
- ²⁸Hipho nguma ya Jesu yaenea jimbo rosi ra Galilaya.
- ²⁹Saa iyo-iyo Jesu na anafundzie ariphotuluka mura sinagogini, Jesu, Jakobo, na Johana, aphiya phamwenga na Simoni na Anderea kpwao kaya.
- ³⁰Hiko kaya, mtsedza mchetu wa Simoni kala akadziambalaza kpwa sababu kala ana homa kali. Naye Jesu ariphofika phara kaya achiambirwa.
- ³¹Phahi wamgbwira mkpwono yuya mchetu, naye achiunuka. Saa iyo-iyo homa richiphola achiandza kuahumikira.
- ³²Dziloniye, Siku ya Kuoya kala ikasira naro jiza rinaanda, atu amrehera Jesu akongo osi na hara ambao ka ana pepho.
- ³³Atu osi, mudzi mzima akpwedza pho mhalani,
- ³⁴na Jesu achiphoza anji ariokala na makongo ga aina nyinji. Piya watuluza pepho, lakini kayaziricha zikagomba, mana kala zinamanya iye ni ani.
- ³⁵Muhondoye, chimirimiri kabla ya atu kulamuka, Jesu watuluka achiphiya phahali kanda macheye achendavoya.
- ³⁶Lakini Simoni na ayae akpwendamuendza,
- ³⁷na ariphomuona amuamba, "Atu osi anakuendza."

³⁸Ela Jesu achiaambira, "Nahuphiyeni midzi yanjina ili nikatangaze ujumbe wangu hiko nako, mana nakpwedza kpwa gago."

³⁹Phahi wanyendeka Galilaya yosi, achitangaza ujumbe kula kpwa Mlungu masinagogini mwao na kutuluza pepho.

⁴⁰Mutu mmwenga ambaye kala ana mahana wakpwezachita mavwindi mbere za Jesu achiamba, "Uchimendza unaweza kunitakasa."

⁴¹Jesu wamuonera mbazi sana, achigolosa mkpwonowe achinguta yuya mutu wa mahana, achimuamba, "Ehe! Nalonda, takasika."

⁴²Na saa iyo-iyu hura ukongo wa mahana uchiphola, mwiriwe uchikala mzuri.

⁴³Kabla ya kulagiza yuya mutu kuphiya vyakpwe, Jesu wamsisitizira sana achimuamba,

⁴⁴"Usimuambire mutu yeyesi! Ela phiya ukadzionyese kpwa Mlavyadzi-sadaka na ulavye sadaka kama vyo shariya za Musa vyolagiza, ili ukale ushahidi kpwa atu kala ukaphola kpweli."

⁴⁵Lakini yuya mutu wamuambira chila mutu yemuona kala akaphozwa ni Jesu, na habari zichienea hata ichikala Jesu kaweza tsona kuinjira midzini wazi-wazi, ela wakala ko kanda-kanda kusiko na atu. Hata hivyo atu amlunga vivyo kula chila phahali.

Mariko 2

¹Jumwa na chisiku Jesu wauya Kaperinaumu, na atu achisikira kukala wakpwedza asegere ko asagalako.

²Hipho umati mkpwulu wa atu wakpwedza uchiodzala mpaka atu achikala taaweza kusengerera mryango, naye Jesu achieleza atu mambo ga Mlungu.

³Chisha kpwakpwedza atu ane ambao kala akatsukula mkpwongo wa kuphola vilungo kumreha kpwa Jesu.

⁴Lakini kpwa sababu ya hura umati wa atu, hara okala akatsukula mkpwongo, taayaweza kumfisa phara ariphokala Jesu. Phahi apanda dzulu ya hira nyumba, achielekeza phara ariphokala Jesu, achiphahenda mwanya, chisha achimtsereza yuya mkpwongo na chitandache.

⁵Jesu ariphoona hara atu vira amkuluphiravyo, wamuamba yuya mkpwongo, "Mwanangu, ukasamehewa dambizo."

⁶Phahi alimu anjina a Shariya ariokala asegere hipho adziuza mwao mioyoni,

⁷"Kpwa utu wani yuno anagomba vino? Anakufuru Mlungu ati! Takuna mutu awezaye kusamehe dambi siphokala Mlungu macheye."

- ⁸Saa iyo-iyo Jesu wamanya maazo gao, na achiauza, "Kpwa utu wani mnaaza hivyo mwenu mioyoni?"
- ⁹Ni riphi ra rahisi, ni kumuamba hiyu mutu wa kuphola vilungo, 'Ukasamehewa dambizo,' hebu ni kumuamba, 'Unuka, hala tandikoro uphiye vyako?'
- ¹⁰Ela n'ndakuhendani mmanye kukala mimi, Mutu Yela Mlunguni, nina uwezo wa kusamehe dambi himu duniani." Chisha achimuamba yuya mkpwongo,
- ¹¹"Nakuamba, unuka uhale tandikoro uphiye kaya."
- ¹²Saa iyo-iyo achiunuka, achihala chitandache na achiuka kuno atu osi anamlola. Na osi aangelala na achimtogola Mlungu, achiamba, "Mambo higa! Tahudzangbwegaona bii."
- ¹³Jesu waphiya tsona kanda ya ziya ra Galilaya. Kundi kulu ra atu richimlunga naye achiandza kuafundza.
- ¹⁴Ariphokala anaphiya vyakpwe wamuona karani wa kodi aihwaye Lawi, mwana wa Alfayo, asegere phakpwe ofisini. Achimuamba, "Nilunga," naye Lawi waunuka achimlunga.
- ¹⁵Badaye, Jesu na anafundzie akpwendarya chakurya nyumbani kpwa Lawi. Na ariphokala asegere anarya, makarani ga kodi na atu anjina ariokala achiharirwa kala ni achina-dambi akpwezarya phamwenga naye.
- ¹⁶Alimu a Shariya okala ni a kundi ra Mafarisayo amuona Jesu anarya na atu hinya. Phahi achiauza anafundzie, "Mbona yuno anarya phamwenga na makarani ga kodi na achina-dambi anjina?"
- ¹⁷Jesu ariphosikira waambira, "Azima taana haja ya mganga, ela hara akongo ndio ario na haja ya mganga. Mino siyakpwezaiha atu adzionao ana haki, ela n'akpwedza kpwa achina-dambi."
- ¹⁸Wakati mmwenga ambapho Mafarisayo na anafundzi a Johana kala akafunga, atu anjina akpwezamuza Jesu, "Mbona anafundzi a Johana na a Mafarisayo anafunga ela ako taafunga?"
- ¹⁹Jesu achiamba, "Hangu rini ajeni a harusini akafunga, naye bwana arusi achere phamwenga nao? Taaweza kufunga wakati bwana arusi achere phamwenga nao.
- ²⁰Ela kuredza wakati ambapho bwana arusi andauswa. Hinyo ndio wakati ndiphofunga.
- ²¹Tsona takuna ashonaye chiraka chiphya nguwo ya kare; mana achihenda hivyo chira chiraka chindakpwanyuka, chiphya chirichane na cha kare, na hipho nguwo ya kare indazidi kpwaahuka.
- ²²Wala takuna atiyaye uchi muphya viriba vya kare; mana achihenda hivyo hura uchi undaahula zira chingo, zibanangike nao umwagike. Uchi muphya utiywa viriba viphya."

²³Wakati mmwenga kala ni Siku ya Kuoya, Jesu na anafundzie atsapira minda ya nganu. Ariphekala anatsupa, anafundzie aandza kukata na kuphulula masuche ga nganu achirya.

²⁴Mafarisayo ariphoona vira, amuuza Jesu, "Mbona anafundzio anahenda kazi Siku ya Kuoya? Lola! Anahenda dzambo ambaro si shariya kpwehu sisi Ayahudi kuhendwa Siku ya Kuoya."

²⁵Jesu achiaambira, "Hebu tamdzangbwesoma arivyohenda Mfalume Daudi na ayae ariphosikira ndzala?"

²⁶Wakati Abiathari kala ndiye Mlavyadzi-sadaka Mkpwulu, Daudi wamenya hema ra kumuabudu Mlungu, achirya mabofulo gotengbwa kpwa kazi ya Mlungu. Chishariya, alavyadzi-sadaka bahi ndio kala anaruhusiwa kugarya, ela Daudi warya, tsona achiapha ayae."

²⁷Alafu Jesu achiaambira, "Siku ya Kuoya yaikirwa atu, wala siyo kukala atu aumbwa kpwa sababu ya Siku ya Kuoya.

²⁸Kpwa hivyo, mimi, Mutu Yela Mlunguni, nina uwezo wa mambo gosi ga Siku ya Kuoya."

Mariko 3

¹Siku yanjina Jesu wainjira sinagogini, namo kala muna mutu yefuwa mkpwono.

²Piya kala mna atu ambao kala anaendza chizigbwa cha kumshitakira Jesu. Atu hinyo amrorera aone ichikala andamphoza yuya mutu Siku ya Kuoya.

³Jesu achimuamba yuya mutu wa kufuwa mkpwono, "Ndzo hiku."

⁴Chisha achiauza hara ariokala phara, "Ni riphi ra shariya kuhenda Siku ya Kuoya? Ni mutu kuhenda manono hebu kuhenda mai? Ni kutivya mutu hebu kuolaga?" Lakini osi achinyamala.

⁵Hipho Jesu waatong'orera matso kpwa utsungu, achisononeka kpwa sababu ya kukosa mbazi kpwao. Alafu achimuamba yuya mutu, "Golosa mkpwonoo," naye achiugolosa na uchikala mzima.

⁶Saa iyo-iyoy Mafarisayo atuluka kondze achiungana na atu a chikundi cha Herode kuhenda njama ya kumuolaga.

⁷Jesu na anafundzie auka achiphiya kanda-kanda ya ziya ra Galilaya, na kundi kulu ra atu kula Galilaya richimlunga.

⁸Piya kpwapwedza atu anji kula mudzi wa Jerusalemu, Jimbo ra Judea na jimbo ra Idumea, ng'ambo ya muho wa Joridani, na phephi na midzi ya Tiro na Sidoni. Hano osi akpwedza mana kala akasikira gara ahendago Jesu.

- 9-10 Kpwa vira Jesu kala akaphoza atu anji, akongo osi kala analonda amgute. Phahi Jesu ariphoona hura umati, waambira anafundzie amsengezere dau akale andasagala asedze akafyehwa ni atu.
- 11 Na atu a pepho ariphomuona, adzibwaga photsi mbereze na hinyo pepho achikota likululu achiamba, "Uwe u Mwana wa Mlungu!"
- 12 Ela Jesu waaonya sana asimuambire mutu yeyesi kumhusu.
- 13 Alafu Jesu waphiya gambani na achiiha hara kala anaalonda, nao achimlunga.
- 14 Watsambula kumi na airi, achiaiha "mitume." Waatsambula ili akale phamwenga naye, aahume kpwendatangaza ujumbewe,
- 15 na akale na uwezo wa kutuluza pepho.
- 16 Phahi hara kumi na airi kala ni: Simoni (ariyemwiha Petero),
- 17 Jakobo na Johana, ana a Zebedayo, (waaiha Boanerige, yani manage ni ana a Chiguruguru),
- 18 Anderea, Filipu, Batholomayo, Mathayo, Tomasi, Jakobo mwana wa Alfayo, Thadayo, Simoni (ambaye piya ka achiihwa Mpiganiadzi Uhuru),
- 19 na Juda Iskarioti, ambaye mwisho wamsalata Jesu.
- 20 Badaye Jesu wakpwendainjira nyumba fulani, na kundi ra atu richedza tsona hata ichikala Jesu na anafundzie taana nafwasi ya kurya.
- 21 Atu a kpwao kaya ariphosikira, aphiya kpwendamhala mana atu kala anaamba, "Ana koma!"
- 22 Piya alimu a Shariya ariphokpwedza kula Jerusalemu, aamba, "Analongozwa ni Shetani, mkpwulu wa pepho. Anatuluza pepho kpwa uwezowe."
- 23 Hipo Jesu waaiha, achibisha nao kuhumira ndarira, "Dze Shetani anawezadze kutuluza Shetani?"
- 24 Tsi yoyosi ambayo vilongozie anapingana taiweza kudumu,
- 25 tsona nyumba iganyanayo makundi kupingana, nkutsamuka.
- 26 Phahi ichikala kundi mwenga ra pepho rinapinga utawala wa Shetani, inaonyesa kukala ufalume hinyo unaganyana, nao tauweza kuenderera, mana mwishowe uphephi.
- 27 Wala takuna mutu awezaye kuinjira nyumba ya mutu wa mkpwotse ili amfute malize, isiphokala kpwandza, amfungu mikowa yuya mutu wa mkpwotse ndipho amfute malize.
- 28 Nakuambirani kpweli kukala atu andasamehewa chila dambi na kufuru,

²⁹lakini yeyesi ndiyekufuru Roho wa Mlungu kandasamehewa bii; andakala ana dambi ya milele.”

³⁰Jesu wagomba hivyo mana hara atu kala anaamba, "Hiyu ana pepho.”

³¹Saa iyo-iyo, nine na ndugu a chilume a Jesu akpwedza. Achiima kondze, achilagiza Jesu aihwe.

³²Kundi ra atu kala risegere kumzunguluka; achimuamba, "Bwana! Mayo na enenu a pho phondze anakulonda.”

³³Jesu achiauza, "Mayo na enehu ni ano ani?”

³⁴Alafu walola hara ariokala asegere kumzunguluka na achiamba, "Lolani, hinya ndio mayo na enehu!

³⁵Yeyesi ahendaye alondago Mlungu, ndiye mwenehu na mayo.”

Mariko 4

¹Siku yanjina Jesu waphiya tsona kanda ya Ziya ra Galilaya achiandza kufundza. Sambu kupa vira umati mkpwulu kala ukamzunguluka, wapanda dau ambaro kala rinaelea madzini achisagala. Nao atu osi amphundza pho kanda-kanda ya madzi.

²Wahumira ndarira kuafundza mambo manji, na kahi ya mafundzoge achiamba,

³"Sikizani! Mkurima mmwenga waphiya kpwakpwe mndani kpwendakumbira mbeyuze.

⁴Ariphokala anakumbira, mbeyu zanjina zagbwa njirani, zichitsotwa ni nyama a mapha.

⁵Mbeyu zanjina zagbwa dzulu ya mawe kokala na mtsanga mchache. Zichimera upesi, kupa sababu mtsanga kala sio munji.

⁶Lakini kuriphokala na dzuwa kali, hira mimea yanyala, ichifwa kupa vira miziye kala i dzulu-dzulu.

⁷Mbeyu zanjina zagbwa zichimera phamwenga na mbeyu za miya. Phokala zinakula, miya nayo yakula, hipo, hira mimea ichilingbwa-lingbwa ni hira miya hata taivyarire.

⁸Zanjina nazo zagbwa mtsanga wa nguvu, zichimera na zichikula. Hizi zavyala masuche ga tembe salasini, ganjina ga tembe sitini na hata masuche ganjina gachivyala tembe gana.”

⁹Chisha achiamba, "Ariye na masikiro, naasikire!”

¹⁰Jesu ariphokala macheye, hara kumi na airi na anjina ambao kala akasikiza mahubirige amlunga, achendamuuza mana ya ndariraze.

- ¹¹Achiaambira, "Mwimwi mkaajaliwa kumanya siri za ufalume ambao Mlungu wanipha, ela nyo asioamini andatsuphirwa zo ndarira bahi
- ¹²ili: 'Alole lakini asione, asikize lakini asielewe; asedze akagaluka, akamuuyira Mlungu na akasamehewa.' "
- ¹³Alafu Jesu achiauza, "Kpwani ndarira hino tamuielewa? Sambu mndaelewadze hizo ndarira zanjina?"
- ¹⁴Ndipho naye achiaambira, "Mkurima ni dza mutu atangazaye neno ra Mlungu.
- ¹⁵Mbeyu zanjina phokala zinaphandwa zagbwa njirani na zichiriwa ni nyama a mapha. Hivyo ni dza atu asikirao neno, na saa iyo-iyo Shetani akedzarihala ro neno richirophandwa mwao mioyoni.
- ¹⁶Nazo mbeyu zanjina zagbwa maweni zichimera upesi lakini kpwa vira mizi ka i dzulu-dzulu zafwa. Hivyo ni dza atu asikirao neno na mara mwenga akariphokera na raha,
- ¹⁷lakini tarimenya ndani, nao nkuenderera kurigbwira kpwa muda tu. Kpwa hivyo kuchizuka tabu na mateso gogosi kpwa sababu ya kulunga rira neno, atu hivyo nkuriricha mara mwenga.
- ¹⁸Mbeyu zanjina zagbwa miyani zichilingbwa-lingbwa hata zichikosa kuvyala. Hivi ni dza atu asikirao neno,
- ¹⁹lakini mambo ga dunia, na tamaa za mali na mambo ganjina nkpwedzalinga-linga rira neno hata rikakala tarivyala.
- ²⁰Ela mbeyu zogbwa mtsanga wa nguvu, ni mfwano wa atu asikirao neno chisha akariphokera. Nao nkuvyala matunda, dza viratu mbeyu vyovyala masuche ga tembe salasini, ganjina sitini, na hata ganjina gana."
- ²¹Jesu waenderera kubisha achiamba, "Dze, mutu nkuasa taa akaifwinika bakuli au akayiika mvunguririni? Hata! Nkuyiika phahali pha dzulu.
- ²²Mana gara gafwitswago manage ni gedze gaonekane wazi, yaani gosi garigo ga siri manage ni gedze gamanyikane.
- ²³Ichikala mutu yeyesi ana masikiro naasikire."
- ²⁴Piya achiaambira, "Phundzani vinono gara msikirago! Chipimo mupimiracho ayawenu, ndicho ndichopimirwa mwimwi, na hata muenjerezwe zaidi.
- ²⁵Mana yeyesi ariye na chitu na kuchihumira andaenjerezwa. Ela asiyehumira chitu chidide aricho nacho, hata chicho chindahalwa."
- ²⁶Jesu achienderera kuamba, "Hino ni ndarira ya kuhusu ufalume ambao Mlungu wanipha ndivyokala. Mutu nkukumbira mbeyu,
- ²⁷alafu achaenderera na shugulize. Usiku na mutsi, dzagbwe mutu arere hebu a matso, mbeyu nkumera na kukula bila iye kumanya higo gahendekadze.

- ²⁸Mana mtsanga nkuhenda mbeyu ikamera, ikatuluza chikodza kpwandza, alafuye ikakula, ikatuluza suche, chisha mwisho suche rikahenda tembe.
- ²⁹Mavuno gachiphera, ye mkurima nkuphiya na rumure achatsenga mana mavuno ga tayari.”
- ³⁰Tsona Jesu achiamba, "Huambe ufalume ambao Mlungu wanipha ni dza utu wani? Hebu, huhumire ndarira hiphi kueleza?"
- ³¹Hinyo ni dza tembe ya mgandi, ambayo ni ndide kuriko zosi.
- ³²Tembe hino ichiphandwa nkumera, ikakala muhi mkpwulu sana, hata nyama a mapha akedzadzenga nyumba zao dzulu ya pandaze ambapho taphafika dzuwa.”
- ³³Phahi Jesu wahumira ndarira nyinji dza hino kufundza hura umati; achisemurira chiasi ambacho angeweza kuelewa.
- ³⁴Wakati wosi ariphogomba nao wahumira ndarira; ela ariphokala kanda na anafundzie wagomba wazi na kuaeleza chila chitu.
- ³⁵Dziloniye, Jesu waambira anafundzie, "Nahuvukeni ng'ambo.”
- ³⁶Phahi aricha rira kundi ra atu, achimenya dauni arimokala Jesu na achiphiya naye. Na piya kala phana madau ganjina.
- ³⁷Gafula kpwazuka phuto kali, maimbi gachiandza kpwedza dzulu hata dau richikala rinainjira madzi.
- ³⁸Lakini Jesu ye ta kala arere, akaejemeza chitswache mutoni nyuma ya dau. Anafundzie achimlamusa, achimuamba, "Mwalimu, unaona si chitu sino kuhoha?"
- ³⁹Saa iyo-iyu walamuka na achidemurira rira phuto na achiambira maimbi, "Hurira!" Hipho phuto raricha na kuchihurira hu.
- ⁴⁰Alafu Jesu achiauza anafundzie, "Mnaogophani? Dze tamnikuluphira?"
- ⁴¹Lakini nyo atishirwa sana, achiuzana, "Yuno akale ni ani ambaye hata phuto na maimbi ganamsikiza?"

Mariko 5

- ¹Phahi Jesu na anafundzie avuka Ziya ra Galilaya achifika jimbo ra Gadara.
- ²Ariphotuluka dauni, Jesu wakutana na mutu yekala na pepho, ambaye kala ala vikurani.
- ³Mutu hiyu kala achiishi vikurani, wala takuna yeyesi ariyeweza kumfunga hata na singenge.
- ⁴Mana mara nyinji kala achifungbwa mikono na magulu, ela chila wakati anadosa zira singenge. Phahi, kpwa sababu ya nguvuze, takuna yeyesi ariyeweza kumzuwiya.

- ⁵Usiku na mutsi mutu hiyu kala achinyendeka ko vikurani na gambani kuno anakota likululu na kudzikata-kata na mawe.
- ⁶Ariphomuona Jesu aredza kpwa kure, wazola achendamgbwerera maguluni.
- ⁷Chisha pepho ariyekala ndani ya yuya mutu wakota likululu achiamba, "Jesu, Mwana wa Mwenyezi Mlungu, unamini? Lapha kukala kundanitesa!"
- ⁸Ye pepho wagomba hivi kpwa kukala Jesu kala akaamba, "We pepho mui, mtuluke hiyu mutu!"
- ⁹Alafu Jesu achimuza, "Uihwadze?" Naye achiamba, "Naihwa Kundi; mana huanji!"
- ¹⁰Achim'bembeleza sana Jesu asiazole tsi hiyo.
- ¹¹Sambi kala kuna chaa cha nguluwe anji chinanisa kanda-kanda ya gamba.
- ¹²Hara pepho achim'voya Jesu achimuamba, "Hulagize hukainjire hara nguluwe."
- ¹³Jesu achikubali, na pepho achituluka yuya mutu, achendainjira hara nguluwe. Chaa chosi cha nguluwe elufu mbiri, chatserera fuli mteremukoni, chichiinjira ziyani, na nguluwe osi achihoha.
- ¹⁴Arisa a hara nguluwe azola achendasema hiko mudzini na mindani gachigohendeka. Atu achedzalola,
- ¹⁵na ariphofika phara pha Jesu amuona yuya mutu yekala akatuluzwa kundi ra pepho asegere akavwala nguwo na ana achilize, nao achitishirwa.
- ¹⁶Hara ambao agaona gahendekavyo asemurira ayawao. Aambira vira yuya mutu arivyotuluzwa pepho ni Jesu na gara goaphaha hara nguluwe.
- ¹⁷Ndipho atu a jimbo rira achiandza kum'voya Jesu auke tsi yao.
- ¹⁸Jesu ariphokala anainjira dauni, yuya mutu ambaye kala akatuluzwa pepho wam'voya ruhusa aphiye naye.
- ¹⁹Lakini Jesu achirema, achimuamba, "Phiya kaya na ukaambire atuo mambo gosi Mlungu achigokuhendera na vira achivyokuonera mbazi."
- ²⁰Phahi yuya mutu wanyendeka kuko tsi ya Dekapoli achendatangaza arigohenderwa ni Jesu, na osi ariogasikira achiangalala.
- ²¹Jesu ariphola jimbo ra Gadara, wavuka tsona na dau hadi ng'ambo ya phiri ya ziya. Waima kanda-kanda ya ziya, na kundi kulu ra atu richedza richimzunguluka.
- ²²Alafu phakpwedza chilongozi wa sinagogi aihwaye Jairo. Ariphomuona Jesu wamgbwerera maguluni,
- ²³achim'bembeleza achiamba, "Mwanangu mchetu anafwa. Tafadhali kambandikire mkpwono aphole na akale mzima."

- ²⁴Hipho Jesu achiuka naye, na atu anji achimlunga-lunga hata achikala anamfyeha.
- ²⁵Mo kundini, kala mna mchetu mmwenga, ambaye ka ni mkpwongo wa mruwo miaka kumi na miiri.
- ²⁶Mchetu hiyu kala akagaya sana. Wamala aganga, na kuhumira malize zosi, lakini badala ya kuhenda baha, ukongo wazidi.
- ²⁷⁻²⁸Ariphosikira habari za Jesu, waaza mwakpwe moyoni achiamba, "Nchiguta yo nguwoye tu, n'ndaphola." Ndipho achedza pho kundini, nyuma ya Jesu achiguta nguwoye.
- ²⁹Ariphoguta tu, mruwo uchituma na achidzisikira akaphola.
- ³⁰Saa iyo-iyoy Jesu achimanya kala nguvuze zikaphoza mutu, achigalukira rira kundi ra atu achiauza, "Ni ani chiyeguta nguwo yangu?"
- ³¹Anafundzie achimuamba, "Uwe unaona atu akakuzunguluka, tsona unauza, 'Ni ani chiyeniguta?' "
- ³²Lakini Jesu achienderera kuendza achiyeguta nguwoye.
- ³³Hipho yuya mchetu, kpwa vira kala akamanya chigomphaha, wakpwezamgbwerera maguluni kuno anakakama kpwa wuoga, achisemurira chila chitu.
- ³⁴Jesu achimuamba, "Mayo, kpwa sababu ya kunikuluphira ukaphola. Phiya salama mana kundagaya tsona."
- ³⁵Ariphokala acheregomba gaga, kwakpwedza atu kula kaya ya yuya chilongozi, achiamba Jairo, "Pore, ela ye mwanao msichana akafwa, kpwa hivyo takuna haja ya kumyuga mwalimu tsona."
- ³⁶Lakini Jesu kayagatiya nazi gara gobishwa ni hara atu, ela achimuamba Jairo, "Gasikuondose higo, kuluphira tu."
- ³⁷Phahi Jesu kayaruhusu mutu yeyesi kumlunga isiphokala Petero, Jakobo na mwanáo Johana.
- ³⁸Ariphofika kaya pha yuya chilongozi wa sinagogi, Jesu wakuta atu anapiga kululu na kurira.
- ³⁹Wainjira ndani achiaambira hara atu, "Mbona mnarira na kusononeka? Hiyu mwanache kafwere, ela arere tu!"
- ⁴⁰Atu achimtseka, ela ye achiatuluza kondze osi. Chisha achihala ise na nine a yuya mwanache na hara ariokala naye, achiinjira chumbani mokala akalazwa.
- ⁴¹Jesu achimgbwira mkpwono achigomba chikpwao achiamba, " Talitha kumi." Manage ni, "Mwanangu mchetu, lamuka."

⁴²Saa iyo-iyo yuya mwanache waunuka. Achiandza kunyendeka, na atu ariphomuona aangelala sana. Naye kala ni msichana wa miaka kumi na miiri.

⁴³Hipho, Jesu waakahaza asimuambire mutu yeyesi dzambo hiro. Chisha achilagiza yuya mwanache ahewe chakurya.

Mariko 6

¹Jesu wauka hipho phamwenga na anafundzie, achiphiya mudzi arikorerwa.

²⁻³Iriphofika Siku ya Kuoya, waandza kufundza sinagogini na anji ariosikira aangelala. Achiuzana, "Yuno, si ni yuyatu fundi wa mbao, mwana wa Maryamu, na ambaye nduguze ni Jakobo, Jose, Juda na Simoni. Na nduguze a chichetu hunaishi nao phapha. Ni marifwa gani arigoheva? Vyo kpweli, yuno ana uwezo wa kuhenda vilinje hivyo?" Phahi nyo atu taayafwahirwa na achimrema tse-tse-tse.

⁴Alafu Jesu achiaambira, "Nabii nkutogolwa chila phahali, isiphokala phao laloni pharipho na mbarize, na phao kaya pharipho na atue mwenye."

⁵Jesu kayaweza kuhenda vilinje isiphokala waabandikira mikono akongo achache achiaphoza.

⁶Phahi Jesu waangalazwa ni hara atu kpwa sababu ya kusakuluphira. Jesu waphiya chidzidzi hadi chidzidzi kuno anafundza.

⁷Chisha achiiha anafundzie kumi na airi phamwenga, achiapha uwezo wa kutuluza pepo na achiandza kuahuma airi airi kpwendahubiri.

⁸Ndipho achialagiza achiamba, "Tsukulani bakora bahi, ela msihale chakurya, mkoba ama pesa bindoni.

⁹Vwalani virahu lakini msihale nguwo zanjina.

¹⁰Mchiinjira chidzidzi chochosi, kalani ajeni a nyumba mwenga hadi ndiphouka.

¹¹Phophosi ambapho atu andarema kukukaribishani ama kukusikizani phaukeni, na ichikala mnauka kukutani vumbi ra mwenu maguluni, kuaonyesa kala akahenda makosa kpwa kusakusikizani."

¹²Phahi anafundzi akpwendahubiriya atu kuno anaambira atubu dambi zao.

¹³Achituluza pepo anji, na achiapaka mafuha akongo anji na achiphola.

¹⁴Herode, mfalume wa jimbo ra Galilaya, wasikira mambo higa gosi, kpwa vira dzina ra Jesu kala rikaenea chila phahali. Atu anjina kala achiamba, "Johana M'batizadzi akafufuka! Ndiyo mana anaweza kuhenda vilinje vinji."

¹⁵Anjina kala achiamba, "Mutu hiyu ni Elija." Anjina nao achiamba, "Hiyu ni nabii dza viratu manabii anjina a kare."

¹⁶Lakini Herode ariphosikira kuhusu Jesu, waamba, "Hiye ni Johana nriyemkata chitswa, akafufuka."

¹⁷⁻¹⁸Hipho awali Herode walagiza Johana agbwirwe na afungbwe jela. Wahenda hivyo kpwa mana Johana kala akamuambira kala chishariya ni makosa sana kumlóla Herodiya, ambaye kala ni mkpwaza nduguye Filipu.

¹⁹Phahi, Herodiya wamzira sana Johana achilonda kumuolaga. Ela washindwa kuhenda hivyo

²⁰kpwa sababu Herode kala anamrinda. Herode wamuogopa Johana kpwa mana wamanya kukala ni mutu wa haki na asiye na lawama. Herode wamendza kumsikiza, dzagbwe kala anayugika mwakpwe moyoni.

²¹Ela wakati wa kusherekea kumbukumbu ya kuvyalwa kpwa Herode, Herodiya waphaha nafwasi. Siku hiyo Herode waatayarishira karamu azehe a ngambiye, akulu a viha, na vilongozi a Galilaya.

²²Naye mwana mchetu wa Herodiya wakpwezafwiha vinono mbere za hara atu, hata Herode na ajenie achihamirwa. Ndipho mfalume achimuamba yuya msichana, "Voya chochosi ulondacho nami n'ndakupha."

²³Chisha achihendalapha achiamba, "N'ndakupha chochosi ndichovoya, hata ikale ni nusu ya ufalume wangu!"

²⁴Hipho yuya msichana watuluka achendamuuza nine, "Mayo, nkavoyeni?" Nine achimuamba, "Kavoye chitswa cha Johana M'batizadzi."

²⁵Ndipho yuya msichana achiuya kpwa mfalume upesi achendamuamba, "Nalonda uniphe chitswa cha Johana M'batizadzi ndani ya chano vivi sambu."

²⁶Mfalume ariphosikira hivyo wasononeka sana, lakini kpwa vira kala akalapha mbere za ajenie, kayamendza kumkahaza.

²⁷Saa iyo-iyo achihuma asikari arehe chitswa cha Johana, naye asikari achendamkata chitswa mumo jela.

²⁸Chisha achireha chira chitswa ndani ya chano, achimupha yuya msichana, naye achimphirikira nine.

²⁹Anafundzi a Johana ariphosikira habari hizo, akpwezahala mwiriwe na achendauzika.

³⁰Hara mitume ariphouya kula charo chao cha kpwendahubiri, akutana phamwenga achimsemurira Jesu gosi arigohenda na kuhubiri.

³¹Phahi kpwa vira kala phana atu anji, edzao na aukao, akala taana nafwasi ya hata kurya. Hipho Jesu waambira anafundzie, "Nahuukeni hukakale machiyehu, ili huoye kpwa muda."

³²Phahi auka na dau achiphiya kpwahali kusikokala na atu, ili akakale machiyao.

- ³³Lakini Jesu ariphokala anauka waonewa, nao atu anji kula midzi minji azola na kanda-kanda ya ziya hata Jesu na anafundzie ariphofika, nyo a kuko kare.
- ³⁴Jesu ariphotuluka dauni waona rira kundi kulu ra atu. Naye achiaonera mbazi mana kala ni dza mang'ondzi gasigo na mrisa. Phahi achiafundza mambo manji.
- ³⁵Kuriphokala dziloni anafundzie akpwendamuamba, "Mwalimu, hipha ni kure na midzi, na jiza rinaanda.
- ³⁶Baha uambire, aphiye mitaa na vidzidzi vya phephi, akagule chakurya."
- ³⁷Lakini Jesu achiaambira, "Ariseni mwimwi." Nao achimuamba, "Huyaphahaphi chakurya cha maelufu ga pesa ili chitoshe atu hinya?"
- ³⁸Jesu achiauza, "Kpwani mna mabofulo mangaphi? Phiyani mkalole." Ariphokpwendalola, achimuamba, "Huna mabofulo matsano, na ng'onda airi."
- ³⁹Phahi Jesu waambira atu asagale nyasini makundi makundi.
- ⁴⁰Nao achisagala makundi ga atu hamsini hamsini, na ga gana gana.
- ⁴¹Jesu wahala gara mabofulo matsano na hara ng'onda airi, achilola dzulu mlunguni achimshukuru Mlungu. Ariphomala kuvoya, wamega-mega gara mabofulo na hara ng'onda achiapha anafundzie aaganyire atu.
- ⁴²Atu osi arya kumvuna.
- ⁴³Chisha anafundzie achitsola-tsola masaza ga mabofulo na ng'onda goodzaza kaphu kumi na mbiri.
- ⁴⁴Na hara ariorya mabofulo kala ni alume elufu tsano.
- ⁴⁵Saa iyo-iyo Jesu waambira anafundzie apande dau avuke ng'ambo aphiye Bethisaida. Lakini ye mwenye achibaki ko nyuma kuaambira atu auye makpwao.
- ⁴⁶Bada ya kulagana na hara atu, waphiya gambani kpwendavoya Mlungu.
- ⁴⁷Dziloni, dau ririphokala rikafika kahi-kahi ya ziya, naye Jesu kala a macheye tsi kavu.
- ⁴⁸Phahi waona anafundzie kpwa kure agayavyo na phuto kali rohenda dau rao risiphiye mbere. Na iriphofika wakati wa dzogolo ra kpwandza kuika, waalunga anafundzie kuno ananyendeka dzulu ya madzi, achihenda avi anaatsupa.
- ⁴⁹Lakini anafundzie ariphomuona ananyendeka dzulu ya madzi, aona ni tsunusi. Nao achikota likululu kpwa wuoga,
- ⁵⁰mana atishirwa ariphomuona. Lakini saa iyo-iyo Jesu waambira, "Msikakame, ni mimi! Msitishirwe!"
- ⁵¹Chisha achipanda nao mo dauni, naro phuto richihurira. Hinyo anafundzie aangalazwa sana ni gara arigogaona.

⁵²Taayaelewa uwezo wa Jesu wa kurisa atu na mabofulo machache kala ulaphi, mana kala ni visoto na kala taamini.

⁵³Bada ya kuvuka ziya, atuluka tsi kavu seemu za Genesareti, achitiya nanga.

⁵⁴Jesu na anafundzie ariphotuluka dauni, saa iyo-iyo atu amtambukira.

⁵⁵Phahi atu azunguluka tsi yosi, achitsukula akongo ambao akalazwa michekani mwao, achiaphirika chila phahali ariphosikira Jesu akaphiya.

⁵⁶Na kokosi Jesu arikophiya, vidzidzini, midzini ama mindani, atu asagika akongo cheteni. Nao achim'voya aaruhusu akongo agute hata dzagbwe ni pindo ra nguwoye ili aphozwe, nao osi arioriguta aphola.

Mariko 7

¹Siku mwenga Mafarisayo na alimu a Shariya anjina ambao kala ala Jerusalemu, akpwedzakusanyana mbere za Jesu.

²Phapho aona anafundzi a Jesu anarya bila ya kutsukutsa mikono.

³Mana Mafarisayo na Ayahudi anjina osi nkulunga mila za akare ao; taarya chitu bila ya kutsukutsa mikono vinono.

⁴Tsona, achiuya kula cheteni taarya chochosi bila kutawaza. Piya kuna mila zanjina ambazo azirisi kula kpwa akare ao kama vira atsukutsavyo vyombo vya kuririra na kujitira.

⁵Phahi, Mafarisayo na alimu a Shariya amuuza Jesu, "Kpwa utu wani anafundzio anavundza mila hurizorichirwa ni akare ehu? Mana nyo nkurya bila kutsukutsa mikono."

⁶Jesu achiaambira, "Mbavi mu anafiki mwi! Nabii Isaya wagomba kpweli kukuhusuni ariphotabiri ujumbe hinyu kula kpwa Mlungu: 'Atu hinya nkuniogopha na maneno bahi, ela mioyo yao i kure nami.

⁷Kuniabudu kpwao takuna mana, mana anafundza atu alunge mafundzo ga chibinadamu tu badala ya Shariya za Mlungu.'

⁸Mwimwi mkuricha shariya za Mlungu na kugbwiririra mila za atu."

⁹Jesu achienderera kuaambira, "Mwimwi mnamanya kuricha shariya ya Mlungu chiwerevu ili mlunge mila zenu!

¹⁰Mana nabii Musa walavya shariya achilagiza, 'Ogopha sowe na mayoo.' Na chisha achiamba, 'Yeyesi alaphizaye ise na nine, n'lazima aolagbwe.'

¹¹Lakini mwi mnaruhusu mutu kuricha avyazie, kpwa kuambira, 'Cho n'richo nacho kpwa kukusaidiyani nkachilavya sadaka kpwa Mlungu.'

¹²Kpwa hivyo karuhusiwa kuterya ise au nine tsona.

¹³Kpwa kulunga mila zenu mrizophokera kula kpwa akare enu na kuzifundza, mnazarau malagizo ga Mlungu. Namwi mnahenda mambo manji ga kuigana na higo.”

¹⁴Jesu waiha tsona rira kundi ra atu achiaambira, "Hebu niphundzani vinono mosi, na mmanyenine ninagokuambirani!

¹⁵Takuna chitu chochosi chiinjiracho ndani ya mutu kula kondze chinachoweza kumtiya najisi. Lakini chilacho ndani ndicho chimtiyacho najisi.

[¹⁶Ariye na masikiro, naasikire!"]

¹⁷Bada ya kurichana na hara atu, Jesu wainjira ndani ya nyumba. Himo nyumbani, anafundzie amuuza mana ya maneno arigogomba.

¹⁸Naye achiauza, "Hata mwimwi piya tamuelewa? Kpwani tammanyenine kukala chitu chimuinjiracho mutu kula kondze, tachiweza kumtiya najisi?

¹⁹Mana tachimuinjira moyoni, ela chinainjira ndanini na badaye ayachinya." (Kpwa kugomba hivyo, Jesu wahalalisha vyakurya vyosi.)

²⁰Achienderera kuamba, "Maneno mai galago ndani ya mutu ndigo gamtiyago najisi.

²¹Mana kula ndani, moyoni mwa mutu, ndimo asili ya uyi wosi, kpwa mfwano maazo mai, udiya, wivi, kuolaga,

²²uzembe, uroho, kuhenda mai, lihandzo, tamaa mbaya, chidzitso, lisengenyo, ngulu, na uzuzu.

²³Uyi wosi hinyu ula moyoni mwa mutu, nao ndio umtiyao najisi.”

²⁴Jesu ariphouka hiko Galilaya, waphiya seemu ya mudzi wa Tiro. Hiko wamenya nyumba mwenga achitaka asimanywe ni atu, lakini kayaweza kudzifwitsa.

²⁵⁻²⁶Kpwakpwedza mchetu mmwenga asiyekala Myahudi. Mchetu hiye kala ni Mgiriki, mwenyezi wa phapho lalo ra Foinike, jimbo ra Siria. Mwanawe mchetu kala ana pepho, phahi ariphosikira habari za Jesu wakpwedzangbwerera maguluni, na achim'voya amtuluze pepho mwanawe.

²⁷Jesu achimuamba, "Richa anache amvune kpwandza; mana si vinono kuhala chakurya cha anache na kuchitsuphira madiya.”

²⁸Lakini yuya mchetu achimuamba, "Ni kpweli Bwana, ela amba madiya nkurya pukupuku zigbwazo kula mezani pha matajiri gao.”

²⁹Alafu Jesu achimuamba, "Kpwa sababu ya maneno uchigogomba, phiya kaya. Pepho akamtuluka mwanao!”

³⁰Phahi, waphiya kaya, ariphofika kaya wakpwendamkuta mwanawe arere chitandani, pepho kala akamtuluka kare.

³¹Chisha Jesu wauka seemu za midzi ya Tiro na Sidoni, achiphiya avi anauya seemu za ziya ra Galilaya, hadi achifika tsi ya Dekapoli.

³²Phahi atu amreha mutu ambaye kala ni bwibwi na masito, achim'voya Jesu amwiikire mikono ili aphole.

³³Jesu wamhala achiphiya naye kanda, kure na rira kundi ra atu. Achendamtiya mala ga masikiro, chisha achitsitsa mahe malani, achimguta lilimi.

³⁴Chisha achilola dzulu mlunguni, achiuyiza mseho, achimuamba, "Efatha," manage ni "Vuguka."

³⁵Saa iyo-iyoyuya mutu achiandza kusikira na kugomba.

³⁶Jesu achiaambira hara ariokala hipho asiseme na mutu yeyesi. Lakini chila arivyozi kuakahaza, ndivyo arivyozi kutangaza sana.

³⁷Atu aangalala sana, achiamba, "Mambo achigohenda ni manono sana, mana akahenda asioweza kusikira asikire, na mabwibwi agombe!"

Mariko 8

¹Siku yanjina, kundi kulu ra atu rakusanyika phahali tsona, lakini achikala taana chakurya. Hipho Jesu waiha anafundzie, achiamba,

²"Naaonera mbazi hinya atu, mana nkakala nao siku tahu, na hivi sambi taana chakurya.

³Nchiaricha aphiye vyao na ndzala, anaweza kpwendahirika mo njirani, mana anjina ao ala kure."

⁴Nao achimuamba, "Phano weruni hundaphahaphi chakurya cha kutosha cha kurisa atu osi hano?"

⁵Achiauza, "Kpwani mna mabofulo mangaphi?" Nao achiamba, "Sabaa."

⁶Phahi Jesu waambira atu osi asagale. Chisha achihala gara mabofulo sabaa na achimshukuru Mlungu. Achigamega-mega, alafu achiapha anafundzie, nao achiaganyira atu.

⁷Piya akala na ng'onda achache. Phahi Jesu waajaliya, achilagiza aganyirwe atu piya.

⁸Atu osi arya kumvuna. Bada ya kurya anafundzie achitsola-tsola masaza goodzaza mabweko sabaa.

⁹Nao atu ariorya kala ni kama elufu ne. Bada ya higo Jesu walagana nao, achiuka.

¹⁰Saa iyo-iyoyu wapanda dau phamwenga na anafundzie, achiphiya seemu za Dalmanutha.

¹¹Badaye Mafarisayo akpwezalumbana na Jesu kumhega achili, achimuamba "Uhendere dalili ya chilinje kuonyesa kala uwezoo ula mlunguni."

- ¹²Lakini Jesu achiuyiza mseho kpwa sonono, achiamba, "Mbona atu a chivyazi hichi analonda dalili? Nakuambirani kpweli kukala atu a chivyazi hichi taandaonyeswa dalili yoyosi."
- ¹³Phahi, waaricha hara atu achipanda dauni tsona, achivuka ng'ambo ya rira ziya.
- ¹⁴Anafundzi kala akayala kutsukula chakurya, ela himo dauni achikala na bofulo mwenga tu.
- ¹⁵Jesu achiaonya anafundzie, "Dzimanyirireni na unafiki wa Mafarisayo na wa Herode, ambao ni dza amira."
- ¹⁶Lakini nyo abisha enye kpwa enye achiamba, "Anagomba hivyo kpwa kukala tahuna mabofulo."
- ¹⁷Ela Jesu waamanya agombago, achiaambira, "Mbona mnabisha kuhusu kusakala na mabofulo? Kpwani bado tamdzangbweelewa? Mbona mna mioyo mifu?"
- ¹⁸Hangbwe mna matso na masikiro, ela tamuona wala kusikira! Kpwani tamtambukira,
- ¹⁹wakati nrighthouse-mega gara mabofulo matsano na kuaganyira atu elufu tsano? Mwaodzaza kaphu ngaphi za masaza?" Nao achimuamba, "Kumi na mbiri."
- ²⁰Jesu achiauzua tsona, "Na nrighthouse-mega gara mabofulo sabaa goapha atu elufu ne, mwaodzaza mabweko mangaphi ga masaza?" Nao achimuamba, "Sabaa."
- ²¹Phahi achiaambira, "Na tamdzangbweelewa?"
- ²²Jesu wafika Bethisaida phamwenga na anafundzie. Atu a hiko amrehera chipofu achim'voya Jesu amgute, ili aone.
- ²³Jesu wamgbwira mkpwono yuya chipofu, achimphirika kondze ya chidzidzi. Achimtsitsira mahe matsoni, achimuikira mikono, chisha achimuuzua, "Dze, unaweza kuona chitu?"
- ²⁴Yuya mutu achilola, achiamba, "Naona atu vurungu-vurungu, avi mihi inanyendeka."
- ²⁵Chisha Jesu wauyira kumuikira mikono matsoni. Naye achikodola matso na uwezowe wa kuona uchimuuyira, achikala anaona chila chitu sawa-sawa.
- ²⁶Jesu wamuamba aphiye kpwakpwe kaya mwenga kpwa mwenga, na achimkahaza asiphiye achazunguluka chidzidzini.
- ²⁷Chisha Jesu waphiya phamwenga na anafundzie vidzidzi virivyo phephi na mudzi wa Kaisaria Filipi. Mo njirani, wauza anafundzie, "Atu nkuamba mino ni ani?"

²⁸Nao achimuamba, "Anjina nkuamba u Johana M'batizadzi, anjina nkuamba u Elija na anjina nkuamba u mmwenga wa manabii."

²⁹Jesu achiauza, "Dze, mwino, mnaamba mino ni ani?" Petero achimuamba, "Uwe ndiwe Masihi."

³⁰Phahi Jesu waakahaza sana asimuambire mutu yeyesi kuhusu habarize.

³¹Jesu achiandza kuafundza anafundzie, waamba, "N'lazima mimi, Mutu Yela Mlunguni, niteswe sana na nikahalwe ni akulu a alavyadzi-sadaka, alimu a Shariya na vilongozi anjina a Chiyahudi. N'ndaolagbwa lakini siku ya hahu n'ndafufulwa."

³²Waambira anafundzie mambo higa wazi-wazi. Hipho Petero wamhala Jesu kanda achendaandza kudemurira.

³³Phahi Jesu achigaluka, achialola anafundzie, achimkanya Petero achiamba, "Hebu niukira, Shetani wee! Maazogo ni ga chibinadamu bahi, sigo ga chimlungu."

³⁴Chisha achiiha kundi ra atu na anafundzie, achiaambira, "Yeyesi amenzaye kukala mfuasi wangu n'lazima ariche njiraze, akale tayari kugaya kpwa kutsukula msalabawe, na anilunge.

³⁵Mana yeyesi ndiyelonda kuokola maishage himu duniani andaangamiza maishage ga milele, ela aangamizaye maishage ga himu duniani kpwa sababu yangu na kpwa sababu ya kutangazira atu habari zangu, andagaokola.

³⁶Dze, kuna fwaida yani mutu kuphaha utajiri wosi wa dunia ndzima, ela asiphahe uzima?

³⁷Ama mutu anaweza kulavya chitu chani chikale badili ya uzima?

³⁸Sikizani mwimwi atu ayi a chivyazi hichi msiokala aaminifu. Mmanyeye kukala mimi, Mutu Yela Mlunguni, n'ndakpwedza phamwenga na malaika, na utukufu ulao kpwa Baba. Mutu yeyesi ndiyenionera waibu, na kuonera haya maneno gangu wakati hinyu, nami n'ndamuonera haya wakati ndiphokpwedza."

Mariko 9

¹Jesu waenderera kuaambira anafundzie, "Nakuambirani kpweli phapha phana anjina ambao taandafwa hadi anione naphokera uwezo mkpwulu kula kpwa Mlungu wa kutawala dza Mfalume."

²Bada ya siku sita, Jesu wauka na Petero, Jakobo na Johana, achiambuka nao mwango mure ili akakale machiyao. Arophokala hiko mwangoni, mwiri wa Jesu wagaluka mbere yao.

³Nguwoze zang'ala sana zichikala nyereru hali ya kukala takuna mutu awezaye kuzifula dza hivyo.

- ⁴Saa iyo-iyo achitsembuka Elija na Musa, achibisha na Jesu.
- ⁵Chisha Petero achimuamba, "Mwalimu, ni vinono sisi kukala hipha. Phahi baha hudzenge vibanda vihahu; chimwenga chako, cha phiri cha Musa, na cha hahu cha Elija."
- ⁶Petero achikala kana ra kugomba mana iye na hara ayae atishirwa sana.
- ⁷Chisha phatserera ingu richiabwiningiza, na kuchituluka sauti kula himo inguni ichiamba, "Hiyu ni mwanangu nimmendzaye sana. Msikizeni!"
- ⁸Saa iyo-iyo hara anafundzi aphelephesa chila phahali, lakini taonere mutu wanjina yeyesi ela Jesu macheye.
- ⁹Na wakati kala anatserera kula mwangoni, Jesu waakahaza asimuambire mutu yeyesi mambo arigogaona, hadi iye, Mutu Yela Mlunguni, ndiphofufuka.
- ¹⁰Phahi, agbwira lagizo hiro, lakini achikala anadziuza, "Mana ya kufufuka ni ni?"
- ¹¹Nao achimuza, "Mbona alimu a Shariya anaamba ati n'lazima Elija edze kabla ya Muokoli?"
- ¹²Naye achiamba, "Ni kpweli Elija n'lazima edze kpwandza atayarishe mambo gosi. Hata hivyo kpwa utu wani yaandikpwa kukala n'lazima mimi, Mutu Yela Mlunguni, niteswe sana na kuzarauliwa?"
- ¹³Lakini nakuambirani kukala Elija hakika wakpwedza, na atu achimtesa vira arivyolonda, kama vyoandikpwa kumhusu."
- ¹⁴Jesu na hara anafundzi ahahu ariphofika kura kala kuna anafundzi ayawao, aona kundi kulu ra atu hipho. Na alimu anjina a Shariya akala analumbana nao.
- ¹⁵Rira kundi ra atu ririphomuona Jesu, atu osi atezeka, chisha achimzorera kpwendamlamusa.
- ¹⁶Jesu achiauza, "Mnalumbana nao chisa ni ni?"
- ¹⁷Mutu mmwenga kula mo kundini wamuamba, "Mwalimu, nkakurehera mwanangu barobaro, ana pepo yemhenda bwibwi.
- ¹⁸Chila achigbwirwa ni hiye pepo, nkum'bwaga akatuluka povu ra mromo, akasaga meno na kudina mwiri mzima. Nkaambira anafundzio amtuluze hiyu pepo lakini akashindwa."
- ¹⁹Jesu ariphosikira hivyo, waamba, "Mwi atu msiomkuluphira Mlungu! N'ndakala namwi hadi rini? N'ndakuvumirani hadi rini? Hebu mreheni ye mvulana."
- ²⁰Phahi amphirika yuya mwanache kpwa Jesu. Na saa iyo-iyo pepo ariphomuona wam'bwaga yuya mwanache na achimtiya chifwafwa. Yuya mwanache wagbwa achigalagala na achituluka povu ra mromo.

- ²¹Jesu achiuza ise wa yuya mwanache, "Mambo gano gamuandza rini?" Naye achiamba, "Hangu wanachewe.
- ²²Mara nyinji hiye pepho nkum'bwaga mohoni au madzini ili amuolage. Phahi ichikala unaweza kuhenda chochosi, huonere mbazi na huuterye!"
- ²³Achiamba, "Hangbwe ichikala ninaweza! Chila chitu chinawezekana kpwa mutu aaminiye."
- ²⁴Phapho hipho yuya ise wa mwanache wakota likululu achiamba, "Naamini! Lakini niterya niamini zaidi."
- ²⁵Jesu ariphoona kundi kulu ra atu rinaenjerezeka zaidi, wamdemurira yuya pepho, achiamba, "Uwe pepho yemhenda bwibwi na masito hiyu mwanache, nakulagiza umtuluke na usimuuyire tsona!"
- ²⁶Hipho yuya pepho wakota likululu, achim'bwaga yuya mwanache na achimhenda afurukute sana alafu achimtuluka. Yuya mwanache achizimiya, hata anji ao achiamba, "Akafwa."
- ²⁷Lakini Jesu achimgbwira mkpwono achimuunula, naye yuya mwanache achiima.
- ²⁸Phahi, Jesu ariphoinjira nyumbani, anafundzie achimuuza wakati kala a machiyao, "Kpwa utu wani sino tahuwezere kumtuluzwa yuya pepho?"
- ²⁹Naye achiamba, "Aina hino ya pepho taiweza kutuluka isiphokala kpwa kufunga na kuvoya bahi."
- ³⁰Jesu na anafundzie auka hipho, na ariphokala anaphiya, atsupira seemu za Galilaya. Jesu kayamendza atu amanye kura ariko,
- ³¹kpwa mana kala anafundza anafundzie bahi. Achiaambira, "Wakati ukafika mimi, Mutu Yela Mlunguni, niyalaviwa kpwa anadamu ambao andaniolaga. Lakini siku ya hahu bada ya kuolagbwa n'ndafufuka."
- ³²Ela hara anafundzie taelewere mana ya mambo higo, na achiogopha kumuuzwa.
- ³³Phahi aphiya Kaperinaumu. Na Jesu ariphokala akainjira nyumbani, waauza anafundzie, "Che mnalumbana nani kura njirani?"
- ³⁴Lakini nyo achinyamala, mana himo njirani kala analumbana kuhusu ndiye kala mkpwulu kuriko osi.
- ³⁵Phahi bada ya Jesu kusagala, waiha hara anafundzi kumi na airi achiaambira, "Mutu achilonda kukala wa kpwandza n'lazima akale wa mwisho na akale mtumishi wa osi."
- ³⁶Chisha achigbwira mkpwono mwanache mdide, achimuimisa mbere zao. Achimuika chifuwani alafu achiaambira,

³⁷"Mutu yeyesi ndiyemkaribisha mwanache dza hiyu kpwa sababu yangu, ananikaribisha mimi. Na kanikaribisha mimi bahi, ela anamkaribisha hiye ariyenihuma."

³⁸Johana achimuamba, "Mwalimu, hwamuona mutu anahumira dzinaro kutuluza pepho, naswi huchimkahaza kpwa kukala siye myawehu."

³⁹Lakini Jesu achiaambira, "Msimzuwiye, mana takuna awezaye kuhenda vilinje kpwa uwezo wangu, chisha phapho akagomba mai kunihusu.

⁴⁰Mana mutu ambaye kahupinga, manyani ni myawehu.

⁴¹Mutu yeyesi ndiyekuphani chikombe cha madzi ga kunwa kpwa sababu mu atu angu nakuambirani kpweli andatuzwa."

⁴²Jesu waenderera kugomba achiamba, "Shakare yeyesi ndiyehenda mmwenga wa hano adide anikuluphirao kuhenda dambi; mutu hiye baha afungbwe lala kulu singoni akatsuphiwe ndani ya bahari.

⁴³Na mkpwonoo uchikuhenda uhende dambi, ukate. Mana ni baha uinjire uzima wa milele na mkpwono mmwenga, kuriko kukala na mikonoyo miiri na utsuphiwe moho wa milele usiozimika.

⁴⁵Na chiguluchochikuhenda uhende dambi, chikate. Mana ni baha uinjire uzima wa milele na chigulu chimwenga, kuriko kukala na magulugo mairi chisha utsuphiwe moho wa milele.

⁴⁷Na dzitsoro richikuhenda uhende dambi, ring'ole! Ni baha kuinjira uzima wa milele na tsongo, kuriko kukala na matsogo mairi na utsuphiwe moho wa milele.

⁴⁸Hiko atu andariwa ni mabulu ambago tagafwa, na andaochwa ni moho usiofwa.

⁴⁹Chila mmwenga andasafishwa na moho, dza viratu chakurya chitiywavyo munyu.

⁵⁰Munyu ni mzuri, lakini uchibanangika taufwaha na tauweza kuhendwa ukafwaha tsona. Kpwa hivyo kundi renu rikale dza munyu, yani mdinise kuishi vinono na yawenu."

Mariko 10

¹Alafu Jesu wauka achiphiya seemu ya Judea, ng'ambo ya Muho wa Joridani. Atu makundi makundi amlunga tsona, naye achiafundza kama vyokala tabiyaye.

²Hipho, Mafarisayo anjina akpwendamuza ili kumhega achili, achiamba, "Dze, shariya inamruhusu mutu kuricha mchewe?"

³Naye achiamba, "Kpwani Shariya za Musa zinaambadze?"

⁴Nao achiamba, "Musa waruhusu mlume amuphe mchewe cheti cha talaka na amriche."

- ⁵Jesu achiaambira, "Musa wakuandikirani shariya hiyo kpwa sababu ya mioyo yenu mifu.
- ⁶Lakini kula dunia kuumbwa, 'Mlungu waumba mlume na mchetu.'
- ⁷Kpwa sababu hiyo mlume andaricha ise na nine, agbwirane na mchewe,
- ⁸nao osi airi andakala mwiri mmwenga.' Phahi atu hinyo si airi tsona ela ni mwiri mmwenga.
- ⁹Kpwa hivyo ariounganishwa ni Mlungu, mwanadamu asiatenganishe."
- ¹⁰Badaye, ariphokala ndani ya nyumba, anafundzie amuuza tsona dzulu ya dzambo hiri.
- ¹¹Naye achiaambira, "Mutu arichaye mchewe akalóla mchetu wanjina, anazinga.
- ¹²Na mchetu arichaye mlumewe na akalólwa ni mutu wanjina, piya anazinga."
- ¹³Atu amrehera Jesu anache adide ili aagute na kuajaliya, lakini anafundzie achiademurira hara atu.
- ¹⁴Ariphoona hivyo, wareya sana achiaambira, "Aricheni hinyo anache adide edze kpwangu, wala msiazuwie, mana atu ambao n'ndahewa ni Mlungu kuatawala ni dza hinya anache.
- ¹⁵Nakuambirani kpweli, mutu asiyenikuluphira dza mwanache akuluphiravyo ise, kandakala mmwenga katika ufalume wangu."
- ¹⁶Chisha waakusanya phakpwe chifuwani, achiabandikira mikono kpwa kuajaliya.
- ¹⁷Jesu ariphokala anaandza kuuka, mutu mmwenga wamtsolokera mairo achimbwerera maguluni, achimuza, "Mwalimu mnono, nihendedze mino ili Mlungu aniphe uzima wa milele?"
- ¹⁸Jesu achimuamba, "Kpwa utu wani unaniiha mnono? Takuna ariye mnono isiphokala Mlungu macheye.
- ¹⁹Samba unamanya malagizo ga Mlungu: 'Usiolage mutu, usizini, usiye, usizige myao na dzambo ra handzo, usichenge, tsona muogophe sowe na mayoo.' "
- ²⁰Yuya tajiri achimuamba, "Mwalimu, higo gosi nágalunga hangu wanache wangu."
- ²¹Jesu achimlola na achimmenda. Chisha achiamba, "Ukaphungukirwa ni chitu chimwenga tu. Phiya ukaguze chila chitu uricho nacho, na pesaze ukaziganyire achiya, nawe undakala na akiba hiko mlunguni. Chisha ndzo unilunge."
- ²²Yuya tajiri ariphosikira higo wasononeka, achihiya vyakpwe na kureya, mana kala ana mali nyinji.

- ²³Jesu waalolato hara anafundzie osi, chisha achiamba, "Ni vigumu sana tajiri kukala mmwenga katika ufalume ambao Mlungu wanipha."
- ²⁴Nao anafundzie aangalazwa ni manenoge. Achiaambira tsona, "Anangu, ni vigumu sana kukala mmwenga katika ufalume wangu!"
- ²⁵Ni rahisi zaidi ngamia kutsapira na tundu ya sindano kuriko tajiri kukala mmwenga katika ufalume wangu."
- ²⁶Anafundzie achiangalala achiuzana, "Pho sambu ni ano ani ambao anaweza kuokolwa?"
- ²⁷Lakini Jesu waalolato na achiamba, "Dzambo hiri tariwezekana kpwa anadamu, ela kpwa Mlungu ni chitu chidide. Kpwa Mlungu chila chitu chinawezekana."
- ²⁸Petero achimuamba, "Dze sino? Kpwani hwaricha vitu vyehu vyosi huchikulunga hukale anafundzio!"
- ²⁹Jesu achiamba, "Nakuambirani kpweli, mutu yeyesi arichaye mudziwe ama ndugu alume na achetu, ise ama nine, anae, ama minda kpwa sababu yangu na kpwa sababu ya kutangazira atu habari zangu,
- ³⁰andaphaha mara gana zaidi. Himu duniani andaphaha midzi, ndugu alume na achetu, mayo, ana na minda. Ela andateswa piya. Na wakati wedzao andaphaha uzima wa milele.
- ³¹Lakini anji ambao ni a kpwandza andakala a mwisho, na anji a mwisho andakala a kpwandza."
- ³²Phahi, aenderera na charo chao cha kuphiya Jerusalemu, na Jesu wakala mbere anaalongoza. Hara anafundzi achitezeka na atu ariomlunga-lunga achitishirwa. Tsona Jesu wahala hara anafundzi kumi na airi achiphiya nao njama, na kuaambira gara ambago andahenderwa.
- ³³"Sikizani, vivi hunaphiya Jerusalemu, ambako mimi, Mutu Yela Mlunguni, n'ndalaviwa kpwa akulu a alavyadzi-sadaka na alimu a Shariya, nao andanihakumu kuolagbwa. Chisha andanilavya kpwa atu asio Ayahudi.
- ³⁴Nao andanizemerera, andanitsitsira mahe, andanichapa viboko na kuniolaga. Lakini bada ya siku tahu n'ndafufuka."
- ³⁵Jakobo na Johana anangbwa a Zebedayo, amlunga Jesu achendamua, "Mwalimu, hunalonda huuhendere chitu chochosi ndichokuvoya."
- ³⁶Naye achiauza, "Mnalonda nikuhendereni utu wani?"
- ³⁷Nao achimuamba, "Wakati uchitawala, hunakuvoya mmwenga asagale uphandeo wa kulume na wanjina uphandeo wa kumotso."
- ³⁸Lakini achiaambira, "Tammenya m'voyaro. Dze, mnaweza kuvumirira mateso ambago gandaniphaha? Hebu mnaweza kugaya dza vivyo ndivyogaya mimi?"

³⁹Nao achimuamba, "Hunaweza." Achiaambira, "Mateso ndigophaha, namwi mndagaphaha, na mndagaya dza vivyo ndivyogaya.

⁴⁰Lakini kusagala uphande wangu wa kulume au wa kumotso siyo kazi yangu kupanga. Dzambo hiro andahewa hara ambao aikirwa kare."

⁴¹Hara anafundzi anjina kumi ariphosikira hivyo, aandzakureyera Jakobo na Johana.

⁴²Lakini Jesu waiha anafundzie na achiaambira, "Mnamanya kukala atawala a himu duniani nkutawala atu ao chinguvu-nguvu, na hinyo vilongozi nkuatawala atu ao na uwezo wao.

⁴³Lakini kpwenu mwimwi taindakala hivyo. Amendzaye kukala mkpwulu n'lazima akale mtumishi wa ayae,

⁴⁴na amendzaye kukala wa kpwandza n'lazima akale mtumwa wa osi.

⁴⁵Mana mimi, Mutu Yela Mlunguni, sedzere kuhenderwa, ela nákpwedza kuhendera na kulavya maisha gangu ili gakale maripho ga kukombola atu anji."

⁴⁶Jesu na anafundzie atsupira mudzi wa Jeriko. Ariphokala anauka mudzi hinyo phamwenga na kundi kulu ra atu, chipofu, yeihwa Batimayo (manage ni mwana wa Timayo), kala asegere kanda-kanda ya barabara anavoya pesa.

⁴⁷Phahi hiye Batimayo, ariphosikira kukala Jesu wa Nazareti a pho phephi, waandza kukota likululu achiamba, "Jesu, Mwana wa Daudi, nionera mbazi!"

⁴⁸Atu anji amdemurira anyamale, lakini ye achizidi kukota likululu kuamba, "Jesu, Mwana wa Daudi, nionera mbazi!"

⁴⁹Jesu ariphosikira waima achiamba, "Muiheni." Phahi, atu amuiha yuya chipofu, achimuamba, "Dziphe moyo! Unuka, anakuiha."

⁵⁰Naye wabwaga nguwoye ya tadzi, aching'oka, achiphiya kpwa Jesu.

⁵¹Jesu achimuuzi, "Unalonda nikuhendereni?" Yuya chipofu achimuamba, "Mwalimu, navoya nione."

⁵²Jesu achimuamba, "Kpwa sababu ya kunikuluphira ukaphola, kpwa hivyo phiya salama." Saa iyo-iyoyuya chipofu achikala anaona, na achimlunga-lunga Jesu.

Mariko 11

¹Jesu na anafundzie ariphofika phephi na Jerusalemu afika Bethifage na Bethania, hiko Mwango wa Mizeituni. Midzi hiyo kala iphephi na Jerusalemu. Hipo Jesu wahuma anafundzie airi,

²achiaambira, "Phiyani hinyo mudzi wa hipho mbere na mchiinjira tu, mndamkuta mwana-punda akafungbwa, naye kadzangbwepandwa ni mutu. Mvuguleni mumrehe.

- ³Na mutu ndiyekuuzani, 'Mnayeni ye mwana-punda, mbona mnamvugula?' Muambeni, 'Bwana ana haja naye na achimala andamuuyiza mara mwenga.' "
- ⁴Phahi aphiya na achendakuta mwana-punda akafungbwa mryangoni phahali phereru. Ariphokala anamvugula,
- ⁵atu ariokala aimire phephi aauza, "Mnahendadze! Mbona mnamvugula ye mwana-punda?"
- ⁶Nao achigomba viratu arivyolagizwa ni Jesu; na atu achiaricha aphiye vyao.
- ⁷Ariphomrehera Jesu yuya mwana-punda, ahandika nguwo zao dzuluye, naye achipanda achisagala.
- ⁸Atu anji ahandika nguwo zao barabarani, na anjina achihandika makalala ga mitende ambago kala akagavundza mindani.
- ⁹Phahi ariokala mbere na ariokala nyuma osi akota likululu achiamba: "Mlungu naatogolwe!" "Naajaliwe iye edzaye kpwa dzina ra Mwenyezi Mlungu!"
- ¹⁰"Naujaliwe ufalume wedzao wa baba Daudi!" "Mlungu ariye dzulu mlunguni naatogolwe!"
- ¹¹Jesu ariphofika Jerusalemu, wakpwendamenya Nyumba ya Kuvoya Mlungu. Bada ya kulola chila chitu, kpwa vira kala kukatswa waphiya vyakpwe Bethania phamwenga na anafundzie kumi na airi.
- ¹²Muhondoye, Jesu ariphokala anauya kula Bethania, kala ana ndzala.
- ¹³Waona muhi uihwao mtini kure chidide, uriokala na makodza, achiusengerera kulola ichikala wavyala. Lakini ariphofika hipho wakuta makodza mahuphu, mana kala sio wakati wa kuvyala.
- ¹⁴Alafu waulani hura muhi achiamba, "Atu taandarya matundago tsona bii!" Na anafundzie achisikira gara maneno.
- ¹⁵Jesu ariphofika Jerusalemu, wamenya Nyumba ya Kuvoya Mlungu na achiandza kuzoresa atu ariokala anahenda bishara himo ndani. Achipendula-pendula meza za hara okala anabadilisha pesa na vihi vya hara okala anaguza njiya,
- ¹⁶wala kayamruhusu mutu yeyesi kutikanya na chitu cha kuguza mura ndani.
- ¹⁷Alafu achiafundza hara atu, "Maneno ga Mlungu gaandikpwa, 'Nyumba yangu indaihwa nyumba ya mavoyo kpwa atu a makabila gosi.' Lakini mwino mnaihenda kukala mwamdzifwitso wa aivi!"
- ¹⁸Akulu a alavyadzi-sadaka na alimu a Shariya ariphosikira higo aendza njira ya kumuolaga. Mana amuogopha, kpwa sababu kundi kulu ra atu kala rikaangalazwa ni mafundzoge.
- ¹⁹Dziloniye, Jesu na anafundzie auka mudzi hinyo.

²⁰Ligundzure Jesu na anafundzie ariphokala anaphiya Jerusalemu aona hura muhi wa mtini ukanyala wosi mpaka mizi.

²¹Petero achitambukira, achimuamba, "Mwalimu, lola! Hura mtini urioulani dzana, ukanyala."

²²Jesu achiaambira anafundzie, "Mkuluphireni Mlungu.

²³Nakuambirani kpweli, mutu anaweza kuwambira mwango hinyu, 'Ng'oka ukadzitiye baharini.' Mutu hiye achikuluphira bila wasi-wasi kukala go agombago gandakala, naye Mlungu andamhendera.

²⁴Kpwa hivyo, nakuambirani chochosi ndichom'voya Mlungu, aminini mkaphokera, namwi mndahewa.

²⁵Na muimapho kuvoya, na phana mutu yeyesi ariyekukoserani, msameheni kpwandza, ili Sowe yenu ariye mlunguni piya akusameheni makosa genu."

²⁷Jesu na anafundzie auya tsona Jerusalemu, na achendainjira Nyumba ya Kuvoya Mlungu. Jesu ariphokala ananyendeka himo, akulu a alavyadzi-sadaka, alimu a Shariya, na vilongozi anjina a Chiyahudi amlunga,

²⁸achendamuuza, "We, gano unagogahenda, unahenda kpwa uwezo wa ani? Ni ani yekupha uwezo wa kuhenda mambo higa?"

²⁹Achiaambira, "N'ndakuuzani swali, mchinijibu, nami n'ndakuambirani nahenda mambo higa kpwa uwezo wa ani.

³⁰Niambirani, uwezo wa Johana wa kubatiza, wala kpwa Mlungu hebu wala kpwa atu?"

³¹Phahi aphiya njama, achendabisha enye kpwa enye, achiamba, "Huchiamba, 'Wala mlunguni,' andahuamba, 'Sambi mbona tamyamkuluphira?"

³²Na tahuweza kuamba, 'Wala kpwa atu.' " (Agomba hivyo kpwa sababu aogopha kuphaha tabu, mana atu osi akubali kukala Johana kala ni nabii kpweli.)

³³Phahi amuamba Jesu, "Tahumanya." Naye achiaambira, "Wala nami sindakuambirani nahenda mambo higa kpwa uwezo wa ani."

Mariko 12

¹Chisha Jesu wahumira ndarira kugomba na hara vilongozi a Chiyahudi. Achiaamba, "Kpwakala na mutu mmwenga yephanda mizabibu mwakpwe mndani. Achiizungulusira lichigo, achitsimba phatu pha kuminyira zabibu, na piya achidzenga uringo. Chisha hura munda achiukodishira akurima, naye mwenye achihiya tsi yanjina.

²Wakati wa kuvuna zabibu uriphofika, yuya mchina-munda wahuma mtumishiwe aphiye kpwa hara akurima ariokodisha mundawe, ili akahewe fungure ra mavuno.

- ³Hara ariokodi achimgbwira yuya mtumishi, achimpiga, na achimuuyiza mikono mihuphu.
- ⁴Alafu mchina-munda wahuma mtumishi wanjina. Nao hara ariokodisha hura munda, ampiga, achimlumiza chitswa na achimhenda mambo ga waibu.
- ⁵Chisha, mchina-munda wahuma mtumishi wanjina ambaye amuolaga, na tsona achiatesa anjina dza vivyo, kuapiga na anjina kuaolaga.
- ⁶Sambi wasala na mutu mmwenga bahi; mutu hiye kala ni mwanawe ammendzaye sana. Phahi wamuhuma kpwa hara akurima, achifikiri achiamba, 'Hakika hiyu andamuogopa, mana ni mwanangu.'
- ⁷Lakini hara akurima aambirana, 'Hiyu ni mwanawe ndiyemrisi, phahi nahumuolageni ili huno munda ukale wehu.'
- ⁸Phahi amgbwira, achimuolaga, na achimtsupha kondze ya hura munda wa mizabibu.
- ⁹Dze! Ye mchina-munda achedza, andahendadze? Andakpwedzaolage hara akurima, na hura munda aukodishe akurima anjina.
- ¹⁰Hakika mnamanya Maandiko higa ga Mlungu gaambago: 'Dziwe roremewa ni adzengi, ndipho rikakala dziwe kulu ra msingi.
- ¹¹Mwenyezi Mlungu ndiye yehenda dzambo hiri, naro rinahuangalaza.' "
- ¹²Phahi hara vilongozi a Chiyahudi amanya kukala akagomba ndarira hiyo kuonyesa kala aho ndio akurima ayi ariokodisha hura munda. Kpwa hivyo alonda kumgbwira Jesu kpwa nguvu ili amtiye jela. Lakini amricha, nao achiphiya vyao, mana aogopa rira kundi ra atu.
- ¹³Mafarisayo anjina, na atu a chikundi cha Herode, ahumwa ni vilongozi a Chiyahudi akamuuze Jesu maswali kumhega achili.
- ¹⁴Amuuzwa, "Mwalimu, hunamanya kukala uwe u mutu muaminifu, kulunga maoni ga atu mana cheo si chochosi kpwako. Tsona unafundza kpweli kuhusu Mlungu alagizago. Dze, shariya zehu zinahuruhusu kuripha kodi kpwa Kaisari, Mtawala wa Chirumi? Huriphe hebu husiriphe?"
- ¹⁵Lakini Jesu wamanya lengo rao ra kpweli, achiamba, "Mbona mnanipima achili? Hebu, nireherani pesa ya Chirumi, nami n'ndakuambirani."
- ¹⁶Ariphomupha hira pesa, Jesu achiuza, "Sura hino na dzinare ni ra ani?" Nao achimuamba, "Ni ya Kaisari."
- ¹⁷Ndipho achiaambira, "Phahi, vya Kaisari mupheni Kaisari, na vya Mlungu, mupheni Mlungu." Jibu hiri raangalaza hara atu.
- ¹⁸Siku mwenga Jesu watsolokerwa ni Masadukayo anjina. Nao Masadukayo ni kundi ra Ayahudi asioamini kukala atu achifwa andafufuka. Phahi achimuamba,

- ¹⁹"Mwalimu, Musa wahuandikira katika Shariya kukala, mutu achifwa na achikala karichire mwana, nduguye n'lazima ahale ufwa hiye gungu, na amvyarire ana yuya mufwa.
- ²⁰Hipho kare kpwahenda ndugu sabaa. Wa mwandzo walóla mchetu, na ariphofwa karichire ana.
- ²¹Mdidewe achihala ufwa yuya gungu, naye achifwa bila kuricha ana. Dzambo hiro rakala vivyo na ndugu wa hahu.
- ²²Osi sabaa alóla hiyu gungu lakini afwa osi bila kuricha mwana. Mwisho, yuya mchetu naye piya wafwa.
- ²³Dze, siku ya kufufulwa atu, yuya mchetu andakala mkpwaza ani? Mana ndugu osi sabaa amlóla."
- ²⁴Lakini Jesu waambira, "Makosa genu nkukala tammanya Maandiko wala uwezo wa Mlungu.
- ²⁵Atu ndiphofufuka andakala dza malaika hiko mlunguni ambao taalóla wala taalólwa.
- ²⁶Mwasoma vitabu vya Musa lakini tamdzangbwemanya kukala atu andafufulwa! Seemu ihusuyo chira chitsaka chokala chinaaka moho, Mlungu wamuamba Musa, 'Mimi ni Mlungu wa Brahimu, Isaka na Jakobo.'
- ²⁷Kpwa hivyo, iye ni Mlungu wa atu hinyo dzagbwe afwa kare. Higa ganaonyesa kukala afwadzi kpwakpwe achere moyo. Mwimwi Masadukayo munakosera sana."
- ²⁸Mwalimu mmwenga wa Shariya watsoloka na achisikira Jesu na Masadukayo anashindana kuhusu mambo ga kufufulwa. Ariphoona Jesu akaajibu vinono, wadzituluza, achimuuza, "Kulengana na shariya zosi za Mlungu ni iphi ya muhimu kuriko zosi?"
- ²⁹Jesu achiamba, "Ya muhimu zaidi ni hino: 'Sikizani mwimwi Aiziraeli! Mwenyezi Mlungu wehu, ndiye Mlungu macheye.
- ³⁰Mmendze Bwana Mlunguo chikpweli-kpweli na moyoo wosi, na rohoru rosi, na achilizo zosi na kpwa nguvuzo zosi.'
- ³¹Na ya phiri inaamba, 'Mmendze myao dza vyo udzimendzavyo mwenye.' Takuna shariya muhimu zaidi kuriko hizi."
- ³²Yuya mwalimu wa Shariya wamuamba Jesu, "Mwalimu u sawa, ukagomba kpweli kuamba Mlungu ni mmwenga, wala takuna wanjina.
- ³³Kpwa kpweli n'lazima mutu amendze Mlungu na moyowe wosi, na achilize zosi, na nguvuze zosi, na amendze myawe dza vyo adzimendzavyo ye mwenye. Na kulunga mambo higa ni muhimu zaidi kuriko kulavya sadaka zosi za nyama na za kuochoa nyama mzima kama hutakpwavyo ni Shariya."

³⁴Jesu ariphoona kukala hiyu mutu akagombato, wamuamba, "Uwe ku-kure na ufalume ambao Mlungu wanipha." Bada ya higo atu osi aogopha kumuuza swali rorosi.

³⁵Jesu ariphokala anafundza muhalani, muhala wa Nyumba ya Kuvoya Mlungu, wauza, "Kpwani alimu a Shariya a sawa achiamba Masihi ni chivyazi cha Mfalume Daudi?"

³⁶Ambapho Daudi mwenye walongozwa ni Roho wa Mlungu achiamba: 'Mwenyezi Mlungu wamuamba Bwana wangu, Sagala uphande wangu wa kulume, phatu pha ishima kulu sana, hadi nihende maaduigo gakugbwerere maguluni.'

³⁷Ichikala Daudi anamuiha hiye mutu, 'Bwana wangu,' vinakaladze akale ni chivyaziche?" Naro kundi kulu ra atu ramsikizato sana.

³⁸Wakati Jesu kala anafundza waamba, "Dzimanyirireni na alimu a Shariya! Mana nkumendza kuvwala kandzu nyire na kutsupa-tsupa hiko cheteni ili alamuswe na ishima mbere za atu.

³⁹Piya anamendza kusagala vihi vya mbere-mbere masinagogini na karamuni.

⁴⁰Lakini nkuzulumu magungu, na kudzihenda kala ni atu anono kpwa kuvoya mavoyo mare! Siku ya mwisho atu dza hinyo andaphaha adabu kali sana."

⁴¹Jesu ariphokala ndani ya Nyumba ya Kuvoya Mlungu, wasagala phephi na sanduku ra kuikira pesa za sadaka. Achikala analola kundi kulu ra atu atiyavyo pesa mura sandukuni. Matajiri anji alavya pesa nyinji.

⁴²Chisha phachedza mayo mmwenga gungu mgayi, achilavya mapeni mairi.

⁴³Phahi Jesu achiaambira anafundzie, "Lolani hiyu mayo. Nakuambirani kpweli, hiyu gungu mchiya akatiya pesa nyinji kuriko anjina osi.

⁴⁴Mana anjina osi akatiya kulengana na fwaida ya mali arizo nazo. Lakini hiyu mayo, dzagbwe ni mchiya, akalavya pesa zosi achizokala nazo, hata vivi kana chitu cha kumterya kuishi."

Mariko 13

¹Jesu ariphokala anatuluka kula Nyumba ya Kuvoya Mlungu, mwanafundziwe mmwenga wamuamba, "Mwalimu, lola vira higa mawe garivyo manono na dzengo ririvyo nono ra ajabu!"

²Naye achimuamba, "Dze, unagaona gara madzengo makulu? Taphana hata dziwe mwenga ndirosala dzulu ya ranjina; chila chitu chindabomolwa."

³Badaye aphiya Mwango wa Mizeituni, ambao unalolana na Nyumba ya Kuvoya Mlungu. Wakati Jesu kala asegere hiko, Petero, Jakobo, Johana na Anderea amlunga achikala naye machiyao, achimuuza,

- ⁴"Huambire mambo higo gandakala rini? Ni dalili yani ndiyoonyesa kukala mambo higa gosi ga phephi gahendeke?"
- ⁵Naye Jesu achiaambira, "Dzimanyirireni msedze mkachengbwa.
- ⁶Mana kundakpwedza anji ahumire dzina rangu, nao andachenga atu anji, na kuamba, 'Mimi ndiye hiye Yetsambulwa ni Mlungu!'
- ⁷Na mchisikira habari za viha na ndziye-ndziye za viha, msitishirwe. Mana mambo higa n'lazima gakale, lakini mwisho wa dunia undakala taudzangbwe.
- ⁸Tsi mwenga indapigana na tsi yanjina, mfalume mmwenga andapigana na mfalume wanjina. Dunia indakala ichisumba kpwatu kunji na kundakala na ndzala. Mambo higa ni dza viratu mwandzo wa utsungu wa mayo alondaye kudzivugula.
- ⁹Lakini mwimwi dzimanyirireni. Mana atu andakuphirikani mkashitakiwe mbere ya vilongozi vya chidini, na andakuchapani viboko ndani ya masinagogi. Chisha mndagbwirwa mphirikpwe mbere za atawala na afalume kpwa sababu yangu. Hino indakala nafwasi yenu ya kunishuhudiya mbere zao.
- ¹⁰Na kabla dunia kuangamizwa, n'lazima habari ndzuri kunihusu itangazwe kpwa atu a mataifa gosi.
- ¹¹Na wakati achikugbwirani na kukushitakini, msitange-tange ra kugomba kabla tamdzangbweshitakiwa. Ela gombani rorosi ndirohewa ni Mlungu; mana si mwimwi ndiogomba, ela Roho wa Mlungu.
- ¹²Mutu andafyakatsira nduguye na amlavye aolagbwe, baba andamfyakatsira mwanawe, nao ana andaagalukira avyazi ao aafyakatsire ili aolagbwe.
- ¹³Atu osi andakuzirani kpwa sababu yangu. Lakini ndiyevumirira hadi mwisho, andaokolwa.
- ¹⁴Kundakpwedza wakati muone 'Chitu cha najisi cha kubananga' chi phahali phasiphokala phakpwe. (Msomadzi naamanye manage.) Wakati hinyo, ario Judea naachimbirire myangoni.
- ¹⁵Ndiyekala kondze ya nyumba naasiuye mwakpwe nyumbani kuhala chitu.
- ¹⁶Na ariye mndani naasiuye kaya kpwedzahala nguwoze.
- ¹⁷Shaka rani ro achetu a mimba na amwisao siku hizo!
- ¹⁸Tsona voyani Mlungu ili mambo higa gasikale wakati wa mnyevu.
- ¹⁹Mana wakati hinyo kundakala na tabu kulu ambazo tazidzangbwekalako kula Mlungu aumbe dunia hadi rero, wala tazindahendeka tsona.
- ²⁰Ela Mlungu wapanga kare kuphanguza siku za mateso kpwa ajili ya atu arioatsambula. Kala Mlungu kahendere hivyo, takungesala mutu.

- ²¹Jesu waenderera kugomba achiamba, Siku hizo mutu achikuambirani, 'Lolani, Yetsambulwa ni Mlungu hiyu hipha!' Au, 'Hiye hiko!' Msimsikize.
- ²²Mana kundazuka manabii ga handzo na atu ambao andadziamba ni hiye Yetsambulwa ni Mlungu. Andahenda vilinje na maajabu ili aachenge atu na hata ichiwezekana piya aangamize ariotsambulwa ni Mlungu kukala afuasi angu.
- ²³Phahi dzimanyirireni. Nakuambirani chimbere mambo higa gosi kabla tagadzangbwe kuhendeka.”
- ²⁴"Phahi siku hizo, bada ya tabu hizo, dzuwa rindakala jiza, na mwezi taundang'ala;
- ²⁵nyenyezi zindagbwa kula dzulu, na nguvu za dzulu mlunguni zindasumbiswa.
- ²⁶Ndipho atu ndiphoniona mimi, Mutu Yela Mlunguni, nchitsembuka mainguni kpwedza na nguvu na utukufu munji.
- ²⁷Chisha n'ndahuma malaika angu ili akusanye ariotsambulwa kula chila phahali duniani na mlunguni, pembe hadi pembe.
- ²⁸Dzifundzeni kula kpwa mfwano hinyu wa mtini: Panda za mtini zinaphotula, mkumanya wakati wa kuvuna u phephi.
- ²⁹Namwi mchiona mambo higa ganahendeka, manyani kukala mimi, Mutu Yela Mlunguni, ni phephi na kuuya.
- ³⁰Nami nakuambirani kpweli, chivyazi hichi tachindasira kufwa kabla ya mambo higa gosi kuhendeka.
- ³¹Dzulu mlunguni na dunia kundasika, lakini maneno gangu gandakalako milele na milele.”
- ³²Jesu waenderea kuaambira, "Lakini takuna mutu amanyaye siku wala saa indakala rini; akale malaika a mlunguni, wala Mwana. Baba macheye ndiye amanyaye.
- ³³Dzimanyirireni na mkale matso, mana tammanya wakati mimi ndiphouya.
- ³⁴Kuuya kpwangu kundakala dza hivi. Mutu mmwenga wapanga kuphiya charo. Phahi warichira atumishie madaraka, chila mmwenga na kaziye, na badaye achimuamba mrindzi wa mryango akale matso.
- ³⁵Atumishi taamanya mchina-nyumba andauya rini. Inawezekana andauya dziloni, usiku wa manane, pepho za kucha au ligundzu. Phahi kalani matso!
- ³⁶Kalani matso ili nichedza gafula nisedze nkakukutani murere.
- ³⁷Kpwa hivyo, gago ambago nakuambirani, ninagaambira chila mmwenga: Kalani matso!"

Mariko 14

- ¹Phokala bado siku mbiri kabla ya Sukukuu ya Pasaka na Sukukuu ya Mikahe Isiyotiywa Amira. Akulu a alavyadzi-sadaka na alimu a Shariya akala anaendza njira ya kumbwira Jesu chisiri ili amuolage.
- ²Lakini asikizana kukala dzambo hiro risihendeke wakati wa sukukuu, sedze atu akahenda fujo.
- ³Jesu ariphokala hiko chidzidzi cha Bethania, wainjira nyumba ya Simoni, yekala na mahana. Wakati Jesu kala asegere anarya chakurya, phainjira mchetu mmwenga yekala akatsukula tupa ya marashi ga samani kulu. Yuya mchetu wavundza hira tupa achimmwagira Jesu chitswani.
- ⁴Atu anjina ariokalapho atsukirwa sana, achiuzana, "Hasara hino ya marashi n'yani?"
- ⁵Marashi higa che ganaweza kuguzwa pesa nyinji kama mshahara wa mwaka mzima, na pesaze zikahewa agayi!" Nao achimlaumu sana yuya mchetu.
- ⁶Lakini Jesu achiamba, "Kpwa utu wani mnamyuga yuno mchetu? Mricheni, mana akanihendera dzambo ra mana sana.
- ⁷Mana siku zosi, agayi mndakala nao, namwi mnaweza kuaterya wakati wowosi mmendao. Lakini mino sindakala namwi siku zosi.
- ⁸Hiyu mayo akahenda awezavyo, akaumwagira mwiri wangu marashi kuutayarisha kpwa mazishi gangu.
- ⁹Nakuambirani kpweli kukala kokosi dunia ndzima ndikotangazwa habari ndzuri kunihusu, dzambo hiri achirohenda hiyu mchetu rindahadzwa kpwa kumtambukira."
- ¹⁰Phahi Juda Iskarioti, ambaye piya ka ni mwanafundzi wa Jesu, waphiya kpwa akulu a alavyadzi-sadaka akamsalate Jesu.
- ¹¹Nao ariphosikira habari hizo ahererwa sana, achilaga kumupha pesa. Phahi Juda waandza kuendza nafwasi ya kumsalata Jesu.
- ¹²Siku ya kpwandza ya Sukukuu ya mikahe isiyotiywa amira, wakati ambao Mwana-ng'ondzi wa Pasaka nkutsindzwa kpwa sadaka, Jesu wauzwa ni anafundzie, "Unalonda huphiyephi hukakutayarishire chakurya cha Pasaka?"
- ¹³Phahi Jesu wahuma anafundzie airi achiaambira, "Phiyani mudzi wa Jerusalem, namwi mndakutana na mlume achiyedzihika nyungu ya madzi. Mlungeni-lungeni
- ¹⁴hadi nyumba ndiyoinjira, mkamuambe mchina-nyumba, 'Mwalimu anauza kukala, chumba ambacho n'ndarya chakurya cha Pasaka phamwenga na anafundzi angu nchiphi?'
- ¹⁵Naye andakuonyesani chumba chikulu dzulu ya gorofa ambacho chikatayarishwa kare. Huandalieni chakurya himo."

- ¹⁶Phahi hara anafundzi airi auka kuphiya mudzini, na achendakuta viratu Jesu arivyoaambira. Achitayarisha chakurya cha Pasaka himo.
- ¹⁷Dziloniye, Jesu wafika phamwenga na anafundzie.
- ¹⁸Nao ariphokala anarya chakurya, waamba, "Nakuambirani kpweli, mmwenga wenu ambaye narya naye, andanisalata."
- ¹⁹Hipho anafundzie asononeka sana, na achiandza kumuuzwa, mmwenga mmwenga, "Dze! Ikale ni mimi?"
- ²⁰Jesu achiaambira, "Iye ni myawenu, naye anatsotsa mkahe bakuli mwenga nami.
- ²¹Mana mimi, Mutu Yela Mlunguni, n'ndafwa kama Maandiko gaambavyo, lakini shaka hiro hiye ndiyenisalata! Baha kala mutu hiye kavyarirwe."
- ²²Ariphokala anarya na anafundzie, wahala mkahe na achimshukuru Mlungu. Chisha achiumega-mega na achiapha anafundzie, achiamba, "Halani murye; hinyu ni mwiri wangu."
- ²³Tsona achihala chikombe cha uchi wa zabibu, achimshukuru Mlungu. Alafu achiapha, nao achinwa osi.
- ²⁴Ndipho Jesu achiaambira, "Hinyu ni mlatso wangu ambao unaika chilagane cha Mlungu na atue, nao unamwagbwa kpwa fwaida ya atu anji.
- ²⁵Nakuambirani kpweli, sindanwa tsona uchi wa zabibu hadi siku hiyo ndiphounwa luphya ndiphokpwezatawala dza Mfalume yetsambulwa ni Mlungu."
- ²⁶Bada ya kuimba wira wa kumtologa Mlungu, auka achiphiya Mwango wa Mizeituni.
- ²⁷Chisha Jesu achiaambira anafundzie, "Mwimwi mosi mndakala na wasi-wasi nami na kuniricha, mana Mlungu anaamba katika Maandikoge: 'N'ndampiga mrisa, nago mang'ondzi gandatsamukana.'
- ²⁸Lakini bada ya kufufulwa, n'ndakutanguliyani kuphiya Galilaya."
- ²⁹Ela Petero achimuamba, "Hata osi achikala andakuricha, mino sindahenda hivyo."
- ³⁰Naye Jesu achimuamba, "Nakuambira kpweli kukala usiku hinyu wa rero, kabla ya dzogolo kuika mara mbiri, undanitsamalala mara tahu."
- ³¹Lakini Petero wahenda likani, achiamba, "Hata ichikala ni kufwa, nahufwe hosi, lakini sindakutsamalala bii!" Chisha hara anjina osi nao achigomba dza vivyo.
- ³²Chisha auka hadi phahali phaihwapho Gethesemane, na Jesu achiaambira anafundzie, "Sagalani hipha wakati ninavoya."

- ³³Achimhala Petero, Jakobo na Johana. Hipho waandza kusononeka sana,
- ³⁴achiaambira, "Yo sonono nriyo nayo, naona indanirya! Phahi chesani mnigodzere hipha."
- ³⁵Na ariphosengera mbere chidide, wagbwa chimabumabu, achivoya kukala ichiwezekana wakati hinyo wa mateso asiuphahe.
- ³⁶Achiamba, "Baba, mambo gosi kpwako ganawezekana. Niusira mateso chigonilenga; lakini isikale vira nimendzavyo mimi, ela ulondavyo uwe."
- ³⁷Ariphouya, wakuta Simioni Petero na ayae arere. Achimlamusa achimuamba, "Simoni, mbona urere? Kukaweza kukala matso hata dzagbwe ni dzisaa dzimwenga?"
- ³⁸Chesani kuvoya ili Shetani asedze akakutiyani dambini, mana roho inamendza kuhendato, lakini mwiri tauweza."
- ³⁹Bada ya kugomba higo, wauka tsona achendavoya vivyo hivyo vya mwandzo.
- ⁴⁰Ariphouya tsona achiakuta arere, mana kala akashindwa ni usingizi. Nao achikala taana ra kugomba.
- ⁴¹Chisha achiauyira hara anafundzie mara ya hahu, na achialamusa kuno anaamba, "Mbona mchererere na kuoya? Haya, lamukani mnisikize! Saa ikafika, nami, Mutu Yela Mlunguni, ni phephi na kulaviwa kpwa atu a dambi.
- ⁴²Unukani, huphiyeni vyehu. Lolani, hiye mutu ndiyenisalata akedza."
- ⁴³Jesu ariphokala acheregomba, Juda, ambaye piya kala ni mwanafundziwe, wakpwedza na kundi ra atu ario kala akatsukula panga na marungu. Atu hinyo kala akahumwa ni akulu a alavyadzi-sadaka, alimu a Shariya na vilongozi a Chiyahudi.
- ⁴⁴Juda kala akaapha dalili achiamba, "Ye ndiyemdonera kumlamusa ndiye iye; mgbwireni, muuke naye na mumrinde."
- ⁴⁵Phahi ariphofika wamsengerera Jesu, achimuamba, "Mwalimu!" Chisha achimdonera,
- ⁴⁶na hinyo atu achimgbwira.
- ⁴⁷Lakini mmwenga wa hara okala aimire na Jesu, watsomola upanga achimkata sikiro mtumwa wa Mlavyadzi-sadaka Mkwulu.
- ⁴⁸Chisha Jesu achiaambira, "Mbona mkedza na panga na marungu avi mkedzagbwira muivi?"
- ⁴⁹Hwakalani hosi ndani ya Nyumba ya Kuvoya Mlungu, na chila siku kala nchifundza. Mbona tamuyanigbwira? Lakini n'lazima Maandiko gatimie."
- ⁵⁰Hipho anafundzie osi amricha achichimbira.

- ⁵¹Jesu aripholongozwa, barobaro mmwenga, yekala akavwala shuka bahi, wamlunga-lunga. Hinyo atu ariphojaribu kumgbwira,
- ⁵²yuya barobaro waahepa. Achiricha hira shuka, achichimbira chitsaha.
- ⁵³Phahi Jesu waphirikpwa kaya kpwa Mlavyadzi-sadaka Mkpwulu ambako akulu osi a alavyadzi-sadaka phamwenga na alimu a Shariya na vilongozi anjina a Chiyahudi kala akakutana.
- ⁵⁴Petero wamlunga kpwa kure, hadi achifika muhala wa nyumba ya Mlavyadzi-sadaka Mkpwulu. Wasagala phamwenga na arindzi achioha moho.
- ⁵⁵Phahi akulu a alavyadzi-sadaka na ngambi yosi yaendza mashitaka ga kumshitakira Jesu ili aphahe kumuolaga, lakini taaphahire.
- ⁵⁶Mana atu anji alavya ushahidi wa handzo kumhusu, lakini ushahidi wao tauyagbwirana.
- ⁵⁷Mwisho anjina aima achilavya ushahidi wa handzo achiamba,
- ⁵⁸"Hwamsikira anaamba, 'N'ndabomola hino Nyumba ya Kuvoya Mlungu yodzengbwa ni atu, na kpwa siku tahu n'ndadzenga yanjina isiyodzengbwa ni atu.' "
- ⁵⁹Lakini hata hivyo, ushahidi wao tauyagbwirana.
- ⁶⁰Phahi Mlavyadzi-sadaka Mkpwulu waima, achimuuza Jesu, "Ikale kuna ra kudzihehera kuhusu mashitaka ga hinya atu?"
- ⁶¹Ela wanyamala zi. Mlavyadzi-sadaka Mkpwulu achimuuza swali ranjina, "Wendiwe Masihi, yani Mwana wa Mlungu?"
- ⁶²Jesu achiamba, "Ehe ndimi. Tsona mndaniona mimi, Mutu Yela Mlunguni, nisegere mkpwono wa kulume wa Mwenyezi Mlungu, phatu pha ishima kulu sana, na chisha mndaniona nichedza dzulu ya maingu."
- ⁶³Hipho Mlavyadzi-sadaka Mkpwulu wakpwanyula nguwoze, na achiamba, "Kuna haja yani ya mashahidi zaidi?"
- ⁶⁴Mkasikira enye achivyokufuru! Hebu mnaonadze?" Osi achigomba chilimwenga kala anafwaha kuolagbwa.
- ⁶⁵Phahi anjina aandza kumtsitsira mahe, amfunga chigungu, achimpiga ngumi na kumuuza, "Huambire ni ani achiyekupiga." Nao arindzi amhala na achimuwanga makofi.
- ⁶⁶Petero ariphokala bado achere pho muhalani, mtumishi wa chichetu wa Mlavyadzi-sadaka Mkpwulu wakpwedza.
- ⁶⁷Ariphomuona Petero anaoha moho, wamlolato, achimuamba, "Hata uwe wakala phamwenga na yuya Jesu Mnazareti."

⁶⁸Lakini achirema, achiamba, "Simanya wala sielewa unaambadze." Chisha achiuka, na ariphofika mryangoni kuphiya kondze, dzogolo richiika.

⁶⁹Yuya mtumwa, ariphomuona tsona, waambira atu ariokala aimire hipho, "Mutu hiyu piya ni myawao."

⁷⁰Lakini Petero achienderera kumtsamalala. Bada ya muda, hara okala aimire phephi naye, amuamba Petero tsona, "Hakika uwe u myawao, mana hata uwe u mwenyezi wa Galilaya."

⁷¹Phahi Petero waandza kudzilani na kulapha achiamba, "Mutu hiye mnayegomba habarize simmanyana tse-tse-tse!"

⁷²Saa iyo-iyu dzogolo richiika mara ya phiri. Ndipho, naye Petero achitambukira maneno arigoambirwa ni Jesu, kukala, "Kabla ya dzogolo kuika mara ya phiri, undanitsamalala mara tahu." Phahi warira kpwa utsungu.

Mariko 15

¹Chiti kuriphocha, akulu a alavyadzi-sadaka osi, phamwenga na alimu a Shariya na vilongozi anjina a Chiyahudi, yani angambi osi, akutana achibisha. Amfunga Jesu mikowa achimphirika kpwa Pilato, mkpwulu wa jimbo ra Chirumi.

²Pilato achimuza, "We ndiwe Mfalume wa Ayahudi?" Naye achimuamba, "Kama uchivyogomba."

³Nao akulu a alavyadzi-sadaka amshitaki na mambo manji.

⁴Phahi Pilato wamuza tsona Jesu, "Sikira go mashitaka manji anagokushitakira. Dze, vino kundadzikanira?"

⁵Lakini kayajibu neno, hata Pilato achiangalala.

⁶Kawaida chila Sukukuu ya Pasaka, Pilato kala nkuavugurira Ayahudi mfungbwa mmwenga ariyemlonda.

⁷Wakati hinyo, kpwakala na mutu mmwenga yeihwa Baraba, ambaye kala akafungbwa phamwenga na atu anjina. Atu hinyo kala akahenda fujo na kuolaga atu.

⁸Kundi kulu ra atu ramlunga Pilato achendam'voya aahendere kama kawaidaye.

⁹Pilato achiauza, "Mnalonda nikuvugurireni Mfalume wa Ayahudi?"

¹⁰Pilato wagomba hivyo mana kala akamanya kukala, akulu a alavyadzi-sadaka kala akamreha Jesu kpwakpwe kpwa sababu ya chidzitso.

¹¹Lakini akulu a alavyadzi-sadaka afyakatsira atu amuambe Pilato aavugurire Baraba badala ya Jesu.

¹²Pilato achiauza tsona, "Vino mnalonda nimhendedze yuno mumuihaye Mfalume wa Ayahudi?"

- ¹³Atu achikota likululu chilimwenga achiamba tsona, "Naakotwe msalabani!"
- ¹⁴Ela Pilato achiauza, "Kpwa utu wani? Kpwani wahenda uyi wani?" Lakini nyo achizidi kukota likululu, achiamba, "Naakotwe msalabani!"
- ¹⁵Kpwa vira Pilato kala analonda kufurahisha rira kundi ra atu, waavugurira Baraba. Achilagiza Jesu achapwe viboko sana, chisha achimlavya akakotwe msalabani.
- ¹⁶Asikari amphirika Jesu dzumba ra mkpwulu wa jimbo ra Chirumi, nao achiiha ayawao osi achimzunguluka.
- ¹⁷Achimvrika kandzu ya zambarau, rangi ya chifalume, achisuka chiremba cha miya achimvrika chitswani.
- ¹⁸⁻¹⁹Achiandza kumnyetera kuno anachita mavwinda mbereze, achiamba, "Mfalume wa Ayahudi! Kala na maisha mare!" Nao achienderera kumchapa milawa ya chitswa, na kumtsitsira mahe.
- ²⁰Bada ya kumnyetera, amvula hira kandzu ya zambarau, achimvrika nguwoze. Chisha achimphirika kpendakotwa msalabani.
- ²¹Ariphokala achere njirani, akutana na mutu mmwenga yehwa Simoni. Mutu hiye kala ni isengbwa wa Isikanda na Rufo, mwenyezi wa mudzi wa Kirene. Wakati uho kala anainjira mudzi wa Jerusalemu kula vidzidzini. Phahi asikari amlazimisha atsukule msalaba wa Jesu.
- ²²Chisha achimphirika Jesu hadi pahali phaihwapho Gologotha, manage ni "Zekeya ra Chitswa."
- ²³Atu amupha uchi wa zabibu uriotsanganywa na dawa ya kuusa mavune, lakini kayaunwa.
- ²⁴Phahi asikari amkota Jesu msalabani. Chisha achipiga kura kuganya nguwoze ili amanye ni ani ndiyephaha.
- ²⁵Ariphomkota msalabani yakala saa tahu za ligundzu.
- ²⁶Dzulu ya msalaba kala phakakotwa chibao chikaandikpwa shitakare, Hiyu ni Mfalume wa Ayahudi.
- ²⁷Piya, asikari akota akora airi misalaba yanjina, mmwenga uphandewe wa kulume na wanjina uphande wa kumotso.
- [²⁸Higa gatimiza Maandiko gaambago, "Amhenda avi ni mkora."]
- ²⁹Atu ario kala anatsupa na pahali hipho amlaphiza na kusuka-suka vitswa na kuamba, "Haya! We wadzikarya kukala unaweza kubomola Nyumba ya Kuvoya Mlungu na kuidzenga tsona bada ya siku tahu.
- ³⁰Sambi amba tserera pho msalabani udzitivye!"

- ³¹Vivyo hivyo akulu a alavyadzi-sadaka na alimu a Shariya amnyetera, achiambirana, "Waokola anjina, lakini kaweza kudziokola mwenye!"
- ³²Hangbwe iye ndiye Muokoli, ati Mfalume wa Iziraeli! Amba naatserere msalabani ili huone na kuamini." Hata hara aivi ariokotwa phamwenga naye, piya nao amlaphiza.
- ³³Kala ni kama saa sita za mutsi, na kpwakala na jiza tsi ndzima hadi saa tisiya.
- ³⁴Saa tisiya iriphofika, Jesu warira na likululu achiamba, "Eloi, Eloi, lema sabakthani?" Manage ni, "Mlungu wangu, Mlungu wangu, mbona ukaniricha?"
- ³⁵Atu anjina ariokala akaima phephi ariphosikira hivyo aamba, "Sikizani! Anamuiha Elija."
- ³⁶Mutu mmwenga wazola achendahala demu achirivwika uchi wa ngbwadu, achirigbwadzika mgongoni. Chisha achimupha Jesu afyondze, achiamba, "Godzani, hulole ichikala Elija andakpwezamtserereza msalabani."
- ³⁷Jesu wakota likululu tsona, ndipho achikata roho.
- ³⁸Paziya ya Nyumba ya Kuvoya Mlungu yaahuka manungu mairi, kula dzulu hadi photsi.
- ³⁹Mkpwulu wa asikari yekala aimire kuelekezana naye wasikira chiriroche. Na ariphoona Jesu achivyofwa waamba, "Hakika mutu hiyu ni Mwana wa Mlungu!"
- ⁴⁰Piya phakala na achetu ambao kala aimire kure chidide kulola. Anjina ao kala ni Maryamu kula Magidala, Salome, phamwenga na Maryamu ninengbwa wa Jose na Jakobo mdide.
- ⁴¹Hinya kala achimlunga-lunga Jesu ariphokala Galilaya ili amterye. Piya phakala na achetu anjina anji ambao kala akedza Jerusalem phamwenga naye.
- ⁴²Siku hiyo kala ni Ijumaa, dzuwa kala ri phephi na kutsua, wakati wa kuandza Siku ya Kuoya.
- ⁴³Phahi phakpwedza Yusufu mwenyezi wa Arimathaya, ariyeishimiwa sana. Iye piya kala anagodzera kpwa hamu kuona wakati Mfalume kula kpwa Mlungu ndiphokpwedza. Phahi, wamlunga Pilato bila chiwewe, achivoya ahewe mwiri wa Jesu.
- ⁴⁴Pilato waangalala ariphosikira kukala Jesu kala akafwa kare. Phahi wamuiha mkpwulu wa asikari, achilonda kumanya ichikala ni kpweli.
- ⁴⁵Pilato ariphoambirwa ni hiye mkpwulu wa asikari kukala Jesu kala akafwa, wamruhusu Yusufu kuuhala hura mwiri.
- ⁴⁶Phahi Yusufu wagula shanda, achitsereza hura mwiri, achiulinga-linga hira shanda. Chisha achiwiika mbirani ambayo kala ikatsongbwa mwambani, achipingilisira dziwe phara mryangoni.

⁴⁷Nao Maryamu kula Magidala, na Maryamu nine wa Jose, aona phahali Jesu ariphozikpwa.

Mariko 16

¹Dziloni bada ya Siku ya Kuoya kusira, Maryamu kula Magidala, Salome, na Maryamu nine wa Jakobo agula marashi ili akapake mwiri wa Jesu.

²Siku ya Jumapili chiti, afika mbirani, dzuwa kala rinatuluka.

³Nao achikala anaambirana, "Ni ani ndiyehupingilisira rira dziwe phara mryango wa mbira?"

⁴Achikala anaambirana hivyo mana dziwe kala ni kulu sana. Ela ariphololato, aona dziwe rikapingiliswa kare.

⁵Hara achetu amenya mbirani, nao achimuona barobaro yekala akavwala kandzu nyereru, asegere uphande wa kulume wa hira mbira. Nao achiangalala sana,

⁶ela hiye barobaro waambira, "Msiangalale. Mnamuendza Jesu wa Nazareti, yekotwa msalabani. Phahi akafufuka, kapho hipha. Lolani! Hipha ndipho phahali ambapho kala akamlaza.

⁷Phiyani mkaambire anafundzie phamwenga na Petero kukala akakutanguliyani kuphiya Galilaya. Mndamuona hiko kama arivyokuambirani."

⁸Phahi auka phara mbirani mairo, mana akakama kpwa chiwewe na kuangalala. Tayaambira mutu yeyesi mana kala ni aoga.

⁹Jesu ariphofufuka chiti cha siku ya Jumapili, kpwandza wadzionyesa kpwa Maryamu kula Magidala, ambaye ka akamtuluza pepho sabaa.

¹⁰Maryamu waphiya achendaambira hara ariokala phamwenga na Jesu, na wakati uho akala ana hanga.

¹¹Lakini ariphosikira kukala Jesu a moyo tsona na kukala iye akamuona, taayaamini.

¹²Badaye, Jesu waatsembukira anafundzie airi njirani, nao ka ala Jerusalemu. Ela tayamtambukira mana kala akagaluka chivyanjina.

¹³Aho piya auya achendaambira ayawao, ela hata hivyo taayaamini.

¹⁴Mwishowe Jesu waatsembukira anafundzie kumi na mmwenga wakati kala anarya. Achiademurira kpwa kusakuluphira kpwao na usoto wao, mana taayaamini hara kala akamuona bada ya kufufuka.

¹⁵Ndipho achiaambira, "Phiyani chila phahali duniani mkatangaze habari ndzuri kunihusu kpwa chila mutu.

¹⁶Yeyesi ndiyekuluphira na kubatizwa andaokolwa, naye asiyeamini andahukumiswa.

¹⁷Na Mlungu andaapha hara anikuluphirao uwezo wa kuhenda dalili hizi. Andatuluza pepho kpwa uwezo wangu na andagomba kpwa luga ambazo taazimanya.

¹⁸Andagbwira nyoka na mikono yao, na hata achinwa chochosi chiricho na sumu kali tachindaazuru. Piya andabandikira mikono akongo, nao andaphola.”

¹⁹Bwana Jesu ariphomala kugomba higo na anafundzie, wahalwa kuphiya mlunguni, ambako asegere mkpwono wa kulume wa Mlungu, phatu pha ishima kulu sana.

²⁰Anafundzie aphiya kpwendatangaza nenore chila phahali. Bwana Jesu achiaterya na vira vilinje arivyohenda vyaonyesa kala ujumbe wao ni wa kpweli.

Luka

Luka 1

- ¹Muishimiwa Teofilo: Atu anji aandika kare habari za mambo gohendeka ku kpwehu.
- ²Ahumira maelezo ga hara arioonā mambo higa na matso gao kula mwandzo na ambao atangaza habari hizo.
- ³Muishimiwa Teofilo, bada ya kugachunguza gosi sawa-sawa kula mwandzo, nami náona inafwaha nikuandikire kpwa mpango,
- ⁴ili nawe udzionere mwenye ukpweli wa mambo urigofundzwa.
- ⁵Wakati Herode kala ni mfalume wa tsi ya Judea, kpwakala kuna Mlavyadzi-sadaka mmwenga yeihwa Zakariya. Mutu hiye wahenda kazi na chikundi cha Abiya. Mchewe kala ni Elizabeti, naye piya kala ni wa chivyazi cha Haruni.
- ⁶Osi airi kala ni atu a kumuogopha Mlungu, alunga shariya za Mlungu na malagizoge gosi bila lawama tse.
- ⁷Lakini kala taana mwana, mana Elizabeti kala ni mgumba, tsona osi airi kala ni atumia sana.
- ⁸Siku mwenga, kala ni zuma ra chikundi cha Zakariya kulavya sadaka.
- ⁹Mila yao kala ni kupiga kura kutsambula mmwenga kuinjira Nyumba ya Kuvoya Mlungu kufukiza ubani, na siku hiyo kura yamgbwerera Zakariya.
- ¹⁰Wakati Zakariya kala anafukiza ubani himo ndani, kundi rosi ra atu kala rinavoya hiko kondze.
- ¹¹Phahi Malaika wa Mlungu wamtsembukira mo ndani, achiima mkpwono wa kulume wa phatu pha kufukizira ubani.
- ¹²Zakariya ariphomuona yuya malaika wakala na wasi-wasi na achiogopha.
- ¹³Lakini malaika achimuamba, "Usiogophe Zakariya! Mlungu wasikira mavoyogo na mcheo Elizabeti andavyala mwana mlume. Nawe undamuiha Johana.
- ¹⁴Ni raha yadze yo ndiyokala nayo, na atu anji andahererwadze ndiphovyalwa ye mwana!
- ¹⁵Mlungu andamuona mutu muhimu. Ni lazima asinwe uchi wala asihumire ulevi wa aina yoyosi, na andatawalwa ni Roho wa Mlungu hangu ndanini mwa nine.
- ¹⁶Na andaaelekeza Aiziraeli anji kumuogopha Mlungu wao tsona.
- ¹⁷Andamtanguliya Mlungu na nguvu na uwezo dza viratu nabii Elija. Andaapatanisha ano baba na ana ao; andaagaluzā atu asiomuogopha Mlungu kukala na maazo ga kumuogopha Mlungu na andamtayarishira Mlungu atue."

- ¹⁸Zakariya achimuuza yuya malaika, "N'ndamanyadze kala mambo higa gandahendeka kpweli? Mimi ni mtumia sana na mkpwazangu naye piya ni mtumia."
- ¹⁹Malaika achimuamba, "Mimi ni Gabrieli, niimaye mbere za Mlungu kumhumikira, na nkahumwa nedze nikuambire higa mambo manono.
- ²⁰Sikiza, undakala bwibwi kpwa sababu kukaamini maneno gangu, ambago gandakala wakatiwe uchifika. Kundagomba hadi higo chigokuambira gahendeke."
- ²¹Wakati hinyo, hara atu kura kondze kala anamgodzera Zakariya kuno akatezeka kpwadze anakaa mo ndani ya Nyumba ya Kuvoya Mlungu.
- ²²Ariphotuluka kondze, achikala kaweza kubisha nao. Ndipho hara atu achimanya kala Zakariya akaphaha ruwiya mo ndani ya Nyumba ya Kuvoya Mlungu. Kayaweza kugomba lakini kala anabisha nao na mikono.
- ²³Zakariya ariphomala zumare, waphiya kaya.
- ²⁴Badaye mchewe Elizabeti wagbwira mimba. Wadzifwitsa nyumbani miezi mitsano.
- ²⁵Waamba, "Sambi Mlungu akaniterya, akaniusira waibu okala nao kpwa atu."
- ²⁶Mwezi wa sita wa mimba ya Elizabeti, yuya malaika Gabrieli wahumwa ni Mlungu aphiye mudzi wa Nazareti tsi ya Galilaya,
- ²⁷kpwa msichana mmwenga mwanamwali aihwaye Maryamu. Hiye Maryamu kala ni mchumba wa mutu yehwa Yusufu ambaye kala ni chivyazi cha Mfalume Daudi.
- ²⁸Malaika ariphofika kpwa Maryamu achimuamba, "Togola we umendzwaye sana! Mlungu wakujaliya."
- ²⁹Maryamu wayugika sana na maneno higa, na achidziuza mana ya mwadzo hinyo.
- ³⁰Malaika achimuamba, "Usiogophe Maryamu, mana Mlungu wakujaliya.
- ³¹Sikiza, undagbwira mimba na undavyala mwana mlume na undamuiha Jesu.
- ³²Naye andakala mkpwulu na andaihwa mwana wa Mwenyezi Mlungu. Bwana Mlunguo andamhenda mfalume dza mkarewe Daudi.
- ³³Andatawala atu a Mlungu milele, na andakala mfalume wao hata kare na n'kareni."
- ³⁴Maryamu achimuuza yuya malaika, "Gandakaladze gano, na bado mino nchere mwanamwali?"

- ³⁵Achiambwa, "Undakpwedzerwa ni Roho wa Mlungu na nguvu za Mwenyezi Mlungu zindakufwinika. Kpwa hivyo ndiyevyalwa andaihwa Mtakatifu, Mwana wa Mlungu.
- ³⁶Piya umanye kala m'bario Elizabeti ana mimba ya mwana mlume, hata dzagbwe atu kala achiamba ni mgumba; phamwenga na utumiawe, huno ni mweziwe wa sita.
- ³⁷Mana kpwa Mlungu takuna rorosi risirowezekana."
- ³⁸Maryamu achiamba, "Mimi ni muja wa Mlungu, naikale kama uchivyoamba." Alafu yuya malaika achiuka.
- ³⁹Phahi, bada ya muda, Maryamu wahenda safari ya gafula kuphiya kpwa Elizabeti, mudzi wa gambani, tsi ya Judea.
- ⁴⁰Wamenya nyumbani mwa Zakariya na achendalamusa Elizabeti.
- ⁴¹Elizabeti ariphosikira mwadzo wa Maryamu, yuya mwana mura ndanini wasumba. Chisha Elizabeti walongozwa ni Roho wa Mlungu,
- ⁴²achikota likululu achiamba, "Wajaliwa kuriko achetu osi na hiye ndiyemvyala piya wajaliwa!
- ⁴³Ni ajabu yadze yo, nine wa Bwana wangu kpwedza kpwangu kunijambosa!
- ⁴⁴Lola! Nchiphosikira mwadzo tu, mwanangu himu ndanini akasumba-sumba kpwa raha.
- ⁴⁵Wajaliwa uwe yeamini kala gandahendeka gara ambago Mlungu wakuambira!"
- ⁴⁶Naye Maryamu achiamba: "Roho yangu inamtogola Mlungu,
- ⁴⁷na inahererwa kpwa sababu ya Mlungu Muokoli wangu.
- ⁴⁸Kpwa mana Mlungu wanionera mbazi mimi mtumishiwe mnyonje. Hangu sambu vivyazi vyosi vindaniiha yejaliwa.
- ⁴⁹Kpwa sababu Mlungu wa Uwezo Wosi wanihendera mambo makulu, naye dzinare ni takatifu.
- ⁵⁰Andaaonera mbazi atu amuogophao, vivyazi na vivyazi.
- ⁵¹Wahenda mambo makulu na uwezowe; waatsamula atu a mioyo ya kudzikarya.
- ⁵²Waausira ufalume wao afalume akulu akulu, na achiahenda muhimu anyonje.
- ⁵³Waashibisha andzala na mambo manono manono, lakini achiausa matajiri mikono mihuphu.
- ⁵⁴Waaterya Aiziraeli atumishio, na achiaonera mbazi,
- ⁵⁵Brahimu na uvyaziwe hata milele, kama vyoalaga akare ehu."

- ⁵⁶Maryamu wasagala kama miezi mihahu na Elizabeti, ndipho achiuya kaya.
- ⁵⁷Wakati wa kuvyala uriphofika, Elizabeti wavyala mwana mlume.
- ⁵⁸Ndugu na majirani ga Elizabeti ariphosikira kala Mlungu akamjaliya mwana, ahererwa piya.
- ⁵⁹Mwana ariphokala akamala sabaa mwenga, akpwedza atu achimdeka, na atu kala analonda amuihe dzina ra Zakariya, dzina ra ise.
- ⁶⁰Lakini nine achiamba, "Hata! Kandaihwa hivyo, ela ni aihwe Johana."
- ⁶¹Hara atu achimuamba, "Ni m'bario ani aihwaye Johana?"
- ⁶²Phahi, abisha kpwa mikono na ise wa yuya mwana ili amanye analonda kumuiha ani.
- ⁶³Hipho, Zakariya wavoya chibao cha kuandikira, achiandika hivi: "Dzinare ni Johana." Na atu osi achiona ajabu!
- ⁶⁴Saa iyo-iyo Zakariya achivugulwa kauli, achimtogola Mlungu.
- ⁶⁵Majirani osi aangalala na achiogopha. Mambo higo gaenea seemu za gambani za tsi yosi ya Judea.
- ⁶⁶Osi ariosikira mambo higo aaza-aza mwao mioyoni na achiamba, "Mwana yuno andakala mutu wa viphi?" Mana kala ni wazi kala Mlungu wamjaliya.
- ⁶⁷Alafu Zakariya ise wa Johana, walongozwa ni Roho wa Mlungu na achiaambira atu maneno ga Mlungu:
- ⁶⁸"Naatogolwe Bwana Mlungu wa Iziraeli, mana wakpwedza kuterya na kukombola atue.
- ⁶⁹Wahurehera muokoli wa uwezo mkpwulu, kula kpwa chivyazi cha mtumishiwe Daudi,
- ⁷⁰kama arivyolaga hipho kare, ariphohumira manabiige matakatifu,
- ⁷¹kukala andahuokola kula kpwa maadui gehu na atu osi ariohuzira.
- ⁷²Mlungu waamba andaonera mbazi akare eh, na andatimiza ahadiye takatifu.
- ⁷³Ahadiye yomlaga mkare wehu Brahimu:
- ⁷⁴Kukala andahutivya kula kpwa maadui gehu na andahujaliya ili humhumikireni bila wuoga,
- ⁷⁵piya hudzitenge kumhumikira Mlungu, na hulunge haki siku zosi za maisha gehu.
- ⁷⁶Nawe mwanangu, undaihwa nabii wa Mwenyezi Mlungu, mana undatanguliya Mlungu kumtayarishira njiraze,

⁷⁷kuatangazira atue kukala andaaokola, kpwa kusamehewa dambi zao.

⁷⁸Mlungu wehu ni mpole na wa mbazi; andahurehera mwanga wa dzuwa wa wokofu kula mlunguni.

⁷⁹Undaang'arira atu ario jizani, ambaro ni dalili ya chifo, na undahuelekeza maisha ga salama.”

⁸⁰Phahi, yuya mwana wakula, naye achiphera chiroho. Naye wasagala weru weru hadi siku ariyotsembukira Aiziraeli wazi-wazi.

Luka 2

¹Siku hizo Kaisari Augusto, Mtawala wa Chirumi, walagiza atu osi akalao tsi zitawalwazo ni Arumi atalwe.

²Hino yakala isabu ya atu ya kpwandza wakati Kirenio kala ndiye mkpwulu wa tsi ya Siria.

³Phahi, chila mmwenga waphiya mudzi wa kpwao kpwendadziandikisha kutalwa.

⁴Yusufu piya wauka kula mudzi wa Nazareti tsi ya Galilaya kuphiya Bethlehemu tsi ya Judea, kovyalwa Mfalume Daudi. Waphiya hiko kpwa sababu kala ni chivyazi cha Daudi.

⁵Wakpwendadziandikisha phamwenga na mchumbawe Maryamu ambaye kala ana mimba.

⁶Ariphokala hiko Bethlehemu, wakatiwe wa kudzivugula uchifika,

⁷naye Maryamu wadzivugula mwanawe wa kpwandza, mwana mlume. Phahi wamhala ye mwana achimfunga-funga nguwo na achimlaza chidau cha kutiira mifugo chakurya. Vivi vyahendeka kpwa sababu zo nyumba za ajeni kala zikaodzala atu.

⁸Uphande uho kala kuna arisa ambao kala anarinda mbuzi na mang'ondzi gao usiku ko weruni.

⁹Malaika wa Mlungu waatsembukira na mwanga wa Mlungu uchiang'arira kosi, nao achitishirwa sana.

¹⁰Lakini malaika achiaambira, "Msiogophe! Nkakureherani habari ndzuri za raha sana kpwa atu osi.

¹¹Mana rero, hiko mudzi wa Daudi, Muokoli wenu akavyalwa, naye ndiye Bwana Muokoli.

¹²Na hivi hino ndiyo ndokala dalili ya kukumanyisani: Mndakuta mwana mtsanga akafungbwa-fungbwa nguwo, na akalazwa ndani ya chidau cha kutiira mifugo chakurya.”

¹³Gafula kundi kulu ra malaika a mlunguni akala phamwenga na yuya malaika wanjina na achimtogola Mlungu, achiamba:

¹⁴"Naatogolwe Mlungu dzulu mlunguni, na atu ambao anamhamira Mlungu naakale salama duniani!"

¹⁵Hara malaika ariphouka kuuya mlunguni, hara arisa abisha achiambirana, "Huphiyeni Bethlehemu hukarioneni rira chirohendeka na chiroambirwa ni Mlungu."

¹⁶Phahi, auka upesi na achendamuona Maryamu na Yusufu na yuya mwana mtsanga akalazwa ndani ya chidau cha kutiira mifugo chakurya.

¹⁷Ariphomuona yuya mwana, asemurira gara ambago aambirwa ni malaika kuhusu ye mwana.

¹⁸Osi ariosikira habari hizo za arisa aangelala.

¹⁹Lakini Maryamu wagaika rohoni mambo gosi higa, na achikala anagaririkana sana.

²⁰Hara arisa auya kpwao, kuno anamtogola Mlungu na kumshukuru kpwa gara gogasikira na kugaona, ambago gakala viratu vyoambirwa ni malaika.

²¹Bada ya sabaa mwenga, kala ni wakati wa kumdeka yuya mwana na kumupha dzina; amuiha Jesu, dzina ambaro ralaviwa ni malaika hata kabla nine kadzangbwegbwira mimba.

²²Maryamu ariphomala arubaini kala ni wakati wa iye na Yusufu kutakaswa, kama vyolagiza Shariya za Musa. Phahi amphirika mwana wao Jerusalemu kumuonyesa Mlungu,

²³kama Shariya ya Mlungu vyoandikpwa: "Chila mwana mlume yevyalwa kpwandza ni atengbwe kpwa kazi ya Mlungu."

²⁴Piya alavya sadaka kulengana na Shariya ya Mlungu, ambayo inaamba, "Sadaka ya maninga mairi ama ana-njiya airi."

²⁵Wakati hinyo hiko Jerusalemu, kala kuna mutu mmwenga aihwaye Simioni, mutu wa haki ariyekala anamuogopha Mlungu. Naye kala anagodza wokofu wa Aiziraeli, na Roho wa Mlungu kala aphaswenga naye.

²⁶Roho wa Mlungu kala akamhakikishira kukala kandafwa hadi amuone yuya Masihi.

²⁷Simioni walongozwa ni Roho wa Mlungu na achiinjira Nyumba ya Kuvoya Mlungu. Avyazi a Jesu ariphomreha mwana wao himo ndani ili amhendere vira Shariya ilondavyo,

²⁸Simioni wamphokera achikala naye mikononi na achimtogola Mlungu achiamba:

- ²⁹"Sambi, Mlungu Mtawala wangu, ukanitimizira ahadiyo, niricha mtumishio nifwe pore.
- ³⁰Mana nkamuona Muokoli kula kpwako
- ³¹ambaye wamtayarisha kpwa atu osi.
- ³²Ni mwanga ndiong'arira atu ambao sio Aiziraeli kuaonyesa mendzwayo, na ni mwanga wa kureha nguma kpwa atuo Aiziraeli."
- ³³Avyazi a Jesu aangalazwa ni maneno ga Simioni kuhusu mwana wao.
- ³⁴Alafu Simioni waajaliya, na achimuamba nine wa Jesu, "Mwana hiyu andakala sababu ya Aiziraeli anji kuangamika na anji kuokoka, na andakala dalili ndiyopingbwa ni atu.
- ³⁵Hivyo maazo ga atu anji gandakala wazi-wazi. Piya utsungu undakulumiza roho dza upanga udungavyo mwiri."
- ³⁶Mumo Nyumba ya Kuvoya Mlungu kala muna nabii wa chichetu mzehe sana, dzinare ka ndiye Ana, mwana wa Fanueli, kabila ra Asheri. Bada ya kulolwa waishi na mlume miaka sabaa,
- ³⁷alafu wakala gungu hadi wakati huno, ambapho kala ana miaka themanini na mine. Wakati wosi nabii Ana kala katuluka Nyumba ya Kuvoya Mlungu, kpwa kumuabudu usiku na mutsi, kufunga na kuvoya.
- ³⁸Wakati uratu ura, Ana wadzituluza mbere zao, achimshukuru Mlungu na achigomba na atu osi okala anagodza wakati Mlungu ndiphoikombola Jerusalemu. Phahi wagomba nao kuhusu yuya mwana.
- ³⁹Yusufu na Maryamu ariphomala mambo gosi ambago kala ni agahende kulengana na Shariya za Mlungu, auya kaya, mudzi wa Nazareti, jimbo ra Galilaya.
- ⁴⁰Yuya mwana wakula, achikala na nguvu na achili, na Mlungu achimjaliya.
- ⁴¹Chila mwaka avyazi a Jesu kala achiphiya Jerusalemu wakati wa Sukukuu ya Pasaka.
- ⁴²Jesu ariphokala na miaka kumi na miiri, waphiya sukukuuni na avyazie, kama vyokala desturi.
- ⁴³Sukukuu iriphosira, avyazie aandza charo cha kuuya, lakini Jesu wasala Jerusalemu bila ya avyazie kumanya.
- ⁴⁴Aona mwana wao a mo kundini, nao achisafiri mwendo wa kutwa ndzima, ndipho achiandza kuuza-uza kpwa ndugu na asena.
- ⁴⁵Ariphokala taamuona, auya Jerusalemu kpendamuendza.

- ⁴⁶Siku ya hahu amkuta ndani ya Nyumba ya Kuvoya Mlungu, asegere na alimu, anaasikiza na kuauza maswali.
- ⁴⁷Chila mmwenga yemsikira watezeka kpwa achiliye na majibuge.
- ⁴⁸Avyazie ariphomuona, aangalala. Alafu nine achimuamba, "Mwanangu, mbona ukahuhenda hivi? Mimi na sowe hukaangaika sana kukuendza."
- ⁴⁹Naye achiamba, "Kala mnaniendzerani? Tamyamanya kukala ni nikale nyumbani mwa Baba?"
- ⁵⁰Lakini aho taayamuelewa vira arivyoaambira.
- ⁵¹Hipho, Jesu wauya kaya Nazareti na avyazie, na achikala anaaogopha. Lakini nine wagaika rohoni mambo gosi higa.
- ⁵²Phahi, Jesu waenderera kukula chimo na achili, achizidi kumhamira Mlungu na atu.

Luka 3

- ¹Mwaka wa kumi na tsano wa utawala wa Kaisari Tiberiyo, mfalume mkpwulu wa tsi zosi zotawalwa ni Arumi, Pontio Pilato kala anatawala jimbo ra Judea. Herode kala anatawala jimbo ra Galilaya, na nduguye Filipu kala anatawala majimbo ga Iturea na Tirakoniti, naye Lusania kala anatawala Abilene.
- ²Anasi na Kayafa kala ni akulu a alavyadzi-sadaka. Wakati hinyo Johana mwana wa Zakariya kala a weruni na Mlungu achimlagiza aandze kazi ya kuhubiri.
- ³Phahi, Johana waphiya seemu zosi zopakana na muho wa Joridani kuno anahubiri, kuamba, "Tubuni dambi m'batizwe ili Mlungu akusameheni."
- ⁴Kala anahubiri kama vyoandikpwa ni nabii Isaya: "Kuna mutu anakota likululu hiko weruni kuaambira atu: 'Tayarishani njira ya Bwana na muigolose.
- ⁵Chila dete narisirirwe, chila mwango na chidzango navihendwe herera, phariphobeta naphagoloswe, na njira mbaya zitengezwe zikale ndzuri.
- ⁶Chila mutu andaona vira Mlungu ndivyookola atu.' "
- ⁷Hipho, atu anji akpwedza ili abatizwe ni Johana, naye achiaamba, "Ehe, nyoka mwi! Mnataka kuchimbira adabu ya Mlungu yedzayo bila ya kutubu kpweli! Hiyo siyo sababu ndzuri ya kukala mnataka m'batizwe!
- ⁸Haya vivi onyesani na mahendo genu kala kpweli mkatubu. Na msidzichenge mkaamba, 'Sino huna haki kpwa kukala hu ana a Brahimu.' Nakuambirani kpweli kala Mlungu anaweza kugaluza hata mawe higa gakakala ana a Brahimu.
- ⁹Hata vivi sambu hukumu ya Mlungu i tayari, dza mbadzo iriyo tayari kubwaga muhi. Chila muhi usiovyala matunda manono undakatwa utsuphiwe mohoni."
- ¹⁰Alafu hara atu amuuza Johana, "Sambu sino huendedze?"

- ¹¹Naye achiaambira, "Ariye na nguwo mbiri, naamuphe mwenga myawe asiye na nguwo, na ariye na chakurya naamganyire myawe ambaye kana."
- ¹²Makarani a kodi piya nao akpwedza ili abatizwe, achimuuzwa, "Mwalimu, dze naswi huhendedze?"
- ¹³Naye achiaambira, "Msitoze kodi zaidi ya chipimo choikpwa."
- ¹⁴Na asikari nao achimuuzwa, "Dze, sino huhendedze?" Achiaambira, "Msihale pesa za atu kpwa nguvu wala msizige mutu. Toshekani na mishahara yenu."
- ¹⁵Atu okala hipho ka ana dzuphi, na osi achidziuza rohoni kuhusu Johana, achiamba, "Menzerepho hiyu ndiye Yetsambulwa ni Mlungu Kuokola Atu."
- ¹⁶Ndipho Johana ariphogomba na atu osi, achiamba, "Mimi nakubatzani na madzi; lakini aredza mutu ambaye ana uwezo zaidi yangu, ambaye mimi sifwaha hata kuvula virahuvye. Naye andakubatzani na Roho wa Mlungu na moho.
- ¹⁷Iye ana lungore mkpwononi, na a tayari kupheha nganu na aitiye chitsagani. Lakini maphephe andagatsupha mohoni, moho usiofwa."
- ¹⁸Hipho, Johana watangaza habari ndzuri kula kpwa Mlungu; waaonya na achiakalata ahende mambo manono, naye wahumira mifwano minji tafwauti tafwauti.
- ¹⁹Johana piya wamkanya mtawala Herode, mana ka akalóla Herodiya mkpwaza nduguye, na mambo ganjina mai manji ambago kala akahenda.
- ²⁰Chisha Herode wazidisha ubayawe kpwa kumtiya jela Johana.
- ²¹Atu osi ariphokala anabatizwa, Jesu naye wabatizwa. Na phokala anavoya Mlungu, mlunguni kpwapwenukwa,
- ²²na Roho wa Mlungu achitserera dza mfwano wa njiya na achigbwerera Jesu mwirini. Chisha kpwatuluka sauti kula mlunguni ichiamba, "Uwe ndiwe mwanangu nikumenzaye, nawe unanihamira sana."
- ²³Jesu ariphoandza kaziye kala ana kama miaka salasini. Atu ka achiona ni mwana wa Yusufu, mdzukululu wa Heli.
- ²⁴(Madzina gosi chigohadzwa ni ga ana alume.) Heli kala ni mwana wa Mathati, naye Mathati kala ni mwana wa Lawi, naye Lawi kala ni mwana wa Melki. Melki kala ni mwana wa Janai, naye Janai kala ni mwana wa Yusufu, naye
- ²⁵Yusufu kala ni mwana wa Matathia. Matathia kala ni mwana wa Amosi, naye Amosi kala ni mwana wa Nahumu, naye Nahumu kala ni mwana wa Hesli. Hesli kala ni mwana wa Nagai, naye
- ²⁶Nagai kala ni mwana wa Maathi, naye Maathi kala ni mwana wa Matathia. Matathia kala ni mwana wa Semeni, naye Semeni kala ni mwana wa Joseki, naye Joseki kala ni mwana wa Joda.

²⁷Joda kala ni mwana wa Joanani, naye Joanani kala ni mwana wa Resa, naye Resa kala ni mwana wa Zerubabeli. Zerubabeli kala ni mwana wa Shealtieli, naye Shealtieli kala ni mwana wa Neri, naye

²⁸Neri kala ni mwana wa Melki. Melki kala ni mwana wa Adi, naye Adi kala ni mwana wa Kosamu, naye Kosamu kala ni mwana wa Elimadamu. Elimadamu kala ni mwana wa Eri, naye

²⁹Eri kala ni mwana wa Joshuwa, naye Joshuwa kala ni mwana wa Eliezeri. Eliezeri kala ni mwana wa Jorimu, naye Jorimu kala ni mwana wa Mathati, naye Mathati kala ni mwana wa Lawi.

³⁰Lawi kala ni mwana wa Simioni, naye Simioni kala ni mwana wa Juda, naye Juda kala ni mwana wa Yusufu. Yusufu kala ni mwana wa Jonamu, naye Jonamu kala ni mwana wa Eliakimu, naye

³¹Eliakimu kala ni mwana wa Melea. Melea kala ni mwana wa Mena, naye Mena kala ni mwana wa Matatha, naye Matatha kala ni mwana wa Nathani. Nathani kala ni mwana wa Daudi, naye

³²Daudi kala ni mwana wa Jese, naye Jese kala ni mwana wa Obedi. Obedi kala ni mwana wa Boazi, naye Boazi kala ni mwana wa Salmoni, naye Salmoni kala ni mwana wa Nashoni.

³³Nashoni kala ni mwana wa Aminadabu, naye Aminadabu kala ni mwana wa Adimini, naye Adimini kala ni mwana wa Arini. Arini kala ni mwana wa Hezironi, naye Hezironi kala ni mwana wa Perezi, naye Perezi kala ni mwana wa Juda.

³⁴Juda kala ni mwana wa Jakobo, naye Jakobo kala ni mwana wa Isaka, naye Isaka kala ni mwana wa Brahimu. Brahimu kala ni mwana wa Tera, naye Tera kala ni mwana wa Nahori, naye

³⁵Nahori kala ni mwana wa Serugi. Serugi kala ni mwana wa Reu, naye Reu kala ni mwana wa Pelegi, naye Pelegi kala ni mwana wa Eberi. Eberi kala ni mwana wa Sala, naye

³⁶Sala kala ni mwana wa Kainani, naye Kainani kala ni mwana wa Aripakisadi. Aripakisadi kala ni mwana wa Shemu, naye Shemu kala ni mwana wa Nuhu, naye Nuhu kala ni mwana wa Lameki.

³⁷Lameki kala ni mwana wa Methusela, naye Methusela kala ni mwana wa Enoko, naye Enoko kala ni mwana wa Jaredi. Jaredi kala ni mwana wa Mahalaleli, naye Mahalaleli kala ni mwana wa Kainani, naye

³⁸Kainani kala ni mwana wa Enoshi. Enoshi kala ni mwana wa Sethi, naye Sethi kala ni mwana wa Adamu, naye Adamu kala ni mwana wa Mlungu.

Luka 4

- ¹Jesu wauya na uwezo mkpwulu wa Roho wa Mlungu kula muho wa Joridani, na achilongozwa ni Roho hadi weruni,
- ²hiko Jesu wakala siku arubaini kuno anajezwa ni Shetani. Siku zosi hizo kayarya chitu, badaye wasikira ndzala.
- ³Shetani achimuamba, "Ichikala kpweli u Mwana wa Mlungu, riambire hiri dziwe rigaluke mkahe."
- ⁴Jesu achiamba, "Yaandikpwa, 'Atu taandaishi kpwa chakurya bahi.' "
- ⁵Chisha Shetani achiphiya naye hadi dzulu, kufunga na kufumbuwa achimuonyesa falume zosi za dunia.
- ⁶⁻⁷Alafu achimuamba, "Uchiniabudu, n'ndakupha uwezo wa kutawala falume zosi hizi na madzo gosi garigo himo, kpwa mana náhewa na naweza kumupha yeyesi nilondaye."
- ⁸Jesu achimuamba, "Yaandikpwa, 'Muabudu Bwana Mlunguo bahi na umhumikire iye macheye.' "
- ⁹Chisha Shetani wamhala achimphirika hadi Jerusalemu achendamuimisa chirere cha Nyumba ya Kuvoya Mlungu. Achimuamba, "Ichikala u Mwana wa Mlungu, tina ugbwe,
- ¹⁰mana yaandikpwa, 'Mlungu andalagiza malaikawe akurinde sawa-sawa,
- ¹¹naye andakuunula, ili usedze ukakpwala dziwe.' "
- ¹²Lakini Jesu achimuamba, "Neno ra Mlungu rinaamba, 'Usimjeze Bwana Mlunguo.' "
- ¹³Phahi, Shetani wamala kumjeza Jesu, achiuka achimricha hadi muda wanjina.
- ¹⁴Jesu wauya Galilaya kuno analongozwa ni uwezo wa Roho wa Mlungu. Habarize zichienea seemu zosi za jirani.
- ¹⁵Wafundza masinagogini, na chila mmwenga achimtogola.
- ¹⁶Jesu waphiya Nazareti, ambako ndiko korerwa, na Siku ya Kuoya wainjira sinagogini kama vyokala kawaidaye. Achiima ili asome.
- ¹⁷Wahewa Chitabu cha nabii Isaya, achichivugula na achisoma phahali phoandikpwa kuhusu Masihi phoamba hivi:
- ¹⁸"Roho wa Mlungu a nami, mana wanitsambula niarehere agayi habari ndzuri. Wanihuma niatangazire mabusu uhuru na niatangazire vipofu kala andaona, kuaika huru aonerwao,
- ¹⁹na kutangaza kukala wakati wa Mlungu kuokola atue ukafika."
- ²⁰Ariphomala kuasomera, wafunga chitabu, achimuuyizira mtumishi na achisagala. Chila mmwenga mo sinagogini wamtong'orera matso.

- ²¹Alafu Jesu achiamba, "Rero maneno higa gakatimia, kula wakati mchiphosikira nagasoma."
- ²²Atu osi amtogola, na achiangalazwa ni manenoge mazuri achigogomba. Chisha achiuzana, "Yuno siye yuya mwana wa Yusufu?"
- ²³Naye achiaambira, "Namanya mndaniamba msemu huno: 'Ichikala u mganga dzilagule mwenye!' Piya mndaniamba, 'Mbona phano phenu mtaani kuhenda mambo dza higo hurigosikira hiko Kaperinaumu?'"
- ²⁴Lakini nakuambirani kpweli kala nabii kakubaliwa kpwao.
- ²⁵Nakuhakikishirani kala, zamani za nabii Elija, Iziraeli kala kuna magungu anji, kuriphokosekana mvula miaka mihahu na nusu na kuchikala na ndzala kali tsi ndzima.
- ²⁶Lakini nabii Elija kayahumwa kpwa yeyesi hiko, ela kpwa gungu yesagala Sareputa, tsi ya Sidoni.
- ²⁷Tsona wakati wa nabii Elisha, Iziraeli ka kuna akongo anji a mahana, lakini takuna hata mmwenga yephozwa isiphokala Namani kula tsi ya Siria."
- ²⁸Jesu phogomba hivyo, atu osi okala himo sinagogini areya sana.
- ²⁹Aunuka achimtuluzwa kondze ya mudzi, aphiya naye hadi kanda-kanda ya mwango odzengbwa mudzi wao, ili amsukume ko tsini mavoromokoni.
- ³⁰Lakini achitsapa na pho kahi-kahi za atu achiphiya vyakpwe.
- ³¹Alafu Jesu waphiya Kaperinaumu, mudzi wa Galilaya, na Siku ya Kuoya kala achifundza sinagogini.
- ³²Atu aangalazwa ni mafundzoge, mana manenoge kala gana uwezo.
- ³³Mo sinagogini kala mna mutu yepagalwa ni pepo, na achikala anakota likululu,
- ³⁴anaamba, "Unamini wee, Jesu wa Nazareti? Ukedzahumarigiza? Nakumanya! Uwe u Mutu wa Haki yela kpwa Mlungu."
- ³⁵Lakini Jesu wamdemurira yuya pepo, achimuamba, "Nyamala na utuluke!" Alafu yuya pepo wam'bwaga yuya mutu pho mbere za atu, chisha achituluka bila ya kumlumiza.
- ³⁶Atu osi aangalala na achibisha enye kpwa enye, achiamba, "Ni mafundzo gadze gano? Kpwa mana anademurira pepo kpwa uwezo na nguvu nao anatuluka!"
- ³⁷Habarize zaenea chila phahali seemu hiyo.
- ³⁸Jesu wauka sinagogini na achiphiya kaya kpwa Simoni. Mtsedza wa chichetu wa Simoni kala ana homa kali, atu achimuamba Jesu amphoze.
- ³⁹Phahi, waima phephi naye na achiridemurira rira homa riuke, na richiuka achiphola. Yuya mchetu waunuka na saa iyo-iyo achiandza kuahumikira.

⁴⁰Dzuwa phokala rinatswa, osi ariokala na akongo a chila aina, amrehera Jesu, naye achiabandikira mikono osi achiaphoza.

⁴¹Piya pepho atuluka atu anji, kuno anapiga kululu, anaamba, "Uwe ndiwe Mwana wa Mlungu!" Lakini Jesu ka achiademurira, na ka kaaricha akagomba, mana kala anamanya kukala ndiye Yetsambulwa ni Mlungu Kuokola Atu.

⁴²Muhondoye chiti, Jesu wauka achiphiya phahali kanda macheye. Atu achikala anamuendza na ariphomuona ajeza kumzuwiya asiuke.

⁴³Lakini achiaambira, "N'lazima piya nikatangaze midzi yanjina habari ndzuri kukala Mfalume kula kpwa Mlungu akedza, mana hiyo ndiyo sababu yohumirwa."

⁴⁴Phahi, waenderera kutangaza ujumbe kula kpwa Mlungu masinagogi ga Judea ndzima.

Luka 5

¹Siku mwenga, Jesu kala aimire kanda-kanda ya ziya ra Genesareti na phachikala pha tele atu anji anasukumana hata Jesu mwenye achikala anafyehwa. Nao ka akedzasikiza mafundzo ga Jesu kula kpwa Mlungu.

²Waona madau mairi pho kanda-kanda ya ziya, enye kala akatuluka anatsukutsa nyavu zao.

³Dau mwenga rakala ni ra Simoni; Jesu wapanda dau hiro ra Simoni na achimuamba arisengeze madzi manji chidide. Wasagala himo dauni na achifundza nyo atu.

⁴Ariphomala kufundza, wamuamba Simoni, "Phirika dau chinani, mkabwage nyavu zenu mvuwe ng'onda."

⁵Simoni achimuamba, "Bwana, usiku kucha hukahenda chadi cha kuvuwa, wala tahukaphaha chitu. Lakini kpwa kukala ukaamba, hundabwaga nyavu huvuwe."

⁶Phahi ariphoandza kuvuwa, agbwira ng'onda anji hata nyavu zao zichianza kudoka.

⁷Ariphoona hivyo, aatsuphira mikono ayawao okala dau ranjina ili edze aaterye. Nao ariphokpwedza aodzaza ng'onda madau gosi mairi, hata phadide gahohe.

⁸Simoni Petero ariphoona hivyo, wamgbwerera Jesu maguluni, na achimuamba, "Bwana, tafadhali uka hipha, mana mino ni mutu wa dambi, sifwaha kukala na uwe!"

⁹Simoni na ayae aangalazwa ni vira achivyogbwira ng'onda anji,

¹⁰nao Jakobo na Johana, ana a Zebedayo, ambao kala ni avuvi ayae piya aangalala. Alafu Jesu wamuamba Simoni, "Usiogophe! Hangu sambu na kuenderera undavuwa atu."

- ¹¹Phahi, ariphotuluza madau gao kondze, aricha chila chitu na achimlunga Jesu.
- ¹²Siku mwenga Jesu ariphokala mudzi fulani, kpwapwedza mutu ana mahana mwiri mzima. Ariphomuona Jesu, wadzibwaga photsi chimabumabu mbereze na achimuamba, "Bwana, uchimendza unaweza kunitakasa."
- ¹³Jesu wagolosa mkpwonowe achimguta yuya mutu wa mahana, achimuamba, "Ehe! Nalonda, takasika." Saa iyo-iyo mahana gachiyaya.
- ¹⁴Chisha achimkahaza achimuamba, "Usimuambire mutu yeyesi! Ela phiya ukadzionyese kpwa Mlavyadzi-sadaka na ulavye sadaka ya kutakaswa kama vyolagiza Musa, ili ukale ushahidi kpwa atu kala ukaphola kpweli."
- ¹⁵Lakini habari za Jesu zazidi kuenea, hata atu anji achedzamsikiza na kuphozwa makongo gao.
- ¹⁶Mara kpwa mara Jesu kala nkuphiya phatu kanda macheye achavoya Mlungu.
- ¹⁷Siku mwenga, wakati Jesu ka anafundza, kpwapwedza Mafarisayo na alimu a Shariya kula chila mtaa wa Galilaya, na kula Judea na mudzi wa Jerusalemu. Jesu kala ana uwezo wa Mlungu wa kuphoza akongo,
- ¹⁸phahi phakpwedza atu akatsukula mutu wa kuphola vilungo mzega-mzega chitandani. Ajeza kumuinjiza ndani amphirikire Jesu,
- ¹⁹ela kpwa sababu ya hura umati wa atu uriokala hipho akosa njira ya kuinjirira mo ndani. Phahi, apanda naye dzulu ya nyumba, achiusa vigae vichache na achimtsereza na chitandache mpaka mbere za Jesu.
- ²⁰Jesu ariphoona hara atu vira amkuluphiravyo, wamuamba yuya mkpwongo, "Msena wangu, ukasamehewa dambizo."
- ²¹Hara Mafarisayo na alimu a Shariya achiandza kudziuza chimoyo-moyo, achiamba, "Ni ani yuno ambaye anagomba kufuru? Takuna mutu awezaye kusamehe dambi siphokala Mlungu macheye!"
- ²²Jesu wamanya aazago, achiauza, "Kpwa utu wani mnaaza hivyo mwenu mioyoni?"
- ²³Niriphi ra rahisi, ni kumuambira mutu, 'Ukasamehewa dambizo,' hebu ni kuamba, 'Unuka uphiye vyako?'
- ²⁴Lakini ili kukuhakikishirani kala mimi Mutu Yela Mlunguni nina uwezo wa kusamehe dambi duniani, ninamuamba hiyu mkpwongo, 'Unuka, hala chitandacho uphiye kpwako kaya.' "
- ²⁵Mara mwenga yuya mkpwongo achiunuka, achiima pho mbere za atu, achihala tandikore achiphiya kaya kuno anamtogola Mlungu.
- ²⁶Chila mmwenga waangalala sana na achimtogola Mlungu. Atishirwa sana na achiamba, "Rero hukaangirwa."

²⁷Badaye, Jesu watuluka kondze ya mudzi, achimuona karani mmwenga wa kodi aihwaye Lawi, asegere phakpwe ofisini. Achimuamba, "Nilunga."

²⁸Naye Lawi waunuka, achiricha kaziye na achimlunga.

²⁹Alafu Lawi wamhendera Jesu karamu kulu phakpwe kaya, na kundi kulu ra makarani ga kodi na atu anjina kala achiharirwa kala ni achina-dambi akpwedzarya phamwenga naye.

³⁰Phahi, Mafarisayo anjina na alimu a Shariya okala kundi mwenga, anung'unika kuauza anafundzi a Jesu, "Mbona mnarya na kunwa na makarani ga kodi na achina-dambi anjina?"

³¹Jesu achiaambira, "Azima taana haja ya mganga, ela hara akongo ndio ario na haja ya mganga.

³²Siyakpwezaiha atu adzionao ana haki, ela nákpwedza kuaambira achina-dambi atubu dambi zao."

³³Alafu atu anjina amuuzza Jesu, "Anafundzi a Johana mara kpwa mara kala achifunga na kuvoya Mlungu, na hata anafundzi a Mafarisayo piya. Lakini mbona anafundzio kazi yao ni kurya na kunwa bahi?"

³⁴Jesu waambira, "Mchiaalika ajeni harusini, kpwa kpweli tamuweza kuahenda afunge na kuno bwana arusi a phamwenga nao.

³⁵Ela kundakpwedza wakati ambapho andausirwa bwana arusi, wakati hinyo ndipho andafunga."

³⁶Chisha achiaambira mfwano hinyo: "Takuna mutu akataye chipande cha nguwo nyiphya akachitiya chiraka nguwo ya kare. Kpwa mana uchihenda hivyo undabananga hira nguwo nyiphya, na hicho chiraka tachindagbwa sawa na hiyo nguwo ya kare.

³⁷Wala takuna atiyaye uchi muphya viriba vya kare; mana achihenda hivyo vira viriba vindafutuka na viahuke, chisha uchi undamwagika na vyo viriba vindakala tavina mana.

³⁸Lakini uchi muphya n'lazima utiywe viriba viphya!

³⁹Tsona phahi, takuna mutu anwaye uchi wa kare akaaza muphya, mana andaamba, 'Hura wa kare ndio mnono.' "

Luka 6

¹Siku mwenga, kala ni Siku ya Kuoya, Jesu na anafundzie atsapira minda ya nganu. Anafundzie achikala anakata masuche ga nganu, achigaphulula na kurya.

²Mafarisayo anjina achiauza, "Mbona mnahenda dzambo ambaro si shariya kpwehu sisi Ayahudi kurihenda Siku ya Kuoya?"

- ³Jesu achiaambira, "Kale tamdzangbwesoma arivyohenda Mfalume Daudi na ayae ariphosikira ndzala?"
- ⁴Daudi wamenya hema ra kumuabudu Mlungu, achihala mikahe yotengbwa kpwa kazi ya Mlungu na achiirya. Hiyo mikahe kala chishariya iriwa ni alavyadzi-sadaka bahi. Piya waapha ayae achirya."
- ⁵Chimarigizo achiaambira, "Mimi Mutu Yela Mlunguni, nina uwezo wa mambo gosi ga Siku ya Kuoya."
- ⁶Siku yanjina ya Kuoya, Jesu wainjira sinagogini kufundza, na kala muna mutu ambaye mkpwonowe wa kulume wafuwa.
- ⁷Alimu a Shariya na Mafarisayo kala anaendza chizigbwa cha kumshitakira Jesu, hipho, amrorera ichikala andamphoza hiye mutu Siku ya Kuoya.
- ⁸Lakini Jesu wamanya maazo gao, na achimuamba yuya mutu wa kufuwa mkpwono, "Ng'oka wedze uime hipha." Yuya mutu wang'oka na achendaima hipho.
- ⁹Alafu Jesu achiaambira, "Nakuuzani, ni rhiphi ra shariya kuhenda Siku ya Kuoya? Ni mutu kuhenda manono hebu kuhenda mai? Ni kutivya mutu hebu kuolaga?"
- ¹⁰Waatong'orera matso atu osi, chisha achimuamba yuya mkpwongo, "Golosa mkpwonoo." Yuya mkpwongo achiugolosa, na uchikala mzima.
- ¹¹Lakini aho areya sana achibisha o enye kpwa enye achiamba, "Humhendedze yuno Jesu?"
- ¹²Siku mwenga Jesu waphiya gambani kpwendavoya Mlungu; wakala kuko usiku kucha kuvoya.
- ¹³Ligundzure kuriphocha, waiha afuasie, na kahi yao achitsambula kumi na airi ambao waaiha "mitume."
- ¹⁴Nao kala ni: Simoni (ambaye piya ka achimuiha Petero) na nduguye Anderea, Jakobo, Johana, Filipu, Batholomayo,
- ¹⁵Mathayo, Tomasi, Jakobo mwana wa Alfayo, Simoni (ambaye piya ka achiihwa Mpiganiadzi Uhuru.)
- ¹⁶Juda wa Jakobo na Juda Iskarioti, ambaye mwisho wamsalata Jesu.
- ¹⁷Jesu wala gambani na hara mitume, achedzaima hererani. Kala phana kundi kulu ra afuasie na kundi kulu ra atu anjina. Hinyo kala ala Jerusalemu na seemu zanjina zosi za Judea, na kula seemu za pwani ya midzi ya Tiro na Sidoni.
- ¹⁸Nao kala akedzasikiza mafundzo na kuphozwa makongo gao. Piya Jesu waphoza atu ariokala anayugbwa ni pepho.
- ¹⁹Atu osi kala achiaza kumguta, mana nguvu kala zichimtuluka zikaaphoza osi.

- ²⁰Jesu walola afuasie, na achiamba: "Baha mwi agayi a chiroho, mana Mlungu andakuhendani mkale atue.
- ²¹Baha mwimwi mhirikao na ndzala sambu, mana Mlungu andakumvunisani! Baha mwimwi mrirao sambu, mana mndatseka!
- ²²Baha atu achikuzirani, achikuhendani nyunga na kukulaphizani, na achikuoherani ngulu kpwa sababu ya mimi Mutu Yela Mlunguni.
- ²³Phahi, siku mambo higo gachikuphahani, hererwani na mruke-ruke na raha, mana Mlungu wakuikirani zawadi kulu hiko mlunguni. Mana ndivyo akare ao arivyoahendera manabii pho kare.
- ²⁴Lakini shaka rani hiro mwi matajiri, mana mndakala mwarya raha yenu kare.
- ²⁵Shaka rani hiro mwi mmvunao sambu, mana badaye mndahirika! Shaka rani hiro mwi mtsekao sambu, mana badaye mndarira!
- ²⁶Shaka rani hiro atu achikulikani, mana piya akare ao atogola manabii ga handzo."
- ²⁷Chisha Jesu achiamba, "Lakini mino nakuambirani mwimwi msikizao kukala, amendzeni aviha enu. Ahendereni manono anaokuzirani.
- ²⁸Ajaliyeni anaokuvoyera mai, avoyereni Mlungu anaokuhenderani vibaya.
- ²⁹Mutu achikupiga ndzeya hino mgaluzire yanjina nayo apige. Mutu achikufuta kandzuyo, mrichire na shatiro piya.
- ³⁰Akuvoyaye chitu muphe, na ndiyekufuta chiticho mrichire wala usimuisse.
- ³¹Ahendereni ayawenu viratu ambavyo namwi mngelonda akuhendereni.
- ³²Kpwani ichikala mnamendza akumendzania bahi, mndaphaha zawadi yani? Mana hata atu a dambi nao anamendza asena ao!
- ³³Na ichikala mnahenderato hara anaokuhenderani manono bahi, mndaphaha zawadi yani? Mana hata atu a dambi nao nkuhenderana manono.
- ³⁴Na mndaphahani mchiaaphasa pesa atu ambao mnaona anaweza kukuriphani? Mana hata atu a dambi nao nkuaaphasa ayawao na nkutaka ariphiwe pesa zosi.
- ³⁵Lakini amendzeni aviha enu na ahendereni manono. Aphaseni wala msikale na tamaa ya kuriphiwa. Namwi mndatuzwa vinono na mndakala ana a Mlungu wa Uwezo wosi. Mana Mlungu nkuaonera mbazi atu asioshukuru na ayi.
- ³⁶Phahi, kalani na mbazi dza Sowe yenu ariye mlunguni arivyo."
- ³⁷Tsona Jesu waamba, "Msihukumu ayawenu, namwi tamndahukumiswa ni Mlungu. Msilaumu ayawenu, namwi tamndalaumiwa. Sameheni ayawenu, namwi mndasamehewa vivyo.

³⁸Apheni ayawenu, naye Mlungu andakuphani. Mndahewa tele ya kusindirirwa na kusukpwa-sukpwa hata kufwasa. Mana chipimo mpimiracho ayawenu, ndicho ndichopimirwa mwimwi.”

³⁹Alafu Jesu waapha mfwano, waamba, "Dze chipofu anaweza kumlongoza njira chipofu myawe? Hata! Kaweza, mana osi airi andagbwa dibwani.

⁴⁰Mwanafundzi kashinda mwalimuwe, lakini mwanafundzi achimala masomoge vinono, andakala dza mwalimuwe.

⁴¹Kpwa utu wani unalola chifusi dzitsoni mwa myao, lakini kuona gongo zima ririro mwako dzitsoni?

⁴²Unawezadze kumuamba myao, 'Hebu msena wangu, nikuuse chifusi mwako dzitsoni,' ela kuona gongo zima mwako dzitsoni? Mnafiki we! Andza kutuluza gongo ririro mwako dzitsoni, ndipho undaona vinono hata utuluze chifusi chiricho dzitsoni mwa myao.”

⁴³Jesu achienderera kugomba achiamba, "Muhi mnono tauvyala matunda mai, wala muhi mui tauvyala matunda manono.

⁴⁴Mana chila muhi nkumanyikana kpwa gara matunda uvyalago. Kuweza kuphaha zabibu kula muhi wa miya, wala mngololi tauvyala tende.

⁴⁵Mutu mnono nkutuluza manono kula kpwa akibaye nono iriyo mwakpwe moyoni. Naye mutu mui nkutuluza mai kula kpwa akibaye mbii. Kpwa mana mutu nkugomba gachigoodzala mwakpwe moyoni.”

⁴⁶Jesu waenderera kuaambira atu, "Phahi, mbona mnaniiha 'Bwana, Bwana,' lakini tamhenda nilondago?

⁴⁷Nami nakuambirani mutu asikiraye maneno gangu na kugalunga garivyo:

⁴⁸Hiye ni dza mutu yedzenga nyumba, achitsimba msingi wa ndani na achidzenga dzulu ya mwamba. Mafuriko gariphokpwedza, gapiga nyumba lakini taiyagbwa, mana kala ikadzengbwa vinono.

⁴⁹Lakini yuya asikiraye maneno gangu na akagapuza, ni dza mutu yedzenga nyumba dzulu ya mtsanga bila ya kutsimba msingi. Mafuriko gariphokpwedza gapiga hira nyumba, na mara nyumba ichigbwa na kubomokakpwe kpwakala kukulu sana.”

Luka 7

¹Jesu ariphomala kuaambira atu mambo higo, wainjira mudzi wa Kaperinaumu.

²Kuko kpwakala na mkpwulu wa jeshi ra Chirumi, yekala na mtumishi ambaye kala anammendza sana. Hiye mtumishi wakala mkpwongo hata kayamanyikana kutiya.

³Mkpwulu wa jeshi ariphosikira habari za Jesu, wahuma vilongozi a Chiyahudi achiaambira, "Kamuambireni Jesu edze amphoze mtumishi wangu."

⁴Nao ariphofika kpwa Jesu, amtaka sana amsaidiye, amuamba, "Mutu hiye anafwaha kusaidiwa,

⁵mana anamendza atu ehu na wahudzengera sinagogi."

⁶Phahi, Jesu waphiya nao. Lakini ariphofika phephi na hipho, yuya mkpwulu wa jeshi ra Chirumi wahuma asenae akamuambe, "Bwana, usidziyuge kpwedza hadi kpwangu, mana sifwaha kukukaribisha mwangu nyumbani.

⁷Ndiyo mana sedzere kpwako mimi mwenye. Nakuvoya ugombe neno tu, na mtumishi wangu andaphola.

⁸Mana hata mimi ni tsini ya akulu angu, nami nina asikari ambao a tsini yangu. Nchimuamba mmwenga, 'Phiya phatu fulani!' Anaphiya; na wanjina nchimuamba, 'Ndzoo!' Aredza. Piya nchimuamba mtumishi wangu, 'Henda utu fulani!' Naye anahenda."

⁹Jesu ariphosikira hivyo, waangalala sana; achiugalukira hura umati wa atu okala anamlunga-lunga, achiaambira, "Nakuambirani kukala sidzangbweona mutu ariye na imani kulu dza ihi mumu tsi ya Iziraeli."

¹⁰Phahi, hara ahumwa auya kaya kpwa mkpwulu wa jeshi na ariphofika mura nyumbani akuta yuya mtumishi akaphola.

¹¹Siku ya phiri Jesu waphiya mudzi uihwao Naini phamwenga na anafundzie na umati mkpwulu wa atu.

¹²Ariphofika phephi na ryango ra mudzi, wakuta atu anatuluka kula mudzi hinyo, akatsukula maiti ya mutu ambaye kala ni mwana wa macheye kpwa nine, tsona nine kala ni gungu. Atu anji kula mudzi hinyo kala a phamwenga na yuya gungu.

¹³Jesu ariphomuona yuya nine wa mufwa, wamuonera mbazi, na achimuamba, "Usirire mayo."

¹⁴Warisengerera rira jeneza achiriguta na hara okala anaritsukula achiima. Alafu achiamba, "We mvulana, nakuamba unuka!"

¹⁵Yuya mufwa wang'oka achisagala na achiandza kubisha. Chisha Jesu achimlavya kpwa nine.

¹⁶Atu osi ariokala hipho atezeka na achiogopha sana, na achimtogola Mlungu, achiamba, "Kpwazuka nabii mkpwulu kpwehu siku hizi. Mlungu wakpwedzasaidiya atue!"

¹⁷Habari hizo zaenea tsi ndzima ya Judea na seemu zosi za jirani.

¹⁸Johana M'batizadzi ariphoambirwa ni anafundzie habari za mambo gosi higo, waiha anafundzie airi,

- ¹⁹achiahuma kpwa Jesu akamuuze, "We ndiwe Muokoli ugodzerwaye, hebu hugodze mutu wanjina?"
- ²⁰Phahi, hara ahumwa ariphofika kpwa Jesu, amuamba, "Johana M'batizadzi akauhuma wedze hukuuze, 'Dze, we ndiwe hiye Muokoli ugodzerwaye, hebu hugodze mutu wanjina?' "
- ²¹Wakati hinyo hinyo Jesu kala anaphoza atu anji makongo na ayugbwao ni pepho, piya waphoza vipofu anji.
- ²²Phahi, waambira hara ahumwa, "Phiyani mkamsemurire Johana gara mchigogaona na kugasikira: Vipofu anaona, viswere ananyendeka, akongo a mahana anaphozwa, masito anasikira, atu a kufwa anafufulwa na achiya anasemurirwa habari ndzuri kula kpwa Mlungu.
- ²³Tsona muambireni kukala mutu yeyesi asiye na wasi-wasi nami waajaliwa."
- ²⁴Ahumwa a Johana ariphokala anauka, Jesu wagomba na rira kundi ra atu kuhusu Johana, achiamba, "Mriphophiya weruni kpwendamsikiza Johana, mwaona myaonani? Dze, mwakpwendalola nyasi zifwihavyo na phuto?"
- ²⁵Ichikala sio hivyo, sambu kala mchalolani? Hebu ka mchalola mutu wa kuvwala nguwo ndzuri? Hata! Atu avwalao nguwo maridadi na kuishi maisha mazuri akala madzumba ga chifalume.
- ²⁶Haya niambirani, kala mchalolani? Kala mchalola nabii? Ehe! Ni kpweli kabisa, tsona nakuambirani iye ni zaidi ya nabii.
- ²⁷Hiye ndiye ambaye neno ra Mlungu raandikpwa kumhusu, Mlungu phoamba, 'N'ndatanguliza mhumwa wangu mberezo, ambaye andakutengezera njirayo.'
- ²⁸Nakuambirani, kahi ya anadamu osi takuna mutu muhimu kuriko Johana, lakini mutu yeyesi ndiyekubali Muokoli yela kpwa Mlungu, hata yuya wa tsini kabisa, ni muhimu zaidi kuriko Johana."
- ²⁹Na atu osi phamwenga na makarani ga kodi amsikiza Johana, achimtogola Mlungu, nao achibatizwa ni Johana.
- ³⁰Lakini Mafarisayo na alimu a Shariya arema kubatizwa ni Johana, hipho achikala akarema mpango wa Mlungu.
- ³¹Jesu waenderera kuamba, "Sambu n'ndakuambirani atu a rero arivyo.
- ³²Ni dza anache avumbao cheteni, kundi mwenga rinaambira ranjina: 'Hukakupigirani ngoma ya arusi, lakini tamkafwiha! Hukakupigirani ngoma ya chifudu, wala tamkarira!'
- ³³Kpwa mana Johana M'batizadzi kala achifunga na kanwere uchi, ela mwi mchiamba, 'Pepho zamtiya koma.'

- ³⁴Nriphokpwedza mimi Mutu Yela Mlunguni, narya na kunwa uchi, vino mnaamba, 'Mloleni hiye mroho na mlevi, tsona ni msena wa makarani ga kodi na achina-dambi!'
- ³⁵Lakini phahi, ikima ya Mlungu nkuhakikishwa kala ni kpweli ni atu osi aikubalio na kuilunga."
- ³⁶Mfarisayo mmwenga wamualika Jesu akarye naye kpwakpwe kaya. Alafu Jesu waphiya achendasagala chakuryani.
- ³⁷Phahi, mudzi hinyo kala kuna mchetu mmwenga malaya. Hiye mchetu ariphosikira Jesu anarya nyumbani mwa Mfarisayo, wahala tupa ya marashi ga samani na achedza nago mura nyumbani.
- ³⁸Waima phephi na Jesu, achiandza kurira na matsozige gachitwena maguluni pha Jesu. Chisha achigaphangusa na nyereze, achimdonera magulu alafu achigapaka higo marashi.
- ³⁹Yuya Mfarisayo yemualika Jesu ariphoona vira, wagomba na rohore, achiamba, "Kala mutu hiyu ni nabii, angemanya ni ani na ni mchetu wa aina yani amgutaye, mana ni mchina-dambi!"
- ⁴⁰Ndipho Jesu achimuamba yuya Mfarisayo, "Simoni, nina maneno nataka nikuambire." Simoni achiamba, "Haya mwalimu, niambira."
- ⁴¹Phahi, Jesu waamba, "Kpwahenda mutu mmwenga achiaphasa pesa atu airi: Mmwenga wamuaphasa shilingi elufu hamsini na wanjina achimuaphasa shilingi elufu tsano.
- ⁴²Osi airi ashindwa kuripha, hipho yuya mutu yeaphasa pesa achiasamehe. Sambu, unafikiri ni yuphi ndiyeshukuru zaidi?"
- ⁴³Simoni achimuamba, "Naona ni yuya yesamehewa deni kulu." Jesu achimuamba, "Ni sawa, ukagomba kpweli."
- ⁴⁴Alafu wagaluka achimlola yuya mchetu na achimuamba Simoni, "Unamuona yuno mchetu? Nchiphoinjira himu mwako nyumbani, kukanipha madzi ga kusinga magulu, lakini yuno mchetu akanisinga magulu na matsozige na akaniphangusa na nyereze.
- ⁴⁵Kukanipha mwadzo wa kunidonera, lakini hiyu mchetu akanidonera magulu hangu nchiphokpwedza.
- ⁴⁶Tsona kukanipaka mafuha chitswani kama desturi, lakini iye akanipaka marashi ga magulu.
- ⁴⁷Phahi, nakuamba, mahaba manji achigonihendera hiyu mayo ganaonyesa akasamehewa dambize nyinji. Lakini mutu asamehewaye chidide andamendza chidide."
- ⁴⁸Ela Jesu achimuamba yuya mchetu, "Mayo, ukasamehewa dambizo."

⁴⁹Ndipho hara atu anjina okala anarya naye achiuzana, "Ni ani yuno, ambaye anasamehe hata dambi?"

⁵⁰Ela Jesu achimuamba yuya mchetu, "Kuluphiroro rikakuokola, phiya salama."

Luka 8

¹Bada ya higo, Jesu wazunguluka midzi na vidzidzi achitangaza na kusemurira habari ndzuri kuhusu ufalume ambao Mlungu wamupha. Piya kala achiphiya na hara anafundzie kumi na airi.

²Achetu anjina ambao ka akatuluzwa pepho na kuphozwa makongo ka achiphiya naye. Achetu hinyo kala ni Maryamu (mwenyezi wa Magidala), naye ka akatuluzwa pepho sabaa,

³Joana, mkpwaza Kuza (hiye Kuza kala ni mwimirizi wa nyumba ya Mfalume Herode), Susana na achetu anjina anji. Achetu hinyo ka achitsanga mali zao kumterya Jesu na anafundzie.

⁴Siku mwenga, umati wa atu waphiya kpwa Jesu na anjina achikala bado acherephiya kula chila mudzi, phahi waatsuphira ndarira, achiamba:

⁵"Mkurima mmwenga waphiya kpwakpwe mndani kpwendakumbira mbeyuze. Aripbokala anamwaga-mwaga zira mbeyu, zanjina zagbwa njirani, zichivyogbwa-vyogbwa na zichitsotwa ni nyama a mapha.

⁶Zanjina zagbwa seemu za mawe, na ziriphoandza kumera zichinyala, mana kala taphana mtsanga wa haja wa kuika chinemi.

⁷Zanjina zagbwa zichimera phamwenga na mbeyu za miya. Phokala zinakula, miya nayo yakula, hipho, hira mimea ichilingbwa-lingbwa ni hira miya.

⁸Zanjina nazo zichigbwa mtsanga wa nguvu, zichikulato na kuvyala masuche ga tembe gana." Chimarigizo Jesu wapiga likululu, achiamba, "Ariye na masikiro, naasikire!"

⁹Anafundzie amuuzwa, "Ndarira hiyo manaye ni ni?"

¹⁰Naye achiaambira, "Mwimwi mwaajaliwa kumanya siri za ufalume ambao Mlungu wanipha, lakini kpwa atu anjina nagomba nao na ndarira tu, 'ili alole ela asione, na asikire ela asielewe.'

¹¹Mana ya ndarira hino ni hivi: Zira mbeyu ni ujumbe wa Mlungu.

¹²Mbeyu zogbwa njirani na zichiriwa ni nyama a mapha, ni dza atu asikirao neno, alafu Shetani akariusu mwao mioyoni, ili asedze akaamini na kuokoka.

¹³Mbeyu zogbwa seemu za mawe zichimera upesi lakini kpwa vira mizi ka i dzulu-dzulu zafwa. Hizi ni dza atu asikirao neno akariphokera na raha, lakini tarimenya mwao ndani. Nkuriamini kpwa muda tu, lakini Shetani achiajeza nkuriricha.

- ¹⁴Mbeyu zogbwa miyani zichilingbwa-lingbwa hata zichikosa kuvyala. Hizi ni dza atu asikirao neno, lakini anavyoenderera kuishi, badaye nkulingbwa-lingbwa ni mambo ga dunia, tamaa za mali na raha za maisha, hipho, imani zao taziphera.
- ¹⁵Ela mbeyu zogbwa mtsanga wa nguvu zichivyalato. Hizi ni dza viratu atu asikirao neno ra Mlungu, akarigbwira moyo kutsuka, nao kpwa kuvumirira nkuenderera kuhenda mambo manono.”
- ¹⁶Alafu Jesu waamba, "Takuna mutu aasaye taa akaifwinika daba ama akayiika mvunguririni. Lakini mutu achiasa taa, nkuyiika dzulu, ili chila ainjiraye aone mwanga.
- ¹⁷Mambo gosi gofwitsika gandaonekana wazi na maneno gosi ga siri gandamanyikana wazi.
- ¹⁸Phahi sikizanito neno ra Mlungu, kpwa mana yeyesi ndiyesikizato andaenjerezwa, lakini asiyesikiza vinono, hata higo machache ambago anaona anamanya, andafutwa.”
- ¹⁹Siku mwenga, nine na ndugu za chilume a Jesu akpwezamlola, lakini taayaweza kumfikira kpwa sababu ya umati wa atu uriokala hipho.
- ²⁰Mutu mmwenga wamuamba Jesu, "Mayoo na enenu aimire kondze analonda kukuona.”
- ²¹Lakini Jesu achiaambira atu, "Mayo na enehu ni hara asikizao neno ra Mlungu na akarigbwira.”
- ²²Siku mwenga, Jesu na anafundzie ainjira dauni, achiaambira, "Nahuvukeni ng'ambo ya ziya." Phahi achiandza charo chao.
- ²³Ariphokala anavuka, Jesu wagbwirwa ni usingizi achilala mo dauni. Alafu kpwapiga phuto kali ziyani, na dau richikala rinainjira madzi, phadide ahohe.
- ²⁴Hara anafundzie akpwendamlamusa, achimuamba, "Bwana, Bwana, hunahoha!" Jesu walamuka na achiridemurira rira phuto na maimbi; rira phuto rahurira, na kuchikala kuhurire.
- ²⁵Alafu achiaambira anafundzie, "Kuluphiro renu ri kuphi?" Lakini aho aangalala na achiona wuoga, na achiuzana, "Yuno ni mutu wa viphi ambaye anaweza kudemurira hata phuto na maimbi, gakamsikiza?”
- ²⁶Badaye Jesu na anafundzie aenderera na charo chao na achifika tsi ya Gadara, ambayo ni kuvuka ng'ambo ya ziya kula Galilaya.
- ²⁷Jesu ariphotuluka dauni, waktana na mutu kula mudzi uho yepagaliwa ni pepho. Siku nyinji mutu hiye kala kavwala nguwo wala kala kaishi kaya, lakini kala achiishi vikurani.

²⁸Ariphomuona Jesu, wapiga kululu na achidzibwaga maguluni, achigomba na hoyo, achiamba, "Jesu, Mwana wa Mwenyezi Mlungu, unamini? Nakuvoya usinitese!"

²⁹Mana Jesu kala akaademurira hara pepho atuluke mura mwa yuya mutu. (Mara nyinji pepho kala achidedemuka hiye mutu; kala nkufungbwa singenge za mikono na magulu na akarindwa, lakini kala achizidosa na akaphirikpwa weruni ni pepho.)

³⁰Jesu achimuza, "Uihwadze?" Naye achiamba, "Ndimi Jeshi." Wagomba hivyo mana ka ana pepho anji.

³¹Hara pepho am'bembeleza sana Jesu asiatsuphe kuzimu.

³²Sambi kala kuna chaa cha nguluwe anji chinalisa kanda-kanda ya gamba. Pepho am'voya ruhusa Jesu akainjire hara nguluwe, naye achikubali.

³³Hipho, hara pepho atuluka yuya mutu na achendainjira rira kundi ra nguluwe, nacho chira chaa chosi chatserera fuli mteremukoni, chichiinjira ziyani, na nguluwe osi achihoha.

³⁴Arisa a hara nguluwe phoona vira, azola achendasema habari hizo ko midzini na mindani.

³⁵Atu akpwedzalola mambo gachigohendeka. Ariphofika kpwa Jesu, amuona yuya mutu kala akatuluzwa pepho asegere maguluni pha Jesu, akavwala nguwo na ana achilize, nao achitishirwa.

³⁶Hara ambao agaona garivyoohendeka asemurira ayawao. Aambira vira yuya mutu wa pepho achivyophozwa.

³⁷Alafu enyezi osi a tsi ya Gadara am'voya Jesu auke, mana ka anatishirwa sana. Phahi, wapanda dauni na achiuka.

³⁸Kabla Jesu kadzangbweuka, yuya mutu yekala akatuluzwa pepho wam'voya ruhusa Jesu aphiye naye. Lakini wamkahaza, achimuamba,

³⁹"Phiya kaya na ukaambire atu mambo gosi Mlungu achigokuhendera." Phahi, yuya mutu wauka na achendatangazira atu mudzi mzima mambo gosi achigohenderwa ni Jesu.

⁴⁰Jesu ariphouya ng'ambo yanjina, kundi ra atu ambaro kala rinamgodzera ramkaribisha.

⁴¹Alafu kpwakpwedza chiongozi wa sinagogi yehwa Jairo, achimgbwerera Jesu maguluni na achim'bembeleza aphiye naye kpwakpwe kaya.

⁴²Mana kala ana mwanawe wa chichetu, wa kama miaka kumi na miiri, na kala ndiye mwana macheye, naye kala ni mkpwongo hata wa kutsungurira kaburi. Phahi, Jesu phokala anaphiya kpwa Jairo, kala anafyehwa sana chila uphande.

⁴³Mo kundini, kala mna mchetu mmwenga, ambaye ka ni mkpwongo wa mruwo miaka kumi na miiri. Naye wamala aganga na malize zosi wala takuna yemphoza.

⁴⁴Phahi, hiye mchetu waphiya nyuma ya Jesu, achiguta mutse wa nguwoye. Mara mwenga hura mruwo uchituma.

⁴⁵Ndipho Jesu wauza, "Ni ani chiyeniguta?" Phahi, chila mmwenga ariphorema kala akamguta, Petero wamuamba, "Bwana, umati wosi huno uchiokuzunguluka na vyo atu afyehanavyo, unauza chekuguta!"

⁴⁶Lakini Jesu achiamba, "Mmwenga akaniguta, mana nkasikira nguvu zangu zikaphoza mutu."

⁴⁷Phahi, yuya mchetu ariphoona akamanyikana, wadzituluza kuno anakakama, achimgbwerera maguluni, na achimuambira sababu ya kumguta pho mbere za atu osi, na vira achivyophola mara mwenga.

⁴⁸Phahi Jesu wamuamba yuya mchetu, "Mayo, kpwa sababu ya kunikuluphira ukaphola. Phiya salama."

⁴⁹Phokala acherebisha na yuya mchetu, kpwakpwedza mhumwa kula kaya ya yuya chilongozi, achimuamba Jairo, "Pore, ela ye mwanao msichana akafwa, kpwa hivyo takuna haja ya kumyuga mwalimu tsona."

⁵⁰Lakini Jesu ariphosikira higo, wamuamba Jairo, "Gasikuondose higo, kuluphira tu."

⁵¹Jesu ariphofika phara kaya, kayamruhusu mutu yeyesi kuinjira naye mura nyumbani, siphokala Petero, Johana na Jakobo, na avyazi a ye mufwa.

⁵²Wakati na hinyo, atu osi himo nyumbani kala anapiga kululu na kurira kpwa sonono. Lakini Jesu achiaambira, "Nyamalani, msirire! Mana hiyu mwanache kafwere, ela arere tu!"

⁵³Atu amtseka, mana kala anamanya yuya mwanache akafwa.

⁵⁴Lakini Jesu wamgbwira mkpwono yuya msichana, na achiamba, "Mwanangu, unuka!"

⁵⁵Yuya mwanache achiuyiza, na mara mwenga achiima. Alafu Jesu achilagiza ahewe chakurya.

⁵⁶Avyazie aangelala sana. Lakini Jesu waambira asimuambire mutu yeyesi higo chigohendeka.

Luka 9

¹Badaye Jesu wakusanya anafundzie kumi na airi, achiapha nguvu na uwezo wa kutuluza pepho osi na kuphoza makongo.

- ²Chisha waahuma akasemurire atu kuhusu ufalume ambao Mlungu wamupha na kuphoza akongo.
- ³Waambira, "Msitsukule chitu chochosi: bakora, wala mkoba, wala chakurya, wala pesa; wala mutu naasitsukule nguwo yanjina.
- ⁴Nyumba ndiyokaribishwa, kalani hiyo hiyo mpaka ndiphouka mudzi hinyo.
- ⁵Atu achirema kukukaribishani, ukani mudzi hinyo, na ichikala mnauka kukutani vumbi ra mwenu maguluni kuaonyesa kala akahenda makosa kpwa kusakusikizani."
- ⁶Phahi, hara anafundzi auka, achiphiya chidzidzi hadi chidzidzi kutangaza habari ndzuri na kuphoza akongo chila phahali.
- ⁷Herode, mtawala wa jimbo ra Galilaya, ariphosikira habari za higo mambo gahendwago ni Jesu, wahenda wasi-wasi sana, mana anjina ka anaamba, "Johana M'batizadzi akafufuka!"
- ⁸Na anjina ka anaamba, "Elija wazembuka," na anjina nao ka anaamba, "Nabii mmwenga wa kare wafufuka."
- ⁹Phahi, Herode waamba, "Johana námkata chitswa; sambu ye nisikiraye habarize, akale ni ani?" Hipo, wahenda bidii akutane naye.
- ¹⁰Anafundzi a Jesu auya, achimsemurira chila chitu arichohenda. Alafu Jesu na hara anafundzie auka machiyao achiphiya mudzi wa Bethisaida.
- ¹¹Hura umati wa atu uriphomanya achikophiya, wamlunga kuko. Jesu waakaribisha na achiafundza kuhusu ufalume ambao Mlungu wamupha, na achiphoza akongo.
- ¹²Dzuwa riphokala rinatswa, hara anafundzie kumi na airi akpwendamuamba, "Mwalimu, aambire hano atu aphiye mitaa na midzi ya phephi ili akaendze chakurya na malazi; mana hiku huriko ni weruni."
- ¹³Lakini Jesu achiaambira, "Ariseni mwimwi." Nao achimuamba, "Huna mabofulo matsano na ng'onda airi tu. Tavitosha kurisa atu osi hinya, labuda hukaagurire."
- ¹⁴(Kala phana alume kama elufu tsano.) Phahi, waambira anafundzie, "Aambireni asagale makundi makundi, kama atu hamsini hamsini."
- ¹⁵Anafundzie ahenda hivyo, chila mmwenga achisagala.
- ¹⁶Alafu Jesu wahala gara mabofulo matsano na ng'onda airi, achilola dzulu mlunguni na achimshukuru Mlungu, alafu achigamega-mega, na achiapha anafundzie aandazire atu.
- ¹⁷Atu osi arya kumvuna. Chisha anafundzie achitsola-tsola masaza na achiodzaza kaphu kumi na mbiri.

- ¹⁸Siku mwenga, Jesu kala anavoya Mlungu macheye. Anafundzie amlunga pho phephi, naye achiauza, "Atu nkuamba mino ni ani?"
- ¹⁹Nao achimuamba, "Anjina nkuamba uwe u Johana M'batizadzi; anjina nkuamba u Elija; anjina nao nkuamba u nabii fulani wa kare ambaye wafufuka."
- ²⁰Chisha achiauza, "Dze, mwino, mnaamba mino ni ani?" Petero achimuamba, "Uwe ndiwe Masihi."
- ²¹Jesu achiakahaza sana asimuambire mutu yeyesi dzambo hiri.
- ²²Alafu Jesu achiamba, "N'lazima mimi Mutu Yela Mlunguni niteswe sana na nikahalwe ni akulu a alavyadzi-sadaka, alimu a Shariya na vilongozi anjina. N'ndaolagbwa, lakini siku ya hahu n'ndafufulwa."
- ²³Alafu Jesu wagomba na atu osi, achiaambira, "Yeyesi amendzaye kukala mfuasi wangu n'lazima ariche njiraze, akale tayari kugaya chila siku kpwa kutsukula msalabawe, na anilunge.
- ²⁴Mana yeyesi ndiyelonda kuokola maishage himu duniani andaangamiza maishage ga milele; ela aangamizaye maishage ga himu duniani kpwa sababu yangu, andagaokola.
- ²⁵Dze, mutu andaphaha fwaida yani achiphaha utajiri wosi wa dunia ndzima lakini akose maisha ga milele?
- ²⁶Mmanye kukala mimi, Mutu Yela Mlunguni, n'ndakpwedza na utukufu, phamwenga na wa malaika, na utukufu wa Baba. Mutu yeyesi ndiyenionera waibu, na kuonera haya maneno gangu, nami n'ndamuonera haya wakati ndiphokpwedza.
- ²⁷Tsona nakuambirani kpweli, phapha phana anjina ambao taandafwa mpaka anione naphokera uwezo kula kpwa Mlungu wa kutawala kama Mfalume."
- ²⁸Iriphotsapa kama wiki bada ya kugomba maneno higa, Jesu wamhala Petero, Johana na Jakobo kpwendavoya Mlungu gambani.
- ²⁹Ariphokala anavoya Mlungu, suraye yagaluka, na nguwoze zichikala nyereru za kung'ala-ng'ala.
- ³⁰⁻³¹Gafula phachitsembuka atu airi, nao piya kala anang'ala sana. Hinyo, kala ni Musa na Elija, na achikala anabisha na Jesu kuhusu mwisho wa kaziye na chifoche ambacho ka chindakala Jerusalem.
- ³²Wakati hinyo Petero na ayae kala anasenukira, ela ariphong'aza matso, aona Jesu anang'ala ajabu, naye kala aimire na hara airi.
- ³³Badaye, Musa na Elija aandza kuuka. Ariphokala anauka, Petero wamuamba Jesu, "Bwana, ni vinono sisi kukala hipha. Nahudzenjeni vibanda vihahu; chimwenga chako, cha phiri cha Musa, na cha hahu cha Elija." (Lakini Petero kala kamanya agombaro.)

- ³⁴Petero phokala acheregomba, kpwapwedza ingu na chira chivurivuriche chichiafwinika. Hara anafundzi atishirwa ariphokala ndani ya rira ingu.
- ³⁵Alafu kwatuluka sauti kula mo inguni, ichiamba, "Hiyu ni mwanangu, yemtsambula. Mphundzeni!"
- ³⁶Bada ya hiyo sauti kutsupa, anafundzie amuona Jesu akasala macheye, na taayamuambira mutu yeyesi mambo higo arigogaona kpwa muda.
- ³⁷Muhondoye, Jesu na hara anafundzie ahahu ariphokala akatserera kula gambani, umati wa atu wakpwedza kukutana na Jesu.
- ³⁸Mutu mmwenga mo kundini wapiga hoyo achiamba, "Mwalimu, nakuvoya umsaidiye mwanangu, ambaye ni yuyu mmwenga tu.
- ³⁹Pepho nkumbwira akapiga hoyo gafula; nkumhenda akafurukuta na kutuluka povu ra mromo. Nkuenderera kumtesa sana na nkumrichira kpwa tabu.
- ⁴⁰Nkavoya anafundzio amtuluze hiyu pepho, lakini akashindwa."
- ⁴¹Jesu achiamba, "Aa! Mwi atu msiolunga manono na kusamkuluphira Mlungu! N'ndakala namwi hadi rini? N'ndakuvumirirani hadi rini?" Chisha achimuamba ise wa yuya mwanache, "Mrehe hipha ye mwanao."
- ⁴²Wakati yuya mvulana ka anarehwa, yuya pepho achim'bwaga photsi na achifurukuta. Lakini Jesu achimdemurira amtuluke, na achimphoza yuya mwanache, chisha achimlavya kpwa ise.
- ⁴³Atu osi aangalazwa ni uwezo mkpwulu wa Mlungu. Wakati atu osi kala achereangalazwa ni mambo gahendwago ni Jesu, Jesu waambira anafundzie,
- ⁴⁴"Niphundzani sawa-sawa higo ndigokuambirani: Wakati ukafika mimi, Mutu Yela Mlunguni, niyalaviwa kpwa anadamu."
- ⁴⁵Lakini taelewere mana ya maneno higo. Manage kala gakafwitswa ili asielewe, nao achiogopa kumuuza kuhusu mambo higo.
- ⁴⁶Anafundzi a Jesu aandza kulumbana kuhusu ni ani ndiye kala mkpwulu zaidi.
- ⁴⁷Lakini wamanya anafundzie aazago, hipho, wahala mwanache mdide na achimuimisa phephi naye.
- ⁴⁸Alafu achiaambira, "Mutu yeyesi ndiyemkaribisha hiyu mwanache kpwa sababu yangu, ananikaribisha mimi. Na hiye ndiyenikaribisha mimi, anamkaribisha hiye ariyenihuma. Kpwa mana yuya ndiyekubali kuumikira ayae, ndiye mkpwulu kuriko mosi."
- ⁴⁹Alafu Johana achimuamba, "Bwana, hwamuona mutu anahumira dzinaro kutuluzwa pepho, naswi huchimkahaza kpwa kukala siye wa kundi rehu."
- ⁵⁰Jesu achiamba, "Msimzuwiye, mana mutu ambaye kakupingani, manyani a uphande wenu."

- ⁵¹Phokala Jesu sikuze za kuhalwa kuphiya mlunguni zi phephi, wakata shauri kuphiya Jerusalemu.
- ⁵²Phahi, walavya ahumwa amtanguliye, ambao akpwendainjira mtaa mmwenga wa Asamariya ili amtayarishire phahali.
- ⁵³Lakini enyezi a mtaa hinyo arema kumkaribisha Jesu, mana kala anatsapa kuphiya Jerusalemu.
- ⁵⁴Phahi, anafundzie airi, Johana na Jakobo ariphoona vira, amuamba, "Bwana, unataka huihe moho kula mlunguni wedze uangamize?"
- ⁵⁵Lakini Jesu wagaluka na achiademurira.
- ⁵⁶Alafu Jesu na anafundzie aphiya mtaa wanjina.
- ⁵⁷Phahi, ariphokala anaphiya vyao, akutana na mutu mmwenga mo njirani, achimuamba Jesu, "Mwalimu, mino n'ndakulunga kokosi ndikophiya."
- ⁵⁸Naye Jesu achimuamba, "Makala gaishi winani na nyama a mapha ana nyumba zao, lakini mimi Mutu Yela Mlunguni sina phatu pha kuika mbavu."
- ⁵⁹Wakati wanjina wakutana na mutu wanjina achimuamba, "Nilunga." Lakini yuya mutu achimuamba, "Bwana, niricha kpwandza nkazike baba ndipho nedze nikulunge."
- ⁶⁰Ela Jesu achimuamba, "Ariche atu ambao taamkuluphira Mlungu adzishugulishe na mambo dza higo, lakini uwe ni muhimu zaidi ukatangazire atu kukala Mfalume yela kpwa Mlungu a phephi kpwedzatawala atue."
- ⁶¹Alafu mutu wanjina wamuamba, "Bwana, n'ndakulunga, lakini niricha mwandzo nkalage enehu."
- ⁶²Lakini Jesu achimuamba, "Mutu yeyesi achiandza kumhumikira Mlungu alafu achiaza kuuyira mamboge ga kare, kafwaha kukala mtumishi wa Mlungu."

Luka 10

- ¹Bada ya higo, Jesu watsambula afuasi anjina sabini na airi, achialavya airi airi amtanguliye kuphiya chila mudzi na kpwahali ambako kala akapanga kuphiya.
- ²Achiaambira, "Mavuno ni manji ela avunadzi ni achache. Phahi, m'voyeni Mlungu, Bwana mchina-munda, ahume ahendadzi-kazi zaidi edze avune mwakpwe mndani.
- ³Sikizani! Nakuhumani mphiye, namwi mndakala dza ana-ng'ondzi aphiyo kahi ya mabawa.
- ⁴Msihale pochi, wala mkoba, wala virahu vya akiba; na wala msilamusane na yeyesi njirani.
- ⁵Nyumba yoyosi ndiyoinjira, kpwandza ambani, 'Mlungu naakupheni amani.'

- ⁶Ichikala muna mutu wa kumendza amani, phahi, andaphaha amani. Lakini ichikala tamuna, mavoyo genu ni ga bure.
- ⁷Kalani nyumba hiyo, murye na munwe ndichoheva, kpwa mana mhendadzi-kazi anafwaha kuriphiwa mshaharawe. Msitsame-tsame kuphiya nyumba hadi nyumba.
- ⁸Mchiinjira mudzi wowosi na mchikaribishwa, ryani hicho ndichoandazirwa.
- ⁹Phozani akongo a mudzi hinyo na muambire atu, 'Mfalume yela kpwa Mlungu a phephi kpwedzatawala atue.'
- ¹⁰Lakini mchiinjira mudzi wowosi na enyezi achirema kukukaribishani, phiyani barabara za mudzi hinyo na muambe,
- ¹¹'Kpwa kukala mkarema kuhukaribisha mkasikira maneno ga Mlungu, tahutaki kugbwirana namwi hata chidide. Hata vumbi ra mudzi wenu chirogbwira mwehu maguluni, hunarikukuta, kuonyesa tahu phamwenga. Ela mmanyeye kukala hwataka kukuambirani kukala Mfalume yela kpwa Mlungu a phephi kpwedzatawala atue.'
- ¹²Nakuhakikishirani kala, siku ya mwisho mudzi hinyo hukumuye indakala mbaya sana hata kuriko ya Sodoma."
- ¹³Jesu waamba, "Shaka hiro, mwi atu a midzi ya Korazini na Bethisaida! Mana kala vilinje vyohendwa kpweni, vyahenderwa atu a midzi ya Tiro na Sidoni, atue angekala atubu chitambo, akasagala photsi kuno akavwala magunia na kudzisaka ivu kuonyesa akatubu.
- ¹⁴Lakini siku ya mwisho, mwimwi mndaphaha hukumu kali kuriko ya atu a Tiro na Sidoni.
- ¹⁵Namwi atu a Kaperinaumu, dze mndadzikarya hadi mfike mlunguni? Hata! Mndatserezwa hadi mohoni."
- ¹⁶Jesu waambira afuasie, "Mutu ndiyekusikizani ananisikiza mimi, na ndiyekukahalani ananikahala mimi; na ndiyenikahala mimi anamkahala hiye ariyenihuma."
- ¹⁷Badaye, hara afuasi sabini na airi auya kpwa Jesu na raha, achimuamba, "Bwana, hata pepho atuluka huriphozidemurira kpwa dzinaro!"
- ¹⁸Jesu achiaambira, "Námuona Shetani anagbwa kula mlunguni dza limeme.
- ¹⁹Sikizani! Nákuphani uwezo wa kuvyoga nyoka na visuse, na uwezo wa kushinda nguvu za adui Shetani. Takuna chochosi ndichokulumizani.
- ²⁰Lakini, msishererwe kpwa kukala mwatuluza pepho, ela hererwani kpwa kukala mkakubaliwa ni Mlungu kukala atue milele."

- ²¹Wakati hinyo hinyo, Roho wa Mlungu wamhenda Jesu akale na raha sana, naye achiamba, "Baba Mlungu, Bwana wa dzulu mlunguni na duniani, nakushukuru kpwa sababu waafwitsa atu a ilimu na marifwa mambo higa na uchiang'azira atu akuluphirao dza anache. Ehe, ni sawa Baba, mana hivyo ndivyo vyokuhamira.
- ²²Baba wanipha uwezo wa mambo gosi. Takuna mutu animanyaye mimi Mwana isiphokala Baba, wala takuna ammanyaye Baba Mlungu isiphokala Mwana na mutu yeyesi ambaye Mwana nkumtsambula kumfwenurira."
- ²³Alafu wagalukira anafundzie ariphokala machiyao, achiaambira, "Baha mwimwi muonao mambo higa mgaonago!
- ²⁴Nakuambirani kukala manabii anji na afalume anji aaza kuona mgaonago mwimwi lakini taagaonere, piya achiaza kusikira higa msikirago mwimwi ela taayagasikira."
- ²⁵Sikuye, mwalimu mmwenga wa shariya wakpwedza kpwa Jesu kumhega achili, wamuamba, "Mwalimu, nihendedze hata niphahe uzima wa milele?"
- ²⁶Jesu achimuamba, "Shariya za Mlungu zinaambadze?"
- ²⁷Yuya mwalimu achiamba, "Zinaamba, mmendze Bwana Mlunguo chikpweli-kpweli na moyoo wosi, na rohoru rosi, na kpwa nguvuzo zosi na achilizo zosi, na mmendze myao dza vyo udzimendzavyo mwenye."
- ²⁸Jesu achimuamba, "Ukagomba sawa-sawa. Nawe henda vivyo na undaphaha uzima wa milele."
- ²⁹Lakini yuya mwalimu wataka kuonyesa kala swalire achiroriuza mwandzo ni ra mana, hipho wamuuza Jesu, "Ye myangu ambaye ni nimmendze ni yuphi?"
- ³⁰Phahi, Jesu wamtsuphira ndarira, achimuamba, "Myahudi mmwenga ka ala Jerusalemu anaphiya Jeriko. Mo njirani achivwamukirwa ni akora. Achimpiga, achimvula nguwo na achimfuta malize zosi, chisha achim'bwaga pho njirani kadzimanya.
- ³¹Kpwa bahati, Mlavyadzi-sadaka mmwenga wa dini ya Chiyahudi wagbwira njira hiyo. Ariphomuona yuya mutu achiyevwamukirwa ni akora, watsega-tsega na kanda, achimricha phapho.
- ³²Alafu Myahudi wanjina, msaidizi wa Mlavyadzi-sadaka, naye wahenda vivyo. Ariphomuona yuya mutu chiyevwamukirwa ni akora, watsega-tsega na kanda, naye achimricha phapho.
- ³³Ela Msamariya mmwenga yekala ana vyarovye, watsapa na phapho. Na ariphomuona yuya mutu chiyevwamukirwa ni akora, wamuonera mbazi.
- ³⁴Achimsengerera, achendamfuta-futa virondavye na uchi kama dawa na mafuha chisha achimfunga bendeji. Yuya Msamariya kala ana pundawe, wamhala yuya

mutu achimpandiza pundani, achimtsukula hadi hotelini, ambako wakpwendamtundza.

³⁵Muhondoye, yuya Msamariya walavya pesa achimupha mchina-hoteli, achimuamba, 'Mrorome hiyu mkpwongo wangu, na chochosi ndichozidi n'ndakpwedza nikuriphe, siku nchiuya.' "

³⁶Chimarigizo Jesu wamuamba yuya mwalimu wa Shariya, "Sambi unaonadze, hara atu ahahu, ni yuphi ambaye waonyesa kukala ni myawe wa kpweli wa yuya mutu yevwamukirwa ni akora?"

³⁷Yuya mwalimu wa Shariya achiamba, "Ni yuya yemuonera mbazi." Jesu achimuamba, "Phahi, nawe kahende dza vyo arivyohenda Msamariya."

³⁸Jesu na anafundzie ariphokala anaenderera na charo chao cha kuphiya Jerusalem, afika mtaa fulani, ambako wakaribishwa kaya ni mchetu yeihwa Maritha.

³⁹Maritha ka ana mdidewe ambaye ka aihwa Maryamu. Maryamu wasagala photsi, phephi na Jesu na achikala anamsikiza afundzago.

⁴⁰Lakini Maritha kala anagaya macheye na kazi ya kutayarishira ajeni. Phahi, wamlunga Jesu achendamua, "Bwana, kuona vibaya ichikala mwenehu akanirichira kazi zosi machiyangu? Muambire edze aniterye!"

⁴¹Lakini Jesu wamuamba Maritha, "Unagaya na kuhangaishwa ni mambo manji,

⁴²ela umanye kuna chitu chimwenga muhimu. Maryamu akatsambula chitu chizuri, kunisikiza, na takuna ndiyemfuta."

Luka 11

¹Siku mwenga, Jesu ka a phahali anavoya Mlungu. Ariphomala, mwanafundziwe mmwenga wamuamba, "Bwana, hufundze kuvoya Mlungu, dza Johana vyofundza anafundzie."

²Phahi, Jesu waambira, "Ichikala mnavoya Mlungu, ambani: 'Baba Mlungu, dzinaro nariogophewe. Utawalao nauonekane wazi duniani.

³Chila siku huphe chakurya cha kuhutosha.

⁴Na husamehe dambi zehu, dza viratu hunavyosamehe osi aukosao. Usihuriche hukatiywa dambini ni Shetani.' "

⁵Chisha Jesu achiaambira, "Mendzerepho mutu una msenao, siku mwenga uphiye kpwapwe usiku wa manane, ukamuambe, 'Msena wangu, nikopesha mabofulo mahahu,

⁶mana nkatsolokerwa ni mjeni, nami sina chitu cha kumupha.'

⁷Alafu hiye msenao himo nyumbani akuambe, 'Usiniyuge, mino nkafunga kare mryango; mimi na anangu hurere. Sindang'oka nkedzakupha chitu chochosi.'

- ⁸Lakini nakuhakikishirani, dzagbwe kandakupha mabofulo kpwa ni msenao, ela andang'oka na edze akuphe chochosi utakacho kpwa sababu ya likaniro.
- ⁹Phahi, nakuambirani: Voyani namwi mndahewa; endzani namwi mndaphaha; pigani hodi namwi mndavugurirwa.
- ¹⁰Mana chila avoyaye n'kuhewa, aendzaye nkuphaha, na apigaye hodi nkuvugurirwa.
- ¹¹Ni yuphi kahi-kahi yenu ambaye mwanawe achim'voya ng'onda andamupha nyoka?
- ¹²Ama mwanawe achim'voya yayi andamupha chisuse?
- ¹³Ichikala mwimwi achina-dambi tu, mnamanya kuapha ana enu vitu vinono, dze si zaidi ye Sowe yenu ariye mlunguni? Iye nkuapha Rohowe atu osi am'voyao."
- ¹⁴Badaye, Jesu ka anatuluza pepho mutu asiyeweza kugomba. Hara pepho ariphotuluka, yuya bwibwi waandza kugomba na atu osi achiangalala.
- ¹⁵Lakini atu anjina ka anaamba, "Anatuluza pepho kpwa uwezo wa Belizebuli, mkpwulu wa pepho."
- ¹⁶Anjina achimhega achili kpwa kumuamba ahende dalili ya chilinje kuonyesa kala uwezowe ula mlunguni.
- ¹⁷Jesu wamanya maazo gao ndipho achiaambira, "Tsi yoyosi ambayo vilongozie anapingana, tsi hiyo taindadumu, na nyumba iganyanayo makundi kupingana, nkutsamuka.
- ¹⁸Sambi, kama ufalume wa Shetani wadziganya makundi makundi na unaheha wenye kpwa wenye, undaendereradze? Nkaamba hivyo kpwa sababu mwimwi mnaamba kala natuluza pepho na uwezo wa Belizebuli.
- ¹⁹Pho mino ichikala natuluza pepho na uwezo wa Belizebuli, dze, afuasi enu nkutuluzo pepho na uwezo wa ani? Afuasi enu anakuonani kala mna makosa.
- ²⁰Lakini kpwa kukala ninatuluza pepho kpwa uwezo wa Mlungu, phahi manyani kukala Mfalume kula kpwa Mlungu akedza kpwenu.
- ²¹Shetani ni sawa na mutu wa mkpwotse ariye na silaha za kutosha. Arindapho dzumbare, malize zindakala salama.
- ²²Lakini achedza mutu wa mkpwotse zaidi kumvwamukira na kumshinda nguvu, andamfuta silahaze achizozikuluphira na kuapha ayae mali achizozihala zewe.
- ²³Yeyesi ambaye ka uphande wangu, manyani ananipinga; na iye ambaye tahukusanya phamwenga, manyani anatsamula."
- ²⁴"Pepho achimtuluka mutu, nkuphiya weruni achaendza phahali pha kuoya, lakini achikosa phahali nkudziamba, 'N'ndauya kpwangu nyumbani kpwa kare n'rikola.'

- ²⁵Achiuya, na kukuta nyumba ikaphyerwa na chila chitu chikaikpwato,
- ²⁶nkuphiya achahala pepho ayae sabaa ayi zaidi kuriko iye, na achamuinjira yuya mutu na akaishi himo. Hipo, hali ya yuya mutu nkukala mbii zaidi kuriko hira ya mwandzo.”
- ²⁷Jesu phokala anagomba higo, mchetu mmwenga mo kundini wapiga likululu, achiamba, "Baha hiye mchetu yekuvyala na achikuamwisa!"
- ²⁸Lakini Jesu achimuamba, "Ni kpweli, lakini ario na raha zaidi ni hinyo asikirao ujumbe wa Mlungu na akaukubali!"
- ²⁹Atu ariphokala anazidi kpwedza, Jesu waamba, "Atu a chivyazi hichi ni ayi. Anataka dalili ya chilinje, lakini taandaonyeswa chochosi isiphokala chiratu chohenderwa Jona.
- ³⁰Viratu Jona arivyokala dalili kpwa atu a Ninawi, vivyo hivyo nami Mutu Yela Mlunguni n'ndakala dalili kpwa atu a chivyazi hichi.
- ³¹Siku ya hukumu malikia wa kula tsi ya Mwakani andaima phamwenga na atu a chivyazi hichi, naye andachishitaki kpwa makosa gao, mana wala mwisho wa dunia kpwedzasikiza maneno ga marifwa ga Selemani. Lakini sambu, mimi n'riye hipha ni mkpwulu kuriko Selemani.
- ³²Vivyo hivyo, siku hiyo atu a Ninawi andaima phamwenga na atu a chivyazi hichi, nao andachishitaki kpwa makosa gao. Mana aho atubu dambi zao ariphosikira Jona anahubiri, lakini sambu, mimi n'riye hipha ni mkpwulu kuriko Jona.”
- ³³Chisha Jesu achiaambira atu, "Takuna mutu aasaye taa na kuitiya mvunguririni, lakini nkuyiika dzulu ili ainjirao aone mwanga.
- ³⁴Matso ni taa ya mwiri, nago gachikala ni mazima, mwiri wosi undakala na mwanga. Lakini gachikala ni makongo, phahi mwiri wosi undaodzala jiza.
- ³⁵Phahi, hakikishani mnagbwira mafundzo gangu, ili maisha genu gasikale na jiza.
- ³⁶Chumbacho chosi chichikala na mwanga, maishago gandakala na mwanga munji, dza taa iakavyo chumbani.”
- ³⁷Jesu ariphomala kugomba higo, Mfarisayo mmwenga wamualika kwakpwe kaya akarye naye. Jesu wakubali, achiinjira nyumbani, achisagala achirya naye.
- ³⁸Mfarisayo hiye watezeka ariphomuona Jesu anarya bila ya kulunga mila ya dini yao, yani bila ya kutsukutsa mikono kabla ya kurya.
- ³⁹Jesu wamuamba, "Mwimwi Mafarisayo mna bidii ya kudzionyesa mu atu azuri. Hivyo ni sawa na kutsukutsa chikombe na sahani kondze macheye. Lakini mwenu marohoni mukaodzala unyang'anyi na uyi.

- ⁴⁰Mu azuzu! Kpwani tammanya kala yetengeza kondze ndiye ariyetengeza ndani piya?
- ⁴¹Lakini phahi, lavyani zaka vyo mrivyo navyo mo vikombeni muaphe agayi, alafu tamndakala na chochosi chiricho najisi.
- ⁴²Lakini shaka hiro mwi Mafarisayo! Kpwa mana mnalunga Shariya ya kumupha Mlungu fungu ra kumi ra mavuno makulu na hata mavuno madide, lakini tamjali haki wala tammendze Mlungu. Higa ndigo mlondwago kuhenda, bila ya kuzarau higo ganjina.
- ⁴³Shaka hiro mwi Mafarisayo! Kpwa mana mnamendza kusagala vihi vya mbere-mbere masinagogini na kulamuswa na ishima mbere za atu.
- ⁴⁴Shaka hiro, mana mu dza mbira zisizo na alama, ambazo atu nkunyendeka dzuluze bila ya kumanya uyi na lovu ririro himo.”
- ⁴⁵Alafu mwalimu mmwenga wa Shariya wamuamba Jesu, "Mwalimu, uchiamba hivyo, unahuinjirira hata sisi alimu a Shariya piya.”
- ⁴⁶Achiambwa, "Shaka hiro hata mwimwi alimu a Shariya. Mnamendza kutsukuza ayawenu mizigo miziho, yani Shariya ngumu, lakini mwi enye tamuterya atu kuzilunga hata chidide.
- ⁴⁷Shaka hiro! Mana mnadzengera mbira manabii ambao aolagbwa ni akare enu.
- ⁴⁸Hivyo mnadzishuhudiya kukala mnakubaliana na mambo gohendwa ni akare enu, mana aho aolaga manabii, namwi mnaadzengera vikuta.
- ⁴⁹Kpwa sababu ya higo, Mlungu wa marifwa waamba, 'N'ndakureherani manabii na mitume, lakini mundaolaga anjina na anjina mundaatesa.'
- ⁵⁰Phahi, atu a chivyazi hichi andatiywa adabu kpwa sababu ya vifo vya manabii osi oolagbwa hangu kuumbwa kpwa dunia,
- ⁵¹tsona hangu chifo cha Abeli hadi chifo cha Zakariya. Hiye Zakariya waolagbwa mbere za Nyumba ya Kuvoya Mlungu, kahi-kahi ya hiyo nyumba na phatu pha kulavira sadaka. Kpweli nakuambirani, atu a chivyazi hichi andatiywa adabu kpwa sababu ya hinyo manabii.
- ⁵²Shaka hiro mwi alimu a Shariya! Kpwa mana mnaafwitsa ayawenu mafundzo ga kpweli ga Mlungu. Mwi enye mwagarema na mnazuwiya atu ambao analonda kugamanya!”
- ⁵³Jesu ariphouka phara, Mafarisayo na alimu a Shariya atsukirwa sana na achikala anampinga na kumhega achili na maswali manji,
- ⁵⁴ili kulola ichikala andagomba maneno ambago sigo, amgbwire.

Luka 12

- ¹Wakati hinyo hinyo, atu aodzazana maelufu na maelufu hata ichikala anasukumana. Phahi, Jesu wagomba na anafundzie kpwandza, achiaambira, "Dzimanyirireni na unafiki wa Mafarisayo, ambao ni dza amira.
- ²Takuna chochosi chofwitsika ambacho tachindamanyikana wazi, wala takuna dzambo ra siri ambaro tarindamanyikana.
- ³Phahi, gosi mgombago jizani gandasikirwa mutsi, na gosi mgombago pokopoko chumbani, gandatangazwa mbere za atu."
- ⁴"Asena angu, nakuambirani, msiogophe aolagao miri bahi, na badaye taana ranjina zaidi ariwezaro.
- ⁵Lakini n'ndakuambirani wa kuogophewa: Muogopheni Mlungu, aolagapho mutu tsona ana uwezo wa kumtsupha mohoni. Ehe, kpweli, iye ndiye wa kuogophewa!
- ⁶Mnamanya kala mberya atsano ana bei ya photsi sana, lakini Mlungu anajali chila mmwenga.
- ⁷Hata nyere zenu za vitswani zosi Mlungu anazimanya isabuye. Phahi, msiogophe, mana mwimwi mna samani zaidi kuriko mberya anji!"
- ⁸"Tsona nakuambirani, yeyesi ndiyedzimanyisa wazi mbere za atu kala ni mfuasi wangu, nami Mutu Yela Mlunguni n'ndamkubali mbere za malaika a Mlungu.
- ⁹Lakini ndiyenitsamalala mbere za atu, andatsamalalwa mbere za malaika a Mlungu.
- ¹⁰Atu osi ndiogomba maneno kunipinga mimi Mutu Yela Mlunguni andasamehewa, lakini yeyesi ndiyekufuru Roho wa Mlungu, kandasamehewa bii!
- ¹¹Mchiphirikpwa masinagogini ama kpwa atawala kushitakiwa, msitange-tange ndivyokpwendadzikanira ama ndivyogomba,
- ¹²kpwa mana saa iyo-iyro Roho wa Mlungu andakufundzani maneno ambago ni mgombe."
- ¹³Alafu mutu mmwenga pho kundini wamuamba Jesu, "Mwalimu, muambire mwenehu aniganyire urisi wa baba nami."
- ¹⁴Jesu achimuamba, "Msena wangu, ni ani yenitsambula nikale jaji wenu ama mutu wa kukuganyirani urisi?"
- ¹⁵Chisha achiamba, "Dzimanyirireni! Dziejusheni na chila aina ya tamaa. Mana maisha ga mutu tagakala kamili kpwa unji wa mali arizo nazo."
- ¹⁶Chisha achiatsuphira ndarira, achiamba, "Kpwahenda tajiri mmwenga ambaye mundawe wavyala sana.
- ¹⁷Yuya tajiri waaza rohani, 'Nihendedze mino? Mana sina phahali pha kuika mavuno gangu.

- 18**N'ndahenda hivi: N'ndabomola vitsaga vyangu vyosi na nidzenge vyanjina vikulu zaidi, alafu mavuno gangu gosi nigatiye himo na vitu vyangu vyanjina.
- 19**Nichimala kuhenda vivyo niambire roho yangu, una vitu vinji vya akiba vya kuhumira miaka na miaka. Sambu oya, urye, unwe na ustarehe.'
- 20**Ela Mlungu achimuamba, 'U mpumbavu uwe! Rero usiku undafwa. Sambu, vyo vitu vyodziikira akiba, vindakala vya ani?' "
- 21**Jesu achimarigiza kuamba, "Hivyo ndivyo ndivyokala mutu adziikiraye mali ya akiba, lakini maishage tagamhamira Mlungu."
- 22**Alafu Jesu waambira anafundzie, "Phahi, nakuambirani, msidzitiye wasi-wasi kuhusu maisha genu, kala mndaryani, wala kuhusu miri yenu mndavwalani.
- 23**Kpwa mana maisha ni muhimu kuriko chakurya, na mwiri ni muhimu kuriko nguwo.
- 24**Hebu lolani makunguru. Tagaphanda wala tagavuna, tsona tagana vitsaga wala tagaika akiba, lakini Mlungu anagarisa. Dze, mwino na nyama a mapha ni ani ario na samani zaidi?
- 25**Ni ani awezaye kudzienjerezera maisha kpwa kuhenda wasi-wasi, hata dzagbwe ni dzisaa dzimwenga tu?
- 26**Sambu, ichikala neno dide dza hiri tamriweza, kpwa utu wani mnadzitiya wasi-wasi wa higo mambo ganjina?
- 27**Lolani maruwa gameravyo. Tagahenda kazi wala tagashona nguwo, ela nakuambirani, hata Mfalume Selemani mwenye na utajiriwe wosi, kayapambwa vinono dza ruwa mwengarapho.
- 28**Ee, mwi atu mkuluphirao chidide mwi! Ichikala Mlungu anaweza kupamba nyasi, ambazo rero mnazona na muhondo zinatiywa moho, dze si zaidi andakuvwikani mwi?
- 29**Phahi, msitange-tange kala mndaryani wala mndanwani; wala msihende wasi-wasi na higo.
- 30**Mana gosi higo ni kuendzwa ni atu asiommanya Mlungu, ela Sowe yenu ariye mlunguni anamanya mnataka vitu hivyo.
- 31**Phahi, dzilavyeni kpwa Mlungu Mfalume wenu, na go ganjina andakuenjerezani."
- 32**"Mwi afuasi angu mu chikundi chidide, ela msilogophe, mana Sowe Yenu Mlungu anaonato kukutawalani na kukurindani.
- 33**Guzani mali zenu na mlavye zaka. Utajiri wa dunia hino una mwisho. Phahi, dzishugulisheni na mambo ga Mlungu, na mchihenda hivyo ni kama mnadziikira

akiba mlunguni, akiba ambayo taisira. Mlunguni takuna aivi, wala adudu a kubananga vitu.

³⁴Mana hipho uikapho akibayo ndipho ambapho rogoro rinalonda rikale.”

³⁵Alafu Jesu waamba, "Kalani tayari kuumika, na muase taa zenu tayari tayari.

³⁶Mkale avi mu atumishi amgodzao tajiri wao edze kula harusini, ili achitsoloka na kupiga hodi, amvugurire mryango mara mwenga.

³⁷Baha hinyo atumishi ndiokpwezakutwa matso ni tajiri wao. Nakuambirani kpweli, iye mwenye andavwaliya tayari tayari, aakaribishe aandazire chakurya.

³⁸Baha hinyo atumishi ndiokpwezakutwa tayari ni tajiri wao, hata achedza usiku wa manane au pepho za kucha.

³⁹Lakini mmanye: Kalapho mchina-nyumba anamanya saa edzerayo muivi, kpwa kpweli kangekubali nyumbaye ivundzwe.

⁴⁰Namwi piya n'lazima mkale tayari, kpwa sababu tamanya saa ndizokpwezera mimi, Mutu Yela Mlunguni.”

⁴¹Alafu Petero wamuuza Jesu, "Bwana, huno mfwano uchiohuambira, unauhusu sisi bahi hebu ni unahusu atu osi?”

⁴²Jesu achimuamba, "Kalani dza mtumishi muaminifu na wa marifwa, ambaye tajiriwe nkumupha kazi ya kuimirira nyumbaye na kuapha atumishi ayae chakurya wakati unaofwaha.

⁴³Ni baha hiye mtumishi ambaye siku tajiriwe achedza, andakutwa anahenda hivyo.

⁴⁴Nami nakuambirani kpweli, tajiriwe andamhenda mwimirizi wa malize zosi.

⁴⁵Lakini yuya mtumishi achiamba, 'Tajiri wangu kedza sambu,' naye aandze kupiga atumishi ayae, alume kpwa achetu, na kurya, kunwa na kulewa.

⁴⁶Phahi yuya tajiriwe ndiphouya siku asiyomtarajiya na saa asiyoimanya, andamtiya adabu vibaya sana, na andamuika kundi ra atu asiomkuluphira Mlungu.

⁴⁷Mtumishi ambaye anamanya tajiriwe atakavyo, lakini kadzitayarisha wala kahenda atakavyo tajiriwe, andapigbwa vibaya sana.

⁴⁸Lakini mtumishi ambaye kamanya tajiriwe atakavyo, achienda mambo ambago ni atiwe adabu, phahi, andapigbwa chidide. Chila ariyehewa chinji, andaiswa chinji, chiasi ndichohewa mutu ndicho ndichoiswa.”

⁴⁹Jesu waenderera kuaambira atu, "Nákpwedzaasa moho duniani wa kutakasa atu ndionikuluphira na kuangamiza atu asionikuluphira. Nami naaza ukale unaaka kare!

⁵⁰Nákpwedzagaya na kuolagbwa, na nina tabu kulu mpaka mambo higa ndiphokamilika!

⁵¹Mnaona nákpwedzahenda atu aelewane himu duniani? A'a, nakuambirani kpwedza kpwangu kundahenda atu aganyane.

⁵²Hangu sambu, atu a nyumba mwenga andakala na maoni tafwauti tafwauti kunihusu; anjina andanipinga na anjina andanikubali.

⁵³Kpwa mfwano, baba na mwanawe wa chilume andakala na maoni tafwauti, naye mayo andakala na maoni tafwauti na mwanawe wa chichetu; mayo-vyala andakala na maoni tafwauti na mkpwaza mwanawe."

⁵⁴Jesu waambira atu, "Mchiona ingu rikakunga mtswerero wa dzuwa, mara mwenga mkuamba, 'Kundanya mvula,' na kpweli mvula nkunya.

⁵⁵Na mchiona phuto rinapiga kula mwakani, mkuamba, 'Kundahenda dzoho,' na kpweli nkuhenda dzoho.

⁵⁶Anafiki mwi! Kumbavi maweza kumanya hali ya hewa kpwa kulola dunia na mlunguni kurivyo. Mbona tamuweza kumanya mambo ganagohendeka wakati hurio nao?"

⁵⁷Alafu Jesu waamba, "Kpwa utu wani tamtsambula ra sawa?"

⁵⁸Mutu achikala anakuphirika kotini, henda bidii murye suluhu mo njirani, asedze akakuburuta hata kpwa jaji, naye jaji akakulavya kpwa asikari, nao asikari akakutiya jela.

⁵⁹Nami nakuambirani wazi, kundatuluka hadi uriphe faini yosi tse-tse-tse."

Luka 13

¹Wakati hinyo hinyo atu fulani amuambira Jesu habari za kuhusu atu a Galilaya arioolagbwa ni Pilato, mtawala wa Chirumi, enye kala akareha nyama kualavya sadaka kpwa Mlungu.

²Jesu achiamba, "Dze, mnafikiri vyo arivyogaya, o atu a Galilaya arioolagbwa, kala ana dambi zaidi kuriko anjina osi hiko Galilaya?"

³Si hivyo hata chidide! Nakuambirani kpweli, msiphotubu dambi zenu, mwimwi mosi mndafwa piya.

⁴Hebu mnaona hara atu kumi na anane ariogbwererwa ni gorofa ya Siloamu achifwa, kala ana dambi zaidi kuriko atu anjina osi akalao Jerusalemu?"

⁵Si hivyo hata chidide! Nakuambirani kpweli, msiphotubu dambi zenu, mwimwi mosi mndafwa piya."

- ⁶Chisha Jesu waatsuphira atu ndarira hino: "Mutu mmwenga kala akaphanda muhi uihwao mtini mwakpwe mndani. Sikuye, wakpwendaenda matunda, lakini kayaphaha rorosi.
- ⁷Phahi, yuya mchina-munda wamuamba mkurimawe, 'Lola, na miaka mihahu sambi kpwedza nchilola huno muhi ichikala wavyala, ili nami nifwaidi matundage, lakini sidzangbwephaha rorosi. Ukate, mana naona unabananga munda bure!'
- ⁸Yuya mkurima achimuamba, 'Bwana, uriche uhu mwaka mmwenga, niurimire na niutiire mbolea.
- ⁹Uchivyala mwaka wedzao, ni vinono, lakini usiphovyala, phahi ndipho undaukata.' "
- ¹⁰Siku mwenga ya Kuoya, Jesu kala anafundza ndani ya sinagogi fulani.
- ¹¹Mo sinagogini kala mna mchetu ambaye pephe kala akamhenda mkpwongo miaka kumi na minane. Kala akamhenda chinundu hata kaweza kugoloka kabisa.
- ¹²Jesu ariphomuona yuya mchetu, wamuiha phara mbere, na achimuamba, "Mayo, ukarichirwa, ukongoo ukaphozwa."
- ¹³Achim'bandikira mkpwono, na saa iyo-iyoyuya mchetu achigoloka, na achimtogola Mlungu.
- ¹⁴Lakini mkpwulu wa sinagogi wareya kpwa sababu Jesu akaphoza mutu Siku ya Kuoya. Achiaambira atu, "Kuna siku sita za kuhenda kazi. Phahi, ndzoni siku hizo mwedze mphozwe makongo genu, lakini msedze Siku ya Kuoya."
- ¹⁵Phahi, Jesu wamuamba, "Mu anafiki mwimwi! Ni ani asiyevugula ng'ombeye ama pundawe achanwesa kpwa sababu ni Siku ya Kuoya?"
- ¹⁶Sambi yuno mchetu, chivyazi cha mkare wehu Brahimu, Shetani wamfunga miaka kumi na minane. Dze, kafwaha kuvugulwa Siku ya Kuoya?"
- ¹⁷Ariphoamba hivyo, apindzanie osi agbwirwa ni haya, lakini atu anjina kala anahamirwa ni higo maajabu ahendago.
- ¹⁸Alafu Jesu waamba, "Ufalume ambao Mlungu wanipha u viphi? Sambini ndakuambirani urivyo.
- ¹⁹Ufalume ambao Mlungu wanipha ni dza tembe ya mgandi, ambayo mutu waitsupha mwakpwe mndani, ichimera na ichikala muhi hata nyama a mapha achidzenga nyumba zao dzulu ya pandaze."
- ²⁰Achiaambira tsona, "N'ndakuambirani ufalume ambao Mlungu wanipha urivyo.
- ²¹Hinyo ni dza amira cache ambayo mchetu waitiya unгани, na unga wosi daba zima uchiumuka."

- ²²Jesu ariphokala anaphiya Jerusalemu, watsapa na midzini na mitaani kuno anafundza.
- ²³Mutu mmwenga achimuuzwa, "Bwana, dze, Mlungu andaokola atu achache tu?"
- ²⁴Naye Jesu achimuamba, "Mryango wa Peponi ni mphutsu. Hendani bidii ya kuinjira, mana kpwa kpweli atu anji andataka kuinjira lakini taandaweza.
- ²⁵Siku mchina-nyumba achedzafunga mryango, mndakala kondze mpige hodi na muambe, 'Bwana, huvugurire mryango!' Lakini andakuambirani 'Sikumanyani tse wala simanya mlako!'
- ²⁶Ndipho namwi mndamuamba, 'Hwarya na huchinwani phamwenga na uwe, tsona wafundza kpwelu mitaani.'
- ²⁷Lakini naye andaamba, 'Sikumanyani tse. Niukirani hipha mwi atu ayi!'
- ²⁸Ndipho mndarira na kusaga meno mana mndaona akare ehu Brahimu, Isaka na Jakobo na manabii osi hiko mlunguni, lakini mwi enye mndatsuphiwa kondze.
- ²⁹Atu kula mlairo wa dzuwa, na mtswerero wa dzuwa, kula mwakani hata vurini andakpwedza karamuni phamwenga na atu osi a Mlungu.
- ³⁰Hakika, kuna atu ambao ni a mwisho ambao andakala a mwandzo, na ambao ni a mwandzo vi sambu andakala a mwisho."
- ³¹Siku hiyo hiyo Mafarisayo anjina akpwezamuamba Jesu, "Uka hipha, uphiye phahali phanjina, mana Mfalume Herode anataka akuolage."
- ³²Jesu achiaambira, "Kamuambireni hiye mwerevu, 'Natuluza pepo na kuphoza akongo rero na muhondo, na wairya n'ndamala kazi yangu.'
- ³³Lakini, n'lazima nienderere na charo changu kuphiya Jerusalemu rero, muhondo na wairya, mana si sawa nabii kuolagbwa phahali phanjina siphokala Jerusalemu!
- ³⁴Ee, mwi atu a Jerusalemu! Mkuolaga manabii na kuapiga mawe ariohumwa kpwenu. Mara ngaphi náaza kukuikani phamwenga dza kolo ra kuku rifwinikavyo anae mwakpwe maphani, lakini mwi mwakahala!
- ³⁵Haya sikizani, mkarichirwa mudzi wenu enye, Mlungu kandakurindani tsona. Nami nakuhakikishirani, tamndaniona tsona hadi wakati ndiphokpwedzaamba, 'Wajaliwa iye edzaye kpwa dzina ra Mwenyezi Mlungu.' "

Luka 14

- ¹Siku mwenga ya Kuoya, Jesu kala anarya nyumbani kpwa mkpwulu mmwenga Mfarisayo, na atu amlolato chila ahendaro.
- ²Pho mbereze kala phana mkpwongo wa kufutuka mwiri.

- ³Phahi Jesu wauza Mafarisayo na alimu a Shariya, "Dze, chishariya ni sawa kuphoza mkpwongo Siku ya Kuoya hebu si sawa?"
- ⁴Lakini aho achinyamala. Phahi, Jesu wamguta yuya mkpwongo, achimphoza na achimricha aphiye vyakpwe.
- ⁵Alafu achiamba, "Ni ani ambaye mwanawe ama ng'ombeye ichigbwa chisimani Siku ya Kuoya kandaituluza mara mwenga?"
- ⁶Lakini taayakala na ra kugomba.
- ⁷Phahi phara karamuni ajeni anjina adzitsamburira nafwasi za ishima ko mbere mbere. Jesu ariphoona vira ahendavyo, achiakanya achiaambira,
- ⁸"Mutu achikualika harusini, usisagale nafwasi ya mbere, sedze kala kuna mutu wanjina marufu zaidi ya uwe yealikipwa,
- ⁹na mwenyezi wenu yekualikani akakuamba, 'Tafadhali mphise hiyu bwana hiyo nafwasiyo.' Hipo undaona waibu mbere za atu kuphiya nafwasi ya nyuma.
- ¹⁰Lakini uchialikipwa, sagala nafwasi ya nyuma, ili yuya mwenyezi achedzakuona, akuambe, 'Msena wangu, ndzoo usagale hiku mbere zaidi.' Hino indakuikira ishimayo mbere za ajeni anjina osi.
- ¹¹Mana mutu yeyesi ndiyedzihenda muhimu, andatserezwa, na ndiyedzitsereza, andahendwa muhimu."
- ¹²Alafu Jesu wagomba na yuya chiyemualika karamu, achimuamba, "Uchihenda karamu, usialike asenao, enenu, mbarizo wala majiranigo matajiri. Mana uchihenda hivyo, nao anaweza kukualika, nao akakala akariphiza.
- ¹³Lakini uchihenda karamu, alika agayi, viswere, atu a virema na vipofu,
- ¹⁴nawe undajaliwa, hata dzagbwe taana cha kukuripha. Mlungu andakuripha wakati atu a haki achifufuka."
- ¹⁵Phahi, mutu mmwenga ambaye kala anarya na Jesu phosikira hivyo, wamuamba, "Baha aho ndiorya karamu wakati Mlungu achiandza kutawala dunia wazi-wazi."
- ¹⁶Jesu achimuamba, "Mutu mmwenga wahenda karamu kulu, achialika atu anji.
- ¹⁷Karamu iriphokala tayari, wamhuma mtumishiwe akaambire hara arioalikipwa, 'Ndzoni, mana sambu chila chitu chi tayari.'
- ¹⁸Lakini chila mmwenga walavya sababuye ya kusaphiya karamuni. Wa mwandzo waamba, 'Nágula munda, na n'lazima nkaulole. Tafadhali nisamehe.'
- ¹⁹Wanjina naye achiamba, 'Nágula ng'ombe kumi za kurima, na vivi naphiya nkazijeze. Tafadhali nisamehe.'

- ²⁰Na wanjina naye achiamba, 'Mino nálóla dzuzi dzuzi, kpwa hivyo sindaweza kpwedza.'
- ²¹Phahi, yuya mtumishi wauya kaya kpwa tajiriwe achendasema. Tajiriwe watsukirwa, ndipho achimuamba hiye mtumishiwe, 'Upesi phiya ukazunguluke mudzi mzima, barabarani na mitaani ukaarehe agayi, viswere, atu a virema na vipofu.'
- ²²Badaye yuya mtumishi wakpwezamuamba tajiriwe, 'Bwana, higo uchigonilagiza nikagahenda, lakini bado kuchere na nafwasi.'
- ²³Yuya tajiri achimuamba, 'Sambi phiya chila barabara na chila njira, ukaashurutishe atu edze, ili nyumba yangu iodzale.
- ²⁴Mana kpwa kugomba kpweli, hinyo ariolikpwa taphana yeyesi ndiyetata karamu yangu.' "
- ²⁵Wakati mmwenga, umati wa atu kala unamlunga-lunga Jesu, achiagalukira na achiamba,
- ²⁶"Mutu yeyesi achitaka kukala mfuasi wangu, n'lazima animendze kuriko ise na nine, nduguze, mchewe na anae, na hata maishage mwenye.
- ²⁷Mana asiyekala tayari kugaya na kunilunga, kaweza kukala mfuasi wangu.
- ²⁸Lakini kabla ya kukala mfuasi wangu, n'lazima mwandzo umanye ichikala undaweza kuvumirira mpaka mwisho. Kpwa mfwano, uchitaka kudzenga nyumba, kpwandza n'lazima uhende isabu ya pesa urizo nazo ichikala zindatosha.
- ²⁹Mana uchidzenga msingi macheye alafu uchishindwa ni kuimarigiza, atu andakutseka,
- ³⁰andaamba, 'Lolani, mutu hiyu waandza kudzenga nyumba, vino inamshinda kumarigiza!'
- ³¹Ama, mfalume yeyesi achitaka kuphiya vihani, kupigana na mfalume wanjina, kpwandza n'lazima apime ichikala asikarie elufu kumi andaweza kupiga asikari elufu ishirini.
- ³²Na achiona kaweza kupigana nao, analavya mhumwa wakati hara asikari anjina achere kure ili atake mapatano.
- ³³Phahi, mutu yeyesi achitaka kukala mfuasi wangu, n'lazima akale tayari kuricha chila chitu aricho nacho."
- ³⁴Tsona Jesu achiamba, "Munyu ni mzuri, lakini uchibanangika taufwaha na tauweza kuhendwa ukafwaha tsona.

³⁵Taufwaha kuhendwa rorosi kabisa, kpwa hivyo ni wa kutsuphiwa. Phahi, atu ambao taandavumirira kukala afuasi angu ni dza munyu uriobanangika. Ariye na masikiro, naasikire."

Luka 15

¹Siku mwenga, makarani manji ga kodi na atu anjina ariokala achiharirwa kala ni achina-dambi akpwedza kpwa Jesu ili amsikize.

²Phahi, Mafarisayo na alimu a Shariya aandza kunung'unika achiamba, "Mloleni hiyu! Anakaribisha achina-dambi na kurya nao!"

³Ndipho Jesu aripoatsuphira ndarira hino:

⁴"Mendzerepho mutu ana mang'ondzi gana, mwenga richiangamika, andahendadze? Andaricha gara tisaini na tisiya ko marisani na akaendze rira richiroangamika hadi arione.

⁵Achiriphaha andaribandika fuzini kuphiya naro kaya na kuhererwa.

⁶Na achifika kaya, andaiha asenae na majirani aambire, 'Ayangu, nahufurahini mana ng'ondzi rangu che rikaangamika na vino nkariphaha.'

⁷Phahi, nakuambirani kpweli, vivyo hivyo kundakala na kuhererwa zaidi mlunguni mchina-dambi mmwenga achitubu dambize, kuriko atu tisaini na tisiya ambao anadziona ana haki na wala taana haja ya kutubu."

⁸Alafu Jesu waatsuphira ndarira yanjina, achiamba, "Mendzerepho mchetu ana shilingize kumi, mwenga ichiangamika, andahendadze? Andaasa taa, aphyere nyumbani mosi kuno anaendza pore pore mpaka aione.

⁹Na achiiona, andaiha asenae na majirani aambire, 'Ayangu nahufurahini, mana shilingi yangu che nkayaangamiza, na vino nkaiphaha.'

¹⁰Phahi, nakuambirani, malaika a Mlungu nkufurahi kpwa sababu ya mchina-dambi mmwenga achiyetubu dambize."

¹¹Alafu Jesu waatsuphira ndarira yanjina, achiamba, "Kpwahenda mutu na anae airi.

¹²Yuya mdide wamuamba ise, 'Baba, niganyira urisi wangu sambu kabla kudzangbwefwa.' Phahi, ise yao waaganyira osi airi, chila mmwenga fungure.

¹³Bada ya siku chache, yuya mdide waguza fungure na achiuka, kuphiya tsi ya kure, ambako wakpwendahumira pesaze ovyo ovyo.

¹⁴Ariphokala akamala chila chitu, kpwahenda ndzala kali tsi hiyo, naye achiandza kugaya.

¹⁵Phahi, wakpwendauza kazi kpwa mwenyezi mmwenga wa tsi hiyo, ambaye wamphirika kpwakpwe mndani akarise nguluwe.

- ¹⁶Waaza kurya chakurya chokala anarisa nguluwe, lakini takuna mutu yeyesi yemupha chitu.
- ¹⁷Badaye achili zamuedzera, achiamba, 'Kaya, baba ana ahendadzi-kazi anji ambao anarya na kusaza, mino kuno nahirika!
- ¹⁸N'ndaphiya kpwa baba nkamuambe, "Baba, námkosea Mlungu na nchikukosea uwe piya.
- ¹⁹Sifwaha kuihwa mwanao tsona; nihenda kama mhendadzi-kazi." ‘
- ²⁰Phahi, waandza charo cha kuuya kaya kpwa ise. Lakini ariphokala achere chikure-kure, ise wamuona na achimuonera mbazi. Achimzorera achendamkumbatira na achimdonera.
- ²¹Phahi yuya mwana wamuamba ise, 'Baba, námkosea Mlungu na nchikukosea uwe piya. Sifwaha kuihwa mwanao tsona.’
- ²²Lakini ise achiaambira ahendadzi-kazie, 'Upesi reheni kandzu ndzuri kabisa mumvwike. Piya mvwiken pete na virahu.
- ²³Chisha mrehe mwana-ng'ombe wa kunona mumtsindze, ili huhendeni karamu na kusherekea.
- ²⁴Kpwa mana ka naona mwanangu wafwa, kumbavi ni mzima, kala akaangamika na vino akaphahikana.' Ndipho achiandza kusherekea.
- ²⁵Wakati hinyo, mwana mvyere wa yuya mzehe kala a mndani. Arip Hofika phephi na kaya kula mndani, wasikira ngoma na njerejere.
- ²⁶Hipho, wamuiha mhendadzi-kazi mmwenga achimuza, 'Phano kaya rero phanani?’
- ²⁷Mhendadzi-kazi achimuamba, 'Mwenenu akedza, na sowe akamtsindzira mwana-ng'ombe wa kunona, kpwa sababu mwanawe akauya kaya mzima na salama.’
- ²⁸Lakini hiye mwanawe mvyere wareya na achirema kuinjira nyumbani. Phahi, ise waphiya achendamchenga-chenga.
- ²⁹Lakini naye achimuamba ise, 'Lola baba, miaka yosi yokuhumikira kama mtumwa, tsona wakati wosi náhenda ulondavyo. Ela kudzangbwenipha hata mwana-mbuzi nami nkarya na asena angu.
- ³⁰Ela yuno mwanao yehumira maliyo ovyo ovyo na malaya, achiphokpwedza, ukamtsindzira mwana-ng'ombe wa kunona!’
- ³¹Naye ise achimuamba, 'Mwanangu, uwe hu osi siku zosi, na vitu vyosi nrivyo navyo ni vyako.

³²Lakini n'lazima huhendeni karamu na kusherekea kpwa sababu ya mwenenu, mana kala naona wafwa, kumbavi achere mzima, kala akaangamika na vino akaphahikana.' "

Luka 16

¹Jesu waatsuphira anafundzie ndarira, achiamba, "Kpwahenda tajiri mmwenga ambaye karaniwe muimirizi ka analaumiwa kpwa kuumira mali za tajiriwe vibaya.

²Phahi, hiye tajiri wamuiha karaniwe achimuuzua, 'Ni maneno gani gano nisikirago? Nataka ulavye isabu kamili ya mali na fwaida, mana kuweza kuenderera kukala karani wangu.'

³Yuya karani achidziuza, 'Nihendedze mino? Tajiri wangu anataka kunifuta kazi. Nami siweza kurima, na kuvoya-voya naona haya!

⁴Sambi, namanya ndivyohenda ili siku nchifutwa kazi, atu anikaribishe kpwa madzumbani.'

⁵Hipho, waiha adeni a tajiriwe osi, mmwenga mmwenga. Achimuuzua yuya wa kpwandza, 'Unaiswani ni tajiri wangu?'

⁶Yuya mdeni achiamba, 'Naiswa madebe gana mwenga ga mafuha.' Naye karani achimuamba, 'Hala hino karatasiyo ya deni, sagala upesi na uandike madebe hamsini.'

⁷Alafu achimuuzua mdeni wanjina, 'Nawe unaiswani ni tajiri wangu?' Yuya mdeni achimuamba, 'Naiswa magunia gana mwenga ga nganu.' Yuya karani achimuamba, 'Hala hino karatasiyo ya deni, na uandike magunia themanini.'

⁸Phahi, yuya tajiri wamtogola hiye karani mkora kpwa vira achivyohumira achili. Sambu, hivyo ndivyo atu asiomjali Mlungu arivyo, ni erevu zaidi kushugulikiya mambo gao kuriko atu amkuluphirao Mlungu ashugulikiyavyo mambo ga Mlungu.

⁹Nami nakuambirani, humirani pesa chiwervevu, yani dziphahireni asena kpwa kuumira pesa, ili siku mchifwa, Mlungu akuphokereni mlunguni, kuriko na makao ga milele.

¹⁰Yeyesi ambaye ni muaminifu wa mambo madide, piya andakala muaminifu wa mambo makulu; na mutu ambaye si muaminifu wa mambo madide, piya andakala muaminifu wa mambo makulu.

¹¹Sambu, ichikala tamilyaaminika na mali ya duniani, ni ani ndiyekuaminini na mali ya kpweli yola Mlunguni?

¹²Na kama tamilyaaminika na mali ya mutu wanjina, ni ani ndiyekuphani mali ikale yenu?

- 13**Takuna mtumishi awezaye kuumikira matajiri mairi. Mana achihenda vivyo, andamendza mmwenga na amzire yuya wanjina. Mmwenga andamhendera kazi vinono na amzarau yuya wa phiri. Tamuweza kuumikira Mlungu na kuno mnahumikira mali.”
- 14**Mafarisayo ariphosikira hivyo, amzemerera Jesu, kpwa sababu ni atu a kumendza pesa.
- 15**Phahi waambira, "Mwimwi mnadzionyesa kpwa atu kala mu atu azuri, lakini Mlungu anamanya wazi mambo mai garigo mwenu mioyoni. Kpwa mana mambo gamhendago mutu aonekane mzuri kpwa atu anjina, kpwa Mlungu ni mabaya.
- 16**Shariya za Musa na Maandiko ga manabii gahumika mpaka wakati wa Johana M'batizadzi. Hangu siku hizo habari ndzuri kuhusu utawala wa Mlungu unatangazirwa atu, na anji anahenda bidii ili akubaliwe kukala atu a Mlungu.
- 17**Ni rahisi zaidi mlunguni na duniani kusira kuriko arufu mwenga au seemu ndide ya Shariya za Musa kuuswa.
- 18**Mutu arichaye mchewe akalóla mchetu wanjina, anazinga, na mutu alólaye mchetu yerichwa ni mlumewe naye piya anazinga.”
- 19**Alafu Jesu waamba, "Kpwakala na mutu mmwenga tajiri, ambaye kala achivwala nguwo ndzuri za gali sana, na kuishi maisha manono chila siku.
- 20-21**Na phakpwe ryangoni kala phachilazwa mgayi mmwenga yeihwa Lazaro kpwedzavoya. Mutu hiye kala nkuhenda ndzala hata akaaza kurya pukupuku za chakurya cha yuya tajiri. Tsona kala ana vironda mwiri mzima, na madiya kala nkpwedzamlamba-lamba vira virondavye.
- 22**Lazaro sikuze za kufwa ziriphofika, wafwa. Malaika achimhala achendamuika phamwenga na Brahimu hiko mlunguni. Yuya tajiri naye, sikuze phofika, piya naye wafwa, achizikpwa.
- 23**Yuya tajiri phokala mohoni hiko kuzimu, wagaya sana. Aripshotsupha matso, wamuona Brahimu kpwa kure na Lazaro pho kanda-kanda.
- 24**Phahi, wamuiha Brahimu, 'Baba Brahimu, nionera mbazi umhume Lazaro adyoge madzi na tsani ya chalache edze anireze lilimi, mana nagaya sana na huno moho!'
- 25**Lakini Brahimu achimuamba, 'Mwanangu, umanye wakati kala unaishi hiko duniani waphaha mambogo mazuri mazuri, kuno Lazaro anagaya. Lakini sambu iye anafurahishwa hipha, na uwe unagaya.
- 26**Zaidi ya hivyo, kahi-kahi ya uwe na sisi phana dibwa kulu ra ndani, ili kuzuwiya atu atakaotsapa kula hiku kpwedza hiko, wala kusivuke mutu yeyesi kula hiko kpwedza kpwehu.'

²⁷Alafu yuya tajiri achiamba, 'Phahi, nakuvoya baba Brahimu umhume Lazaro kpwehu kaya,

²⁸aphiye akaaonye enehu atsano, ili nao asedze akainjira hipha mashakani.'

²⁹Lakini Brahimu achimuamba, 'Enenu ana Shariya za Musa na Maandiko ga manabii, naalunge higo.'

³⁰Yuya tajiri achiamba, 'Hata baba Brahimu, hiyo taitosha, lakini kuchiphiya mutu kula kuzimu, enehu andatubu dambi zao.'

³¹Lakini achiambwa, 'Ichikala enenu taandagbwira Shariya za Musa na maneno ga manabii, phahi, hata mutu achifufuka kula kuzimu taandagbwira manenoge.'

Luka 17

¹Jesu waambira anafundzie, "Mambo gamtiyago mutu dambini ga kuko, lakini shakare hiye mutu ndiyegareha!

²Mutu hiye baha afungbwe lala singoni na akatsuphiwe baharini, kuriko kumhenda mmwenga wa hinya anyonje ainjire dambini.

³Phahi dzimanyirireni! Myao achikukosera, mkanye, na achitubu achikuvoya msamaha, msamehe.

⁴Hata achikukosera mara sabaa siku mwenga, na achedza mara sabaa achikuamba, 'Nkatubu mwenehu, nisamehe,' phahi n'lazima umsamehe."

⁵Hara mitume achimuamba Jesu, "Hutiye imani zaidi."

⁶Naye achiaambira, "Kala mna imani, hata dzagbwe ni ndide dza tembe ya mgandi, mngeweza kuuambira muhi huno, 'Ng'oka ukamere baharini,' nao hinyo muhi ungehenda uchivyoulagiza."

⁷Chisha achiamba, "Menzerepho una mtumishio acharima ama acharisa mang'ondzi. Achedza kula mndani ama marisani, unaweza kumuamba, 'Karibu wedze hurye?'

⁸Hata chidide! Lakini ungemuamba, 'Nitengezera chakurya, uniandazire nirye na ninwe, nchimala ndipho nawe undarya.'

⁹Wala kundamshukuru hiye mtumishio kpwa sababu akakuhendera vira uchivyomlagiza.

¹⁰Phahi, hata mwimwi piya, mchikala mkahenda chila chitu sawa-sawa kama mchivyolagizwa, ambani, 'Sisi hu atumwa tu na hukahenda vyo hulondwavyo kuhenda.' "

¹¹Wakati Jesu kala anaphiya Jerusalemu, watsapira mphaka wa Samariya na Galilaya.

- ¹²Wainjira mtaa fulani, ambako wakutana na akongo kumi a mahana. Hara akongo aima chikure-kure,
- ¹³na achikota likululu achiamba, "Bwana Jesu, huonere mbazi!"
- ¹⁴Jesu ariphoana, waambira, "Phiyani kpwa alavyadzi-sadaka akakuloleni ichikala mkaphola." Na wakati kala anaphiya, gara mahana gaphola.
- ¹⁵Ndipho mmwenga wao ariphoona akaphola, wauya kpwa Jesu, kuno anamtogola Mlungu na likululu.
- ¹⁶Achedzadzibwaga maguluni pha Jesu na achimshukuru. Naye kabilaye kala ni Msamariya.
- ¹⁷Jesu achiuza, "Akongo osi kumi akaphozwa. Dze, hara tisiya a kuphi?"
- ¹⁸Mbona cheuya kpwedzamtogola Mlungu ni yu mjeni bahi?"
- ¹⁹Alafu Jesu achimuamba, "Unuka uphiye vyako; kuluphiroro rikakuphoza."
- ²⁰Siku mwenga, Mafarisayo anjina amuza Jesu utawala wa Mlungu ndiphokpwedza. Jibure waamba, "Utawala wa Mlungu tawedza na dalili za kuonekana na matso.
- ²¹Wala atu taandaamba, 'Huno hipha,' ama 'Hura kura,' mana utawala wenye wakpwedza kare, na u kahi-kahi yenu."
- ²²Chisha achiaambira anafundzie, "Kundakpwedza wakati ambapho mndaaza siku mwengayapho ya mimi Mutu Yela Mlunguni, lakini tamndaiona.
- ²³Atu anjina andakuambirani, 'Yuya kura,' ama 'Hiyu hipha,' lakini msialunge gao, wala msiphiye mchalola.
- ²⁴Kpwa mana mimi, Mutu Yela Mlunguni, kpwedza kpwangu kundaonekana wazi-wazi chila phahali, dza viratu limeme rimekavyo mlungu mzima.
- ²⁵Lakini, kpwandza n'lazima niteswe sana na niremewe ni atu a chivyazi hichi.
- ²⁶Vivyo vyokala wakati wa Nuhu, ndivyo ndivyokala wakati mimi Mutu Yela Mlunguni ndiphouya.
- ²⁷Wakati wa Nuhu atu kala achirya na kunwa, kala achilóla na kulólwa, hadi siku Nuhu ariphoinjira safina, alafu mafuriko gachedza, na gachiolaga atu osi.
- ²⁸Hata siku za Lutu yakala vivyo piya, atu arya na kunwa, kuhenda bishara, kurima na kudzenga.
- ²⁹Lakini siku Lutu ariphouka Sodoma, vidziwe viakavyo moho kula mlunguni vyamwagika dza mvula na vichiaolaga osi.
- ³⁰Phahi, hivyo ndivyo ndivyokala siku mimi Mutu Yela Mlunguni ndiphouya himu duniani.

³¹Siku hiyo, mutu ndiyekala kondze ya nyumba naasiuye mwakpwe nyumbani kuhala malize. Naye ariye mndani naasiuye kpwedzalola malize.

³²Mnatambukira gomphaha mkpwaza Lutu!

³³Mutu yeyesi ndiyedzishugulisha na maishage himu duniani bahi, andaangamiza maishage ga milele, ela aangamizaye maishage ga himu duniani andarinda maishage ga milele.

³⁴Nakuambirani, usiku uho ndiokpwezera mimi, atu airi andakala arere chitanda chimwenga; mmwenga andahalwa na wanjina andarichwa.

³⁵Achetu airi andakala anasaga phamwenga; mmwenga andahalwa na wanjina andarichwa.”

³⁷Ndipho anafundzie achimuuza, "Bwana, mambo higa gandakala kuphi?" Naye achiaambira, "Pho pharipho na lufu, ndipho ndiphogbwa nderi."

Luka 18

¹Alafu Jesu waatsuphira anafundzie ndarira kuafundza kala n'lazima atu avoye Mlungu chila wakati na asikate tamaa.

²Waamba, "Kpwahenda jaji mmwenga mudzi fulani, ambaye ka kamuogopha Mlungu wala kujali mutu.

³Na piya kala kuna gungu mmwenga mudzi uho, ambaye mara kpwa mara kala achimlunga yuya jaji achamuamba, 'Nakuvoya unisaidiye niphahe haki yangu kula kpwa mviha wangu.'

⁴Kpwa muda mure hiye jaji warema. Lakini badaye waamba, 'Hata dzagbwe simuogopha Mlungu wala sijali mutu,

⁵lakini kpwa kukala hiyu mchetu ananiyuga, n'ndamupha hakiye, ama andaniremweza achienderera kpwedza chila wakati.' "

⁶Alafu Jesu achiamba, "Mkamsikira ye jaji wa zuluma vyoamba?

⁷Phahi, Mlungu andaahendera haki atu oatsambula akale atue, amririrao na kum'voya usiku na mutsi. Na wala kandakaa kuaterya.

⁸Nakuhakikishirani, andaahendera haki, tsona upesi. Lakini dze, mino Mutu Yela Mlunguni, siku nchiuya duniani, n'ndakuta atu anikuluphirao?"

⁹Jesu waatsuphira ndarira hara atu adzionao bora na kuzarau ayawao, waamba:

¹⁰"Kpwahenda atu airi, achiphiya ndani ya sinagogi kpendavoya Mlungu. Mmwenga kala ni Mfarisayo na wanjina kala ni karani wa kodi.

¹¹Yuya Mfarisayo waima na achivoya chimoyo-moyo, achiamba, 'Nakushukuru Mlungu, kpwakukala mino si dza atu anjina: aivi, atu ayi na azinifu, wala si dza hiyu karani wa kodi.

- ¹²Mino nafunga mara mbiri kpwa wiki na nalavya sadaka fungu ra kumi ra pato rangu.'
- ¹³Lakini yuya karani wa kodi waima kanda. Kayaweza hata kuunula usowe kulola mlunguni, ela wadzipiga-piga chifuwa kpwa utsungu na achiamba, 'Mlungu nakuvoya unionere mbazi, mimi mchina-dambi.' "
- ¹⁴Alafu Jesu achiaambira, "Nakuambirani kpweli, hiye karani wa kodi wasamehewa dambize na achikubaliwa ni Mlungu. Lakini kpwa yuya Mfarisayo taiyakala hivyo. Kpwa mana chila adzikipwezaye andatserezwa, na adzitserezaye andakpwezwa."
- ¹⁵Atu anjina amrehera Jesu hata ana ao atsanga ili aagute na kuaajaliya. Lakini anafundzie ariphoona hivyo, achiademurira hara atu.
- ¹⁶Ela Jesu waaiha na achiaambira, "Aricheni hinyo anache adide edze kpwangu wala msiazuwie, mana atu ambao n'ndahewa ni Mlungu kuatawala ni dza hinya anache.
- ¹⁷Nakuambirani kpweli, mutu asiyenikuluphira dza mwanache akuluphiravyo ise, kandakala mmwenga katika ufalume wangu."
- ¹⁸Siku mwenga mtawala mmwenga wamuuzza Jesu, waamba, "Mwalimu mnono, nihendedze mino ili Mlungu aniphe uzima wa milele?"
- ¹⁹Jesu achimuamba, "Kpwa utu wani unaniiha mnono? Takuna ariye mnono isiphokala Mlungu macheye.
- ²⁰Samba unamanya malagizo ga Mlungu: 'Usizini, usiolage mutu, usiye, usizige myao na dzambo ra handzo, tsona muogophe sowe na mayoo.' "
- ²¹Yuya mutu achiamba, "Ehe, higa gosi nágalunga hangu wanache wangu."
- ²²Jesu ariphosikira hivyo, wamuamba, "Bado kuna chitu chimwenga ambacho unatakiwa uchihende. Kaguze malizo zosi na pesaze ukaaphe achiya, nawe undakala na akiba hiko mlunguni. Chisha ndzo unilunge."
- ²³Lakini yuya mutu ariphosikira higo, wasononeka sana, mana kala ana mali nyinji.
- ²⁴Jesu ariphoona yuya mutu anasononeka, waamba, "Ni vigumu sana tajiri kukala mmwenga katika ufalume ambao Mlungu wanipha.
- ²⁵Ni rahisi zaidi ngamia kutsapira na tundu ya sindano kuriko tajiri kukala mmwenga katika ufalume wangu."
- ²⁶Atu ariphosikira hivyo, amuuza, "Pho sambu ni ano ani ambao anaweza kuokolwa?"
- ²⁷Achiaambira, "Risirowezekana kpwa mwanadamu, kpwa Mlungu rinawezekana."

- ²⁸Ndipho Petero wamuamba, "Dze, sino? Hwaricha vitu vyehu vyosi ili hukale anafundzio!"
- ²⁹Jesu achiaambira, "Hakika nakuambirani, yeyesi ndiyeona kazi ya Mlungu ni muhimu zaidi kuriko nyumbaye, mchewe ama nduguze, avyazie ama anae,
- ³⁰andaphaha vinji zaidi wakati wa maishage, na wakati wedzao andaphaha uzima wa milele."
- ³¹Jesu wahala hara anafundzi kumi na airi achiphiya nao njama, achendaambira, "Sikizani, vivi hunaphiyani Jerusalemu, ambako gosi goandikpwa ni manabii kuhusu mimi, Mutu Yela Mlunguni, gayatimia.
- ³²N'ndalaviwa kpwa atu ambao sio Ayahudi, andanizemerera, andanilaphiza na kunitsitsira mahe,
- ³³andanichapa viboko na mwisho andaniolaga, lakini siku ya hahu n'ndafufuka."
- ³⁴Lakini anafundzie taayaelewa chochosi kuhusu mambo higo. Taayaelewa manage wala taayamanya Jesu anagomba kuhusuni.
- ³⁵Jesu na anafundzie ariphokala a phephi na Jeriko, kala phana chipofu asegere kanda-kanda ya barabara, anavoya-voya pesa.
- ³⁶Hiye chipofu ariphosikira umati wa atu unatsapa, wauza, "Kunani?"
- ³⁷Achiambwa, "Jesu wa Nazareti anatsapa."
- ³⁸Phahi, hiye chipofu wakota likululu, achiamba, "Jesu, Mwana wa Daudi, nionera mbazi!"
- ³⁹Atu ambao kala a mbere ya msafara wa Jesu amdemurira anyamale, lakini ye achizidi kukota likululu achiamba, "Jesu, Mwana wa Daudi, nionera mbazi!"
- ⁴⁰Phahi Jesu waima, achilagiza hiye mutu arehwe. Ariphofika phephi, achimuza,
- ⁴¹"Unalonda nikuhendereni?" Achiamba, "Bwana, nakuvoya nione."
- ⁴²Achiambwa, "Vi sambu ona! Kpwa sababu ya kunikuluphira ukaphola."
- ⁴³Saa iyo-iyoyuya chipofu achikala anaona, achimlunga-lunga Jesu na kumtogola Mlungu. Atu osi ariphoona hivyo, nao piya amtogola Mlungu.

Luka 19

- ¹Jesu wainjira mudzi wa Jeriko ambapho kala anatsapa kuphiya Jerusalemu.
- ²Hiko Jeriko kala kuna mutu mmwenga yehwa Zakayo, mkpwulu wa makarani ga kodi tsona kala ni tajiri.
- ³Zakayo ka analonda kumuona Jesu, lakini kayaweza, mana kala phana umati wa atu, naye mwenye kala ni mfupi.

- ⁴Phahi, watanguliya mbere ya hura umati wa atu, achendapanda dzulu ya muhi ili amuone Jesu, mana kala andatsapa na njira hiyo.
- ⁵Jesu ariphofika phara, walola dzulu na achimuamba, "Zakayo tserera upesi, mana rero n'lazima nikale mjenio."
- ⁶Zakayo watsrerera upesi na achimkaribisha na raha.
- ⁷Atu osi ariokala hipho aandza kunung'unika, kuno anaamba, "Jesu anahenda ujeni kaya kpwa mchina-dambi!"
- ⁸Lakini Zakayo waunuka achimuamba Jesu, "Sikiza Bwana, nusu ya mali yangu n'ndaipha achiya, na ichikala námzulumu mutu yeyesi kpwa kumtoza kodi zaidi, n'ndamuuyizira mara nne zaidi."
- ⁹Phahi Jesu achiamba, "Rero yuyu akaokolwa phamwenga na atue, mana hata iye piya ni chivyazi cha Brahimu.
- ¹⁰Kpwa mana mimi, Mutu Yela Mlunguni, nákpwedza kuendza na kuokola atu arioangamika."
- ¹¹Wakati atu kala anasikiza mambo higo, Jesu watsupha ndarira. Mana kala a phephi na kufika Jerusalemu, nao atu kala anaona utawala wa Mlungu undaandza wakati hinyo hinyo.
- ¹²Phahi Jesu waambira, "Kpwahenda mutu mmwenga wa mbari ya chifalume, achiphiya tsi ya kure ili akahewe madaraka ga chifalume, alafu auye.
- ¹³Ela kabla kadzangbweuka, waiha atumishie kumi, na achiapha osi pesa chiasi sawa, achiaambira, 'Zihendereni bishara mpaka ndiphouya.'
- ¹⁴Nao anatsi a tsi hiyo kala akamzira, phahi ariphouka hiye mutu, hiku nyuma hara anatsi alavya ahumwa akaambe, 'Tahumtaki mutu hiyu akale mfalume wehu.'
- ¹⁵Lakini, yuya mutu wakpwendahendwa mfalume vivyo, na achiuya. Alafu walagiza hara atumishie arioapha pesa aihwe, ili amanye chila mmwenga arichophaha.
- ¹⁶Mtumishi wa kpwandza wakpwedza mbereze, achimuamba, 'Bwana, náphaha fwaida mara kumi ya zira pesa zonipha.'
- ¹⁷Yuya mfalume achimuamba, 'Wahendato! U mtumishi mnono! Kpwa sababu wakala muaminifu wa mambo madide, n'ndakuhenda mkpwulu wa midzi kumi.'
- ¹⁸Wa phiri naye achedza, achiamba, 'Bwana, pesazo zaphaha fwaida mara tsano zaidi.'
- ¹⁹Yuya mfalume achimuamba, 'N'ndakuhenda mkpwulu wa midzi mitsano.'
- ²⁰Alafu achedza mtumishi wanjina, achiamba, 'Bwana, pesazo hizi, názifwitsa vinono chitambarani.

- ²¹Nákuogopha, kpwa sababu uwe u mutu mufu, mana unahala ambacho si chako, na unavuna ambacho kuyaphanda.'
- ²²Yuya mfalume achimuamba, 'N'ndakuhukumu kpwa kauliyo mwenye, u mtumishi mbaya! Nawe unamanya mino ni mutu mgumu, nihalaye ambacho si changu na kuvuna ambacho siphandire,
- ²³phahi, kpwa utu wani kuyaika pesa zangu bengi ili nikaziphaha na fwaida siku ndiphouya?'
- ²⁴Ndipho achiaambira hara ariokala aimire pho phephi, 'Mfutuni hizo pesa na mumuphe hiye yephaha fwaida mara kumi.'
- ²⁵Lakini hara atu achimuamba, 'Bwana, iye anazo kare pesa dza zizo mara kumi!'
- ²⁶Naye achiaambira, 'Nakuhakikishirani kukala, chila ariye na chitu na kuchihumira andaenjerezwa. Ela asiyehumira chitu chidide aricho nacho, hata chicho chindahalwa.
- ²⁷Sambi, hara maadui angu ambao kala taanitaki nikale mfalume wao, areheni phano na muaolage pha mbere zangu.' "
- ²⁸Jesu ariphomala kugomba higo, watsapa mbere ya afuasie kuphiya Jerusalemu.
- ²⁹Ariphokala a phephi na kufika midzi ya Bethifage na Bethania, hiko Mwango wa Mizeituni, watanguliza anafundzie airi, na achialagiza hivi:
- ³⁰"Phiyani hinyo mudzi wa hipho mbere, na mchiinjira tu, mndamkuta mwana-punda akafungbwa, naye kadzangbwepandwa ni mutu. Mvuguleni mnirehere.
- ³¹Mutu achikuuzani, 'Mnayeni ye mwana-punda, mbona mnamvugula?' Muambeni, 'Bwana ana haja naye.' "
- ³²Phahi, hara ahumwa aphiya na achendaona viratu achivyoambwa.
- ³³Ariphokala anamvugula yuya mwana-punda, enye aauza, "Mbona mnamvugula ye mwana-punda?"
- ³⁴Achiaambira, "Bwana ana haja naye."
- ³⁵Chisha amreha yuya mwana-punda kpwa Jesu, achihandika nguwo zao dzulu ya hiye punda, alafu achimsaidiya kupanda.
- ³⁶Jesu ariphokala anaphiya, atu ahandika nguwo zao barabarani.
- ³⁷Ariphofika phephi na Jerusalemu, phahali ambapho barabara inatserera Mwango wa Mizeituni, umati wosi wa afuasie waandza kupiga njerejere kpwa raha na kumtogola Mlungu kpwa mambo gosi makulu makulu gohenda Jesu. Achiamba,
- ³⁸"Wajaliwa hiye mfalume edzaye kpwa dzina ra Mwenyezi Mlungu!" "Naatogolwe Mlungu ariye dzulu na mlunguni nakukale salama!"

- ³⁹Lakini Mafarisayo anjina ariokala mo kundini amuamba Jesu, "Mwalimu, anyamaze hano afuasio."
- ⁴⁰Ela achiaambira, "Nakuhakikishirani, hano atu achinyamala, higo mawe gandapiga hoyo."
- ⁴¹Jesu ariphofika phephi na Jerusalemu na kuona hinyo mudzi, wauririra
- ⁴²achiamba, "Naaza kala rero mnamanya mambo garehago amani! Lakini tamgamanya.
- ⁴³Kundakpwedza wakati ambapho jeshi ra maadui genu rindauzungulusira lichigo mudzi wenu, asikarie akuzungulukeni na akupigeni kula chila uphande.
- ⁴⁴Andakuolagani na kubomola mudzi wenu kabisa. Taandaricha hata dziwe mwenga dzulu ya dziwe ranjina, kpwa kukala tamyamanya wakati wa Mlungu kpwedzakukuokolani!"
- ⁴⁵Alafu Jesu wainjira Nyumba ya Kuvoya Mlungu na achiandza kuzoresa achuuzi.
- ⁴⁶Waamba, "Maneno ga Mlungu gaandikpwa, 'Nyumba yangu indakala nyumba ya mavoyo.' Lakini mwino mnaihenda mwamdzifwitso wa aivi!"
- ⁴⁷Chila siku Jesu kala achifundza ndani ya Nyumba ya Kuvoya Mlungu. Akulu a alavyadzi-sadaka, alimu a Shariya, na vilongozi aendza njira ya kumuolaga,
- ⁴⁸ela taayaweza, mana atu osi amwendza sana dza mwalimu wao na ataka kusikiza vinono na taatafire atsupwe ni neno hata mwenga.

Luka 20

- ¹Siku mwenga, Jesu kala anafundza atu na kutangaza habari ndzuri za Mlungu ndani ya Nyumba ya Kuvoya Mlungu. Hiphoo, akulu a alavyadzi-sadaka, alimu a Shariya, na vilongozi anjina akpwezabisha naye.
- ²Achimuamba, "Huambire, gano unagogahenda, unahenda kpwa uwezo wa ani? Ni ani yekupha uwezo hinyo?"
- ³Naye achiaambira, "Nami n'ndakuuzani swali, niambirani,
- ⁴dze, uwezo wa Johana wa kubatiza wala kpwa Mlungu hebu wala kpwa atu?"
- ⁵Hara vilongozi aphiya njama kpendabisha, achiaamba, "Huchiamba, 'Wala mlunguni,' andahuamba, 'Sambi mbona tamyamkuluphira?'
- ⁶Na huchiamba, 'Wala kpwa atu,' atu osi andahupiga mawe, mana kpwa kpweli anaamini kukala Johana kala ni nabii."
- ⁷Phahi, amuamba Jesu, "Tahumanya uwezowe urikola."
- ⁸Naye achiaambira, "Wala nami sindakuambirani nahenda mambo higa kpwa uwezo wa ani."

- ⁹Jesu waatsuphira atu ndarira achiamba, "Kpwakala na mutu mmwenga yephanda mizabibu mwakpwe mndani, na hura munda achiukodishira akurima. Alafu achisafiri tsi yanjina kpwa muda wa kukola.
- ¹⁰Wakati wa kuvuna zabibu uriphofika, mchina-munda wahuma mtumishiwe aphiye kpwa hara ariokodisha mundawe ili akahewe fungure ra mavuno. Lakini hara ariokodisha hura munda ampiga na achimuuyiza mikono mihuphu.
- ¹¹Alafu mchina-munda wahuma mtumishi wanjina, lakini naye ampiga, achimhenda mambo ga waibu na achimuusa mikono mihuphu.
- ¹²Yuya mchina-munda achihuma mutu wa hahu. Hiye naye ampiga na achimlumiza, chisha achimtsupha kondze ya munda.
- ¹³Phahi yuya mchina-munda waamba, 'Sambi mino nihendedze? Si chitu, n'ndamhuma mwanangu mwenye, mwanangu nimmendzaye sana, naona andamuogopha.'
- ¹⁴Lakini hara akurima okodisha hura munda ariphomuona yuya mwanangbwa, aima njama, achiambirana, 'Hiyu ni mwanawe ndiyemrisi, phahi nahumuolageni ili huno munda ukale wehu.'
- ¹⁵Hipho amtuluza kondze ya hura munda na achimuolaga. Dze! Ye mchina-munda achedza, andaahendadze hara akurima ariokodisha hura munda?
- ¹⁶Andakpwedza aolage, na hura munda aukodishe akurima anjina." Hara atu phosikira hivyo, aamba, "Hunavoya dzambo dza hiri risihendeke kabisa!"
- ¹⁷Phahi Jesu waatong'orera matso, chisha achiamba, "Sambi mana ga Maandiko gano ni ni? 'Dziwe roremewa ni adzengi, ndipho rikakala dziwe kulu ra msingi.'
- ¹⁸Mutu yeyesi ndiyegbwa dzulu ya hiro dziwe andavundzika-vundzika, na ndiyegbwererwa ni hiro dziwe andasagbwa-sagbwa."
- ¹⁹Phahi hara alimu a Shariya na akulu a alavyadzi-sadaka amanya kala akagomba ndarira hiyo kuonyesa kala aho ndio akurima ayi ariokodisha hura munda. Kpwa hivyo ataka kumgbwira Jesu mara mwenga, lakini achimricha kpwa kuogopha atu.
- ²⁰Phahi amchunguza chila ahendaro na achihuma achunguzi a siri ambao adzihenda avi ni aaminifu. Nia yao kala ni kumgbwira na manenoge agombago ili amshitaki kpwa mkpwulu wa jimbo ra Chirumi.
- ²¹Phahi hara achunguzi amuamba Jesu, "Mwalimu, hunamanya kala manenogo na mafundzogo ni ga kpweli na ga haki, wala kuonera mutu, lakini unafundza kpweli kuhusu Mlungu alagizago.
- ²²Dze, ni shariya kuripha kodi kpwa Kaisari, Mtawala wa Chirumi, hebu sio shariya?"
- ²³Lakini Jesu wamanya werevu wao, hipho waamba,

- ²⁴"Nionyesani pesa mwenga. Dze, pesa hino ina sura na dzina ra ani?" Nao achimuamba, "Ni ya Kaisari."
- ²⁵Ndipho achiaambira, "Phahi, vya Kaisari mupheni Kaisari, na vya Mlungu, mupheni Mlungu."
- ²⁶Hipho, taayaweza kumgbwira kpwa maneno achigogomba mbere za atu, lakini aangalazwa ni majibuge na achikala taana ra kuamba.
- ²⁷Jesu watsolokerwa ni Masadukayo anjina. Nao Masadukayo ni kundi ra Ayahudi asioamini kukala atu achifwa andafufuka. Phahi achimuamba,
- ²⁸"Mwalimu, Musa wahuandikira katika Shariya kukala, mutu achifwa na achikala kavyarire, nduguye n'lazima ahale ufwa hiye gungu, na amvyarire ana yuya mufwa.
- ²⁹Phahi, hipho kare, kpwahenda ndugu sabaa. Wa mwandzo walóla, achifwa bila ya kuvyala naye ana.
- ³⁰Mdidewe achimhala ufwa, naye achifwa,
- ³¹na wa hahu achimlólá, na achifwa. Phahi, yakala hivyo mpaka ndugu osi sabaa achisira kufwa, bila ya kuvyala naye.
- ³²Mwisho, hiye mchetu naye wafwa.
- ³³Sambi, siku ya kufufulwa atu, yuya mchetu andakala mkpwaza ani? Kpwa mana ndugu osi sabaa amlólá."
- ³⁴Jesu achiaamba, "Hipha sambi alume na achetu analólana,
- ³⁵lakini wakati wedzao, atu ambao Mlungu andaona anafwaha kufufulwa na kuishi tsona wakati hinyo, taandalólana.
- ³⁶Kpwa kpweli taandafwa tsona, mana andakala dza malaika na ni ana a Mlungu, ahendafufulwa.
- ³⁷Na kuhusu atu kufufulwa, si Musa wakuhakikishirani wazi-wazi ariphoandika kuhusu chitsaka chokala chinaaka moho. Mana Musa anamhadza Bwana dza Mlungu wa Brahimu, Isaka na Jakobo.
- ³⁸Kpwa hivyo iye si Mlungu wa atu ariofwa, lakini ni Mlungu wa ario moyo, mana kpwakpwe anadamu osi a moyo."
- ³⁹Alimu a Shariya anjina achiamba, "Mwalimu, ukagombato!"
- ⁴⁰Phahi, atu osi tayasubutu kumuuzwa maswali tsona.
- ⁴¹Chisha Jesu wauza, "Kpwadze, atu nkuamba Masihi andakala chivyazi cha Mfalume Daudi?"

⁴²Kpwa mana hata Daudi mwenye ariphoandika Chitabu cha Zaburi waamba: 'Mwenyezi Mlungu wamuamba Bwana wangu: Sagala uphande wangu wa kulume, phatu pha ishima kulu sana,

⁴³hadi nihende maaduigo gakugbwerere maguluni.'

⁴⁴Ichikala Daudi anamuiha hiye mutu, 'Bwana wangu,' vinakaladze akale ni chivyaziche?"

⁴⁵Jesu wagomba na anafundzie mbere za atu osi, achiamba,

⁴⁶"Dzimanyirireni na alimu a Shariya! Mana nkumendza kuvwala kandzu nyire na kutsupa-tsupa hiko cheteni ili alamuswe na ishima mbere za atu. Piya anamendza kusagala vihi vya mbere-mbere masinagogini na karamuni.

⁴⁷Nkuzulumu magungu, na kudzihenda kukala ni atu anono kpwa kuvoya mavoyo mare! Siku ya mwisho atu a aina hiyo andaphaha adabu kali sana."

Luka 21

¹Badaye Jesu watsupha matso na achiona matajiri anatiya pesa zao ndani ya sanduku ra kulavira sadaka.

²Piya wamuona mayo mmwenga gungu, tsona mchiya, anatiya mapeni mairi.

³Jesu waamba, "Lolani hiyu mayo. Nakuambirani kpweli, hiyu gungu mchiya akatiya pesa nyinji kuriko anjina osi.

⁴Mana anjina osi akatiya kulengana na fwaida ya mali arizo nazo. Lakini hiyu mayo, dzagbwe ni mchiya, akalavya pesa zosi achizokala nazo, hata vivi kana chitu cha kumterya kuishi."

⁵Anafundzie anjina kala anabisha kuhusu vira Nyumba ya Kuvoya Mlungu vyodzengbwato na mawe manono, na vira vyopambwa vinono na zawadi zolaviwa sadaka kpwa Mlungu. Lakini Jesu achiamba,

⁶"Kuredza wakati ambapho higa gosi mgaonago gandabomolwa, na taphana hata dziwe mwenga ndirosala dzulu ya ranjina."

⁷Phahi anafundzi anjina a Jesu amuuza, "Mwalimu, mambo higo gandakala rini? Na dalili ya kuonyesa kala ga phephi ni ni?"

⁸Jesu waambira, "Dzimanyirireni msedze mkachengbwa. Kpwa mana atu anji andadzihenda kala ni mimi na andaamba, 'Mimi ndiye hiye Yetsambulwa ni Mlungu,' na andaamba, 'Huno ndio wakati wa mwisho!' Lakini nakuambirani, msialunge gao.

⁹Na mchisikira habari za viha na fujo, msiogophe, mana kpwandza, higo n'lazima gakaleko, lakini siyo kukala ni mwisho kare."

- ¹⁰Chisha achiamba, "Tsi mwenga indapigana na tsi yanjina, na mfalume mmwenga andapigana na mfalume wanjina.
- ¹¹Dunia indakala ichisumba sana, kundakala na ndzala na makongo ga kuolaga atu anji seemu nyinji. Kundakala na mambo ga ajabu-ajabu na ga kutisha hiko dzulu mlunguni.
- ¹²Lakini kabla ya kpwedza mambo higa, atu andakugbwirani akuteseni. Andakushitakini masinagogini na kukufungani jela, mndashitakiwa kpwa afalume na atawala kpwa sababu yangu.
- ¹³Na uho ndiondokala wakati mnono wa kulavya ushahidi wa rira mnaroriamini.
- ¹⁴Lakini nataka mgbwireto mambo higa: Sitaki mtange-tange kuhusu ndivyodzikanira,
- ¹⁵kpwa mana n'ndakuphani maneno ga marifwa, ambago maadui genu gosi tagandaweza kugarema wala kugapinga.
- ¹⁶Mndafyakatsirwa na kulaviwa hata ni avyazi enu, ndugu zenu, abari enu na asena enu kpwa atu akuteseni, na anjina mndaolagbwa.
- ¹⁷Atu osi andakuzirani kpwa sababu yangu.
- ¹⁸Lakini mambo higa tagandaangamiza roho zenu, hata chidide!
- ¹⁹Mchivumirira, mndaokola roho zenu."
- ²⁰Alafu Jesu waamba, "Mchiona mudzi wa Jerusalem ukazungulukpwa ni majeshi, phahi manyani u phephi na kuangamizwa.
- ²¹Wakati na hinyo, ario seemu ya Judea naachimbirire myangoni, ario mudzini Jerusalem naamutuluke, na ario mindani naasedze Jerusalem.
- ²²Kpwa sababu siku hizo zindakala ni siku za kutiywa adabu ili gosi goandikpwa ndani ya Maandiko ga Mlungu gatimie.
- ²³Shaka rani ro achetu a mimba na amwisao siku hizo! Kundakala na tabu kulu sana tsi hiyo, na utsungu wa Mlungu undaapiga atu a tsi hiyo.
- ²⁴Atu anjina andaolagbwa vihani na anjina andahalwa mateka kuphirikpwa tsi tafwauti tafwauti duniani. Jerusalem indatekpwa na itawalwe ni atu ambao sio Ayahudi mpaka wakati wao ndiphosira."
- ²⁵"Kundakala na vituko vya dzuwa, mwezi na nyenyezi. Himu duniani, atu andakala na tabu sana na kuangalala kpwa sababu ya mngurumo wa maimbi makulu ga bahari.
- ²⁶Atu andazimia kpwa wuoga, na kuririkana higo gedzago himu duniani, mana nguvu za dzulu mlunguni zindasumbiswa.

²⁷Ndipho atu ndiphoniona mimi, Mutu Yela Mlunguni, nchitsembuka inguni kpwedza na nguvu na utukufu munji.

²⁸Mambo higa gachiandza kuonekana, hererwani na msifwe moyo, mana mu phephi na kukombolwa.”

²⁹Chisha Jesu walavya mfwano, achiamba, "Lolani mtini na mihi yanjina.

³⁰Mchiiona inatula, mkumanya vuri ikafika.

³¹Namwi mchiona mambo higa ganahendeka, manyani kukala Mfalume yela kpwa Mlungu a phephi kpwedzatawala atue.

³²Nami nakuambirani kpweli, chivyazi hichi tachindasira kufwa kabla ya mambo higa gosi kuhendeka.

³³Dzulu mlunguni na dunia kundasika, lakini maneno gangu gandakalako milele na milele.

³⁴Dzimanyirireni msedze mkatawalwa ni kurya kunji, kulewa, na shuguli za maisha, ama siku ya mwisho indakpwedzakugbwirani gafula

³⁵dza muhambo. Kpwa mana siku hiyo indakpwedza kpwa atu osi duniani.

³⁶Kpwa hivyo Kalani matso wakati wosi, na m'voye ili mphahe nguvu za kugatsupira mambo gago ndigohendeka, tsona muweze kuima mbere za ye Mutu Yela Mlunguni.”

³⁷Phahi chila siku, namutsi Jesu kala achifundza atu Nyumba ya Kuvoya Mlungu na dziloni akaphiya Mwango wa Mizeituni achalala.

³⁸Ligundzu chiti atu osi kala achiphiya Nyumba ya Kuvoya Mlungu achamsikiza Jesu.

Luka 22

¹Sukukuu ya Mikahe Isiyotiywa Amira, yani Pasaka, kala i phephi.

²Phahi, akulu a alavyadzi-sadaka na alimu a Shariya ataka kumuolaga Jesu, lakini kala anataka njira ambayo atu taandahenda fujo, chitu ambacho ka anachiogopha.

³Phahi, Shetani wamuinjira Juda Iskarioti, ambaye piya kala ni mwanafundzi wa Jesu.

⁴Juda waphiya kpwendabisha na akulu a alavyadzi-sadaka na akulu a asikari a kurinda Nyumba ya Kuvoya Mlungu vira ambavyo andamsalata Jesu.

⁵Nao ahererwa sana, achilaga kumupha pesa.

⁶Phahi, Juda wakubali na achikala anaendza nafwasi ya kumsalata Jesu kpwa hinyo akulu bila ya makundi ga atu kumanya.

- ⁷Alafu yafika Sukukuu ya mikahe isiyotiywa amira, ambapho siku hiyo mwana-
ng'ondzi wa Pasaka nkutsindzwa kpwa sadaka.
- ⁸Jesu walagiza Petero na Johana, achiaambira, "Phiyani mkahutayarishire
chakurya cha Pasaka wedze hurweni."
- ⁹Achimuuza, "Unalonda hukaitayarishe kuphi?"
- ¹⁰Achiaambira, "Wakati mchikala mkainjira mudzini, mndakutana na bwana
mmwenga akadzihika nyungu ya madzi. Mlunge-lungeni hadi nyumba
ndiyoinjira.
- ¹¹Chisha muambeni mchina-nyumba hiyo, 'Mwalimu anakuuza: Chi kuphi chira
chumba ambacho n'ndarya Pasaka na anafundzi angu?'
- ¹²Andakuonyesani chumba chikulu dzulu ya gorofa ambacho chikatayarishwa.
Tayarishani chakurya cha Pasaka himo."
- ¹³Phahi, Petero na Johana aphiya na achendakuta viratu Jesu arivyoaambira.
Achtayarisha chakurya cha Pasaka himo.
- ¹⁴Wakati wa kurya uriphofika, Jesu wasagala chakuryani phamwenga na hara
mitumee kumi na airi.
- ¹⁵Chisha achiaambira, "Kala naaza sana kurya Pasaka hino na mwimwi kabla
sidzangbweteswa.
- ¹⁶Mana kpwa kpweli nakuambirani, sindairya tsona mpaka manage
ndiphokamilika wakati ndiphokpwezatawala dza Mfalume yetsambulwa ni
Mlungu."
- ¹⁷Wahala chikombe cha uchi wa zabibu, na bada ya kumshukuru Mlungu,
waamba, "Halani hinyu uchi mtsumbuzane mosi.
- ¹⁸Nakuambirani, hangu sambu sindanwa tsona uchi wa zabibu hadi
ndiphokpwezatawala dza Mfalume yetsambulwa ni Mlungu."
- ¹⁹Chisha achihala mkahe, achimshukuru Mlungu alafu achiumega-mega na
achiapha arye, achiamba, "Huno ni mwiri wangu, ambao unalaviwa kpwa fwaida
yenu. Kalani mchihenda hivi ili mkale mchinitambukira."
- ²⁰Ariphomala kurya chakurya, vivyo hivyo Jesu wahala chikombe cha uchi wa
zabibu na achigomba tsona, achiamba, "Uchi wa chikombe hichi ni dalili ya
chilagane chiphya cha Mlungu, ambacho chinaikpwa na mlatso wangu
ndiomwagika kpwa fwaida yenu.
- ²¹Lakini sikizani, hiye mutu ndiyenialata, ni phamwenga naye phapha kuryani!
- ²²Mimi, Mutu Yela Mlunguni, n'ndaolagbwa kama vyopangbwa ni Mlungu, lakini
shakare hiye ndiyenialata!"

- ²³Hipho hara mitume achikala anauzana, "Ni myawehu ani ye ambaye andahenda dzambo dza hiro?"
- ²⁴Alafu phazuka malumbano kuhusu ni ani ndiyetsukurirwa kama mkpwulu kuriko ayae osi.
- ²⁵Jesu achiaambira, "Afalume a duniani nkutawala atu chinguvu-nguvu, nao atawala nkumendza kuihwa 'atu azuri ateryo anatsi.'
- ²⁶Lakini mwimwi msikale hivyo. Ela mkpwulu wenu naakale avi ndiye mdide, na chilongozi wenu naakale kama mtumishi.
- ²⁷Kpwani mkpwulu ni ani: ni yuya asagalaye mezani, hebu ni yuya aandazaye? Asagalaye mezani ndiye mkpwulu. Lakini mimi ni myawenu kama muandazi.
- ²⁸Mwimwi ndimwi mriokala nami wakati wosi nrphojaribiwa.
- ²⁹Phahi, nakuphani uwezo wa kutawala, dza viratu Baba Mlungu arivyonipha uwezo wa kutawala,
- ³⁰ili murye na munwe phangu chikaloni wakati wa utawala wangu, na mndasagala vihi vya chifalume kuhukumu mbari kumi na mbiri za Iziraeli."
- ³¹Alafu Jesu wagomba na Simoni Petero achimuamba, "Simoni, sikiza! Shetani wavoya ruhusa Mlungu akujaribuni, kuatenga aaminifu na asio aminifu, dza viratu mkurima aphehavyo nganu kutuluza makoya.
- ³²Lakini nkakuvoyera Mlungu Simoni, ili kuluphiroro risiphunguke. Na wakati ndiphoniuyira, atiye nguvu ayao."
- ³³Petero achimuamba, "Bwana, mimi ni tayari kutiywa jela na piya kufwa na uwe."
- ³⁴Achiambwa, "Petero, nakuambira, rero usiku kabla dzogolo taridzangbweika, undakala ukanitsamalala mara tahu na uambe kala kunimanya."
- ³⁵Alafu Jesu waaauza anafundzie, "Nriphokulavyani mphiyе bila ya pochi, mkoba wala virahu vya akiba, mwakosa chitu chochosi?" Aho achimuamba, "Hata, tahuyakosa chitu."
- ³⁶Achiaambira, "Lakini sambі, ariye na pochi au mkoba naahale. Na mutu asiye na upanga, naaguze nguwoye agule upanga.
- ³⁷Gara maneno ga Mlungu goandikpwa, 'Amtsukurira kama avi ni mkora,' gananihusu mimi. Nakuhakikishirani maneno higa n'lazima gatimizwe. Ehe, mambo goandikpwa kunihusu ga phephi na kutimu."
- ³⁸Anafundzie achimuamba, "Bwana, lola, huna panga mbiri." Achiaambira, "Zinatosha."
- ³⁹Jesu wauka kuphiya Mwango wa Mizeituni kama kawaidaye, na anafundzie nao achimlunga.

- ⁴⁰Ariphofika hiko, waambira anafundzie, "Voyani Mlungu ili Shetani asedze akakutiyani dambini."
- ⁴¹Phahi Jesu waphiya kanda macheye, hatuwa ya mutu kutsupha dziwe, achichita mavwindi na achivoya Mlungu.
- ⁴²Achiamba, "Baba, nakuvoya ichikala ni kumendzako niusira mateso chigonilenga, lakini isikale vira nimendzavyo mimi, ela vihendeke ulondavyo uwe."
- ⁴³Alafu malaika wa Mlungu wamtsembukira na achimtiya nguvu.
- ⁴⁴Lakini wasikira utsungu sana rohoni na achivoya Mlungu kpwa bidii zaidi. Achituluka jasho, na richitwena photsi dza matone makulu ga mlatso.
- ⁴⁵Ariphomala kuvoya, wang'oka achiuyira anafundzie na achendaakuta arere, akaremwa na sonono.
- ⁴⁶Achiaambira, "Mbona mrere? Lamukani m'voye ili Shetani asedze akakutiyani dambini."
- ⁴⁷Phahi, Jesu ariphokala acheregomba na anafundzie, phakpwedza kundi ra atu chirolongozwa ni Juda, mmwenga wa nyo kumi na airi. Phahi wamsengerera Jesu ili amdonere.
- ⁴⁸Lakini achimuamba, "Juda, mimi, Mutu Yela Mlunguni, unanilavya na atu kpwa kunidonera?"
- ⁴⁹Anafundzie ariphoona gara gedzago, amuamba, "Bwana, huakate na upanga?"
- ⁵⁰Mwanafundzi mmwenga wa Jesu wamkata sikiro ra kulume mtumwa wa Mlavyadzi-sadaka Mkwulu.
- ⁵¹Lakini Jesu achiamba, "Bahi, richani!" Alafu achiguta sikiro ra yuya mutu chekatwa na achimphoza.
- ⁵²Chisha achigomba na akulu a alavyadzi-sadaka, arindzi a Nyumba ya Kuvoya Mlungu, na vilongozi anjina okala akedzambwira, achiamba, "Mkanilunga na panga na marungu avi mkedzagbwira muivi!
- ⁵³Hwakalani hosi chila siku ndani ya Nyumba ya Kuvoya Mlungu. Mbona tamuyanigbwira? Lakini hinyu ndio wakati wenu wa kuhenda mtakago, wakati jiza rinatawala."
- ⁵⁴Phahi amgbwira Jesu, achimphirika kaya kpwa Mlavyadzi-sadaka Mkwulu. Petero achikala anaalunga-lunga kpwa kure.
- ⁵⁵Atu hinyo ariphofika hipho muhalani akuta moho, achisagala kuwooha, alafu Petero achedzasagala phamwenga nao.
- ⁵⁶Msichana mmwenga mhendadzi-kazi wamuona Petero asegere pho mohoni. Achimlolato, chisha achiamba, "Mutu hiyu piya kala a phamwenga na Jesu!"

- ⁵⁷Lakini Petero achirema, achiamba, "Mwenehu mchetu, hata! Simmanyanya hiye."
- ⁵⁸Badaye chidide mutu wanjina wamuona Petero na achimuamba, "Uwe piya u myawao." Lakini Petero achiamba, "Mwenehu, hata, simi."
- ⁵⁹Bada ya kama dzisaa dzimwenga, mutu wanjina wamng'atira dzino Petero, achiamba, "Hakika mutu hiyu kala a phamwenga na Jesu, mana piya ni mwenyezi wa Galilaya!"
- ⁶⁰Lakini Petero achimuamba, "Msena wangu, sikuelewa unaambadze!" Na saa iyo-iyo, wakati Petero bado acheregomba, dzogolo raika.
- ⁶¹Alafu Jesu wagaluka achimlola. Ndipho Petero achitambukira maneno ga Bwana Jesu, ariphoambwa, "Rero usiku, kabla dzogolo taridzangbweika, undanitsamalala mara tahu."
- ⁶²Phahi watuluka kondze, achendarira kpwa sonono.
- ⁶³Atu ambao kala anamrinda Jesu amzemerera na kumpiga.
- ⁶⁴Amfungua chigungu, chisha mmwenga mmwenga achimuamba, "Ichikala u nabii kpweli, huambire achiyekupiga ni ani?"
- ⁶⁵Na achizidi kumlaphiza na matusi manji.
- ⁶⁶Ligundzu kuriphocha, vilongozi a Chiyahudi akusanyika phamwenga, yani akulu a alavyadzi-sadaka na alimu a Shariya. Phahi Jesu waphirikpwa hiko ngambini, nao achimuamba,
- ⁶⁷"Huambire ichikala uwe ndiwe Masihi." Jesu achiaambira, "Hata nchikuambirani ndimi, tamndaniamini,
- ⁶⁸na nchikuuzani swali, piya tamndanijibu.
- ⁶⁹Lakini hangu sambu mimi, Mutu Yela Mlunguni, n'ndasagala mkpwono wa kulume wa Mwenyezi Mlungu, phatu pha ishima kulu sana."⁷⁰Hipho, osi amuuzwa, "Vino we u Mwana wa Mlungu?" Naye achiaambira, "Mwimwi mkagomba kukala mimi ndiye iye."
- ⁷¹Chisha hinyo atu hipho ngambini achiamba, "Hunaendza ushahidi wani zaidi? Mana hukamsikirani sisi enye achigogomba na kauliye!"

Luka 23

- ¹Hipho, atu osi ariokala hipho ngambini aunuka na achimphirika Jesu kpwa Pilato, mkpwulu wa jimbo ra Chirumi.
- ²Achiandza kumshitaki Jesu, achiamba, "Hunaona mutu hiyu anaangamiza atu eh, anaambira atu asiriphe kodi kpwa sirikali ya Kaisari, na piya anadziiha Masihi, yani mfalume."

- ³Phahi, Pilato wamuuzwa Jesu, "We ndiwe Mfalume wa Ayahudi?" Naye achimuamba, "Kama uchivyogomba."
- ⁴Pilato waambira akulu a alavyadzi-sadaka na atu anjina osi okala hipho, "Mutu hiyu simuona kosa rorosi."
- ⁵Lakini hara atu azidi na kuamba, "Mafundzoge gakahenda Yahudi ndzima ihende fujo! Waandza hiko Galilaya na vino akafika hiku."
- ⁶Pilato ariphosikira hivyo, wauza ichikala Jesu wala Galilaya.
- ⁷Phahi, Pilato ariphomanya kala Jesu ala Galilaya, ambako ni kpwa Mfalume Herode, walagiza apherikpwe kpwa Herode, ambaye wakati hinyo piya kala a Jerusalem.
- ⁸Herode phomuona Jesu, wahererwa sana, mana kala akasikira habarize na waaza kumuona siku nyinji. Kala anaaza kumuona Jesu anahenda vilinje.
- ⁹Hipho wamuuzwa maswali manji, lakini Jesu kayamjibu.
- ¹⁰Nao akulu a alavyadzi-sadaka na alimu a Shariya kala aimire kuno akadina kulavya mashitaka gao kuhusu Jesu.
- ¹¹Alafu Herode na asikarie amzarau Jesu na achimnyetera. Achimvwika kandzu maridadi na achimuuyiza kpwa Pilato.
- ¹²Kula siku hiyo, Herode na Pilato akala asena, mana kabla ya hipho kala taaphahana.
- ¹³Phahi, Pilato waiha akulu a alavyadzi-sadaka, vilongozi na atu anjina,
- ¹⁴achiaambira, "Mkamreha kpwangu kpwedzamshitaki kala anaangamiza atu na mafundzoge. Lakini sikizani, nkamuuzwa maswali kuhusu higo mashitaka mbere zenu, na sikaona makosage, kama muambavyo.
- ¹⁵Na hata Herode kamuonere na makosa; ndiyo mana naye wamuuyiza kpwangu. Phahi, ni wazi kahendere rorosi ra kumhenda anyongbwe.
- ¹⁶Kpwa hivyo, n'ndalagiza achapwe viboko, alafu arichirwe."
- [¹⁷Chila wakati wa Sukukuu ya Pasaka Pilato kala inambidi aavugurire busu mwenga.]
- ¹⁸Lakini atu osi achipiga kululu chilimwenga achiamba, "Naaolagbwe hiye! Huvugurire Baraba!"
- ¹⁹(Baraba kala akafungbwa jela kpwa sababu ya kuandza kuhenda fujo na kuolaga atu hiko mudzini.)
- ²⁰Pilato kala anataka kumrichira Jesu, hipho wagomba na hura umati wa atu tsona.
- ²¹Lakini aho achipiga likululu, kuamba, "Naakotwe, naakotwe msalabani!"

- ²²Alafu Pilato wagomba nao mara ya hahu, "Kpwa utu wani? Kpwani wahenda uyi wani yuno hata aolagbwe? Mino siona uyi wowosi wa kumhenda anyongbwe! Kpwa hivyo, n'ndalagiza achapwe viboko na arichirwe."
- ²³Lakini atu azidi kupiga likululu na nguvu kulonda Jesu anyongbwe. Na mwisho likululu rao rashinda.
- ²⁴Phahi, Pilato wakata shauri kuahendera hivyo enye vyolonda.
- ²⁵Waavugurira hiye mutu yefungbwa kpwa kuhenda fujo na kuolaga, na achimlavya Jesu anyongbwe kama enye vyolonda.
- ²⁶Phahi, asikari amhala Jesu kumphirika akanyongbwe. Na mo njirani amgbwira mutu mmwenga yeihwa Simoni, mwenyezi wa mudzi wa Kirene. Mutu hiye kala anainjira mudzi wa Jerusalemu kula vidzidzini. Amuimisa na achimhika msalaba, autsukule nyuma za Jesu.
- ²⁷Umati wa atu wamlunga-lunga Jesu, phamwenga na achetu ambao kala anamririra na kudzipiga-piga vifuwa kpwa utsungu.
- ²⁸Lakini Jesu waagalukira hara achetu na achiaambira, "Ano mayo a Jerusalemu, msiniririre, ela dziririreni enye na ana enu.
- ²⁹Kpwa mana kundakpwedza wakati atu aambe, 'Baha achetu ambao taavyarire!'
- ³⁰Wakati hinyo atu andaiambira myango, 'Hugbwererereni!' Piya andaviambira vidzango, 'Hufwinikeni.'
- ³¹Ichikala atu ananihenda hivi mimi, ambaye sina makosa, dze, andakuhendani viphi, mwino mrio na makosa?"
- ³²Phahi, atu anjina airi ambao kala ni akora, apherikpwa phamwenga na Jesu akanyongbwe.
- ³³Ariphofika phahali phaihwapho "Zekeya ra Chitswa", asikari amkota Jesu misumari msalabani na piya akota misalabani hara akora airi, mmwenga uphandewe wa kulume na wanjina uphande wa kumotso.
- ³⁴Jesu waamba, "Baba Mlungu, asamehe, kpwa mana taamanya ahendaro." Phahi, hara asikari aganya nguwoze kpwa kupiga kura.
- ³⁵Atu aima hipho kumrorera, kuno vilongozi a Chiyahudi anamnyetera, anaamba, "Waokola ayae, phahi naadziokole mwenye ichikala kpweli ndiye Muokoli, Yetsambulwa ni Mlungu!"
- ³⁶Asikari nao achendamchania, amupha uchi wa ngbwadu anwe,
- ³⁷achimuamba, "Ichikala kpweli uwe ndiwe mfalume wa Ayahudi, phahi dzitivye!"
- ³⁸Dzulu ya msalaba kala phakakotwa chibao chikaandikpwa: Hiyu ni Mfalume wa Ayahudi.

- ³⁹Mmwenga wa hara akora okala akakotwa phara msalabani wamlaphiza Jesu, achimuamba, "Samba we ndiwe Muokoli? Phahi, dziokole na uhuokole naswi piya!"
- ⁴⁰Lakini yuya mkora wanjina wamdemurira myawe achimuamba, "We kuogopa hata Mlungu? Hosi hwahukumiwani hukumu mwenga.
- ⁴¹Hukumu yehu ni ya haki mana hunatiywa adabu kpwa sababu ya makosa gehu. Lakini hiyu kahendere kosa rorosi."
- ⁴²Chisha achimuamba, "Jesu, nakuvoya unitambukire wakati ndiphoandza kutawala."
- ⁴³Jesu achimuamba, "Nakuahidi kala vivi rero hundakala hosi Peponi."
- ⁴⁴Kala ni kama saa sita za mutsi, na kpwakala na jiza tsi ndzima hadi saa tisiya.
- ⁴⁵Wakati uhu paziya ya Nyumba ya Kuvoya Mlungu yakpwanyuka manungu mairi.
- ⁴⁶Jesu wakota likululu achiamba, "Baba, roho yangu ninayiika mwako mikononi." Ariphomala kugomba hivyo, achikata roho.
- ⁴⁷Mkpwulu wa hara asikari ariokala hipho phoona hivyo, wamtogola Mlungu na achiamba, "Hakika mutu hiyu kala ni mutu wa haki!"
- ⁴⁸Atu osi ariokpwedza hipho kulola Jesu na hara akora airi anyongbwavyo, ariphoona hivyo, auya kaya kuno anadzipiga-piga vifuwa kpwa utsungu.
- ⁴⁹Lakini asena osi a Jesu, na achetu ambao kala akamlunga-lunga kula Galilaya, aima chikure-kure kurorera mambo higo.
- ⁵⁰⁻⁵¹Phahi, kala kuna mutu mmwenga aihwaye Yusufu, mwenyezi wa mudzi wa Arimathaya, tsi ya Judea. Kala ni mutu mzuri na wa haki na kala anagodzera kpwa hamu kuona wakati Mfalume kula kpwa Mlungu ndiphokpwedza. Yusufu kala ni mngambi, lakini kayakubaliana na ayae kuhusu uamuzi wa kumnyonga Jesu.
- ⁵²Phahi, waphiya kpwa Pilato achendavoya ruhusa ahewe mwiri wa Jesu ili akauzike.
- ⁵³Alafu wakpwendautsereza phara msalabani, achiuwwika shanda na achendautiya mbirani, mbira ambayo kala ikatsimbwa mwambani na kala taidzangbwezikipwa mutu.
- ⁵⁴Siku hiyo kala ni Ijumaa, dzuwa kala ri phephi na kutswa, wakati wa kuandza Siku ya Kuoya.
- ⁵⁵Hara achetu ambao kala akamlunga-lunga Jesu kula Galilaya, aphiya na Yusufu na achiona mbira na vira mwiri wa Jesu uchivyolazwa himo.

⁵⁶Alafu aphiya vyao kaya na achendatayarisha marashi ga kupaka mwiri wa Jesu. Lakini Siku ya Kuoya taayahenda kazi yoyosi, kama Shariya za Musa vyotaka.

Luka 24

¹Siku ya Jumapili ligundzu chiti, hara achetu ahala gara marashi ga kupaka maiti, ambago kala akatengeza, na achiphiya mbirani.

²Ariphofika hipho, akuta dziwe ra kubwiningizira mryango wa mbira rikauswa hipho mryangoni.

³Ainjira ndani, lakini taayaona mwiri wa Bwana Jesu.

⁴Wakati acheretezeka na higo, phatsembuka atu airi gafula okala akavwala nguwo za kung'ala-ng'ala, achiima phephi.

⁵Hara achetu azamisa vitswa photosi kpwa wuoga, lakini hara atu achiaambira, "Kpwa utu wani mnaendza mutu mzima phahali pha atu a kufwa?"

⁶Jesu kapho hipha, akafufuka! Mnatambukira vyokuambirani ariphokala achere Galilaya,

⁷kukala iye, Mutu Yela Mlunguni, n'lazima alaviwe kpwa atu a dambi, anyongbwe na siku ya hahu afufuke."

⁸Ndipho hara achetu achitambukira.

⁹Hara achetu ariphouya kula mbirani, akpwendasemurira mambo higo hara anafundzi kumi na mmwenga na afuasi osi.

¹⁰Achetu hinyo ka ni Maryamu kula Magidala, Joana, Maryamu nine wa Jakobo, na achetu anjina.

¹¹Lakini mitume taayaamini hara achetu kpwa sababu aona maneno gao ni maphuphe.

¹²Lakini Petero wang'oka achizola mairo hadi ko mbirani. Wazama achitsungurira hiko ndani, achiona shanda macheye. Hipho wauya kaya na kuangalala.

¹³Siku hiyo hiyo, afuasi airi a Jesu kala anaphiya mtaa wa Emau, ambao ni mwendo wa kama masaa mairi kula Jerusalemu.

¹⁴Akala anabisha kuhusu mambo gotukiya.

¹⁵Ariphokala anabisha, Jesu mwenye wakpwedza kula nyuma zao na achinyendeka nao.

¹⁶Amuona na matso gao, lakini aangamizwa fwahamu za kumanya kala ni Jesu.

¹⁷Jesu achiauza, "Mnabishani mu njirani?" Hara mabwana airi aima, na sura zao zichionyesa taana raha.

- ¹⁸Mmwenga, ambaye ka aihwa Kileopa, achimuamba, "Naona ni uwe macheyo hiko Jerusalem asiyejanya mambo gohendeka vi dzuzi dzuzi."
- ¹⁹Achiauza, "Mambo gani?" Nao achimuamba, "Ni mambo garigomphaha Jesu wa Nazareti. Iye kala ni nabii, tsona Mlungu na atu osi aona manenoge na mahendoge gana uwezo mkpwulu.
- ²⁰Ela akulu a alavyadzi-sadaka na vilongozi ehu amlavya ili ahukumiwe kunyongbwa, na achinyongbwa, wakotwa misumari dzulu ya msalaba.
- ²¹Kala huna tamaa kukala iye ndiye ndiyeikombola Iziraeli. Zaidi ya higo, rero ni siku ya hahu hangu mambo higa gahendeki.
- ²²Tsona, achetu anjina a kundi rehu akahuteza rero. Akaphiya mbirani ligundzu chiti,
- ²³lakini achiphofika hipho, taauonere mwiri wa Jesu. Achiphouya akahuambira kala akatsembukirwa ni malaika, akaambwa Jesu ni mzima.
- ²⁴Alafu ayawehu anjina akaphiya ko mbirani na achakuta vivyo achivyoambirwa ni nyo achetu, lakini Jesu mwenye taamuonere."
- ²⁵Ndipho Jesu achiaambira, "Mu azuzu mwimwi, mbona mnaona ugumu kuamini maneno garigogombwa ni manabii?"
- ²⁶Mana Masihi kala n'lazima agaye hivyo kpwandza, ndipho aphahe nguma nyinji kula kpwa Mlungu."
- ²⁷Alafu waeleza vinono mambo goandikpwa kumhusu iye, kuandzira vitabu vya Musa hadi goandikpwa ni manabii anjina gosi.
- ²⁸Hara mabwana ariphofika phephi na Emau ambako kala anaphiya, Jesu wahenda avi anatsapa.
- ²⁹Lakini aho am'bembeleza, achimuamba, "Kala phapha na sisi, mana dzuwa rikatswa na jiza rinaanda." Hipho, wakubali kukala nao.
- ³⁰Wakati wa chakurya wasagala kurya nao, achihala bofulo na achishukuru Mlungu, achirimega-mega chisha achiapha.
- ³¹Ndipho nao achivugulwa matso na achimtambukira. Lakini Jesu achiyaya.
- ³²Hara mabwana achiamba, "Kpwa kpweli roho zehu che zina raha kura njirani, achiphokala anahueleza Maandiko ga Mlungu!"
- ³³Auka saa iyo-iyo kuuya Jerusalem. Ariphofika hiko, akuta hara anafundzi kumi na mwenga a Jesu na ayawao anjina akakutana phamwenga.
- ³⁴Hara anafundzi kumi na mwenga achiamba, "Ni kpweli Bwana Jesu akafufuka! Akamtsembukira Simoni Petero."

- ³⁵Alafu nao hara afuasi airi achieleza gachigotukiya hiko njirani, na vira achivyomtambukira Jesu achiphomega-mega bofulo.
- ³⁶Wakati kala acheresemurirana mambo higo, Jesu mwenye watsembuka gafula achiima kahi-kahi ya afuasie na achiamba, "Togolani enehu."
- ³⁷Atishirwa, mana kala anaona akaona jine.
- ³⁸Lakini Jesu achiamba, "Kpwa utu wani mnaogopha? Na ni kpwa utu wani mna shaka mwenu mioyoni?"
- ³⁹Hebu lolani mikono yangu na magulu, muone ichikala simi. Nigutani muone, mana jine tarina mwiri na mifupha dza hivyo nrivyo mimi."
- ⁴⁰Ariphomarigiza mwadzo, achiaonyesa mikonoye na magulu.
- ⁴¹Akala na raha sana ela taayaamini, piya achiangalala. Hipho Jesu achiaambira, "Mna chakurya phano?"
- ⁴²Achimupha chipande cha ng'onda wa kuwada,
- ⁴³na achichirya pho mbere zao.
- ⁴⁴Alafu achiaambira, "Nriphokala nchere namwi kala nchikuambirani kukala, mambo gosi ganikusugo garigoandikpwa Chitabu cha Shariya za Musa, goandikpwa ni manabii na garigo mo ndani ya Chitabu cha Zaburi, n'lazima gatimizwe."
- ⁴⁵Chisha waang'aza matso ili aelewe Maandiko ga Mlungu,
- ⁴⁶achiaambira, "Higa ndigo goandikpwa himo vitabuni kukala Masihi n'lazima ateswe na siku ya hahu afufuke.
- ⁴⁷Kpwa sababu yangu, kuandzira hipha Jerusalemu, atu a makabila gosi duniani andasikira kukala Mlungu anasamehe dambi za osi anaokubali makosa gao na kumuuyira Mlungu.
- ⁴⁸Mwimwi mu mashahidi a mambo higa.
- ⁴⁹Na sikizani, n'ndakureherani Roho wa Mlungu kama Baba arivyolaga. Lakini kalani hipha Jerusalemu mpaka ndiphohewa nguvu kula mlunguni."
- ⁵⁰Alafu Jesu waalongoza njira afuasie kuuka mudzi wa Jerusalemu hadi phephi na Bethania. Ariphofika hipho waunula mikono achiajaliya afuasie.
- ⁵¹Ariphokala anaajaliya, wauswa, achihalwa kuphiya dzulu mlunguni.
- ⁵²Alafu afuasie amuabudu, chisha achiuya Jerusalemu na raha sana.
- ⁵³Phahi, afuasie kala nkuhumira muda munji chila siku kumtogola Mlungu ndani ya Nyumba ya Kuvoya Mlungu.

Johana

Johana 1

- ¹Hipho mwandzo kabla ya dunia kuumbwa kpwakala na Neno. Hiye Neno kala a phamwenga na Mlungu, naye kala ni Mlungu.
- ²Hangu mwandzo, Neno kala a phamwenga na Mlungu.
- ³Viumbe vyosi vyaumbwa ni hiye Neno, wala takuna hata chiumbe chimwenga ambacho chaumbwa bila iye.
- ⁴Hiye Neno ndiye chandzo cha uzima, nao uzima nkureha mwanga kpwa atu.
- ⁵Hinyo mwanga nkung'ala jizani, naro jiza tariuturya bii.
- ⁶Mlungu wahuma mutu mmwenga yeihwa Johana.
- ⁷Mutu hiye wakpwedzaambira atu kuhusu mwanga, ili atu osi asikire hinyo ujumbewe na aamini.
- ⁸Johana kala siye hinyo mwanga, ela wakpwedza kuambira atu kuhusu mwanga hinyo.
- ⁹Hiye mwanga wa kpweli, ang'ariraye chila mmwenga, kala aredza duniani.
- ¹⁰Hiye Neno wakpwedza duniani, lakini atu duniani taayammanya, hata dzagbwe iye ndiye ariyeumba dunia.
- ¹¹Wakpwedza kpwa atue, ela taayamkubali.
- ¹²Lakini osi ariomkubali na kumkuluphira, waapha haki ya kukala ana a Mlungu.
- ¹³Taayakala ana a Mlungu kpwa kumanyana chimwiri, wala kpwa mipango ya mutu, wala kpwa kuvyalwa ni baba wa chibinadamu. Ela Mlungu mwenye ndiye yeahenda akale anae.
- ¹⁴Tsona Neno rakala mutu, na achiishi phamwenga naswi. Naswi hwaona ukuluwe, ukulu wa mwana wa macheye yela kpwa Baba. Maishage gahuonyesa ukulu wa Mlungu, mana kala ni mutu wa mbazi nyinji tsona muaminifu.
- ¹⁵Johana waambira atu habari za mutu hiye, ariphokota likululu, achiamba, "Hiye ndiye yekuambirani, 'Ye edzaye nyuma zangu ni mkpwulu kuriko mimi, mana kala akuko hangu sidzangbwevyalwa.' "
- ¹⁶Kpwa vira ni mutu wa mbazi nyinji, anaenderera kuhuonera mbazi.
- ¹⁷Mlungu walavya Shariya na Musa, ela waonyesa mbazi na kpwele kpwara gara arigohenda Jesu Masihi.

- ¹⁸Takuna mutu yeyesi ariyemuona Mlungu isiphokala mwana wa macheye yela kpwa Mlungu, ambaye iye mwenye ni Mlungu. Naye ana uhusiano wa phephi na Baba, na wahumanyisa Mlungu arivyo.
- ¹⁹Siku mwenga vilongozi a Chiyahudi hiko Jerusalemu ahuma alavyadzi-sadaka na Alawi akamuuze Johana, "Ye edzaye ni ani?"
- ²⁰Johana karemere kulavya ushahidi, lakini wagomba tsona wazi-wazi achiamba, "Mimi simi iye Yetsambulwa ni Mlungu Kuokola Atu."
- ²¹Nao achimuuza, "Vino we u ani? Ukale u Elija?" Johana achiamba, "Hata simi." Chisha achimuuza, "Ukale we u yuya Nabii?" Ela achiamba, "Hata simi."
- ²²Hara ariohumwa amuuza tsona, "Hebu huambire kpwani we u ani, mana n'lazima huphirike majibu kpwa hinyo achiouhuma. Unaambadze kuhusu we mwenye?"
- ²³Achiaambira, "Mimi ni hiye apigaye kululu hiko weruni, kuamba, 'Tayarishani njira ya Bwana na muigolose.' " (Maneno higa gagombwa kare ni nabii Isaya.)
- ²⁴Phahi hara atu ariohumwa kpwa Johana, anjina kala ni Mafarisayo.
- ²⁵Nao achimuuza, "Ichikala siwe Yetsambulwa ni Mlungu, wala Elija, wala siwe hiye Nabii, mbona unabatiza atu?"
- ²⁶Johana achiamba, "Ninabatiza na madzi, lakini kahi-kahi yehu phana mutu ambaye tamummanya.
- ²⁷Iye ndiye ndiyekpwedza bada ya mimi, ambaye mimi sifwaha hata kuvula virahuvye."
- ²⁸Gosi higo gahendeka Bethania, uphande wa mlauro wa dzuwa wa muho wa Joridani, ambako Johana kala anabatiza atu.
- ²⁹Muhondoye Johana waona Jesu anatsoloka, naye Johana achiamba, "Hiyu ndiye Mwana-ng'ondzi wa Mlungu ausaye dambi za atu osi!
- ³⁰Ndiye yekala nchikuambirani, 'Ye edzaye nyuma zangu ni mkpwulu kuriko mimi, mana akuko hangu sidzangbwevyalwa.'
- ³¹Kala simmanya, lakini chonihenda nibatize na madzi ni kuamanyisa Aiziraeli kuhusu hiye mutu."
- ³²Chisha Johana achishudiya achiamba, "Náona Roho wa Mlungu anatsrerera dza njiya kula mlunguni, achendagbwa mwakpwe mwirini achisala phapho.
- ³³Kalapho siyagaona higa, singegamanya. Ela Mlungu ariyenihuma nibatize na madzi wagomba nami achiniamba, 'Uchedzaona Roho wa Mlungu anatsrerera na kusagala dzulu ya ye mutu, manya iye ndiye ndiyebatiza na Roho wa Mlungu.'
- ³⁴Nikaona mwenye mambo higa gachihendeka, nami nashuhudiya kukala yuyu ndiye Mwana wa Mlungu."

- ³⁵Muhondoye tsona Johana kala a phamwenga na anafundzie airi.
- ³⁶Ariphomuona Jesu anatsupa, waamba, "Lolani, yuya ndiye Mwana-ng'ondzi wa Mlungu!"
- ³⁷Hara anafundzi airi ariphosikira maneno higo, amlunga-lunga Jesu.
- ³⁸Phahi Jesu wagaluka achiaona anamlunga-lunga achiauza, "Mnaendzani?" Nao achiamba, "Rabi, usagalaphi?" (Rabi manage ni Mwalimu.)
- ³⁹Achiaambira, "Ndzoni namwi mndaona." Kala ni kama saa nne za ligundzu ariphophiya naye kuona asagalapho na achendamaringiza naye dzuwa phapho.
- ⁴⁰Mmwenga wa hara ariosikira Johana anagomba na kumlunga Jesu, kala ni Anderea. Iye kala ni ndugungbwa wa Simoni Petero.
- ⁴¹Dzambo ra kpwandza Anderea arirohenda ni kumlunga nduguye Simoni na achendamuamba, "Hukamuona Masihi." (Manage ni Yetsambulwa ni Mlungu.)
- ⁴²Alafu Anderea wamreha Simoni kpwa Jesu. Jesu wamlolato Simoni achimuamba, "Uwe u Simoni mwanangbwa wa Johana. Hivi sambu undaihwa Kefa." (Yani Petero).
- ⁴³Siku ya phiri, akata shauri kuphiya Galilaya. Hiko akpwendamuona mutu yehwa Filipu, naye Jesu achimuamba, "Nilunga-lunga."
- ⁴⁴Filipu kala ala Bethisaida, mudzi ambao Anderea na Petero kala ndiko kpwao.
- ⁴⁵Filipu wamuona msenawe Nathanieli achimuamba, "Hukamuona mutu ambaye Musa na manabii aandika habarize. Mutu hiye ni Jesu mwana wa Yusufu, mwenyezi wa mudzi wa Nazareti."
- ⁴⁶Nathanieli achiamba, "Takuna chochosi chinono ambacho chinaweza kula Nazareti." Ndipho Filipu achimuamba, "Ati unaambadze? Huphiye ukadzionere mwenye."
- ⁴⁷Jesu ariphomuona Nathanieli anatsoloka, wagomba kumhusu achiamba, "Ye edzaye ni Muizraeli mwenye mwenye, mana mwakpwe rohoni, kana handzo."
- ⁴⁸Nathanieli achimuza, "Ukanimanyadze?" Achiambwa, "Nkakuona kabla Filipu kadzangbwekukuiha, mana che u kolo ya muhi wiihwao mtini."
- ⁴⁹Ndipho Nathanieli achiamba, "Rabi, uwe u Mwana wa Mlungu! Ndiwe Mfalume wa Izraeli!"
- ⁵⁰Jesu achiamba, "Vino, ukaamini kpwa vira nkakuamba nkakuona che u kolo ya mtini? Hebu n'viphi? Phahi undaona mambo makulu zaidi ya higa."
- ⁵¹Achienjereza kuamba, "Nakuambirani kpweli mndaona mlunguni kuchifwenuka, piya mndaona malaika a Mlungu achikpwera na kutserera kpwa sababu yangu mimi, Mutu Yela Mlunguni."

Johana 2

- ¹Siku ya hahu kpwakala na arusi hiko mudzi wa Kana, jimbo ra Galilaya. Nine wa Jesu kala a phapho.
- ²Jesu naye piya waalikpwa arusi hiyo phamwenga na anafundzie.
- ³Uchi wa zabibu uriphosira hipho harusini, nine wa Jesu wakpwezamuamba, "Uchi wao ukasira."
- ⁴Jesu achimuamba nine, "Phana rangu rani mayo? Wakati wangu taudzangbwe."
- ⁵Nine achiaambira ahendadzi-kazi, "Hendani rorosi ndirokuambirani mhende."
- ⁶Phahi kala phana simikiro sita za mawe ambazo chila mwenga kala inaodzala madzi, madebe mane hadi sita. Zaikpwa kpwa jadi ya Chiyahudi ya kudzitakasa.
- ⁷Jesu waambira hara ahendadzi-kazi, "Odzazani madzi hizi simikiro zosi." Nao achiziodzaza lingo lingo.
- ⁸Chisha achiaambira, "Haya hekani mumphirikire muandazi mkpwulu wa sheree." Nao achiheka achimphirikira,
- ⁹naye muandazi mkpwulu achitsumbula. Mbavi gara madzi kala gakagaluka uchi, phahi wadziuza ulako. Ela ahendadzi-kazi oheka higo madzi kala anamanya ulako. Phahi yuya muandazi mkpwulu wamuiha kanda bwana arusi,
- ¹⁰achendamuamba, "Kawaida mutu nkuandza kulavya uchi mnono hata atu achikolwa, ndipho akalavya uchi mui. Lakini uwe unalavya uchi mnono mwisho mwisho!"
- ¹¹Jesu wahenda chilinje hichi hiko Kana, Jimbo ra Galilaya. Chilinje hichi chakala dalili ya kpwandza kuonyesa kukala uwezowe wala kpwa Mlungu. Kpwa sababu hiyo anafundzie amkuluphira.
- ¹²Badaye Jesu wauka achiphiya Kaperinaumu phamwenga na nine, nduguze a chilume na anafundzie. Hiko akpwendakala siku chache.
- ¹³Sukukuu ya Chiyahudi ya Pasaka iriphofika phephi, Jesu waphiya Jerusalemu.
- ¹⁴Ariphofika hiko, wainjira Nyumba ya Kuvoya Mlungu na achiona atu anaguza ng'ombe, mang'ondzi na njiya. Piya waona atu okala asegere mezani anabadilisha pesa.
- ¹⁵Phahi wasuka chikoto achiatuluzza kondze hara atu phamwenga na ng'ombe na mang'ondzi. Achipendula-pendula meza za ariokala achichenji pesa, na pesa zao zichimwagika.
- ¹⁶Chisha achiagalukira hara aguzao njiya, na achiaambira kpwa usiru, "Tuluzani vitu vyenu! Nyumba ya Baba msiihinde chete!"

- ¹⁷Anafundzie ariphosikira hivyo, atambukira Maandiko gaambago, "Menzwa yangu kuhusu nyumbayo indaniolaga."
- ¹⁸Phahi vilongozi a Chiyahudi amuuza Jesu, "Undahuonyesa chilinje chani hata humane una uwezo wa kuhenda gosi higa uhendago?"
- ¹⁹Achiaambira, "Ivundzeni hino Nyumba ya Kuvoya Mlungu nami n'ndaidzenga tsona kpwa siku tahu."
- ²⁰Nao achimuamba, "Dzengo rohala miaka arubaini na sita kusira, uridzenge kpwa siku tahu? Hiyo taiwezekana bii!"
- ²¹Lakini nyumba ambayo Jesu kala anabisha habarize, kala ni mwiriwe.
- ²²Phahi ariphofufulwa, anafundzie atambukira kukala maneno higa wagagomba. Nao achiamini higo Maandiko na higo ambago Jesu kala akaambira.
- ²³Jesu ariphokala Jerusalemu, wakati wa Sukukuu ya Pasaka, atu anji amkuluphira kpwa sababu aona vilinje arivyohenda.
- ²⁴Lakini Jesu wamanya hinya atu taakuluphirika, mana anamanya achili za anadamu zirivyo.
- ²⁵Kala kana haja ya mutu yeyesi kumuambira vira anadamu arivyo, kpwa sababu ye mwenye anamanya moyo wa chila mutu.

Johana 3

- ¹Kpwakala na chilongozi mmwenga wa Chiyahudi yehwa Nikodemu. Mutu hiyu piya kala ni Mfarisayo.
- ²Siku mwenga waphiya kpwa Jesu usiku achendamuamba, "Rabi, hunamanya kukala uwe u mwalimu yehumwa ni Mlungu. Mana takuna awezaye kuhenda vilinje uhendavyo bila ya Mlungu kukala phamwenga naye."
- ³Jesu achiamba, "Nakuambira kpweli, mutu kaweza kuona mambo ga ufalume ambao Mlungu wanipha asiphovyalwa mara ya phiri."
- ⁴Nikodemu achimuuza, "Lakini mutu anawezadze kuvyalwa ichikala ni mvyere? Mana kpwa kpweli mutu kaweza kuuya ndanini mwa nine mara ya phiri na akavyalwa tsona!"
- ⁵Achiambwa, "Hakika nakuambira kpweli, mutu asiphovyalwa kpwa madzi na Roho wa Mlungu, kaweza kukala mmwenga katika ufalume ambao Mlungu wanipha.
- ⁶Anadamu nkuvyala anadamu ario na uhai, lakini Roho wa Mlungu nkuvyala atu ario na uhai wa chiroho.
- ⁷Kpwa hivyo gasikuangalaze higa nchigokuambira, kukala n'lazima mutu avyalwe mara ya phiri.

- ⁸Roho wa Mlungu ndiye aaphaye atu uhai wa chiroho. Ni dza viratu phuto, mana nkuvuma kuphiya kokosi rilondako. Unarisikira rinavuma, lakini kumanya rilako wala riphiyako.”
- ⁹Nikodemu achiuza, "Mambo gano ganawezekanadze?"
- ¹⁰Jesu achimuamba, "Uwe mwalimu mzima wa Ayahudi uheshimiwaye sana hipha Iziraeli! Inawezekanadze kale kumanya mambo higa?"
- ¹¹Nakuambira kpweli kukala hunagomba mambo humanyago na kuaambira atu hurigoona, lakini bado tamuna mioyo ya kukubali ujumbe wehu.
- ¹²Sambi nakuuza, nkakuambirani mambo ga himu duniani, ela tamniamini, dze, nchikuambirani mambo ga mlunguni vyo kpweli mndaamini?
- ¹³Takuna ariyephiya dzulu mlunguni, ela mimi, Mutu Yela Mlunguni, nátserera kula hiko.
- ¹⁴Dza viratu Musa arivyounula nyoka ya shaba dzulu ya chatsi hiko weruni, vivyo hivyo nami, Mutu Yela Mlunguni, n'lazima niunulwe
- ¹⁵ili chila mutu ndiyenikuluphira aphahe uzima wa milele.”
- ¹⁶Kpwa sababu hiyo Mlungu wamendza atu duniani hata achimlavya mwanawe wa macheye, ili chila mutu amkuluphiraye asiangamike, ela akale na uzima wa milele.
- ¹⁷Mlungu kayamhuma mwanawe ili ahukumu atu himu duniani, lakini wamhuma ili edze kuokola atu.
- ¹⁸Takuna hukumu imgodzayo mutu amkuluphiraye. Ela ahukumiwa kare osi asiomkuluphira, mana taayamkuluphira Mwana wa macheye wa Mlungu.
- ¹⁹Na sababu ya kuhukumiwa kpwao ni kukala, mwanga wakpwedza duniani kula mlunguni, lakini atu amendza jiza zaidi kuriko mwanga, mana mahendo gao ni mai.
- ²⁰Chila mutu ahendaye mai nkuuzira hinyo mwanga. Na kaweza kuusengerera phephi kpwa kuogopha dambize zisedze zikamanywa.
- ²¹Lakini ahendaye ga haki nkpwedza mwangani bila wasi-wasi. Nkpwedza mwangani ili chila mmwenga aone kukala ahendago anawezeshwa ni Mlungu.
- ²²Badaye, Jesu na anafundzie auka Jerusalemu, achendakala seemu zanjina za jimbo ra Judea kpwa muda na achikala anabatiza atu kuko.
- ²³Johana naye kala anabatiza hiko Ainoni phephi na seemu za Salimu, sababu kala kuna madzi manji na atu kala aredza kubatizwa.
- ²⁴(Wakati hinyo Johana kala kadzangbwetiywa jela.)

- ²⁵Siku mwenga anafundzi anjina a Johana na Myahudi mmwenga alumbana kuhusu mila za kutawaza.
- ²⁶Phahi anafundzi a Johana akpwedza achimuamba, "Mwalimu, yuya mutu yekala naye ng'ambo ya Joridani ambaye wamshuhudiya, vivi sambu anabatiza na chila mutu anaphiya kpwakpwe."
- ²⁷Johana achiamba, "Mutu kaweza kuphaha chitu asiphohewa ni Mlungu.
- ²⁸Mwimwi enye mnaweza kushuhudiya kukala náamba, 'Mino simi Yetsambulwa ni Mlungu,' lakini náamba, 'Natangulizwa.'
- ²⁹Bwana arusi ndiye mwenye bibi arusi. Chandama nkuhamirwa kumwona bwana arusi na kukala phephi naye. Iye ndiye bwana arusi, nami ni dza chandamawe na hiyo ndiyo mana nkahamirwa.
- ³⁰N'lazima aphahe nguma zaidi na zaidi, nami nguma yangu izidi kuphunguka.
- ³¹Edzaye kula dzulu ni mkpwulu kuriko osi. Alaye duniani ni wa dunia, naye nkugomba mambo ga chidunia. Lakini edzaye kula mlunguni ni mkpwulu kushinda osi.
- ³²Iye nkugomba arigogaona na kugasikira lakini taphana mutu aphokeraye ujumbewe.
- ³³Ela mutu achikubali ushahidi wa Jesu, anaonyesa kukala Mlungu ni wa kpweli.
- ³⁴Mana iye ambaye Mlungu wamhuma anagomba maneno ga Mlungu. Na n'kuhewa nguvu za Roho ni Mlungu bila chipimo.
- ³⁵Baba nkumendza mwanawe na waika chila chitu chikale tsini ya uwezowe.
- ³⁶Yeyesi akuluphiraye Mwana ana uzima wa milele. Ela asiyemuogopha kandakala na uzima mana Mlungu anaenderera kumreyera."

Johana 4

- ¹⁻³Mafarisayo asikira kukala Jesu anaphaha afuasi anji kuriko Johana na anaabatiza. (Lakini si Jesu ariyekala anabatiza afuasie, ela anafundzie ndio kala anabatiza.) Jesu ariphomanya mambo higa, wauka Judea na achiuya jimbo ra Galilaya.
- ⁴Jesu ariphokala anaphiya, yambidi atsupe na jimbo ra Samariya.
- ⁵Wafika Sukari, mudzi mmwenga wa jimbo ra Samariya, ambao kala uphephi na munda wa Yusufu ariokala akahewa ni ise Jakobo.
- ⁶Phahi hipho kala phana chisima chokala cha Jakobo. Jesu wasagala hipho chisimani mana kala akaremwa na charo. Nayo kala ni kama saa sita za mutsi.

7-8Anafundzie amricha hipho chisimani achiphiya mudzini kpwendagula chakurya. Badaye chidide, phachedza mchetu wa Chisamariya kuheka madzi. Jesu wamuamba yuya mchetu, "Nipha madzi ninwe."

9Yuya mchetu achiamba, "Uwe u Myahudi, nami ni mchetu wa Chisamariya, inakaladze unanivoya madzi ga kunwa?" (Wagomba hivyo mana Ayahudi na Asamariya kala taagbwirana.)

10Jesu achimuamba, "Uwe kumanya zawadi ya Mlungu alavyayo kpwa anadamu wala kumanya akuvoyaye madzi ga kunwa ni ani. Kala unamanya, uwe ungem'voya iye akakupha madzi, naye angekupha madzi garehago uzima."

11Yuya mchetu achiamba, "Bwana kuna mwiyo wa kuhekera madzi na chisima chi ndani. Undagaphadze go madzi garehago uzima?"

12Ama unataka kudzihenda mkpwulu kuriko mkare wehu Jakobo? Iye wahurichira chisima hichi ambacho iye mwenye, anae na mifugoye, osi anwa madzi ga chisima hichi."

13Achiambwa, "Yeyesi ndiyenwa madzi higa nkukala na chiru tsona,

14lakini mutu ndiyenwa madzi ndigomupha mimi, kandahenda chiru milele. Higo madzi ndigomupha gandakala dza pula za muho urehao uzima wa milele."

15Yuya mchetu achiamba, "Bwana nakuvoya, uniphe madzi higo, ili nisikale na chiru tsona ama kpwedza hipha chisimani kuheka madzi."

16Jesu achiamba, "Phiya ukamuihe mlumeo wedze naye."

17Yuya mchetu achimuamba, "Sina mlume." Achiambwa, "Ukagomba kpweli kabisa kukala kuna mlume.

18Mana wahalwa ni alume atsano, na hata iye uriye naye, kayakulóla ela ni msena tu, wala siye mlumeo. Phahi uchivyogomba uwe ni kpweli tse-tse-tse!"

19Yuya mchetu achiamba, "Bwana, naona kukala uwe u nabii.

20Akare ehu aabudu dzulu ya mwango uhu, ela mwimwi Ayahudi mkuamba kukala Jerusalemu ndipho phahali pha atu kuabudu Mlungu."

21Jesu achimuamba, "Mayo! Amini nagokuambira, wakati uredza ambapho tamundamuabudu Baba dzulu ya mwango hinyu wala hiko Jerusalemu.

22Mwimwi Asamariya tamumanya mnayemuabudu, lakini sisi Ayahudi hunamanya humuabuduye, mana wokofu uredza kula kpwa Ayahudi.

23Kuredza wakati, na wakati wenye ni uhu, wa Roho wa Mlungu kulongoza atu amuabudu Baba Mlungu chikpweli-kpweli. Mana hiye Baba anamendza atue amuabudu dza hivi.

24Mlungu ni Roho, na atue achimuabudu n'lazima alongozwe ni Rohowe ili amuabudu chikpweli-kpweli."

- ²⁵Yuya mchetu achiamba, "Namanya kukala kuredza Masihi. Ndiphofika andahueleza mambo gosi." ("Masihi" manage ni Yetsambulwa ni Mlungu.)
- ²⁶Jesu achimuamba, "Mimi nigombaye, ndiye."
- ²⁷Saa iyo-iyona anafundzie achiuya. Ariphouya, achitezeka kumuona Jesu anabisha na mchetu. Lakini taphana yemuza yuya mchetu, "Unatakani?" Wala taphana ariyemuza Jesu, "Kpwa utu wani unabisha naye?"
- ²⁸Phahi yuya mchetu waricha nyunguye ya madzi na achiphiya hiko mudzini, achendaambira atu,
- ²⁹"Ndzoni muone mutu achiyenambira chila chitu n'richohenda. Kale mutu yuno ndiye Yetsambulwa ni Mlungu?"
- ³⁰Atu akpwedza kula hiko mudzini kulola Jesu.
- ³¹Wakati atu kala aredza kulola Jesu, anafundzie kala anamchenga-chenga kumuamba, "Mwalimu rya chakurya."
- ³²Lakini achiaambira, "Nina chakurya ambacho tamchimanya."
- ³³Hara anafundzie achiuzana, "Kale kuna mutu achiyemrehera chakurya?"
- ³⁴Ndipho achiaeleza achiamba, "Chakurya changu ni kuhenda gara ambago nalagizwa ni iye ariyenihuma, na kumala kaziye.
- ³⁵Mwimwi mkuamba, 'Sere miezi mine tu atu avune.' Lakini nakuambirani, kalani matso muone minda! Lolani, mavuno ga tayari kuvunwa.
- ³⁶Avunadzi anahewa mshahara kpwa kazi ahendayo. Na mavuno avunago ni atu ambao andaphaha uzima wa milele. Kpwa hivyo aphantaye na avunaye osi andahererwa.
- ³⁷Mnamanya msemu uambao, 'Mmwenga nkuphanda na wanjina akavuna.' Nayo ni kpweli!
- ³⁸Kpwa hivyo nákuhumani mkavune minda ambayo tamuiphandire mwimwi. Mana ariohenda kazi kpwa bidii ni anjina, namwi mnavuna jasho rao."
- ³⁹Asamariya anji kula mudzi hinyo amkuluphira Jesu kpwa sababu ya maneno arigogomba yuya mchetu. Mana kala akaambira, "Mutu hiyu akaniambira gosi nrigohenda."
- ⁴⁰Phahi hinyo Asamariya ariphokpwedza kpwa Jesu, am'bembeleza akale nao. Hipo wasagala nao siku mbiri,
- ⁴¹na manenoge arigogomba gahenda atu anji sana amkuluphire.
- ⁴²Hara atu achimuamba yuya mchetu, "Hipha sambu hukaamini kpwa sababu hukamsikira enye na masikiro gehu, wala si kpwa sababu ya maneno

uchigohuambira. Kpwa hivyo hunamanya kpwa kpweli, yuyu ndiye ndiyetivya atu duniani.”

⁴³Zira siku mbiri ambazo Jesu wakubali kusagala Samariya phosira, wauka achiphiya Galilaya.

⁴⁴Mana Jesu mwenye kala akaamba, "Nabii katogolwa kpwao.”

⁴⁵Atu a Galilaya kala akaphiya kuko Jerusalemu wakati wa Sukukuu ya Pasaka, nao kala akaona chila chitu ambacho Jesu kala akahenda hiko. Kpwa sababu ya higo, Jesu ariphofika Galilaya, atu amkaribisha vinono.

⁴⁶Phahi Jesu ariphokala Galilaya, wauya mudzi wa Kana ambako kala akagaluzza madzi kukala uchi. Kpwakala na mkpwulu wa jeshi ambaye kala ana mwana mkpwongo sana mudzi wa Kaperinaumu.

⁴⁷Hiye mkpwulu wa jeshi ariphosikira kukala Jesu akedza Galilaya kula Judea, wamlunga kuko Kana. Ariphofika, wam'voya sana aphiye naye Kaperinaumu, ili akamphozere mwanawe ambaye kala kamanyikana kutiya.

⁴⁸Jesu achimuamba, "Tamundaamini hadi muone vilinje na mambo ga kpwangalaza!”

⁴⁹Lakini yuya mkpwulu wa jeshi achimuamba, "Bwana, huphiye phamwenga kabla mwanangu kadzangbwefwa.”

⁵⁰Achiambwa, "Phiya kaya; mwanao akaphola." Naye achiamini maneno ga Jesu, achigbwira njira.

⁵¹Muhondoye, ariphokala achere njirani anauya kaya, wakutana na atumishie, achimuamba kukala mwanawe waphola.

⁵²Phahi wauza, "Waandza kuphola saa ngaphi?" Nao achimuamba, "Dzana saa sabaa za mutsi ndipho homa ramrichira.”

⁵³Ise wa yuya mwanache watambukira kukala uho ndio wakati ambao Jesu waamba, "Mwanao akaphola." Kpwa hivyo iye na atue osi pho phakpwe kaya amkuluphira Jesu.

⁵⁴Chilinje hichi chakala dalili ya phiri, ambayo Jesu waihenda hiko Galilaya bada ya kuuya kula Judea.

Johana 5

¹Badaye Jesu wauya Jerusalemu kusherekea Sukukuu muhimu ya Chiyahudi.

²Hiko Jerusalemu, phephi na ryango roihwa Ryango ra Mang'ondzi, kala phana dimbwi ra madzi ambaro Chiebrania ka richiihwa Betizatha. Hiro dimbwi razungulukpwa ni mabanda matsano.

- ³Himo mabandani kala muna kundi kulu ra akongo ambao kala akadziambalaza. Kala phana vipofu, viswere, na ariopooza. [Akongo kala achigodza madzi gatebulwe.
- ⁴Kpwa mana chila bada ya muda fulani malaika wa Mlungu kala achitserera mura madzini na akagatebula. Mkpwongo wa kpwandza yetserera mura madzini bada ya madzi kutetulwa kala achiphola.]
- ⁵Phahi kala phana mutu mmwenga yekala mkpwongo miaka salasini na minane.
- ⁶Jesu ariphomuona akadziambalaza hipho na kumanya kukala ukongowe ni wa masiku, wamuza, "Unataka kuphola?"
- ⁷Yuya mkpwongo achiamba, "Bwana, sina mutu wa kuniterya kunitiya himu dimbwini, madzi gachitebulwa. Mana nchitaka kuinjira, mutu wanjina ananitanguliya."
- ⁸Phahi Jesu wamuamba, "Unuka! Hala tandikoro uphiye vyako."
- ⁹Saa iyo-iyoyuya mkpwongo waphola. Achiunuka, achihala tandikore, na achiandza kunyendeka. Mambo higa gahendwa Siku ya Kuoya,
- ¹⁰kpwa hivyo vilongozi a Chiyahudi amuamba yuya mutu achiyephozwa, "Chishariya rero ni Siku ya Kuoya na tairuhusiwa kutsukula mzigo."
- ¹¹Lakini ye achiamba, "Iye mutu achiyeniphosha akaniamba nihale tandiko ranguni niphaye vyangu."
- ¹²Nao achimuza, "Ye chekuamba uhale tandikoro uphiye vyako ni ani?"
- ¹³Ela yuya mutu yekala akaphozwa, kamanyire achiyemphosha. Mana Jesu kala akayaya mo ndani ndani za atu, kpwa vira kala phana atu anji sana.
- ¹⁴Badaye Jesu wamuona yuya mutu ndani ya Nyumba ya Kuvoya Mlungu achimuamba, "Unaona, sambini umzima, phahi usihende dambi tsona, usedze ukaphaha mashaka makulu zaidi."
- ¹⁵Yuya mutu waphiya vyakpwe achendaambira vilongozi a Chiyahudi kukala Jesu ndiye yemphosha.
- ¹⁶Phahi, kpwa vira Jesu ka achihenda mambo higa Siku ya Kuoya, vilongozi a Chiyahudi amtesa.
- ¹⁷Jesu achiaambira, "Baba anahenda kazi wakati wosi, na ndiyo mana nami n'lazima nihende kazi."
- ¹⁸Ariphogomba hivyo, kayavundza shariya ya Siku ya Kuoya bahi, ela piya wadzihenda sawa na Mlungu kpwa kuamba Mlungu ni ise. Hicho ndicho chokala chizigbwa cha vilongozi a Chiyahudi azidi kutaka kumuolaga.
- ¹⁹Jesu achienderera kugomba, achiamba, "Nakuambirani kpweli, mimi Mwana siweza kuhenda rorosi mi mwenye kare. Mambo ambago nkumuona Baba

anahenda, ndigo nihendago bahi. Mana higo gahendwago ni Baba, nami Mwana ndigo nihendago.

²⁰Kpwa vira Baba ananimendza mi Mwanawe, nkunionyesa chila chitu ambacho ye mwenye nkuhenda. Na andanionyesa mambo makulu zaidi kuhenda kuriko higa mchigogaona, namwi mndaangalazwa sana.

²¹Viratu Baba afufulavyo atu ariofwa na kuapha uzima, ndivyo nrivyo hata mimi Mwana, nkuapha uzima atu nrioatsambula.

²²Baba mwenye kahukumu mutu yeyesi, lakini uwezowe wosi wa kuhukumu wanirichira mi Mwanawe,

²³ili atu osi aniishimu, dza viratu amuishimavyo Baba. Mutu yeyesi asiyemuishimu Mwana, piya kamuishimu Baba ambaye wanihuma.

²⁴Nakuambirani kpweli, mutu asikiraye maneno gangu na kumuamini ye ariyenihuma, ana uzima wa milele. Kandahukumiwa, ela wavuka kufwewako achiinjira uzimani.

²⁵Nakuambirani kpweli kuredza wakati, na wakati wenye ni uhu, ambapho ariofwa chiroho andasikira sauti ya Mwana wa Mlungu, na hinyo ndiosikira, andaishi.

²⁶Vyo ambavyo Baba ndiye chandzo cha uzima, phahi wamjaliya Mwanawe naye akale chandzo cha uzima.

²⁷Tsona wamupha uwezo wa kuhukumu kpwa sababu iye ni Mutu Yela Mlunguni.

²⁸Msitezeke na higa mana wakati uredza ambapho osi ario mbirani andasikira sautiye,

²⁹nao andatuluka. Hara ariohenda manono andafufulwa na aishi milele. Ela ariohenda mai andafufulwa, chisha ahukumwiwe na kutiywa adabu.

³⁰Siweza kuhenda chochosi mimi mwenye machiyangu. Nahukumu niambiwapho ni Mlungu. Kpwa hivyo hukumu yangu ni ya haki kpwa sababu sihenda nilondavyo, ela nahenda alondavyo iye ariyenihuma.”

³¹Jesu waenderera kugomba achiamba, "Ichikala n'ndadzishuhudiya mi mwenye tu, phahi ushahidi wangu taundakala na mana.

³²Lakini kuna wanjina ambaye ananishuhudiya, na namanya higo agombago kunihusu ni kpweli.

³³Mwimwi mwalavya ahumwa kpwa Johana, naye piya achiashuhudiya ukpweli kunihusu.

³⁴Kugomba hivi sio kala nina haja na mwanadamu akale shahidi, ela nakuambirani ili muamini na muokolwe.

- ³⁵Johana kala ni dza taa ing'alayo, namwi mwahererwa kpwa muda, kpwa sababu ya hinyo mwangawe.
- ³⁶Lakini ushahidi n'rio nao ni mkpwulu kuriko wa Johana. Chila nihendacho, náhewa ni Baba nchikamilishe. Higa nihendago ganagomba badala ya mimi na ganaonyesa kukala Baba ndiye ariyenihuma.
- ³⁷Naye Baba ariyenihuma washuhudiya mwenye kunihusu. Tamdzangbwesikira sautiye wala kumuona uso kpwa uso,
- ³⁸wala tamlunga manenoge, kpwa sababu tamnikuluphira mimi ariyenihuma.
- ³⁹Mnadzifundza sana Maandiko kpwa sababu mnaona ndigo ndigokuphani uzima wa milele. Lakini Maandiko genye gananishuhudiya mimi!
- ⁴⁰Ela mbona mnarema kpwedza kpwangu kuphaha uzima wa milele?"
- ⁴¹Phahi Jesu wazidi kugomba na hara atu, achiamba, "Mino silonda nguma kula kpwa anadamu.
- ⁴²Lakini nakumanyani mrivyo, na namanya kukala tamummendza Mlungu mioyo kutsuka.
- ⁴³Nákpwedzamuwakilisha Baba, ela mwimwi mchinikahala. Lakini mutu wanjina achidzihuma mwenye, mndamkaribisha.
- ⁴⁴Mnamendza kutogolwa ni ayawenu, ela tamlonda kuphaha nguma kula kpwa Mlungu mwenye. Vyo kpweli mndaweza kunikuluphira mino?
- ⁴⁵Msione kukala n'ndaima mbere za Baba nikushitakini. Ye Musa yemkuluphira akuteryeni, ndiye ndekushitakini.
- ⁴⁶Kalapho mwamuamini Musa, hata mimi piya mngeniamini, kpwa sababu Musa waandika kunihusu.
- ⁴⁷Lakini ichikala tamuamini Maandiko ga Musa, gano n'gombago mndagaaminidze?"

Johana 6

- ¹Badaye Jesu na anafundzie avuka ziya ra Galilaya, ambaro piya riihwa Tiberia.
- ²Kundi kulu ra atu ramlunga-lunga, kpwa sababu kala akaona vilinje arivyohenda kpwa kuphoza akongo.
- ³Phahi Jesu waphiya gambani achendasagala na anafundzie.
- ⁴Wakati na hinyo Sukukuu ya Pasaka kala i phephi.
- ⁵Jesu ariphokala hiko gambani, watsupha matso achiona likumundi ra atu rinamlunga. Achimuza Filipu, "Hunaweza kugulaphi chakurya cha kurisa atu osi hinya?"

- ⁶Wamuuza Filipu kumpima tu, ela ye mwenye kala anamanya ndirohenda.
- ⁷Filipu achimuamba, "Hata maripho ga siku mwenga ga vibaruwa magana mairi tagatosha kuhenda chila mmwenga hipha ang'ate chitu."
- ⁸Phahi Anderea, mwanafundzi wa Jesu, na ambaye ka ni ndugungbwa wa Simoni Petero, waamba,
- ⁹"Phana barobaro ambaye ana mabofulo matsano ga shayiri, na ng'onda airi. Lakini kpwa kpweli tagatosha atu osi hinya."
- ¹⁰Jesu achiamba, "Aambireni atu asagale." Phatu hipho kala phana seemu kulu ya nyasi, nao achisagala pho nyasini. Alume machiyao ariosagala kurya kala ni kama elufu tsano.
- ¹¹Phahi Jesu wahala gara mabofulo na hara ng'onda na achimshukuru Mlungu. Ariphomala achiapha anafundzie aaganyire hara atu, nao osi arya kumvuna.
- ¹²Hinyo atu ariphokala akarya na kumvuna, Jesu waambira anafundzie, "Tsolani-tsolani masaza gosi, ili husibanange chakurya."
- ¹³Phahi anafundzie atsola-tsola na achiodzaza kaphu kumi na mbiri za masaza kula kpwa gara mabofulo matsano ga shayiri gosazwa ni hara ariorya.
- ¹⁴Atu ariphoona chilinje ambacho Jesu akachihenda, abisha o enye achiamba, "Kpwa kpweli hiyu ndiye nabii ambaye kala ni edze himu duniani!"
- ¹⁵Jesu ariphomanya hara atu anataka kumgbwira amhende mfalume wao turi-turi, wauka tsona achisengera mbere ko gambani achendasagala macheye.
- ¹⁶Dziloni anafundzi a Jesu atserera mpaka ziyani.
- ¹⁷Ariphofika hiko, apanda dau achiandza charo cha kuvuka ziya kuphiya Kaperinaumu. Phahi giza kala rikahanda na Jesu kadzangbwepwedza kula gambani.
- ¹⁸Hiko ziyani kpwazuka phuto kali hata kuchikala na maimbi makulu.
- ¹⁹⁻²⁰Hinyo anafundzi ariphokala akauka mwendo wa kama kilomita tsano ama sita, amuona mutu ananyendeka dzulu ya madzi. Hiye mutu kala aredza ko dauni, kpwa hivyo hara atu atishirwa sana. Lakini yuya mutu kumbavi kala ni Jesu, naye achiaambira, "Ni mimi, msitishirwe!"
- ²¹Phahi anafundzie akala razi kumphokera mo dauni, na saa iyo-iyo achifika kura aphiyako.
- ²²⁻²³Muhondoye, hiro likumundi ra atu rorya mabofulo bada ya Bwana Jesu kumshukuru Mlungu, kala richere phapho ng'ambo ya ziya kumgodzera. Mana ratambukira kukala dzana Jesu na anafundzie kala akedza na dau mwenga bahi, na badaye hara anafundzi achiuka na dau machiyao. Jesu kayainjira dauni

phamwenga nao. Lakini madau ganjina kula Tiberia kala gakatiya nanga phephi na phapho.

²⁴Phahi hara atu ariphomanya kala Jesu na anafundzie taapho, nao ainjira madauni achipiya Kaperinaumu kpwendamuzenda.

²⁵Hara atu ariphomuona Jesu ng'ambo ya ziya, amuamba, "Mwalimu, wakpwezda rini phano?"

²⁶Jesu achiaambira, "Nakuambirani kpweli, mnanienda kpwa sababu mwarya mabofulo mchimvuna wala si kpwa sababu ya vilinje nrivyohenda.

²⁷Msidziyuge kuenda chakurya chibanangikacho. Lakini endzani chakurya chirehacho uzima ambacho mimi, Mutu Yela Mlunguni, n'ndakuphani. Mana Baba Mlungu wanipha uwezo wa kulavya chakurya sichobanangika."

²⁸Ndipho hara atu achimuza, "Sambi, huhendedze ili hutimize gara ambago Mlungu analonda?"

²⁹Achiambwa, "Mlungu analonda mumuamini hiye ariyemuhuma."

³⁰Phahi amuamba, "Sino hunataka kuona chilinje, sambi we, undauhendera chilinje chani hata hukuamini?"

³¹Akare ehu arya chakurya choihwa mana hiko weruni, kama Maandiko gagombavyo, 'Waapha mikaha kula mlunguni achirya.' "

³²Phahi achiaambira, "Nakuambirani kpweli, Musa siye yekuphani chakurya kula mlunguni, ela ni Baba ndiye alavyaye chakurya cha kpweli kula mlunguni.

³³Kpwa sababu chakurya hicho chitsereracho kula mlunguni nkuapha atu uzima himu duniani."

³⁴Nao achiamba, "Bwana, huphe hicho chakurya chila wakati."

³⁵Phahi Jesu wagomba wazi-wazi achiamba, "Mimi ndimi hicho chakurya chirehacho uzima. Yeyesi edzaye kpwangu kandasikira ndzala tsona tse! Na ndiyenikuluphira, hakika kandasikira chiru bii!

³⁶Ela kama nchivyokuambirani, mkaniona wala tamndanikuluphira.

³⁷Lakini phahi, osi ambao Baba andanipha andakpwezda kpwangu, na yeyesi ndiyekpwezda kpwangu, sindamricha bii.

³⁸Kpwa sababu siyakpwezda kula mlunguni kuhenda nilondago, ela nákpwezda ili nihende gara nrigolagizwa ni iye ariyenihuma.

³⁹Na iye ariyenihuma alondago ni kukala, osi arionipha nisiyaze hata mmwenga, ela siku ya mwisho edze niafufule osi.

⁴⁰Baba analonda yeyesi ndiyemuona mwana na kumkuluphira akale na uzima wa milele. Nami n'ndamfufula siku ya mwisho."

- ⁴¹Ndipho hara atu achiandza kunung'unika, sababu Jesu kala akaamba, "Mimi ndimi hicho chakurya chotserera kula mlunguni."
- ⁴²Nao achiamba, "Samba yuno ni Jesu mwana wa Yusufu? Ise na nine ni atu huamanyao sana! Kpwadze anaamba wala mlunguni?"
- ⁴³Lakini Jesu achiamba, "Richani kunung'unika kpwa higa nchigogomba.
- ⁴⁴Takuna mutu awezaye kpwedza kpwangu isiphokala Baba ariyenihuma amrehe, nami n'ndamfufula siku ya mwisho.
- ⁴⁵Nabii mmwenga waandika achiamba, 'Chila mutu andafundzwa ni Mlungu.' Yeyesi asikizaye na kudzifundza kula kpwa Baba, nkpwedza kpwangu.
- ⁴⁶Takuna ariyemuona Baba isiphokala mimi yela kpwakpwe.
- ⁴⁷Nakuambirani kpweli, ndiyenikuluphira ana uzima wa milele.
- ⁴⁸Mimi ndimi hicho chakurya chirehacho uzima.
- ⁴⁹Akare enu ary a chakurya choihwa mana hiko weruni, na achifwa.
- ⁵⁰Lakini chakurya hicho chatserera kula mlunguni ili mutu achichirya asifwe.
- ⁵¹Mimi ndimi chakurya chotserera kula mlunguni, chinachoapha atu uzima. Uchirya chakurya hicho undaishi milele. Chakurya hicho ni mwiri wangu, ulaviwao ili atu himu duniani akale na uzima."
- ⁵²Atu ariphosikira gara gogombwa ni Jesu, alumbana enye kpwa enye achiamba, "Inawezekanadze mutu hiyu ahuphe mwiriwe hurye?"
- ⁵³Phahi Jesu wagomba nao achiamba, "Nakuambirani kpweli, msiphorya mwiri wa Mutu Yela Mlunguni na kunwa mlatsowe, tamuna uzima wa milele.
- ⁵⁴Yeyesi ndiyerya mwiri wangu na kunwa mlato wangu ana uzima wa milele, nami n'ndamfufula siku ya mwisho.
- ⁵⁵Kpwa sababu mwiri wangu ndio chakurya cha kpweli na mlato wangu unaua chiru kpwa kpweli.
- ⁵⁶Aryaye mwiri na kunwa mlato wangu andakala nami, nami n'ndakala naye.
- ⁵⁷Kpwa vira Baba aishiye wanihuma, naye ndiye anihendaye niishi, phahi yeyesi ndiyenirya nami piya n'ndamhenda aishi.
- ⁵⁸Phahi hichi ndicho chakurya chotserera kula mlunguni. Sicho dza chira chakurya chorya akare enu. Mana bada ya kurya afwa, ela osi ndiorya chakurya hichi andaishi milele."
- ⁵⁹Jesu wagomba higa gosi phokala anafundza sinagogini hiko Kaperinaumu.
- ⁶⁰Afuasi anji a Jesu ariphomsikira anagomba hivyo, aamba, "Higa ni mafundzo mafu sana. Ni ani ndiyegakubali?"

- ⁶¹Lakini Jesu wamanya bila ya kuambirwa ni mutu kukala afuasie ananung'unika kuhusu dzambo hiro, naye achiauza, "Kpwani dzambo rino rinakutsukizani?"
- ⁶²Indakaladze ndiphoniona mimi, Mutu Yela Mlunguni, ninauya hiko dzulu kokala mwandzo?
- ⁶³Roho wa Mlungu ndiye alavyaye uzima. Mwanadamu kana rorosi awezaro. Maneno higa nchigokuambirani ni ga Roho wa Mlungu, nago ganalavya uzima.
- ⁶⁴Lakini anjina tamnikuluphira." Jesu waamba hivyo mana wamanya kula mwandzo ni ano ani asiomkuluphira, na hiye ndiyemsalata.
- ⁶⁵Naye achienjereza kuamba, "Hino ndiyo sababu hata nkakuambirani kukala takuna mutu ndiyeweza kpwedza kpwangu isiphokala Baba amuwezeshe."
- ⁶⁶Kufikira hipho, afuasie anji aricha kumlunga-lunga.
- ⁶⁷Phahi Jesu wagalukira hara anafundzi kumi na airi, achiauza, "Hata mwimwi piya mnataka mnichimbire?"
- ⁶⁸Ela Simoni Petero achiamba, "Bwana, huphiye kpwa ani? Uwe ndiwe uriye na maneno ga kuapha atu uzima wa milele.
- ⁶⁹Naswi hunaamini na kumanya kukala uwe ndiwe Mutu wa haki yela kpwa Mlungu."
- ⁷⁰Ndipho Jesu achiamba, "Samba mino nákutsambulani mwimwi kumi na airi? Lakini mmwenga wenu ni wa Shetani!"
- ⁷¹Wagomba higo kumuhusu Juda mwana wa Simoni Iskarioti. Hiyu piya kala ni mwanafundzi wa Jesu lakini kala mwishowe andamsalata.

Johana 7

- ¹Badaye Jesu wakpwendazunguluka Jimbo ra Galilaya. Kayataka kuphiya Jimbo ra Judea, mana vilongozi a Chiyahudi kala analonda amuolage.
- ²Ela Sukukuu ya Vibanda, sheree muhimu ya Ayahudi, iriphokala ikafika phephi,
- ³nduguze amuamba, "Baha uuke hipha uphiye Judea, ili afuasio aone vilinje uhendavyo.
- ⁴Takuna mutu amendzaye kumanyikana na atu, na akadzifwitsa. Ichikala kpweli unaweza kuhenda mambo ga kpwaangalaza, gahende ching'ang'a ili atu amanye u ani."
- ⁵Nduguze Jesu agomba higa, mana hata aho kala taamuamini.
- ⁶Jesu achigomba nao achiamba, "Wakati wangu taudzangbwefika, lakini mwimwi mnaaweza kuphiya hiko wakati wowosi.
- ⁷Atu a dunia taana sababu ya kukureyerani mwimwi, lakini mimi ananireyera kpwa vira naambira wazi kukala mahendo gao ni mai.

- ⁸Kpwa hivyo mwimwi phiyani hiko shereeni, lakini mimi sindaphiya sambu mana wakati wangu taudzangbwefika.”
- ⁹Bada ya kugomba higo wasala hiko Galilaya.
- ¹⁰Lakini bada ya nduguze kuuka kuphiya kuko shereeni, Jesu naye waphiya lakini kudziya-ya.
- ¹¹Hiko shereeni, vilongozi a Chiyahudi azunguluka kumuendza Jesu kuno anauza, "Yu phaphi yuno mutu?"
- ¹²Phahi phakala na pokopoko nyinji kumuhusu Jesu hipho kundini. Anjina achiamba, "Iye ni mutu mnono," na anjina achirema achiamba, "Hata anachenga ayae.”
- ¹³Lakini taphana mutu yegomba wazi-wazi kpwa kuogopa vilongozi a Chiyahudi.
- ¹⁴Sheree iriphokala ikafika kahi-kahi, Jesu wainjira Nyumba ya Kuvoya Mlungu achiandza kufundza.
- ¹⁵Vilongozi a Chiyahudi aangalala nao achiuzana achiamba, "Inakaladze mutu hiyu anamanya sana mambo gano bila ya kusomera walimu?"
- ¹⁶Jesu achiaamba, "Higa mafundzo si gangu, ela ni ga iye ariyenihuma.
- ¹⁷Mutu achitsambula kuhenda amenzago Mlungu, iye andamanya ichikala mafundzo higa gala kpwa Mlungu ama nagomba gangu.
- ¹⁸Ye agombaye gakupwe nkuziendzera nguma mwenye, ela hiye amuendzeraye nguma ariyemuhuma ni mkpweli, wala kana handzo bii.
- ¹⁹Musa wakuphani Shariya, ela taphana hata mmwenga azilungaye. Na ichikala mnazilunga, mbona mnalonda kuniolaga?"
- ²⁰Atu achimuamba, "Una pepo nini? Ni ani alondaye kukuolaga?"
- ²¹Jesu achiaamba, "Mino nriphohenda chiline chimwenga cha kuphoza mutu Siku ya Kuoya, chakpwangalazani na chichikutsukizani mosi.
- ²²Musa walagiza muatiye tsatsani ana enu a chilume. Lakini siye wa kpwandza kugomba kuhusu tsatsa, ela akare enu ndio arioandza mambo higa. Namwi mkuatiya tsatsani ana enu hata Siku ya Kuoya.
- ²³Mwimwi mkumtiya tsatsani mwanache hata dzagbwe ni Siku ya Kuoya, ili Shariya za Musa zisivundzwe. Phahi, mbona mnanireyera kpwa kuphoza mutu akale mzima Siku ya Kuoya?
- ²⁴Richani kulola mambo dzulu-dzulu na kulavya hukumu, lakini hukumuni na haki kulengana na vira mambo garivyo.”

- ²⁵Atu anjina a Jerusalemu agomba achiamba, "Dze! Mutu yuno siye aendzwaye aolagbwe ni vilongozi ehu?"
- ²⁶Hiyu anafundza wazi-wazi na taphana hata chilongozi mmwenga agombaye chochosi kumhusu. Nyo vilongozi akale taamanya kukala hiyu ndiye Yetsambulwa ni Mlungu Kuokola Atu?
- ²⁷Ela hino taiwezekana, mana sino hunamanya mutu hiyu alako. Wakati Yetsambulwa ni Mlungu ndiphokpwedza takuna mutu ndiyemanya alako."
- ²⁸Phahi Jesu ariphokala acherefundza himo Nyumba ya Kuvoya Mlungu, wagomba achiamba, "Mnanimanya na hata kura nilako. Mimi sedzere kpwa uwezo wangu! Ela iye yenihuma ni wa kpweli, namwi tamumanya.
- ²⁹Mino nammanya kpwa sababu nala kpwakpwe, naye ndiye yenihuma kpwenu."
- ³⁰Phahi Ayahudi anjina ariokala himo Nyumba ya Kuvoya Mlungu ajeza kumbwira, lakini taphana mutu yemguta, mana wakatiwe kala taudzangbwefika.
- ³¹Ela atu anji pho kundini amuamini. Achiamba, "Wakati yuya Yetsambulwa ni Mlungu ndiphokpwedza, andahenda vilinje vinji kuriko hiyu?"
- ³²Mafarisayo asikira hira pokopoko ya rira kundi kuhusu Jesu. Nao Mafarisayo na akulu a alavyadzi-sadaka ahuma arindzi a Nyumba ya Kuvoya Mlungu akamgbwire.
- ³³Lakini Jesu achiaambira, "N'ndakala namwi muda mchache na badaye n'ndauya kpwa iye ariyenihuma.
- ³⁴Chisha mndaniendza lakini tamundaniona, na phatu ndiphokala tamundaweza kuphafika."
- ³⁵Phahi hinyo akulu a Chiyahudi ariphosikira hivi, aandza kuuzana achiamba, "Mutu yuno anataka aphiye kuphi ambako sino tahundaweza kumuona? Akale andaphiya midzi ambako atu ehu atsamukana, ili akafundze atu asio kala Ayahudi?"
- ³⁶Mutu yuno anahuambirani, anaphoamba hundamuendza lakini tahundamuona, na phahali ndiphokala sino tahundaweza kuphafika?"
- ³⁷Siku ya mwisho ya Sukukuu ya Vibanda, ambayo ni muhimu sana, Jesu waima na achikota likululu achiamba, "Mutu yeyesi ariye na chiru naedze kpwangu edze anwe madzi.
- ³⁸Mutu yeyesi anikuluphiraye, vidzoho vya madzi ga uzima vindajera mwakpwe ndani, kama Maandiko gagombavyo."
- ³⁹Ariphogomba higa kala anagomba kuhusu Roho wa Mlungu, ambaye hara ambao ka andamkuluphira andamhewa. Nao kala taadzangbwehewa hiyu Roho, mana Jesu kala kadzangbwehalwa kuphiya mlunguni.

- ⁴⁰Atu ariphosikira maneno garigogombwa ni Jesu, anjina agomba achiamba, "Kpwa kpweli hiyu ndiye yuya nabii kala hunamgodzera."
- ⁴¹Anjina achiamba, "Iye n'lazima akale ndiye Yetsambulwa ni Mlungu Kuokola Atu." Ela anjina ao achiamba, "Yetsambulwa ni Mlungu kaweza kula Galilaya!"
- ⁴²Mana Maandiko ganaamba kukala Yetsambulwa ni Mlungu Kuokola Atu ni m'bari wa Mfalume Daudi, naye andavyalwa Bethlehemu, mudzi arikovyalwa Daudi."
- ⁴³Kpwa hivyo hara atu aganyikana chimaazo kuhusu Jesu.
- ⁴⁴Anjina kala analonda kumgbwira, lakini taphana mutu yemguta.
- ⁴⁵Phahi, hara arindzi okala akahumwa kpwendamgbwira Jesu ariphouya, akulu a alavyadzi-sadaka na Mafarisayo aauza, "Kpwa utu wani tamumgbwirire mkedza naye?"
- ⁴⁶Hara arindzi achiamba, "Takudzangbwehenda mutu yegomba maneno dza higo achigogomba hiyu!"
- ⁴⁷Mafarisayo achiamba, "Hata mwimwi piya mchahendwa azuzu?"
- ⁴⁸Hebu mkasikira angaa mmwenga wa vilongozi ama Mafarisayo achiyemkuluphira?
- ⁴⁹Lakini kundi rosi hiri tarimanya Shariya za Musa, kpwa hivyo ralaniwa."
- ⁵⁰Mfarisayo mmwenga kala ni Nikodemu. Mutu hiyu kala akaphiya kpwa Jesu hipho mwanzo. Phahi wagomba na ayae achiamba,
- ⁵¹"Kulengana na Shariya zehu, tahuweza kuhukumu mutu bila ya kumsikiza na kumanya arigohenda."
- ⁵²Nao achiamba, "We nawe ula Galilaya? Kasometo Maandiko nawe undamanya kukala takuna nabii ndiyekpwedza kula Galilaya."
- ⁵³Badaye chila mmwenga waphiya kwakpwe kaya.

Johana 8

- ¹Jesu ariphomala kufundza, waphiya dzulu Mwango wa Mizeituni.
- ²Muhondoye, chiti sana, wakpwedza tsona Nyumba ya Kuvoya Mlungu. Atu anji achedzamzunguluka, naye achisagala achiandza kuafundza.
- ³Alimu a Shariya na Mafarisayo areha mchetu ambaye kala akagbwirwa anazinga, achimuimisa mbere za hiro kundi.
- ⁴Ariphomreha amuamba Jesu, "Mwalimu, mchetu hiyu akagbwirwa anazinga.
- ⁵Na kulengana na Shariya zehu, Musa walagiza mchetu dza hiyu ni apigbwe mawe hadi afwe. Dze, we ndiwe unaambadze?"

⁶Atu hinyo ahumira swali hiri kumhega Jesu, ili aphahe chizigbwa cha kumshitakira. Ela wazama achiandika photsi na chala.

⁷Na ariphokala anazidi kumuuzwa maswali, waunuka achigomba nao achiamba, "Yeyesi asiye na dambi, naakale wa kpwandza kumpiga dziwe."

⁸Achiuya kuzama tsona na achiandika photsi.

⁹Hara atu ariphosikira higa auka mmwenga mmwenga. Avyere ndio ariokala a mwandzo kuuka, hadi mwisho Jesu achisala macheye na yuya mchetu ambaye kala acheremire.

¹⁰Jesu ariphounula uso achimuuzwa yuya mchetu, "Mayo, phana angaa mmwenga achiyesala kukuhukumu?"

¹¹Yuya mchetu achiamba, "Bwana, taphana hata mmwenga." Phahi Jesu achimuamba, "Mimi nami sindakulavya makosa. Phiya vyako, ela kula rero usihende dambi tsona."

¹²Jesu waenderera kugomba na atu achiamba, "Mimi ni mwanga ung'arirao atu himu duniani. Mutu ndiyenilunga mimi kandanyendeka jizani kamare, ela andaphaha mwanga uphao atu uzima."

¹³Mafarisayo achigomba naye achiamba, "Unagomba ushahidi wa kuhusu we mwenye, phahi hiyo inaonyesa kala ushahidio ni wa handzo!"

¹⁴Phahi Jesu achiamba, "Gaga nigombago ni kpweli, hata dzagbwe nikadzishuhudiya mwenye. Kpwa mana mimi namanya nilako na niphiyako, lakini mwimwi tammanya nilako wala niphiyako.

¹⁵Mwimwi mnanihukumu chibinadamu, lakini mino sihukumu mutu.

¹⁶Na hata nchihukumu, hukumu yangu ni ya kpweli kpwa sababu si mimi machiyangu nihukumuye, lakini ni phamwenga na ye Baba ariyenihuma.

¹⁷Yaandikpwa mwenu Shariyani kukala ushahidi wa atu airi uchikubaliana, chochosi agombacho nkukala kpweli.

¹⁸Kpwa hivyo mimi ni mmwenga wa hinyo mashahidi alavyao ushahidi kunihusu, na wa phiri alavyaye ushahidi kunihusu, ni Baba ariyenihuma."

¹⁹Ndipho hara atu aamuuzwa, "Yu kuphi ye sowe?" Achiaambira, "Tamnimanya mimi wala Baba, na kalapho mnamimanya, hata Baba naye piya mngemmanya."

²⁰Jesu wagomba higo ariphokala anafundza himo Nyumba ya Kuvoya Mlungu, phephi na phahali phokala phachiikpwa visanduku vya pesa. Na taphana yemgbwira, mana wakatiwe kala taudzangbwefika.

²¹Waenderera kugomba na atu achiamba, "N'ndaphiya vyangu, namwi mndaniendza. Lakini bila ya kutubu hiyo dambi yenu ya kusaniamini, mndafwa. Kura niphiyako mwimwi tamuweza kukufika."

- ²²Maneno higa gahenda vilongozi a Chiyahudi auzane, "Akale andadziolaga? Mana anaamba, 'Niphiyako tamuweza kukufika.' "
- ²³Jesu achiaambira, "Mwimwi mu a photsi, lakini mino ni wa dzulu. Mwimwi mu a duniani, ela mimi ni wa mlunguni.
- ²⁴Nkakuambirani kare kukala bila ya kutubu hiyo dambi yenu ya kusaniamini, mndafwa. Na hakika mndafwa ichikala tamndaamini kukala Mimi ndiye hiye."
- ²⁵Hara atu amuuzza achiamba, "Kpwani we u yuphi?" Achiambwa, "Vyo nchivyokuambirani hangu mwandzo, ni vivyo.
- ²⁶Nina manji ga kugomba kukuhusuni, tsona ga kukuhukumuni. Ela mwimwi atu a duniani nakuambirani nrigosikira kula kpwa iye ariyenihuma tu. Naye agombago ni ga kpweli."
- ²⁷Lakini taayamanyala kala Jesu anagomba nao kuhusu Ise ariye mlunguni.
- ²⁸Phahi waamba, "Ndiphomuunula msalabani Mutu Yela Mlunguni, ndipho ndiphomanya kukala Mimi ndiye hiye. Na piya mndamanya kala sihenda rorosi kpwa uwezo wangu, ela nkugomba nfundzwago ni Baba.
- ²⁹Naye ariyenihuma a phamwenga nami. Kadzangbweniricha machiyangu, mana chila wakati nahenda alondago."
- ³⁰Atu anji ariomsikira Jesu anagomba hivyo, amuamini.
- ³¹Jesu wagomba na hara Ayahudi ariomuamini achiamba, "Ichikala mndaenderera kulunga mafundzo gangu, mndakala afuasi angu chikpweli-kpweli.
- ³²Mwimwi mndamanya kpweli, nayo kpweli indakuikani huru."
- ³³Nao achimuamba, "Sino hu chivyazi cha Brahimu, na tahudzangbwekala atumwa a mutu yeyesi. Kpwadze unaamba hundakala huru?"
- ³⁴Ndipho achiaambira, "Nakuambirani kpweli, mutu yeyesi aishiye maisha ga dambi ni mtumwa wa dambi.
- ³⁵Mtumwa kaweza kukala milele nyumba ya tajiriwe ariphogulwa, ela mwana nkukala phao kaya milele na milele.
- ³⁶Mimi ndimi hiye mwana, phahi nchikuikani huru, mndakala huru kpweli-kpweli.
- ³⁷Nakubali kukala, mwimwi mu chivyazi cha Brahimu. Lakini mnataka kuniolaga, kpwa sababu tamtaki kukubali mafundzo gangu.
- ³⁸Nakuambirani kukala higa nigombago ni gara goonyeswa ni Baba, ela namwi mkuhenda mrigoambirwa ni sowe yenu."

- ³⁹Nao achimuamba, "Sisi, baba ni Brahimu." Ndipho achiaambira, "Ichikala mu chivyazi cha Brahimu kpweli, mbona tamlunga mifwanoye?"
- ⁴⁰Mimi nákuambirani kpweli ambago Mlungu waniambira, lakini kpwadze mcherelonda kuniolaga? Kala ni Brahimu, kangehenda higo mhendago!
- ⁴¹Ela mwimwi mkuhenda mambo ambago sowe yenu ndigo ahendago." Nao achimuamba, "Sisi sio ana a vuweni, hunaye baba, naye ni Mlungu."
- ⁴²Jesu achiaambira, "Kala Mlungu ndiye Sowe yenu, mngenimendza. Kpwa sababu mimi nála kpwakpwe, na ndiyo mana ni hipha. Siyakpwedza kpwa uwezo wangu, ela iye ndiye ariyenihuma.
- ⁴³Mwimwi tamuelewa nagokuambirani, mana tamtaki kusikira maneno gangu!
- ⁴⁴Kpwa kpweli mwimwi sowe yenu ni Shetani, namwi mkumendza kuhenda mai go atakago. Hangu mwandzo iye ni muolagi wala kamendze kpweli, kpwa sababu ye mwenye kana kpweli. Na chila agombapho handzo, nkugomba kulengana na asiliye, mana iye ana handzo na ni baba wa handzo.
- ⁴⁵Lakini kpwa vira mimi nagomba kpweli, mwimwi tamuamini nigombago.
- ⁴⁶Phano phana mutu yeyesi ambaye anaweza kunihukumu? Sambu, ichikala nagomba kpweli, kpwadze tamniamini?
- ⁴⁷Yeyesi ambaye ni mutu wa Mlungu, anasikiza maneno ga Mlungu. Na kpwa vira tamsikiza, inaonyesa kala simwi atu a Mlungu."
- ⁴⁸Ayahudi amuamba Jesu, "Phahi tahukosera huchiamba uwe siwe Myahudi ela u Msamariya, tsona una pepo!"
- ⁴⁹Achiaambira, "Mimi sina pepo tse-tse-tse, ela namuishimu Baba! Lakini mwimwi mnanibera.
- ⁵⁰Mino sidziendzera nguma kabisa, lakini kuna mmwenga ambaye anataka nitogolwe, naye ndiye jaji.
- ⁵¹Nakuambirani kpweli, mutu yeyesi ndiyelunga mafundzo gangu kandafwa bii."
- ⁵²Phahi hara atu achimuamba, "Kpwa kpweli hivi sambu hukakumanya kala una pepo! Ichikala Brahimu mwenye wafwa na manabii piya nago gachifwa, kpwadze unaamba ndiyelunga mafundzogo kandafwa bii?"
- ⁵³Kpwani we u mkpwulu kuriko mkare wehu Brahimu? Iye tu wafwa! Na piya manabii afwa. Kpwani we unadzihenda u ani?"
- ⁵⁴Jesu achiamba, "Nchidzhenda mkpwulu mi mwenye, phahi ukulu hinyo tauna mana. Ela Baba, ambaye mwimwi mnamuiha Mlungu wenu, ndiye anihendaye mkpwulu.

⁵⁵Mwimwi tamdzangbwemmanya, lakini mimi nammanya. Mimi nchiamba simmanya, phahi n'ndakala n'nagomba handzo dza mwimwi. Ela nammanya, tsona nalunga manenoge.

⁵⁶Mkare wenu Brahimu wahererwa ariphomanya kala andaona siku ya mimi kpwedza. Brahimu waiona na achihamirwa."

⁵⁷Ndipho achimuza, "Uwe kudzangbwefisa hata miaka hamsini, ye Brahimu wamuonaphi?"

⁵⁸Achiaambira, "Nakuambirani kpweli, kabla ya Brahimu kuvyalwa, mino kala ni kuko kare!"

⁵⁹Phahi ariphosikira hivyo, ataka kumpiga mawe. Lakini achidzifwitsa na achituluka mura Nyumba ya Kuvoya Mlungu.

Johana 9

¹Siku mwenga, Jesu ariphokala anatsupa, wamuona mutu yekala chipofu hangu kuvyalwawakpwe.

²Anafundzie achimuza, "Mwalimu, ni dambi za yuphi zomhenda yuno avyalwe chipofu? Ni dambize mwenye, hebu ni za avyazie?"

³Jesu achiamba, "Upofuwe tauhusiana na dambize, wala za avyazie. Ela ni chipofu ili uwezo wa Mlungu uonekane unahenda kazi mwa hiye mkpwongo.

⁴Kpwa vira kuchere namutsi, n'lazima huendeni kazi za iye ariyenihuma. Kpwa mana usiku uredza ambapho taphana mutu yeyesi ndiyeweza kuhenda kazi.

⁵Vivi nrivyo mumu duniani, mimi ndimi mwanga wa atu."

⁶Bada ya kugomba higo, watsitsa mahe mtsangani na achikoroga tope achimpaka yuya chipofu matsoni.

⁷Na achimuamba, "Phiya ukaoge uso chidimbwi cha Siloamu." (Manage ni Yehumwa.) Phahi yuya mutu wakpwendaoga uso na ariphokala anauya achikala anaona.

⁸Majiranige na atu anjina ariomuona wakati kala ni mutu wa kuvoya-voya auzana, "Yuno siye yuya mutu ambaye kala achisagala akavoya-voya?"

⁹Anjina achiamba, "Eeh, niiye." Lakini anjina nao achiamba, "Wahendaigana naye." Lakini ye mwenye achiamba, "Ni mimi."

¹⁰Nao achimuza, "Vyakaladze hata vino sambu unaona?"

¹¹Achiaambira, "Yuya mutu aihwaye Jesu akatengeza tope, akanipaka matsoni, na akaniamba nkaoge uso mtsara wa Siloamu. Phahi nchaoga uso, na vino naona."

¹²Nao achimuza, "Ye mutu yu kuphi?" Naye achiamba, "Simmanya ariko."

¹³Badaye yuya mutu yekala chipofu achimphirika kpwa Mafarisayo.

- 14**Hira siku ambayo Jesu watengeza tope na kumphoza yuya chipofu kala ni Siku ya Kuoya.
- 15**Phahi Mafarisayo nao piya amuuzwa vira arivyophozwa. Naye achiaambira, "Iye mutu ariyeniphoza, wanipaka tope matsoni, alafu nchendaoga uso, na vino naona."
- 16**Mafarisayo adziganya makundi mairi. Kundi mwenga richiamba, "Mutu hiyu kayala kpwa Mlungu, kpwa sababu kalunga Shariya ya Siku ya Kuoya." Lakini anjina nao achiuza, "Ichikala mutu hiyu ni mutu wa dambi, anawezadze kuhenda vilinje dza hivi?"
- 17**Phahi amuuzwa tsona yuya mutu yekala chipofu, "Uwe ndiwe uriyephozwa matso. Vino unaambadze kuhusu mutu hiye?" Yuya mutu achiamba, "Mutu hiye ni nabii."
- 18**Hara vilongozi a Chiyahudi tayaamini kukala yuya mutu wakala chipofu na vino anaona. Kpwa hivyo achiha avyazie,
- 19**achiauza, "Yuno ni mwana wenu? Na ni kpweli kala mwamvyala chipofu? Hebu huambireni, vyakaladze hata vino sambini anaona?"
- 20**Avyazie achiamba, "Hunamanya kukala hiyu ni mwana wehu, naye wavyalwa chipofu.
- 21**Lakini tahumanya rohendeka hata akale hivi sambini anaona, wala tahumanya ariyemuphoza upofuwe. Muuzeni ye mwenye mana ni mwana nyama mzima, na anaweza kugomba mwenye."
- 22**Avyazie aamba hivyo kpwa kuogopa vilongozi a Chiyahudi. Mana hinyo vilongozi kala akatsapiza kukala, mutu yeyesi ndiyekubali na kuamba Jesu ndiye Yetsambulwa ni Mlungu Kuokola Atu, andahendwa nyunga wala kandainjira sinagogini.
- 23**Hino ndiyo sababu yoahenda avyazie aambe, "Ni mwana nyama mzima, muuzeni mwenye."
- 24**Phahi hara vilongozi amuiha tsona yuya mutu yekala chipofu, achimuamba, "Hebu gomba kpweli mbere za Mlungu. Sino hunamanya mutu hiyu ni mutu wa dambi."
- 25**Yuya mutu achiamba, "Ichikala ni mchina-dambi ama siye mchina-dambi, mino simanya. Ela nina hakika ya chitu chimwenga: kala n'chipofu vino naona."
- 26**Alafu achimuuza tsona, "Wakuhendadze hata vino sambini anaona?"
- 27**Yuya mutu achiamba, "Mimi nkakuambirani kare arivyoni hendera, namwi tamnisikira. Kpwa utu wani mnaniuza tsona? Hebu piya namwi mnataka mkale afuasie?"

²⁸Ndipho amtsuphira maneno ga kumuifya, achimuamba, "Uwe ndiwe mfuasi wa hiye mutu, lakini sisi hu afuasi a Musa.

²⁹Hunamanya kukala Mlungu wagomba na Musa, ela ichikala ni hiye mutuo, sino tahumanya alako."

³⁰Phahi yuya mutu waamba, "Mbona mnaniangalaza ayangu! Mnaamba tamumanya alako, ela wanivugula matso!

³¹Humanyavyo Mlungu kasikiza achina-dambi, lakini anasikiza mutu yeyesi amuabuduye na kuhenda gara alondago.

³²Hangu dunia iumbwe, tahudzangbwesikira mutu fulani wavugula matso mutu yevyalwa chipofu.

³³Kalapho mutu hiyu kayala kpwa Mlungu, kangeweza kuhenda chitu dza hichi."

³⁴Nao achimuamba, "Hangu kuvyalwako uwe u mutu wa dambi kabisa. Sambi unahufundzani?" Chisha achimzola mura Sinagogini.

³⁵Jesu wasikira kukala yuya mutu yekala chipofu wazolwa Sinagogini. Phahi wamuendza na ariphomuona wamuuzza, "Dze, unamkuluphira Mutu Yela Mlunguni?"

³⁶Yuya mutu achiuza, "Ni yuphi Bwana ili nimkuluphire?"

³⁷Jesu achimuamba, "Wamuona kare, na iye ugombaye naye ndiye."

³⁸Phahi hiye mutu waamba, "Bwana nakukuluphira." Naye achingbwerera maguluni.

³⁹Chisha Jesu achiamba, "Nákpwedza himu duniani ili vipofu aone, nao adzihendao anaona, akale vipofu. Nami, n'ndaahukumu hinyo adzihendao anaona."

⁴⁰Mafarisayo anjina ariokala phephi na Jesu amsikira anagomba hivyo, achimuuzza, "Yani hata sisi naswi hu vipofu?"

⁴¹Achiaambira, "Kalapho mnakubali m'vipofu, tamngekala na hukumu. Lakini bada mnaamba mnaona, na mbavi sivyo, phahi mndasala na hukumu yenu."

Johana 10

¹Jesu waamba, "Nakuambirani kpweli kukala, mutu asiyeinjira chaa cha mang'ondzi kutsupira mryangoni, ni muivi tsona ni mnyang'anyi.

²Lakini mrisa mwenye mwenye wa mang'ondzi nkuinjira chaani kutsupira mryangoni.

³Mrindzi nkuvugurira mryango yuya mrisa, naye akainjira chaani. Nago mang'ondzi ganamanya kauliye. Iye mrisa nkugaiha mang'ondzige na madzina na kugatuluza kondze.

- ⁴Naye achituluza mang'ondzige gosi kuphiya marisani, nkutsupa mbere, nago nkumlunga-lunga, mana ganamanya kauliye.
- ⁵Higo mang'ondzi tagaweza kulunga-lunga mjeni. Kpwa vira tagamanya sauti ya mutu wanjina, gandamchimbira.”
- ⁶Jesu waambira atu ndarira hino lakini atu taayaelewa manage.
- ⁷Phahi Jesu wagomba tsona achiamba, "Nakuambirani kpweli, mimi ndimi mryango wa mang'ondzi.
- ⁸Osi ariokpwedza kabla ya mimi kala ni aivi na anyang'anyi, lakini mang'ondzi tagayaasikiza.
- ⁹Mimi ni mryango. Mutu yeyesi ndiyeinjira kutsupira kpwangu, andaokolwa. Naye andainjira na kutuluka na kpwendarisa.
- ¹⁰Muivi nkpwedzaiya, kuolaga na kubananga. Lakini mino nákpwedza ili atu aphahe uzima, tsona akale na uzima kpweli-kpweli.
- ¹¹Mimi ndimi mrisa mnono. Na hiye mrisa mnono a tayari kufwa kpwa sababu ya mang'ondzige.
- ¹²Lakini mrisa wa kuandikpwa kakala dza mwenye mchina-mang'ondzi. Mana mang'ondzi sigo gakpwe, phahi achiona mabawa garedza, andaricha mang'ondzi phapho, achimbire. Nago mabawa nkugagbwira na ganjina gakatsamukana.
- ¹³Mrisa wa kuandikpwa nkuchimbira, kpwa vira mang'ondzi sigo gakpwe wala kanago utsungu.
- ¹⁴⁻¹⁵Mimi ndimi mrisa mnono, nami n'ndafwa kpwa mang'ondzi gangu. Mana nagamanya nago gananimanya, dza viratu Baba animanyavyo, nami nammanya.
- ¹⁶Kuna mang'ondzi gangu ganjina ambago sigo ga chaa hichi, na n'lazima nigarehe piya. Gandasikira sauti yangu, na hipho ndipho kundakala na kundi mwenga na mrisa mmwenga.
- ¹⁷Baba ananimendza kpwa sababu ni tayari kufwa ili nifufuke tsona.
- ¹⁸Takuna mutu awezaye kuniolaga bila mimi mwenye kumendza. Lakini n'ndafwa mwenye kumendza kpwangu. Nina uwezo wa kudziricha niolagbwe na uwezo wa kufufuka. Mana Baba ndiye ariyenilagiza nihende hivi.”
- ¹⁹Kpwa sababu ya maneno higa, Ayahudi auya tsona kusaelewana.
- ²⁰Anji agomba achiamba, "Mutu hiyu ana pepho, chisha ana koma. Munamsikiza wani?”
- ²¹Lakini anjina achiamba, "Mutu ariye na pepho kaweza kugomba mambo dza higa. Kpwani pepho anaweza kumhenda chipofu akaona?”

- ²²Kala ni majira ga mnyevu, na piya kala ni wakati wa Sukukuu ya kutambukira kuusa najisi Nyumba ya Kuvoya Mlungu ko Jerusalem.
- ²³Wakati hinyo, Jesu kala a himo Nyumba ya Kuvoya Mlungu ananyendekanyendeka seemu iihwayo Muhala wa Selemani.
- ²⁴Phahi vilongozi a Chiyahudi amzunguluka na achimuuza, "Mbona kuhuambira kpweli hadi rini? Ichikala ndiwe Yetsambulwa ni Mlungu Kuokola Atu, hebu huambire wazi-wazi."
- ²⁵Jesu achiamba, "Nákuambirani kare lakini tamuamini. Higa mambo nihendago kpwa uwezo wa Baba, ganaonyesa mino ni ani.
- ²⁶Lakini tamuamini kpwa vira simwi mang'ondzi gangu.
- ²⁷Mang'ondzi gangu nagamanya. Nago ganasikira sauti yangu, na nkunilungalunga.
- ²⁸Nkuapha uzima wa milele afuasi angu, nao taandafwa bii. Takuna mutu yeyesi ndiyenifuta,
- ²⁹mana Baba, ariyenipha atu hinyo, ni mkpwulu kuriko osi, wala takuna awezaye kumfuta Baba.
- ³⁰Mimi na iye hu chitu chimwenga."
- ³¹Ayahudi ariphosikira Jesu akagomba hivyo, atsola mawe tsona ili amuolage.
- ³²Lakini achiaambira, "Nákuhenderani mambo manji manono kpwa uwezo wa Baba. Gosi higo nrigokuhenderani, n'riphi ambaro rinakuhendani hata mtake kuniolaga?"
- ³³Achimuamba, "Tahutaki kukupiga mawe kpwa sababu ya higo mambo manono, ela ni kpwa sababu ya kukufuru. Uwe u mwanadamu dza anjina, mbona unadzihenda u Mlungu!"
- ³⁴Achiamba, "Samba Maandiko genu gaandikpwa kukala, Mlungu anaamba, 'Mwimwi mu milungu!'
- ³⁵Maandiko ganaamba kukala, atu ariophokera ujumbe wa Mlungu aihwa 'milungu' ni Mlungu mwenye. Naswi hunamanya kukala Maandiko ganagomba kpweli siku zosi.
- ³⁶Sambi mino nchiamba ni mutu yetsambulwa ni Mlungu akale Mwanawe, kpwadze mnaamba nakufuru? Mana Baba mwenye ndiye ariyenitenga kpwa kaziye na achinihuma himu duniani.
- ³⁷Ichikala sihenda kazi za Baba, phahi msiniamini.
- ³⁸Lakini ichikala nazihenda, hata mchikala tammendze kuniamini, ela aminini zo kazi zangu. Mchihenda hivyo, ndipho mndamanya na kuelewa kala Baba a phamwenga nami, nami ni phamwenga na Baba."

³⁹Phahi vilongozi a Chiyahudi ataka tsona kumgbwira Jesu, lakini waahepa achiuka.

⁴⁰Hipho Jesu wauka tsona achendavuka muho wa Joridani na achendakala phahali ambapho mwandzo Johana kala achibatiza atu.

⁴¹Wakati kala a hiko, atu anji amlunga. Nao ng'andzi zao kala anaamba, "Johana kayahenda vilinje, lakini chila chitu arichohuambira kuhusu mutu hiyu ni kpweli."

⁴²Phahi atu anji a seemu hizo amkuluphira Jesu.

Johana 11

¹⁻²Kpwakala na mutu mmwenga yeihwa Lazaro ambaye kala ni mkpwongo. Mutu hiyu kala ni ndugu wa chilume wa Maryamu na Maritha, na osi kala achisagala Bethania. (Maryamu yuyu ndiye yekpwezammwagira Bwana Jesu mafuha ga kunukato maguluni, na kugaphangusa na nyereze.)

³Phahi hara nduguze Lazaro, alavya mhumwa kpwa Jesu akaambirwe, "Bwana, msenao ummendzaye ni mkpwongo."

⁴Lakini Jesu ariphosikira hivyo, waamba, "Ukongo hinyo sio wa kumurya. Lakini wakpwedza ili kuonyesa vira Mlungu na Mwanawe arivyo na nguvu."

⁵Jesu wamendza Maritha, Maryamu na ndugu yao Lazaro.

⁶Phahi ariphosikira kukala Lazaro ni mkpwongo, kayauka mara mwenga. Bada ya kusala siku mbiri phapho,

⁷achiaambira anafundzie, "Huphiyeni Judea tsona."

⁸Anafundzie achimuamba, "Mwalimu, undauyadze Judea? Samba dzuzi dzuzi vilongozi a Chiyahudi kala analonda kukupiga mawe!"

⁹Jesu achiaambira, "Mutsi una masaa kumi na mairi ga mwanga. Mutu achinyendeka wakati hinyo kandakpwala, mana anaona na mwanga wa himu duniani.

¹⁰Lakini mutu yeyesi achinyendeka usiku andakpwala, mana kaona kpwa vira takuna mwanga."

¹¹Bada ya kugomba higa, chisha wazidi kuambira hara anafundzie, "Msena wehu Lazaro arere, lakini n'ndaphiya nkamlamuse."

¹²Anafundzie achimuamba, "Bwana, ichikala arere, phahi, achilamuka andaphola."

¹³Aona kala arere kpweli. Lakini Jesu kala anagomba kuhusu chifo cha Lazaro.

¹⁴Ndipho Jesu ariphogomba wazi-wazi, achiamba, "Lazaro akafwa.

- ¹⁵Ela achiphofwa mino che sipo. Lakini naonato kpwa sababu yenu, mana mambo higa gakahendeka ili mnikuluphire. Sambu nahuphiyeni.”
- ¹⁶Tomasi, ambaye piya kala achiihwa Patsa, waambira anafundzi ayae, "Nahuphiyeni na Mwalimu, ili ichikala ni kufwa, hukafweni hosi.”
- ¹⁷Phahi Jesu ariphotsoloka hiko Bethania, Lazaro kala akazikpwa siku nne zotsupa.
- ¹⁸Mudzi wa Bethania kala u kama kilomita tahu hivi kula Jerusalemu,
- ¹⁹na atu anji kala akedza kpwa Maritha na Maryamu kuapha pore kpwa chifo cha ndugu yao.
- ²⁰Maritha ariphosikira kala Jesu aredza, wakpwendamchinjira, lakini Maryamu wasala pho kaya.
- ²¹Phahi Maritha ariphokutana naye, wamuamba, "Bwana, kalapho ka u phapha, mwenehu kangefwa.
- ²²Na hata vivi namanya kukala ndichovoya kpwa Mlungu, andakupha.”
- ²³Naye achimuamba, "Mwenenu andafufuka.”
- ²⁴Ndipho Maritha achiamba, "Namanya mwenehu naye andafufuka siku ya mwisho, atu osi ndiphofufulwa.”
- ²⁵Jesu achiamba, "Mimi ndimi n'fufulaye atu na kuapha uzima. Mutu yeyesi ndiyenikuluphira, hata dzagbwe andafwa, andaishi tsona.
- ²⁶Mutu yeyesi ariye na uzima kpwa kunikuluphira, kandafwa bii. Sambu Maritha nakuuza, unagaamini gano?”
- ²⁷Maritha achiamba, "Ehe Bwana! Naamini kukala ndiwe Masihi, Mwana wa Mlungu, ndiyekpowedza himu duniani.”
- ²⁸Phahi Maritha ariphomala kugomba higo, wamuiha kanda Maryamu, achimuamba, "Mwalimu akedza, anakuiha.”
- ²⁹Maryamu kusikira hivyo, wang'oka saa iyo-iyo na achiphiya.
- ³⁰Wakati hinyo Jesu kala kadzangbweinjira chidzidzi hicho, ka achere pho achiphokutana na Maritha.
- ³¹Mura nyumbani kala mna atu ambao akedzamupha pore Maryamu. Ariphomuona anatuluka kondze mairo, amlunga-lunga, mana aona anaphiya mbirani akarire.
- ³²Maryamu waphiya hadi pho ka aripho Jesu. Ariphomuona, wamgbwerera maguluni na achimuamba, "Bwana, kalapho ka u phapha, mwenehu kangefwa.”
- ³³Phahi Jesu ariphoona Maryamu anarira na hara ariokala naye piya anarira, wasikira utsungu rohoni na kusononeka sana.

- ³⁴Chisha achiuza, "Mwamzikaphi?" Nao achiamba, "Bwana, ndzo ulole."
- ³⁵Jesu achirira.
- ³⁶Phahi atu aamba, "Lolani vyo ambavyo kala anammendza Lazaro!"
- ³⁷Lakini anjina achiamba, "Ichikala wamvugula matso chipofu, washindwa ni utu wani kuzuwiya Lazaro asifwe?"
- ³⁸Phahi Jesu ariphofika hiko mbirani, wazidi kusononeka sana. Hiyo mbira yenye kala ni pango ambaro kala rikazibwa na dziwe pho mryangoni.
- ³⁹Jesu achiamba, "Riuseni hiro dziwe." Maritha, ndugungbwa wa ye mufwa, achimuamba, "Bwana, hangu azikpwe rero ni siku ya nne, ro dziwe richiuswa ela phandakalika phano?"
- ⁴⁰Ndipho achiamba, "Maritha, sikakuambira uchiamini undaona uwezo mkpwulu wa Mlungu?"
- ⁴¹Phahi hara atu ariusa rira dziwe. Chisha Jesu achilola dzulu mlunguni na achiamba, "Baba, nakushukuru mana ukasikira kare mavoyo gangu.
- ⁴²Namanya kukala chila wakati unanisikira. Ela nkagomba hivyo ili hinya atu aimireo hipha aamini kukala uwe ndiwe uriyenihuma."
- ⁴³Ariphomala kugomba higa, wakota likululu achimuiha Lazaro, "Lazaro, tuluka!"
- ⁴⁴Phahi Lazaro watuluka kondze na shandaye vivyo. Kala akafungbwa-fungbwa kula chitswani hadi maguluni. Jesu waambira hara atu, "Mvuguleni na mumriche aphiye vyakpwe."
- ⁴⁵Phahi atu okala akamlunga-lunga Maryamu hadi mbirani, na kuona gara achigohenda Jesu, anji amkuluphira.
- ⁴⁶Lakini anjina aphiya kpwa Mafarisayo achendasema gara Jesu achigohenda.
- ⁴⁷Alafu Mafarisayo na akulu a alavyadzi-sadaka ahenda mkutano wa Baraza ra vilongozi a Chiyahudi, achiambirana, "Hunagaya bure! Mana mutu hiyu anazidi kuhenda vilinje vinji.
- ⁴⁸Huchimricha vivi hivi, chila mmwenga andamkuluphira. Alafu vilongozi a Chirumi andakpwedza abanange tsi yehu na kubomola Nyumba yehu ya Kuvoya Mlungu."
- ⁴⁹Lakini Kayafa ambaye kala ni Mlavyadzi-sadaka Mkwulu mwaka hinyo, waamba, "Mwimwi tammanya chochosi!
- ⁵⁰Tammanya kukala ni fwaida kpwenu mutu mmwenga afwe kpwa sababu ya atu osi, kuriko tsi ndzima kuangamizwa?"

⁵¹Higa arigogomba Kayafa, kayagagomba kula mwakpwe achilini. Lakini kpwa vira kala ndiye Mlavyadzi-sadaka Mkpwulu mwaka hinyo, watabiri bila ya kumanya, kukala Jesu andafwa kpwa Ayahudi osi.

⁵²Tsona kandafwa kpwa Ayahudi bahi, ela piya ana a Mlungu osi ariotsamulwa tsi zanjina, ili aakusanye akale chitu chimwenga.

⁵³Kpwa hivyo kula siku hiyo na kuenderera vilongozi a Chiyahudi ahenda njama za kumuolaga Jesu.

⁵⁴Phahi kayaweza kunyendeka wazi-wazi kahi-kahi ya Ayahudi. Lakini wauka achiphiya tsi yokala kanda-kanda ya weru, mudzi urioihwa Efraimu, achisagala hiko na anafundzie.

⁵⁵Wakati Sukukuu ya Pasaka kala i phephi, atu anji ala kpwao midzini achiphiya Jerusalemu. Kulengana na mila yao, aphiya mapema ili akadzitakase kabla ya siku hiyo.

⁵⁶Phahi ariphokala ndani ya Nyumba ya Kuvoya Mlungu, amuendza-endza Jesu. Chisha achiuzana, "Mnaonadze ayangu? Akale kpweli Jesu andakpwedza Sukukuuni?"

⁵⁷Akulu a alavyadzi-sadaka na Mafarisayo kala akalagiza atu kukala yeyesi amanyaye Jesu aripho, n'lazima akaseme ili agbwirwe.

Johana 12

¹Siku sita kabla ya Sukukuu ya Pasaka, Jesu waphiya Bethania, kokala achiishi Lazaro. Lazaro hiyu ndiye ariyefufulwa ni Jesu.

²Jesu wajitirwa chakurya cha dziloni ambacho chaandazwa ni Maritha. Mmwenga wa hara okala asegere kumrisa Jesu kala ni Lazaro.

³Phahi Maryamu wahala tupa ya nusu lita ya marashi ga samani kulu, gotengezwa kula kpwa muhi uihwao narido. Wampaka Jesu marashi maguluni na achimphangusa na nyereze. Nyumba yosi yagota kunuka marashi higo.

⁴Lakini mwanafundzi mmwenga yeihwa Juda Iskarioti, ambaye kala ndiye ndemsalata Jesu, waamba,

⁵"Kpwadze gano marashi tagakaguzwa na pesaze zikaganyirwa agayi? Mana samaniye ni mshahara wa mwaka mzima wa mchibaruwa!"

⁶Juda kayagomba hivyo kpwa kuaonera mbazi agayi, ela ye mwenye kala ni muivi. Kala ndiye muiki wa pesa za rira kundi rosi. Naye kala achitsola chidide chidide chitiywacho himo mkobani.

⁷Jesu achiamba, "Mriche ahende atakavyo. Mana wagaika ili atayarishe mwiri wangu kpwa siku ya mazishi gangu.

⁸Siku zosi, agayi mndakala nao, lakini mino sindakala namwi siku zosi."

- ⁹Kundi kulu ra Ayahudi ririphosikira kukala Jesu a hiko mudzi wa Bethania, aphiya kuko. Nao taayaphiya kumuona Jesu bahi, ela haswa kumuona Lazaro yekala akafufulwa ni Jesu.
- ¹⁰Phahi akulu a alavyadzi-sadaka ahenda njama ya kumuolaga Lazaro piya.
- ¹¹Mana kpwa sababu ya kufufulwa Lazaro, Ayahudi anji aricha kulunga vilongozi ao, na achimkuluphira Jesu.
- ¹²Siku ya phiriye, hiro kundi kulu rokala rikedza kusherekea Sukukuu ya Pasaka, rasikira kukala Jesu a njirani aredza Jerusalemu.
- ¹³Phahi ahala makalala ga mitende na achiphiya kondze ya mudzi kpwendamchinjira, kuno anagomba kululu anaamba: "Mlungu naatogolwe!" "Naajaliwe iye edzaye kpwa dzina ra Mwenyezi Mlungu!" "Mlungu naamjalie hiye Mfalume wa Iziraeli!"
- ¹⁴Jesu kala akaphaha mwana-punda na achimpanda, viratu Maandiko gagombavyo:
- ¹⁵"Msiogophe atu a mudzi wa Jerusalemu! Lolani, mfalume wenu aredza, naye akapanda mwana-punda."
- ¹⁶Mwandzo anafundzie taayaelewa mambo higa, lakini Jesu ariphohalwa kuphiya mlunguni, atambukira kukala mambo higa gaandikpwa kumhusu na vira arivyohenderwa.
- ¹⁷Hara atu ariokala a phamwenga na Jesu wakati anamuiha Lazaro kula mbirani na kumfufula, azidi kusemurira ayawao gara garigohendeka.
- ¹⁸Phahi, sababu ya atu anji kpwendamchinjira Jesu, kala akasikira akahenda chilinje cha kufufula Lazaro.
- ¹⁹Ndipho Mafarisayo achiambirana, "Lolani, hunagaya bure! Dunia ndzima inamlunga-lunga iye!"
- ²⁰Atu ambao kala achiphiya Jerusalemu kpwendaabudu wakati wa Sukukuu, anjina kala ni Agiriki.
- ²¹Phahi atu hinya amlunga Filipu yela Bethisaida hiko Galilaya, achendamuamba, "Bwana, hunalonda kumuona Jesu hugombe naye."
- ²²Filipu wakpwendamambira Anderea, chisha badaye osi airi achendamuambira Jesu.
- ²³Achiaambira, "Wakati wangu mimi, Mutu Yela Mlunguni, kuphaha nguma ukafika.
- ²⁴Nakuambirani kpweli, mbeyu isiyozikpwa mtsangani, inasala hiyo mbeyu bahi. Ela ichizikpwa inamera, na ivyale sana.

²⁵Yeyesi aonaye maishage ni muhimu zaidi hipa duniani, andaangamiza uzima wa milele. Na ambaye anaona maishage ga hipa duniani si muhimu zaidi, andagarinda na kuphaha uzima wa milele.

²⁶Mutu ndiyemendza kunihumikira n'lazima anilunge, ili mhumwa wangu akale nami phara ndiphokala. Mana chila anayenihumikira andatukuzwa ni Baba.

²⁷Hipa sambu roho yangu inasikira utsungu, tsona simanya niambedeze. Niambe, 'Baba, niokola na higo garigo mbere yangu?' Hata, siweza kuhenda hivyo mana nákpwedza duniani kpwa sababu ya gago.

²⁸Baba onyesa uwezoo urivyo mkpwulu." Phahi kwatuluka sauti kula mlunguni ichiamba, "Mimi náonyesa uwezo wangu na n'ndahenda hivyo tsona."

²⁹Umati wosi uriokala uimire hipho wasikira sauti hiyo. Anjina achiamba ni chiguruguru, na anjina nao achiamba ni malaika wa Mlungu akagomba na Jesu.

³⁰Lakini Jesu achiamba, "Sauti hiyo ikatuluka kpwa fwaida yenu, wala siyo kpwa sababu yangu.

³¹Wakati wa dunia kuhukumiwa ukafika, na mkpwulu wa dunia hino andependulwa.

³²Nami ndiphounulwa dzulu, n'ndavweha chila mmwenga kwangu."

³³Wagomba hivi kumanyisa atu ni chifo cha viphi ndichomphaha.

³⁴Hura umati wa atu uchimuamba, "Maandiko ganaamba Yetsambulwa ni Mlungu Kuokola Atu andaishi milele. Na vino we unaamba Mutu Yela Mlunguni n'lazima aolagbwe msalabani. Dze, yuno Mutu Yela Mlunguni ni yuphi?"

³⁵Jesu achiaambira, "Kuchere na mwanga kpwa muda. Kpwa hivyo nyendekani mwangani msedze mkagbwirwa ni jiza njirani. Mana mutu yeyesi anyendekaye jizani, kaweza kuona aphiyako.

³⁶Na wakati mna hiyu ariye mwanga, mkuluphireni ili namwi mkale ana a ye mwanga." Jesu ariphomala kugomba higo, wauka na achendadzifwitsa.

³⁷Hata dzagbwe Jesu wahenda vilinje vinji mbere za Ayahudi, lakini taayamkuluphira.

³⁸Mambo higa gahendeka ili maneno ga nabii Isaya gatimie, goamba: "Bwana, ni ani ariyeamini ujumbe wehu hurigomba? Ni ani yetambukira kukala gara hurigohenda ni kpwa uwezo mkpwulu wa Bwana?"

³⁹Phahi hara atu taawezere kuamini, dza viratu nabii Isaya arivyogomba phahali phanjina ariphoamba:

⁴⁰"Mlungu waahenda vipofu, nayo mioyo yao achiihenda mifu. Ndiyo mana matso gao tagaona, wala mioyo yao taiweza kuamini. Kpwa hivyo taaweza kumgalukira Mlungu, akaaphoza."

- ⁴¹Isaya wagomba higa kpwa sababu waona ukulu wa Jesu, ndipho achigomba kumhusu.
- ⁴²Hata hivyo vilongozi anji a Chiyahudi amkuluphira. Lakini kpwa kuogopa Mafarisayo, taayashuhudiya wazi-wazi, asedze akakahazwa kuinjira sinagogini.
- ⁴³Aho kala anamendza kuphaha sifwa kula kpwa anadamu kuriko kuphaha sifwa kula kpwa Mlungu.
- ⁴⁴Jesu wakota likululu achiamba, "Mutu yeyesi anikuluphiraye, kanikuluphira mimi bahi, ela piya anamkuluphira iye ariyenihuma.
- ⁴⁵Na yeyesi anionaye mimi, anamuona iye ariyenihuma.
- ⁴⁶Nákpwedza duniani dza mwanga, ili chila mmwenga ndiyenikuluphira asisale jizani tsona.
- ⁴⁷Mutu achisikira maneno gangu na asigagbwire, sindamuhukumu mimi. Mana sedzere duniani kpwedzahukumu atu, ela nákpwedza kuaokola.
- ⁴⁸Mutu yeyesi ndiyenikahala na kuricha kulunga mafundzo gangu, andahukumiwa. Mafundzo nigombago ndigo ndigoonyesa kukala atu ana makosa siku ya mwisho.
- ⁴⁹Mana siyagomba gangu, ela Baba ariyenihuma ndiye yenilagiza ga kugomba, na ga kufundza.
- ⁵⁰Na namanya kukala malagizoge ganaapha atu uzima wa milele. Phahi rorosi nigombaro ni riratu rolagizwa ni Baba nigombe."

Johana 13

- ¹Hiyo Sukukuu ya Pasaka kala ikafika phephi, na Jesu kala anamanya kukala wakatiwe wa kuuka himu duniani na kuuya kpwa Ise ukafika. Wamendza atue osi okala anamkuluphira himu duniani, na achiaonyesa mendzwaye hadi mwisho.
- ²Kuriphofika dziloni, Jesu na anafundzie kala asegere anarya. Shetani kala akamupha Juda, mwana wa Simoni Iskarioti, maazo ga kumsalata Jesu.
- ³Jesu kala anamanya kukala wala kpwa Mlungu na andauya kpwa Mlungu. Na piya wamanya kukala Ise wamupha chila chitu chikale tsini ya uwezowe.
- ⁴Phahi waunuka hipho chakuryani, achivula kandzuye, na achidzifunga tauli chununi.
- ⁵Alafu achitiya madzi karaini, na achiandza kutsukutsa magulu anafundzie na achiafuta na hira tauli.
- ⁶Ariphomfikira Simoni Petero, Petero wamuamba, "Bwana, kpwa utu wani uwe unitsukutse mimi magulu?"

- ⁷Jesu achimuamba, "Hipha sambu kumanya nihendaro, lakini badaye undamanya."
- ⁸Petero achimuamba, "Kundanitsukutsa magulu hata chidide." Lakini achiambwa, "Nisiphokutsukutsa magulu, phahi kundakala wangu tsona."
- ⁹Ndiphho Simoni Petero achiamba, "Bwana, usinitsukutse magulu bahi, ela nitsukutsa mikono na chitswa piya!"
- ¹⁰Achiambwa, "Mutu yeyesi achiyeoga kare ni msafi. Kana lazima ya kuoga tsona, labuda atsukutse magulu bahi. Phahi hata dzagbwe mkaera, ela simwi mosi."
- ¹¹Jesu kala anamanya kare ndiyemalata, ndiyo mana waamba, "Mkaera, ela simwi mosi."
- ¹²Jesu ariphomala kutsukutsa magulu anafundzie, wavwala kandzuye, achiuya kusagala. Chisha achiauza, "Mnamanya kpwa utu wani nkahenda hivyo?"
- ¹³Mwimwi mnaniha Mwalimu na Bwana, namwi tamkosere, mu sawa kabisa.
- ¹⁴Sambu ichikala mimi, Bwana na Mwalimu wenu, nkakutsukutsani magulu, namwi piya n'lazima mhenderane dza vivi.
- ¹⁵Nkakuphani mfwano, ili namwi mhende kama nchivyokuhenderani.
- ¹⁶Nakuambirani kpweli, mtumishi siye mkpwulu kuriko tajiriwe, wala mhumwa kaweza kukala mkpwulu kuriko ariyemuhuma.
- ¹⁷Na kpwa vira mnamanya mambo higa, phahi mchigalunga mndaajaliwa.
- ¹⁸Hivi nchivyogomba, sikagomba kuhusu mwimwi mosi. Mana chila mmwenga nriyemtsambula namanya arivyo. Lakini n'lazima Maandiko gatimie, gaambago, 'Mutu yeganya naye mkahe, ndiye yenigalukira.'
- ¹⁹Nakuambirani mambo higa hivi sambu, kabla tagadzangbwehendeka, ili gachihendeka mkale mndaamini kukala mimi ndimi hiye Yetsambulwa.
- ²⁰Kpweli nakuambirani, mutu ndiyephokera mhumwa wangu yeyesi, ananiphokera mimi. Na aniphokera yeye mimi, anamphokera iye ariyenihuma."
- ²¹Jesu ariphomala kugomba higa, wasononeka rohoni. Achigomba wazi achiamba, "Nakuambirani kpweli, mmwenga wenu andanisalata."
- ²²Hara anafundzie alolana, na achitezeka achikala taamanya Jesu anagomba kuhusu yuphi.
- ²³Mwanafundziwe mmwenga, yuya ambaye kala anamendzwa sana ni Jesu, kala asegere phephi naye.
- ²⁴Phahi Simoni Petero wamtsuphira nyusi yuya mwanafundzi ili amuuze Jesu anagomba kuhusu ani.
- ²⁵Yuya mwanafundzi wamsengerera Jesu zaidi achimuuza, "Bwana, ni yuphi?"

²⁶Achiambwa, "Iye ndiyemupha chipande cha mkahe bada ya kuchitsotsa mtsuzini." Phahi Jesu wahala chipande cha mkahe, achichitsotsa, achimupha Juda, mwana wa Simoni Iskarioti.

²⁷Juda ariphohala hura mkahe, Shetani wamuinjira. Naye Jesu achimuamba, "Hiro ulondaro kurihenda, rihende mara mwenga."

²⁸Lakini taphana hata mmwenga pho mezani yeelewa gara gomuambira Juda.

²⁹Ela kpwa vira Juda kala ndiye muiki wa mkoba wa pesa, anafundzi anjina aona Jesu akamuhuma akagule vitu vya Sukukuu, ama akahumwa akalavye vitu kpwa agayi.

³⁰Bada ya Juda kuphokera chira chipande cha mkahe, watuluka kondze mara mwenga. Nako kala ni usiku.

³¹Juda ariphotuluka kondze, Jesu waamba, "Sambi ukulu wangu mimi, Mutu Yela Mlunguni, undamanyikana, nami n'ndang'aza matso atu kukala Mlungu ni mkpwulu.

³²Na nching'aza atu kala Mlungu ni mkpwulu, Mlungu naye andang'aza ukulu wangu n'rio nao pha sambu.

³³Anangu, n'ndakala namwi kpwa muda mchache tu. Badaye mndaniendza, lakini kama nrivyoambira vilongozi a Chiyahudi, namwi nakuambirani, 'Kura niphiyako tamuweza kukufika.'

³⁴Nakuphani shariya nyiphya, nakuambirani: Mendzanani dza vyo nrivyokumenzani.

³⁵Ichikala mndamenzana, chila mmwenga andamanya kukala mu anafundzi angu."

³⁶Simoni Petero achimuza, "Bwana, unaphiyaphi?" Jesu achiamba, "Niphiyako kuweza kunilunga hivi sambu, lakini undanilunga badaye."

³⁷Petero achimuza, "Bwana, kpwa utu wani vino sambu siweza kukulunga? Ni tayari hata kufwa kpwa sababuyo."

³⁸Jesu achimuamba, "Kpweli uwe u tayari kufwa kpwa sababu yangu? Mino nakuambira kpweli, kabla dzogolo taridzangbweika, undakala ukanitsamalala mara tahu."

Johana 14

¹Jesu waambira anafundzie, "Msisononeke mwenu mioyoni. Mkuluphireni Mlungu, na nikuluphirani mimi piya.

²Sababu ya kuuka kpwangu ni kpwendakutengezerani pahali, mana nyumbani mwa Baba mna makao manji. Kala tamuna, ningekuambirani.

- ³Na nchimala kukutengezerani makao, n'ndauya tsona nedze nikuhaleni, ili phahali ndiphokala mimi, namwi piya mkale phapho.
- ⁴Namwi mnamanya njira ambayo inalongoza phara phahali niphiyapho.”
- ⁵Tomasi achimuuza Jesu, "Bwana, sino hundaimanyadze yo njira ichikala tahumanya uphiyako?"
- ⁶Achiambwa, "Mimi ndimi njira, kpweli na uzima. Takuna mutu awezaye kufika kpwa Baba isiphokala atsupire kpwangu.
- ⁷Kpwa vira mnamanya, mndamanya hata Baba. Hakika mnamanya na mwamuona kare.”
- ⁸Filipu achimuamba, "Bwana, huonyese Sowe, naswi hundatosheka.”
- ⁹Achiambwa, "Filipu, nchivyosagala na mwimwi muda wosi hinyo lakini inakaladze kunimanya? Yeyesi ariyeniona mimi wamuona Baba. Mbona unaamba, 'Huonyese Sowe?’
- ¹⁰Kuamini kukala mino ni phamwenga na Baba, naye Baba a phamwenga nami? Maneno nagokuambirani si gangu, lakini ni ga Baba aishiye mwangu, naye ndiye ahendaye kazi kutsupira kpwangu mimi.
- ¹¹Nichikuambirani kukala ni phamwenga na Baba naye Baba a phamwenga nami, aminini kukala nakuambirani kpweli. Ichikala sivyo, aminini kpwa sababu ya vilinje nrivyohenda.
- ¹²Nakuambirani kpweli, mutu yeyesi anikuluphiraye mimi, naye piya andahenda nihendavyo. Tsona andahenda mambo makulu zaidi ya higa, kpwa sababu naphiya kpwa Baba.
- ¹³Na rorosi mndirovoya kpwa uwezo wangu, n'ndarihenda, ili ukulu wa Baba uonyeswe wazi kutsupira mimi mwanawe.
- ¹⁴Mchinivoya chochosi kpwa uwezo wangu, n'ndakuhenderani.”
- ¹⁵Jesu waenderera kugomba na anafundzie achiamba, "Kpwa kpweli mchinimendza, mndagbwira na kulunga malagizo gangu.
- ¹⁶Nami n'ndam'voya Baba, naye andakuphani Msaidizi wanjina, ambaye andasagala namwi milele.
- ¹⁷Hiye Msaidizi ni Roho aonyesaye atu kpweli kuhusu Mlungu arivyo. Atu a dunia hino taaweza kumkubali mana taamuona wala taamannya. Ela mwimwi mnamanya, mana a phamwenga namwi na andakala mwenu mioyoni.
- ¹⁸Sindakurichani machiyenu dza anachiya, mana n'ndakuuyirani.
- ¹⁹Bada ya muda mchache atu asionikuluphira taandaniona tsona, ela mwimwi ndimwi ndioniona. Na kpwa kukala n'ndaishi tsona, namwi piya mndakala na uzima.

- ²⁰Wakati nchifufulwa mndamanya kukala mimi ni phamwenga na Baba. Na mwimwi mu phamwenga na mimi, nami ni phamwenga namwi.
- ²¹Agbwiraye malagizo gangu na kugalunga, ndiye animenzaye. Na kpwa sababu ya kunimendza mimi, Baba naye andammendza. Nami piya n'ndammendza na kudzionyesa kpwakpwe."
- ²²Juda wanjina (siye Juda Iskarioti) wamuuza Jesu achiamba, "Bwana, kpwa utu wani undadzimanyisa kpwehu bahi, wala si kpwa atu a dunia?"
- ²³Achimuamba, "Mutu yeyesi animenzaye andagbwira mafundzo gangu. Baba andammendza, naswi hundakpwedzasagala naye.
- ²⁴Asiyenimendza kagbwira mafundzo gangu. Higo mafundzo msikirago sigo gangu, ela ni ga Baba mana ndiye ariyeni huma.
- ²⁵Nkakuambirani mambo higa vivi hurivyo huchere phamwenga.
- ²⁶Lakini Mlungu andamuhuma Msaidizi ariye ni Rohowe, edze aniwakilishe. Naye Msaidizi andakpwedza kukufundzani mambo gosi na akutambukizeni gosi nrigokuambirani.
- ²⁷Nakurichirani amani yangu, nayo si dza hira ilaviwayo ni atu asiomkuluphira Mlungu. Msisononeke wala kukala aoga.
- ²⁸Mwanisikira nchikuambirani kukala, 'Nakurichani, lakini n'ndakuuyirani.' Kalapho mwanimendza kpweli, mngehererwa kusikira naphiya kpwa Baba, mana Baba ndiye mkpwulu kuriko mimi.
- ²⁹Nkakuambirani mambo higa hivi sambu kabla tagadzangbwehendeka, ili gachihendeka, muamini.
- ³⁰Mimi sina muda munji kukala phamwenga namwi na kugomba mambo manji, mana mkpwulu wa dunia hino aredza. Lakini kana uwezo kpwangu,
- ³¹ela nahenda viratu nrivyolagizwa ni Baba, ili atu osi a dunia hino amanye kukala nammendza Baba. Unukani huphaukeni hipha."

Johana 15

- ¹Phahi Jesu waenderera kugomba na anafundzie, achiaamba, "Mimi ndimi mzabibu wa kpweli, na Baba ndiye mkurima.
- ²Panda ya mzabibu isiyovyala, Baba nkuikata. Lakini panda ivyalayo andaitsatsula ili ivyale zaidi.
- ³Mwimwi mu dza panda zivyalazo; mwatsatsulwa kare ni mafundzo ambago nakufundzani.

- ⁴Gbwiranani na mimi, nami n'ndagbwirana namwi. Mana panda taiweza kuvyala macheye, mpaka igbwirane na mzabibu wenye. Phahi namwi piya ni vivyo, tamuweza kuvyala matunda mpaka mgbwirane nami.
- ⁵Mimi ndimi mzabibu, namwi mu panda. Mchigbwirana na mimi mndavyalato, mana bila mimi tamuweza kuhenda rorosi.
- ⁶Mutu asiyegbwirana nami, ni dza panda yokatwa ichiuma. Panda dza hizo nkutsolwa-tsolwa zikapigbwa iyi, chisha zikatiywa moho.
- ⁷Mchigbwirana nami, na maneno gangu gachisala mwenu mioyoni, voyani chochosi mlondacho namwi mndaphaha.
- ⁸Anafundzi angu a chikpweli-kpweli nkuvyala matunda manji. Kpwa sababu hiyo atu andamanya Baba arivyo mkwulu.
- ⁹Nakumenzani dza vyo Baba animenzavyo. Phahi gbwiranani nami ili nikuonyeseni mendzwa yangu.
- ¹⁰Mimi nagbwira malagizo ga Baba, naye anaenderera kunimendza. Vivyo hivyo, namwi mchigbwira malagizo gangu, mndaenderera kuona mendzwa yangu.
- ¹¹Nkakuambirani mambo gosi higa ili mkale na raha dza ihi nriyo nayo mimi, tsona muweze kukala na raha sana mwenu mioyoni.
- ¹²Sambi nakuphani lagizo rangu: Mendzanani dza vyo nrivyokumenzani.
- ¹³Takuna mutu ariye na mendzwa dza hino ya mutu kufwa kpwa sababu ya asenae.
- ¹⁴Phahi mchigbwira malagizo gangu, mndakala asena angu.
- ¹⁵Sikuihani atumishi tsona, mana mtumishi kamanya tajiriwe ahendaro. Ela vivi nakuihani asena angu, kpwa sababu gosi ambago nágasikira kula kpwa Baba nákuambirani.
- ¹⁶Mwimwi simwi mrionitsambula, ela mimi ndiye yekutsambulani na nchikuhumani mkavyale mavuno sigosira. Ndipho rorosi ndirom'voya Baba kpwa uwezo wangu, andakuphani.
- ¹⁷Phahi nakulagizani kukala n'lazima mmendzane.”
- ¹⁸Jesu wazidi kugomba na anafundzie, achiamba, "Atu himu duniani achikuzirani, mmanyane kukala aandza kunizira mimi kpwandza.
- ¹⁹Kalapho mu atu a dunia hino, phahi dunia ingekumenzani avi mu ayawao. Lakini atu a dunia hino akuzirani, mana simwi a dunia hino, tsona náhendakutsambulani mimi kula mumu duniani.
- ²⁰Msiyale gara nrigokuambirani, kukala, 'Mtumishi siye mkwulu kuriko tajiriwe.' Ichikala atu anitesa, phahi hata mwimwi piya andakutesani. Kalapho agbwira mafundzo gangu, hata go genu nago angeagbwira.

- ²¹Lakini gosi higo andakuhenderani kpwa sababu mu afuasi angu, mana taamanya ariyenihuma.
- ²²Kala sedzeregomba nao, taangekala na makosa. Ela kpwa vira nákpwedza na nchigomba nao, phahi taaweza kudzikanira.
- ²³Mutu yeyesi aniziraye amanye piya anamzira Baba.
- ²⁴Kala siyaahendera vilinje ambavyo takuna wanjina yevihenda, phahi taangekala na makosa. Lakini sambu, vilinje aviona na bado ahuzira hosi, mimi na Baba.
- ²⁵Hivyo arivyohenda atimiza, Maandiko gaambago, 'Anizira bure.'
- ²⁶Mimi n'ndakuhumirani Msaidizi kula kpwa Mlungu. Iye ndiye Roho ndiyekuonyesani kpweli, na andakuambirani kunihusu.
- ²⁷Namwi piya n'lazima muambire atu anjina kunihusu, mana mwakala nami kula mwandzo wa kazi yangu."

Johana 16

- ¹Hipho Jesu waenderera kugomba na anafundzie, achiamba, "Nakuambirani higa gosi ili msedze mkaricha kuluphiro renu.
- ²Atu andakutuluzani masinagogini. Tsona kuredza wakati atu andakuolagani na aone avi anahenda kazi ya Mlungu.
- ³Nao andakuhenderani mambo higa kpwa sababu taanimanya mimi wala Baba.
- ⁴Phahi nkakuambirani chimbere mambo higa, ili wakati gachedza, mtambukire kala nákuambirani. Siyakuambirani kula mwandzo, mana kala nchere phapha namwi."
- ⁵"Ela vino nauya kpwa iye yenihuma, mbona taphana hata mmwenga aniuza, 'Unaphiyaphi?'
- ⁶Naona mnasikira utsungu kpwa gara mambo nchigokuambirani,
- ⁷lakini nakuambirani kpweli, kuuka kpwangu ni fwaida kpwenu. Mana nsiphouka mimi, hiye Msaidizi kandakpwedza. Ela nchiuka n'ndaphiya nkamhume edze.
- ⁸Naye achedza, andaahukumu atu himu duniani kuhusu dambi, haki, na hukumu yao.
- ⁹Andahukumiwa kuhusu dambi, mana taamendze kunikuluphira.
- ¹⁰Tsona aona kala mimi sina haki, ela aho anayo; lakini andahukumiwa, mana naphiya kpwa Baba ambako tamndaniona tsona.
- ¹¹Nao andahukumiwa kuhusu hukumu yao, mana mkpwulu wa dunia hino wahukumiwa kare.

- ¹²Nina mambo manji ambago nalonda nikuambireni, lakini kpwa sambini vigumu mwimwi kugaelewa.
- ¹³Ela ye Roho wa Mlungu ndiphokpwedza, andakulongozani kulunga chila chitu cha kpweli. Iye kandagomba gakpwe mwenye, ela andakuambirani higo ndigosikira na ndigokpwedzahendeka.
- ¹⁴Andaonyesa ukulu wangu, mana andaphokera gangu na akumanyiseni.
- ¹⁵Vya Baba vyosi ni vyangu. Ndiyo mana nkaamba Roho wa Mlungu andaphokera gangu na akumanyiseni.”
- ¹⁶Jesu waenderera kugomba na anafundzie achiamba, "Bada ya muda mchache tamndaniona, na bada ya muda mchache mndaniona tsona."
- ¹⁷Anafundzie anjina achiuzana achiamba, "Ni gaphi gano ahuambirago? Ati anaamba kala bada ya muda tahundamuona, na bada ya muda tsona hundamuona! Na achiamba anaphiya kpwa Ise, manage ni ni?"
- ¹⁸Phahi hara anafundzie azidi kuuzana achiamba, "Sambini achiamba bada ya muda mchache, manage ni ni? Lakini mbona tahumuelewa?"
- ¹⁹Jesu wamanya kukala hara anafundzi anataka kumuuzana mana ga gara achigogomba. Ndipho achiauza, "Mnauzana mana ga higo nchigogomba, kukala bada ya muda mchache tamndaniona, na bada ya muda mchache tsona mndaniona?"
- ²⁰Nakuambirani kpweli, mndarira na kusononeka lakini atu a himu duniani andahererwa. Mndakala na sonono ela sonono yenu indagaluka raha.
- ²¹Hata mchetu achitaka kudzivugula nkuhenda utsungu, mana wakatiwe wa kugaya ukafika. Lakini achidzivugula salama nkuyala hura utsungu, kpwa raha ya kuphaha mwana.
- ²²Phahi hata mwimwi hivi sambini mnasononeka. Lakini n'ndakuonani tsona na mndakala na raha, wala takuna mutu ndiyekuusirani hiyo raha.
- ²³Wakati hinyo uchifika, tamndanivoya chitu. Nakuambirani kpweli Baba andakuphani chochosi ndichom'voya kpwa uwezo wangu.
- ²⁴Mpaka sambini tamdzangbwevoya chitu chochosi kpwa uwezo wangu. Phahi voyani namwi mndahewa, ili mkale na raha sana mwenu mioyoni.
- ²⁵Nkakuambirani mambo higa kpwa mafumbo. Lakini kuredza wakati ambapho sindakuambirani kpwa mafumbo tsona, ela n'ndakuambirani ching'ang'a kuhusu Baba.
- ²⁶Wakati hinyo uchifika mndavoya Mlungu kpwa uwezo wangu. Lakini siamba mimi n'ndakuvoyerani kpwa Baba, ela mndavoya enye.

- ²⁷Mana Baba mwenye anakumendzani, kpwa vira mwimwi mnanimendza na mnaamini kukala mimi nála kpwa Baba.
- ²⁸Mino nákpwedza duniani kula kpwa Baba, nami nairicha niuye kpwa Baba.”
- ²⁹Phahi anafundzie amuaamba, "Ehe! Sambu ndipho unagomba wazi-wazi, bila mafumbo.
- ³⁰Hivi sambu hukamanya kukala uwe unamanya chila chitu, wala takuna haja ya mutu kukuuzá. Higo ndigo gahendago huamini kala uwe wala kpwa Mlungu.”
- ³¹Ndipho Jesu achiauza, "Dze, vino sambu mnaamini?
- ³²Lakini wakati uredza, na vivi ukafika kare, ambapho mndatsamukana. Chila mmwenga andaphiya kpwaoya kaya, nami n'ndasala machiyangu. Ela kpwa kpweli si machiyangu, mana Baba a phamwenga nami.
- ³³Enehu, nkakuambirani mambo higa, ili mkale na amani mwenu mioyoni kpwa sababu yangu. Himu duniani atu andakutesani, lakini dinani chilume! Mana mino náshinda dunia."

Johana 17

- ¹Bada ya Jesu kugomba maneno higa, walola dzulu mlunguni, achiamba, "Baba, wakati ukafika! Onyesa atu wazi-wazi ukulu wangu, ili nami mwanao, niaonyese ukuluo.
- ²Mana wanipha uwezo wa kulongoza atu dunia ndzima, na niaphe uzima wa milele osi urionirichira.
- ³Na hinyo uzima wa milele ni kukumanya uwe Mlungu wa kpweli, Mlungu wa macheye, na kunimanya mimi, Jesu Masihi, uriyenihuma himu duniani.
- ⁴Náonyesa ukuluo hipha duniani kpwa kukamilisha kazi uriyonipha niihende.
- ⁵Sambu Baba nakuvoya uniphe nguma mberezo, dza iratu nriyokala nayo huriphokala phamwenga, kabla ya dunia kuumbwa.
- ⁶Baba, hinya atu urionipha kula himu duniani, náamanyisa uwe u ani. Osi kala ni ako, nawe uchinipha mimi. Nao alunga mafundzogo.
- ⁷Hipha sambu anamanya kala chila chitu urichonipha chala kwako.
- ⁸Kpwa mana náapha ujumbe urionipha, nao achiuphokera. Amanya kpwa kpweli nála kwako na piya aamini kukala uwe ndiwe uriyenihuma.
- ⁹Sivoyera atu osi dunia ndzima, ela navoyera aho urionipha bahi, mana ni ako.
- ¹⁰Atu osi n'rio nao mimi ni ako, na osi urionao uwe ni angu. Nao anaonyesa ukulu wangu.

- ¹¹Vi sambi mino n'ndauka himu duniani nedze kpwako, ela hinya atu achere mumu duniani. Baba usiye na lawama, nakuvoya uarinde kpwa uwezoo, ili akale chitu chimwenga dza viratu mimi na uwe hurivyo chitu chimwenga.
- ¹²Nriphokala nao, náarinda kpwa uwezoo. Náarisato, na ariyeangamika ni hiye mmwenga bahi, ambaye kala ni wakuangamika, ili Maandiko gatimie.
- ¹³Phahi Baba, hivi sambi n'redza kpwako, ela nagomba maneno higa wakati nchere himu duniani, ili akale na raha yangu yosi mwao mioyoni.
- ¹⁴Mino náambira higo manenogo, lakini atu a dunia hino aazira, kpwa vira sio a dunia hino, dza viratu ambavyo mimi simi wa dunia hino.
- ¹⁵Sivoya ili uause himu duniani, lakini nakuvoya uarinde na yuya Mui, yani Shetani.
- ¹⁶Aho sio a dunia hino, dza vivyo mimi.
- ¹⁷Nenoro ni kpweli, kpwa hivyo humira hiyo kpweli kuahenda adzilavye kpwako tse-tse-tse.
- ¹⁸Vivyo urivyoni huma nedze himu duniani, ndivyo nami naahuma mumu himu.
- ¹⁹Vivi nadzilavya kpwako kpwa fwaida yao, ili nao adzilavye kukuhumikira uwe chikpweli-kpweli.
- ²⁰Baba, sivoya kpwa hinya anafundzi angu bahi, lakini hata hinyo ndionikuluphira kpwa sababu ya ujumbe wa atu hinya.
- ²¹Navoya ili osi akale chitu chimwenga, dza vivyo mimi na uwe hurivyo. Naavoyera akale chitu chimwenga naswi, ili atu anjina aamini kukala uwe ndiwe uriyeni huma himu duniani.
- ²²Uwezo ambao wanipha nami náapha afuasi angu, ili akale chitu chimwenga dza mimi na uwe hurivyo.
- ²³Yani mimi nikale chitu chimwenga nao, dza mimi na uwe hurivyo. Nao naakale chitu chimwenga kabisa, ili atu anjina amanye kukala uwe wanihuma, nawe unaamendza afuasi angu dza unimendzavyo.
- ²⁴Baba, hara urionipha, naaza akale nami ndiphokala, ili aone uwezo ambao wanipha. Uwezo huno wanipha kpwa sababu wanimendza kabla ya dunia kuumbwa.
- ²⁵Baba uriye wa haki, atu a dunia taakumanya. Ela mimi nakumanya, nao anafundzi angu anamanya kukala uwe ndiwe uriyeni huma.
- ²⁶Náamanyisa uwe urivyo, na n'ndaenderera kuhenda hivyo, ili amendze ayawao kama unimendzavyo, tsona nami nikale chitu chimwenga nao."

Johana 18

- ¹Jesu ariphomala kugomba maneno higa, wauka na anafundzie. Avuka uphande wanjina wa dete ra Kedironi, na achendainjira mndani.
- ²Juda, ariyemsalata Jesu, kala anaumanya munda hinyo, mana Jesu na anafundzie kala achihiya mara kpwa mara.
- ³Phahi walongoza chikosi cha asikari a Chirumi phamwenga na arindzi a Nyumba ya Kuvoya Mlungu, ambao kala akahumwa ni Mafarisayo na akulu a alavyadzi-sadaka. Hara asikari na arindzi kala akatsukula taa, vimwindi na silaha.
- ⁴Phahi kpwa vira Jesu kala anamanya gosi ndigomphaha, wadzilavya na achiauza, "Mnaendza ani?"
- ⁵Hara atu achiamba, "Hunaendza Jesu kula Nazareti." Nao achiambwa, "Ni mimi." Juda, yemsalata, kala aimire phamwenga nao.
- ⁶Jesu ariphoaamba, "Ni mimi," hara atu auya nyuma na achigbwa.
- ⁷Achiauza tsona, "Mnaendza ani?" Nao achiamba, "Amba hunaendza Jesu kula Nazareti."
- ⁸Ye achiaamba, "Amba nkakuambirani kare kukala ni mimi. Ichikala mnaniendza, phahi aricheni hinya atu aphiye vyao."
- ⁹Higa gahendeka ili arigogomba gatimie, "Baba, osi urionipha siyazire hata mmwenga."
- ¹⁰Phahi Simoni Petero kala ana upanga, wautsomola na achikata sikiro ra kulume ra mtumwa wa Mlavyadzi-sadaka Mkwulu. (Hiye mtumwa kala achiihwa Maliko.)
- ¹¹Jesu achimuambira Petero, "Hai! Hai! Uyiza upangao chowani! Mateso higa nāpangirwa ni Baba Mlungu, kwadze gasiniphahe?"
- ¹²Phahi chira chikosi cha asikari na chilongozi wao phamwenga na hara arindzi a Nyumba ya Kuvoya Mlungu amgbwira Jesu na achimfunga mikowa.
- ¹³Mwandzo amphirika kpwa Anasi, mtsedza wa Kayafa. Kayafa kala ndiye Mlavyadzi-sadaka Mkwulu mwaka hinyo,
- ¹⁴naye kala akaambira vilongozi a Chiyahudi kukala ni vinono mutu mmwenga afwe kpwa sababu ya atu osi.
- ¹⁵Simoni Petero wamlunga-lunga Jesu phamwenga na mwanafundzi wanjina ambaye kala anamanywa pho kaya pha Mlavyadzi-sadaka Mkwulu. Mutu hiye wainjira ndani ya muhala wa Mlavyadzi-sadaka Mkwulu phamwenga na Jesu,
- ¹⁶ela Petero achisala phara mryangoni. Yuya wanjina ambaye kala anamanywa pho kaya watuluka kondze, na bada ya kugomba na msichana yekala anaimirira mryango, wamuinjiza Petero ndani.

- ¹⁷Yuya msichana yekala mryangoni wamuuzwa Petero, "Kale piya we u mwanafundzi wa hiye mutu chegbwirwa?" Petero achiamba, "Hata, mino simi."
- ¹⁸Kpwa sababu ya mnyevu, hara arindzi na atumishi a Mlavyadzi-sadaka Mkwulu kala akakuta moho wa makala anaoha. Petero naye kala aimire phapho anaoha moho.
- ¹⁹Mo nyumbani, Mlavyadzi-sadaka Mkwulu kala anamuuzwa Jesu kuhusu anafundzie na mafundzoge.
- ²⁰Jesu achimuamba, "Chila wakati kala nchifundza atu wazi-wazi masinagogini na ndani ya Nyumba ya Kuvoya Mlungu, ambako Ayahudi osi nkukusanyika. Nami siyagomba chochosi chisiri.
- ²¹Kpwadze unaniuza maswali? Uza atu arionisikira, aho anamanya nrigogomba."
- ²²Ariphomala kugomba maneno higo, mrindzi mmwenga ariyekala aimire phephi naye wampiga kofi ra uso na achimuamba, "Vyo ndivyo kumjibu Mlavyadzi-sadaka Mkwulu?"
- ²³Achimuambira yuya mutu, "Ichikala nkagomba makosa, hebu sema makosa nchigogomba. Ela ichikala nkagomba sawa, kpwa utu wani unanipiga?"
- ²⁴Badaye Anasi walagiza Jesu apherikpwe kpwa Kayafa, Mlavyadzi-sadaka Mkwulu, kuno akafungbwa.
- ²⁵Wakati Simoni Petero kala aimire anaoha moho, hara ayae amuamba, "Kale we piya u mwanafundzi wa hiye mutu chegbwirwa?" Lakini Petero watsamalala achiamba, "A'a! Mino simi."
- ²⁶Mtumishi mmwenga wa Mlavyadzi-sadaka Mkwulu, m'bari wa yuya yekakwa sikiro ni Petero, wamuuzwa, "Avi nkakuona ngiri-ngiri naye kura mndani?"
- ²⁷Petero achimtsamalala tsona Jesu, na saa iyo-iyo dzogolo richiika.
- ²⁸Muhondoye kuriphocha, Jesu waphirikpwa hadi dzumba ra Pilato, mkwulu wa jimbo ra Chirumi, kula kpwa Kayafa. Lakini vilongozi a Chiyahudi enye taainjirire mo dzumbani ili asedze akatiywa najisi (mana kulengana na mila za Chiyahudi, kala achiinjira nyumba ya mutu asiyekala Myahudi, andakahazwa kusherekea Sukukuu ya Pasaka).
- ²⁹Phahi Pilato watuluka kondze kukutana nao na achiauzwa, "Yuno mutu, mnamshitaki na makosa gani?"
- ³⁰Nao achiamba, "Kalapho mutu hiyu kahendere makosa, tahungemreha kwako."
- ³¹Pilato achiaambira, "Phahi halani mutu wenu mkamhukumu kulengana na shariya zenu." Ela hara vilongozi a Chiyahudi achimuamba, "Shariya za Chirumi taziuruhusu kuolaga mutu."

- ³²Higa gahendeka ili arigogomba Jesu dzulu ya ndivyofwa gatimie.
- ³³Alafu Pilato wauya tsona ndani ya dzumbare, achilagiza Jesu arehwe. Ariphorehwa himo ndani, Pilato wamuuza, "We ndiwe Mfalume wa Ayahudi?"
- ³⁴Naye achiamba, "Gano ugombago ni gako uwe ama ukaambirwa ni atu anjina kunihusu?"
- ³⁵Pilato achiamba, "Kpwani mino ni Myahudi? Atuo mwenye a kabilaro, akulu a alavyadzi-sadaka ndio achiokureha kpwangu. Dze, wakosani?"
- ³⁶Jesu achiamba, "Ufalume wangu sio wa dunia hino. Kalapho ufalume wangu ni wa dunia hino, atumishi angu angebwaga viha ili nisigbwirwe ni vilongozi a Chiyahudi. Ni mfalume kpweli, ela ufalume wangu sio wa hipha duniani."
- ³⁷Phahi Pilato achimuamba, "Kpwa hivyo we u mfalume!" Naye achiamba, "Uwe unaamba kukala ni mfalume, nawe u sawa. Mana nákpwedza himu duniani na kuvyalwa ili nifundze atu kuhusu kpweli. Chila ariye wa kpweli nkunisikiza."
- ³⁸Pilato achimuuza, "Kpweli ni ni?" Bada ya kugomba higo, Pilato watuluka kondze tsona kokala na vilongozi a Chiyahudi, achiaambira, "Mutu hiyu simuonere na kosa rorosi ra kumshitakira."
- ³⁹Lakini kpwa vira ni kawaida yenu mvugurirwe mfungbwa mmwenga chila Sukukuu ya Pasaka, mnaambadze nchikuvugurirani Mfalume wa Ayahudi?"
- ⁴⁰Lakini nyo akota likululu achiamba, "Usimvugule hiye, huvugurire Baraba!" (Baraba wakala ni mpindzani wa serikali.)

Johana 19

- ¹Alafu Pilato walagiza Jesu ahalwe, akachapwe viboko.
- ²Hinyo asikari asuka chiremba cha miya na achimvwika chitswani. Piya achimvwika kandzu ya zambarau, rangi ya chifalume.
- ³Hara asikari amlunga-lunga kuno anampiga makofi, achiamba, "Mfalume wa Ayahudi! Kala na maisha mare!"
- ⁴Pilato watuluka kondze tsona achendaamba, "Sikizani, nakureherani hiyu mutu, ela mmany simuonere kosa rorosi ra kumshitakira."
- ⁵Phahi Jesu watuluka kondze, kuno akavwala chiremba cha miya na kandzu ya rangi ya zambarau. Naye Pilato achiaambira hara atu, "Mutu wenu hiye!"
- ⁶Akulu a alavyadzi-sadaka na arindzi ariphomuona Jesu, akota likululu achiamba, "Naakotwe misumari! Naakotwe misumari!" Ndipho Pilato achiaambira, "Hiye, mhaleni mwimwi enye mkamkote msalabani, mana mino simuonere na kosa rorosi."⁷Hara vilongozi a Chiyahudi adinisa kumuamba Pilato, "Sino huna shariya iambayo mutu achikufuru n'lazima aolagbwe. Phahi hiyu akakufuru kpwa kuamba ni Mwana wa Mlungu."

- ⁸Pilato ariphosikira maneno higo wazidi kutishirwa.
- ⁹Achiuya himo ndani ya dzumbare achendamuuza Jesu achiamba, "Kpwani we walaphi?" Lakini Jesu kayajibu neno.
- ¹⁰Phahi Pilato achimuamba, "Kutaki kunigombekeza? Kumanya kukala nina uwezo wa kukurichira au kukulavya ukakotwe msalabani?"
- ¹¹Achimuamba, "Kalapho kuyaphaha uwezo kula kpwa Mlungu, kungekala na uwezo wowosi kpwangu. Ela iye achiyenireha kpwako ana dambi kulu zaidi."
- ¹²Pilato ariphosikira higa, waendza njira ya kumrichira Jesu, lakini vilongozi a Chiyahudi achienderera kukota likululu achiamba, "Mutu hiyu uchimrichira, undakala adui wa Kaisari, Mtawala wa Chirumi. Mana mutu yeyesi adzihendaye ni mfalume dza iye, phahi anampinga Kaisari!"
- ¹³Pilato ariphosikira maneno higa, walagiza Jesu atuluzwe kondze. Naye achendasagala chihi cha hukumu, phatu phoihwa, "Muhala wa Mawe." (Ambapho phaihwa, "Gabatha" kpwa Chiebrania).
- ¹⁴Siku hiyo kala ni Ijumaa, kala ni kama saa kumi na mbiri za ligundzu, na siku ya phiriye kala ni Sukukuu ya Pasaka. Pilato achiaambira hara vilongozi a Chiyahudi, "Mfalume wenu hiyu!"
- ¹⁵Nao achikota likululu achiamba, "Naaolagbwe, naaolagbwe! Naakotwe msalabani!" Pilato achigomba nao tsona achiamba, "Dze, mnalonda mfalume wenu nimkote msalabani?" Akulu a alavyadzi-sadaka achiamba, "Tahuna mfalume wanjina isiphokala Kaisari bahi!"
- ¹⁶Phahi Pilato wamlavya Jesu kpwa hinyo asikari akakotwe msalabani. Phahi Jesu wahalwa ni hara asikari,
- ¹⁷achitsukuzwa msalabawe na achilongozwa kuphiya phatu phaihwapho "Zekeya ra Chitswa." (Ambapho Chiebrania phaihwa Gologotha.)
- ¹⁸Hipho ndipho ariphokotwa misumari msalabani. Atu anjina airi akotwa misalabani piya, mmwenga uphande huno na mwenga uphande wanjina, naye Jesu achikala kahi-kahi.
- ¹⁹Pilato piya walagiza tangazo riandikpwe na ribandikpwe pho dzulu ya msalaba wa Jesu. Hiro tangazo kala rikaandikpwa, Hiyo ni Jesu wa Nazareti, Mfalume wa Ayahudi.
- ²⁰Phahali Jesu ariphokotwa msalabani kala ni phephi na mudzi, tsona maneno ga tangazo hiro kala gakaandikpwa kpwa luga za Chiebrania, Chilatini na Chigiriki. Phahi Ayahudi anji aweza kusoma tangazo hiro.
- ²¹Akulu a alavyadzi-sadaka achendamuuza Pilato, "Usiandike, 'Hiyo ni Mfalume wa Ayahudi,' lakini rikale, 'Mutu hiyu waamba, ni Mfalume wa Ayahudi.' "
- ²²Ela Pilato achiaambira, "Nchigoandika, nkaandika. Sigaluza."

- ²³Hara asikari ariphomala kumkota misumari phara msalabani, ahala nguwoze achizipiga mafungu mane, ili chila asikari aphahe fungure. Piya kandzuye kala ikafumwa kula dzulu hadi photsi bila ya kushonwa,
- ²⁴phahi achiambirana o enye, "Nahusiikpwanyule hino kandzu, ela hupigeni kura humanye kandzu indakala ya ani." Hara asikari ariphohenda hivyo, Maandiko gatimizwa gaambago: "Aganya nguwo zangu, na kupigira kura kandzu yangu."
- ²⁵Atu okala aimire phephi na hura msalaba kala ni ninengbwa wa Jesu na mwanao mchetu wa nine, phamwenga na Maryamu mkpwaza Kileopa, Maryamu kula Magidala,
- ²⁶na mwanafundzi yemendzwa sana ni Jesu. Jesu ariphoona nine aimire phephi na ye mwanafundziwe, wamuamba, "Sikiza Mayo, mwanao hiye."
- ²⁷Ndipho achimgalukira yuya mwanafundzi, achimuamba, "Mwenehu, mayoo hiye!" Kula hipho nine wakpwendasagala kaya kpwa yuya mwanafundzi.
- ²⁸Jesu wamanya kala kaziye ikasira. Phahi, bada ya higa, ili akamilishe Maandiko waamba, "Nasikira chiru."
- ²⁹Kala phana bakuli tele ra sichi pho hipho, phahi atu ahala demu achirilweka himo sichini achirigbwadzika phungo ra muhusopo na achim'bandika mromoni.
- ³⁰Jesu ariphomala kufyondza rira sichi, waamba, "Gakasira!" Ndipho achizamisa chitswache achidosa.
- ³¹Siku hiyo kala ni Ijumaa, na siku ya phiriye kala ni Siku ya Kuoya. Tsona hiyo Siku ya Kuoya kala i chivyakpwe mana kala ikagbwirana na Sukukuu ya Pasaka. Kpwa vira vilongozi a Chiyahudi kala taamendze miri isale misalabani Siku ya Kuoya, anjina akpwendamshauri Pilato magulu ga hara atu gavundzwe ili afwe upesi, na miri yao iuswe.
- ³²Phahi hara asikari akpwendavundza magulu ga yuya wa kpwandza yekotwa phamwenga na Jesu. Alafu achendavundza yuya wa phiri.
- ³³Lakini ariphomfikira Jesu amuona akafwa kare, sebu amvundze magulu.
- ³⁴Ela asikari mmwenga wamdunga fumo ra lavu, na saa iyo-iyoo achimwagika mlatso na madzi.
- ³⁵Hinyu ni ushahidi wa mutu ariyegaona ganahendeka. Nao ni ushahidi wa kpweli, mana iye anamanya kukala ni kpweli agombaro. Tsona anashuhudiya ili mwimwi piya muamini.
- ³⁶Mambo higa gahendeka ili Maandiko gatimie gaambago, "Kana hata mfupha mmwenga ndiovundzwa."
- ³⁷Na Maandiko ganjina ganaamba, "Atu andamlola iye ariyedungbwa fumo."

³⁸Badaye, phakpwedza mutu mmwenga yeihwa Yusufu, yevyalwa mudzi wa Arimathaya. Iye kala ni mwanafundzi wa Jesu, ela kpwa chisiri kpwa kuogopha vilongozi a Chiyahudi. Wakpwendavoya ruhusa Pilato ahale mwiri wa Jesu, naye Pilato achimruhusu. Achedzahala hura mwiri

³⁹phamwenga na Nikodemu, ambaye wakati wanjina kala akamlunga Jesu usiku. Nikodemu wareha mtsanganyiko wa udi na ubani wa uziho wa kama kilo salasini.

⁴⁰Hara alume airi, bada ya kuhala hura mwiri, achiusaka hura udi na ubani, na achiufunga vipande vya shanda kama irivyokala mila ya Chiyahudi.

⁴¹Phephi na phapho phokotwa Jesu msalabani kala phana munda. Himo mndani kala mna mbira nyiphya ambayo kala taidzangbwezikipwa mutu.

⁴²Kpwa vira mbira kala i phephi, na siku ya phiri kala ni Siku ya Kuoya, hara atu akpwendaika hura mwiri wa Jesu hipho.

Johana 20

¹Siku ya Jumapili, chiti cha ngutu, Maryamu kula Magidala waphiya mbirani. Hipho mbirani phakala na dziwe kulu rohumirwa kuzibira hira mbira, ela ariphofika waona rira dziwe rikauswa.

²Phahi waphiya mairo kpwa Simoni Petero na yuya mwanafundzi ariyemendzwa ni Jesu, achendaambira, "Atu akausa mwiri wa Bwana Jesu kula mbirani, na tahumanya achikouika."

³Phahi Petero na hiye mwanafundzi myawe aphiya hiko mbirani.

⁴Osi airi azola, ela ye wanjina wamtsupa Petero. Ariphofika phara mbirani chimbere

⁵wakpwendazama kutsungurira, achiona vipande vya shanda vikahandikpwa mo mbirani, lakini kayainjira.

⁶Badaye Simoni Petero wakpwedza, ela iye wainjira mura mbirani, achiona hira shanda ikahandikpwa phapho.

⁷Piya achiona chipande cha shanda ambacho kala chikafungirwa chitswa cha Jesu, chikakundzwa na chikaikpwa kanda na vira vyanjina.

⁸Ndipho yuya mwanafundzi ambaye kala akafika mbirani chimbere, naye achiinjira achiona na kuamini gara chigohendeka.

⁹(Mana anafundzi a Jesu kala taadzangbwe kuelewa Maandiko goamba kukala, n'lazima afufuke.)

¹⁰Alafu hara anafundzi airi auya kura ka asagalako.

- ¹¹Maryamu wafika tsona mbirani achiima kondze kuno anarira. Wakati kala anarira, wazama kutsungurira mo mbirani,
- ¹²achiona malaika airi akavwala nguwo nyereru. Nao kala asegere hipho phokala mwiri wa Jesu, mmwenga uphande wa chitswani na wanjina uphande wa maguluni.
- ¹³Hara malaika amuuzza, "Mayo, unarizwa ni ni?" Naye achiamba, "Atu akamuusa Bwana wangu na simanya achikomuika."
- ¹⁴Bada ya kugomba higa, watsupha matso achiona mutu aimire nyumaze. Kumbavi kala ni Jesu, lakini kayamtambukira.
- ¹⁵Achiamba, "Mayo, unarizwa ni ni? Unaendza ani?" Maryamu kala anaona ni mhendadzi-kazi wa pho mndani. Phahi achimuamba, "Bwana, ichikala ukamuusa uwe, niambira uchikomuika, nkamhale."
- ¹⁶Jesu wamuiha, "Maryamu." Maryamu wagaluka achiihika Chiebrania, "Raboni!" (Neno ambaro manage ni mwalimu.)
- ¹⁷Jesu achimuamba, "Richa usinigute, mana sidzangbwehalwa kuphiya dzulu kpwa Baba. Lakini phiya kpwa enehu, yani afuasi ayao, ukaambire naphiya dzulu kpwa Baba, ambaye ni Sowe yenu. Iye ni Mlungu wangu, namwi piya ni Mlungu wenu."
- ¹⁸Phahi Maryamu waphiya achendaambira hara anafundzi, "Nkamuona Bwana Jesu!" Na achiaambira gara ambago kala akalagizwa.
- ¹⁹Dziloniye siku hiyo ya Jumapili, anafundzi kala akakutana phamwenga, na achifunga miryango kpwa kuogopha vilongozi a Chiyahudi. Phahi Jesu wakpwedza gafula achiima pho kahi-kahi achiamba, "Togolani enehu."
- ²⁰Ariphomarigiza mwadzo, achiaonyesa mikonoye na lavu. Nao hara anafundzi ahererwa kpwa kumuona Bwana Jesu.
- ²¹Jesu wagomba tsona, achiamba, "Togolani enehu. Baba wanihuma, na viratu arivyonihuma, nami nakuhumani."
- ²²Bada ya kugomba higo, waavuvurira, na achiaambira, "Phokerani Roho wa Mlungu.
- ²³Mchisamehe mutu dambize, Mlungu naye anamsamehe; ela msiphomsamehe, Mlungu naye kamsamehe."
- ²⁴Jesu ariphoatsembukira anafundzie, mwanafundzi wanjina yeihwa Tomasi (manage ni patsa) kala kapho.
- ²⁵Phahi hara anafundzi ayae amuamba, "Hukamuona Bwana Jesu!" Lakini Tomasi waamba, "Siamini bii, hadi nione alama za misumari mwakpwe mikononi, tsona nigute hizo alama na chala changu! Na nitiye mkpwono wangu phakpwe lavuni, ndipho niamini."

²⁶Bada ya siku nane, anafundzie kala akakutana phamwenga tsona himo nyumbani, Tomasi naye kala a mumo. Miryango yosi kala ikafungbwa, ela Jesu achiinjira na achiima phamwenga nao, chisha achiamba, "Togolani enehu."

²⁷Phahi wamuamba Tomasi, "Lola mikono yangu na urehe chalacho ugute hipha. Chisha golosa mkpwonoo utiye phangu lavuni. Richa wasi-wasi na uamini."

²⁸Tomasi achimuamba, "Hai! Bwana wangu na Mlungu wangu!"

²⁹Achiambwa, "Ukaamini kpwa sababu ukaona? Andajaliwa atu ambao taonere lakini anaamini."

³⁰Jesu wahenda vilinje vyanjina vinji mbere za anafundzie, ambavyo taviandikirwe himu chitabuni.

³¹Lakini mambo higa gaandikpwa ili muamini kukala, Jesu ndiye Yetsambulwa ni Mlungu Kuokola Atu, yani Mwana wa Mlungu. Namwi mchimuamini, mndakala na uzima wa milele.

Johana 21

¹Bada ya higa, Jesu watsembukira tsona anafundzie kanda-kanda ya Ziya ra Galilaya (piya roihwa, "Ziya ra Tiberia.") Na hivi ndivyo vyokala:

²Simoni Petero, Tomasi ambaye piya kala aihwa "Patsa", Nathanieli ambaye wavyalwa Kana jimbo ra Galilaya, ana a Zebedayo, na anafundzi anjina airi kala a phamwenga.

³Simoni Petero waambira ayae, "Naphiya vyangu nkavuwe." Nao achimuamba, "Sisi piya hundaphiya." Phahi apanda dau achendavuwa usiku kucha, lakini taayaphaha chitu.

⁴Wakati dzuwa kala rinaahula ingu, Jesu waima ufuwoni, lakini hara anafundzi taayamtambukira.

⁵Wauza achiamba, "Enehu, tamphahire ng'onda?" Nao achiamba, "Tahuphahire."

⁶Achiaambira, "Tsuphani chimia uphande wa kulume wa dau, namwi mndaaphaha ng'onda." Phahi ahenda hivyo, na ariphotsupha chimia, agbwira ng'onda anji hata asiweze kuchivweha na kuchiinjiza dauni, kpwa sababu ya unji wa ng'onda.

⁷Mwanafundzi yemendzwa sana ni Jesu wamuamba Petero, "Hiyu ni Bwana Jesu!" Simoni Petero ariphosikira kala ni Jesu, wasega nguwoze na achidzitabwisa madzini.

⁸Lakini hara anafundzi anjina akpwedza ufuwoni na dau, kuno anavweha chira chimia chokala chikaodzala ng'onda, mana kala taakure na ufuwoni, kama nyago gana mwenga bahi.

- ⁹Ariphofika ufuwoni, aona moho wa makala na ng'onda anawadwa. Piya kala phana mkahe.
- ¹⁰Alafu Jesu achiaambira, "Rehani ng'onda anjina mchioagbwira vi sambu."
- ¹¹Phahi Simoni Petero, yekala achere madzini, wavweha chira chimia hadi ufuwoni. Nacho kala chikaodzala ng'onda akulu-akulu gana mwenga na hamsini na tahu. Hata dzagbwe chimia kala china ng'onda anji, ela tachiyadoka bii.
- ¹²Chisha Jesu achiaambira, "Ndzoni hufunguleni." Ela hara anafundzi osi kala anamanya hakika kukala ni iye, na kpwa hivyo aogopha kumuza, "We u ani?"
- ¹³Phahi Jesu wahala hura mkahe, achiapha anafundzie achirya. Chisha achihala ng'onda na achihenda dza vivyo.
- ¹⁴Hino yakala mara ya hahu Jesu kutsembukira anafundzie bada ya kufufulwa.
- ¹⁵Bada ya kufungula, Jesu wamuamba Simoni Petero, "Simoni, mwana wa Johana, dze unanimendza zaidi kuriko hinya ayao animendzavyo?" Petero achiamba, "Ehe Bwana, hata we mwenye unamanya kala nakumendza." Achimuambira, "Haya, risa ana-ng'ondzi angu."
- ¹⁶Wamuza mara ya phiri, achiamba, "Simoni, mwana wa Johana, unanimendza?" Petero achiamba, "Ehe Bwana, unamanya kukala nakumendza." Achimuambira, "Rinda mang'ondzi gangu."
- ¹⁷Wamuza tsona mara ya hahu, "Simoni, mwana wa Johana, unanimendza?" Petero wasikira utsungu kpwa kuuzwa mara tahu, "Unanimendza?" Naye achiamba, "Bwana, unamanya chila chitu, mana hata we mwenye unamanya kala nakumendza." Jesu achimuambira, "Risa mang'ondzi gangu."
- ¹⁸Nakuambira kpweli, uriphokala barobaro, kala ukadzifunga nguwo na ukaphiya ulondako. Lakini wakati ndiphokala mtumia, undagolosa mikono na mutu wanjina akufunge na akuphirike usikolonda kuphiya."
- ¹⁹(Jesu wagomba higa kuonyesa ni chifo cha viphi ndichomphaha Petero ili amuphe nguma Mlungu.) Chisha achimuambira Petero, "Nilunga!"
- ²⁰Petero ariphokala anamlunga-lunga, wagaluka, achilola nyuma, na achimuona yuya mwanafundzi yemendzwa sana ni Jesu. (Mwanafundzi hiye ndiye ariyekala lavuni pha Jesu wakati wa chakurya cha dziloni na ndiye kala akamuza Jesu, "Bwana ni yuphi ndiyekusalata?")
- ²¹Petero ariphomuona yuya amendzwaye, chisha wamuza Jesu, "Dze yuno, andafwadze?"
- ²²Achiamba, "Rinakuhusuni hata nchitaka akale moyo mpaka ndiphouya? Phana rako rani, we nilunga tu!"

²³Phahi habari hizi zaenea kpwa afuasi osi kala hiyu mwanafundzi kandafwa. Lakini Jesu kayagomba hivyo, ela kala akaamba, "Rinakuhusuni hata nchitaka akale moyo mpaka ndiphouya?"

²⁴Hiyu ndiye mwanafundzi ariyeona mambo higa na matsoge mwenye, na ndiye yegaandika. Naswi hunamanya maneno agombago ni ga kpweli.

²⁵Lakini kuna mambo ganjina manji ambago Jesu wagahenda na tagaandikirwe. Kalapho chila chitu chaandikpwa, nafikiri dunia ndzima taingekala na nafwasi ya kuika vitabu vyosi.

Mahendo

Mahendo 1

- ¹Muishimiwa Teofilo, Chitabu changu cha kpwandza, naandika mambo gosi ambago Jesu wahenda na kufundza, kula mwandzo
- ²hadi siku yohalwa kuphiya mlunguni. Kabla kadzangbweuya mlunguni, waapha mitumee malagizo kpwa uwezo wa Roho wa Mlungu.
- ³Bada ya kufwa na kufufuka Jesu wakala na mitumee mara nyinji kpwa siku arubaini. Achiaonyesa dalili nyinji kuahakikishira kala ni mzima, na achigomba nao kuhusu ufalume ambao Mlungu wamupha.
- ⁴Siku mwenga ariphokala phamwenga nao waambira, "Msiuke hipha Jerusalemu, godzani ahadi yokuambirani, ambayo Baba Mlungu wailaga.
- ⁵Mana Johana wabatiza na madzi, lakini siku chache zedzazo mwimwi mndabatizwa na Roho wa Mlungu."
- ⁶Siku yanjina hara mitume ariphokala phamwenga na Jesu, amuuza, "Dze, Bwana, vino ndipho wakpwedzauyizira Aiziraeli utawala wao ili adzitawale enye?"
- ⁷Lakini iye achiaambira, "Siro renu kumanya wakati ama majira ambago Baba Mlungu waika, hinyo ni uwezowe mwenye.
- ⁸Lakini siku Roho wa Mlungu ndiphokpwedzerani mndaphaha nguvu na mndakala mashahidi gangu kula phapha Jerusalemu, Judea na Samariya kosi, na hata mpaka chila phahali duniani."
- ⁹Ariphomala kugomba higo, wahalwa kuphiya mlunguni, kuno anamlola. Alafu achizibwa ni maingu na achikala kaoneka tsona.
- ¹⁰Wakati hara mitume ka acherelola dzulu mlunguni vira Jesu ahalwavyo, phakpwedza alume airi gafula okala akavwala kandzu nyereru. Achiima phephi nao,
- ¹¹achiamba, "Mwi anatsi a Galilaya! Mbona mkaima kulola dzulu mlunguni? Jesu yuyu ambaye akahalwa kuphiya mlunguni, andauya vivyo hivyo mchivyomuona anaphiya mlunguni."
- ¹²Jesu ariphohalwa kuphiya mlunguni hara mitume auya Jerusalemu kula Mwango wa Mizeituni, ambako ni kama mwendo wa dakika kumi na tsano kula mudzi wa Jerusalemu.
- ¹³Ariphofika Jerusalemu, apanda chumba cha gorofani ambako ka anakala. Nao kala ni Petero, Johana, Jakobo, Anderea, Filipu, Tomasi, Batholomayo, Mathayo, Jakobo mwana wa Alfayo, Simoni (ambaye piya ka achiihwa Mpiganiadzi Uhuru), na Juda mwana wa Jakobo.

¹⁴Chila wakati hara mitume kala achiungana phamwenga na achetu fulani, Maryamu nine wa Jesu, na nduguze. Achikala anavoya Mlungu kama kundi mwenga.

¹⁵Siku mwenga afuasi a Jesu kama atu gana mwenga na ishirini kala akakutana phamwenga. Phahi Petero waima achigomba nao achiamba,

¹⁶⁻¹⁷"Enehu, ka n'lazima Maandiko ga Mlungu gatimizwe. Hipo kare Mfalume Daudi walongozwa ni Roho wa Mlungu achigomba chimbere maneno ambago gamphaha Juda. Iye kala ni myawehu, mana piya naye kala akatsambulwa kuhenda kazi phamwenga, ela wakala chilongozi wa atu ariomgbwira Jesu."

¹⁸(Juda wagula munda na zira pesa zophaha kpwa kuhenda mai, wagbwa mo mndani achifwa; achiahuka ndani na mahumbo gosi gachitsamuka.

¹⁹Atu osi a Jerusalemu ariphosikira habari hizo, hinyo munda awiia, "Akelidama" kpwa kabila yao, manage ni, Munda wa Mlatso.)

²⁰Phahi Petero achienderera kugomba, achiaambira, "Kpwa mana Chitabu cha Zaburi chaandikpwa, 'Nyumbaye naitamwe; naitisagale mutu.' Na tsona ichiandikpwa, 'Nafwasiye ya kazi naihewe mutu wanjina.'

²¹⁻²²Kpwa hivyo n'lazima mutu mmwenga adziunge naswi na akale shahidi wa kufufuka kpwa Jesu. N'lazima hutsambuleni mutu yekala myawehu wakati wosi phokala Bwana Jesu anazunguluka hiku na hiko, hangu ariphobatizwa ni Johana mpaka siku yohalwa kuphiya mlunguni."

²³Phahi, hura mkutano walavya madzina ga atu airi; mmwenga ni Yusufu Barisaba ambaye piya kala achiihwa Justo na wanjina kala ni Mathiasi.

²⁴Chisha achivoya Mlungu, achiamba, "Mlungu umanyaye roho ya chila mutu, hunakuvoya uhuonyese hinya alume airi, ni yuphi uchiyemtsambula,

²⁵ili ahale nafwasi ya kazi ya utume yorichwa ni Juda, na achiphiya kpwahali komuajira."

²⁶Alafu apiga kura, na kura ichimgbwerera Mathiasi. Naye achitiywa kundi ra hara mitume anjina kumi na mmwenga.

Mahendo 2

¹Siku ya Pentekosti iriphofika, afuasi osi a Jesu kala akakusanyika pahali phamwenga.

²Phahi, kpwakala na m'vumo gafula kula mlunguni kama wa phuto kali. Hura m'vumo uchiodzaza nyumba yosi yokala afuasi asegere.

³Alafu mura chumbani mwatsembuka vilinje vya moho vyokala vinaaka, vichidziganya na vichigbwerera chila mmwenga.

- ⁴Na Roho wa Mlungu wainjira mwao mioyoni na chila mmwenga achiandza kugomba na luga tafwauti tafwauti kama Roho wa Mlungu arivyoajaliya.
- ⁵Phahi hiko Jerusalemu kala kuna Ayahudi amuogophao Mlungu, kula tsi zosi dunia ndzima.
- ⁶Ariphosikira hinyo m'vumo, umati mkpwulu wa atu wakpwedza na uchitezeka mana chila mmwenga wasikira higo gagombwago kpwa lugaye.
- ⁷Aona vituko na achitezeka sana, chisha achiamba, "Dze, hinya osi huasikirao kugomba si ni enyezi a Galilaya?"
- ⁸Ikaandzadze hata sisi hosi hunaasikira anagomba kpwa luga zehu za chienyedzi?
- ⁹Mana hipha phana makabila manji: phana Aparithi, Amedi, Aelami, na anjina ni a kula Mesopotamia, Judea, Kapadokia, Ponto, Asia,
- ¹⁰anjina ala Firigia, Pamfilia, Misiri na seemu za Libiya phephi na Kirene. Anjina ni ajeni kula Rumi,
- ¹¹(Ayahudi na atu anjina ambao sio Ayahudi lakini ahendainjira dini ya Chiyahudi), piya phana Akirete na Arabu. Naswi hunaasikirani anagomba luga zehu enye, vituko vikulu vya Mlungu ahendavyo!"
- ¹²Atu osi atezeka na achikala na wasi-wasi, kuno anauzana, "Mambo gano manage ni ni?"
- ¹³Lakini anjina achikala anaachania anaamba, "Hinya atu akalewa!"
- ¹⁴Ndipho Petero achiunuka phamwenga na hara mitume anjina kumi na mwenga, achigomba kpwa sauti na hura umati, achiamba, "Ayahudi ayangu na mwimwi mosi mkalao Jerusalemu, sikizani sawa-sawa nkuelezeni mana ya mambo higa.
- ¹⁵Atu hinya taakalewa kama mfikiriyavyo, mana bado ni saa tahu tu za ligundzu.
- ¹⁶Lakini mambo higa gagombwa hipho kare ni nabii Joeli achiamba:
- ¹⁷'Mlungu anaamba: Siku za mwisho anadamu osi n'ndaarehera Roho wangu. Ana enu, alume kpwa achetu andatangaza ujumbe kula kpwangu. Barobaro andaona ruwiya, nao atumia andaloha ndoso.
- ¹⁸Ehe! Hata atumishi angu, alume kpwa achetu, n'ndaarehera Roho wangu siku hizo, nao andatangaza maneno gangu.
- ¹⁹N'ndaonyesa maajabu dzulu mlunguni, na dalili zindaonekana duniani. Kundakala na viha, moho na mosi mkpwulu.
- ²⁰Kabla ya kufika Siku hiyo kulu muhimu ya Mlungu, dzuwa tarindaala na mwezi undakala kundu dza mlatso.
- ²¹Lakini mutu yeyesi ndiyemririra Mlungu andaokolwa.' "

- ²²Petero waenderera kuaambira atu, "Enehu Aiziraeli, sikizani! Mosi mnamanya kukala Jesu wa Nazareti wahenda vilinje na dalili kahi zenu. Na higa ganaonyesa wazi kukala watsambulwa ni Mlungu.
- ²³Mutu hiyu warehwa kpwenu ni Mlungu kpwa uamuziwe kama arivyopanga. Ela mwamuolaga kpwa kumlavya na atu asiomanya Shariya za Mlungu, nao achimkota misumari msalabani.
- ²⁴Lakini Mlungu wamfufula, na achimuusira utsungu wa chifo kpwa sababu kala taiwezekana abaki lufu.
- ²⁵Kpwa mana hipho kare Mfalume Daudi wagomba kumhusu, achiamba: 'Namanya Mlungu a phephi nami na ananirinda wakati wosi; nguvuze nkuniika salama wakati wa tabu.
- ²⁶Kpwa hivyo moyo wangu una raha, tsona napiga njerejere. Nami hata dzagbwe n'ndafwa lakini naishi na matumaini.
- ²⁷Kpwa sababu kundaricha roho yangu mbirani, wala kundaricha mtumishio mwenye uriyemtsambula aole mbirani.
- ²⁸Wanifundza njira za kuishi vinono, n'ndahamirwa sana ni uwe kukala phephi nami.' "
- ²⁹"Enehu, nakuhakikishirani kuhusu mkare wehu Daudi. Iye wafwa, achizikpwa na mbiraye i mumu hata rero.
- ³⁰Lakini Daudi kala ni nabii, na wamanya kukala Mlungu wamlaga na achimlaphira kukala mmwenga wa uvyaziwe andakala mfalume dza viratu Daudi arivyokala mfalume.
- ³¹Daudi watabiri kuhusu kufufuka kpwa Masihi, ariphoamba kukala, rohore tariyarichwa mbirani, wala mwiriwe tauyaola.
- ³²Sambi, sisi hosi hu mashahidi kukala Mlungu wamfufula kpweli hiyu Jesu.
- ³³Phahi, Jesu wahalwa kuphiya mlunguni, asegere mkpwono wa kulume wa Mlungu, phatu pha ishima kulu sana, na waphokera Roho wa Mlungu kula kpwa Baba Mlungu ambaye kala akamlaga, naye wahupha sisi ye Roho. Mambo higa mgasikirago na kugaona ganahakikisha maneno higa.
- ³⁴Mana Daudi mwenye kayahalwa kuphiya mlunguni, ela waamba: 'Mwenyezi Mlungu wamuamba Bwana wangu: Sagala uphande wangu wa mkpwono wa kulume, phatu pha ishima kulu sana,
- ³⁵hadi nihende maaduigo gakugbwerere maguluni.' "
- ³⁶Chimarigizo Petero waamba, "Phahi Aiziraeli osi ni amanye kukala, Jesu yuyatu ambaye mwamkota misumari msalabani, Mlungu wamhenda Mtawala na Muokoli."

- ³⁷Phahi hara atu okala anamsikiza Petero phosikira vira, ajuta, achimuza Petero na hara mitume anjina, "Enehu, vino sambu sino huhendedze?"
- ³⁸Petero achiaambira, "Chila mmwenga naatubu dambize na abatizwe kpwa dzina ra Jesu Masihi, ili asamehewe. Namwi mindaphaha zawadi ya Roho wa Mlungu.
- ³⁹Ahadi hino ni fwaida yenu, vivyazi vyenu na atu osi ario kure, ni ya mutu yeyesi ambaye Mwenyezi Mlungu wehu andamualika."
- ⁴⁰Petero waaeleza kpwa chirefu na achiabembeleza sana, waambira, "Dziepusheni na adabu ndizoaphaha atu hinya ayi!"
- ⁴¹Phahi, atu osi ariokubali maneno ga Petero abatizwa, na siku hiyo kundi ra afuasi a Jesu raenjerezeka atu kama elufu tahu.
- ⁴²Afuasi hinya adzilavya wakati wosi kudzifundza kpwa mitume, kuishi kama ndugu, kurya mikahe phamwenga na kuvoya Mlungu phamwenga.
- ⁴³Chila mmwenga waangalazwa ni vilinje vinji vyohendwa ni mitume.
- ⁴⁴Atu osi ariomkuluphira Jesu akala phatu phamwenga na achikumira vitu vyao vyosi phamwenga.
- ⁴⁵Aguza vitu arivyokalanavyo, na pesa arizophaha achiganyira ayawao okala anataka msada.
- ⁴⁶Na kala achikutana ndani ya Nyumba ya Kuvoya Mlungu chila siku. Piya kala achirya phamwenga hiko kpwao madzumbani, ka achirya na raha na roho mwenga,
- ⁴⁷kuno anamtogola Mlungu. Atu anji ahamirwa sana, na chila siku Mlungu warienjereza kundi rao na hara ambao ka achiokoka.

Mahendo 3

- ¹Siku mwenga, Petero na Johana kala anainjira Nyumba ya Kuvoya Mlungu, akavoye mavoyo ga saa tisiya.
- ²Mutu mmwenga chiswere hangu kuvyalwakupwe kala anatsukulwa kurehwa ryango ra Nyumba ya Kuvoya Mlungu riihwaro Ryango Nono. Kala nkurehwa chila siku kpwedzavoya pesa atu ainjirao himo.
- ³Ariphoona Petero na Johana anataka kuinjira ndani ya Nyumba ya Kuvoya Mlungu, yuya chiswere waavoya pesa.
- ⁴Petero na Johana amloloto, chisha Petero achimuamba, "Hebu huloletu!"
- ⁵Hipho, yuya chiswere waaloloto achiona labuda andahewa chitu.
- ⁶Lakini Petero achimuamba, "Mino sina pesa wala zahabu, ela n'ndakupha n'richo nacho. Kpwa uwezo wa Jesu Masihi wa Nazareti, ng'oka unyendeke."

- ⁷Wamgbwira mkpwono wa kulume achimuunula, na mara mwenga yuya chiswere achidina magulu.
- ⁸Watina achiima na maguluge na achiandza kunyendeka. Alafu achiinjira nao Nyumba ya Kuvoya Mlungu. Wanyendeka mwenye na kutina-tina kuno anamtogola Mlungu.
- ⁹Atu osi amuona ananyendeka na achimtogola Mlungu.
- ¹⁰Hara atu achimtambukira kala ni yuya chiswere ambaye kala achisagala phara ryango Nono ra kuinjirira Nyumba ya Kuvoya Mlungu kpwa kuvoya pesa. Phahi aangelazwa sana ni higo gohenderwa yuya chiswere.
- ¹¹Yuya chiswere phokala akamgbwira Petero na Johana, atu osi aphiya mairo mpaka phahali phoihwa Varanda kulu ya Selemani na achitezeka.
- ¹²Petero ariphoona hara atu, waamba, "Enehu, Aiziraeli ayangu, mkaangelazwa ni ni? Mbona mkahutumburira matso? Uwezo uchiomhenda hiyu mutu anyendeke sio uwezo wehu, wala sio uzuri wehu kpwa Mlungu.
- ¹³Ela Mlungu yeabudiwa ni Brahimu, Isaka na Jakobo na ambaye piya waabudiwa ni akare ehu anjina, wamtogola mtumishiwe Jesu. Ela mwamlavya na atawala a Chirumi, tsona mchimrema mbere za mtawala Pilato, hata bada ya Pilato kukata shauri amrichire.
- ¹⁴Iye asiye na lawama wala makosa, mwamrema, na mchimuamba Pilato akuvugurireni mutu yeolaga atu.
- ¹⁵Mwaolaga mutu ambaye ndiye chandzo cha uzima, lakini Mlungu achimfulula, naswi hu mashahidige.
- ¹⁶Mutu hiyu mummanyaye ka ni chiswere, akaphola kpwa kukuluphira uwezo wa Jesu. Kumkuluphira Jesu kukamphoza kabisa kama mmuonavyo.
- ¹⁷Enehu, namanya mrivyomhenda Jesu mwimwi na atawala enu mwayugbwa nkusamanya.
- ¹⁸Lakini hivyo ndivyo Mlungu arivyotimiza maneno gotabiriwa kare ni manabii ariphoamba Masihi, n'lazima agaye.
- ¹⁹Phahi tubuni na mgaluze mioyo yenu na kulola Mlungu ili akuusireni dambi zenu.
- ²⁰Namwi mchihenda hivyo Mlungu andakujaliyani, na kukureherani Muokoli, ambaye ni Jesu.
- ²¹N'lazima abaki hiko mlunguni mpaka wakati Mlungu ndiphotengeza uphya chila chitu, kama manabii matakatifu arivyogomba hipho kare.

²²Mana Musa waamba, 'Bwana Mlungu andazembula nabii kula kpwa kabila rehu dza vivyo vyonihuma mimi. Na n'lazima mhende chila chitu ndichokuambirani.

²³Ambaye kandamsikiza, andatengbwa kabisa na atu a Mlungu na kuangamizwa.'

²⁴Manabii gosi hangu Samueli na kuenderera atabiri kuhusu siku hizi hurizo nazo sambu.

²⁵Hizo ahadi za Mlungu arizolaga kuhumira manabiige ni zenu, na chilagane choikpwa na akare enu dza vivyo. Mlungu wamuambira Brahimu hivi, 'Makabila gosi duniani gandabarikiwa kpwa sababu ya uvyazio.'

²⁶Phahi ariphomtsambula mtumishiwe Jesu, mwandzo wamreha kpwenu ili akujalieni kpwa kumhenda chila mmwenga atubu dambize na kuricha njiraze mbii."

Mahendo 4

¹Petero na Johana kala acheregomba na atu ndani ya Nyumba ya Kuvoya Mlungu, alavyadzi-sadaka, Masadukayo na mkpwulu wa asikari a Nyumba ya Kuvoya Mlungu achitsoloka.

²Atsukirwa sana kpwa sababu kala anafundza na kugomba wazi kukala Jesu wafufuka, kuonyesa kukala atu a kufwa andafufuka.

³Aagbwira na achendaatiya jela, na kpwa vira kala ni dziloni kare, aaricha jela hadi ligundzu.

⁴Lakini atu anji ambao asikira mafundzo gao aamini. Afuasi a Jesu aenjerezeka mpaka achifika kama alume elufu tsano.

⁵Kuriphocha, hara alimu a Shariya, azehe na vilongozi anjina a Chiyahudi akala na baraza hiko Jerusalemu.

⁶Anasi, ambaye kala ni Mlavyadzi-sadaka Mkwulu, kala a phapho barazani, phamwenga na Kayafa, Johana, Isikanda na ndugungbwa zanjina za Mlavyadzi-sadaka Mkwulu.

⁷Petero na Johana arehwa barazani na achiuzwa, achiambwa, "Mwino, yuya chiswere mwamphoza kpwa uwezo wani ama kpwa dzina ra ani?"

⁸Phahi, Petero walongozwa ni Roho wa Mlungu achiamba, "Atawala eh na azehe!

⁹Ichikala rero ndipho hunatakpwa huseme vyomtery yuya chiswere na kusema vyophozwa,

¹⁰phahi ni hivi: Mwimwi azehe na atu osi a Iziraeli n'lazima mmanyeye kukala hiyu chiswere aimireye hipha mzima kabisa waphozwa ni uwezo wa dzina ra Jesu Masihi wa Nazareti, ambaye mwamuolaga msalabani, ela Mlungu achimfufula.

- ¹¹Naye ndiye ambaye neno ra Mlungu ragomba kumhusu phoambwa: 'Dziwe mrirorema mwimwi adzengi, ndipho rikakala dziwe kulu ra msingi.'
- ¹²Wokofu tauphahikana kula kpwa mutu wanjina yeyesi, isiphokala kpwa Jesu, mana takuna dzina ranjina rorosi duniani rohewa anadamu kuaokola."
- ¹³Hara anachama a baraza ka anamanya kala Petero na Johana ni atu a kawaida wala taana ilimu ya mwanya. Hiphoh, atezeka ariphoaona anagomba chilume, achimanya kukala akala phamwenga na Jesu.
- ¹⁴Lakini kpwa vira amuona yuya mutu yephozwa aimire phephi, taayakala na ra kugomba.
- ¹⁵Phahi alagiza Petero na Johana atuluke kondze ya baraza, alafu achibisha aho enye kpwa enye.
- ¹⁶Achiuzana achiamba, "Huahendedze atu hano? Chila mmwenga akalaye Jerusalemu anamanya kukala ahenda vilinje, naswi tahuweza kurema.
- ¹⁷Lakini, huchitaka kuzuwiya mambo higa kuenea zaidi, n'lazima huaonye asigombe tsona na mutu yeyesi kuhusu Jesu."
- ¹⁸Alafu Petero na Johana aihwa ndani na achiambirwa asigombe tsona wala kufundza mambo ga kuhusu Jesu.
- ¹⁹Lakini achiamba, "Lolani enye ra sawa mbere za Mlungu, kukuogophani mwimwi ama kumuogopha Mlungu.
- ²⁰Kpwa mana tahuweza kuricha kugomba mambo hurigogaona na kugasikira."
- ²¹Phahi hara azehe a baraza aatishira zaidi Petero na Johana, chisha achiarichira aphiye vyao. Nao aona wazi kala taiwezekana kuatiya adabu, kpwa sababu atu osi kala anamtogola Mlungu kpwa gara arigohenda.
- ²²Hiye chiswere yehenderwa vilinje achiphozwa ka ana zaidi ya miaka arubaini.
- ²³Petero na Johana ariphorichirwa, auya kpwa afuasi ayawao na achendasemurira mambo gosi arigoambwa ni akulu a alavyadzi-sadaka na azehe a Chiyahudi.
- ²⁴Hinyo ayawao ariphosikira hivyo, aungana phamwenga osi achivoya Mlungu kpwa sauti, achiamba, "Mwenyezi Mlungu, Muumba wa dzulu mlunguni, dunia, bahari na vitu vyosi!
- ²⁵Mlungu, Rohoo wamlongoza mkare wehu mtumishio Daudi achiamba: 'Mbona atu ambao sio Ayahudi atsukirwa? Atu hinyo anapanga njama za bure.
- ²⁶Afalume a duniani adzitayarisha, nao atawala akutana phamwenga, ili ampinge Mwenyezi Mlungu na hiye Masihi.' "

²⁷Chisha achienderera kuvoya achiamba, "Mana, kpwa kpweli Herode, Pontio Pilato, Aiziraeli na atu asio Aiziraeli akutana phamwenga mumu mudzini kumpinga Jesu, mtumishio mwenye uriyemtsambula.

²⁸Akutana ili ahende mambo ambago wapanga kula mwandzo gahendeke kpwa uwezoo.

²⁹Sambi Bwana, lola vyo vitisho vyao, hunakuvoya uhujaliye sisi atumishio ili hutangaze nenoro bila ya wuoga kabisa.

³⁰Hunavoya uhuphe uwezo wa kuphoza na uhende vilinje kpwa uwezo wa mtumishio Jesu."

³¹Ariphomala kuvoya, phara phahali phokala anakutana phasumba. Nao achiodzalwa ni Roho wa Mlungu na achitangaza ujumbe wa Mlungu bila ya wuoga.

³²Atu osi ariomkuluphira Jesu akala chitu chimwenga chiroho na chimaazo. Takuna hata mmwenga yehenda malize zikale zakpwe macheye, lakini ahumira vitu vyao vyosi phamwenga.

³³Hara mitume kala achitangaza kufufuka kpwa Jesu na uwezo munji sana, na osi Mlungu achiajaliya sana.

³⁴Takuna yeyesi yephungukirwa ni chitu. Kpwa mana hara ariokala na minda ama nyumba aguza na pesaze achizirehera mitume.

³⁵Mitume ka ana uwezo wa hizo pesa, nao ka achiaganyira ario na shida, kulengana na shida ya mutu.

³⁶Mmwenga wa atu arioguzi mali zao ni Yusufu, wa mbari ya Lawi kula tsi ya Kupuro. Mitume ka achimuiha Barinaba (manage ni Mutu wa kutiya moyo.)

³⁷Waguza mundawe na pesaze achizilavya kpwa mitume.

Mahendo 5

¹Kala kuna mutu mmwenga yeihwa Anania, na mchewe Safira, ambao nao aguza munda wao.

²Anania na mchewe akubaliana na achifwitsa pesa zanjina na zosala achiziphirikira mitume.

³Phahi Petero wamuamba Anania, "Mbona ukakubali Shetani akatawala rohoyo hata unamchenga Roho wa Mlungu kpwa kufwitsa pesa zanjina urizophaha uriphoguzi munda?

⁴Hinyo munda uriphokala kudzangbweuguza kala ni wako, na uriphoguzi, hizo pesa piya kala ni zako. Sambu, yakaladze hata uchiona uhende dzambo dza hiri? Phahi, kunichengere mimi binadamu myao, ela ukamchenga Mlungu."

- ⁵Anania ariphosikira hivyo, wagbwa na achifwa. Atu osi osikira mambo higo atishirwa sana.
- ⁶Alafu phakpwedza barobaro achimtiya shanda, achimtsukula kondze na achendamzika.
- ⁷Bada ya kama masaa mahahu hivi, naye Safira, mkpwaza Anania, wakpwedza, achikala kamanya chigohendeka.
- ⁸Petero achimuuza, "Hebu niambira, zino pesa ni zosi mrizophaha na mlumeo mriphoguzi munda?" Safira achiamba, "Ehe, ni zosi."
- ⁹Ndipho Petero achiamba, "Mbona mwahenda njama na mlumeo kumpima Roho wa Mlungu? Sikiza! Hara achiozika mlumeo a pho mryangoni, na andakutsukula kondze piya uwe."
- ¹⁰Saa iyo-iyo achigbwa maguluni pha Petero na achifwa. Hara barobaro ambao ka akamzika mlumewe ariphoinjira ndani amkuta akafwa kare, achimhala na achendamzika phephi na mlumewe.
- ¹¹Kundi rosi ra afuasi a Jesu na atu osi anjina osikira mambo higo aona wuoga sana.
- ¹²Atu ahenderwa vilinje vinji na maajabu ni mitume. Afuasi osi a Jesu ka achikutana Varanda kulu ya Selemani ndani ya Nyumba ya Kuvoya Mlungu.
- ¹³Mutu yeyesi ambaye kala kamkuluphira Jesu waogopha kudziunga nao, lakini atu osi kala achiatogola.
- ¹⁴Ela ariomkuluphira Jesu na kukala afuasie azidi kuenjerezeka sana, alume kpwa achetu.
- ¹⁵Kpwa sababu ya vilinje vyohendwa ni mitume, atu kala achireha akongo ao vitandani na michekani na kualaza barabarani ili Petero achitsapa, chivurivuriche chigute akongo anjina.
- ¹⁶Piya atu anji kula midzi ya kanda-kanda ya Jerusalem areha akongo ao na ambao kala anayugbwa ni pepho, nao osi aphozwa.
- ¹⁷Badaye Mlavyadzi-sadaka Mkwulu na ayae osi ambao kala ni kundi ra Masadukayo, waaonera wivu sana hara mitume.
- ¹⁸Phahi waagbwira achiatiya jela.
- ¹⁹Lakini usiku malaika wa Mlungu wakpwedzaavugurira mryango na achiatuluza kondze, chisha achiaambira,
- ²⁰"Phiyani mkaima ndani ya Nyumba ya Kuvoya Mlungu, na muambire atu habari zosi za maisha higa maphya."
- ²¹Hara mitume ainjira Nyumba ya Kuvoya Mlungu pepho za kucha, kama vyolagizwa na achiandza kufundza atu. Wakati hinyo hinyo Mlavyadzi-sadaka

Mkpwulu na ayae, waiha mkutano wa angambi, yani baraza rosi ra vilongozi a Iziraeli, chisha achilagiza hara mitume alaviwe jela na arehwe hipho barazani.

²²Lakini hinyo arindzi a Nyumba ya Kuvoya Mlungu ariphofika hiko jela, akpwendakuta mitume taamo. Hipho, auya na achendasema kpwa akulu hipho barazani,

²³achiaambira, "Hukakuta jela ikafungbwa sawa-sawa, na arindzi anarinda mryangoni. Lakini huchiphoinjira tahukakuta mutu himo ndani."

²⁴Mkpwulu wa arindzi a Nyumba ya Kuvoya Mlungu na akulu a alavyadzi-sadaka ariphosikira hivyo, atezeka sana na achishindwa ni kumanya chiroaphaha.

²⁵Alafu kpwakpwedza mutu achiamba, "Sikizani! Hara atu mrioatiya jela, anafundza ndani ya Nyumba ya Kuvoya Mlungu."

²⁶Hipho, mkpwulu wa arindzi na ayae aphiya kpwendaahala na achiareha, lakini taayahumira nguvu, kpwa sababu aogopha atu asedze akaapiga mawe.

²⁷Hara mitume ariphorehwa, aimiswa mbere za hira ngambi, chisha Mlavyadzi-sadaka Mkpwulu achiamba,

²⁸"Sino hwakukahazani kabisa kufundza kuhusu mutu hiyu Jesu, lakini tamdzangbwesikira. Sambu lolani, mwaeneza mafundzo genu Jerusalemu ndzima na vino mnataka muutiye lawamani kuhusu chifoche!"

²⁹Lakini Petero na mitume ayae achiamba, "N'lazima humuogophe Mlungu wala siye mwanadamu!"

³⁰Mlungu ariyevoywa ni akare ehu wamfulula Jesu, ambaye mwamuolaga kpwa kumkota misumari msalabani.

³¹Chisha Mlungu wamuika uphande wa mkpwono wa kulume, phatu pha ishima kulu sana, wamhenda Chilongozi na Muokoli, ili kuapha nafwasi Aiziraeli atubu dambi zao na asamehewe.

³²Naswi hu mashahidi a mambo higo. Roho wa Mlungu ambaye Mlungu waapha atu amuogophao piya ni shahidi."

³³Hara anachama a ngambi ariphosikira vira, atsukirwa sana hata achitaka hara mitume aolagbwe.

³⁴Lakini phakala na Mfarisayo mmwenga yeihwa Gamalieli, mwalimu wa Shariya, ambaye kala anaishimiwa ni atu osi. Waima mbere za atu osi na achilagiza hara mitume atuluzwe kondze kpwandza.

³⁵Alafu achiamba, "Enehu, Aiziraeli ayangu, dzimanyirireni sana na higo mtakago ahendera atu hano.

³⁶Kare chidide, kpwazuka mutu yehwa Theuda, achidzihenda mutu wa kumanyikana, wakala na afuasi kama magana mane. Badaye waolagbwa na afuasie osi achitsamukana, mamboge gachisirira hipho.

³⁷Badaye, wakati hura wa kutala atu, kpwazuka wanjina yehwa Juda kula Galilaya. Iye naye wahenda afuasie, lakini piya naye waolagbwa, nao afuasie osi achitsamukana.

³⁸Phahi, nakuambirani aricheni aphiye vyao, wala msiahende rorosi! Mana ichikala mipango ama mambo gao gaandzwa ni binadamu, gandakala na mwisho.

³⁹Lakini ichikala mambo higa gala kpwa Mlungu, tamndaweza kuazuwiya, richirobaki mndadzikuta mnashindana na Mlungu." Hipho, hara anachama a ngambi akubali maneno ga Gamalieli.

⁴⁰Achiaiha ndani hara mitume, achiachapa viboko, chisha achiakahaza asifundze tsona kuhusu Jesu. Alafu achiarichira aphiye vyao.

⁴¹Phahi hara mitume ariphokala anatuluka na rira Baraza ra azehe, ahererwa sana kpwa mana Mlungu waaesabu kukala anafwaha kuphaha waibu wa kuchapwa viboko kpwa sababu ni afuasi a Jesu.

⁴²Lakini chila siku, ndani ya Nyumba ya Kuvoya Mlungu na midzini mwa atu, hara mitume aenderera kufundza na kusemurira kukala Jesu ndiye Muokoli.

Mahendo 6

¹Siku hizo afuasi a Jesu aenjerezeka. Ayahudi agombao Chigiriki anung'unika kukala Ayahudi agombao Chiebrania anaabaguwa. Aamba kala magungu gao tagaganyirwa maitaji gao ga chakurya cha chila siku sawa-sawa.

²Hipho, hara mitume kumi na airi akusanya afuasi osi na achiaambira, "Siyo sawa sisi kuricha neno ra Mlungu na kuimirira chakurya.

³Phahi enehu, tsambulani atu sabaa kula mu kundini ambao analikpwa na manono, anatawalwa ni Roho wa Mlungu, na ana marifwa. Naswi hundaarichira kazi hiyo.

⁴Lakini sisi enye hundadzishugulisha na kuvoya Mlungu na kazi ya kusemurira mafundzoge."

⁵Mpango hinyo wahamira kundi zima. Hipho atsambula atu sabaa: Stefano (ambaye ka anamkuluphira sana Mlungu na yetawalwa ni Roho wa Mlungu), Filipu, Purokoro, Nikanori, Timoni, Parmena, na Nikolao wa Antiokia (kala siye Myahudi lakini awali kala ni mfuasi wa dini ya Chiyahudi).

⁶Afuasi achiarehera mitume hara atu achiotsambulwa, nao mitume achiavoyera na achiabandikira mikono.

- ⁷Hipho, atu anji zaidi asikira habari za Jesu, na afuasi aenjerezeka sana hiko Jerusalem. Tsona, kundi kulu ra alavyadzi-sadaka a dini ya Chiyahudi achilunga mafundzo kuhusu Jesu na achimkuluphira.
- ⁸Mlungu ka akamjaliya sana Stefano; wamupha uwezo munji hata achikala anahendera atu vilinje vinji na maajabu.
- ⁹Lakini kuchizuka malumbano ga Stefano na atu a sinagogi ra Ayahudi riihwaro Sinagogi ra Atu Huru. Sinagogi hiro kala ni ra Ayahudi kula midzi ya Kirene na Isikandaria, na kundi ranjina kula majimbo ga Kilikia na Asia.
- ¹⁰Ela Roho wa Mlungu wamupha Stefano achili nyinji sana hata ichikala chila agombaro takuna mutu awezaye kuripinga.
- ¹¹Alafu apanga njama na atu edze agombe handzo aambe, "Hwamsikira Stefano anamkufuru Mlungu na kugomba mai kuhusu Shariya za Musa."
- ¹²Hinyo atu okala analumbana na Stefano afyakatsira kundi ra atu, phamwenga na alimu a Shariya na vilongozi anjina a Chiyahudi. Phahi amgbwira Stefano na achimreha mbere za ngambi.
- ¹³Achireha mashahidi a handzo achiamba, "Chila wakati mutu hiyu anagomba mai kuhusu Nyumba ya Kuvoya Mlungu na Shariya za Musa.
- ¹⁴Kpwa mana sino hwamsikira anaamba, 'Jesu wa Nazareti andabomola Nyumba ya Kuvoya Mlungu na agaluze mila zosi zorehwa ni Musa.' "
- ¹⁵Atu osi okala hipho ngambini amtong'orera matso Stefano, na achiona usowe ukagaluka dza wa malaika.

Mahendo 7

- ¹Phahi Mlavyadzi-sadaka Mkwulu wamuza Stefano, "Dze mambo gano ni ga kpweli?"
- ²Naye Stefano achiamba, "Enehu na ano baba, nisikizani! Mwenyezi Mlungu wamtsembukira mkare wehu Brahimu wakati acheresagala Mesopotamia, kabla kadzangbwekpwendasagala Harani.
- ³Mlungu wamuamba, 'Tsama hipho phenu, uriche mbarizo na nduguzo na uphiye tsi ambayo n'ndakuonyesa.'
- ⁴Hipho, watsama tsi ya Akalidayo na achendasagala Harani. Bada ya chifo cha ise, Mlungu wamtsamiza mpaka tsi hino mriyo mwimwi hivi sambu.
- ⁵Wakati hinyo Mlungu kayamupha Brahimu hata nyago mwenga ya tsi hiyo ikale yakpwe. Lakini wamlaga kala andamupha na badaye ikale ya vivyazivyeye, hata dzagbwe Brahimu mwenye kala kana mwana wakati na hinyo.
- ⁶Mlungu wamuamba Brahimu, 'Umanye hakika uvyazio undakala ujenini tsi ambayo siyo yao; andakala atumwa na andateswa miaka magana mane.

- ⁷Lakini n'ndaatiya adabu hara atu andioahenda atumwa, chisha badaye uvyazio undatsama tsi hiyo na wedze uniabudu hipha.'
- ⁸Alafu Mlungu wahenda tsatsa ikale dalili ya chilagane cha iye na Brahimu. Phahi, badaye Brahimu wavyala Isaka na achimdeka ariphokala ana siku nane. Naye Isaka ariphovyala Jakobo wamtiya tsatsani, naye Jakobo achivyala ana kumi na airi, akarengbwa a mbari kumi na mbiri za Aiziraeli.
- ⁹Hinya ana a Jakobo amuonera wivu Yusufu na achimguza akakale mtumwa hiko Misiri. Lakini Mlungu wamrinda,
- ¹⁰na achimtivya na mashaka gosi. Mlungu wamjaliya marifwa na achimhenda aonekane mzuri kpwa Farao, mfalume wa Misiri. Hipho, mfalume wamuika mkpwulu wa tsi ya Misiri na mwimirizi wa nyumbaye.
- ¹¹Alafu kpwakala na ndzala kali Misiri yosi na Kanani, ambayo yagayisa sana atu, na hinyo akare ehu achikala taana chakurya.
- ¹²Phahi Jakobo ariphosikira kukala Misiri kuna chakurya, wahuma anae, yani akare ehu, kuphiya Misiri mara ya kpwandza.
- ¹³Charo cha phiri, Yusufu wakpwendadzimanyisa kpwa nduguze, na piya mfalume wa Misiri waphaha habari kuhusu ndugungbwa za Yusufu na ise yao.
- ¹⁴Badaye Yusufu wahuma atu alungirwe ise, na abarie osi ili edze Misiri. Jumula osi kala ni atu sabini na tsano.
- ¹⁵Phahi Jakobo waphiya Misiri, ambako ndiko kofwa iye na akare ehu.
- ¹⁶Miri yao ya uyizwa Shekemu, ambako yakpwendazikpwa vikurani pha Brahimu ambapho kala akaphagula na uvyazingbwa wa Hamori kpwa chasi fulani cha pesa.
- ¹⁷Wakati uriphofika wa Mlungu kumtimizira Brahimu ahadiye ya kulavya uvyaziwe utumwani, Ayahudi kala akaenjerezeka sana hiko Misiri.
- ¹⁸Alafu mfalume wanjina, ambaye kala kamanya rorosi kuhusu Yusufu, watawala Misiri.
- ¹⁹Warihendera uyi kabila rehu na kuatesa akare ehu kpwa kualazimisha aike ana ao atsanga kondze ili afwe.
- ²⁰Wakati na hinyo ndipho Musa phovyalwa, naye kala ni mnono sana mbere za Mlungu. Warerwa nyumbani mwa ise miezi mihahu,
- ²¹na ariphoikpwa kondze ili afwe, mwana mchetu wa Farao wamtsola na achimrera kama mwanawe.
- ²²Musa wafundzwa marifwa gosi ga Amisiri na achikala mutu mashuhuri wa kugomba na hata kuhenda.

- ²³Musa ariphokala ana miaka arubaini, wakata shauri kpendanyendekera Aiziraeli ayae.
- ²⁴Hiko arikophiya, wakpwendamuona Muiziraeli myawe anateswa ni Mmisiri. Hipo, Musa wamkanira myawe na achidziriphiza kpwa kumuolaga yuya Mmisiri.
- ²⁵(Musa kala anaona hinyo Aiziraeli ayae andamanya kala Mlungu anamhumira iye kuaokola, lakini taayamanya.)
- ²⁶Muhondoye, Musa waona Aiziraeli airi anapigana, achiakanya achiamba, 'Enehu, amba mwi mu ndugu, mbona mnaheha?'
- ²⁷Lakini yuya ambaye kala anamlumiza myawe, wamsukuma Musa kanda na achimuamba, 'Ni ani yekuhenda mtawala wehu na mkanyi?'
- ²⁸Hebu unataka uniolage dza vira vyomuolaga yuya Mmisiri dzana?'
- ²⁹Musa ariphosikira hivyo, wachimbira achihiya tsi ya Midiani. Waishi kuko na achivyala ana airi a chilume.
- ³⁰Bada ya miaka arubaini kutsapa, malaika wamtsembukira Musa weruni phehi na Mwango wa Sinai. Malaika wamtsembukira na mfwano wa chitsaka cha miya chokala chinaaka moho.
- ³¹Musa ariphoona gara maphungo ganaaka moho na tagaphya, watezeka. Ariphokala anasengera phephi ili aphaoleto, wasikira sauti ya Mlungu inaamba,
- ³²'Mimi ni Mlungu wa akareo Brahimu, Isaka na Jakobo.' Hipo, Musa wagbwirwa ni mchecheta kpwa wuoga hata kayaaza kuphalola tsona.
- ³³Alafu Mlungu achimuamba, 'Vula virahuvyo, mana hipo uimirepho ni phahali photengbwa kpwa kazi ya Mlungu.
- ³⁴Kpwa kpweli nikaona mateso ga atu angu hiko Misiri. Nikasikira chiriro chao na nkedzaokola. Sambu, ndzoo hipha ili nikuhume hiko Misiri.' "
- ³⁵"Musa yuhiyu ndiye yeremewa ni Aiziraeli, achimuamba, 'Ni ani yekuhenda mtawala wehu na mkanyi?' Iye ndiye yehumwa ni Mlungu akakale mtawala na mkomboli wao, wakati ariphotsembukirwa ni malaika phara chitsaka cha miya.
- ³⁶Iye ndiye ariyetsamiza Ayahudi kula Misiri na achiendera vilinje na maajabu ariphokala Misiri na hiko Bahari ya Shamu, na ariphokala weruni miaka arubaini.
- ³⁷Musa hiye hiye ndiye yeaambira Aiziraeli, 'Mlungu andakureherani nabii wanjina kula kpwa uvyazi wenu dza vivyo vyonireha mimi.'
- ³⁸Musa yehiye ndiye yekala phamwenga na Aiziraeli ariphokala akakusanyika phamwenga hiko weruni. Ndiye yehewa malagizo ni malaika dzulu ya Mwango wa Sinai ariphokala na akare ehu. Tsona ndiye yehewa maneno garehago uzima aurehere sisi.

- ³⁹Lakini akare ehu arema kumsikiza, achimkahala na achiaza kuuya Misiri.
- ⁴⁰Amuamba Haruni, 'Hutengezere milungu ambayo indahulongoza njirani. Kpwa mana hiye Musa yehulavya Misiri tahumanya gomphaha.'
- ⁴¹Wakati hinyo ndipho ariphotengeza sanamu ya mfwano wa ndzau. Achiilavira sadaka; ahendera sheree chitu ambacho ahendachitengeza nyo enye.
- ⁴²Lakini Mlungu wagaluka na achiaaricha aenderere kuabudu nyenyezi za mlunguni, kama vyoandikpwa ni manabii, achiamba: 'Mwimwi atu a Iziraeli! Mimi siye mriyenitsindzira nyama kunipha sadaka miaka arubaini hiko weruni.
- ⁴³Mwatsukula hema ra mlungu wenu Moloki, na sanamu ya nyota ya mlungu wenu Refani, hizi kala ni sanamu mrizotengeza kuabudu. Kpwa hivyo n'ndakutsamizani mkaishi kure, kutsapa Babeli.'
- ⁴⁴Hiko weruni akare ehu akala na hema ra kumuabudu Mlungu. Ratengezwa viratu Mlungu vyomlagiza Musa, na ratengezwa na mfwano ambao Musa kala akaonyeswa.
- ⁴⁵Chisha akare ehu a wakati wa Musa arisiza hema ana ao. Aritsukula na achiphiya na Joshuwa na achendateka tsi ya atu ambao kala sio Ayahudi, ambao Mlungu waazoresa mbere za akare ehu. Hema hiro rakala hiko mpaka endzi ya Mfalume Daudi.
- ⁴⁶Mlungu wamjaliya Daudi, naye achivoya ruhusa amdzengere Mlungu wa Jakobo nyumba ya kuishi.
- ⁴⁷Lakini Mfalume Selemani ndiye yemdzengera Mlungu nyumba.
- ⁴⁸Ela Mwenyezi Mlungu kaishi nyumba zidzengbwazo ni atu; kama arivyogomba nabii Isaya:
- ⁴⁹'Mlunguni ni chihi changu cha chifalume na dunia ni chigogo changu cha kuikira magulu. Ni nyumba ya viphi yo ndiyonidzengera mwimwi? Na ni phahali gani ambapho naweza kuoya?
- ⁵⁰Vitu vyosi hivyo navitengeza mwenye na mkpwono wangu.' "
- ⁵¹Phahi Stefano waamba, "Aa! Atu siosikira mwi! Maroho genu ni mafu na masikiro genu ni mazito kugbwira maneno ga Mlungu. Mnahenda dambi dza akare enu. Chila wakati mnampinga Roho wa Mlungu!
- ⁵²Dze, ni nabii yuphi ambaye akare enu taayamtesa? Piya aolaga ahumwa ambao atabiri kpwedza kpwa mutu asiye na lawama wala makosa, ambaye mwimwi mwamsalata na mchimulaga vi dzuzi dzuzi.
- ⁵³Mwimwi mwahewa Shariya zirizolaviwa kpwa Musa ni malaika, lakini mchirema kuzilunga."

⁵⁴Hara anachama a ngambi ariphosikira hivyo, atsukirwa sana, achiphya roho kpwa utsungu.

⁵⁵Lakini Roho wa Mlungu wamuinjira Stefano na achimupha uwezo. Achilola dzulu mlunguni na achiona mwangaza mkpwulu wa Mlungu, achimuona Jesu aimire mkpwono wa kulume wa Mlungu, phatu pha ishima kulu sana.

⁵⁶Achiaambira, "Lolani! Naona mlungu ukafwenuka, na Mutu Yela Mlunguni aimire mkpwono wa kulume wa Mlungu."

⁵⁷Phahi atu osi okala hipho, apiga likululu na achiziba masikiro na mikono. Chisha osi achimuurukira chilimwenga.

⁵⁸Amtsukula hadi kondze ya mudzi na achiandza kumpiga mawe. Mashahidi amupha nguwo zao barobaro mmwenga yehwa Sauli ili azirinde.

⁵⁹Wakati Stefano kala anapigbwa mawe, wavoya Mlungu, achiamba, "Bwana Jesu, phokera roho yangu."

⁶⁰Alafu wachita mavwindi na achipiga kululu, achiamba, "Bwana Mlungu, asamehe kpwa kuhenda dambi hino." Bada ya kugomba hivyo, achifwa.

Mahendo 8

¹Naye Sauli waona sawa-sawa Stefano kuolagbwa. Siku hiyo hiyo, kundi ra afuasi a Jesu hiko Jerusalemu raandza kuteswa sana, na osi achitsamukana kuphiya seemu za Judea na Samariya, siphokala hara mitume ndio ariosala.

²Atu amuogophao Mlungu amzika Stefano na achimiririra kpwa kudzipiga vifuwa.

³Sauli wajaribu kuangamiza kundi ra afuasi a Jesu. Kala achiinjira nyumba hadi nyumba na kuaguruta afuasi alume kpwa achetu kpwendaatiya jela.

⁴Hinyo afuasi a Jesu ambao kala akatsamukana akpwendatangaza habari ndzuri kuhusu Jesu chila phahali ariphophiya.

⁵Naye Filipu waphiya mudzi fulani tsi ya Samariya na achendatangaza kukala Jesu ndiye Muokoli.

⁶Umati wa atu uriphomsikira Filipu na kuona vilinje ahendavyo, amsikizato agombago.

⁷Pepho nyinji zatuluzwa kuno zinapiga kululu, na atu anji ambao ka akaphola vilungo na viswere aphozwa.

⁸Phahi, mudzi hinyo wakala na raha sana.

⁹Phahi, mudzi hinyo kala kuna mutu mmwenga yehwa Simoni. Iye ka achiteza atu osi a Samariya na utsai na achidzikarya kukala ni mutu mkpwulu.

¹⁰Phahi atu osi, akulu kpwa adide kala achimsikizato, nao kala achiamba, "Mutu yuyu ndiye ye mlungu aihwaye, 'Uwezo Mkpwulu.' "

- ¹¹Atu amsikiza kpwa sababu waangalaza atu na utsaiwe siku nyinji.
- ¹²Ela Filipu ariphotangaza habari ndzuri kuhusu utawala wa Mlungu na uwezo wa Jesu Masihi, atu anji aamini na achibatizwa, alume kpwa achetu.
- ¹³Hata Simoni mwenye naye waamini na achibatizwa. Wakala na Filipu chila phahali na achitezwa ni vilinje na maajabu makulu gohendwa ni Filipu.
- ¹⁴Hiko Jerusalemu hara mitume ariphosikira atu hiko Samariya akakubali ujumbe kula kpwa Mlungu, amlavya Petero na Johana aphiye kuko.
- ¹⁵Ariphofika hiko, aavoyera hara arioamini ili Roho wa Mlungu ainjire mwao mioyoni.
- ¹⁶Nao kala takuna yeyesi ambaye kala akaphokera Roho wa Mlungu moyoni; kala akabatizwa kpwa dzina ra Bwana Jesu tu.
- ¹⁷Alafu Petero na Johana aabandikira mikono, na Roho wa Mlungu achiinjira mwao mioyoni.
- ¹⁸Simoni ariphoona Roho wa Mlungu akainjira mwao mioyoni phobandikirwa mikono ni hara mitume, wataka kuapha pesa,
- ¹⁹na achiamba, "Nami piya niphani uwezo hinyo, ili chila mutu ndiyem'bandikira mkpwono, Roho wa Mlungu ainjire mwakpwe moyoni."
- ²⁰Lakini Petero achimuamba, "Angamika na zo pesazo! Unafikiri unaweza kugula zawadi yolaviwa bure ni Mlungu?"
- ²¹Taphana funguro kabisa kpwa kazi hino, mana moyoo tausawa mbere za Mlungu.
- ²²Phahi, tubu uyio na uvoye Mlungu akusamehe maazogo mai uazago mwako rohani.
- ²³Mana ukaodzala wivu mui kama sumu na u mtumwa wa dambi."
- ²⁴Simoni achiamba, "Nivoyerani Mlungu ili higo mchigoamba gasiniphahe."
- ²⁵Petero na Johana ariphomala kuaonya nyo atu na kusemurira neno ra Mlungu, auya Jerusalemu. Himo njirani atangaza habari ndzuri kuhusu Jesu, mitaa minji ya Asamariya.
- ²⁶Alafu malaika wa Mlungu wamuamba Filipu, "Unuka uphiye uphande wa mwakani, barabara ya weruni ilayo Jerusalemu kuphiya Gaza."
- ²⁷Phahi, Filipu waandza charo, na mo njirani achimuona karani mkpwulu wa pesa za sirikali ya Malikia wa Ithiyopia, yeihwa Kandake. Hiye karani ka ala Jerusalemu kumuabudu Mlungu,
- ²⁸na ka anauya kaya. Kala anaphiya kuno anasoma chitabu cha nabii Isaya ndani ya gari ra kuvutwa ni farasi.

- ²⁹Roho wa Mlungu achimuamba Filipu, "Zorera rira gari na unyendeke naro chiphephi."
- ³⁰Hipho, warizorera na achimsikira yuya mutu anasoma Chitabu cha nabii Isaya. Achimuuza, "Dze, unaelewa go usomago?"
- ³¹Yuya karani achimuamba, "N'ndaelewadze bila ya mutu kunieleza?" Alafu achimkaribisha Filipu apande mo garini asagale naye.
- ³²Yuya karani kala anasoma neno ra Mlungu riambaro: "Iye wakala dza ng'ondzi riphirikpwaro kutsindzwani. Dza viratu Mwana-ng'ondzi ahuriravyo wakati wa kukatwa nyoya, vivyo hivyo naye wanyamala.
- ³³Watiywa waibu na achilafiwa haki. Takuna awezaye kueleza kuhusu chivyaziche, kpwa sababu wahendaolagbwa himu duniani."
- ³⁴Yuya karani wamuamba Filipu, "Hebu tafadhali niambira, yuno nabii anagomba kuhusu ani? Ganamhusu ye mwenye, hebu anagomba kuhusu mutu wanjina?"
- ³⁵Phahi Filipu waandza na phara phahali ambapho yuya karani ka akasoma na achimuambira habari ndzuri kuhusu Jesu Muokoli.
- ³⁶Wakati kala anaenderera na charo chao, afika phahali ambapho kala phana madzi. Ndipho yuya karani achimuamba Filipu, "Lola, madzi higa. Kpwa utu wani nisibatizwe?"
- [³⁷Filipu achimuamba, "Uchiamini chikpweli rohoni, unaweza kubatizwa." Yuyu mutu achiamba, "Naamini kala Jesu Masihi ndiye Mwana wa Mlungu."]
- ³⁸Phahi wamuamba mtumishiwe aimise rira gari. Alafu osi airi, Filipu na yuya karani, atserera tsini madzini, na Filipu achim'batiza.
- ³⁹Ariphotuluka madzini, Roho wa Mlungu wamhala Filipu, na yuya karani sebu amuone tsona, lakini waenderera na charoche na raha sana.
- ⁴⁰Filipu watsembuka mudzi wa Azoto, achitangaza habari ndzuri kuhusu Jesu midzi yosi ya njirani mpaka achifika mudzi wa Kaisaria.

Mahendo 9

- ¹Wakati hinyo hinyo, hiko Jerusalemu Sauli wazidi kutisha kuolaga afuasi a Jesu. Waphiya kpwa Mlavyadzi-sadaka Mkpwulu,
- ²na achendavoya baruwa za kudzimanyisa kpwa masinagogi hiko mudzi wa Damaskasi, ili achiphaha afuasi a Jesu, alume ama achetu, aagbwire na aaphirike Jerusalemu.
- ³Phahi, Sauli wauka, achifika phephi na Damaskasi. Gafula wapigbwa ni mwanga mkali kula mlunguni,
- ⁴achigbwa photsi na achisikira sauti inamuamba, "Sauli, mbona unanitesa?"

- ⁵Achiuza, "U ani Bwana?" Achiambwa, "Ni mimi Jesu, ambaye unanitesa.
- ⁶Sambi phiya hiko mudzini, na undaambirwa ra kuhenda."⁷Hara atu ambao ka anasafiri naye aima gbwi, mana asikira sauti lakini taaonere mutu yeyesi.
- ⁸Sauli waunuka phara photsi, achifwenula matso lakini gachikala tagaona. Kpwa hivyo hara ayae amgbwira mkpwono na achimlongoza kuphiya naye mpaka Damaskasi.
- ⁹Wakala chipofu siku tahu na kayarya wala kunwa chitu chochosi.
- ¹⁰Hiko Damaskasi kala kuna mfuasi mmwenga wa Jesu yeihwa Anania. Bwana Jesu wagomba naye ruwiyani na achimuiha, "Anania." Achiihika, "Ehe, Bwana."
- ¹¹Achiambwa, "Phiya phahali phaihwapho Barabara ya Kugoloka, nyumbani kpwa Juda, na ukauze mutu aihwaye Sauli kula mudzi wa Tariso. Iye viwi anavoya Mlungu,
- ¹²na akaona ruwiya. Hiko ruwiyani akaona mutu aihwaye Anania aredza kum'bandikira mikono ili aphahe kuona tsona."
- ¹³Phahi Anania waamba, "Bwana, mutu hiye námsikira habarize kula kpwa atu anji, kuhusu mateso manji ahenderago atuo hiko Jerusalemu.
- ¹⁴Hata viwi ana baruwa kula kpwa akulu a alavyadzi-sadaka ya kumupha uwezo wa kugbwira mutu yeyesi amkuluphiraye Jesu."
- ¹⁵Lakini achiambwa, "Phiya vivyo, mana nkamtsambula akale mtumishi wangu wa kutangaza habari zangu kpwa atu ambao sio Ayahudi phamwenga na afalume ao, na hata kpwa Aiziraeli.
- ¹⁶Na mi mwenye n'ndamuonyesa ndivyoteseka kpwa sababu yangu."
- ¹⁷Phahi Anania waphiya na achendainjira nyumba iriyokala Sauli. Chisha achim'bandikira mikono na achimuamba, "Mwenehu Sauli, Bwana Jesu yekutsembukira njirani phokala uredza hiku, wanihuma ili uone tsona na ulongozwe ni Roho wa Mlungu."
- ¹⁸Saa iyo-iyo kuchigbwa vitu dza mamba ga ng'onda kula matsoni mwa Sauli, na achikala anaona. Phahi, wang'oka achiima na achibatizwa,
- ¹⁹na bada ya kurya, wauyiza nguvuze. Sauli wasagala masiku hiko Damaskasi phamwenga na afuasi anjina a Jesu.
- ²⁰Phahi waandza mara mwenga kusemurira masinagogini kukala Jesu ndiye Mwana wa Mlungu.
- ²¹Atu osi ariomsikira Sauli anagomba atezeka sana, na achikala anauzana, "Dze, yuno siye yuya mutu yekala achitesa atu amkuluphirao Jesu hiko Jerusalemu? Mana hata kuku wakpwedza na nia ya kuagbwira na kuaphirika Jerusalemu kpwa akulu a alavyadzi-sadaka!"

- ²²Lakini Sauli wazidi kukala na nguvu za kuaonyesa na Maandiko kukala Jesu ndiye Masihi, hata Ayahudi a Damaskasi achikala taana ra kumuamba.
- ²³Bada ya masiku kutsapa, vilongozi a Chiyahudi ahenda njama ya kumuolaga Sauli,
- ²⁴lakini ye wamanya njama hiyo. Hinyo Ayahudi kala achigodza ryangoni usiku na mutsi, ili amphahe Sauli amuolage.
- ²⁵Lakini afuasie amtiya bwekoni usiku na achimtsereza kondze na dzitunduni, dzitundu ririrokala ukutani.
- ²⁶Sauli waphiya Jerusalemu na ariphofika hiko wataka kudziunga na afuasi a Jesu. Lakini afuasi osi achikala anamuogopa, mana kala taamini kama ni mfuasi wa Jesu kpweli.
- ²⁷Ela Barinaba wakpwezamhala Sauli achimphirika kpwa mitume. Wakpwendasemurira vira Sauli arivyomuona Bwana Jesu njirani, phokala anaphiya Damaskasi, alafu achiaeleza vira Jesu vyogomba naye. Piya waeleza hara mitume vira Sauli arivyogomba kuhusu Jesu bila ya wuoga hiko Damaskasi.
- ²⁸Phahi, Sauli wasagala nao na achinyendeka nao hiko Jerusalemu, achisemurira habari za Jesu bila ya wuoga.
- ²⁹Kala achilumbana na Ayahudi agombao Chigiriki, lakini achitaka kumuolaga.
- ³⁰Afuasi a Jesu ariphomanya dzambo hiri, aphiya naye mudzi wa Kaisaria, alafu achimhuma kuphiya mudzi wa Tariso.
- ³¹Hipho, afuasi a Jesu okala Judea, Galilaya na Samariya akala salama na achienderera kumuogopa Mlungu. Roho wa Mlungu aatiya moyo na kuapha nguvu, na kundi ra afuasi richienjerezeka.
- ³²Petero kala achizunguluka chila pahali kunyendekera afuasi a Jesu. Siku mwenga wanyendekera afuasi okala anaishi mudzi wa Lida.
- ³³Hiko Lida wakpwendakuta mutu yehwa Ainea, ambaye ka akaphola vilungo, hata ni wa chitanda, chitanda na iye, miaka minane.
- ³⁴Phahi Petero wamuamba, "Ainea, Jesu Masihi akaphoza ukongoo. Unuka uhandike mwenye chitandacho!" Na saa iyo-iyo Ainea achiunuka.
- ³⁵Atu anji osagala Lida na pwani ya Sharoni aona mambo higo na achigaluka achimkuluphira Bwana Jesu.
- ³⁶Hiko mudzi wa Yafa kala kuna mfuasi wa Jesu wa chichetu yehwa Tabitha (kpwa Chigiriki ni Dorokasi, manage ni chiphala.) Kala ni mutu mzuri na chila wakati ka achiterya achiya.
- ³⁷Phahi wakati uratu phokala Petero anawehera seemu hizo, Tabitha walumwa na achifwa. Achioshwa na achendaikpwa chumba cha gorofani.

³⁸Midzi ya Lida na Yafa kala ni pula na mromo, hipho afuasi a Jesu ariphomanya kala Petero a mudzi wa Lida, ahuma atu airi akamuambe, "Tafadhali ndzoo upesi."

³⁹Petero wakpwedza nao, na ariphotsoloka waphirikpwa chumba cha gorofani, ambako ka akaikpwa ye mufwa. Magungu gosi kala gakamzangira Petero kuno anarira na kumuonyesa mashati na marinda gotengezwa ni Dorokasi wakati ka ni mzima.

⁴⁰Petero waatuluza atu osi mura chumbani, alafu achichita mavwindi achivoya Mlungu. Chisha achigaluka kpwa ye mufwa na achiamba, "Tabitha, lamuka." Tabitha wavugula matso na ariphomuona Petero, waunuka achisagala.

⁴¹Wamgbwira mkpwono na achimterya kung'oka. Alafu achiaiha hara atu a Mlungu phamwenga na hara magungu, achimlavya Tabitha, mzima.

⁴²Habari za mambo higa zaenea mudzi wosi wa Yafa, na atu anji achimkuluphira Bwana Jesu.

⁴³Petero wasagala Yafa kpwa muda na mutu yeihwa Simoni, ambaye kala ni fundi wa kutengeza chingo.

Mahendo 10

¹Kpwakala na mutu mmwenga hiko mudzi wa Kaisaria yeihwa Korinelio, ambaye ka ni kapteni wa jeshi ra Chirumi riihwaro, "Chikosi cha Itali."

²Iye na atue osi phakpwe kaya kala ni atu azuri mbere za Mlungu, naye kala achiterya achiya, na kuvoya Mlungu chila wakati.

³Siku mwenga dzuwa ra mutsi kama saa tisiya, Korinelio waona ruwiya. Malaika wa Mlungu wamtsembukira wazi-wazi na achimwiha, "Korinelio!"

⁴Korinelio wamtong'orera matso kpwa wuoga, achiamba, "Ee Bwana, unaambadze?" Yuya malaika achiamba, "Mlungu wasikira mavoyogo hiko mlunguni na waona sadaka ulavyazo kuterya agayi, naye waika mambogo achilini.

⁵Sambi, huma atu aphiye mudzi wa Yafa akamuihe mutu mmwenga aihwaye Simoni, dzina ranjina ndiye Petero.

⁶Ni mjeni wa Simoni, fundi wa chingo na ambaye nyumbaye i kanda-kanda ya bahari."

⁷Yuya malaika ariyegomba naye ariphouka, Korinelio waiha atumishie airi na mrindziwe mmwenga ambaye kala anamuogopha Mlungu.

⁸Achiaeleza gosi achigogaona, chisha achiahuma Yafa kpwendamhala Petero.

⁹Muhondoye, hara atu ariphokala achere charoni, lakini phephi na mudzi wa Yafa, Petero wapanda dzulu ya nyumba kama saa sita za mutsi ili avoye.

- ¹⁰Lakini wasikira ndzala na achiaza chitu arye, na wakati chakurya kala chinatayarishwa, waona ruwiya.
- ¹¹Wakati hinyo waona mlunguni kukafwenuka na achiona chitu dza dzishuka kulu rinatserezwa photsi kuno rikagbwirwa pembe zosi nne.
- ¹²Rira dzishuka kala rina chila aina ya nyama a tsakani, nyama a kuambala photsi na nyama a mapha.
- ¹³Chisha achisikira sauti inamuamba, "Petero, lamuka utsindze urye."
- ¹⁴Lakini Petero achiamba, "Hata Bwana! Taiwezekana mana sidzangbwerya chitu ambacho ni najisi ama chichafu."
- ¹⁵Hira sauti ichigomba tsona ichiamba, "Vitu ambavyo Mlungu wavitakasa usiviambe ni vichafu."
- ¹⁶Mambo higa gahendeka mara tahu, alafu saa iyo-iyu hira shuka ichiuya mlunguni.
- ¹⁷Wakati Petero kala acheretanga-tanga mana ya hira ruwiya, hara alume ahahu okala akahumwa ni Korinelio ka akazembula hira nyumba ya Simoni, nao kala aimire ryangoni.
- ¹⁸Apiga hodi na achiuza, "Phano phana mjeni aihwaye Simoni ama dzina ranjina Petero?"
- ¹⁹Petero ariphokala acherefikiriya kuhusu hira ruwiya, Roho wa Mlungu wamuamba, "Petero, kuna atu ahahu anakuendza.
- ²⁰Sambi unuka utserere ko kotsi, na usihende wasi-wasi kuphiya nao mana mimi ndiye nchiyeahuma."
- ²¹Phahi watserera na achendaambira hara mabwana, "Mimi ndiye hiye mumuendzaye. Dze mnaniendzerani?"
- ²²Hara mabwana achimuamba, "Hukahumwa ni Korinelio kapteni wa jeshi. Ni mutu wa haki na ambaye anamuogopha Mlungu, tsona anaishimiwa ni Ayahudi osi. Malaika wa Mlungu wamuamba akualike kpwakpwe kaya ili asikize chochosi ndichomuamba."
- ²³Alafu Petero waakaribisha ajenie na achilala phapho. Muhondoye, waandza charo na ajenie, phamwenga na afuasi anjina a Jesu kula hipho Yafa.
- ²⁴Siku ya phiriye afika Kaisaria. Korinelio kala anamgodzera na kala akaalika nduguze na asenae.
- ²⁵Petero ariphokala anainjira nyumbani, Korinelio wamchinjira na achimgbwerera maguluni achimuabudu.
- ²⁶Lakini Petero achimuamba, "Unuka, mimi ni mwanadamu dza uwe tu."

- ²⁷Waenderera kubisha naye hadi nyumbani ambako wakpwendakuta atu anji.
- ²⁸Achiaambira, "Mosi mnamanya kukala kulengana na shariya za Chiyahudi ni makosa Myahudi kugbwirana na mutu asiye Myahudi ama kumnyendekera. Lakini Mlungu wanionyesa wazi nisimuihe mutu yeyesi mui ama mchafu.
- ²⁹Kpwa sababu hiyo, nripholavirwa mhumwa, nkedza bila ya wasi-wasi. Sambi nami nauza, mwanihirani?"
- ³⁰Korinelio achimuamba, "Dzuzi kala ni mwangu nyumbani navoya Mlungu, saa tisiya za mutsi, saa dza zizi. Gafula mutu yekala akavwala nguwo za kung'ala-ng'ala wakpwezaima mbere zangu.
- ³¹Na achiniamba, 'Mlungu wasikira mavoyogo hiko mlunguni na waona sadaka ulavyazo kuterya agayi, naye waika mambogo achilini.
- ³²Huma atu aphiye mudzi wa Yafa akamuihe mutu mmwenga aihwaye Simoni na dzina ranjina aihwa Petero. Iye ni mjeningbwa wa Simoni fundi wa chingo, ambaye asagala phephi na bahari.'
- ³³Ndipho nami nchikulavira ahumwa mara mwenga, na ukahendato kpwedza. Sambi sino hu mbere za Mlungu kusikiza chila chitu ambacho Mlungu akakulagiza uhuambire."
- ³⁴Phahi, Petero waandza kugomba nao achiamba, "Kpwa kpweli sambi nikaelewa kala Mlungu kana ubaguzi,
- ³⁵lakini anamkubali mutu wa kabila rorosi amuogophaye na kuhenda haki.
- ³⁶Mnamanya ujumbe ambao Mlungu wauphirikira Aiziraeli, kukala mutu yeyesi amkuluphiraye Jesu Masihi, ambaye ndiye Bwana wa atu osi, andasagala na amani.
- ³⁷Mnamanya rira rotokea tsi yosi ya Judea, kuandzira Galilaya bada ya Johana kuhubiri atu atubu na abatizwe.
- ³⁸Mlungu wamupha Jesu wa Nazareti uwezo na Rohowe. Kpwa sababu Mlungu kala anamterya, wazunguluka chila phahali kuhenda manono na kuphoza atu osi okala akatekpwa ni Shetani.
- ³⁹Sisi hu mashahidi a chila chitu arichohenda tsi ya Ayahudi na Jerusalemu. Wakotwa misumari msalabani na achiolagbwa,
- ⁴⁰lakini Mlungu wamfufula siku ya hahu. Na wamhenda aonewe,
- ⁴¹ela sio atu osi, ni hara mashahidi ambao Mlungu ka akaatsambula kare, yani sisi ambao warya na huchinwa naye bada ya kufufuka.
- ⁴²Jesu wahulagiza huatangazire atu habarize na kuashuhudiya kukala iye ndiye ambaye Mlungu wamtsambula akale jaji wa azima na akufwa.

⁴³Manabii osi agomba kumhusu, achiamba kala chila mutu ndiyemkuluphira andasamehewa dambize kpwa uwezo wa dzinare.”

⁴⁴Petero ariphokala acheregomba nao, Roho wa Mlungu wainjira moyoni mwa chila mmwenga yekala anasikiza maneno higo.

⁴⁵Ayahudi amkuluphirao Jesu okala akedza na Petero atezeka kpwa sababu zawadi ilayo kpwa Mlungu ambayo ni Roho wa Mlungu kala ikahewa atu hata ambao sio Ayahudi.

⁴⁶Kpwa mana hara Ayahudi aasikira anagomba luga tafwauti tafwauti na kumtogola Mlungu. Alafu Petero achiamba,

⁴⁷”Atu hano akamphokera Roho wa Mlungu dza vivyo sisi. Dze, ni ani ambaye anaweza kuazuwiya asibatizwe na madzi?”

⁴⁸Phahi walagiza abatizwe kpwa dzina ra Jesu Masihi. Alafu ariphobatzwa amuamba Petero abaki naye kpwa siku chache.

Mahendo 11

¹Mitume na atu amkuluphirao Jesu Judea yosi asikira kala atu asio Ayahudi nao akubali mafundzo ga kumhusu Jesu.

²Phahi, Petero ariphophiya Jerusalem, afuasi anji ariotiywa tsatsani ampinga sana.

³Achimuamba, "Waphiya madzumbani kpwa atu ambao taatiywa tsatsani na uchendarya nao.”

⁴Phahi Petero waandza kueleza chila chitu hangu mwandzo hadi mwisho.

⁵Achiamba, "Siku mwenga kala navoya Mlungu ko mudzi wa Yafa, nchiona ruwiya. Náona chitu dza shuka kulu ikagbwirwa pembe nne, inatserezwa kula mlunguni, na ichedza hata pho ka n'ripho.

⁶Náilolato ira shuka kulu na nchiona nyama a magulu mane, nyama a tsakani, nyama akuambala photsi na nyama a mapha.

⁷Alafu nchisikira sauti inaniamba, 'Petero, unuka, tsindza urye.'

⁸Lakini mino nchiamba, 'Hata Bwana! Taiwezekana, mana sidzangbwerya chitu ambacho ni najisi ama chichafu.'

⁹Hiyo sauti yagomba tsona kula mlunguni, ichiamba, 'Vitu ambavyo Mlungu wavitakasa usiviambe ni vichafu.'

¹⁰Higa gahendeka mara tahu, alafu ira shuka kulu ichiuyizwa mlunguni.

¹¹Saa iyo-iyó alume ahahu okala akahumwa kula mudzi wa Kaisaria, atsoloka phara nyumbani phokala nasagala.

¹²Roho wa Mlungu waniamba niphiye nao wala nisihende wasi-wasi. Piya náphiya na aha afuasi sita na nchendainjira nyumbani mwa Korinelio.

¹³Korinelio wahuambira vira malaika vyomtsembukira mwakpwe nyumbani na achimuamba, 'Huma atu hiko mudzi wa Yafa akamuihe Simoni ambaye piya aihwa Petero.

¹⁴Iye andakpwezakuambira maneno ambago gandakuokola, uwe na atuosi phako kaya.'

¹⁵Nriphoandza kugomba, Roho wa Mlungu wainjira mwao mioyoni dza viratu vyokpwedza kpwehu hipho mwandzo.

¹⁶Ndipho nriphotambukira Bwana Jesu vyogomba, achiamba 'Johana wabatiza na madzi, lakini mwimwi mndabatizwa na Roho wa Mlungu.'

¹⁷Ichikala Mlungu waapha zawadi dza iratu yohewa sisi, huriphomkuluphira Jesu Muokoli, sambi mino nina uwezo wani wakumpinga Mlungu?"

¹⁸Ariphosikira hivyo, taayalumbana naye tsona. Amtogola Mlungu kuno achiamba, "Mlungu waapha atu ambao sio Ayahudi nafwasi ya kutubu na kuphaha uzima wa milele."

¹⁹Hara afuasi ambao kala akatsamukana kpwa sababu ya mateso wakati wa kuolagbwa Stefano, aphiya mpaka seemu za Foinike, chisiwa cha Kupuro na mudzi wa Antiokia. Akpwendasemurira neno ra Mlungu kpwa Ayahudi bahi.

²⁰Lakini afuasi anjina kula chisiwa cha Kupuro na mudzi wa Kirene aphiya Antiokia na achendasemurira habari ndzuri kuhusu Bwana Jesu kpwa Agiriki nao.

²¹Mlungu waajaliya achiapha uwezo, na kundi kulu ra atu ragaluka na richimkuluphira Jesu.

²²Habari hizi zaafikira afuasi okala Jerusalemu, nao achimhuma Barinaba kuphiya Antiokia.

²³Ariphofika hiko na kuona baraka za Mlungu, wahererwa na achiatiya moyo osi ili akale aaminifu chikpweli-kpweli kpwa Mlungu.

²⁴Mana kala ni mutu mnono, ambaye kala anatawalwa ni Roho wa Mlungu na ariyekala na kuluphiro ra kudina. Phahi kundi kulu ra atu richimkubali Bwana Jesu.

²⁵Badaye Barinaba waphiya mudzi wa Tariso kpendamuendza Sauli,

²⁶na ariphomphaha, wakpwedza naye Antiokia. Phahi Barinaba na Sauli akala na kundi ra afuasi mwaka mzima na achifundza kundi kulu ra atu. Hiko Antiokia ndiko ambako afuasi a Jesu aandza kuihwa Akristo.

²⁷Wakati hinyo hinyo hiko Antiokia kpwakpwedza manabii kula Jerusalemu.

²⁸Mmwenga wa hinyo manabii kala aihwa Agabo. Agabo waima na achitabiri kpwa uwezo wa Roho wa Mlungu kukala; vi karibuni kundahenda ndzala kali dunia ndzima. (Ndzala hiyo yakala wakati wa utawala wa Klaudia.)

²⁹Afuasi akata shauri chila mmwenga atsange chochosi kulengana na uwezowe kuterya afuasi ayawao okala anaishi Judea.

³⁰Phahi atsanga, na achilavya pesa zao kpwa Barinaba na Sauli ili ziphirikpwe Judea kpwa vilongozi a kundi ra afuasi a Jesu.

Mahendo 12

¹Siku hizo Mfalume Herode wagbwira afuasi anjina na achiandza kuatesa.

²Wamuolaga Jakobo ndugungbwa wa Johana na upanga.

³Herode ariphoona Ayahudi akahamirwa ni dzambo hiro, walagiza Petero agbwirwe. Petero wagbwirwa bada ya Sukukuu ya Mikahe Isiyotiywa Amira.

⁴Bada ya Petero kugbwirwa, wamtiya jela, na achilavya asikari amrinde. Asikari aganywa makundi mane na chila kundi kala rina asikari ane. Nia ya Herode kala anataka Petero ashitakiwe mbere za atu bada ya Sukukuu ya Pasaka.

⁵Phahi, Petero ariphokala jela, afuasi ayae am'voyera Mlungu kpwa chadi sana.

⁶Usiku ambao Herode kala andamlavya Petero kpwa atu, Petero kala arere kahi-kahi ya asikari airi kuno akafungbwa minyororo miiri. Piya kala kuna arindzi anarinda ryango ra jela.

⁷Gafula malaika wa Mlungu achitsembuka na muching'ala mo jela. Wampiga Petero lavuni achimlamusa, achimuamba, "Lamuka upesi!" Na mara mwenga hira minyororo ichivuguka mura mikononi na ichigbwa.

⁸Alafu yuya malaika achimuamba, "Vwala nguwozo na virahuvyo." Petero achivwala. Chisha malaika achimuamba, "Dzifunge mkumbuu na unilunge."

⁹Petero achimlunga-lunga yuya malaika hadi kondze. Lakini kala kamanya kukala, gara gahendwago ni malaika ganahendeka kpweli; waona analoha tu.

¹⁰Atsapa asikari a mwandzo, na achitsapa a phiri, alafu achifika ryango ra chuma ra kuinjirira mudzini. Hiro ryango ravuguka renye na achitsapa. Anyendeka barabarani phamwenga, alafu gafula yuya malaika achiangamika na achimricha Petero macheye.

¹¹Ndipho Petero aching'alwa ni matso na achiamba, "Ehe! Sambu ndipho, nikaelewa. Kpwa kpweli Mlungu akahuma malaikawe ili edze aniokole na uyi wa Herode na chila chitu ambacho Ayahudi kala akapanga kunihendera."

¹²Petero ariphomanya hivyo, waphiya kaya kpwa Maryamu, nine wa Johana Mariko, ambako atu anji kala akakutana na anavoya Mlungu.

¹³Wapiga hodi mryangoni, na mtumishi wa chichetu aihwaye Roda wakpwedza mryangoni ili amvugurire.

¹⁴Yuya msichana ariphotambukira sauti ya Petero, wahererwa sana, na badala ya kuvugula mryango, wazola ndani na achendaambira atu, "Petero a pho mryangoni!"

¹⁵Nao achimuamba yuya msichana, "Una koma we?" Lakini iye achishata kukala ni kpweli, Petero anapiga hodi phondze. Nao achimuamba, "Hiye n'lazima akale ni malaikawe."

¹⁶Naye Petero hiko kondze ka akadinisa kupiga hodi. Mwisho hara atu avugula mryango, na ariphomuona, atezeka sana.

¹⁷Petero waatsuphira mikono ili anyamale na alafu achiaeleza vira Mlungu achivyomtuluza jela. Chisha achiaambira, "Muelezeni Jakobo mambo higa na afuasi anjina a Jesu." Alafu Petero wauka achiphiya phahali phanjina.

¹⁸Ligundzure kuriphocha, hiko jela kpwakala na fujo ra ajabu, kpwa mana hinyo asikari ka anauzana richiromphaha Petero.

¹⁹Herode walagiza Petero aendzwe chila phahali, lakini kayaphahikana. Hipo walagiza hara asikari auzwe maswali, chisha aolagbwe. Bada ya higo, Herode wauka Judea achiphiya mudzi wa Kaisaria na achendakala kpwa muda.

²⁰Wareyezwa sana ni atu a midzi ya Tiro na Sidoni. Lakini nao ataka mapatano kpwa sababu tsi zao kala zikaadamira tsi ya Mfalume Herode kpwa chakurya. Phahi aungana phamwenga na achim'bembeleza Balasto, ambaye kala ni mtumishi muhimu wa mfalume, ili akale uphande wao wakati achiphiya kpwa mfalume.

²¹Alafu kpwatsambulwa siku, Herode achivwala kandzuye ya chifalume, achisagala chihiche cha chifalume, na achilavya hutuba kpwa atu a Tiro na Sidoni.

²²Hinyo umati wa atu wapiga kululu uchiamba, "Hiyo ni sauti ya mlungu na wala sio ya mwanadamu."

²³Phapho hipho malaika wa Mlungu wam'bwaga Herode na ukongo, kpwa sababu kala kamphere Mlungu sifwa hiyo. Wariwa ni minyololo na achifwa.

²⁴Lakini atu anji asikira habari za Jesu, na afuasi aenjerezeka sana.

²⁵Barinaba na Sauli ariphomala kazi yao Jerusalem, auya Antiokia phamwenga na Johana Mariko.

Mahendo 13

¹Hiro kundi ra afuasi hiko Antiokia kala rina manabii na alimu. Atu hinyo kala ni Barinaba, Simioni ambaye piya kala achiihwa Mwiru, Lukio kula tsi ya Kirene, Manaeni ambaye warerwa phamwenga na Mfalume Herode, na Sauli.

- ²Wakati kala anamuabudu Mlungu na kufunga, Roho wa Mlungu waamba, "Nitengerani Barinaba na Sauli ili ahende kazi yoatsamburira."
- ³Phahi, bada ya kufunga na kuvoya, aabandikira mikono achiavoyera, na achiaricha achipiia vyao.
- ⁴Barinaba na Sauli ahumwa ni Roho wa Mlungu na achiuka kupiia bandari ya Seleukia. Bada ya hipho asafiri na meli kupiia chisiwa cha Kupuro.
- ⁵Ariphofika mudzi wa Salami, atangaza ujumbe wa Mlungu masinagogini. Johana Mariko wakala phamwenga nao kama msaidizi wao.
- ⁶Anyendeka chisiwa chosi hadi achifika mudzi wa Pafo ambako akutana na Myahudi mmwenga mtsai yehwa Bari-Jesu, na ambaye kala ni nabii wa handzo.
- ⁷Hiye mtsai kala ni msena wa Sarigio Paulo, ambaye ka ni mtawala wa chisiwa hicho. Hiye mtawala Sarigio Paulo ka ni mutu wa achili, naye wamuiha Barinaba na Sauli ili edze amuambire mafundzo kula kpwa Mlungu.
- ⁸Lakini yuya mtsai Elimasi (dzinare kpwa Chigiriki) wapinga na achijaribu kumzuwiya mtawala asikubali mafundzo kuhusu Jesu.
- ⁹Lakini Sauli, ambaye piya ka achiihwa Paulo, walongozwa ni Roho wa Mlungu, achimlolato yuya mtsai, achimuamba,
- ¹⁰"Mwana wa Shetani wee! Adui wa mambo ga kpweli! Wadziesha chila aina ya lihandzo na werevu, na chila wakati unalonda kugaluzha ukpweli wa Mlungu ukale handzo.
- ¹¹Sambi Mlungu andakutiya adabu; undakala chipofu na kundaona mwanga wa dzuwa kpwa muda." Mara mwanga Elimasi achiona chitu dza guro na jiza. Waangaika hiku na hiko kuendza mutu wa kumbwira mkpwono na kumulongoza njira.
- ¹²Yuya mtawala wa hicho chisiwa ariphoona hivyo waangalazwa ni mafundzo ga Mlungu, na achiamini.
- ¹³Kula mudzi wa Pafo, Paulo wapanda meli na ayae kupiia mudzi wa Periga, seemu za Pamfilia, ambako Johana Mariko waricha ayae na achiuya Jerusalemu.
- ¹⁴Paulo na atu anjina atsapa na Periga hadi mudzi wa Antiokia seemu za Pisidia. Siku ya Kuoya ainjira sinagogini, na achendasagala.
- ¹⁵Bada ya mutu kusoma kula chitabu cha Shariya za Musa na Maandiko ga manabii, atawala a sinagogi amlavira mhumwa Paulo na ayae. Achiamba, "Enehu, ichikala mna neno rorosi ra kuaambira atu ili kuatiya moyo, tafadhalini gombani."
- ¹⁶Phahi Paulo waima, achiatsuphira mkpwono, chisha achiamba, "Enehu, Aiziraeli na mwimwi anjina mumuabuduo Mlungu, nisikizani!

- ¹⁷Mlungu wa Aiziraeli watsambula akare ehu, achiajaliya na achikala anji wakati ariphokala Misiri. Tsona waalongoza kuuka Misiri kpwa uwezowe mkpwulu sana.
- ¹⁸Chisha achiavumirira miaka arubaini ariphokala hiko weruni.
- ¹⁹Bada ya higa Mlungu waangamiza makabila sabaa gokala tsi ya Kanani na hiyo tsi achiipha atue.
- ²⁰Mambo higa gosi gahala kama miaka magana mane na hamsini. Badaye Mlungu waapha akare ehu majaji ili aalongoze. Nao alongoza hadi wakati wa nabii Samueli.
- ²¹Chisha hinyo akare ehu avoya Mlungu aphahe mfalume. Naye Mlungu achiapha Sauli, mwana wa Kishi wa kabila ra Benjamini, ambaye wakala mfalume wao miaka arubaini.
- ²²Na Mlungu ariphomuusa Sauli, wamuika Daudi akale mfalume. Mlungu wagomba maneno manono kuhusu Daudi, achiamba, 'Daudi mwana wa Jese anafurahisha moyo wangu; ni mutu ambaye andahenda chila chitu nilondacho.'
- ²³Mlungu wamhenda mmwenga wa chivyazi cha Daudi akale Muokoli wa Aiziraeli kama arivyolaga. Naye ni Jesu.
- ²⁴Kabla Jesu kadzangbweandza kaziye, Johana M'batizadzi waatangazira Aiziraeli osi atubu dambi zao na abatizwe.
- ²⁵Johana ariphokala anamarigiza kaziye, waamba, 'Mnafikiri mino ni ani? Mimi siye hiye mumgodzaye. Lakini sikizani! Kuna mutu aredza bada ya mimi ambaye sifwaha hata kuvugula virahuyeye.'
- ²⁶Enehu, chivyazi cha Brahimu, na mwimwi muabuduo Mlungu, habari za Mlungu za kuokola atu zarehwa kpwehu.
- ²⁷Atu a Jerusalemu na atawala ao taayamtambuwa Jesu ni ani. Wala taaelewere maneno ga manabii ambago kala gachisomwa chila Siku ya Kuoya. Phahi, kpwa sababu hiyo Ayahudi atimiza maneno ga manabii, mana amhukumu kunyongbwa.
- ²⁸Hata dzagbwe taayaphaha sababu ya kpweli ya kumuolaga Jesu, lakini amuamba Pilato, ni aolagbwe.
- ²⁹Bada ya kumhendera chila chitu choandikpwa kumhusu, amtsereza msalabani na achendamaliza mbirani.
- ³⁰Lakini Mlungu wamfufula,
- ³¹na kpwa muda mure atu ambao ka achisafiri na Jesu kula Galilaya mpaka Jerusalemu amuona. Nao ni mashahidige kpwa atu a Iziraeli.

- ³²Rero hunakuambirani habari ndzuri kukala mambo ambago Mlungu waalaga akare eh,
- ³³wahutimizira sisi chivyazi cha hinyo akare, kpwa kumfufula Jesu. Zaburi ya phiri, Mlungu waamba, 'Uwe u Mwanangu, rero mino nikakala Sowe.'
- ³⁴Na kuhusu kumfufula Jesu na asiote mbirani, Mlungu achiamba, 'N'ndakupha baraka zangu za kpweli zomlaga Daudi.'
- ³⁵Piya phahali phanjina phaandikpwa, 'Kundamricha mtumishio mwenye uriyemtsambula aole mbirani.'
- ³⁶Daudi wamhumikira Mlungu wakati wa uzimawe, alafu wafwa na achizikpwa vikurani pha akaree, na mwiriwe uchiola.
- ³⁷Lakini iye ambaye Mlungu wamfufula, kayaola.
- ³⁸Kpwa hivyo, enehu nataka mmanyane kala kpwa sababu ya mutu hiyu Jesu, hunaweza kukusemurirani ujumbe kuhusu kusamehewa dambi zenu.
- ³⁹Shariya za Musa taziweza kumhenda mutu kuphaha haki, lakini chila mutu amkuluphiraye Jesu anahendwa kukala wa haki.
- ⁴⁰Phahi dzimanyirireni msedze mkaphahwa ni higo gogombwa ni manabii:
- ⁴¹'Sikizani mwi atu a zarau, mndaangalala na kuangamika, mana n'ndahenda chitu wakati wenu ambacho, hata mutu achikuambirani, tamndaamini bii.' "
- ⁴²Paulo na Barinaba ariphokala anatuluka sinagogini, waalikpwa edze afundze tsona mambo higo Siku ya Kuoya yedzayo.
- ⁴³Mkutano uriphosira, Ayahudi anji na atu anjina alungao dini ya Chiyahudi aalunga na achendabisha nao. Paulo na Barinaba aabembeleza ili azidi kukuluphira mendzwa ya Mlungu, ambaye waajaliya.
- ⁴⁴Siku ya Kuoya iriphofika, karibu atu osi mudzi mzima akpwedzasikiza neno ra Mlungu.
- ⁴⁵Lakini Ayahudi ariphoona hura umati wa atu, aona wivu, achimlaphiza Paulo na achipinga gara agombago.
- ⁴⁶Phahi, Paulo na Barinaba agomba nao chilume, achiaambira, "Ka ni lazima hutangaze ujumbe wa Mlungu kpwa Ayahudi kpwandza. Ela kpwa vira mnarema, na mnaona tamuna haja ya uzima wa milele, phahi, ni lazima huatangazire atu anjina ambao sio Ayahudi.
- ⁴⁷Mana Mlungu wahulagiza hivi: 'Nákuhenda mwanga kpwa atu ambao sio Ayahudi, ili urehere dunia ndzima habari za Mlungu za kuokola atu.' "
- ⁴⁸Atu ambao sio Ayahudi ariphosikira hivyo, ahererwa na achiutogola hura ujumbe kula kpwa Mlungu. Nao osi ariotsambulwa kuphokera uzima wa milele amkuluphira Jesu.

⁴⁹Phahi, neno ra Mlungu ragota chila pahali seemu yosi.

⁵⁰Lakini Ayahudi atiya fitina kpwa achetu okala na vyeo na anamuogopha Mlungu na alume muhimu a mudzini. Achiafyakatsira amtese Paulo na Barinaba na achiazola auke seemu hiyo.

⁵¹Phahi akukuta vumbi ra mwao maguluni ili rikale onyo kpwao na achiuka kuphiya mudzi wa Ikonio.

⁵²Afuasi a Jesu hiko Antiokia achiona raha sana na achiodzalwa ni Roho wa Mlungu.

Mahendo 14

¹Hiko Ikonio nako mambo gakpwendakala vivyo: Paulo na Barinaba ka achiphiya sinagogini. Afundza neno ra Mlungu vizuri sana hata Ayahudi anji na atu anjina ambao sio Ayahudi achiamini.

²Lakini Ayahudi ariorema kuamini, aafyakatsira atu ambao sio Ayahudi ili areyerane na hara oamini.

³Phahi Paulo na Barinaba asagala muda mure hiko kusemurira neno ra Mlungu bila ya wuoga. Na Mlungu waajaliya uwezo wa kuhenda vilinje na dalili, kuonyesa kala mafundzo gao kuhusu mbazi na mendzwa ya Mlungu ni ga kpweli.

⁴Atu a mudzi hinyo aganyana: anjina akala uphande wa Ayahudi na anjina achiunga mkpwono hara mitume.

⁵Mwisho, Ayahudi na atu anjina ambao sio Ayahudi aungana na akulu ao, achipanga kuhenda vibaya na kuaolaga kpwa kuapiga mawe.

⁶Hara mitume ariphomanya njama hiyo, achimbira kuphiya midzi ya Lusitira na Dabe seemu za Likonia na mitaa ya jirani,

⁷ambako azidi kutangaza habari ndzuri kuhusu Jesu Muokoli.

⁸Hiko Lusitira ka kuna mutu mmwenga chiswere, ambaye hangu kuvyalwakupwe ka kadzangbwenyendeka bii.

⁹Hiye chiswere wamsikiza Paulo wakati ka anagomba. Paulo wamlolato na achiona yuya chiswere ana imani ya kumphoza.

¹⁰Achimuamba kpwa sauti kulu, "Unuka uime na magulugo!" Gafula yuya chiswere watina na achiandza kunyendeka.

¹¹Atu ariphoona chilinje chohendwa ni Paulo, apiga kululu chikpwao Chilikonika achiamba, "Milungu ikedza kpwehu na umbo ra binadamu!"

¹²Hara atu amtunga dzina Barinaba, achimuiha Zeusi, naye Paulo achimuiha Hamesi, mana kala ndiye agombaye sana.

- ¹³Mlavyadzi-sadaka wa Zeusi ambaye phatuphe pha kulavira sadaka kala ni phephi na mudzi, wareha ndzau na maruwa ryango ra mudzi. Mana ye Mlavyadzi-sadaka na hinyo umati wa atu kala anataka kulavira sadaka mitume.
- ¹⁴Lakini hara mitume, Barinaba na Paulo ariphosikira hivyo, akpwanyula nguwo zao na achizola mo ndani ndani za atu kuno anapiga kululu anaamba,
- ¹⁵"Msihende hivyo alume, mana sisi hu anadamu tu dza mwimwi! Hwakupwedzakureherani habari ndzuri ili mriche kuvoya hivi vitu visivyo mana, lakini m'voyeni Mlungu ariye hai, yeumba dzulu mlunguni na dunia, bahari na viumbe vyosi virivyo mumo.
- ¹⁶Wakati wa nyuma Mlungu waricha chila kabila rilunge mamboge,
- ¹⁷ela kadzangbwericha kuonyesa atu kala a kuko, mana nkuhenda manono. Nkukureherani mvula kula mlunguni na mavuno wakati wa sawa. Piya nkukuphani vyakurya vya kutosha na raha mwenu mioyoni."
- ¹⁸Ela hata bada ya kugomba maneno gosi higo, bado yakala vigumu Paulo na Barinaba kuzuwiya hura umati wa atu usialavire sadaka.
- ¹⁹Badaye kpwapwedza Ayahudi kula midzi ya Antiokia na Ikonio achedzatiya ndzili kpwa atu kukala Paulo ni mutu mui, nao achikubali. Achimpiga mawe hata achiona labuda akafwa, alafu achinguruta kondze ya mudzi.
- ²⁰Lakini afuasi a Jesu amzunguluka, naye achiunuka na achiuya mudzini. Muhondoye Paulo na Barinaba auka achiphiya mudzi wa Dabe.
- ²¹Paulo na Barinaba atangaza habari ndzuri kuhusu Jesu Muokoli hiko mudzi wa Dabe na achiphaha afuasi anji. Alafu auya midzi ya Lusitira, Ikonio na Antiokia seemu za Pisidia.
- ²²Hara mitume atiya moyo afuasi a midzi hiyo na achiafundza zaidi kumkuluphira Jesu. Chisha achiatambukiza achiamba, "Huchitaka kuishi na Mlungu na kubarikiwa n'lazima hutsapireni tabu nyinji."
- ²³Chila phahali phokala na kundi ra afuasi a Jesu, Paulo na Barinaba atsambula vilongozi. Afunga na achiavoyera Mlungu aarinde hinyo amkuluphirao Jesu.
- ²⁴Hara mitume atsapa na seemu za Pisidia na achifika seemu za Pamfilia.
- ²⁵Bada ya kufundza neno ra Mlungu hiko mudzi wa Periga, atserera kuphiya bandari ya Atalia.
- ²⁶Kula Atalia, apanda meli kuuya Antiokia ambako pho mwandzo ka akavoyerwa Mlungu aajaliye kpwa kazi yao. Sambu kala anauya Antiokia mana ka akamala kazi.
- ²⁷Ariphofika Antiokia akusanya kundi rosi ra afuasi achiasemurira mambo gosi ambago Mlungu waahendera na vira Mlungu arivyoavugurira njira atu ambao sio Ayahudi kumkuluphira Jesu.

²⁸Paulo na Barinaba akala hipho na hinyo afuasi siku za kukola.

Mahendo 15

¹Alafu pho Antiokia phakpwedza atu kula Judea ambao ka anafundza hara afuasi anaamba, "Tamuweza kuokoka mpaka mtiywe tsatsani, kama mila yorehwa ni Musa iambavyo."

²Mambo higo gahenda Paulo na Barinaba akale na malau mafu sana na hinyo okala anafundza hivyo. Hipho, Paulo na Barinaba phamwenga afuasi anjina atsambulwa kuphiya Jerusalem kpendakutana na mitume na vilongozi anjina, kuhusu dzambo hiro.

³Phahi kundi ra afuasi ramsindikiza Paulo na ayae kuphiya Jerusalem, nao ariphokala anatsapa na seemu za Foinike na Samariya, asemurira vira atu asio Ayahudi vyogaluka na achimkuluphira Mlungu. Habari hizi zafurahisha afuasi osi.

⁴Ariphofika Jerusalem, akaribishwa ni kundi ra afuasi, phamwenga na mitume na vilongozi a hiko, nao aasemurira chila chitu ambacho Mlungu waahendera.

⁵Alafu afuasi anjina ambao ka ni kundi ra Mafarisayo aima na achiamba, "Afuasi a Jesu ambao sio Ayahudi, ni lazima atiywe tsatsani na alunge Shariya za Musa."

⁶Phahi hara mitume na vilongozi anjina akutana kubisha kuhusu dzambo hiro.

⁷Bada ya kulumbana kpwa muda mure, Petero wang'oka achiamba, "Enehu, mnamanya kukala chitambo Mlungu wanitsambula mimi kuatangazira atu asio Ayahudi habari ndzuri kuhusu Jesu, ili nao asikire na kumkuluphira.

⁸Mlungu ambaye anamanya mioyo ya atu, waonyesa kala waakubali, mana waapha Roho wa Mlungu dza viratu sisi.

⁹Mlungu kayaika tafwauti ya sisi Ayahudi na asio Ayahudi, lakini hosi wahusamehe dambi zehu kpwa mana hwamkuluphira Jesu.

¹⁰Sambi kpwadze mnamjeza Mlungu kpwa kuahika mizigo afuasi ayawenu, ambayo hata akare ehuni na sisi tahuweza kuitsukula?

¹¹Sivyo kabisa! Hunaamini kukala atu osi, Ayahudi na asio Ayahudi, anaokolwa ni mbazi na mendzwa ya Bwana Jesu bahi."

¹²Alafu mkutano mzima wanyamala kusikiza Barinaba na Paulo. Asemurira kuhusu Mlungu arivyoajaliya kuhenda vilinje na dalili kuonyesa uwezowe kpwa atu asio Ayahudi.

¹³Ariphomala kubisha, Jakobo waamba, "Enehu, hebu nisikizani.

¹⁴Simoni Petero akahueleza vira ambavyo Mlungu wadzishugulisha na atu asio Ayahudi hipho mwandzo, kpwa kuatsambula anjinae akale atue.

¹⁵Hata maneno ga manabii piya ganakubaliana na higo phoamba:

- ¹⁶Badaye, mimi Mlungu, n'ndauya nedze nidzenge uphya nyumba ya Daudi iriyogbwa. N'ndauuyiza kula kpwa masazage na niudzenge uphya tsona.
- ¹⁷Nao atu anjina aniendze mimi Mlungu, na atu osi asio Ayahudi nríoatsambula akale angu, anilunge.
- ¹⁸Ndivyo aambavyo Mlungu, yeamanyisa atu mambo higa hangu kare.'
- ¹⁹Kpwa hivyo, maoni gangu naamba, husiayugeni atu ambao sio Ayahudi ndiogaluka kumlunga Mlungu.
- ²⁰Lakini n'lazima huaandikire baruwa kuaambira: Asirye vyakurya vyotiywa uyi kpwa kulaviwa sadaka kpwa milungu ya sanamu; asihende uzinifu; asirye nyama achiyesongolwa; wala asirye mlatso.
- ²¹Mana mmanyenye kala hangu kare Shariya za Musa zinatangazirwa mudzi hadi mudzi na kusomwa masinagogini Siku za Kuoya."
- ²²Phahi mitume na vilongozi anjina, phamwenga na afuasi osi, akubaliana na achitsambula atu airi aphiye Antiokia phamwenga na Paulo na Barinaba. Atsambula Juda piya yeihwa Barisaba, na Sila, ambao kala ni vilongozi piya.
- ²³Phahi hiyo baruwa yophirikpwa kala inaamba: Sisi ndugu zenu, mitume na vilongozi osi, hunakulamusani mwimwi afuasi a Jesu ambao simwi Ayahudi mkalao mudzi wa Antiokia, na seemu za Siria na Kilikia.
- ²⁴Sino hwasikira kuna ayawehu anjina okpwedza hiko kpwenu bila ya ruhusa yehu, achikuyugani achili na kukuangaishani kpwa higo arigogomba.
- ²⁵Phahi sino hwakutana na huchikubaliana kutsambula atu edze kpwenu phamwenga na asena ehū Barinaba na Paulo,
- ²⁶ambao adzilavya maisha gao kumhumikira Bwana wehu Jesu Masihi.
- ²⁷Hukalavya hano ndugu airi, Juda na Sila ili akuelezeni na miromo yao mambo gaga higa hunagokuandikirani.
- ²⁸Mana Roho wa Mlungu phamwenga na sisi hwaona vibaya kukuhikani mzigo wanjina zaidi isiphokala zirate shariya muhimu:
- ²⁹Msirye chakurya cholaviwa sadaka kpwa sanamu, msirye mlatso wala nyama yehendasongolwa na msihende uzinifu. Mchigbwira mambo higa mndasagala vinono sana. Kpwaherini, mkale salama.
- ³⁰Phahi asindikizwa kula Jerusalemu achihiya Antiokia ambako akpwendakusanya afuasi osi na achiapha hira baruwa.
- ³¹Ariphosoma hira baruwa aonato sana kpwa kutiywa moyo.
- ³²Juda na Sila ka ni manabii, nao aambira mambo manji ambago gaaterya sana hara afuasi na gachiatiya moyo.

³³Bada ya kukala nao kpwa muda, hinyo afuasi aasindikiza kuuya salama. Auya Jerusalemu kpwa hinyo okala akaahuma.

[³⁴Lakini Sila wakata shauri kubaki kuko.]

³⁵Lakini Paulo na Barinaba abaki Antiokia ambako, phamwenga na atu anjina anji, afundza na kutangaza neno ra Mlungu.

³⁶Badaye wakati fulani Paulo wamuamba Barinaba, "Nahuphiye hukaalole afuasi a Jesu chila mudzi huriotangaza neno ra Mlungu, ili hukamanye aendereravyo."

³⁷Barinaba kala anataka aphiye na Johana ambaye piya ka aihwa Mariko.

³⁸Lakini Paulo achiona sio sawa, kpwa sababu Johana waachimbira ariphokala Pamfilia na achiricha kuhenda nao kazi.

³⁹Paulo na Barinaba alumbana sana hata ichibidi chila mmwenga akale lakpwe. Barinaba wahala Johana Mariko na achendapanda meli achiphiya chisiwa cha Kupuro.

⁴⁰Lakini Paulo wahala Sila, achivoyerwa Mlungu ni hara afuasi anjina ili aarinde, alafu achiuka.

⁴¹Paulo watsapira seemu za Siria na Kilikia ambako wakpwendaatiya nguvu afuasi a Jesu okala hiko.

Mahendo 16

¹Paulo wasafiri hadi midzi ya Dabe na Lusitira ambako wakutana na mfuasi mmwenga yeihwa Timothi. Nineye ka ni Myahudi na wamkuluphira Jesu, lakini ise ka ni Mgiriki.

²Afuasi osi a Jesu okala Lusitira na Ikonio ka achimtogola Timothi.

³Paulo ka anataka kumhala asafiri naye. Ichibidi amtiye tsatsani kpwa sababu Ayahudi ariokala seemu hizo kala anamanya ise ni Mgiriki.

⁴Azunguluka mudzi hadi mudzi, kuambira atu omkuluphira Jesu malagizo gotsapizwa ni mitume na vilongozi anjina hiko Jerusalem, ili agalunge.

⁵Phahi, kuluphiro ra makundi ga afuasi razidi kukula na atu achienjerezeka chila siku.

⁶Paulo na ayae atsapa na seemu za Firigia na Galatia, kpwa sababu Roho wa Mlungu waazuwiya kusemurira neno ra Mlungu jimbo ra Asia.

⁷Ariphofika mphaka wa Misia ataka kuinjira jimbo ra Bithinia, lakini Roho wa Mlungu achiazuwiya.

⁸Hipho aenderera na charo, achitsapa na seemu ya Misia hadi bandari ya Tirowa.

⁹Usikuwe Paulo waona mutu ruwiyani kula jimbo ra Makedonia akamuimira pho phephi, anamuamba, "Nakuvoya wedze Makedonia wedze uhuterye!"

- ¹⁰Paulo ariphoona ruwiya hiyo, hwafunganya upesi kuphiya Makedonia, mana hwamanya Mlungu anahuiha hukatangaze habari ndzuri kuhusu Jesu hiko.
- ¹¹Hwapanda meli bandari ya Tirowa huchiphiya mwenga kpwa mwenga hadi chisiwa cha Samotirake, na muhondoye huchifika bandari ya Neapoli.
- ¹²Kula hipho hwaphiya Filipi ambako hwakala kpwa muda. Filipi kala ni mudzi muhimu wa jimbo ra Makedonia, nao kala unatawalwa ni Arumi.
- ¹³Siku ya Kuoya iriphofika, hwatuluka kondze ya ryango ra mudzi hadi muhoni, ambako hwaona kala ka kuna phatu ambapho Ayahudi nkuvoya Mlungu. Huchisagala na huchibisha na achetu ambao ka anakutana.
- ¹⁴Mmwenga yekala anasikiza mafundzo gehu ni mchetu yeihwa Lidia kula mudzi wa Thiatira, ambaye kala ana bishara ya vitambara vya zambarau. Lidia kala anamuogopa Mlungu, naye wamng'aza matso na achikubali mafundzo ga Paulo.
- ¹⁵Wabatizwa phamwenga na atu osi a phakpwe kaya. Alafu achihualika kpwakpwe, achiamba, "Ichikala mkakubali kala ni mfuasi muaminifu wa Bwana Jesu, karibuni mkakale kpwangu." Wahubembeleza, mwisho huchiphiya.
- ¹⁶Siku mwenga huriphokala hunaphiya hipho phatu pha kuvoya Mlungu, hwakutana na mtumwa wa chichetu, yekala ana pepho. Pepho zomhenda akale na uwezo wa kutabiri mambo ndigokpwedza badaye. Watajirisha sana matajirige kpwa kutabiriya atu bahati zao.
- ¹⁷Yuya msichana waandza kulunga-lunga Paulo na sisi kuno anapiga kululu anaamba, "Atu hano ni atumishi a Mwenyezi Mlungu. Nao anakutangazirani vira ambavyo mnaweza kuokolwa!"
- ¹⁸Waenderera kugomba hivyo siku nyinji, mwisho Paulo gamsinya, achimgalukira na achimuamba yuya pepho, "Kpwa dzina ra Jesu Masihi, tuluka himo mwa hiye msichana!" Na saa iyo-iyo yuya pepho achituluka.
- ¹⁹Enye achina-yuya mtumwa ariphomanya kala taaweza kuphaha pesa tsona, amgbwira Paulo na Sila achiaguruta hadi mbere za atu na akulu a Chirumi.
- ²⁰Ariphoafisa hiko kpwa akulu aashitaki achiamba, "Atu hinya ni Ayahudi, na anahenda fujo mwehu mudzini.
- ²¹Anafundza mila ambazo siyo sawa chishariya. Tahuzikubali na tahuweza kuzilunga mana hu anatsi a Utawala wa Rumi."
- ²²Umati wa atu waunga mkpwono mashitaka higo ga Paulo na Sila. Hara akulu a Chirumi alagiza avulwe nguwo na achapwe viboko.
- ²³Achapwa viboko sana kabisa, alafu achitiywa jela. Naye asikari wa jela walagizwa aarinde vinono sana.
- ²⁴Asikari jela ariphophaha malagizo higo, waatiya chumba cha ndani na achiafunga nyororo za maguluni phamwenga na mapande ga magogo.

- ²⁵Iriphofika saa sita za usiku, Paulo na Sila kala anavoya Mlungu na kumuimbira, mabusu ganjina kala ganasikiza.
- ²⁶Gafula dunia ichisumba sana hata misingi ya jela ichisumba. Saa iyo-iyo miryango ya jela ichivuguka na nyororo zokala zikafungbwa mabusu osi maguluni zichigbwa.
- ²⁷Yuya asikari jela walamuka na ariphoona miryango ya jela i wazi, watsomola upangawe achilonda kudziolaga, mana ka anaona mabusu gosi gakachimbira.
- ²⁸Lakini Paulo achikota likululu achiamba, "Usidziolage! Hosi hu mumu!"
- ²⁹Asikari walagiza taa, alafu achizola ndani kuno ana kakama, achendagbwa maguluni pha Paulo na Sila.
- ³⁰Alafu achimlavya Paulo na Sila kondze, chisha achiuza, "Mabwana, nihendedze mino hata niokoke?"
- ³¹Nao achimuamba, "Mkuluphire Bwana Jesu nawe undaokoka, uwe na atuo osi phako kaya."
- ³²Chisha achimsemurira neno ra Mlungu na anjina osi a phakpwe kaya.
- ³³Saa iyo-iyo usiku, yuya asikari jela waahala achendaatsukutsa vironda. Chisha achibatizwa iye mwenye na atue osi a phakpwe kaya.
- ³⁴Wahala Paulo na Sila achiphiya nao kpwakpwe kaya na achendaapha chakurya. Iye na atue osi ahererwa sana kpwa sababu amkuluphira Mlungu.
- ³⁵Ligundzure kuriphocha, akulu a Chirumi alavya asikari aphiye hiko jela akaambe, "Hara alume airi arichireni."
- ³⁶Phahi asikari jela wakpwendamuamba Paulo, "Akulu a Chirumi akalagiza mrichirwe, sambu, tulukani mphiye vyenu. Phiyani salama."
- ³⁷Lakini Paulo achiamba, "Taiwezekana tse! Sino hu anatsi a Utawala wa Chirumi. Hwachapwa viboko mbere za atu, chisha huchitiywa jela bila ya kuphirikpwa kotini. Na vino anataka hurichirwe chisiri! Hiyo taiwezekana! Naaedze ahulavye nyo enye."
- ³⁸Phahi hara asikari okala akahumwa, auya kpwendasema na hinyo akulu a Chirumi, nao ariphosikira kala Paulo na Sila ni anatsi a Utawala wa Rumi, amaka sana.
- ³⁹Akpwedzaavoya msamaha na achiasindikiza kula jela na achiaambira atsame pho mudzini.
- ⁴⁰Paulo na Sila ariphotuluka jela, aphiya nyumbani kpwa Lidia na achendakutana na afuasi anjina a Jesu, achiatiya moyo, chisha achiuka.

Mahendo 17

- ¹Phahi Paulo na Sila atsapa na midzi ya Amfipoli na Apolonia hadi mudzi wa Thesalonike, ambako kala kuna sinagogi ra Chiyahudi.
- ²Paulo kala achimenya sinagogini kama kawaidaye. Kpwa Siku tahu za Kuoya za kulungirana wabisha na atu,
- ³achiaeleza na kuaonyesa na Maandiko kukala ka n'lazima Masihi ateswe, afwe na afufuke. Paulo waamba, "Hiye Jesu ambaye nakusemurirani habarize, iye ndiye Yetsambulwa ni Mlungu Kuokola Atu."
- ⁴Ayahudi anjina akubali na achidziunga na Paulo na Sila. Kundi kulu ra Agiriki rimuogopharo Mlungu piya radziunga, na achetu anji a vyeo adziunga na Paulo.
- ⁵Lakini vilongozi a Chiyahudi aonera chidzitso na achitsola-tsola atu ayi barabarani na achiakusanya ili ahende fujo mudzi mzima. Akpwendazunguluka nyumba ya Jasoni kuendza Paulo na Sila aagbwire na aarehe mbere za atu.
- ⁶Ela aripoakosa hiko, amguruta Jasoni na afuasi anjina mpaka kpwa akulu a mudzi. Achipiga kululu achiamba, "Atu hano akaeneza fujo dunia ndzima, vino ndipho akpwedza kpwehu.
- ⁷Naye Jasoni waakaribisha kpwakpwe kaya. Hano osi anahenda chinyume cha shariya za mfalume Kaisari; anaamba kala kuna mfalume wanjina aihwaye Jesu."
- ⁸Maneno higo gaatiya wasi-wasi sana vilongozi akulu a mudzi na umati wa atu.
- ⁹Vilongozi akulu amhenda Jasoni na ayae alavye dhamana, ndipho achirichirwa.
- ¹⁰Jiza phoanda, afuasi aachimiza Paulo na Sila kuphiya Berea. Aripokala hiko, ainjira sinagogi ra Chiyahudi.
- ¹¹Atu a Berea kala ni asikizi, wala kala sio dza atu a Thesalonike. Nao aphokera neno kpwa hamu sana. Chila siku ka achichunguza Maandiko kuona ichikala gara afundzwago ni Paulo ni ga kpweli.
- ¹²Phahi Ayahudi anji na piya alume anji a Chigiriki na achetu marufu aamini.
- ¹³Lakini Ayahudi a Thesalonike ariphosikira kala Paulo anatangaza ujumbe wa Mlungu hiko Berea, aphiya kuko na achendafyakatsira atu ahende fujo.
- ¹⁴Mara mwenga hinyo afuasi achimphirika Paulo pwani, lakini Sila na Timothi achisala Berea.
- ¹⁵Atu ambao ka anamsindikiza Paulo, aphiya naye hadi mudzi wa Atheni. Aripokala anarichana, Paulo waalagiza akaambire Sila na Timothi akutane naye Atheni maruru sana.
- ¹⁶Paulo aripokala anagodza Sila na Timothi hiko Atheni, rohore rasononeka sana ariphoona mudzi mzima wa Atheni ukaodzala milungu ya sanamu.
- ¹⁷Chila siku Paulo kala achilumbana na Ayahudi na atu anjina amuabuduo Mlungu ariokutana nao sinagogini na piya ariokutana nao cheteni.

¹⁸Piya wabisha na atu alungao mafundzo ga Epikuro na ga Stoiki. Anjina aamba, "Anahuambirani yuno mpuzi?" Anjina nao achiamba, "Anahufundza habari za milungu mijeni!" Agomba vivi kpwa sababu Paulo kala anagomba kuhusu habari za Jesu na kufufukakpwe.

¹⁹Phahi amhala Paulo na achiphiya naye mwango wa Areopago, ambako kala kuna mkutano wa baraza ra azehe, achendamua, "Hebu hueleze zaidi kuhusu dini hino nyipha ufundzayo!"

²⁰Kpwa mana mambo ganjina ufundzago hunagaona ga ajabu sana, kpwa hivyo hunataka humane manage."

²¹(Anatsi na ajeni a mudzi wa Atheni ka achihumira muda wao wosi kubisha ama kusikiza mambo maphya.)

²²Hipho, Paulo waima mbere za baraza ra Areopago achiamba, "Anatsi a Atheni! Mino ka naona chila mhendaro mu atu a kulunga dini sawa-sawa.

²³Lakini phokala ninazunguluka-zunguluka kulola vitu muabuduvyo, náona phatu pha kulavira sadaka phakaandikpwa, 'Kpwa Mlungu Asiyemanyikana'. Sambu mino nakuhubiriani habari za hiye Mlungu mmuabuduye na msiyemanya.

²⁴Mlungu ariyeumba dunia na vitu vyosi, ndiye Mtawala wa dzulu mlunguni na dunia, naye kaishi mizukani, mizuka yodzengbwa ni anadamu.

²⁵Wala kana haja na chochosi chotengezwa ni binadamu, mana ye mwenye ndiye alavyaye uzima kpwa anadamu, pumuzi za kusohera na chila chitu.

²⁶Mlungu waumba chila kabila duniani kula kpwa mkare mmwenga, na achiahenda agote chila pahali dunia ndzima. Wapanga chimbere chila kabila ndiphosagala na mudawe.

²⁷Wahenda hivyo ili anadamu amuendze na amuone, hata dzagbwe ni kpwa kuphaphasa-phaphasa. Lakini kpwa kpweli Mlungu ka kure naswi.

²⁸Mana, kama mmwenga wenu vyoamba, 'Ndiye ahuphaye uzima, na anahupha uwezo wa kunyendeka na kuishi.' Tsona atu enu a kuandika mashairi aamba, 'Sisi piya hu anae.'

²⁹Kpwa vira hu ana a Mlungu, taifwaha kuhenda sura ya Mlungu ikale yaiga sanamu za zahabu, feza ama dziwe, vitu vyohendatsongbwa chifundi ni binadamu.

³⁰Mlungu wapuza uzuzu wa anadamu kpwa muda wa kukola, lakini sambu analagiza chila mmwenga himu dunia ndzima atubu.

³¹Kpwa mana waika siku ambayo andahukumu dunia ndzima kpwa haki, jaji andakala hiye mutu ariyemtsambula. Naye wammanyisa chila mutu, hiye yetsambulwa, kpwa kumfufula."

³²Atu ariphosikira habari za kufufuka, anjina amtseka, lakini anjina achiamba, "Badaye, hunataka wedze uhueleze zaidi kuhusu mambo higa."

³³Bada ya higo, Paulo wauka mkutanoni.

³⁴Lakini atu anjina aamini na achiungana na Paulo. Mmwenga wao kala aihwa Dionisio, ambaye ka ni mwanachama wa baraza ra Areopago. Piya kala kuna mchetu, yeihwa Damarisi, na atu anjina.

Mahendo 18

¹Bada ya higo, Paulo wauka Atheni na achipiya Korintho.

²Ariphofika hiko wakutana na Myahudi mmwenga yeihwa Akpwila na mchewe Prisila kula jimbo ra Ponto. Nao kala akedza dza dzuzi dzuzi kula tsi ya Itali kpwa sababu mtawala Klaudia ka akalagiza Ayahudi osi azolwe hiko Rumi. Phahi Paulo waawehera,

³na kpwa sababu Paulo kala ni fundi wa kutengeza mahema dza Akpwila na mchewe, wakala nao na achienda nao kazi.

⁴Chila Siku ya Kuoya Paulo kala achibisha na Ayahudi na Agiriki sinagogini na kuabembeleza akubali mafundzoge.

⁵Sila na Timothi ariphokpwedza kula jimbo ra Makedonia, Paulo ka achihumira wakatiwe wosi kuaonyesa Ayahudi na Maandiko kukala Jesu ndiye Masihi.

⁶Lakini Ayahudi ariphompinga na kumlaphiza, wakuta-kuta vumbi nguwoze ili rikale onyo kpwao na achiamba, "Ndirokuphahani narikale dzulu yenu enye, mino sina lawama kabisa. Hangu sambu n'ndaphiya kpwa atu ambao sio Ayahudi."

⁷Phahi Paulo waricha kufundza sinagogi hiro na achendasagala nyumbani kpwa Tito Justo, phephi na sinagogi riro hiro. Tito Justo kala siye Myahudi lakini wamuabudu Mlungu.

⁸Mkpwulu wa sinagogi hiro yeihwa Kirisipo wamkuluphira Jesu phamwenga na atu osi a phakpwe kaya. Akorintho anji ariosikira mafundzo ga Paulo aamini na achibatizwa.

⁹Siku mwenga usiku, Mlungu wagomba na Paulo ruwiyani, achimuamba, "Usiogophe! Enderera kufundza atu, wala usinyamale.

¹⁰Kpwa mana n'ndakurinda na takuna mutu ndiyekuvwamukira kukulumiza, mana nina atu anji himu mudzini."

¹¹Hipho, Paulo wasagala mwaka mmwenga na nusu kufundza atu mafundzo kula kpwa Mlungu.

¹²Wakati Galio kala ni mtawala wa jimbo ra Akaya, Ayahudi anjina aungana achimbwira Paulo achimphirika kotini.

- ¹³Amshitaki achiamba, "Mutu hiyu anachenga-chenga atu amuabudu Mlungu chinyume cha shariya za Chiyahudi."
- ¹⁴Kabla Paulo kadzangbwegomba, Galio wagomba achiamba, "Mwi Ayahudi, kama che mnalavya mashitaka kuhusu mahendo mai mai ama kosa iyi sana, ingekalato kukusikizani.
- ¹⁵Lakini kpwa vira ganahusu maneno genu, madzina na shariya zenu enye, kagabisheni mwi enye. Ela chamba ni mimi simendze kukala jaji wa mambo higo."
- ¹⁶Hipho, Galio waazola mura kotini.
- ¹⁷Alafu atu osi amgalukira Sositene, mkpwulu wa sinagogi achimgbwira, na achimpiga mbere za koti, lakini Galio kayajali hata chidide.
- ¹⁸Paulo wasagala siku nyinji sana na hara afuasi a Jesu hiko Korintho alafu achilagana nao achiuka. Arip Hofika bandari ya Kenikeria, wanyolwa mana kala akaika naziri kpwa Mlungu. Badaye wapanda meli phamwenga na Prisila na Akpwila achiphiya Siria.
- ¹⁹Arip Hofika mudzi wa Efeso, Paulo waricha ayae Prisila na Akpwila na ye mwenye achendainjira sinagogini na achibisha na Ayahudi.
- ²⁰Hinyo Ayahudi amtaka akale naye siku za kukola, lakini achirema.
- ²¹Phokala analaga waamba, "Mlungu achimendza n'ndauya tsona." Alafu wauka Efeso na meli.
- ²²Meli yatiya nanga Kaisaria na Paulo achiphiya Jerusalemu kpwendalamusa afuasi a Jesu. Alafu achiphiya Antiokia.
- ²³Bada ya kusagala kpwa muda hiko Antiokia, wauka na achikala wa mwendo chila phahali hiko seemu za Galatia na Firigia, ili kuatiya nguvu afuasi osi a Jesu.
- ²⁴Wakati fulani hiko Efeso kala kukedza Myahudi mmwenga aihwaye Apolo, mwenyezi wa mudzi wa Isikandaria. Naye kala ni mutu wa kumanya kugomba na tsona kala anamanya Maandiko vinono sana.
- ²⁵Kala akafundzwa njira ya kukala mfuasi wa Bwana Jesu, na ka achiifundzato. Higo gokala achifundza ka ni sawa, lakini kala anamanya ubatizo wa Johana bahi.
- ²⁶Apolo ka achiinjira sinagogi na akafundza atu bila ya wuoga. Prisila na Akpwila arip homsikira, amualika kpwa kaya na achendamfundza kuhusu njira ya kukala mfuasi wa Mlungu tse-tse-tse.
- ²⁷Arip hokala Apolo anataka kuphiya seemu za Akaya, atu a Mlungu amtiya nguvu na achiandika baruwa iphirikirwe afuasi a Jesu akalao hiko ili akamkaribisheto. Arip Hofika hiko, wakala msada mkpwulu wa atu ambao, kpwa mbazi na mendzwa ya Mlungu, kala akamkuluphira Bwana Jesu.

²⁸Mana ka achilumbana sana na Ayahudi mbere za atu, na kuaonyesa Maandiko ga Mlungu kala, Jesu ndiye Masihi.

Mahendo 19

¹Apolo ariphokala achere hiko mudzi wa Korintho, Paulo wasafiri na magulu na ndani ndani hadi achifika mudzi wa Efeso, ambako wakutana na afuasi anjina a Jesu.

²Ariphokutana nao wauza, "Mriphomkuluphira Jesu, Roho wa Mlungu wainjira mwenu mioyoni?" Lakini aho achiamba, "A'a! Wala tahudzangbwesikira kala kuna Roho wa Mlungu."

³Phahi, Paulo wauza, "Sambi mwabatizwa ubatizo uphi?" Hara afuasi achimuamba, "Ubatizo ariofundza Johana."

⁴Paulo achiamba, "Ubatizo wa Johana kala ni ubatizo wa atu atubu dambi zao. Johana waambira atu amkuluphire hiye edzaye nyumaze, ambaye kala ni Jesu."

⁵Hinyo afuasi ariphosikira hivyo, abatizwa kpwa dzina ra Bwana Jesu.

⁶Alafu Paulo ariphoabandikira mikono, Roho wa Mlungu wainjira mwao mioyoni. Agomba kpwa luga zanjina na achitangaza maneno ga Mlungu.

⁷Osi akala kama alume kumi na airi.

⁸Kpwa muda wa miezi mihahu, Paulo kala achiinjira sinagogini na kuhubiri bila ya wuoga, kubisha na kuabembeleza kuhusu utawala muphya wa Mlungu.

⁹Lakini anjina ahenda kani na achirema kuamini, achikala anagomba vibaya mbere za atu kuhusu kumkuluphira Jesu. Phahi, Paulo wahala atu oamini achiuka. Chila siku achikala anabisha na atu ndani ya dzumba ra kusomera ra Tirano.

¹⁰Paulo wafundza hipho miaka miiri, mpaka atu osi a jimbo ra Asia, Ayahudi na asio Ayahudi, achisikira neno ra Bwana Jesu.

¹¹Mlungu wamhumira Paulo kuhenda vilinje vya ajabu.

¹²Atu ka achihala vitambara na mikumbuu chiyoguta Paulo akaphirikira akongo ao na akaphola, nao pepho kala achituluka.

¹³Ayahudi anjina kala achizunguluka kutuluza atu pepho. Phahi wakati uhu ajeza kuhumira dzina ra Bwana Jesu kutuluza pepho. Nao kala achiamba, "Kpwa dzina ra Jesu ahubiriwaye ni Paulo, tuluka."

¹⁴Kala kuna ana sabaa a mkpwulu wa alavyadzi-sadaka wa dini ya Chiyahudi yehwa Sikeva, aha nao kala ni kahi ya aho kala achihenda vivyo.

¹⁵Phahi siku mwenga pepho aambira, "Jesu nammanya na Paulo piya nammanya, lakini dze, mwino mu ano ani?"

- ¹⁶Yuya mutu yepagaliwa ni pepho waaurukira na achiashinda mkpwotse osi. Achiapiga vizuri sana hata achiakopola-kopola maronda, nao achituluka mo nyumbani mairo kuno a vitsaha.
- ¹⁷Ayahudi osi na Agiriki a mudzi wa Efeso ariphosikira mambo higo, atishirwa sana, na dzina ra Bwana Jesu richitogolwa.
- ¹⁸Phahi, atu anji ariomkuluphira Jesu adzituluza mbere za atu na achisema mambo mai gosi arigohenda.
- ¹⁹Atu anji ambao mwandzo ka ni atsai ama aganga, akusanya vitabu vyao phamwenga na achiviocha mbere za atu. Garama ya vitabu hivyo vyoochwa kala ni kama vipande 50,000 vya feza.
- ²⁰Phahi kpwa sababu hiyo, neno ra Mlungu raenea sana na richiphaha nguvu.
- ²¹Bada ya higo gosi kuhendeka, Paulo wakata shauri kuphiya Jerusalemu, kutsupira seemu za Makedonia na Akaya. Waamba, "Nchifika hiko, ni lazima piya niphiye Rumi."
- ²²Watanguliza Timothy na Erasito asaidizie airi kuphiya Makedonia, ela ye mwenye achibaki jimbo ra Asia kpwa muda.
- ²³Wakati na hinyo kpwazuka fujo kulu sana hiko Efeso kpwa sababu ya atu kumkuluphira Jesu.
- ²⁴Kpwahenda fundi mmwenga yeihwa Demetirio yekala achitengeza sanamu za feza, zoigana na nyumba ya mlungu wa chichetu yeihwa Aritemi. Kazi ihi kala ichiaphahira pesa nyinji sana Demetirio na mafundige.
- ²⁵Demetirio wakusanya mafundi osi ambao ka achihenda kazi dza hiyo, achiamba, "Ayangu, mnamanya kala kazi hino inahuphahirani pesa nyinji sana!
- ²⁶Lakini mwi enye mnaona na kusikira vira mutu hiyu aihwaye Paulo anavyochenga-chenga atu. Anaamba kala milungu itengezwayo ni anadamu siyo milungu bii. Wagaluzwa atu anji himu Efeso, na hata jimbo zima ra Asia.
- ²⁷Phahi kuna hatari, siyo kala ati bishara yehu indaphaha nguma mbii bahi, lakini hata nyumba ya mlungu mkpwulu Aritemi indaonekana si chitu cha mana. Na hiye mlungu ambaye anaabudiwa jimbo zima ra Asia na hata dunia ndzima kandaishimiwa kabisa."
- ²⁸Hinyo mafundi ariphosikira hivyo, atsukirwa sana na achipiga kululu achiamba, "Aritemi mlungu wa Aefeso, ndiye mkpwulu!"
- ²⁹Alafu mudzi mzima uchikala na fujo. Agbwira Gayo na Aristariko, enyezi a Makedonia, ambao ka anasafiri na Paulo. Atu osi okala hipho azola nao mairo hadi chiwanja cha michezo.
- ³⁰Paulo kala anataka kudzituluza mbere za hura umati wa atu, lakini afuasi a Jesu achimzuwiya.

³¹Akulu anjina a jimbo hiro piya kala ni asena a Paulo, nao piya achilavya mhumwa kum'voya Paulo asimenye himo chiwanjani.

³²Wakati na hinyo hipho mkutanoni kala phana fujo sana, atu anjina ka anagomba hivi, anjina nao anagomba chivyao. Anji ka taamanya chisa cha atu kuhenda mkutano.

³³Ayahudi anjina amuona Isikanda pho mkutanoni na achimuamba atuluke mbere za atu adzihehere. Phahi Isikanda waatsuphira mikono ili anyamale na achikala anataka kugomba nao.

³⁴Lakini hura umati wa atu uriphomanya kala Iskanda ni Myahudi, apiga kululu osi chilimwenga kama masaa mairi, achiamba, "Aritemi mlungu wa Aefeso, ndiye mkpwulu!"

³⁵Mwisho, karani wa mudzi wanyamaza hura umati wa atu, chisha achiamba, "Anatsi a Efeso, dunia ndzima inamanya kala Efeso ndiye mrindzi wa nyumba ya mlungu wehu Aritemi. Tsona Efeso ndiye mrindzi wa sanamu ya Aritemi yogbwa kula mlunguni.

³⁶Ni ani aremaye mambo higa? Phahi, hurirani msihende mambo na more bila ya kufikiri.

³⁷Mkareha atu hano hipha, hata dzagbwe taayaiya ndani ya nyumba ya Aritemi wala kukufuru mlungu wehu.

³⁸Phahi, ichikala Demetirio na mafundige ana mashitaka kuhusu atu hano, kuna koti, tsona kuna akulu a jimbo. Kpwa hivyo naaphirike mashitaka gao hiko.

³⁹Ela ichikala kuna mambo ganjina ambago mnataka mmanyeye, n'lazima gabishwe mkutano wa kawaida na anatsi.

⁴⁰Mana sisi hu tabuni, hunaweza kushitakiwa kpwa hiri fujo chirotsapa rero. Na huchishitakiwa, tahundakala na sababu yoyosi ya kueleza, mana fujo renye tarina sababu ya mana."

⁴¹Ariphomala kugomba hivyo, wafunga mkutano.

Mahendo 20

¹Rira fujo ririphosira, Paulo waiha afuasi a Jesu na achigomba nao maneno ga kuatiya moyo. Alafu achilagana nao, achiphiya seemu ya Makedonia.

²Ariphokala anatsapa na seemu hizo, waambira afuasi maneno manji ga kuatiya moyo, hadi achifika tsi ya Giriki,

³ambako wasagala miezi mihahu. Ariphokala a phephi na kupanda meli kuphiya Siria, watsunirwa kala Ayahudi anjina akampangira njama. Hipho wakata shauri kuuya nyuma kutsapira Makedonia.

- ⁴Paulo ka achinyendeka na Sopatiro mwana wa Piro kula mudzi wa Berea, Aristariko na Sekundo kula mudzi wa Thesalonike, Gayo kula Dabe, Tikiko na Tirofimo kula jimbo ra Asia, na Timothi.
- ⁵Atu hinyo atanguliya na achendahugodza mudzi wa Tirowa.
- ⁶Lakini sino huchiuka na meli kula bandari ya Filipi bada ya Sukukuu ya Mikahe Isiyotiywa Amira, na bada ya siku tsano hwakpwendagbwirana nao Tirowa, ambako hwasagala siku sabaa.
- ⁷Siku ya Kuoya hwakutana osi phamwenga kuganya na kurya mikahe. Kpwa vira Paulo kala akapanga kuuka muhondoye, waenderera kubisha hadi usiku wa manane.
- ⁸Hinyo mkutano kala u chumba cha dzulu gorofani ambako kala kuna taa nyinji sana.
- ⁹Phahi, barobaro mmwenga yeihwa Eutiko ka asegere dirishani Paulo phokala anabisha nao. Aripbokala anaenderera kubisha, yuya barobaro wagbwirwa ni usingizi wa fungo na achigbwa photsi kula gorofa ya hahu. Atu aripbokpwendamguta achikala akafwa kare.
- ¹⁰Paulo watserera na achendamgbwerera yuya barobaro, achimbwira, chisha achiaambira atu, "Msihende wasi-wasi, mana achere mzima!"
- ¹¹Alafu Paulo wauya dzulu tsona na achendaganya mikahe achirya. Wabisha nao vya kukola hadi ligundzu, alafu achiphiya vyakpwe.
- ¹²Hara atu aphiya naye kaya mzima yuya barobaro, nao ahererwa sana.
- ¹³Paulo kala anataka kuphiya mudzi wa Aso na magulu, hipho wapanga hukutane naye kuko. Phahi sino hwamricha huchendapanda meli na huchiphiya vyehu.
- ¹⁴Paulo aripbokpwedza hipho Aso, hwapanda melini na huchisafiri naye hadi mudzi wa Mitileni.
- ¹⁵Muhondoye, hwauka na meli hipho Mitileni na huchifika phephi na chisiwa cha Kio. Bada ya siku mwenga, hwafika chisiwani Samo, na muhondoye huchitsoloka bandari ya Mileto.
- ¹⁶Paulo wakata shauri kutsupa bandari ya Efeso mwenga kpwa mwenga, ili asedze akachelewa hiko jimbo ra Asia, mana ka anawaniya ichiwezekana afike Jerusalemu kabla ya Siku ya Pentekosti.
- ¹⁷Paulo aripbokala Mileto, walavira salamu vilongozi a kundi ra afuasi a mudzi wa Efeso, edze akutane nao.
- ¹⁸Hinyo vilongozi aripbokpwedza, Paulo waambira, "Mnamanya maisha gangu vyokala wakati wosi nripbokala namwi, hangu siku ya kpwandza photsoloka jimbo ra Asia.

- ¹⁹Námhumikira Mlungu na matsozi manji tsona bila ngulu hata chidide. Nami náphaha tabu nyinji kpwa sababu ya njama za Ayahudi.
- ²⁰Mnamanya kala siyasita kufundza chochosi ambacho ka chingekuteryani, lakini nákufundzani hazarani na nchipiya nyumba hadi nyumba.
- ²¹Náaonya Ayahudi na asiokala Ayahudi ariche dambi na amgalukire Mlungu na amkuluphire Bwana wehu Jesu.
- ²²Phahi, namsikira Roho wa Mlungu anataka niphiye Jerusalemu na simanya ndirokpwendaniphaha hiko.
- ²³Ela namanya kala chila mudzi nriophiya, Roho wa Mlungu ananionya kala ninagodzwa ni jela na tabu.
- ²⁴Hata hivyo, siona kama maisha gangu ni chitu cha mana. Ela navoya tu, nimale kazi yohewa ni Bwana Jesu, ambayo ni kutangaza habari ndzuri kuhusu mbazi na mendzwa ya Mlungu.
- ²⁵Vivi namanya kala mwimwi mosi nriokusemurirani ufalume muphya wa Mlungu, tamndaniona tsona.
- ²⁶Kpwa hivyo, hino rero nakuambirani wazi: Sina lawama na mutu yeyesi ambaye kandaokolwa.
- ²⁷Mana nákutangazirani mambo gosi ambago Mlungu wapanga kuhenda.
- ²⁸Phahi, rindani mioyo yenu na mmanyirire kundi rosi ra afuasi a Jesu ambaro Roho wa Mlungu wakuhendani aimirizi. Kalani arisa a atu a Mlungu, ambao waakombola na chifo cha mwanawe mwenye.
- ²⁹Namanya nchiuka, mabawa masiru gandakuinjirirani, wala tagandakuonerani mbazi.
- ³⁰Piya kundazuka atu anjina mo mwenu kundini, agombe handzo, ili aahale afuasi a Jesu na aahende afuasi ao.
- ³¹Phahi, dzimanyirireni! Mmanyeye kala náonya chila mmwenga na kurira. Nákufundzani miaka mihahu usiku na mutsi, bila ya kukosa hata chidide.
- ³²Sambi, nakuikani mikononi mwa Mlungu akujaliyeni. Mmanyeye neno ra Mlungu kuhusu mbazize. Neno hiro rinaweza kukuphezani chiroho na kukumanyisani majaliwa ambago Mlungu waalagiza osi arioatenga akale atue.
- ³³Siyaaza pesa za mutu, zahabu, wala nguwo za mutu yeyesi.
- ³⁴Mwi enye mnamanya kala ka nchihenda kazi na mikono yangu ili niphahe maitaji gangu phamwenga na ga ayangu.
- ³⁵Chila nrirohenda, nákuonyesani mfwano kala, n'lazima husaidiyeni agayi kpwa kuhenda kazi kpwa bidii. Na ni hutambukire maneno ga Bwana Jesu phoamba, 'Alavyaye nkujaliwa zaidi kuriko aphokeraye.' "

³⁶Paulo ariphomala kugomba hivyo, wachita mavwindi na achivoya Mlungu phamwenga na hara azehe osi.

³⁷Osi arira ariphokala akamkumbatira na kumdonera Paulo.

³⁸Neno roasononesha sana ni rira ra kukala taandamuona tsona. Chisha, amsindikiza hadi melini.

Mahendo 21

¹Phahi, huriphorichana nao hinyo azehe a Efeso, hwapanda melini huchiphiya mwenga kpwa mwenga hadi chisiwa cha Kosi. Muhondoye hwafika Rodo na kula hipho huchiphiya bandari ya Patara.

²Kuko, hwaona meli yokala inaphiya Foinike, huchipanda na huchiuka.

³Huriphona chisiwa cha Kupuro, hwatsapa na uphande wa mwakani na huchienderera hadi Siria. Hwatiya nanga bandari ya Tiro, ambako meli kala indatsereza mizigo.

⁴Hwaendza afuasi a Jesu hiko na huriphokutana nao hwakala nao siku sabaa. Alongozwa ni Roho wa Mlungu achimkahaza Paulo kuphiya Jerusalemu.

⁵Lakini wakati wehu uriphosira, hwauka na huchienderera na charo. Ahusindikiza, osi phamwenga na achetu na ana ao, hadi kondze ya mudzi. Huriphofika pwani, hwachita mavwindi na huchivoya Mlungu na huchilagana.

⁶Bada ya kulagana, hwapanda melini, na hinyo okala anahusindikiza achiuya kaya.

⁷Hwaenderera na charo kula Tiro hadi mudzi wa Tolemai ambako hwakpwendajambosa afuasi na huchikala nao siku mwenga.

⁸Muhondoye, hwauka huchiphiya Kaisaria. Hiko hwakpwendakala nyumbani kpwa mhubiri Filipu, mmwenga wa hara atu sabaa ariotsambulwa kama asaidizi a mitume.

⁹Filipu kala ana asichanae ane ambao ka taadzangbwelólwa, nao ka achitangaza ujumbe kula kpwa Mlungu.

¹⁰Hwasagala hiko siku za kukola, alafu kuchedza nabii yehwa Agabo kula Judea.

¹¹Ariphohufikira, wahala mkumbuu wa Paulo, achidzifunga magulu na mikono. Chisha achiamba, "Roho wa Mlungu anaamba: Vilongozi a Chiyahudi hiko Jerusalemu andakufunga dza hivi uwe mchina-mkumbuu. Alafu akulavye kpwa atu ambao sio Ayahudi."

¹²Huriphosikira hivyo, sisi na atu anjina osi okala hipho, hwam'bembeleza Paulo asiphiye Jerusalemu.

- ¹³Lakini Paulo achiamba, "Mbona mnaniriza na kunivundza moyo? Mino ni tayari, sio kufungbwa bahi, lakini hata kufwa hiko Jerusalemu kpwa sababu ya Bwana Jesu."
- ¹⁴Huriphoona kataki kukubali maneno gehu, hwamricha, huchiamba, "Navikale vyo Mlungu alondavyo!"
- ¹⁵Bada ya higo, hwafunganya na huchiandza charo chehu cha kuphiya Jerusalemu.
- ¹⁶Afuasi anjina kula Kaisaria adziunga naswi na achihuphirika kaya kpwa Mnasoni ambako ka hundakala. Hiye Mnasoni ka ni mwenyezi wa chisiwa cha Kupuro, naye ka ni mmwenga wa afuasi a Jesu a mwandzo mwandzo.
- ¹⁷Huriphotsoloka Jerusalemu, atu amkuluphirao Jesu ahuphokera vinono sana.
- ¹⁸Muhondoye, Paulo phamwenga naswi hwaphiya kpendamjambosa Jakobo, na vilongozi osi a afuasi a Jesu kala a phapho.
- ¹⁹Bada ya kulamusana nao, Paulo wasemurira kpwa chirefu vira Mlungu arivyomsaidiya kuhenda kazi kahi ya atu ambao sio Ayahudi.
- ²⁰Nao ariphosikira hivyo, amtogola Mlungu. Alafu achimuamba Paulo, "Mwenehu, lola! Maelufu na maelufu ga Ayahudi anamkuluphira Jesu, na tsona osi adzilavya kulunga Shariya za Musa.
- ²¹Ela aho aambirwa kala, unaafundza Ayahudi aishio kahi ya atu asio Ayahudi asilunge Shariya za Musa. Ati ana ao alume asidekpwe wala asilunge mila za Chiyahudi.
- ²²Sambi sino hundahendadze? Mana kpwa kpweli atu andasikira kala u phapha wakpwedza.
- ²³Phahi, henda hivi ndivyokuambira. Phapha huna atu ane ambao aika naziri.
- ²⁴Sambi dziunge nao mdzitakase, na uariphire garama zao, ili anyolwe viphala. Ndipho chila mutu ndiphomanya kala mambo higo uambwago sigo ga kpweli, ela we mwenye unalunga Shariya za Musa.
- ²⁵Lakini kuhusu afuasi a Jesu ambao sio Ayahudi, sino hwaandikira baruwa ya vira mkutano vyokata, hwaambira asirye chakurya cholavirwa sadaka sanamu, asirye mlatso wala nyama yehendasongolwa, wala asihende uzinifu."
- ²⁶Muhondoye, Paulo wahala hara atu ane na achendadzitakasa phamwenga nao. Alafu wainjira Nyumba ya Kuvoya Mlungu kpendatangaza siku ya mwisho ya kudzitakasa, na sadaka ambayo indalaviwa ni chila mmwenga.
- ²⁷Phokala zira siku sabaa zi phephi na kusira, Ayahudi kula jimbo ra Asia amuona Paulo ndani ya Nyumba ya Kuvoya Mlungu. Achifyakatsira umati wa atu na achimgbwira,

²⁸kuno anapiga kululu anaamba, "Alume a Iziraeli! Huteryeni! Hiyu ndiye yuya mutu aphyiye chila phatu na kufundza atu mambo mai, yani mambo gapingago atu eh, Shariya za Musa, na Nyumba ya Kuvoya Mlungu. Tsona ichizidi, akatiya uyi hipha, phahali phatakatifu, mana akainjiza Agiriki ndani ya Nyumba ya Kuvoya Mlungu!"

²⁹(Atu aamba hivyo, mana kala akamuona Paulo hiko mudzini anazunguluka na Tirofimo kula Efeso, achiona akamenya naye ndani ya Nyumba ya Kuvoya Mlungu.)

³⁰Hipho, mudzi mzima waandza fujo, atu achedza mairo kula chila uphande. Achingbwira Paulo na achinguruta kula himo Nyumba ya Kuvoya Mlungu, na saa iyo-iyo miryango yosi ichifungbwa.

³¹Ariphokala anataka kumuolaga, habari zichifika kpwa mkpwulu wa jeshi ra Chirumi, kukala mudzi mzima wa Jerusalemu ni fujo huphu.

³²Mkwulu wa jeshi wahala asikari na makapteni ao na achizola mara mwenga mpaka phara phokala na fujo. Hura umati wa atu uriphomuona yuya mkpwulu wa jeshi na asikarie, waricha kumpiga Paulo.

³³Mkwulu wa jeshi wakpwezamgbwira Paulo na achilagiza afungbwe nyororo mbiri. Chisha achiauza, "Ni ani yuno, na akahendani?"

³⁴Phahi, kundi mwenga rapiga kululu chivyakpwe na kundi ranjina naro richipiga kululu chivyo. Na kpwa vira yuya mkpwulu wa jeshi ka kaweza kumanya ukpweli kpwa rira hoyo, walagiza Paulo agbwirwe na apherikpwe ngomeni.

³⁵Paulo ariphokala akafika ngazini, fujo ra hura umati razidi hata ichibidi hara asikari amuunule.

³⁶Hura umati wa atu ambao ka unamlunga-lunga, wazidi kupiga kululu uchiamba, "Muolageni!"

³⁷Asikari ariphokala a phephi na kumuinjiza ngomeni, Paulo wamuamba yuya mkpwulu wa jeshi, "Nakuvoya nikuambire chitu." Naye achimuamba, "Unamanya Chigiriki?"

³⁸Kpwani we siye yuya Mmisiri ambaye vi dzuzi dzuzi walongoza magaidi elufu ne okala akapiga kambi hiko weruni?"

³⁹Phahi Paulo waamba, "Mino ni Myahudi, návyalwa Tariso mudzi wa Kilikia, ni mwanatsi wa mudzi marufu. Tafadhali niruhusu nigombe na hinya atu."

⁴⁰Phahi, yuya mkpwulu wa jeshi wamruhusu agombe nao. Hipho, Paulo waima phara ngazini, achiatsuphira mikono hara atu. Na ariphonyamala, wagomba nao Chiebrania.

Mahendo 22

- ¹Achiamba, "Enehu na ano baba, nataka mnisikizeto vira ndivyodzihehera hipha."
- ²Hinyo atu ariphomsikira Paulo anagomba Chiebrania, azidi kunyamala zii. Alafu naye achiamba,
- ³"Mino ni Myahudi, návyalwa Tariso mudzi wa Kilikia. Ela nárerwa phapha hipha Jerusalemu, ka ni mwanafundzi wa Gamalieli. Náfundzwato sana shariya za akare ehū na nchidzilavya kpwa Mlungu dza vyo mriyvo mwimwi hivi rero.
- ⁴Mino nátesa atu ariolunga njira hino ya Jesu hata kuaolaga. Nágbwira alume na achetu nchendaatiya jela.
- ⁵Ichikala ninagomba handzo, Mlavyadzi-sadaka Mkpwulu phamwenga na ngambi yosi naagombe. Piya kala achinipha baruwa chizoandikirwa Ayahudi a Damaskasi, ili nikagbwire afuasi a Jesu hiko na niarehe hipha Jerusalemu kama mabusu na atiwe adabu.
- ⁶Phahi siku mwenga, kama saa sita za mutsi, kala ni njirani nikafika phephi na Damaskasi, gafula nchipigbwa ni mwanga mkali sana kula mlunguni.
- ⁷Nágbwa photsi na nchisikira sauti inaniamba, 'Sauli, mbona unanitesa?'
- ⁸Nchiuza, 'U ani Bwana?' Nchiambwa, 'Mimi ambaye unanitesa ni Jesu wa Nazareti.'
- ⁹Ayangu nriokala nao auona hura mwanga, lakini taayasikira sauti ya mutu yegomba nami.
- ¹⁰Nchimuuza, 'Sambi nihendedze, Bwana?' Naye achiniamba, 'Unuka uphiye Damaskasi. Uchifika hiko, undaambirwa ambago watsamburirwa kuhenda.'
- ¹¹Hara ayangu nriokala nao, anigbwira mkpwono hadi Damaskasi, kpwa sababu hura ukali wa mwanga wanihenda chipofu.
- ¹²Hiko Damaskasi, kala kuna mutu mmwenga yeihwa Anania, ambaye kala anamuogopha Mlungu, ka analunga Shariya za Musa tsona kala anaishimiwa sana ni Ayahudi osi a hiko.
- ¹³Wakpwezaniimira phephi achiniamba, 'Mwenehu Sauli, matsogo nagaone.' Navugulwa matso saa iyo-iyo, hata naye piya nchimuona.
- ¹⁴Alafu achiamba, 'Mlungu wa akare ehū, wakutsambula ili umanye alondago, umuone Mutu asiye na lawama wala makosa na umsikire anagomba na sautiye mwenye.
- ¹⁵Mana undakala shahidiwe kpwa atu osi, shahidi wa higo urigogaona na kugasikira.
- ¹⁶Sambi usikae, ng'oka ubatizwe na uvoye kpwa dzina ra Jesu usamehewe dambizo.'

- ¹⁷Nriphouya Jerusalemu, wakati fulani ka ninavoya Mlungu ndani ya Nyumba ya Kuvoya Mlungu, nchiona ruwiya.
- ¹⁸Námuona Bwana Jesu achiniamba, 'Uka upesi hipha Jerusalemu, kpwa sababu atu taandaamini ushahidio kunihusu mimi!'
- ¹⁹Nchimuamba, 'Bwana, atu hinya anamanya kukala ka nchiphya chila sinagogi kpwendafunga na kupiga afuasio.
- ²⁰Hata wakati shahidio Stefano anaolagbwa, kala niimire phapho, nchikubali na nchirinda nguwo za hara okala anamuolaga.'
- ²¹Alafu achiniamba, 'Uka, n'ndakuhuma kuphiya kure kpwa atu ambao sio Ayahudi.' "
- ²²Hura umati wa atu wamsikiza hadi ariphohadza kuhusu kuphiya kpwa atu asio Ayahudi, ndipho nao achiandza kupiga kululu achiamba, "Muuseni hipha! Muolageni! Kafwaha kuishi bii!"
- ²³Phokala anapiga kululu na kutsupha nguwo zao, na kutsupha vumbi dzulu kpwa sababu ya tsukizi,
- ²⁴yuya mkpwulu wa jeshi walagiza atue amphirike Paulo ngomeni. Walagiza achapwe viboko ili kuendza chisa chokala chinahenda Ayahudi ampigire kululu Paulo.
- ²⁵Ariphokala akamlaza ili amchape viboko, Paulo wamuuzza kapteni mmwenga yekala aimire hipho, "Ni halali kumchapa viboko mwanatsi wa Rumi ambaye kakapatikana na makosa?"
- ²⁶Yuya kapteni ariphosikira hivyo, waphiya kpwa mkpwulu wa jeshi achendamua, "Yuya mutu ni mwanatsi wa Rumi! Dze, undahendadze?"
- ²⁷Yuya mkpwulu wa jeshi wakpwendamuuza Paulo, "Hebu niambira, ati we u mwanatsi wa Rumi?" Paulo achiamba, "Ehe."
- ²⁸Phahi yuya mkpwulu wa jeshi wamuamba, "Mino náripha pesa nyinji sana kukala mwanatsi wa Rumi." Paulo achimuamba, "Lakini mino ni mwanatsi wa Rumi kuvyalwa."
- ²⁹Hinyo atu ambao ka ni amuuze maswali, aricha mara mwenga. Ye mkpwulu mwenye wa jeshi naye wahenda wasi-wasi ariphomanya akafunga nyororo Paulo, ambaye ni mwanatsi wa Rumi.
- ³⁰Muhondoye, yuya mkpwulu wa jeshi wataka kumanya chisa haswa chohenda vilongozi a Chiyahudi amshitaki Paulo. Wamvugula na achilagiza akulu a alavyadzi-sadaka na anachama osi a ngambi akutane. Alafu achimreha Paulo mbere ya ngambi.

Mahendo 23

- ¹Phahi, Paulo waatong'orera matso hara anachama a ngambi achiamba, "Enehu, mino námhumikira Mlungu kpwa nia ndzuri siku hizo zosi hadi rero."
- ²Phapho hiphohi Anania, Mlavyadzi-sadaka Mkwulu, walagiza atu okala aimire phephi na Paulo, ampige kofi ra mromo.
- ³Alafu Paulo achimuamba, "Mlungu andakupiga we mwenye. Uwe mnafiki udzihendaye mutu mzuri. Unanihukumu na Shariya za Musa, lakini mbavi unataka atu avundze Shariya, kpwa kualagiza anipige."
- ⁴Atu ambao ka aimire phephi na Paulo amuamba, "Unalaphiza Mlavyadzi-sadaka Mkwulu wa Mlungu?"
- ⁵Phahi, Paulo waamba, "Poreni enehu, simanyire kama ni Mlavyadzi-sadaka Mkwulu. Mana hata Maandiko ga Mlungu ganaamba, 'Usigombe mai kuhusu mtawala wenu.' "
- ⁶Paulo ka anamanya anachama anjina a ngambi ni Masadukayo na anjina ni Mafarisayo. Phahi, wagomba hoyo achiamba, "Enehu, mino ni Mfarisayo, akare angu piya ni Mafarisayo. Mimi nashitakiwa kpwa sababu naamini kukala hakika Mlungu andafufula atu ariofwa."
- ⁷Bada ya kugomba hivyo, phakala na malau mafu ga Mafarisayo na Masadukayo, hata anachama achiganyana.
- ⁸Alumbana kpwa sababu Masadukayo anaamba mutu achifwa takuna kufufuka tsona, takuna malaika wala roho, lakini Mafarisayo nyo anaamini higo gosi.
- ⁹Phakala na fujo sana, hata alimu anjina a Shariya a kundi ra Mafarisayo achiunuka na achilumba kpwa nguvu sana. Achiamba, "Tahuona kosa rorosi kpwa mutu hiyu. Mendzerepho roho wa Mlungu au malaika wagomba naye."
- ¹⁰Fujo rakala dzinji sana hata mkwulu wa jeshi achitishirwa, achiona labuda Paulo andakatwa-katwa. Hiphohi, walagiza asikarie ainjire hiphohi kahi-kahi ya atu na amhale chinguvu-nguvu, amphirike ngomeni.
- ¹¹Usiku, Bwana Jesu wantsembukira Paulo na achimuamba, "Dina chilume! Uriphokala hiko Jerusalem kuyanikahala, na hata hiko Rumi piya n'lazima usiphiye uchanikahala."
- ¹²Ligundzure kuriphocha, Ayahudi anjina ahenda njama, achirya chirapho achiamba, "Tahundaya wala kunwa mpaka humuolage Paulo."
- ¹³Zaidi ya atu arubaini kala akahenda njama hiyo.
- ¹⁴Aphiya kpwa akulu a alavyadzi-sadaka na vilongozi anjina a Chiyahudi achendaamba, "Sino hukarya chirapho hukaamba tahundaya chitu chochosi mpaka ndiphomuolaga Paulo.

¹⁵Phahi, uwe na anachama a ngambi kamuambireni mkpwulu wa jeshi amrehe Paulo hipa na mdzihende avi mnataka mmanyeye zaidi kuhusu kesiye. Naswi hu tayari kumuolaga hata kabla kufika hipa.”

¹⁶Lakini muwa wa Paulo ariphosikira njama hiyo, waphiya ngomeni achendamuambira.

¹⁷Alafu Paulo wamuiha kapteni mmwenga achimuamba, "Hiyu barobaro mphirike kpwa mkpwulu wa jeshi, ana salamu anataka akamuambire.”

¹⁸Phahi yuya kapteni wamphirika yuya barobaro kpwa mkpwulu wa jeshi, achendamuamba, "Paulo yuya busu, akanitaka nimrehe hiyu barobaro kpwako, mana ana maneno anataka kukuambira.”

¹⁹Mkwulu wa majeshi wamgbwira mkpwono yuya barobaro achiphiya naye kanda, na achimuza, "Che unataka uambedeze?”

²⁰Yuya barobaro achiamba, "Vilongozi a Chiyahudi ana chizigbwa cha kukala anataka kumanya zaidi kuhusu malau ga Paulo, hipho akakubaliana edze akuambe, muhondo mphirike Paulo mbere ya ngambi ya Chiyahudi.

²¹Lakini usimlavye, kpwa sababu zaidi ya atu arubaini andadzifwitsa ili amvwamukire. Nao arya chirapho kukala taandarya wala kunwa hadi amuolage. Tsona a tayari hata vi sambu, anagodza uamuzio.”

²²Phahi mkpwulu wa jeshi wamruhusu yuya barobaro aphiye, lakini achimuamba, "Usimuambire mutu yeyesi kala ukaniambira habari hizi.”

²³Badaye yuya mkpwulu wa jeshi waiha kapteni airi achiaambira, "Tayarishani asikari magana mairi a kawaida, asikari sabini a farasi na asikari magana mairi a mikuki, ili aphiye Kaisaria. Kalani tayari kuuka rero usiku saa tahu.

²⁴Piya muikireni Paulo farasi, na mumfise salama kpwa Felisi, mkpwulu wa Jimbo.”

²⁵Alafu yuya mkpwulu wa jeshi achiandika baruwa achiamba:

²⁶Ni mimi Klaudia Lusya. Nakuandikira uwe Muishimiwa Felisi, Mkwulu wa Jimbo. Togola.

²⁷Ayahudi amgbwira mutu hiyu na achikala anataka kumuolaga. Lakini mino nchiinjira na jeshi rangu na nchimtavya, mana násikira ni mwanatsi wa Rumi.

²⁸Námphirika mbere ya ngambi ya Chiyahudi ili nimanye chisa cha kushitakirwa.

²⁹Ndipho nágunduwa kala mashitakage ganahusu shariya zao, lakini kana shitaka ambaro anastahili kunyongbwa wala kufungbwa.

³⁰Piya náambirwa kala Ayahudi ana njama ya kumuolaga, ndipho nchiona baha nimrehe kpwako mara mwenga. Tsona nálagiza ariomshitaki edze akuambire mashitaka gao.

³¹Phahi, hara asikari, kama arivyolagizwa, amhala Paulo achiuka naye usiku kpwa usiku hadi mudzi wa Antipatiri.

³²Muhondoye, hara asikari a magulu auya ngomeni, na achiricha asikari a farasi aphiye naye.

³³Hinyo asikari a farasi ariphofika Kaisaria, alavya hira baruwa kpwa mkpwulu wa jimbo, chisha achimlavya Paulo.

³⁴Yuya mkpwulu wa jimbo wasoma hira baruwa alafu achimuuza Paulo jimbo alaro. Ariphomanya kala Paulo ala jimbo ra Kilikia,

³⁵waamba, "N'ndasikiza kesiyo mara tu atu ariokushitaki ndiphokpwedza." Chisha achilagiza Paulo arindwe ndani ya dzumba rodzengbwa ni mfalume Herode.

Mahendo 24

¹Bada ya siku tsano, Anania Mlavyadzi-sadaka Mkwulu wakpwedza Kaisaria na azehe fulani phamwenga na wakili mmwenga yehwa Teritulo. Achimshitaki Paulo mbere za Felisi, mkpwulu wa Jimbo.

²Paulo ariphoihwa, yuya wakili Teritulo waandza kulavya mashitakage mbere za Felisi achiamba, "Muishimiwa! Utawalao mnono wahurehera amani, nawe ukumanya chimbere mambo ambago ganafwaha kugaluzwa kpwa fwaida ya tsi yehu.

³Siku zosi na chila pahali sino hunakubali mambo higo, kpwa shukurani kulu.

⁴Lakini kabla sidzangbwekucheleweshwa sana, nakuvoya uhuonere mbazi na uhusikize shida yehu kpwa chifupi.

⁵Sino hwagunduwa kala mutu hiyu ni mui sana, anareha fujo kpwa Ayahudi dunia ndzima. Iye ndiye chilongozi wa chama cha afuasi a Jesu Mnazareti.

⁶Piya kala anataka kutiya uyi Nyumba ya Kuvoya Mlungu, ndipho sino huchimbwira. [Kala hunalonda kumhukumu kpwa kulunga shariya zehu za Chiyahudi.

⁷Ela Lusua mkpwulu wa jeshi, achedza na asikarie na achimhala chinguvu-nguvu.

⁸Naye walagiza atu ariomshitaki edze ashitaki kwako.] We mwenye uchimuuza maswali, undamanya ukpweli wa mashitaka higo gosi gomshitakira."

⁹Ayahudi aunga mkpwono higo mashitaka, na achiamba higo gosi ni ga kweli.

¹⁰Phahi mkpwulu wa jimbo wamtuphira mkpwono Paulo ili agombe. Ndipho achiamba, "Namanya wakala jaji wa tsi hino miaka ya kukola, kpwa hivyo naona raha kudzihehera hipha mberezo.

- ¹¹Kpwa kpweli kama siku kumi na mbiri zotsupa, mino kala naphiya Jerusalemu kpwendaabudu.
- ¹²Ayahudi taayanikuta ninalumbana na mutu yeyesi ndani ya Nyumba ya Kuvoya Mlungu. Piya taayanikuta ninafyakatsira atu ahende fujo masinagogini, wala phophosi himo mudzini.
- ¹³Tsona, taaweza kuonyesa ukpweli wa mashitaka higo gonishitakira.
- ¹⁴Lakini Muishimiwa, nakubali kala naabudu ye Mlungu wa akare ehu kpwa kulunga njira ya Jesu, ambayo Ayahudi anayiiha chama. Tsona naziamini Shariya zosi za Musa na chila chitu choandikpwa ni manabii.
- ¹⁵Nami piya namkuluphira Mlungu dza vivyo aho; nina hakika atu a kufwa osi andafufulwa, anono na ayi.
- ¹⁶Kpwa hivyo, siku zosi nahenda bidii kuhenda mambo mazuri mbere za Mlungu na anadamu.
- ¹⁷Bada ya kusagala kure na Jerusalemu miaka minji, náuya kpwedzarehera Ayahudi ayangu pesa za msada na piya kpwedzalavya sadaka.
- ¹⁸Ariphonikuta ninahenda hivyo himo ndani ya Nyumba ya Kuvoya Mlungu, nákala nkagamala kare mavoyo ga kudzitakasa. Piya kala sina atu anji, wala siyahenda fujo rorosi.
- ¹⁹Lakini kala phana Ayahudi anjina kula jimbo ra Asia, ambapho mimi naona hinyo ndio angefwaha kukala hipha na kunishitaki, ichikala ana rorosi ra kugomba kunihusu.
- ²⁰Ama aha ario phapha naaseme makosa nrigophahikana nago nriphoshitakiwa mbere za ngambi ya Chiyahudi.
- ²¹Hebu kosa rangu ni phara nriphopiga kululu mbere zao nchiamba kala nkashitakiwa kpwa sababu naamini kala atu a kufwa andafufulwa?"
- ²²Hipho, Felisi ambaye kala anamanya vinono sana hiyo njira ya Jesu, waamba, "Hino kesi, n'ndaikata wakati Lusia, mkpwulu wa jeshi, ndiphokpwedza."
- ²³Hipho, walagiza Paulo arindwe, lakini achimupha uhuru vichache ili edze alamuswe ni asenae na amrehere vitu atakavyo.
- ²⁴Jumwa na chisiku, Felisi wakpwedza na mchewe Durusila ambaye kala ni Myahudi. Wahumiza Paulo akaihwe, alafu achimsikiza ariphokala anagomba kuhusu kuluphirore kpwa Jesu Muokoli.
- ²⁵Lakini Paulo ariphoandza kugomba kuhusu haki, kutosheka, na kuhusu hukumu ndiyokpwedza, Felisi watishirwa sana na achimuamba, "Ni bahi, kpwa sambu phiya; nchiphaha nafwasi n'ndakuiha."

²⁶Wakati hinyo Felisi ka anaona anaweza kuhongbwa ni Paulo, hipho chila mara ka achimlagizira aihwe kubisha naye.

²⁷Bada ya miaka miiri, phahali pha Felisi phahalwa ni Porikio Fesito. Ela kpwa vira Felisi kala anataka kupendelea Ayahudi, wamricha Paulo jela.

Mahendo 25

¹Porikio Fesito wakpwedza Kaisaria kukala mkpwulu muphya wa jimbo. Bada ya siku tahu wauka kuphiya Jerusalemu,

²ambako akulu a alavyadzi-sadaka na vilongozi a Chiyahudi adzituluza na achiandza kumshitaki Paulo. Am'voya sana Fesito

³aapendeleo ili amrehe Paulo hiko Jerusalemu, mana ka akapanga njama ya kumuolaga njirani.

⁴Fesito waambira, "Paulo wafungbwa jela Kaisaria, nami nápanga kuuya kuko vi sambu-sambu.

⁵Akulu enu anjina naanilunge kuphiya hiko Kaisaria, ichikala mutu hiye ana makosa, andalavya mashitaka kuko."

⁶Fesito ariphomala kama siku nane ama kumi hivi, wauya Kaisaria. Muhondoye, wamenya kotini achendasagala chihiche cha ujaji, na achilagiza Paulo arehwe.

⁷Paulo ariphokpwedza, Ayahudi ola Jerusalemu amzangira na achiandza kulavya mashitaka mai mai ambago aho enye kala taana ushahidi nago.

⁸Lakini Paulo wadzihehera, achiamba, "Siyakosera Shariya za Ayahudi wala Nyumba ya Kuvoya Mlungu na hata Kaisari, Mtawala wa Chirumi."

⁹Fesito wataka kuapendelea Ayahudi, ndipho achimuza Paulo, "Dze, u tayari kuphirikpwa Jerusalemu na ukasikizwe kesiyo hiko?"

¹⁰Paulo achiamba, "Mimi niimire mbere za koti ya Chirumi, ambapho n'lazima nihukumiwe. Kpwa kpweli kama umanyavyo, siyakosera Ayahudi chitu chochosi.

¹¹Nchipatikana na makosa ambago adabuye ni kunyongbwa, sindavoya msamaha ili nisinyongbwe. Lakini ichikala mashitaka nishitakiwago ni Ayahudi ni ga handzo, takuna mutu yeyesi ariye na ruhusa ya kunilavya kpwa Ayahudi. Nakata pili kpwa Kaisari!"

¹²Fesito ariphomala kubisha njama na anachama a barazaye, wamuamba Paulo, "Kpwa vira ukakata pili kpwa Kaisari, phahi undaphirikpwa kpwa Kaisari."

¹³Bada ya siku chache, Mfalume Agiripa na mchewe Benike akpwedza Kaisaria kpwedzamkaribisha Fesito.

- ¹⁴Bada ya kusagala hipho siku za kukola, Fesito wabisha na mfalume kuhusu kesi ya Paulo. Achimuamba, "Hipha phana mutu mmwenga ambaye Felisi wamricha jela kama busu.
- ¹⁵Nriphokala Jerusalemu, akulu a alavyadzi-sadaka na azehe a Chiyahudi anirehera mashitaka gao na achitaka nimhende kala ana makosa.
- ¹⁶Lakini mino nchiaambira hiyo siyo mila ya Chirumi, kumlavya mutu kabla ya kukutana matso kpwa matso na atu ariomshitaki, naye akahewa nafwasi ya kudzihehera.
- ¹⁷Nriphokutana nao hipha, mino siyachelewa, náiha koti siku ya phiriye na nchilagiza hiye mutu arehwe mbere za koti.
- ¹⁸Atu ariomshitaki ariphounuka, taayamshitaki na makosa ga kuvundza shariya kama nrivyoona.
- ¹⁹Lakini akala na makosano gao kuhusu dini yao na kuhusu mutu yefwa aihwaye Jesu, ambaye Paulo anadai kala ni mzima.
- ²⁰Siyamanya njira ya kuchunguza mambo higo, hipho námuamba Paulo achikala a tayari kuphiya Jerusalemu kpwendasikizwa kesiye hiko.
- ²¹Lakini wakata pili ili kesiye ikasikizwe ni Kaisari, phahi nálagiza azuiywe mpaka ndiphomphirika kpwa Kaisari."
- ²²Ndipho Mfalume Agiripa achimuamba Fesito, "Indakalato ichikala n'ndamsikiza mutu hiye mi mwenye." Fesito achimuamba, "Undamsikiza muhondo."
- ²³Phahi, muhondoye Agiripa na mchewe Benike avwaliya nguwo za chifalume achiinjira nyumba ya mkutano phamwenga na vilongozi a vyeo vikulu na vilongozi a mudzi. Fesito walagiza Paulo arehwe.
- ²⁴Chisha achiamba, "Mfalume Agiripa, na mwimwi mosi mrio hipha, mutu hiyu mumuonaye hipha washitakiwa ni Ayahudi osi a hipha Kaisaria na hiko Jerusalemu. Apiga kululu vya kukala kafwaha kuenderera kuishi.
- ²⁵Ela mino nchiona kahendere kosa rorosi ra kumhenda anyongbwe, lakini kpwa vira wakata pili kpwa Kaisari, nami nákata shauri apherikpwe kpwa Kaisari.
- ²⁶Lakini sina habari za sawa za kumuandikira Kaisari kuhusu mutu hiyu. Kpwa hivyo, nkamreha mbere zenu mosi, haswa uwe Mfalume Agiripa, ili bada ya uchunguzi huno nipahe chitu cha kuandika.
- ²⁷Kpwa sababu náona taina mana kutsukula busu bila ya kuandika makosage goshitakirwa."

Mahendo 26

- ¹Alafu Agiripa wamuamba Paulo, "Una ruhusa ya kugomba we mwenye." Phahi, Paulo watsupha mkpwono na achidzihehera, achiamba,

- ²"Mfalume Agiripa, nadziona mutu wa bahati sana hipha rero kudzihehera mberezo kuhusu mashitaka gohenderwa ni azehe a Chiyahudi,
- ³haswa kpwa vira uwe mwenye unamanyato mila za Chiyahudi na tafwauti zao. Kpwa hivyo nakuvoya unisikizeto na univumirire.
- ⁴Ayahudi osi ananimanya vyoishi hangu wanache wangu. Anamanya vyohumira maisha gangu gosi hangu mwandzo phokala kpwehu na hata phokala Jerusalemu.
- ⁵Ananimanya siku nyinji kukala mino náishi kama mwanachama wa chama cha Mafarisayo, ambacho china shariya ngumu zaidi. Lakini achilonda anaweza kugomba.
- ⁶Sambi ni hipha mberezo kugodza hukumu kpwa sababu ya kuamini ahadi yolagbwa akare ehu ni Mlungu.
- ⁷Hino ndiyo ahadi igodzwayo itimie ni mbari kumi na mbiri za Aiziraeli anaomuabudu Mlungu usiku na mutsi. Mfalume, azehe a Chiyahudi anishitaki kpwa sababu ya kuamini hivyo!
- ⁸Kpwa utu wani mwi mnaona Mlungu kaweza kufufula atu a kufwa?
- ⁹Kpwa kpweli mimi piya kala nchionato sana kuhenda rorosi baya ili nipinge dzina ra Jesu wa Nazareti.
- ¹⁰Na hivyo ndivyo nrivyohenda hiko Jerusalemu. Akulu a alavyadzi-sadaka kala achinipha uwezo wa kugbwira na kuatiya jela atu a Mlungu, na ariphohukumiwa kunyongbwa, piya mino ná kubali.
- ¹¹Mara nyinji mino kala nchiphya sinagogi hadi sinagogi kuatiya adabu, tsona náalazimisha areme kuluphiro rao. Kala nikaazira sana hata nchikala naaendza midzi yanjina ili niatese."
- ¹²"Siku mwenga, kala nikahewa malagizo na uwezo ni akulu a alavyadzi-sadaka niphiye Damaskasi.
- ¹³Nriphokala ni njirani, kama saa sita za mutsi, ná pigbwa ni mwanga mkali kuriko wa dzuwa. Mwanga waala kula mlunguni uchining'aza na ayangu okala nasafiri nao.
- ¹⁴Hosi hwagbwa photsi, alafu nchisikira sauti kpwa kabila ya Chiebrania inaniamba, 'Sauli, mbona unanitesa? Uwe u dza punda ashindanaye na tajiriwe, ela unadzilumiza bure.'
- ¹⁵Nami nchiuza, 'U ani Bwana?' Naye achiamba, 'Mimi unitesaye ni Jesu.
- ¹⁶Lakini sambu, unuka. Nikakutsembukira mana nikakutsambula kama mtumishi na shahidi wa higo uchigoona na ndigokuonyesa badaye.
- ¹⁷N'ndakutivya kula kpwa Ayahudi na atu asio Ayahudi, na n'ndakuhuma kpwa

¹⁸Ukaang'aze matso, ili atuluke jizani na ainjire mwangani, na ariche kutawalwa ni Shetani na akubali utawala wa Mlungu. Nao asamehewe dambi zao na aphahe nafwasi phamwenga na ariotengbwa kpwa sababu ya kunikuluphira.'

¹⁹Kpwa hivyo Mfalume Agiripa, mino náhenda vira ruwiya hiyo yola mlunguni vyolagiza.

²⁰Mwandzo nákwendahubiri mudzi wa Damaskasi, alafu nchiphiya Jerusalemu na Judea yosi, chisha nchendahubiri kpwa atu asio Ayahudi nchiamba, "Tubuni dambi na mumgalukire Mlungu, na muonyese na mahendo genu kala mwagaluka kweli.'

²¹Ndiyo mana Ayahudi anigbwira ndani ya Nyumba ya Kuvoya Mlungu, na achitaka kuniolaga.

²²Lakini Mlungu waniterya siku zosi hizo mpaka rero niimire hipha kushuhudiya atu osi, akulu kpwa adide. Mino nagomba mambo gogombwa ni Musa na manabii,

²³ariphoamba Masihi andagaya, andakala wa kwandza kufufuka, na andatangaza mwanga kpwa sisi Ayahudi na atu asio Ayahudi piya."

²⁴Kufika hipho Fesito wampigira kululu Paulo na achimuamba, "Paulo una koma? Kusomako kunji kwakutiya koma!"

²⁵Lakini Paulo achimuamba, "Sina koma Muishimiwa Fesito! Nagomba maneno ga kweli na achili yangu i sawa kabisa.

²⁶Mambo higa tagayahendeka kanda phatu siphomanyikana. Nina hakika Mfalume Agiripa anagamanyato sana, ndiyo mana nagomba naye wazi-wazi na bila ya wuoga.

²⁷Dze, Mfalume Agiripa, kuamini maneno ga manabii? Namanya unaamini."

²⁸Naye Mfalume Agiripa achimuamba Paulo, "Unafikiri muda mchache huno unaweza kunigaluzwa nikale mfuasi wa Jesu?"

²⁹Paulo achiamba, "Muda munji wala mchache si chitu. Navoya Mlungu uwe Mfalume na mwi anjina mosi mnisikirao hivi rero, mkale vyo nrivyo mimi, siphokala msifungbwe minyororo."

³⁰Alafu Mfalume Agiripa waunuka phamwenga na Fesito, Benike na atu anjina okala asegere nao.

³¹Atuluka mura chumba cha kesi, na achiphiya njama achiamba, "Mutu hiyu kana kosa rorosi ra kumhenda ahukumiwe kunyongbwa ama kufungbwa."

³²Alafu Mfalume Agiripa wamuamba Fesito, "Kala mutu hiyu kayakata pili kpwa Kaisari, angerichirwa."

Mahendo 27

- ¹Fesito ariphokata shauri huphirikpwe Itali, Paulo na mabusu anjina akabidhiwa kapteni yehwa Juliasi wa chikosi chiihwacho, "Chikosi cha Kaisari."
- ²Hwakpwendapanda meli yokala ila bandari ya Adiramito ambayo ka indatsapa na bandari za pwani ya jimbo ra Asia. Kala kuna Mmakedonia, yehwa Aristariko, mwenyezi wa Thesalonike, ambaye hwasafiri naye mo melini.
- ³Muhondoye hwatiya nanga bandari ya Sidoni. Kapteni Juliasi wamhenderato Paulo, mana wamruhusu akakutane na asenae na amterye na vitu alondavyo.
- ⁴Huriphouka bandari ya Sidoni, phuto rapiga kula mbere zehu, hipho hwadzifwitsa na chisiwa cha Kupuro ili husipigbwe ni hiro phuto.
- ⁵Huriphotsapa bahari ya Kilikia na Pamfilia hwatiya nanga bandari ya Mura, mudzi wa Lukia.
- ⁶Huriphokala hipho Mura, yuya kapteni wa jeshi waphaha meli kula Isikandaria inaphiya Itali, na achiupandiza himo.
- ⁷Hwasafiri pore pore siku nyinji na huchifika bandari ya Nido kpwa tabu. Kpwa vira phuto kala richerepiga kula mbere zehu, hwakala tahuweza kuenderera zaidi. Hipho, hwasafiri na uphande wa mwakani wa chisiwa cha Kirete, phephi na Salmoni.
- ⁸Hwatsapa na kanda-kanda ya pwani hiyo kpwa tabu sana, mwisho huchifika phahali phaihwapho, "Bandari ya Salama", phephi na mudzi wa Lasea.
- ⁹Atu kala akaangamiza muda munji, tsona wakati na hinyo ka ni hatari kusafiri na meli kpwa sababu Sukukuu ya Kufunga kala ikatsapa. Phahi Paulo waakanya achiamba,
- ¹⁰"Alume, naona charo chehu chindakala cha tabu na hasara kulu kpwa meli, mizigo na hata maisha gehu."
- ¹¹Lakini yuya kapteni wa jeshi badala ya kusikiza Paulo, wamsikiza dereva wa meli na mchina-meli.
- ¹²Kpwa vira bandari hiyo kala si ndzuri wakati wa mnyevu, anji akata shauri atu aenderere na charo, na ichiwezekana hufike bandari ya Foinike na hukale hipho wakati wosi wa mnyevu. Bandari hino i Kirete na inalolana na mtswerero wa dzuwa.
- ¹³Badaye kpwapiga phuto ra pore pore kula mwakani, enye achiona ni wakati mzuri wa kuhenda alondavyo. Hipho, achiandza charo na achitsapa na phephi na pwani ya Kirete.
- ¹⁴Lakini mara mwenga phuto kali sana, riihwaro "Phuto ra Vuri na Mlairo wa Dzuwa", rahupiga kula chisiwani.
- ¹⁵Rira phuto rapiga meli na huchikala tahuweza kuphiya hiko rilako, hipho, hwairicha hira meli itsukulwe ni rira phuto.

- ¹⁶Chisiwa chidide chiihwacho Kauda chazuwiya vichache rira phuto kali. Hata dzagbwe yakala kpwa tabu sana, lakini hwaweza kuunula dau ra kuokola na huchirifungato.
- ¹⁷Hara mabahariya ariphofungato rira dau, alafu afunga hira meli yenye, kuizungulusira mikowa na tsini ndani ya madzi kpwa kuogopheza isivundzike. Kpwa vira ka anaogopha meli inaweza kugama ndani ya mtsanga wa bahari ya Libiya, atsereza tanga na achiricha meli iphirikpwe ni phuto.
- ¹⁸Phuto razidi kuupiga sana, hata phofika siku ya phiri mabahariya achiandza kutsupha mizigo madzini.
- ¹⁹Siku ya hahu, atsupha vyombo vya meli madzini kuhumira mikono.
- ²⁰Phokala tahuona dzuwa wala nyenyezi kpwa siku nyinji, na kuno phuto kali rinazidi kuvuma, hwakata tamaa.
- ²¹Bada ya kukosa chakurya kpwa muda mure, Paulo waima mbere zao na achiamba, "Alume, kala mwanisikiza na hukasalani Kirete, tahungephahani tabu hino yosi na hasaraye.
- ²²Lakini sambu, nakuvoyani msifwe moyo! Kpwa mana taphana hata mmwenga ndiyefwa, meli bahi ndiyo ndiyobanangika.
- ²³Kpwa mana malaika wa hiye Mlungu anitawalaye na ambaye namhumikira, akaniimira chiphephi usiku,
- ²⁴naye akaamba, 'Paulo, usiogophe! N'lazima ukalumbe kesiyo mbere za Kaisari, Mtawala wa Chirumi. Naye Mlungu kpwa mbazize anakuahidi kala atu osi ambao unasafiri nao melini, andakala salama.'
- ²⁵Kpwa hivyo ayangu, nataka mdine chilume, mana mino naamini kala vyo Mlungu achivyogomba, ndiyo ndivyokala.
- ²⁶Lakini phahi, n'lazima meli igame pwani ya chisiwa fulani."
- ²⁷Phofika usiku wa kumi na nne meli kala bado icherephirikpwa ni rira phuto hiko bahari ya Adiria. Hata inafika usiku wa manane, hara mabahariya adzisikira a phephi na kufika tsi kavu.
- ²⁸Phahi, ariphokala anataka kumanya china cha madzi, afunga mkowa chitu chiziho achichitabwisa madzini. Achikuta kama china cha madzi ni mita salasini na sabaa. Bada ya muda achipima tsona, achikuta china cha madzi ni mita ishirini na sabaa.
- ²⁹Kpwa kuogopha meli isigame maweni, atsereza nanga nne nyuma za meli, na achivoya kuche.
- ³⁰Alafu mabahariya apanga kuchimbira, hipho atsereza rira dau ra kuokola, kpwa chizigbwa cha kukala akabwage nanga uphande wa mbere.

- ³¹Lakini Paulo achimuamba yuya kapteni na asikarie, "Ichikala hinya mabahariya taandabaki melini, mmanye tamndasalimika bii!"
- ³²Phahi, hinyo asikari akata hira mikowa yokala ikafungirwa dau na achiriricha riphaye na madzi.
- ³³Phofika pepho za kucha, Paulo waabembeleza arye chakurya. Waamba, "Rero ni siku ya kumi na nne mnalola na kugodza ndirokala na wala tamdzangbwerya.
- ³⁴Phahi nakuvoyani murye. N'lazima murye ili mphaha nguvu za kuishi. Taphana hata mmwenga ndiyeangamiza lidzerere."
- ³⁵Bada ya kugomba hivyo, Paulo wahala bofulo, achimshukuru Mlungu mbere zao, achirimega na achiandza kurya.
- ³⁶Adina chilume na chila mmwenga achirya.
- ³⁷Hosi jumula himo melini kala hu alume magana mairi na sabini na sita.
- ³⁸Bada ya chila mmwenga kurya chakurya cha kukola, atsupha nganu baharini ili aphungule uziho wa meli.
- ³⁹Kuriphocha, aona tsi kavu, lakini taamanyire dzinare. Ela aona ufuwo mzuri wa bahari na achipanga, ichikala indawezekana, agamize hira meli phara mtsangani.
- ⁴⁰Hipho akata mikowa ya nanga na achiziricha baharini, na phapho hipho achivugula mikowa yokala ikafungirwa sukani. Alafu achiunula tanga ra mbere ili ihege ppho na achiielekeza ufuwoni.
- ⁴¹Lakini meli yapiga ndulu ya mtsanga mo madzini na ichigama. Seemu ya mbere ya meli yazikika mtsangani na ichikala taiweza kuuka. Nayo seemuye ya nyuma ichiandza kuvundzika vipande vipande kpwa nguvu za maimbi.
- ⁴²Asikari kala akapanga kuolaga mabusu gosi, ili asedze akaojorera kondze na akachimbira.
- ⁴³Lakini kpwa vira yuya kapteni ka analonda kumtavya Paulo, waazuwiya asihende hivyo. Walagiza hara ambao anaweza kuojorera, atine madzini na aojorere hadi kondze.
- ⁴⁴Na hinyo asioweza kuojorera ahumire mbao ama vipande vya meli vya kuvundzika. Chihivyo chila mmwenga wafika tsi kavu salama.

Mahendo 28

- ¹Huriphofika salama tsi kavu, hwaambirwa kala chira chisiwa chiihwa Malita.
- ²Enyezi a chisiwa hicho kala ni atu anono sana. Ahukaribisha na achihukutira moho, mana kala kuna mnyevu tsona ka kunanya mvula.
- ³Paulo wahala hiha ra kuni achiritiya mohoni. Alafu mwatuluka nyoka mo kunini kpwa rira dzoho ra moho, ichimng'ata mkpwono na ichidina phapho.

⁴Enyezi ariphoona hira nyoka inalewa-lewa phara mkpwononi, abisha o enye kpwa enye achiamba, "Mutu hiyu n'lazima akale waolaga! Hata dzagbwe waponahiko baharini, ela mlungu aihwaye Haki kandamricha akaenderera kuishi."

⁵Lakini Paulo waikuta-kuta mohoni hira nyoka bila ya kumhenda rorosi kabisa.

⁶Enyezi kala anaona andafutuka mkpwono au agbwe gafula na afwe, lakini hata bada ya kurorera kpwa muda na kusaona rorosi, agaluzamaazo gao achiamba, "Mutu hiyu ni mlungu!"

⁷Phephi na hipho ka phana munda wa Pabulio, mkpwulu wa chisiwa hicho. Wahukaribisha vinono kpwakpwe kaya na huchendakala ajenie siku tahu.

⁸Ise wa Pabulio ka akadziambalaza chitandani, mana kala ana homa na kuharamlatso. Paulo wamenya achendam'voyera, alafu achimuikira mikono na achiphola.

⁹Bada ya higo kutsapa, atu osi himo chisiwani okala ni akongo, akpwedza na achiphozwa.

¹⁰Ahupha zawadi nyinji, na huriphokala hu tayari kuuka na meli, ahupha chila chitu chotaka.

¹¹Bada ya miezi mihahu, hwapanda meli yokala ikatiya nanga pho chisiwani majira ga mnyevu na huchiandza charo. Meli hiyo kala ila mudzi wa Isikandaria nayo ka yiihwa, "Milungu ya Patsa."

¹²Huriphofika mudzi wa Sirakusa, hwatiya nanga na huchikala hipho siku tahu.

¹³Kula hipho hwauka na huchifika mudzi wa Regio. Muhondoye, kuchizuka phuto ra mwaka, na siku ya phiriye huchikala hukafika bandari ya Potioli.

¹⁴Phofika hiko hwakuta atu amkuluphirao Jesu, na achitaka hukale nao sabaa mwenga. Badaye hwauka na huchifika Rumi.

¹⁵Afuasi a Jesu akalao Rumi ariphosikira kala huredza, akpwedza hadi phahali phaihwapho Soko ra Apiyo na Hoteli Tahu kpwedzahuchinjira. Paulo ariphoaona, wamshukuru Mlungu na achidzisikira ana mkpwotse.

¹⁶Huriphotsoloka Rumi, Paulo waruhusiwa kukala macheye na asikari mmwenga wa kumrinda.

¹⁷Bada ya siku tahu, Paulo waiha vilongozi osi a Chiyahudi. Ariphokpwedza, waambira, "Enehu, hata dzagbwe siyakosera atu a kabila rangu wala kukosera mila ya akare ehu, nágbwirwa hiko Jerusalemu na nchilaviwa kpwa Arumi.

¹⁸Arumi aniuza maswali na achitaka kunirichira, mana akuta sina makosa ga kunihenda ninyongbwe.

¹⁹Lakini Ayahudi ariphopinga, yanibidi nikate pili kpwa Kaisari. Mino siyashitaki atu a kabila rangu,

²⁰ela náfungbwa hino minyororo kpwa sababu ya kuluphiro ra Aiziraeli. Nákuihani ili nedze nikuambireni kuhusu hiro kuluphiro rehu.”

²¹Nao achimuamba, "Sino tahudzangbwephaha baruwa yoyosi kula Judea. Wala takudzangbwepwedza mutu yeyesi kula hiko kpwedzasema ama kugomba rorosi iyi ra kuhusu uwe.

²²Lakini hunalonda hukusikire maonigo we mwenye, kpwa mana hunamanya chila phahali atu anapinga hicho chamacho.”

²³Phahi hinyo Ayahudi apanga kukutana naye siku yanjina. Na siku hiyo akpwedza atu anji sana hipho nyumbani pha Paulo. Paulo wabisha nao hangu ligundzu hadi dziloni, kueleza na kuashuhudiya kuhusu utawala muphya wa Mlungu. Waabembeleza amkubali Jesu kpwa kuasomera Shariya za Musa na vitabu vya manabii.

²⁴Anjina akubali manenoge, lakini anjina achirema kuamini.

²⁵Alumbana enye kpwa enye na achiandza kufumukana bada ya Paulo kuamba, "Roho wa Mlungu wagomba kpweli na akare enu ariphohumira nabii Isaya achiamba:

²⁶'Phiya kpwa hinyo atu ukaambire: Kusikira mndasikira, na wala tamndaelewa chitu; kulola mndalola, lakini tamndaona.

²⁷Mana mioyo yao ni mifu, asindika masikiro gao, na achifwinya matso gao. Lakini kama si hivyo, angeona na matso gao, akasikira na masikiro gao, akaelewa na mioyo yao, na akanigalukira, nami nkaaphoza.' “

²⁸"Kpwa hivyo, nalonda mmanyeye kukala, habari za Mlungu za kuokola atu, zaphirikpwa kpwa atu asio Ayahudi. Nao andakubali!"

[²⁹Paulo ariphomala kugomba hivyo, hara Ayahudi auka kuno analumbana sana.]

³⁰Paulo wasagala miaka miiri mizima phara phokala akapangisha, naye ka achikaribisha chila mutu yekpwedza pho phakpwe.

³¹Watangaza utawala muphya wa Mlungu na kufundza kuhusu Bwana Jesu chilume tsona bila ya kuzuwiywa ni yeyesi.

Arumi

Arumi 1

- ¹Baruwa hino ila kpwangu mimi Paulo, mtumishi wa Jesu Muokoli. Nátsambulwa nikale mtume, na nchitengbwa nitangaze habari ndzuri kula kpwa Mlungu.
- ²Hizo habari ndzuri, Mlungu wazilaga hangu kare kuumira manabiige arioandika Maandiko matakatifu. Habari hizo
- ³zinamhusu mwanawe, ambaye chibinadamu ni chivyazi cha Mfalume Daudi,
- ⁴na ambaye Mlungu kpwa uwezowe mkpwulu, wahumira Rohowe achimfula. Chihivyo achihumanyisa kukala Bwana wehu Jesu Masihi ndiye Mwana wa Mlungu.
- ⁵Mlungu wanijaliya nikale mtume kpwa sababu ya Jesu arivyonihendera. Kazi ya mtume ni kuiha atu a makabila gosi amkuluphire Jesu na kumuogopa ili atogolwe.
- ⁶Mwimwi piya mu kundi mwenga ra aho arioihwa kukala afuasi a Jesu Masihi.
- ⁷Phahi enehu hiko mudzi wa Rumi, Mlungu anakumendzani sana, naye wakutsambulani ili mkale atue haswa. Baba Mlungu na Bwana Jesu Masihi naakujaliyeni na mkale salama.
- ⁸Mwandzo, Jesu Masihi ananiwezesha kumshukuru Mlungu kpwa sababu yenu mosi, mana kuluphiro renu rinamanyikana dunia ndzima.
- ⁹Nami namhumikira Mlungu moyo kutsuka kpwa kuatangazira atu anjina habari ndzuri kuhusu Mwanawe. Mlungu anamanya vyo ambavyo nakuvoyerani chila wakati.
- ¹⁰Nam'voya achimendza, vivi aniphe nafwasi ya kpwedzakulolani.
- ¹¹Mana naaza sana kukuonani, ili nikuganyireni vipawa vya chiroho na kukutiyani moyo.
- ¹²Mana ya kuamba hivyo ni mwimwi na mimi huphezane imani zehu za chiroho.
- ¹³Enehu, nalonda mmanyenye kukala nápanga mara nyinji kpwedzakulolani, lakini sidzangbwephaha nafwasi hadi sambu. Nalonda nedze nihende kazi namwi ili niphaha atu a kumkuluphira Jesu, dza viratu vyohendeka kpwa atu anjina asio Ayahudi.
- ¹⁴Mlungu wanipha jukumu ra kutangaza ujumbewe kpwa atu osi, akale ni astarabu ama asiokala astarabu, akale asoma ama taasomere.
- ¹⁵Ndiyo mana nina hamu sana kpwedzakutangazirani habari ndzuri kuhusu Jesu mwimwi atu a Rumi.

- ¹⁶Hizo habari ndzuri ni uwezo wa Mlungu wa kuokola atu osi akuluphirao, mwandzo ni Ayahudi na phiri ni atu asio Ayahudi. Phahi mino siona haya hata chidide kuzitangaza,
- ¹⁷mana zinaonyesa wazi vira Mlungu ahendavyo atu akale na haki. Atu anaphaha haki kpwa kukuluphira bahi, kama Maandiko gaambavyo, "Mutu ahendwaye kukala na haki ni Mlungu andaishi kpwa kukuluphira."
- ¹⁸Mlungu mwenye waonyesa wazi kukala indabidi aatiye adabu kali atu osi ambao taamuogopha na ambao kpwa sababu ya tabiya zao mbii anapinga ukpweli wa Mlungu.
- ¹⁹Wala siyo kukala taamanya rorosi kuhusu Mlungu, mana gara ambago gangemanywa ga wazi, kpwa vira ye Mlungu mwenye wagaonyesa atu.
- ²⁰Mana hangu mwandzo wa dunia, Mlungu waumba chila chitu kpwa njira ambayo hata dzagbwe atu taamuona, anaweza kuelewa vira arivyo. Hasa vitu arivyumba vinaonyesa kukala Mlungu ana uwezo milele, na ndiye Mlungu macheye, wala takuna wanjina. Ndiyo mana atu taaweza kudai kukala taammanya Mlungu.
- ²¹Mana hata dzagbwe ammanya Mlungu arivyo, lakini taamtogola wala kumshukuru kama anavyostahili. Badala ya hivyo, maazo gao gakala mai na achili zao ni uzuzu muhuphu.
- ²²Enye adzikarya kala ni alachu, ela akala azuzu.
- ²³Mana aricha kumuabudu Mlungu na achiabudu sanamu zoigana na binadamu, nyama, nyama a mapha na viumbe vya kuambala photsi ambavyo taviweza kuishi milele.
- ²⁴Phahi Mlungu waaricha ahende vyo atakavyo, kulunga tamaa zao mbii na kuhenda mambo ga waibu na miri yao.
- ²⁵Aricha kuamini ukpweli kuhusu Mlungu na achilunga mafundzo ga handzo. Ahumikira na kuabudu viumbe badala ya Muumba, ambaye ni atogolwe milele! Amina.
- ²⁶Phahi, Mlungu waaricha ahende mambo gao mai alondavyo. Hata achetu ao achiricha kulala na alume ao, ela achilólana enye kpwa enye.
- ²⁷Vivyo hivyo alume nao aricha kulala na achetu ao, na achilólana enye kpwa enye. Alume ahenderana mambo ga waibu, kpwa hivyo adzitsamburira enye vira ndivyotiywa adabu kpwa mahendo gao mai.
- ²⁸Tsona, atu hinyo arema ilimu ya kpweli kuhusu Mlungu, ndipho naye Mlungu achiaricha alunge maazo gao mai. Nao achihenda mambo ambago tagafwaha kuhendwa.

²⁹Achiodzala chila aina ya uyi, zuluma, uchoyo, udiya na chidzitso. Atu dza aho nkumendza kuheha, kugomba handzo, kuochera atu ngulu, na kusenganya. Ni aolagadzi,

³⁰na fyakatsi, atu asiommendza Mlungu, asiojali ayawao, tsona atu a ngulu na kudzikarya. Chila wakati nkuzembula njira nyiphya ya kuhenda dambi. Taaogopha avyazi ao,

³¹tsona ni apumbavu na azuzu, atu asiotimiza ahadi zao, wala asio na mbazi bii.

³²Atu hinyo anamanya wazi kukala mutu achihenda mambo mai dza higa Mlungu andamhukumu chifo. Lakini taajali! Nkuenderera kuhenda mai makusudi na piya nkuatogola anjina ahendao mambo mai dza gago.

Arumi 2

¹Phahi myangu, nakuambira kpweli, kuna haki ya kuhukumu myao, hata ichikala ni ani. Kpwa mana uchihukumu myao umanye kala, unadzihukumu mwenye. Mana gago gakpwe mai ahendago ndigouhendago hata uwe.

²Sambi hunamanya kukala hukumu ya Mlungu kpwa atu ahendao mambo mai ni ya haki.

³Phahi mwenehu, uchihukumu myao alafu nawe uchihenda gago mai, usione Mlungu andakuricha.

⁴Mlungu ni mnono mana anakuonera mbazi nyinji, kakutiya adabu mara mwenga ela anakuvumirira ili utubu dambizo. Haya sambu mbona unamzarau?

⁵Lakini kpwa sababu u chisoto na kukubali kukala una dambi, unadziikira adabu kali wakati hukumu ya haki ya Mlungu ndiphokala wazi.

⁶Wakati hinyo Mlungu andamripha chila mmwenga kulengana na mahendoge.

⁷Mlungu andaapha uzima hinyo anaodinisa kuhenda manono, kpwa sababu anaendza nguma na ishima kula kpwa Mlungu, na piya uzima wa milele.

⁸Ela atu achoyo na ndiorema ukpweli, na kuhenda mai, Mlungu andaareyera na aatiye adabu kali.

⁹Chila mutu ndiyehenda mambo mai andaphaha tabu na mateso, kuandzira Ayahudi na hata atu asio Ayahudi.

¹⁰Lakini osi ahendao manono, Mlungu andaapha nguma, ishima na amani, kuandzira Ayahudi na hata atu asio Ayahudi.

¹¹Mana Mlungu kaonera mutu yeyesi.

¹²Atu osi ahendao dambi andaangamizwa, hata dzagbwe taamanya Shariya za Musa. Na atu amanyao hizo Shariya achihenda dambi, andahukumiwa kulengana na zizo Shariya.

- ¹³Andahukumiwa mana Mlungu kamupha haki mutu kpwa sababu ya kusikira Shariya bahi, ela anamupha mutu haki kpwa kuhenda gara Shariya ziambago.
- ¹⁴Atu ambao sio Ayahudi achienda vira afikiriavyo na vichigbwa sawa na Shariya ziambavyo, hata dzagbwe Shariya zohewa Musa taazimanya, indaonyesa kala anamanya haki mwao mioyoni.
- ¹⁵Mahendo gao ganaonyesa kala anamanya kare vira Shariya zilondavyo. Nago maazo gao mara zanjina ganaashitaki na mara zanjina ganaatetea.
- ¹⁶Na kulengana na hizo habari ndzuri nitangazazo, wakati wa hukumu, Mlungu andamwika Jesu Masihi ahukumu maazo ga atu ga siri.
- ¹⁷Phahi, uchidziha u Myahudi hakika unaadamira kuphaha haki kpwa kulunga Shariya, na unahenda ngulu ati u mutu wa Mlungu.
- ¹⁸Kpwa sababu ya kufundzwa kuhusu Shariya, unamanya Mlungu alondavyo na kutsambula ra sawa.
- ¹⁹Una hakika kukala unafwaha kulongoza atu asio Ayahudi, kama mutu kulongoza vipofu ama kama taa kung'azira atu jizani.
- ²⁰Tsona u mwalimu wa anache na atu asiomanya, mana Shariyazo zinakueleza kuhusu marifwa gosi na ilimu ya kpweli.
- ²¹We mwenye unafundza anjina, lakini kuhenda gara ugombago! Unafundza ayao, uchiamba "Usiye," lakini mbavi we mwenye u muivi.
- ²²Uwe unaambira atu, "Msizinge," lakini mbona we mwenye unazinga? Tsona unawezadze kuzira anaoabudu sanamu ichikala we mwenye unadzitajirisha kpwa kuiya vitu kula nyumba za kuabudira sanamu.
- ²³Unadzikarya ati unamanya Shariya za Mlungu, ela mbona unahenda atu amkufuru Mlungu kpwa kuvundza Shariyaze?
- ²⁴Phahi gaga ganagbwa sawa na Maandiko gaambago, "Atu asio Ayahudi anakufuru Mlungu kpwa sababu ya mambo mai mhendago mwimwi Ayahudi."
- ²⁵Ayahudi osi a chilume nkutiywa tsatsani, nayo tsatsa ina mana tu ichikala mutu andalunga Shariya. Lakini mutu achivundza Shariya, tsatsaye taina mana yoyosi, na ni sawa na mutu ambaye kayatiywa tsatsani.
- ²⁶Phahi mutu ambaye kayatiywa tsatsani achilunga vyo Shariya zitakavyo, Mlungu andamkubali dza mutu yetiywa tsatsani.
- ²⁷Tsona mutu ambaye kayatiywa tsatsani, achilunga vyo Shariya ziambavyo, mahendoge manono gandakutuluzani makosa mwi Ayahudi. Mana mwatiywa tsatsani, na zo Shariya mnazo, ela tamzilunga.
- ²⁸Phahi siye chila mutu ariyevyalwa Myahudi ni Myahudi mwenye mwenye, wala mutu kakala Myahudi wa kpweli kpwa kutiywa tsatsani.

²⁹Hata! Myahudi wa kpweli ni iye amuogophaye Mlungu mwakpwe moyoni. Nayoy tsatsa ya kpweli ni tsatsa ya moyo, yohendwa ni Roho wa Mlungu, wala si kpwa kulunga Shariya. Mutu dza hiye anaphaha nguma kula kpwa Mlungu wala si kpwa anadamu.

Arumi 3

¹Sambi kuna fwaida yani kukala Myahudi? Hebu kutiywa tsatsani kuna mana yani?

²Hakika kukala Myahudi kuna mana sana. Mwandzo kabisa, Mlungu waapha Ayahudi malagizoge.

³Ela kpwa kpweli Ayahudi anjina kala taakuluphirika. Dze, o atu asioika chilagane anahenda Mlungu naye asiike chilagane?

⁴Sivyo hata chidide! Atu ni amanye kukala Mlungu ni mkpweli ela anadamu osi ana handzo. Kama Maandiko gaambavyo: "Uchiniambira makosa gangu, manenogo ni ga kpweli. Uchinhukumu, hukumuyo ni ya haki."

⁵Lakini anjina anaweza kuamba ati dambi zehu zinaonyesa kukala Mlungu anahenda haki. Mana ichikala makosa gehu ganamhenda Mlungu aonekane wa haki, phahi sisi hunamhenderato, hebu sivyo? Kpwa hivyo, Mlungu achihutiya adabu, inaonyesa kukala kana haki. (Nagomba dza anadamu agombavyo.)

⁶Sivyo hata chidide! Mana ichikala ni hivyo, Mlungu andahukumudze atu a dunia na haki?

⁷Tsona kuenjereza, atu nkuamba ati, "Sisi huchihenda mai, anjina andaona wazi-wazi kala Mlungu anahenda ga haki, nao andazidi kumtologa. Sambi kpwadze huhukumiwe dza achina-dambi?"

⁸Vivyo ni sawa kuamba, "Nahuhendeni mai ili manono gedze." Atu anjina anahuifya anaamba sisi naswi hunafundza vivyo. Phahi aho andatiywa akili kulengana na makosa gao.

⁹Sambi huambedze? Dze sino Ayahudi hukale hu anono zaidi kuriko atu asio Ayahudi? Hata chidide! Mana nákuambirani kare kala Ayahudi na asio Ayahudi osi a sawa, mana osi anatawalwa ni dambi.

¹⁰Gago ga sawa na Maandiko ga Mlungu gaambago: "Takuna mutu ariye na haki, hata mmwenga.

¹¹Takuna mutu yeyesi amanyaye njira za Mlungu, wala takuna amuendzaye.

¹²Atu osi amricha Mlungu wala taana mana tsona phakpwe matsoni. Takuna hata mmwenga ahendaye manono."

¹³"Miro zao ni dza mbira za wazi, anahumira ndimi kugomba handzo." "Mwao miromoni nkutuluka maneno ga sumu dza ya nyoka."

- 14"Ng'andzi zao zaodzala lana na maneno ga utsungu."
- 15"Magulu gao ga tayari kpwendaolaga.
- 16Phophosi aphyapho, kazi yao ni kuolaga na kutesa atu.
- 17Nao taamanya njira ya kuendza mapatano."
- 18"Taamuogopha Mlungu bii."
- 19Kufikira hipho hunaona kukala hizo Shariya, zichigomba utu wowosi, zinaambira atu osi azilungao. Nazo zaikpwa ili Mlungu ndiphohukumu dunia, anadamu asikale na sababu ya kudzihehera, na ionekane wazi kukala atu osi ana makosa mbere za Mlungu.
- 20Kpwa mana takuna mutu yeyesi ambaye anahendwa kukala na haki mbere za Mlungu kpwa kulunga vira Shariya ziambavyo. Kazi ya Shariya ni kuonyesa mutu kala akahenda dambi tu.
- 21Lakini sambu Mlungu wahuonyesa njira ya kuphaha haki, bila ya kulunga Shariya. Nazo Shariya za Musa na Maandiko ga manabii ganagomba wazi kuhusu mambo higa.
- 22Kumkuluphira Jesu Muokoli ndiko kumhendako Mlungu akakubali atu kukala na haki. Nkuhenda hivyo kpwa atu osi amkuluphirao, wala kaonera mutu yeyesi.
- 23Mana atu osi ahenda dambi, na anakosa haki ya Mlungu,
- 24ela kpwa sababu ya mbazize, Mlungu wakubali atu kukala na haki mbereze bila ya kuripha chochosi. Wahenda hivyo kpwa kumhuma Jesu Muokoli yekpwedzausa dambi zehu na achihukombola.
- 25Mlungu wamlavya Jesu akale sadaka, ili atu achiamini kukala wafwa kpwa sababu yao asamehewe dambi zao. Mlungu wahenda hivyo kuonyesa kala ni wa haki, mana wavumirira na kayaatuluza atu makosa kpwa sababu ya dambi zao za kare.
- 26Piya wahenda hivyo kuonyesa wakati huno kukala iye ni wa haki, na ndiye ahendaye osi amkuluphirao Jesu akale na haki.
- 27Kpwa hivyo, mambo higa ganahuzuiya kabisa kuhenda ngulu, kpwa sababu tahuphokerwa kukala huna haki kpwa kulunga vira Shariya za Musa ziambavyo ela kpwa kukuluphira bahi.
- 28Mana Mlungu nkumhenda mutu akale na haki kpwa kukuluphira, wala sio kpwa kulunga Shariya.
- 29Hebu Mlungu ni Mlungu wa Ayahudi bahi? Dze, akale siye Mlungu wa atu asio Ayahudi? Hakika iye ni Mlungu wa atu asio Ayahudi piya,
- 30kpwa vira Mlungu ni mmwenga, na kuna njira mwenga ya kuahenda atu akale na haki mbereze. Hangu Ayahudi atiywao tsatsani, hata atu asio Ayahudi

asiotiywa tsatsani, osi andakubaliwa ni Mlungu kukala na haki kpwa kuluphiro bahi.

³¹Phahi, huchisisitiza kukuluphira, huambe hizi Shariya tazina mana? Hata chidide! Ko kukuluphira ni kutimiza malagizo gosi ga Shariya.

Arumi 4

¹Dze, huambedze kuhusu mkare wehu Brahimu? Mlungu wamuonadze kukala na haki?

²Ichikala Brahimu waphaha haki kpwa sababu ya mahendoge, phahi angekala na chitu cha kuhendera ngulu, ela si mbere za Mlungu.

³Mana Maandiko ga Mlungu ganaamba, "Brahimu wamkuluphira Mlungu na achikubaliwa kukala mutu wa haki."

⁴Amba mutu achienda kazi, mshaharawe siyo zawadi, lakini kpwa kpweli ni hakiye.

⁵Ela mbazi za Mlungu siyo dza mshahara. Mana mutu asiyeadamira mahendoge kuphaha haki ela anamkuluphira Mlungu asameheye atu ayi, andaphokerwa kukala na haki kpwa kumkuluphira.

⁶Hata Mfalume Daudi naye waamba vivyo kuhusu raha ya mutu ariyehendwa kukala na haki, bila ya kulola mahendoge:

⁷"Baha aho ambao Mlungu waasamehe makosa gao na kugafuta kabisa.

⁸Baha mutu ambaye Mlungu kamhesabira tsona kukala ana dambi."

⁹Zino baraka zohadzwa ni Daudi, zinahusu ariotiywa tsatsani bahi, yani Ayahudi, hebu hata atu asio Ayahudi piya? Nakutambukizani Maandiko gaambago kukala Mlungu wamhenda Brahimu kukala ana haki kpwa kumkuluphira.

¹⁰Phahi nakumanyisani kukala, Brahimu ariphohendwa kukala na haki kala kadzangbwe kutiywa tsatsani. Ela bada ya higa ndipho achitiywa tsatsani.

¹¹Tsatsa kala ni dalili ya kuonyesa kukala Mlungu wamkubali Brahimu kukala ana haki, hata kabla kadzangbwetiya tsatsani. Mana Mlungu wamhenda kukala ana haki kpwa sababu ya kumkuluphira tu, wala si kpwa sababu ya kutiywa tsatsani. Kpwa hivyo Brahimu ndiye mkare wa chiroho wa atu osi amkuluphirao Mlungu na kukubaliwa kukala ana haki bila ya kutiywa tsatsani.

¹²Atu ariotiywa tsatsani nao, Brahimu ni mkare wao wa chiroho vivyo, achimkuluphira Mlungu. Mana kakala ise yao kpwa sababu atiywa tsatsani, ela ni ise yao kpwa sababu amkuluphira Mlungu dza viratu ye mwenye, hata kabla kadzangbwetiya tsatsani.

¹³Mlungu wamlaga Brahimu na vivyazivye kuapha dunia ndzima ikale yao. Mlungu kaikire chilagane hichi na Brahimu kpwa sababu kala analunga Shariya,

lakini ni kpwa sababu Brahimu kala anamkuluphira, ndipho naye Mlungu achimkubali kala ana haki.

¹⁴Mana ichikala atu alungao Shariya ndio ndiophokera cho chilagane, phahi kumkuluphira Mlungu ngekala ni kazi ya bure. Piya chilagane cha Mlungu chingekala ni cha handzo,

¹⁵mana mutu avundzaye Shariya nkutiywa adabu. Lakini ichikala takuna Shariya, phahi takuna mutu wa kutiywa adabu kpwa sababu ya kura kuvundza Shariya.

¹⁶Ndiyo mana cho chilagane cha Mlungu chinategemea kumkuluphira. Na vyakala hivyo ili hicho chilagane chikale kama zawadi kpwa vivyazi vyosi vya Brahimu. Wala sio kpwa hara alungao Shariya bahi, ela hata kpwa hinyo amkuluphirao Mlungu dza viratu Brahimu. Sisi hosi, mkare wehu wa chiroho ni Brahimu,

¹⁷na vivyo vinagbwa sawa na Maandiko gaambago, "Nkakuhenda mkarengbwa wa makabila manji." Phahi, mbere za hiye Mlungu ariyemkuluphira, afufulaye atu a kufwa na kuhenda mambo ambago tagako gakakalako, Brahimu ndiye mkare wehu.

¹⁸Brahimu naye ariphoambwa, "Uvyazio undakala munji dza viratu nyenyezi," dzambo hiro kala tariwezekana. Ela waenderera kumkuluphira Mlungu, na kpwa hivyo wakala mkare wa makabila manji, kama arivyolagizwa.

¹⁹Wakati uho Brahimu wakala na miaka kama gana mwenga, na wamanya kala mwiriwe kala avi ukafwa na mchewe Sara kala ni tasa. Lakini hata hivyo kuluphirore tariyaphunguka.

²⁰Tsona Brahimu kayakala na wasi-wasi wowosi kuhusu chilagane cha Mlungu. Ela wazidi kumkuluphira na kumtogola,

²¹mana wakala na uhakika kukala Mlungu anaweza kutimiza mambo arigolaga kugahenda.

²²Ndiyo mana Maandiko gakaamba kukala Mlungu wamhenda kukala ana haki kpwa kura kukuluphira.

²³Lakini higa maneno gaambago, "Mlungu wamhenda kukala ana haki," tagayaandikirwa iye macheye,

²⁴ela gaandikpwa kpwa sababu yehu piya. Ganahuhakikishira kukala huchimkuluphira Mlungu, ariyemfufula Bwana wehu Jesu, sisi naswi hundahendwa kukala na haki.

²⁵Mlungu wamlavya aolagbwe kpwa sababu ya makosa gehu, na achimfufula ili huphahe haki.

Arumi 5

- ¹Phahi, kpwa vira Mlungu wahuphokera dza atu a haki kpwa kumkuluphira, sambu hunasagalato na Mlungu kpwa gara arigohenda Bwana wehu Jesu Masihi.
- ²Kpwa sababu ya kumkuluphira Jesu, Mlungu wahujaliya na manono gosi, na vivi anaenderera kuhujaliya. Phahi hunaonato sana mana hunaamini hundakala phamwenga na Mlungu phatuphe pha nguma.
- ³Na hata huchiphaha mateso, chisha hunaonato. Mana hunamanya mateso ganahuhenda huzidi kuvumirira.
- ⁴Uvumirizi nkureha tabiya ndzuri, nayo tabiya ndzuri ikareha matumaini.
- ⁵Na matumaini tagaweza kuhutiya waibu. Mana hunamanya vira Mlungu ahumendzavyo sana, kpwa sababu wahupha Rohowe ahuodzaze mendzwaye.
- ⁶Huriphokala huchere na dambi, tsona kala tahudziweza hata chidide, Jesu wahufwerera wakati uriokala ukapangbwa ni Mlungu.
- ⁷Ni vigumu mutu kukubali kuolagbwa kpwa sababu ya mutu wanjina, hangbwe kpwa mana ana haki. Chahi inawezekana mutu kuolagbwa kpwa sababu ya mutu mnono sana.
- ⁸Lakini Mlungu waonyesa kala anahumendza sana, kpwa kumlavya Jesu afwe kpwa sababu yehu, hata wakati kala huchere na dambi.
- ⁹Kpwa vira hwahendwa kukala na haki kpwa sababu ya chifo cha Jesu, hakika rindakala neno dide kpwapkwe kuhutivya na hukumu kali ya Mlungu.
- ¹⁰Manage, kala hu maadui ga Mlungu, ela wahupatanisha kpwa chifo cha mwanawe. Vivi Mlungu wahupatanisha, phahi hakika rindakala neno dide kpwapkwe kuhutivya kpwa sababu ya uhai wa mwanawe!
- ¹¹Wala siyo hivyo bahi, ela piya Mlungu akahuhenda huhererwe sana kpwa sababu Bwana wehu Jesu Masihi akahupatanisha naye.
- ¹²Enehu, naamba: Dambi yainjira duniani kpwa sababu ya dambi ya mutu mmwenga, nayo ichireha chifo. Na ndiyo mana atu osi anafwa, kpwa sababu osi ahenda dambi.
- ¹³⁻¹⁴Hangu Adamu amkosere Mlungu hadi Musa ariphohewa Shariya, duniani kala mna dambi kare. Atu osi a wakati hinyo afwa, hata dzagbwe Mlungu kayaahukumu kukala na makosa mana kala takuna Shariya. Hara atu afwa hata dzagbwe taayakosa kulunga lagizo ra Mlungu dza viratu Adamu. Adamu kala ni mfwano wa iye ambaye wakpwezda badaye.
- ¹⁵Ela hira dambi iriyoinjira duniani kpwa sababu ya Adamu siyo dza zawadi ya bure ya Mlungu iriyorehwa ni Jesu Masihi. Mana mutu mmwenga, yani Adamu, warehera atu anji chifo kpwa dambiye, ela wanjina, yani Jesu, achiarehera atu anji zawadi ya kusamehewa dambi zao na kuphokera uzima. Kpwa kpweli, mbazi za Mlungu tazina chipimo!

¹⁶Viratu Mlungu asamehevyo atu kpwa mbazize vi tafwauti na matokeo ga dambi ya Adamu. Bada ya yo dambi mwenga, Mlungu waahukumu atu, lakini bada ya makosa manji, Mlungu waasamehe kpwa mbazize na achiakubali kukala atu a haki.

¹⁷Dambi ya mutu mmwenga yahenda chifo chitawale atu osi. Ela hakika hara aphokerao mbazi zisizo na chipimo kula kpwa Mlungu na kuphaha haki andaishi milele kpwa sababu ya gohendwa ni mutu wanjina, yani Jesu Masihi.

¹⁸Kpwa hivyo phahi, viratu atu osi vyohukumiwa kpwa sababu ya kosa ra mutu mmwenga, vivyo hivyo atu osi anaphaha haki na kuhewa uzima kpwa kazi ya haki ya mutu mmwenga.

¹⁹Viratu mutu mmwenga vyokosa kumuogopha Mlungu, na achienda atu anji akale na dambi, vivyo hivyo mutu mmwenga wanjina wamuogopha Mlungu, na achienda atu anji akale na haki.

²⁰Shariya za Musa ziriphorehwa, zahenda dambi izidi. Lakini dambi iriphozidi, nazo mbazi za Mlungu zichizidi zaidi.

²¹Kpwa hivyo phahi, dambi ina uwezo wa kutawala atu na kuarehera chifo. Ela vivyo hivyo mbazi na mendzwa ya Mlungu ina uwezo wa kutawala atu kpwa kuapha haki. Chihivyo osi amkuluphirao Jesu, ambaye ni Bwana na Muokoli wehu, andaphaha uzima wa milele.

Arumi 6

¹Dze, atu azidi kuhenda dambi ili Mlungu azidi kuaonera mbazi kpwa kuasamehe?

²Hata chidide! Sino ni kama avi hwafa husihende dambi tsona, kpwa hivyo tahuweza kuenderera kuhenda dambi bii.

³⁻⁴Manyani kukala, huriphobatzwa hwaungana na Jesu Muokoli, yani avi hwafwa na kuzikpwa phamwenga naye. Bada ya Jesu kuzikpwa, wafufulwa na uwezo mkpwulu wa Mlungu. Kpwa hivyo sisi naswi huchifulwa phamwenga naye ili huishi maisha maphya.

⁵Kpwa vira hwaungana naye huriphofwa phamwenga naye, phahi hakika hundaungana naye ndiphofufulwa, dza viratu Jesu arivyofufulwa.

⁶Kpwa mana utu wehu wa kare waolagbwa phamwenga na Jesu msalabani, ili asili zehu za chibinadamu za kumendza kuhenda dambi zibanangbwe, na husienderere kukala atumwa a dambi tsona.

⁷Mana mutu achifwa, katawalwa tsona ni dambi.

⁸Sisi naswi hwafwa phamwenga na Jesu, kpwa hivyo hunaamini kala hundaishi phamwenga naye.

- ⁹Kpwa sababu Jesu wafufuka, hunamanya kukala kandafwa tsona, mana chifo tachimuweza.
- ¹⁰Jesu ariphofwa, wafwa limwenga bahi, na achikala akashinda dambi; hipha sambi anaishi kumhamira Mlungu.
- ¹¹Namwi piya dzioneni kukala mkashinda dambi, nazo taziweza kukutawalani tsona; hipha sambi mnaishi kumhamira Mlungu kpwa sababu ya Jesu Muokoli.
- ¹²Kpwa hivyo msiriche dambi ikatawala miri yenu ifwayo, ili ikuhendeni mlunge tamaa mbii za miri yenu.
- ¹³Msihale vilungo vya miri yenu mkavihumira kuhenda dambi. Ela dzilavyeni kpwa Mlungu ili mhumire vilungo vyenu kuhenda haki, mana mwafufulwa ni Mlungu mchiinjizwa uzimani.
- ¹⁴Kpwa kukala tamlundwa kulunga Shariya tsona, dambi taindakuwezani, mana Mlungu wakusameheni dambi zenu.
- ¹⁵Dze, huzidini kuhenda dambi kpwa vira Mlungu wahusamehe na tahuishi kulunga Shariya tsona? Ha'a! Nahusihende hivyo.
- ¹⁶Hakika mnamanya wazi kukala mchidzilavya kpwa mutu na kuhenda alondavyo, phahi mndamsikiza yuya mutu wala tamndasikiza anjina, avi mu atumwae. Mchisikiza maazo gao mai mndakala atumwa a dambi, na matokeoge ni chifo; ela mchisikiza Mlungu, mndakubaliwa kukala na haki.
- ¹⁷Lakini namshukuru Mlungu mana kala mu atumwa a dambi, ela sambi mwakubali mafundzo gosi mrigophokera hata ndipho mnagalunga moyo kutsuka.
- ¹⁸Mlungu naatogolwe mana wakukombolani msihende dambi tsona, na mkakala atumwa a Mlungu ili mlunge haki.
- ¹⁹(Nahumira mfwano huno wa atumwa na matajiri gao ili ikale rahisi mwimwi kuelewa.) Phokala tamdzangbwemanya Jesu, mwadzilavya miri yenu kpwa ajili ya mambo machafu na kuzidi kuhenda uyi. Sambu, kpwa vira mnamanya, dzilavyeni miri yenu tse-tse-tse kuhenda haki ili muishi bila lawama.
- ²⁰Mriphokala atumwa a dambi, tamyashurutishwa kumhamira Mlungu.
- ²¹Dze, majira higo mriphohenda higo mambo ambago sambu mnaona haya nago, mwaphaha fwaida yani? Ukweli ni kukala, tagana fwaida yoyosi, hata matokeo ga mambo higo ni chifo cha milele!
- ²²Lakini sambu, kpwa vira mwakombolwa dambini na mchikala atumwa a Mlungu, fwaida yenu ni kuishi bila lawama. Nago matokeoge ni uzima wa milele.
- ²³Kpwa kukala mutu yeyesi ahendaye dambi, mariphoge ni chifo cha milele. Ela Mlungu anahupha uzima wa milele, na uzima hinyo si maripho, ela ni zawadi kpwa sababu ya Bwana wehu Jesu Muokoli.

Arumi 7

¹Enehu, naamba hivi, mana nagomba na atu ambao anaelewa Shariya. Kpwa hivyo mnamanya kukala mutu n'lazima alunge Shariya achikala achere mzima.

²Sambi n'ndahumira mfwano huno. Shariya ya ndowa inaamba kala mchetu kaweza kuricha mlumewe wakati achere mzima. Ela mlume achifwa, yuya mchetu a huru; yani, katawalwa tsona ni shariya ya ndowa.

³Achihalwa ni mlume wanjina na kuno mlumewe ni mzima, phahi andaihwa mzindzi. Ela mlumewe achifwa, hiyo shariya taimfunga tsona, na anaweza kulólwa ni mlume wanjina.

⁴Vivyo hivyo enehu, dza viratu mutu achifwa katawalwa tsona ni shariya, mwimwi namwi tamtawalwa tsona ni Shariya za Musa. Mana ni avi mwafwa phamwenga na Jesu msalabani, na vivi mu akpwe. Naye wafufulwa ili sisi humhumikire Mlungu na kumhamira.

⁵Mana asili yehu ya chibinadamu phokala ikatawala maazo gehu, Shariya zahenda tamaa mbii za miri yehu zikale na nguvu zaidi. Dzambo hiri rahenda hutake kuhenda makosa chila wakati ambago mwishowe ni chifo.

⁶Hwakala mateka a Shariya, na hwajaribu kumhumikira Mlungu kpwa kulunga mambo ga kare goandikpwa mo Shariyani. Lakini sambu hu huru, mana tahumhumikira Mlungu kpwa kulunga Shariya ela kpwa kulunga njira nyipha ya kulongozwa ni Rohowe.

⁷Vino huambedeze? Huambe kala Shariya ni mbii? Si kpweli hata chidide! Hakika kala si Shariya, mimi nisingemanya dambi ni utu wani. Kala Shariya taziyaamba, "Usimizire mahe chochosi cha myao," mino nisingemanya kala kuaza cha myangu ni dambi.

⁸Lakini nriphomanya shariya hiyo, dambi yanihala mateka na kukala na chila aina ya tamaa mbii. Mana bila Shariya, dambi taina nguvu ya kuhenda atu ahende makosa.

⁹Hipho dzuzi na dzana nriphokala simanya Shariya za Mlungu, kala nchionato na masagazi gangu. Ela nriphomanya Shariya zilondavyo, dambi ichizidi nguvu, mana náelewa kukala ni kama avi nkafwa, yani nkatengbwa na Mlungu.

¹⁰Nchiona kala Shariya hizo, ambazo kala ni ziniphe uzima, kpwangu mino kala zinanirehera chifo.

¹¹Mana dambi yahumira Shariya hiyo hiyo kunichenga na kunitenga na Mlungu.

¹²Phahi ni wazi kala Shariya na malagizoge gala kpwa Mlungu mwenye; kpwa hivyo ni manono na ga haki.

¹³Kpwa kpweli mambo manono tagaweza kunitenga na Mlungu, ng'o! Lakini Shariya yakpweza ili dambi imanyikane wazi kala ni dambi. Nayo dambi yareha

chifo kpwa higo malagizo manono. Kala ni mpango wa Mlungu, Shariya kuhuonyesa kala dambi ni mbii kpweli.

¹⁴Hunamanya kala Shariya zalaviwa ni Roho wa Mlungu; lakini asili yangu ni ya chibinadamu, nami náguzwa nikale mtumwa wa dambi.

¹⁵Kpwa kpweli mi mwenye sidzimanya. Mana chila nchitaka kuhenda gara nilondago, siweza; ela nahenda gara nisigogalonda.

¹⁶Ichikala nahenda nisigogamendza, inaonyesa kala nakubali kala Shariya ni ndzuri.

¹⁷Phahi, siye mimi nihendaye dambi, ela ni hiyo asili ya dambi nriyo nayo.

¹⁸Namanya mwangu tamuna zuri, yani asili yangu ya chibinadamu. Naweza kuaza manono, lakini siweza kugahenda.

¹⁹Mana sihenda manono nilondago, ela gara mai nisigolonda ndigo nihendago.

²⁰Sambi nchihenda gara ambago sigamendze, kpwa kpweli siye mimi nihendaye dambi, ela ni hiyo asili ya dambi nriyo nayo.

²¹Phahi mino nágunduwa chitu, chila nchitaka kuhenda manono, nadzikuta ninatsambula kuhenda mai.

²²Shariya za Mlungu zinanihamira sana mwangu moyoni.

²³Ela naona kala vilungo vya mwiri wangu vinalongozwa ni shariya yanjina, yani shariya ya dambi. Hiyo shariya inapingana na maazo gangu, na kunihenda mtumwa hata nashindwa kuhenda gara Mlungu alondago.

²⁴⁻²⁵Ni shaka rani rino? Mimi mwenye nalunga Shariya za Mlungu na achili zangu, ela asili yangu ya chibinadamu inalunga shariya ya dambi. Ni ani ndiyenitivya na hino nguvu ya dambi, ili Mlungu asitengane nami? Namshukuru Mlungu kpwa sababu ya Bwana wehu Jesu Masihi!

Arumi 8

¹Sambi phahi kpwa vira Mlungu wakuunganishani na Jesu Muokoli, kakulavyani makosa tse.

²Mana, kpwa sababu ya Jesu Muokoli, mwaikpwa huru msitawalwe ni dambi irehayo chifo. Mwaphokera Roho wa Mlungu alavyaye uzima wa milele, na ndiye anayekuikani huru.

³Kpwa sababu ya asili yehu ya chibinadamu, Shariya za Musa kala tazina nguvu ya kuhuika huru ili husitawalwe ni dambi. Ela Mlungu walavya Mwanawe mwenye na mwiri dza miri yehu, ela bila dambi. Kpwa kuumira mwiri huno Mlungu wahukumu dambi ili ahuike huru. Chihivyo achikala akamala uwezo wa dambi

⁴Ili hutimize mambo gosi manono galondwago ni Shariya. Mana hunalongozwa ni Roho wa Mlungu, wala tahulongozwa tsona ni asili ya chibinadamu.

⁵Kpwa mana alungao asili ya chibinadamu, achili zao nkuaza kuhenda mai. Lakini alongozwao ni Roho wa Mlungu, achili zao nkuaza kuhenda mambo gahamirago ye Roho.

⁶Anayeaza kulunga asili ya chibinadamu, anadziendzera chifo; ela alongozwaye ni Roho, ana uzima na ana amani.

⁷Kpwa mana atu aazao kuhenda mai anampinga Mlungu, wala taaweza kulunga Shariya za Mlungu hata chidide.

⁸Phahi alungao asili ya chibinadamu taaweza kumhamira Mlungu.

⁹Lakini mwimwi tamlongozwa ni asili ya chibinadamu, ela mnalongozwa ni Roho, mana kpwa kpweli Roho wa Mlungu anasagala mwenu mioyoni. (Manyani kukala mutu yeyesi ambaye kana Roho wa Jesu mwakpwe moyoni, siye mfuasiwe wa kpweli.)

¹⁰Lakini Jesu achikala mwenu mioyoni, hata dzagbwe miri indafwa kpwa sababu ya dambi, ela roho zindaishi mana Mlungu wakuhendani mkale na haki.

¹¹Ichikala Roho wa Mlungu, ariyemfufula Jesu, anaishi mwenu mioyoni, miri yenu, ambayo nkufwa, Mlungu andaipha uzima kpwa uwezo wa Rohowe.

¹²Phahi enehu, sisi tahulondwa husagale kulengana na asili ya chibinadamu, yani kuenderera kuhenda dambi, ela jukumu rehu ni kusagala kulengana na Roho wa Mlungu alondavyo.

¹³Mana mchikala na masagazi galungago asili ya chibinadamu, mndafwa, ela mchiricha kuhenda mahendo mai kpwa uwezo wa Roho wa Mlungu, kpwa kpweli mndasagala na Mlungu milele.

¹⁴Osi alongozwao ni Roho wa Mlungu ni ana a Mlungu.

¹⁵Mana Mlungu kayakuphani Roho wa kukuhendani atumwa ario aoga. Lakini wakuphani Roho wa kukuhendani mkale ana a Mlungu. Na Roho hiye ndiye ariyehuwezesha kumuiha Mlungu, "Baba".

¹⁶Phahi ye Roho phamwenga na roho zehu anahuhakikishira kala sisi hu ana a Mlungu.

¹⁷Sambi kpwa vira sisi hu ana a Mlungu, piya hu arisi a Mlungu; na manono gosi ambago Mlungu wamupha Jesu, naswi andahupha. Bora hukubali kuvumirira mateso dza iye, na hipho hundaphaha nguma phamwenga naye.

¹⁸Mateso ga wakati huno sigaona chitu nchigalinganisha na nguma ambayo Mlungu andahupha badaye.

¹⁹Mana viumbe vyosi vinagodza kpwa hamu kumanyiswa ana a Mlungu.

- ²⁰Viumbe vyosi vyahendwa vikale tavina mana tse, wala siyo kumendza kpwao, ela ni vira arivyomendza Mlungu mwenye. Hata hivyo vinarorera ichikala
- ²¹vindativiwa ili visiole, ela viphahe uhuru wa ajabu ndioupha anae.
- ²²Hunamanya kala hata kufikira sambu, viumbe vyosi vinaula kpwa utsungu dza utsungu wa kudzivugula.
- ²³Chisha phahi, si viumbe macheye viulavyo, ela hata sisi, huriohewa Roho wa Mlungu kutatiswa manono ndigophaha, naswi hunaula mwehu mioyoni. Mana hunagodza Mlungu ahuphe haki yosi ya kukala anae, yani kuhupha miri miphya yohulaga.
- ²⁴Hangu Mlungu ariphohuokola, hunagodzera kpwa hamu hiyo nguma yedzayo. Lakini ichikala unatumaini kuphaha chitu ambacho unachiona, siyo kutumaini. Hebu ni ani ambaye anaweza kutumaini kuphaha chitu aricho nacho?
- ²⁵Lakini huchitumaini kuphaha chitu husichochiona, phahi hukugodza kpwa hamu bila kukata tamaa.
- ²⁶Phamwenga na higo, Roho wa Mlungu nkuhuterya katika unyonje wehu, mana tahumanya kuvoya wala hata cho chakum'voya Mlungu. Ela Roho wa Mlungu mwenye nkuhuvoyera kpwa Mlungu na chiriro cha utsungu ambacho tahuweza kuchisemurira.
- ²⁷Mlungu amanyaye mpaka ndani ya mioyo ya atu, anamanya maazo ga Rohowe. Mana ye Roho nkuvoyera atu a Mlungu viratu Mlungu mwenye amenzavyo.
- ²⁸Hunamanya katika chila hali Mlungu nkuhenda kazi na atu amenzao, arioihwa kulengana na mpangowe, ili chila chitu chikale chinono.
- ²⁹Mana Mlungu waamanya hangu mwandzo hinyo atu ndioatsambula kukala atue. Na achikata shauri andaahenda tabiya zao zikale dza za Mwanawe Jesu, ili Jesu akale mvyere wa ana osi a Mlungu.
- ³⁰Phahi hinyo arioiatsambula akale atue ndio arioiha. Na aho ndio arioihenda akale na haki, tsona ndio arioihenda kuapha nguma.
- ³¹Vino, huambedze kuhusu mambo higa? Ichikala Mlungu a uphanda wehu, kpwa kpweli takuna mutu awezaye kuhushinda.
- ³²Mlungu kayamfwitsa mwanawe mwenye, lakini wamlavya afwe kpwa ajili yehu hosi. Phahi, ichikala wahupha mwanawe mwenye, vivyo hivyo andahujaliya mambo manji manono.
- ³³Kpwa kpweli takuna mutu yeyesi ndiyeshitaki atu arioiatsambulwa ni Mlungu. Ye mwenye Mlungu ndiye aahendaye akale na haki.
- ³⁴Tsona takuna mutu yeyesi ndiyehuhukumu. Mana Jesu Muokoli wehu, ariyefwa na kufufulwa, anasagala mkpwono wa kulume wa Mlungu, phahali pha ishima kulu sana, na kuko anahuvoyera sisi vivyo.

³⁵Takuna chochosi ndichoweza kuhutanya na mendzwa ya Jesu! Hata ichikala huna mashaka makulu na mateso au hunagaya, Jesu anahumendza. Hata kala hunahirika na ndzala na tahuna nguwo, anaenderera kuhumendza. Ichikala huna hatari kulu au hata huchiolagbwa, Jesu anahumendza vivyo.

³⁶Higo nchigogomba ganagbwa sawa na Maandiko gaambavyo: "Chila siku hunaindzwa kpwa sababu ya kukuhumikira. Atu anahuhenda avi hu mang'ondzi ga kutsindzwa."

³⁷Lakini hata mambo gosi higa gachihuphaha, sino bado huna ushindi mkpwulu, kpwa sababu Jesu ariyehumendza wahuterya.

³⁸Mana namanya kpwa kpweli kukala takuna chitu ndichoweza kuhutanya na mendzwa ya Mlungu. Kukala moyo au kufwa, takundahutanya na mendzwa ya Mlungu. Takuna malaika, wala mamlaka na falume zosi za Shetani wala viumbe vyosi vitawalavyo na virivyo na uwezo ndivyoweza kuhutenganisha na mendzwaye. Mambo gahendekago hivi sambu au ndigokpwedza badaye tagaweza kuhutanya na mendzwa ya Mlungu.

³⁹Si dzulu mlunguni, wala kuzimu, au chiumbe chochosi ndichohutanya na mendzwa ya Mlungu. Na higa ganakala kpwa sababu ya go arigohenda Bwana wehu Jesu Muokoli.

Arumi 9

¹Nagomba ukpweli muhuphu kpwa sababu ya Jesu. Maazo gangu ganalongozwa ni Roho wa Mlungu, nago gananihakikishira kala nagomba kpweli, wala sichenga.

²Kpwa kpweli nina sonono kulu na utsungu usiosira

³kpwa sababu ya atu angu, a kabila rangu. Mana ningeeza hata dzagbwe ni kulaniwa nilaniwe na kutengbwa na Jesu ili enehu atiye.

⁴Hinyo ni Aiziraeli, ambao Mlungu waahenda akale anae, achiaonyesa ngumaye na achiika vilagane nao. Tsona achiapha Shariyaze, ahadize, na malagizo ga vira anavyolondwa kumuabudu.

⁵Aho Aiziraeli, akare ao ni Brahimu, Isaka na Jakobo, yehwa Iziraeli. Hata Muokoli chibinadamu ni Muiziraeli. Mlungu atawalaye chila chitu, naatogolwe milele na milele! Amina.

⁶Lakini siamba Mlungu washindwa kutimiza ahadiye kpwa Aiziraeli. Hata! Mana si osi ario chivyazi cha Iziraeli ni Aiziraeli enye enye.

⁷Wala sio chivyazi chosi cha Brahimu ni ana a kpweli a Brahimu. Hata! Isiphokala, Mlungu wamuamba Brahimu, "Uvyazio nriokulaga undala kpwa Isaka."

⁸Higa manage ni, ana a Brahimu a kpweli ni hara ariovyalwa kulengana na chilagane cha Mlungu. Ela ariovyalwa kulengana na arivyolonda Brahimu chimwiri taahasabiwa kukala ni ana a Mlungu.

⁹Mana ahadi yenye inaamba hivi, "N'ndauya wakati nchiopanga, na Sara andakala ana mwana mlume."

¹⁰Tsona sio hivyo bahi, ela hiye mwana mlume ni mkare wehu Isaka. Aripbokula walóla Rebeka achivyala naye patsa.

¹¹⁻¹²Ela kabla ya hara patsa kuvyalwa, wala taadzangbwehenda nono au iyi, Mlungu wamuamba Rebeka, "Mvyere andamhumikira mdide." Hivi vinaonyesa kala Mlungu nkutsambula mutu kulengana na arivyopanga iye, wala sio kulengana na mahendo ga yuya mutu.

¹³Higa ganagbwa sawa na Maandiko ga Mlungu gaambago kukala, "Jakobo námmdenza, ela Esau námzira."

¹⁴Sambi huambedze? Huambe Mlungu kayahenda haki? Hata!

¹⁵Mana wamuambira Musa, "Nkumjaliya na kuonyesa mbazi mutu yeyesi nimlondaye."

¹⁶Phahi Mlungu nkumuonera mbazi ye ammendzaye, wala siyo bidii na kumendza kpwa mutu.

¹⁷Mana Mlungu wamuamba Farao hivi, "Nákuricha moyo makusudi nikuhumire uwe kuonyesa atu uwezo wangu, ili nguma yangu igote dunia ndzima."

¹⁸Kpwa hivyo ni wazi kala Mlungu nkumuonera mbazi mutu yeyesi ammendzaye, na kumhenda chisoto yeyesi atakaye.

¹⁹Mendzerepho mutu andaniamba, "Ichikala ni hivyo, mbona Mlungu anahuhukumu? Ni ani awezaye kupinga vira Mlungu alondavyo?"

²⁰Lakini we, u ani hata umuuzi Mlungu? Dze, chitu choumbwa chinaweza kushindana na yechiumba na kuuza, "Kpwa utu wani waniumba hivi?"

²¹Hakika unamanya, muumba wa nyungu ana uwezo wa kuumba nyungu mbiri na ulongo uho mmwenga: nyungu mwenga ikale ya kazi malumu, na yanjina ikale ya kazi za kawaida.

²²Sambi, kpwa sababu Mlungu walonda kuonyesa atu utsunguwe na kuamanyisa uwezowe, waavumirira sana hara ambao kala akapangirwa kutiywa adabu, ambao kala anafwaha kuangamizwa.

²³⁻²⁴Wahenda hivyo mana walonda kuhuonyesa vira ahendavyo kaziye chiajabu. Wahutsambula hosi, Ayahudi na hata asio Ayahudi, ili ahunere mbazi, mana wahutayarisha kare kuphaha nguma phamwenga naye.

²⁵Ndani ya Chitabu cha nabii Hosea, Mlungu anaamba hivi: "Hinyo ambao sio atu angu, n'ndaaiha 'Atu angu.' Atu ambao kala siamendze, n'ndaaiha, 'Atu angu niamendzao.' "

²⁶Na, "Aho ambao kala achiambwa, 'Mwimwi simwi angu,' andaihwa, 'Ana a Mlungu ariye hai.' "

²⁷Naye nabii Isaya anaamba hivi kuhusu Aiziraeli: "Hata dzagbwe Aiziraeli ni anji dza mtsanga wa pwani, lakini ndiotiviwa ni achache.

²⁸Mana Mwenyezi Mlungu andaatiya adabu kamili himu duniani, tsona upesi, viratu arivyoamba."

²⁹Ni dza viratu arivyotabiri nabii Isaya hipho kare, phoamba: "Kala Bwana wa majeshi kayahusazira chivyazi cha Aiziraeli, phahi hungekala hwasira dza atu a Sodoma na Gomora."

³⁰Dze, gano gosi manage ni ni? Manage ni, atu ambao sio Ayahudi taayadzishugulisha kuphaha haki, ela Mlungu waahenda akale na haki kpwa kumkuluphira bahi.

³¹Piya manage ni, Aiziraeli ambao ahenda bidii kulunga Shariya ili aphahe haki, taayaiphaha.

³²Kpwa utu wani taayaiphaha? Kpwa sababu aadamira mahendo gao badala ya kumkuluphira Mlungu. Phahi achikpwala rira dziwe kulu na achigbwa.

³³Dziwe riro ndiro rihadzwaro ni Maandiko gaambago: "Lolani, hiko mudzi wa Sayuni ninaika dziwe, ambaro atu andadzikpwala, dziwe ambaro rindahenda atu agbwe. Lakini mutu yeyesi ndiyekuluphira hiye mutu ambaye ni hiro dziwe, kandaphaha waibu hata chidide!"

Arumi 10

¹Enehu, hamu yangu kulu mwangu moyoni na mavoyo gangu kpwa Mlungu, naaza Ayahudi ayangu aokolwe.

²Nakuambirani, atu aho ana chadi cha kulunga Mlungu, ela taamanya vira Mlungu alondavyo.

³Tsona arema kulunga njira ya Mlungu irehayo haki, mana taaimanyire, ela aendza kuphaha haki kpwa kulunga mipango yao.

⁴Mana Jesu watimiza kazi za Shariya, ili yeyesi ndiyemkuluphira ahendwe kukala ana haki bila ya kulunga Shariya.

⁵Dzulu ya njira ya kuphaha haki kpwa kulunga Shariya, Musa waandika kukala, "Mutu ndiyegbwira malagizo gosi ga Shariya andaishi kpwa sababu ya kulunga hizo Shariya."

- ⁶Ela kuphaha haki kpwa njira ya kukuluphira, Maandiko ganaamba, "Msigombe mwenu mioyoni mkaamba, 'Ni yuphi ndiyepanda kuphiya mlunguni?' " (Yani kumreha Jesu duniani.)
- ⁷"Ama mkaamba, 'Ni yuphi ndiyetserera hadi kuzimu?' " (Yani kumfufula Jesu).
- ⁸Lakini Maandiko ga Mlungu ganambadze? "Neno ra Mlungu u phephi naro, ri mwako mromoni na moyoni." Naro neno ndiro ujumbe hutangazao, yani atu anaweza kuphaha haki kpwa kumkuluphira Jesu.
- ⁹Kpwa hivyo uchigomba na kanwayo mwenye kukala, "Jesu ni Bwana," na uchiamini mwako moyoni kukala Mlungu wamfufula, phahi undaokolwa.
- ¹⁰Mana mutu nkuamini na moyowe naye akahendwa kukala na haki, na akagomba na mromowe mwenye, akaokoka.
- ¹¹Kuhusu ye Muokoli, Maandiko ganaamba, "Mutu yeyesi ndiyemkuluphira kandaphaha waibu hata chidide."
- ¹²Mana takuna tafwauti ya Myahudi na mutu asiyekala Myahudi. Bwana iye mmwenga, ni Bwana wa atu osi, naye anaajaliya atu osi am'voyao.
- ¹³Higa ganagbwa sawa na Maandiko gaambago, "Mutu yeyesi ndiyemririra Mlungu andaokolwa."
- ¹⁴Ela ukpweli ni kukala, atu taaweza kumririra Mlungu ichikala taadzangbwe kumkuluphira. Nao taandaweza kumkuluphira ichikala taadzangbwe kusikira habarize. Chisha taaweza kusikira bila ya kutangazirwa.
- ¹⁵Nao atu taandaphiya kpwendatangaza habari hizo bila ya kuumwa. Phahi Maandiko ganaamba, "Arehaye habari ndzuri nkuhamira atu!"
- ¹⁶Ela sio Aiziraeli osi ariokubali hizo habari ndzuri kuhusu Jesu. Mana nabii Isaya waamba, "Bwana, ni ani ariyeamini habari zehu?"
- ¹⁷Phahi atu andaamini achisikira habari za Jesu Muokoli, nao andasikira tu ichikala zindatangazwa.
- ¹⁸Ela swali ni hiri: Dze, Aiziraeli taadzangbwe kusikira? Kpwa kpweli asikira, mana Maandiko ganaamba, "Sauti yao yasikirika dunia ndzima, na maneno gao gachifika hadi mwisho wa dunia."
- ¹⁹Swali ranjina ni hiri: Dze, Aiziraeli taayaelewa? Mwandzo Musa waamba, "N'ndakuhendani muaonere wivu atu ambao sio Ayahudi, na atu asioelewa, andakuhendani mtsukirwe."
- ²⁰Tsona nabii Isaya anagomba chilume maneno ga Mlungu gaambago, "Atu ambao taayaniendza, ndio arioniona. Nádzimanyisa kpwa atu ambao kala taaniuzira."

²¹Lakini kuhusu Aiziraeli, Mlungu anaamba, "Mutsi wosi nagolosea mkpwono wangu atu ambao taayaniogopha, tsona anipinga."

Arumi 11

¹Sambi nauza, dze, Mlungu wakahala atue? Hata chidide! Mimi mwenye ni Muiziraeli, chivyazi cha Brahimu, na m'bari wa Benjamini.

²Mlungu kayaakahala atue ambao waamanya hangu mwandzo. Kpwani tamanya Maandiko gaambavyo kuhusu Elija, arivyomririra Mlungu kuhusu Aiziraeli ayae?

³Waamba, "Mlungu, atu hinya aolaga manabiigo, na kubananga mwahali mwa kukulavira sadaka. Na hivi sambi nkasala machiyangu, tsona analonda kuniolaga hata mimi!"

⁴Lakini naye Mlungu wamuambadze? Wamuamba, "Nkadziikira alume elufu sabaa kuko Iziraeli ambao taadzangbwemuabudu Baali, mlungu ambaye ni chizuka."

⁵Hata vivi sambi si Aiziraeli osi ariomricha Mlungu; hu phapho achache huriosala, ambao Mlungu wahutsambula kpwa mbazize.

⁶Phahi kpwa vira hwatsambulwa kpwa mbazi za Mlungu, tahuyaokolwa ni mahendo hurigohenda. Mana kalapho ni kpwa mahendo gehu, phahi mbazi tazingekala mbazi tsona.

⁷Kpwa hivyo ni hivi phahi: Aiziraeli anji aendza kuphaha haki na achiikosa, ela ariotsambulwa ni Mlungu aphaha. Nao anjina osi achihendwa visoto,

⁸dza viratu Maandiko ga Mlungu gaambavyo: "Mlungu waahenda akale dza atu achioremererwa ni usingizi, waafunga matso ili asione, na achiaziba masikiro asiweze kusikira, nao a vivyo hata rero."

⁹Naye Mfalume Daudi waamba, "Anaphohenda karamu zao, Mlungu naazihumire dza chambo na mhambo wa kuagbwira enye, na aatiye adabu.

¹⁰Matso gao nagahohe ili asione ahendago, na miongo miongo yao naimyoke milele kpwa tabu za chila siku."

¹¹Sambi nauza tsona, Ayahudi akpwala ili agbwe kabisa? Sivyo, hata chidide! Lakini kpwa sababu ya makosa gao, wokofu wakpwedza kpwa atu ambao sio Ayahudi, ili Ayahudi ahende wivu.

¹²Lakini ichikala atu asio Ayahudi ajaliwa kpwa sababu Aiziraeli akosa kpwa kumrema Muokoli, phahi andaphaha fwaida zaidi hipho ndiphokamilika isabu ya Ayahudi alondwao kumkuluphira Muokoli.

- ¹³Sambi nagomba na mwimwi atu ambao simwi Ayahudi, mana Mlungu wanihuma nikale mtume wenu. Nami nina ngulu kpwa sababu ya kazi ambayo Mlungu anakuhenderani kpwa kunihumira,
- ¹⁴mana nalonda Ayahudi ayangu akuonereni wivu kpwa gara Mlungu anagokuhenderani, ili anjina ao aokolwe.
- ¹⁵Ayahudi ariphomrema Jesu, Mlungu naye waarema na achigbwirana na atu asio Ayahudi. Hipo Mlungu andiphoakubali Ayahudi tsona, indakala avi ni dza atu a kufwa akafufulwa!
- ¹⁶Kulengana na dini ya Chiyahudi, mutu achilavya donje ra unga wa nganu kpwa kazi ya Mlungu, phahi unga wosi ni mtakatifu. Piya ichikala mizi ya mzeituni ni mitakatifu, phahi hata pandaze nazo ni takatifu.
- ¹⁷Uwe u dza panda ya mzeituni wa tsakani yogbwizanywa na hinyo mzeituni mtakatifu. Phahi unaphaha fwaida ya mizi minono ya hinyo mzeituni mtakatifu. Lakini ichikala panda zanjina zakatwa,
- ¹⁸usizarau hizo panda zokatwa. Usihende ngulu, mana umanye mizi taikuadamira uwe, ela uwe ndiwe uadamiraye mizi.
- ¹⁹Mendzerepho undaamba, "Panda hizo zakatwa ili nami nigbwizanywe."
- ²⁰Higo ni kpweli. Hizo panda zakatwa kpwa sababu ya kukosa kukuluphira, ela uwe wadina kpwa sababu ya kukuluphirako. Kpwa hivyo dzimanyirire wala usidzikarye.
- ²¹Mana ichikala Mlungu kayaaonera mbazi Ayahudi kama zira panda za asili, hata uwe kandakuonera mbazi.
- ²²Lolani vira Mlungu aoneravyo atu mbazi na atiyavyo atu adabu kali! Anaatiya adabu aremao kumuogopa, lakini andakuonera mbazi uchienderera kukuluphira mbazize. Ela hata uwe piya uchiricha kumkuluphira, undakatwa.
- ²³Hata aho Ayahudi achiuyira kumkuluphira Mlungu, andagbwizanywa tsona, mana Mlungu ana uwezo wa kuagbwizanya tsona.
- ²⁴Mwimwi msio Ayahudi ni dza panda za mzeituni wa tsakani zokatwa na zichigbwizanywa na mzeituni wa mndani, ambaro ni dzambo risiro ra kawaida. Nao Ayahudi ni dza panda za mzeituni wa mndani, na Mlungu andakala tayari zaidi kuzigbwizanya na muhi wenye.
- ²⁵Enehu, nataka mmanyeye mpango hinyo wa siri wa Mlungu ili msedze mkadzitogola. Aiziraeli akala visoto kpwa muda mpaka isabu ya atu ambao sio Aiziraeli ndiphokamilika kuphokerwa ni Mlungu.
- ²⁶Na taifa rosi ra Iziraeli rindaokolwa. Na gaga ganagbwa sawa na Mlungu arivyogomba, kukala: "Muokoli andala Sayuni, na andahenda chivyazi cha Jakobo ariche kumrema Mlungu.

²⁷Na hipho chilagane changu nao chindakamilika, wakati ndiphoausira dambi zao.”

²⁸Kpwa sababu ya kukahala habari ndzuri kuhusu Jesu, Ayahudi akala maadui ga Mlungu kpwa fwaida yenu mwimwi atu ambao simwi Ayahudi. Lakini kpwa kukala atsambulwa ni Mlungu, Mlungu achereamendza kpwa sababu ya chilagane arichohenda na akare ao.

²⁹Mana Mlungu achitsambula mutu na kumjaliya, kaweza kugaluzi.

³⁰Mwimwi mwakosa kumuogopa Mlungu hipho kare, ela vivi mkaphokera mbazi za Mlungu kpwa sababu Aiziraeli nao akosa kumuogopa.

³¹Na hata vivi anakosa kumuogopa ili aho nao aphahe mbazi za Mlungu dza viratu mwimwi.

³²Yani, atu osi arema kumuogopa Mlungu, naye waaricha aenderere kusamuogopa ili edze aaonere mbazi.

³³Hebu lola vira utajiri, marifwa na ilimu ya Mlungu irivyo kulu! Ni ani awezaye kuelewa hukumu na njira za Mlungu?

³⁴”Takuna amanyaye maazo ga Mlungu, wala takuna mshauriwe.”

³⁵”Ni ani yemuaphasa Mlungu chitu, ambacho iye Mlungu ni achiriphe?”

³⁶Mana Mlungu ndiye yeumba vitu vyosi kpwa uwezowe. Iye ndiye ahendaye vikaleko, na vi kuko kpwa sababuye. Mlungu naatogolwe milele na milele! Amina.

Arumi 12

¹Phahi enehu, kpwa vira Mlungu anahuonera mbazi sana, nakuvoyani moyo kutsuka mlavye miri yenu kama sadaka takatifu iriyo moyo, ili masagazi genu gakale gandamhamira Mlungu. Mana hiyo ndiyo njira ya kpweli ya kumuabudu Mlungu chiroho.

²Msiige tsona mambo gahendwago ni atu a dunia hino, lakini Mlungu akugaluzeni mwenu mioyoni mkale na maazo maphya. Hipho ndipho ndiphomanya hakika Mlungu amendzavyo; dzambo nono na ra sawa rimhamiraro.

³Phahi, kpwa mana Mlungu wanijaliya nikale mtumewe, nakuambirani hivi mwimwi mosi: Msidziona bora kutsapa chiasi. Ela maazo genu nagakale na chiasi kulengana na chipimo cha kuluphiro Mlungu arirojaliya chila mmwenga.

⁴Kama mmanyavyo, mwiri ni mmwenga, lakini una vilungo vinji, na chila chilungo china kaziye.

⁵Vivyo hivyo, sisi naswi hata dzagbwe hu anji, hu mwiri mmwenga kpwa kuungana na Jesu. Chila mmwenga waunganishwa na myawe kama chilungo tafwauti ela mwiri mmwenga.

- ⁶Phahi chila mmwenga Mlungu wamjaliya chipawache tafwauti kpwa mbazize. Ariye na chipawa cha kutabiri naachihumire kulengana na kuluphirore.
- ⁷Wa kuhumikira ayae, naahumikire moyo kutsuka. Na afundzaye, naafundze vinono.
- ⁸Ariye na chipawa cha kutiya ayae moyo, naahende hivyo. Wa kutsangira atu, naatsange moyo kutsuka. Chilongozi naye, naatawale kpwa bidii. Na ariye na moyo wa kuterya ayae, naahende hivyo na raha.
- ⁹Amendzeni ayawenu chikpweli-kpweli. Richani kuhenda mai kabisa, lakini mdine kuhenda manono di yosi.
- ¹⁰Mendzanani chikpweli kama ndugu mwenga. Chila mmwenga naamuishimu myawe zaidi kuriko ye mwenye.
- ¹¹Msikale avivu kuhenda kazi ya Mlungu, ela lungani vira Roho wa Mlungu alondavyo mumhumikire Bwana Jesu kpwa bidii.
- ¹²Hererwani mana kuluphiro renu ri kpwa Mlungu. Mchiphaha mashaka vumirirani, wala msiremwe kuvoya Mlungu.
- ¹³Ariye na vitu, naaterye afuasi ayae ario na haja, na kuphokera vinono ajeni mwenu madzumbani.
- ¹⁴Atu achikutesani, avoyereni manono, wala msialani.
- ¹⁵Atu achihererwa, namwi hererwani phamwenga nao; achisononeka, namwi sononekani nao.
- ¹⁶Ishini vinono na ayawenu. Msihende shobo, lakini dziikeni sawa na atu a kawaida, wala msidziona kala mna marifwa zaidi.
- ¹⁷Atu achikukoserani kpwa kukuhenderani uyi, msiariphize uyi; lakini chila wakati azani kuhenda gara gaonewago manono ni chila mutu.
- ¹⁸Hendani rorosi muwezero msagaleto na atu osi.
- ¹⁹Asena angu, msiriphize chisasi, lakini mrichireni Mlungu atiye adabu atu anaokukoserani. Mana Mlungu mwenye anaamba mo mwakpwe Maandikoni, "Kuriphiza chisasi ni kazi yangu."
- ²⁰Kpwa hivyo chila mmwenga naahende dza Maandiko gaambavyo: "Ichikala m'vihao ana ndzala, muphe chakurya; na achikala ana chiru, muphe madzi. Mana uchihenda hivyo, undakala ukamhika makala ga moho."
- ²¹Usikubali kushindwa ni mai uhenderwago ni atu, ela henda manono, nawe undashinda higo mai.

Arumi 13

- ¹Chila mutu n'lazima aogophe sirikali itawalayo. Mana uwezo wa kutawala ula kpwa Mlungu, nao atawala nkutsambulwa ni Mlungu.
- ²Kpwa hivyo mutu yeyesi apingaye uwezo wa sirikali, anampinga Mlungu ariyetsambula hiyo sirikali. Naye apingaye sirikali anadziendzera hukumu.
- ³Mana mtawala katishira mutu ahendaye manono, ela ahendaye mai. Phahi ichikala unataka usitishirwe ni mtawala, henda manono, naye andakutogola.
- ⁴Mana mtawala ni mtumishi wa Mlungu, naye anahenda kazi kpwa fwaidayo. Lakini uchihenda mai, phahi dziondoke! Mana hakika hiye mtawala ana uwezo wa kukutiya adabu, naye nkukala anahenda kazi ya Mlungu kama vyoheha.
- ⁵Kpwa hivyo, atu n'lazima aogophe atawala, siyo kpwa sababu ya kuogopha kutiywa adabu tu, lakini piya kpwa sababu mnamanya sawa ni mhende hivyo.
- ⁶Hata hino ni sababu ya kulavya kodi. Mana ahendadzi-kazi a sirikali ni atumishi a Mlungu, na n'lazima ahende kazi ambazo Mlungu waapha azihende.
- ⁷Phahi mupheni chila mutu hakiye. Ichikala unatakpwa uriphe kodi, ni uriphe; ichikala kuna mutu fulani ni aishimiwe, phahi muishimuni.
- ⁸Msikale na deni na mutu yeyesi, ela deni renu narikale kumendzana bahi. Mana ammendzaye myawe anatimiza Shariya.
- ⁹Kuna malagizo manji, kpwa mfwano, usizinge, usiolage mutu, usiye, usiye chitu cha mutu na malagizo ganjina. Lakini gosi higa ga ndani ya hiro lagizo mwenga riambaro, "Mmendze myao dza vyo udzimendzavyo mwenye."
- ¹⁰Mutu amendzaye myawe, kamhendera mai, kpwa hivyo mendzwa inatimiza Shariya zosi.
- ¹¹Zaidi ya hivyo ni mmanye wakati wa kulamuka ukafika. Kpwa sababu wakati wa kutiviwa u phephi zaidi kuriko hipho mwandzo huriphoanza kumkuluphira Jesu.
- ¹²Vivi usiku unasira, na ku phephi na kucha. Sambu nahuricheni mahendo mai ga jiza na huvwaleni silaha za mwanga ili hudzirinde na Shetani.
- ¹³Hukaleni na tabiya ndzuri dza viratu wakati wa namutsi, wala husikaleni atu a kuhenda sheree za kunwa uchi na kufwiha chiudiya, wala kuzinga, wala kuheha au wivu.
- ¹⁴Lakini phahi katika mambo gosi longozwani ni Bwana Jesu Masihi, wala msikubali kutimiza tamaa zenu mbii.

Arumi 14

- ¹Myawenu ambaye kadzangbwephera chiroho, achedza kpwenu mkubalini, lakini msilumbane naye kuhusu maonige.

- ²Mutu wanjina anaona kukala anaweza kurya chochosi, lakini wanjina ambaye kadzangbwephera chiroho, mbogaze ni mtsunga bahi.
- ³Hiye aryaye chochosi naasimzarau yuya aryaye mtsunga, na hiye asiyerya chila chitu, naye naasimhukumu hiye aryaye chila chitu. Mana Mlungu wamkubali vyo arivyo.
- ⁴Kuna haki hata chidide ya kuhukumu mtumishi wa mutu wanjina. Tajiriwe ndiye ndiyemanya ichikala mtumishiwe a sawa au akakosera. Na kpweli andahenda sawa, mana Mlungu ana uwezo wa kumhenda ahende sawa.
- ⁵Mutu wanjina anaona siku fulani ni muhimu kuriko siku zanjina, naye wanjina anaona siku zosi ni sawa. Chila mmwenga naalunge vira aonavyo sawa mwakpwe achilini.
- ⁶Kpwa mana mutu yeyesi ambaye anaona siku fulani kala ni muhimu, anahenda hivyo kumhamira Bwana Jesu. Chila aryaye nyama, anarya kpwa sababu ya kumhamira Bwana Jesu, mana karya hadi amshukuru Mlungu. Naye asiyerya nyama, anahenda hivyo kpwa sababu ya kumhamira Bwana Jesu, naye nkushukuru Mlungu vivyo.
- ⁷Mana takuna mutu ambaye anaishi chitswache, wala takuna mutu afwaye kpwa sababuye mwenye.
- ⁸Huchiishi, hunaishi kama Mlungu alondavyo, na huchifwa, navyo hunafwa kama Mlungu alondavyo. Phahi huchiishi ama huchifwa, sisi hu a Mlungu.
- ⁹Mana Jesu wafwa na achifufuka ili akale Bwana wa atu ariofwa na ario moyo.
- ¹⁰Sambi kpwa utu wani anjina anaahukumu afuasi ayawao? Na kpwa utu wani anjina nao anaazarau afuasi ayawao? Mmanyeye kukala, siku mwenga sisi hosi hundaima mbere za Mlungu huhukumiwe.
- ¹¹Kahi za Maandiko Mlungu anaamba, "Kpwa kpweli chila mutu andakpwedza aniabudu, na akiri na lilimire kukala mimi ni Mlungu."
- ¹²Kpwa hivyo, chila mmwenga andalavya isabu ya mahendoge mwenye mbere za Mlungu.
- ¹³Kpwa hivyo, n'lazima huriche kuhukumu ayawehu, wala husihende chochosi ndichohenda ayawehu adzikipwale au ainjire dambini.
- ¹⁴Kpwa sababu ya Bwana Jesu namanya kpwa kpweli takuna chakurya chochosi ambacho ni haramu. Lakini mutu achiona chakurya fulani ni haramu, phahi chakurya hicho kwakpwe chindakala haramu.
- ¹⁵Phahi uchimkosera myao kpwa sababu ya chakurya uryacho, kpwa kpweli undakala ukaricha kummendza. Usikubali hata chidide chakurya chikale sababu ya kubananga kuluphiro ra mutu wanjina ambaye Jesu wamfwerera!
- ¹⁶Phahi usihende chitucho chizuri chionekane chibaya.

¹⁷Mana kukala mtumishi wa Mlungu siyo kurya chitu fulani au kunwa chitu fulani, ela ni kuhenda haki, kukala na amani, na kuphokera raha. Na higa gosi garehwa ni Roho wa Mlungu.

¹⁸Naye amhumikiraye Jesu hivyo, anamhamira Mlungu, tsona andakubaliwa ni atu.

¹⁹Phahi chila wakati nahudinisireni kuhenda mambo garehago amani na ambago ganaterya kuphezana chiroho.

²⁰Usibanange kazi ya Mlungu kpwa sababu ya chakurya. Vyakurya vyosi vya kuriwa ni halali, lakini ni makosa sana mutu kumhenda myawe ainjire dambini kpwa sababu ya chira aryacho.

²¹Baha usirye nyama, ama kunwa uchi, ama kuhenda chochosi ambacho chindamhenda myao ahende dambi.

²²Mutu akuluphiravyo kuhusu maneno higa, phahi nagakale gakpwe na Mlunguwe bahi. Waajaliwa mutu ambaye kadzisikira kuhenda makosa ahendapho dzambo aonaro ni ra haki.

²³Lakini ndiyekala na wasi-wasi kuhusu chakurya na achirya, andahukumiwa mana kakaamini kala rira ahendaro ni sawa mbere za Mlungu. Mana mutu yeyesi achihenda dzambo ambaro kanaro hakika, phahi naamanye kala anahenda dambi.

Arumi 15

¹Phahi sisi huriophera chiroho, n'lazima huvumirire hara ambao taadzangbwephera chiroho, wala husidzipendele.

²Chila mmwenga ni ahende mambo ga kumhamira myawe, kpwa kumhendera manono hata aphere chiroho.

³Mana hata Jesu mwenye kayadzipendelea, ela arivyohenda vinagbwa sawa na Maandiko gaambago, "Mai ambago atu agagomba kuhusu uwe Mlungu, ganiphaha mimi, uriyenitsambula."

⁴Na gosi garigoandikpwa hipho kare, gaandikpwa ili kuhufundza sisi. Huchivumirira, gago ganahutiya moyo ili hukale na kuluphiro.

⁵Mlungu ahuphaye kuvumirira na kuhutiya moyo akuhendeni mkale chitu chimwenga, kpwa kumuiga Jesu Muokoli,

⁶ili mosi muungane kumtograma Mlungu, Ise wa Bwana wehu Jesu Masihi.

⁷Phahi kubalini ayawenu dza viratu Jesu arivyokukubalini, ili Mlungu atogolwe.

⁸Mana nakuambirani, Jesu wakala mtumishi wa Ayahudi kuonyesa kukala, Mlungu wahenda dza arivyolaga akare ao.

- ⁹Chisha wakpwedza ili atu anjina asio Ayahudi amtogole Mlungu kpwa mbazize. Phahi Maandiko ga Mlungu ganaamba: "Kpwa hivyo, n'ndakuimbira mawira ga kukutogola mbere za atu asio Ayahudi."
- ¹⁰Maandiko ganagomba tsona, ganaamba, "Mwimwi atu ambao simwi Ayahudi, hererwani phamwenga na atu a Mlungu."
- ¹¹Chisha ganaamba, "Mwi atu ambao simwi Ayahudi mtogoleni Mlungu. Mlungu naatogolwe ni atu osi duniani!"
- ¹²Naye nabii Isaya waamba, "Mmwenga wa chivyazi cha Jese andakpwedza, naye andatawala makabila gosi, na atu a mataifa gosi andamkuluphira."
- ¹³Hivyo phahi, mnavyoenderera kumkuluphira Mlungu, ambaye ndiye chandzo cha kuluphiro, navoya akujaliyeni mkale na amani na raha tele. Chisha mkale na kuluphiro kulu kpwa uwezo wa Roho wa Mlungu.
- ¹⁴Enehu, mimi mwenye natosheka kala wakati wosi mwimwi mnahendera ayawenu manono. Mnamanya kare kuhusu njira za Mlungu na mnaweza kufundzana.
- ¹⁵Lakini nikakuandikirani mambo higa chilume ili nikutambukizeni mambo fulani. Nkahenda hivyo kpwa sababu Mlungu wanijaliya nikale mtumishiwe,
- ¹⁶nimhumikire Jesu Muokoli kpwa atu ambao sio Ayahudi. Náhenda kazi kama Mlavyadzi-sadaka kutangaza neno ra Mlungu, ili atu asio Ayahudi akale dza sadaka ikubaliwayo ni Mlungu, na iriyotengbwa ni Rohowe.
- ¹⁷Phahi, nina ngulu kpwa kumhumikira Mlungu, mana kazi nimhenderayo naihenda kpwa uwezo wa Jesu Muokoli.
- ¹⁸Nami sindagomba kuhusu chochosi chanjina, isiphokala gara arigohenda Jesu kpwa kunihumira mimi kuahenda atu asio Ayahudi amuogophe Mlungu. Wahenda hivyo kuhumira maneno na mahendo gangu,
- ¹⁹nguvu za kuhenda vilinje, na uwezo wa Roho wa Mlungu. Phahi názunguluka chila phahali kutangaza habari ndzuri kuhusu Jesu Muokoli kuandzira mudzi wa Jerusalemu hadi Jimbo ra Iluriko.
- ²⁰Siku zosi nia yangu kala nitangaze habari ndzuri kula kpwa Mlungu kpwahali ambako dzina ra Jesu taridzangbwemanyikana, ili nisedze nkadzenga dzulu ya msingi wa mutu wanjina.
- ²¹Viratu nrivyohenda vinagbwa sawa na nabii Isaya arivyotabiri kuhusu Muokoli, kukala, "Atu ambao taayaambirwa habarize andaona, na atu ambao kala taadzangbwemsikira andaelewa."
- ²²Hino ndiyo sababu ambayo chila wakati yanizuwiya kpwedza kpwenu.
- ²³Lakini, kpwa vira námala kazi yangu hiku n'riko, na miaka minji náaza kpwedza hiko kpwenu,

- ²⁴nami nina mipango ya kpwedzakuonani wakati nchikala natsapa kuphiya tsi ya Uhisipania. Nalonda niphahe msada wenu wa kunifisa Uhisipania, bada ya kusagala phamwenga namwi kpwa muda.
- ²⁵Lakini vi sambu naphiya Jerusalemu nikahumikire atu a Mlungu.
- ²⁶Kpwa mana atu a Mlungu ario seemu za Makedonia na Akaya aonato kutsanga na kuterya ayawao ambao ni achiya hiko Jerusalemu.
- ²⁷Afuasi aho ahenda hivyo na raha, na kpwa kpweli ana jukumu ra kuaterya. Kpwa vira atu asio Ayahudi ashiriki baraka za chiroho za Chiyahudi, nao inabidi kuaterya chi hali na mali.
- ²⁸Phahi nchimala kazi hino ya kuapha atu a Jerusalemu mitsango yotsangirwa, chisha n'ndakpwedza nikuloleni wakati ni charoni kuphiya Uhisipania.
- ²⁹Tsona namanya siku nchedza hiko kpwenu, n'ndareha baraka nyinji za Jesu.
- ³⁰Enehu, kpwa sababu ya Bwana wehu Jesu Masihi na mendzwa irehwayo ni Roho wa Mlungu, nakuvoyani muungane nami kunivoyera Mlungu kpwa bidii.
- ³¹Nivoyerani kukala, nisihendwe vii ni atu asiomkuluphira Jesu ko tsi ya Judea. Piya voyani kukala, atu a Mlungu hiko Jerusalemu akakubali msada ndioaphirikira.
- ³²Phahi Mlungu achimendza, n'ndaona raha sana kpwedzakulamusani, ili nami mnitiye moyo.
- ³³Navoya Mlungu ariye chandzo cha amani, akale namwi mosi! Amina.

Arumi 16

- ¹Nataka nikumanyiseni Fibi ambaye ni mfuasi myawehu, tsona ni mchetu ambaye anarhumikira kundi ra afuasi hiko mudzi wa Kenikeria.
- ²Phahi kama mfuasi myawehu, mphokereni vinono, mana hivyo ndivyo atu a Mlungu alondwavyo ahende. Piya achitaka msada, mteriyeni mana wasaidiya sana atu anji, na hata mimi piya.
- ³Niphozerani ahendadzi-kazi ayangu, Prisila phamwenga na mlumewe Akpwila. Aho nao anahenda kazi ya kumhumikira Jesu Muokoli,
- ⁴tsona ahatarisha maisha gao kpwa sababu yangu. Phahi mimi na afuasi osi ambao sio Ayahudi anafwaha kuashukuru sana.
- ⁵Chisha niphozerani afuasi a Jesu akutanao nyumbani mwa Akpwila na Prisila, phamwenga na msena wangu Epaneto, ambaye ndiye wa kpwandza kumkuluphira Jesu hiko jimbo ra Asia.
- ⁶Niphozerani Maryamu, ambaye wahenda kazi kpwa bidii kpwa fwaida yenu, na

- ⁷niphozerani abari angu Andironiko na Junia, ambao náfungbwa nao jela. Aho akala afuasi a Jesu kabla ya mimi, tsona anamanyikana sana kahi za mitume.
- ⁸Niphozerani Ampuliato, msena wangu kpwa sababu ya Bwana Jesu,
- ⁹phamwenga na msena wangu Sitakisi, na mhendadzi-kazi myangu Uribano, ahendaye kazi ya kumhumikira Jesu.
- ¹⁰Niphozerani Apele, ambaye uaminifuwe kpwa Jesu unamanyikana. Na niphozerani atu osi a nyumbani mwa Aristobulo.
- ¹¹Niphozerani m'bari wangu Herodioni, na atu osi a nyumbani mwa Narikiso, ambao adziunga na Bwana Jesu.
- ¹²Niphozerani Tirufena na Tirufosa; achetu hinyo anahenda kazi kpwa chadi kumhumikira Bwana Jesu. Piya niphozerani msena wangu Perisi; naye ni mchetu ambaye wahenda manji kumhumikira Bwana Jesu.
- ¹³Niphozerani Rufo na nine. Rufo ni mutu yedzilavya kumhumikira Bwana Jesu moyo kutsuka. Nine naye namharira kukala mayo wa kunivyala.
- ¹⁴Tsona niphozerani Asunikirito, Fulegoni, Herime, Patiroba, Herima, na afuasi a Jesu osi ario phamwenga nao.
- ¹⁵Chimarigizo niphozerani Filologo, Julia, Nerea na mwanao mchetu, Olimpa, phamwenga na atu a Mlungu osi.
- ¹⁶Lamusanani na mendzwa ya kpweli. Mkaphozwa ni makundi gosi ga afuasi a Jesu ario hiku.
- ¹⁷Sambi enehu, dzimanyirireni sana na atu fyakatsi. Dzitengeni nao mana mafundzo gao ni chinyume na gara mrigofundzwa.
- ¹⁸Kpwa kpweli, atu dza hinyo taamhumikira Bwana wehu Jesu, ela anahenda kazi kpwa fwaida yao enye. Anahumira maneno manono kuchenga atu asioyuga kuchengbwa.
- ¹⁹Nina raha sana mana chila mutu anamanya kala mu afuasi a Jesu a kpweli. Lakini nalonda mkale na achili ya kumanya manono, na msigatsanganye na mai.
- ²⁰Vivi sambu Mlungu ambaye ndiye chandzo cha amani andakushindirani Shetani na akupheni uwezo wa kumshinda. Nakuvoyerani Bwana Jesu Masihi akujaliyeni mosi.
- ²¹Mkaphozwa ni Timothy ambaye ni mhendadzi-kazi myangu. Piya mkaphozwa ni abari angu Lukio, Jasoni na Sosipatiro.
- ²²Sambi mimi Teritio, muandiki wa baruwa hino, nakuphozani kpwa sababu ya Bwana Jesu.

²³Mkaphozwa ni mwenyezi wangu Gayo, ambaye piya ni mwenyezi wa afuasi osi a Jesu akutanao hipha. Piya mkaphozwa ni Erasito, ambaye ni muiki wa pesa wa mudzi hinyu, na mwenehu wehu Kpwarito piya akakuphozani.

[²⁴Nakuvoyerani Bwana Jesu Masihi akujaliyeni mosi. Amina.]

²⁵Phahi nahumtogeni Mlungu! Iye anaweza kuhenda kuluphiro renu rikale rindaphera kpwa uwezo wa habari ndzuri nrizokufundzani. Hipho kare na n'kareni, Mlungu wafwitsa habari hizo kuhusu Jesu Masihi,

²⁶lakini sambu wazimanyisa atu kpwa kuumira Maandiko ga manabii. Mlungu wa milele ndiye yelagiza ukpweli huno umanyiswe atu, ili atu a makabila gosi duniani amkuluphire na kumuogopa.

²⁷Mlungu macheye ariye na marifwa gosi, naatogolwe kpwa sababu ya Jesu Masihi, milele na milele! Amina.

1 Akorintho

1 Akorintho 1

- ¹Baruwa hino ila kpwangu mimi Paul. Nátsambulwa nikale mtume wa Jesu Muokoli kama Mlungu arivyomendza. Mimi na mfuasi myangu Sositene,
- ²hunakuandikirani mwimwi afuasi a Jesu hiko mudzi wa Korintho. Mwatengbwa mkale bila lawama kpwa kuungana na Jesu Muokoli namwi mwaihua mkale atu a Mlungu, phamwenga na atu osi aabuduo kpwa kuumira dzina ra Bwana wehu Jesu Masihi. Iye ni Bwana wehu na wao.
- ³Baba Mlungu na Bwana Jesu Masihi naakujaliyeni na mkale salama.
- ⁴Namshukuru Mlungu chila wakati kpwa jinsi arivyokujaliyani kpwa kuungana na Jesu Muokoli.
- ⁵Mana wakutajirishani na chila chitu, wahupha uwezo wa kuhubiri nenore na kuelewa marifwa gosi.
- ⁶Higa gana kuhakikishirani kukala hurigokufundzani kuhusu Jesu kala ni ga kpweli.
- ⁷Kpwa hivyo tamuna hata chipawa chimwenga cha Roho wa Mlungu ambacho mnakosa wakati mnagodzera kpwa hamu kulu kuuya kpwa Bwana wehu Jesu Masihi.
- ⁸Andakutiyani nguvu hadi mwisho ili mkale bila lawama hadi Bwana wehu Jesu Masihi ndiphouya dza mfalume.
- ⁹Mlungu ni muaminifu, naye ndiye yekuihani mkale na umwenga na mwanawe Bwana wehu Jesu Masihi.
- ¹⁰Enehu, kpwa ajili ya mamlaka nrigohewa kula kpwa Bwana wehu Jesu Masihi, nakuambirani mphahane, tsona msihehe, lakini unganani katika nia zenu na maazo genu.
- ¹¹Mana násikira na atu fulani a nyumbani kpwa Kiloee kukala tamuphahana.
- ¹²Yani manage ni hivi. Chila mmwenga anagomba chivyakpwe, mmwenga anaamba, "Mino ni mfuasi wa Paulo," wanjina, "Mino ni mfuasi wa Apolo," wanjina naye, "Mino ni mfuasi wa Kefa," na bado wanjina naye anaamba, "Mino ni mfuasi wa Jesu."
- ¹³Dze, Jesu waganywa? Dze, Paulo wakatwa msalabani kpwa sababu yenu? Chisha nakuuzani, mwabatizwa kpwa dzina ra Paulo? Hata chidide!
- ¹⁴Namshukuru Mlungu kpwa sababu siyabatiza mmwenga wenu isiphokala Kirisipo na Gayo,
- ¹⁵kpwa hivyo takuna ndiyeweza kuamba mino nábatizwa kpwa dzina ra Paulo.

- ¹⁶(Piya che nayala, nábatiza atu a nyumba ya Stefano, na sitambukira ichikala nábatiza mutu wanjina.)
- ¹⁷Mana Jesu kayanihuma nedze nibatize atu, ela nakpwedzatangaza habari ndzuri kumhusu. Tsona siyafundza na marifwa ga anadamu, ili chifo cha Jesu phara msalabani chisedze chikakosa nguvuze.
- ¹⁸Ujumbe wa kuhusu chifo cha Jesu msalabani ni upuzi kpwa atu arioangamika, lakini ni nguvu za Mlungu kpwehu sisi huokolwao.
- ¹⁹Mana Maandiko ganaamba: "N'ndabananga ikima ya hinyo alachu, na n'ndarema ufahamu wao wa enye achili."
- ²⁰Kpwa hivyo huambedze kuhusu hara ambao ni alachu? Tsona huambedze kuhusu hara ambao anadziamba anamanya sana shariya za Chiyahudi, au atu a wakati hinyu ambao ni alachu a kugomba? Mlungu wahuonyesa kukala atu ambao ni alachu kulengana na ikima ya dunia hino ni ajinga kpweli.
- ²¹Mana kulengana na ikima ya Mlungu, atu a dunia hino taaweza kummanya hiye kpwa kutsapira ikima zao. Lakini wahamirwa kuokola hara anaomkuluphira Jesu kpwa kutsapira hura unaoihwa upuzi wa ujumbe hunaotangaza.
- ²²Ayahudi analonda kuonyeswa vilinje, nao Agiriki anataka ikima,
- ²³lakini sino hunafundza kuhusu Jesu yeolagbwa msalabani. Ujumbe hinyu ni chikpwazo kpwa Ayahudi, na kpwa atu asio Ayahudi ni upuzi.
- ²⁴Lakini atu ambao Mlungu waatsambula, akale ni Ayahudi ama sio Ayahudi, kpwao aho Jesu ni nguvu na ikima ya Mlungu.
- ²⁵Kpwa mana hura unaoonekana ni uzuzu wa Mlungu ni werevu kuriko ikima ya mwanadamu, na hura unaoonekana ni unyonje wa Mlungu una nguvu kushinda nguvu za mwanadamu.
- ²⁶Enehu, hebu fikiriyani vira kala mrivyo Mlungu ariphokuihani. Anji enu kala tamuna ikima kulengana na vira anadamu anavyoona, tsona anji enu kala tamuna uwezo, wala sio anji alao nyumba za atu amanyikanao.
- ²⁷Lakini Mlungu watsambula hara aonekanao ni apumbavu ili aaibishe erevu, na achitsambula hara aonekanao ni anyonje ili aaibishe enye uwezo.
- ²⁸Watsambula atu ariozarauliwa na kutsekpwa ni atu a dunia hino, yani atu aonekanao avi si chitu, ili aahende atu adzionao kukala ni a samani, akale si chitu.
- ²⁹Mlungu wahenda hivyo ili mutu yeyesi asihende ngulu mbereze.
- ³⁰Wakuunganishani na Jesu Muokoli, naye wahupha marifwa ga Mlungu mwenye. Jesu anahuhenda hukale na haki, na kpwa sababuye hwakombolwa na huchitengbwa kpwa kazi ya Mlungu.

³¹Kpwa hivyo Maandiko ganaamba, "Mutu atakaye kudzitogola, naadzitogole kpwa go Mlungu arigohenda."

1 Akorintho 2

¹Nriphokpwedza kpweni sedzere kukufundzani mpango wa Mlungu na maneno makulu makulu ama na ikima ya chibinadamu.

²Mana nriphokala namwi hiko, nákata shauri kuricha mambo ganjina gosi, isiphokala kufundza kuhusu Jesu Masihi ariyekotwa msalabani.

³Nákpwedza kpweni chinyonje, na wuoga, tsona na kukakama.

⁴Mafundzo gangu gosi, siyahumira ufundi wa maneno ga ikima ya chibinadamu, lakini nriphokufundzani mwaona nguvu za Roho wa Mlungu.

⁵Náhenda hivyo ili kuluphiro renu risiadamire ikima ya anadamu ela nguvu za Mlungu.

⁶Phahi hukugomba na ikima kpwa atu ambao apha chiroho, lakini ikima hiyo si ya chibinadamu ama ya atawala a hipha duniani ambao andatsupa.

⁷Ela hunagomba kuhusu ikima ya mpango wa Mlungu, yofwitsirwa anadamu. Kabla ya dunia kuumbwa, Mlungu kala akapanga kare kukala ikima hiyo yiuhere nguma.

⁸Takuna mtawala hata mmwenga hipha duniani ariyemanya mambo higa. Mana kalapho agamanya, taangemuolaga Jesu msalabani, Bwana wa nguma zosi.

⁹Kama Maandiko gaambavyo: "Mambo ambago Mlungu watayarishira atu ammendzao, takuna mutu yeyesi ariyegaona wala ariyegasikira; tsona tagadzangbweinjira achilini mwa atu."

¹⁰Lakini Mlungu wahumanyisa mambo higa kpwa kuhumira Rohowe. Mana Roho wa Mlungu ndiye achunguzaye chila chitu, hata garigo sirini mwa Mlungu.

¹¹Phahi rohoyo ndiyo imanyayo chiricho mwako achilini. Vivyo hivyo, Roho wa Mlungu bahi ndiye amanyaye Mlungu aazaro.

¹²Mana sisi tahuyaphokera roho wa dunia hino, ela Mlungu wahupha Rohowe ili huweze kumanya mambo ga ajabu ambago wahupha bure.

¹³Phahi tahugomba hivyo kpwa maneno ga ikima garigofundzwa ni anadamu, ela kpwa maneno ga Roho wa Mlungu, huchieleza ukpweli wa chiroho kpwa hinyo ario na hiye Roho.

¹⁴Mutu asiye na Roho wa Mlungu kaweza kukubali mambo galago kpwa Roho wa Mlungu, mana kpwakpwe ni upuzi na kaweza kuelewa manage isiphokala kpwa msada wa Roho wa Mlungu.

¹⁵Ela mutu ariye na Roho wa Mlungu nkumanya unono au uyi wa mambo gosi, naye kaweza kuhukumiwa ni mutu yeyesi.

¹⁶Mana kama Maandiko gaambavyo: "Ni ani awezaye kumanya maazo ga Bwana? Ni ani wa kumlagiza ra kuhenda?" Lakini sisi afuasi a Jesu, hunaaza dza viratu iye.

1 Akorintho 3

¹Enehu, nriphokala ni phamwenga namwi hiko kpwenu, siyaweza kugomba namwi chiroho. Ela nágomba namwi kama atu a dunia, na kama ana atsanga a chiroho.

²Kpwa vira kala tamdzangbwephera, yanihenda nikupheni maziya badala ya chakurya chigumu. Na hata sambi tamdzangbwe kala tayari,

³mana bado mnalongozwa ni tamaa zenu za chibinadamu. Bado mnaonerana wivu na kuheha enye kpwa enye. Kpwa kpweli mambo higo ganaonyesa kukala mcherelongozwa ni tamaa zenu za chibinadamu.

⁴Kpwa sababu mutu mmwenga anaphoamba, "Mino ni mfuasi wa Paulo," na wanjina naye aambe, "Mino ni mfuasi wa Apolo," dze, go tagaonyesa wazi kala mchere anadamu a kawaida a dunia hino?

⁵Hebu nikuuzeni: Yuno Apolo ni ani? Ama Paulo naye ni ani? Hosi airi hu atumishi a Bwana Jesu tu, na Mlungu wahuhumira kukuhendani mkuluphire Jesu. Chila mmwenga wahewa kaziye ni Bwana Jesu.

⁶Niriphokufundzani kpwandza yakala avi náphanda mbeyu, naye Apolo ariphokufundzani zaidi yakala kama avi wamwagira madzi. Lakini Mlungu ndiye yeihenda imere.

⁷Phahi enehu, wa kuphanda na wa kumwagira madzi si chitu, ela Mlungu ariyehenda hira mbeyu imere ndiye muhimu.

⁸Mana mutu wa kuphanda na wa kumwagira madzi osi ana lengo mwenga, na chila mmwenga andatuzwa chivyakpwe kulengana na kaziye.

⁹Mana sisi hwahenda kazi ya Mlungu phamwenga, namwi mu mundawe. Tsona mwimwi mu dzengore.

¹⁰Kulengana na uwezo nriohewa ni Mlungu, mimi ni dza fundi mzuri yedzenga msingi wa hiro dzengo. Na ayangu anjina anadzenga dzulu ya msingi hinyo hinyo. Lakini chila fundi n'lazima amanyirire adzengavyo.

¹¹Mana takuna mutu awezaye kuika msingi tafwauti na hura urioikpwa, yani Jesu Masihi.

¹²Anjina andahumira zahabu, feza au mawe ga samani kudzenga dzulu ya hinyo msingi, na anjina andahumira mihi, mabuwa au nyasi.

¹³Na kazi ya chila mutu indamanyikana siku ya chiyama. Mana moho undapima kazi ya chila mutu na kuika wazi unonowe ama uyiwe.

¹⁴Mutu ambaye kaziye taindabanangbwa, andatuzwa.

¹⁵Lakini mutu ambaye kaziye indaphya na hinyo moho, andaphaha hasara kulu sana. Ela ye mwenye andaokolwa dza viratu mutu achimbiravyo kutsupira jimbi-jimbi ra moho.

¹⁶Hakika mnamanya kukala mwimwi mu phatu phatakatifu photengbwa kuvoya Mlungu, naye Roho wa Mlungu anaishi ndani yenu.

¹⁷Mutu achibananga phatu pha kuvoya Mlungu, naye Mlungu andam'bananga. Mana phatu pha kuvoya Mlungu ni phahali phatakatifu, na mwimwi ndimwi pho phahali.

¹⁸Msidzichenge! Mutu yeyesi ndiyedziona ni mwenye ikima kpwa kudzipima na atu a dunia, phahi naakale mzuzu ili akale mwenye ikima kpweli.

¹⁹Kpwa mana gara ambago mwanadamu anaona ni ikima, Mlungu kpwakpwe ni uzuzu. Mana Maandiko ganaamba, "Mlungu nkuagbwira enye ikima kpwa kuhumira werevu wao."

²⁰Piya ganaamba, "Bwana anamanya kukala fikira za atu enye ikima ni bure."

²¹Phahi mutu naasidzikarye kuhusu chilongozi fulani. Mana vitu vyosi ni vyenu,

²²hata Paulo, Apolo, Petero, dunia hino, uzima na chifo, vitu vya sambi na hata vya badaye, hivi vyosi ni vyenu.

²³Namwi mu atu a Jesu, naye ni wa Mlungu.

1 Akorintho 4

¹Phahi atu ahuisabu kukala hu atumishi a Jesu ambao hunaeleza mpango wa Mlungu.

²Chitu muhimu ni kukala atumishi n'lazima akale aaminifu.

³Lakini kpwangu mimi si chitu nchihukumiwa ni mwimwi au kpwa kuhumira chiwango chochosi cha chibinadamu. Piya sidzihukumu mwenye.

⁴Simanya rorosi iyi nrirorihenda, lakini hino tainionyesa kala sina lawama, ela Bwana Jesu ndiye anihukumuye.

⁵Kpwa hivyo msihukumu chochosi kabla ya wakatiwe. Godzani mpaka Bwana Jesu ndiphokpwedza. Iye ndiye ndiyeika wazi mambo gofwitswa jizani na kuika wazi nia za mioyo ya atu. Na ndipho chila mmwenga andaphaha sifwaye anayostahili kula kpwa Mlungu.

⁶Sambi enehu, nkahumira mfwano hinyu wa Apolo na mimi kpwa fwaida yenu, ili mmanyane mana ga msemu hinyu uambao, "Msihende mambo chinyume cha gara

ambago gaandikpwa." Ndipho tamndahendera ngulu mutu mmwenga na kuzarau wanjina.

⁷Ni ani yekuhendani mkale anono zaidi kuriko anjina? Chila chitu mrichonacho mwahendahewa ni Mlungu. Kpwa hivyo msihende ngulu, mana vyosi hivyo mwahendahewa dza zawadi.

⁸Dze, tamyatsuma kare? Dze, mwatajirika kare? Dze, mwakala kare afalume hata sisi ayawenu bado? Phahi naaza kala mu afalume kpweli ili hukale afalume phamwenga namwi.

⁹Mana inaonekana kala Mlungu wahuika sisi mitume hukale atu a mwisho kabisa. Wahuhenda dza atu ohukumiswa kunyongbwa azarani ili dunia ndzima, yani atu phamwenga na malaika, ahuzemerere chilimwenga.

¹⁰Sisi hunaonekana azuzu kpwa ajili ya Jesu, lakini mwimwi mnadziona mna ikima kare! Hu anyonje ela mwimwi mna nguvu. Mwimwi mnaishimiwa lakini sisi hunaberwa.

¹¹Vivi nigombavyo huna ndzala na chiru, hukavwala mademu, tsona hunateswa na tahuna kpwahali kpwa kuphiya.

¹²Hunagaya kuhenda kazi na mikono yehu. Atu achihulani, hunaajaliya. Atu achihutesa, sino hunavumirira.

¹³Atu achihukatira, sino hunaajibuto tsona chipole. Mpaka hivi sambu hu kama uchafu wa dunia, naswi hwakala dzala ra atu osi.

¹⁴Sikuandikirani higa ili nikugbwizeni waibu. Hata chidide! Ela nakuandikirani kpwa kukuonyani kama anangu ambao ninaamendza.

¹⁵Mana hata ichikala mna atu anji a kukufundzani ujumbe kuhusu Jesu Muokoli, bado sowe yenu wa chiroho ni mimi bahi. Mana mimi ndimi yekufundzani habari ndzuri kuhusu Jesu.

¹⁶Kpwa hivyo nakuvoyani sana mniige mimi.

¹⁷Ndiyo mana ninamhuma mwanangu Timothy ambaye ninammendza sana na ni muaminifu kpwa kuhenda kazi ya Mlungu. Hiye andakutambukizani vyo nisagalavyo kama mfuasi wa Jesu Muokoli, ambavyo vinagbwa sawa na vira nifundzavyo makundi ga afuasi chila pahali.

¹⁸Anjina enu anahenda ngulu kpwa kufikiri sindauya tsona hiko kpwenu.

¹⁹Lakini Mlungu achimendza n'ndakpwedza vi sambu sambu, ili nedze nisikize agombago hinyo atu ario na ngulu, na nimanye uwezo ario nao.

²⁰Mana kulongoza atu a Mlungu siro dzambo ra kugomba maneno bahi, ela kunategemea uwezo wa Mlungu.

²¹Kpwa hivyo mnalondadze? Mnalonda nedze na chikoto, hebu nedze na mendzwa na roho ya upole?

1 Akorintho 5

¹Kpwa kpweli náambirwa kukala kuna atu adiya kahi yenu. Tsona udiya uhu ni wa kpwaangalaza sana. Unatsapa hata wa atu asiomkuluphira Mlungu, mana myawenu mmwenga anazinga na mkpwaza ise!

²Na badala ya kusikira utsungu mwenu mioyoni na mjute, enye mna ngulu! Hiye ariye na ndzimo hiyo, mtengeni na afuasi ayae.

³Mana hata dzagbwe si phamwenga namwi chimwiri, bado ni phamwenga namwi chiroho. Nami nkalavya hukumu yangu kare kpwa hiye ariyehenda waibu hinyo kama avi nami ni kuko.

⁴Phahi wakati mnaphokutana, n'ndakala phamwenga namwi chiroho, na uwezo wa Bwana Jesu piya undakala phapho.

⁵Wakati hinyo mlavyeni kpwa Shetani mutu hiye ariyehenda higo mai, ili mwiriwe ubanangbwe na rohoye yookolwe ni Bwana Jesu siku ya chiyama.

⁶Kpwa kpweli ngulu zenu tazifwaha. Kpwani tammanya kala amira chache inaweza kuumusa donje ra unga munji sana?

⁷Yiuseni hiyo amira ya kare ya dambi na mkale atu asafi bila ya amira, dza vira mrivyo. Mana Jesu, ambaye ndiye Mwana-ng'ondzi wehu wa Pasaka, walaviwa dza sadaka msalabani.

⁸Phahi nahusherekeeni Pasaka kpwa kuhumira mkahe usiotiywa amira, mkahe wa usafi na kpweli, si kpwa amira ya kare, amira ya uyi na ubaya.

⁹Nákuandikirani kare baruwa nchikuambirani msigbwirane na atu adiya.

¹⁰Siyagomba kuhusu atu a dunia ambao ni azinifu, achoyo, a tamaa mbaya, anyang'anyi na aabuduo sanamu, mana mchidzitenga na atu dza hinyo, ingebidi mtsame kabisa himu duniani.

¹¹Ela manage kala ni higa: Msigbwirane na mutu yeyesi adzihiye mfuasi ambaye ni mdiya, wa tamaa mbii, wa kuabudu sanamu, wa kulaphiza atu, mlevi ama muivi. Tsona piya msirye na mutu dza hiye.

¹²⁻¹³Kpwa kpweli siyo kazi yangu kuhukumu atu ambao sio afuasi. Mana Mlungu andahukumu atu hinyo. Lakini kazi yenu ni kuhukumu atu ambao ni afuasi a kundi renu. Kama Maandiko gaambavyo, "Mzoreseni mwenu kundini hiye mutu mui."

1 Akorintho 6

- ¹Enehu, ichikala mmwenga wenu anaheha na myawe, n'lazima apherike mashitakage kpwa afuasi ayae badala ya kugaphirika kotini kpwa atu asio afuasi a Jesu.
- ²Hebu tammanya kukala afuasi a Jesu ndio ndiohukumu atu a dunia? Na ichikala mwimwi ndimwi ndiohukumu atu a dunia, mbona tamuweza kuphahana na hizo kondo ndide ndide?
- ³Hebu tammanya kukala hundahukumu malaika, na hata zaidi mambo madide madide ga chila siku?
- ⁴Phahi mchikala mna malumbano dza higo, msigaphirike mbere za akanyi ambao sio afuasi ayawenu, atu asioishimiwa ni afuasi!
- ⁵Kpwa kpweli mnahenda waibu! Dze, ikale mo mwenu kundini tamuna mutu hata mmwenga ariye na ikima ya kutosha kukukanyani mwimwi ndugu?
- ⁶Ela sivyo hivyo, mfuasi anamshitaki myawe kotini mbere za atu ambao sio afuasi kuhukumu kesi hiyo.
- ⁷Kpwa kpweli kushitakiana kpwenu kunaonyesa kukala mkashindwa tse-tse-tse! Baha mkoserwe, mchengbwe na muiyirwe mali zenu kuriko kuaphirika afuasi ayawenu kotini.
- ⁸Lakini badala ya hivyo, mwimwi ndio mkoserao na kuiya, hata mnakoserana na kuiyirana mwimwi afuasi enye kpwa enye!
- ⁹Hebu tammanya kukala atu asio na haki taandakubaliwa kusagala phamwenga na Mlungu phahaliphe pha nguma? Enehu msidzichenge! Atu osi aishio maisha ga udiya, anaoabudu sanamu, anaozinga, alume ahendwao achetu na ahendao alume ayawao achetu,
- ¹⁰aivi, achoyo, alevi, asengenyadzi, na aiyirao atu kuhumira nguvu: hinyo osi taandakubaliwa kusagala phamwenga na Mlungu bii.
- ¹¹Kpwa kugomba kpweli anjina enu kala mu dza vivyo, lakini mwatakaswa, mwatengbwa na mwahendwa atu a haki kpwa sababu ya Bwana Jesu na Roho wa Mlungu wehu.
- ¹²Mutu anaweza kuamba, "Vitu vyosi ni halali kpwangu." Lakini si vyosi vinavyoterya. Vitu vyosi ni halali kpwangu, lakini sikubali kuhendwa mtumwa ni chitu chochosi.
- ¹³Mutu wanjina anaweza kuamba, "Vyakurya ni muhimu kpwa sababu ya ndani, nayo ndani ni muhimu kpwa sababu ya vyakurya." Lakini Mlungu andavihenda vyosi vikale na mwisho. Nami nakuambirani mwiri sio wa kuhendera udiya, ela ni wa kumhumikira Mlungu, naye Mlungu andauroroma.
- ¹⁴Mlungu wamfufula Jesu, na vivyo hivyo andahufufula kpwa uwezowe.

¹⁵Hebu tammanya kukala miri yenu ni vilungo vya mwiri wa Jesu? Dze, ni sawa kuunganisha vilungo vya mwiri wa Jesu na malaya? Hata chidide!

¹⁶Hebu tammanya kukala mlume achigbwirana na malaya, osi airi anakala mwiri mmwenga? Mana Maandiko ganaamba, "Osi airi andakala mwiri mmwenga."

¹⁷Lakini yeyesi ndiyegbwirana na Jesu andakala roho mwenga naye.

¹⁸Phahi richani udiya tse-tse-tse. Dambi yanjina yoyosi mutu ahendayo i kondze ya mwiriwe. Lakini mutu achienda udiya, anatiya dambi mwakpwe mwirini.

¹⁹Hakika mnamanya kukala miri yenu ni phatu phatakatifu photengbwa kuvoya Mlungu. Mlungu wakuphani Rohowe naye anaishi ndani yenu. Miri hiyo si yenu, ni malingbwa ya Mlungu,

²⁰mana wakukombolani na bei ya gali. Kpwa hivyo mwimwi miri yenu ihumireni kumhenda Mlungu atogolwe.

1 Akorintho 7

¹Sambi kuhusu gara mambo mrigoniandikira, naamba hivi: Ni vinono mutu kusalóla.

²Ela kpwa sababu ya udiya munji hiko kpwenu, chila mlume naakale na mchewe mwenye na chila mchetu naakale na mlumewe.

³Mlume naatimizire mchewe mambo gosi ga ndowa, naye mchetu dza vivyo, atimizire mlumewe mambo ga ndowa.

⁴Mana mwiri wa mchetu tautawalwa ni ye mwenye, ela unatawalwa ni mlumewe. Nao mwiri wa mlume tautawalwa ni ye mwenye, ela unatawalwa ni mchewe.

⁵Msilafyane ela mkale mkakubaliana kudzizuwiya kpwa muda fulani kpwa sababu ya mavoyo. Alafu uyiranani ili Shetani asedze akakujezani kpwa sababu ya kukosa uwezo wa kudzizuwiya.

⁶Lakini higa nagokuambirani ni ushauri wangu kpwenu, si shariya.

⁷Kpwa kpweli naaza kala alume osi ni dza mimi. Lakini chila mlume ana chipawache malumu arichoheva ni Mlungu, mmwenga ana chipawa hichi na wanjina ana chanjina.

⁸Sambi mwimwi ambao tamdzangbwelóla na kulólwa na magungu, nakuambirani hivi: Ni vinono m'baki bila ya kulóla wala kulólwa dza mimi.

⁹Lakini ichikala mutu kaweza kudzizuwiya, phahi naalóle au naalólwe. Mana baha mutu kulóla au kulólwa kuriko kuyugika na mkpwatyo.

¹⁰Atu mriolólana nakulagizani hiri, naro si rangu bali rila kpwa Bwana Jesu. Mchetu kana ruhusa ya kuricha mlumewe.

- ¹¹Lakini achimricha, naasilólwe tsona au arye suluhu na mlumewe na auyirane. Naye mlume kana ruhusa ya kumricha mchewe.
- ¹²Kpwa atu anjina naamba hivi (nagomba mimi, si Bwana): Mlume yeyesi yemkuluphira Bwana Jesu achikala ana mchetu ambaye kadzangbwukuluphira na analonda kuishi na hiye mchetu, phahi naasimriche.
- ¹³Na ichikala mfuasi wa chichetu walólwa ni mlume ambaye siye mfuasi, na hiye mlume analonda kuishi naye, phahi hiye mchetu naasimriche.
- ¹⁴Mana Mlungu anatakasa mlume asiye mfuasi kpwa kutsupira mchewe, naye anatakasa mchetu asiye mfuasi kpwa kutsupira mlumewe. Kala si hivyo, ana ao angekala najisi. Lakini ukpweli ni kukala Mlungu anaharira ana ao kukala atakatifu.
- ¹⁵Ela mlume ama mchetu asiyemuamini Bwana Jesu achimricha myawe anayeamini, naamriche auke. Kpwa sababu ya hali hiyo mlume ama mchetu kagbwirwa ni shariya ya ndowa. Mana Mlungu anahutaka huishi kpwa amani.
- ¹⁶Mwi achetu mumkuluphirao Jesu, mnamanyadze kukala alume enu taandamkuluphira Jesu kpwa sababu yenu? Ama mwi alume mumkuluphirao Jesu, mnamanyadze kala achetu enu taandamkuluphira Jesu kpwa sababu yenu?
- ¹⁷Chila mutu ni aenderere kuishi kulengana na hali ariyoihirwa na kupangirwa ni Mlungu. Higa ni malagizo gangu kpwa makundi gosi ga afuasi a Jesu.
- ¹⁸Ichikala Mlungu ariphokuiha kala ukatiywa tsatsani kare, usibadilisha hali hiyo. Na ichikala Mlungu ariphokuiha kala kudzangbwetiya tsatsani, phahi usikale na haja ya kutiywa tsatsani.
- ¹⁹Kpwa mana kutiywa tsatsani ama kusatiywa tsatsani si muhimu, ela chitu muhimu ni kugbwira na kulunga malagizo ga Mlungu.
- ²⁰Chila mmwenga naasale vivyo arivyokala Mlungu ariphomuiha.
- ²¹Ichikala Mlungu ariphokuiha kala u mtumwa, ni sawa usijali. Ela uchiphaha nafwasi ya kukala huru, ihumire ukale huru.
- ²²Kpwa mana mutu ariyehwa ni Bwana Jesu wakati kala ni mtumwa, anakala mutu huru wa Bwana. Vivyo hivyo mutu huru anaphoihwa anakala mtumwa wa Jesu.
- ²³Mlungu wakukombolani kpwa bei ya gali, kpwa hivyo msikale atumwa a atu.
- ²⁴Phahi enehu, chila mutu ni aishi kulengana na hali ariyokala nayo Mlungu ariphomuiha.
- ²⁵Sambi kuhusu atu ambao taadzangbwelóla au kulólwa, mino sina malagizo malumu kula kpwa Bwana Jesu. Lakini nalavya maoni gangu kama mutu ambaye Mlungu wanihenda niaminiwe kpwa mbazize.

- ²⁶Phahi kpwa sababu ya matatizo hunagogaona, naona baha msale vyo murivyo.
- ²⁷Dze una mchetu? Phahi ichikala unaye, usimriche. Na ichikala kudzangbwelóla, phahi usilóle.
- ²⁸Lakini mutu uchilóla siyo dambi, na mchetu asiyedzangbwelólwa achilólwa, piya kahendere dambi. Lakini mwimwi mlólanao mndaphaha matatizo manji ga chila siku, nami nalonda mdziepushe na higo matatizo na msale vivyo mrvivo.
- ²⁹Enehu, chisa changu cha kuamba hivyo ni hivi: Wakati unaobaki ni mfupi. Hangu sambu na kuenderera atu ariolóla naaishi kama avi taayalóla.
- ³⁰Atu ariorira ni akale avi taayarira, nao ariohererwa akale avi taayahererwa, na atu ariogula vitu naakale avi vitu hivyo si vyao.
- ³¹Tsona atu ambao anashugulika na mambo ga dunia, ni akale kama avi taayashugulikiya sana mambo higo. Kpwa mana ihi dunia vivi huionavyo, inatsupa.
- ³²Enehu, nataka msikale na wasi-wasi. Mutu ambaye kadzangbwelóla nkudzishugulisha na kazi ya Bwana, yani jinsi ambavyo nkumhamira.
- ³³Lakini mutu ariyelóla nkudzishugulisha na mambo ga himu duniani, yani jinsi anavyotaka kumfurahisha mchewe,
- ³⁴mana maazoge gaganyika mara mbiri. Lakini mchetu ambaye kadzangbwelólwa ama mwanamwali nkudzishugulisha na kazi ya Bwana ili aphahe kukala mtakatifu chimwiri na chiroho. Ela mchetu wa kulólwa nkudzishugulisha na mambo ga himu duniani, yani jinsi alondavyo kumfurahisha mlumewe.
- ³⁵Nagomba hivi kpwa fwaida yenu, wala sio kala nakuikirani vikpwazo. Nalonda muishi kpwa njira inayofwaha kpwa kudzilavya tse-tse-tse kpwa kazi ya Bwana.
- ³⁶Ichikala mutu anaona andamkosea mwanamwali ariyemchumbi, naye hiye msichana anatsupira wakati wa kulólwa, na anaona baha alóle, phahi naamlóle, mana kulóla si dambi.
- ³⁷Lakini mutu achikata shauri kusalóla hiye mwanamwali bila kushurutishwa, na anaweza kutawala tamaaze, kpwa kpweli hiye piya anahenda vinono.
- ³⁸Phahi kpwa kpweli mutu alólaye mchetu anahendato, lakini mutu asiyelóla piya anahendato zaidi.
- ³⁹Mchetu ariyelólwa anafungbwa ni mlumewe hadi mlumewe ndiphofwa. Lakini mlumewe achifwa, a huru kulólwa ni wanjina, ela n'lazima hiye mlume akale ni mfuasi wa Bwana.
- ⁴⁰Lakini maoni gangu ni higa: Ni vinono zaidi hiye mfwererwa asale bila ya kulólwa tsona. Na kpwa mashauri higa gosi, naamini nalongozwa ni Roho wa Mlungu.

1 Akorintho 8

- ¹Sambi kuhusu vyakurya vyolaviwa sadaka kpwa sanamu, hunamanya kukala sisi hosi huna marifwa. Nago marifwa ganahenda mutu ahende ngulu, lakini umendzo ndio uphezao mutu wa Mlungu.
- ²Mutu ambaye anadziona anamanya sana, phahi bado kamanya rira ambaro ni arimanye;
- ³lakini mutu amwendzaye Mlungu anamanywa ni Mlungu.
- ⁴Phahi, kuhusu vyakurya vyolaviwa sadaka kpwa sanamu, hunamanya kala sanamu si chochosi himu duniani na Mlungu ni mmwenga tu.
- ⁵Hata dzagbwe atu anjina anakuta kuna milungu yanjina mlunguni ama duniani (na kpwa kpweli kuna anji anaohwa, "milungu" na, "mabwana"),
- ⁶sisi hunamanya kala Mlungu ni mmwenga, ye Baba yeumba vitu vyosi, na kpwa ajiliye hunaishi. Tsona kuna Bwana mmwenga tu, ambaye ni Jesu Masihi. Vitu vyosi vyakalako kpwa kutsupira iye, na kpwa kutsupira iye sisi hunaishi.
- ⁷Lakini si atu osi amanyao ukpweli huno. Anjina kala akabara kuvoya sanamu kama milungu yao. Hata achiry chakurya cholaviwa sadaka kpwa sanamu, anaona kala chakurya hicho chikalavirwa milungu. Kpwa vira taadzangbwe elewa kala sanamu si chitu, phahi nkudziona anahenda dambi.
- ⁸Lakini chakurya tachiweza kuhureha phephi na Mlungu. Uhusiano wehu na Mlungu taokala mui zaidi ama mnono zaidi huchirya wala kusarya chakurya.
- ⁹Phahi dzimanyirireni ili uhuru wenu usikale chikpwazo kpwa ayawenu ambao kuluphiro rao ni nyonje, asedze akainjira dambini.
- ¹⁰Mana mutu ambaye kadzangbwe elewa kala sanamu si chitu, achikuona uwe mwenye marifwa unarya chakurya muzukani, andaona kukala ni sawa arye chakurya chiricholaviwa sadaka kpwa sanamu.
- ¹¹Hipho undamuangamiza hiyu mutu wa kuluphiro nyonje, ambaye Jesu wamfwerera, kpwa sababu ya higo marifwago.
- ¹²Phahi uchihenda hivyo undakala ukamhendera dambi myao kpwa kumhenda ahende dzambo ambaro anaona ni makosa. Na kpwa kumhendera dza hivyo, unamhendera Jesu dambi.
- ¹³Kpwa hivyo ichikala niryacho chindamtiya mwenehu dambini, phahi sindarya nyama tse-tse-tse, nsedze nkamuinjiza dambini.

1 Akorintho 9

- ¹Mimi kpwa kpweli ni huru, tsona ni mtume. Nami námuona Jesu, Bwana wehu na matso gangu. Na mwimwi mu matokeo ga kazi yangu kpwa Bwana.

- ²Na ichikala atu anjina taakubali kukala mimi ni mtume, hakika naamini kukala mwimwi kpwa kpweli mnakubali. Mana mu mashahidi gangu kukala mimi ni mtume kpwa Bwana.
- ³Atu anaphonihukumu, nami nadzitetea kpwa njira hino.
- ⁴Dze, sino tahustahili kurya na kunwa kula kpwa afuasi?
- ⁵Kpwani sino tahufwaha kusafiri chila mmwenga na mchewe anayekuluphira dza vira ahendavyo mitume anjina, ndugungbwa a Bwana na piya Petero?
- ⁶Hebu ni mimi na Barinaba bahi ndio husiostahili kuriphirwa maitaji gehu wakati hu kazini?
- ⁷Ni asikari yuphi adziriphiraye mwenye wakati a kazini? Takuna hata mmwenga. Ni mkurima yuphi ambaye karya matunda ga mwakpwe mndani? Takuna. Tsona ni mrisa yuphi asiyestahili kunwa maziya ga mifugo ya tajiriwe?
- ⁸Kpwa kpweli sigomba higa kpwa mifwano ya chibinadamu tu. Hata Shariya zinagbwa sawa na hivyo nigombavyo.
- ⁹Mana Shariya za Musa zinaamba, "Ng'ombe ichikala inawaga nganu usiifunge mlomo." Dze, mnafikiri Mlungu kala anagomba kuhusu ng'ombe bahi phano?
- ¹⁰Hakika Mlungu hipha kala anagomba kuhusu sisi anadamu. Mambo higo gaandikpwa kpwa ajili yehu. Mutu mmwenga achipanda na wanjina achiwaga, matumaini ga osi airi ni kuphaha seemu ya mavuno.
- ¹¹Ichikala hwaphanda mbeyu ya chiroho mwenu mioyoni, kuna uyi wani huchivuna mavuno ga maitaji gehu kula kpwenu?
- ¹²Ichikala atu anjina anastahili kuphaha msada kula kpwenu, ela sino si zaidi? Lakini tahuyadai msada hinyo, ela hwavumirira chila chitu ili husikale chizingiti cha kuahenda atu asikuluphire habari ndzuri kuhusu Jesu Muokoli.
- ¹³Bila shaka mnamanya kukala atu ahendao kazi ndani ya Nyumba ya Kuvoya Mlungu nkuphaha chakurya chao mumo. Piya mnamanya kukala alavyadzi-sadaka nkuphaha seemu yao ya nyama kula sadaka zilaviwazo.
- ¹⁴Vivyo hivyo Bwana Jesu walagiza atu anaotangaza habarize aphahe riziki zao kula kpwa yo kazi ya kuitangaza.
- ¹⁵Lakini sidzangbwedai misada hiyo bii. Tsona sikuandikirani baruwa hino ili niandze kudai misada hiyo kpwenu. Kpwa kpweli baha nifwe kuriko kumhenda mutu aniusire kudzikarya kpwangu kpwa kuhubiri nihendako bila maripho.
- ¹⁶Na ninaphotangaza habari ndzuri kuhusu Jesu Muokoli, sina sababu ya kudzikarya hata chidide. Hiro ni jukumu rohewa ni Mlungu. Shaka rani ro ichikala sindatangaza habari ndzuri kuhusu Jesu!

¹⁷Nchihubiri bila ya kulazimishwa, ningephaha tuzo. Ela nchihubiri kpwa lazima, ninachohenda ni kutimiza jukumu rangu rohewa ni Mlungu.

¹⁸Kpwa hivyo tuzo rangu ni utu wani? Tuzo rangu ni kutangazira atu bure habari ndzuri kuhusu Jesu Muokoli, bila ya kudai misada ninayostahili kpwa kuhenda kazi hiyo.

¹⁹Hata dzagbwe mino simi mtumwa wa mutu yeyesi, nadzilavya kama mtumwa wa atu osi ili nipahe atu anji iwezekanavyo kpwa Jesu.

²⁰Kpwa Ayahudi, nákala viratu arivyo Myahudi ili nipahe kuativya. Dzagbwe sitawalwa ni Shariya za Musa, mino náishi dza aho alungao hizo Shariya ili niativye.

²¹Na kpwa atu asio Ayahudi ambao taalunga hizo Shariya, piya nákala dza aho ili niativye. Lakini sio kukala ati silunga malagizo ga Mlungu, hata chidide, ela nkulunga malagizo ga Jesu.

²²Na nchikala na atu anyonje, nami nákala dza aho ili nipahe anyonje. Náhenda chila chitu niwezacho kpwa atu ili nialongoze anjina kpwa Jesu kpwa vyovyosi.

²³Nkuhenda higa gosi ili atu akuluphire habari ndzuri kuhusu Jesu, na vivyo mimi nami n'ndajaliwa.

²⁴Kpwa kpweli mnamanya ashindanao mairo ni anji, ela mmwenga tu ndiye atuzwaye. Phahi zolani mairo ili mpahe tuzo.

²⁵Azoladzi nkuhenda mazowezi magumu sana ili aphahe tuzo, lakini tuzo hizo tazidumu. Ela sisi hunazola ili hupahe tuzo isiyobanangika kabisa.

²⁶Phahi mino sizola mairo gasigo mpango, na simi dza mutu wa makonde atsuphayе ngumize ovyo ovyo.

²⁷Ela nahenda mazowezi magumu na kuutawala mwiri wangu ili bada ya kuhubiriya anjina, nsedze nikatsamalalwa mashindanoni.

1 Akorintho 10

¹Enehu, nataka nikutambukizeni kukala akare ehu osi akala tsini ya ingu na osi achitsupato kahi-kahi ya bahari.

²Osi abatizwa tsini ya rira ingu na hira bahari, nao achikala afuasi a Musa.

³Osi arya chakurya chimwenga cha chiroho.

⁴Na osi anwa madzi mamwenga ga chiroho. Mana anwa madzi ga dziwe ra chiroho ambaro kala richialunga-lunga, na dziwe hiro kala ni Jesu.

⁵Lakini Mlungu kayahamirwa bii ni anji a atu hinyo, kpwa hivyo afwa na miri yao ichitapakaa hiko weruni.

⁶Phahi mambo higa gahendeka ili gahukanye sisi, naswi husiaze kuhenda mai dza akare ehu arivyohenda,

⁷wala husiabudu sanamu dza anjina arivyohenda. Kama Maandiko gaambavyo, "Atu asagala achirya na achinwa, chisha aunuka na achivwina chiudiya."

⁸Nahusihende udiya dza akare ehu anjina arivyokala, na achifwa atu elufu ishirini na tahu siku mwenga.

⁹Wala husimjeze Mlungu dza akare ehu anjina arivyohenda, nao achiolagbwa ni nyoka.

¹⁰Tsona husinung'unike dza arivyonung'unika, nao achiolagbwa ni malaika wa chifo.

¹¹Phahi mambo higo gaaphaha atu hinyo ili gakale mifwano kpwehu, nago gaandikpwa ili gahukanye sisi ambao hunaishi siku za mwisho.

¹²Phahi mchidziona muimire sawa-sawa kpwa Mlungu, mdzimanyirire musedze mukagbwa dambini.

¹³Takuna majaribu gogosi mnagophaha isiphokala garatu ga kawaida ambago anadamu ayawenu nkuphaha. Naye Mlungu ni muaminifu, kandaruhusu mphahе majaribu ga kutsapa uwezo wenu. Lakini mchijezwa, Mlungu andakuphani nguvu za kuvumirira ili mgavuke salama.

¹⁴Kpwa hivyo enehu amenzwa, msiabudu sanamu hata chidide!

¹⁵Mimi nagomba namwi dza atu ario na ikima, phahi gapimeni enye higa nigombago.

¹⁶Hunaphonwa kula chikombe cha baraka cha meza ya Bwana hunachochihumira kpwa kumshukuru Mlungu, kpwa kpweli hunashiriki mlatso wa Jesu phamwenga. Na hunaphomega na kurya mkahe wa meza ya Bwana, hunashiriki mwiri wa Jesu phamwenga.

¹⁷Phahi hata dzagbwe hu anji, hunakala mwiri mmwenga kpwa kushiriki kurya mkahe mmwenga.

¹⁸Hebu fikirini kuhusu Aiziraeli. Osi anaoshiriki phamwenga kurya sadaka inayolavirwa Mlungu, anagbwirana kumuabudu Mlungu.

¹⁹Dze, mana ya maneno higa ni utu wani? Chakurya cholavirwa sadaka kpwa sanamu ama yo sanamu yenye ni chitu muhimu? Hata chidide!

²⁰Makafiri nkulavira sadaka mashetani, lakini si kpwa Mlungu. Nami sitaki mwimwi mshiriki phamwenga na mashetani, hata chidide.

²¹Tamuweza kunwa chikombe cha meza ya Bwana phamwenga na chikombe cha mashetani. Tamuweza kurya chakurya cha meza ya Bwana phamwenga na chakurya cha meza ya mashetani.

²²Huchihenda hivyo, kpwa kpweli hundamhenda Bwana akale na wivu. Dze, hunafikiri huna nguvu kushinda Bwana? Taiwezekana bii!

²³Atu anjina nkuamba, "Vitu vyosi ni halali," ela si vyosi virivyo na fwaida. Tsona, "Vitu vyosi ni halali," ela si vyosi vinavyoterya atu.

²⁴Mutu naasihende gara ganagomfwaha mwenye, lakini naahende gara gafwahirago ayae.

²⁵Mchigula nyama sokoni, ryani na msiuze-uze kukala ni halali ama si halali.

²⁶Mana Maandiko ganaamba, "Dunia na vitu vyosi virivyo himu ni mali ya Mlungu."

²⁷Mutu ambaye siye mfuasi myao achikualika kpwakpwe kaya na uchikubali kuphiya, karye ndichoandazirwa. Usiuze maswali kukala ni halali ama si halali kurya.

²⁸Lakini mutu achikuamba, "Chakurya hichi chalavirwa sadaka kpwa sanamu," phahi usirye. Mana uchirya, ye ambaye akakuambira andakuona unahenda dambi.

²⁹Siyo kukala uwe unahenda dambi lakini iye ariyekuambira ndiye ndiyeona unahenda dambi. Mana takuna sababu uhuru wangu uhukumiwe ni mutu wanjina.

³⁰Nchimshukuru Mlungu kpwa chakurya, kpwa utu wani nilaumiwe kpwa chira ambacho nkachilavira shukurani?

³¹Phahi, chochosi undichorya ama kunwa, ama chochosi ndichohenda, chihendeni ili Mlungu ahewe nguma.

³²Msikale chikpwazo kpwa Ayahudi, kpwa atu asio Ayahudi ama kpwa afuasi a Jesu.

³³Mimi najeza sana kuhamira atu osi kpwa chila chitu. Silonda mambo ganagonifwaidi mwenye, ela nalonda mambo ndigofwaidi atu anji ili aokolwe.

1 Akorintho 11

¹Niigani mimi, dza vivyo nami vyomuiga Jesu.

²Nakutogolani kpwa sababu chila wakati mnanitambukira na kugbwira mafundzo ambago nákufundzani.

³Lakini nalonda mmanye kukala chitswa, yani mkpwulu wa alume osi ni Jesu, chitswa cha mchetu ni mlumewe, na chitswa cha Jesu ni Mlungu.

⁴Phahi mlume yeyesi avoyaye ama kutabiri kuno akadzifwinika chitswa, anaabisha chitswache, yani Jesu.

- ⁵Naye mchetu avoyaye ama kulavya unabii wakati atu akakutana kpwa mavoyo bila ya kudzifwinika chitswa, anaibisha chitswache, yani mlumewe. Mana hinyo ni waibu sawa na mchetu kunyolwa chitswa chizima.
- ⁶Na ichikala kamendze kudzifwinika chitswa, baha anyolwe. Lakini ichikala ni waibu mchetu kuphunguzwa ama kunyolwa nyere, phahi naadzifwinike chitswa.
- ⁷Kpwa mana mlume kafwaha kudzifwinika chitswa, mana ndiye mfwano na nguma ya Mlungu, lakini mchetu ni nguma ya mlume.
- ⁸Mana mlume kayaumbwa kula kpwa mchetu, ela mchetu waumbwa kula kpwa mlume.
- ⁹Na mlume kayaumbwa kpwa sababu ya mchetu, ela mchetu waumbwa kpwa sababu ya mlume.
- ¹⁰Kpwa hivyo mchetu ni adzifwinike chitswa kuonyesa kala a tsini ya mamlaka. Chisha ni ahende vivyo kpwa sababu ya malaika.
- ¹¹Lakini kpwa kuungana na Bwana Jesu, alume na achetu osi ni muhimu, naye mmwenga kaweza kuishi bila ya myawe.
- ¹²Mana mchetu wa kpwandza wala kpwa mlume, na kula hipho hata vivi sambu alume anavyalwa ni achetu. Na vitu vyosi vila kpwa Mlungu.
- ¹³Phahi fikiriyani enye, ichikala ni sawa mchetu kuvoya Mlungu bila ya kudzifwinika chitswa.
- ¹⁴Hata mila yehu inahukahaza mlume kukala na nyere nyire, mana nkudzitiya waibu ye mwenye.
- ¹⁵Lakini mchetu nkulikpwa achikala na nyere nyire, kpwa mana wahewa nyere nyire ili zimfwinike.
- ¹⁶Ichikala mutu analonda kulumba kuhusu dzambo hiri, phahi naamanye kala sisi na makundi gosi ga atu a Mlungu tahuna mila yanjina.
- ¹⁷Kuhusu gaga malagizo nilondago kukuphani, sikutogolani kpwa sababu mikutano yenu inareha matatizo badala ya fwaida.
- ¹⁸Mwandzo atu aniambira kala mnapingana mnaphokutana, ndiyo mana mnaganyana makundi makundi. Nami nchigapima naona kuna chiasi fulani cha ukpweli.
- ¹⁹Mana n'lazima atu aganyane ili hara ariokubaliwa ni Mlungu amanyikane wazi.
- ²⁰Mwimwi mnaphokutana si kpwa lengo ra kurya chakurya cha Bwana Jesu bii.
- ²¹Mana wakati wa kurya, chila mmwenga nkuandza kurya chivyakpwe bila ya kugodzana, hata mwisho anjina akasala na ndzala na kuno anjina nao akalewa.

²²Waibu! Kpwani tamuna nyumba ambazo mnaweza kurya na kunwa? Hebu mnalonda kuzarau atu a Mlungu na kuaibisha atu asio na chitu? Kpwa kpweli mambo mhendago tagaweza kunihenda nikutogoleni hata chidide.

²³Kpwa mana malagizo higa ni garatu nrigophokera kula kpwa Bwana Jesu na nchikuphani. Usiku hura ambao kala andasalatwa, wahala mkahe,

²⁴na bada ya kumshukuru Mlungu, wamega-mega hura mkahe na achiamba, "Huno ni mwiri wangu ulaviwao kpwa ajili yenu. Kalani mchihenda hivi ili mkale mchinitambukira."

²⁵Vivyo hivyo bada ya chakurya Jesu wahala chikombe cha uchi wa zabibu, achiamba, "Uchi wa chikombe hichi ni chilagane chiphya cha Mlungu chinachoikpwa na mlatso wa chifo changu. Chila wakati wa kunwa uchi na chikombe hichi hendani hivi kpwa kunitambukira."

²⁶Mana chila mnaphorya mkahe huno na kunwa uchi wa zabibu wa chikombe hichi, mndatangaza chifo cha Bwana Jesu hadi andiphouya tsona.

²⁷Kpwa hivyo mutu yeyesi aryaye mkahe ama kunwa uchi wa zabibu kula chikombe cha Bwana kpwa njira isiyofwaha, anahendera dambi mwiri na mlatso wa Bwana Jesu.

²⁸Phahi chila mutu n'lazima adzipime mwenye kpwandza, ndipho arye mkahe na anwe uchi wa zabibu,

²⁹mana chila aryaye mkahe na kunwa uchi wa zabibu wa chikombe hichi bila ya kumanya manage ga mwiri wa Jesu, anadzirehera hukumu mwenye.

³⁰Ndiyo mana anji enu ni akongo na taana nguvu, tsona ayawenu anjina afwa.

³¹Lakini huchidzihukumu sawa-sawa sisi enye, tahundahukumiwa ni Mlungu.

³²Ela huchihukumiwa ni Bwana, anahufundza njira nono ili husedze akahuhukumu phamwenga na atu asiomkuluphira Mlungu.

³³Phahi enehu, mchikutana kurya chakurya cha Bwana phamwenga, godzanani.

³⁴Ichikala mutu anasikira ndzala, baha arye kaya kpwandza ili asihukumiwe ni Mlungu mnaphokala phamwenga kpwa muonano. Na kuhusu mambo ganjina, n'ndakufundzani ndiphokpwedza.

1 Akorintho 12

¹Enehu, nataka mmanyenye vinono sana kuhusu vipawa vya Roho wa Mlungu.

²Mnamanya phokala tamdzangbwemanya Mlungu, mwalongozwa makosa kpwa kuabudu sanamu ambazo tazina uhai wala uwezo wa kugomba.

- ³Phahi nalonda mmanyeye kukala mutu yeyesi alongozwaye ni Roho wa Mlungu kaweza kuamba, "Jesu naalaniwe." Na takuna mutu awezaye kuamba, "Jesu ni Bwana," isiphokala alongozwe ni Roho wa Mlungu.
- ⁴Kuna aina nyinji za vipawa vya chiroho, lakini alavyaye ni yehiye Roho wa Mlungu.
- ⁵Tsona kuna aina nyinji za utumishi, lakini Bwana ni iye mmwenga.
- ⁶Piya kuna aina nyinji za kazi, lakini alavyaye uwezo wa kuhenda kazi hizo kpwa atu osi ni yehiye Mlungu.
- ⁷Roho wa Mlungu nkumanyikana kpwa kumupha chila mutu uwezo kpwa fwaida ya afuasi a Jesu.
- ⁸Hiye Roho nkumupha mutu mmwenga uwezo wa kugomba kpwa ikima, na wanjina n'kuhewa uwezo wa kulavya ujumbe wa maarifwa kula kpwa yehiye Roho.
- ⁹Tsona wanjina naye n'kuhewa imani ni ye Roho, na wanjina chipawa cha kuphoza akongo.
- ¹⁰Wanjina n'kuhewa chipawa cha kuhenda vilinje, wanjina uwezo wa kutabiri, na wanjina uwezo wa kutafwautisha roho mbali-mbali. Tsona wanjina n'kuhewa chipawa cha kugomba na luga njeni, naye wanjina chipawa cha kutafasiri hizo luga.
- ¹¹Na zosi hizo ni kazi za yehiye Roho wa Mlungu mmwenga, ambaye nkumupha chila mutu viratu amenzavyo mwenye.
- ¹²Mwiri ni mmwenga, ela vilungo ni vinji. Hata dzagbwe vilungo ni vinji, lakini vinahenda mwiri mmwenga. Hinyo ni mfwano wa mwiri wa Jesu, yani kundi ra atu a Mlungu.
- ¹³Kpwa mana hukakala Ayahudi au atu asio Ayahudi, atumwa au atu huru, sisi hosi hwabatizwa na Roho mmwenga ili hukale mwiri mmwenga. Piya wahendwa huphokere iye Roho mmwenga mwehu mioyoni.
- ¹⁴Mwiri waumbwa na vilungo vinji si chilungo chimwenga bahi.
- ¹⁵Kpwa mfwano, kala chigulu chingeamba, "Mino simi mkpwono, kpwa hivyo simi seemu ya mwiri," hata hivyo hicho chigulu chingekala bado ni seemu ya mwiri.
- ¹⁶Naro sikiro kala ringeamba, "Mino simi dzitso, kpwa hivyo simi seemu ya mwiri," hata hivyo hiro sikiro ringekala bado ni seemu ya mwiri.
- ¹⁷Kala mwiri wosi ungekala dzitso, mutu angesikiradze? Na kala mwiri wosi ungekala sikiro, mutu angenusadze? Kangeweza!

- ¹⁸Lakini Mlungu wapanga vilungo vyosi vya mwiri na chila chilungo wachiika phatuphe, viratu arivyolonda ye mwenye.
- ¹⁹Kala vilungo vyosi vingekala chilungo chimwenga, phahi takungekala na mwiri wowosi.
- ²⁰Ela kama irivyo, kuna vilungo vinji vya mwiri lakini mwiri wenye ni mmwenga.
- ²¹Kpwa hivyo dzitso tarifwaha kuambira mkpwono, "Sina lazima na uwe!" Wala chitswa tachifwaha kuambira magulu, "Sina lazima na mwimwi!"
- ²²Tsona vilungo vya mwiri vionekanavyo vinyonje, ndivyo ni muhimu hukale navyo.
- ²³Na vira vilungo ambavyo hunaona tavifwaha kuishimiwa, ndivyo huviphavyo ishima kulu sana. Na vira vilungo ambavyo tahufwaha kuvionyesa atu, hukuvitundza vinono.
- ²⁴Ela vilungo vyehu vyanjina virivyo na unono wa kuonekana, tahufwaha kuvifwitsa-fwitsa. Mana Mlungu waunganisha vilungo vya mwiri na kuvipha ishima zaidi vira vilungo visivyo na ishima,
- ²⁵ili vilungo visiganyane, ela vyosi viungane na viteryane sawa-sawa.
- ²⁶Chilungo chimwenga chichiteseka, vyosi nkuteseka phamwenga. Na chanjina chichiphaha nguma, vyosi nkuhererwa phamwenga.
- ²⁷Phahi mwimwi mosi mu mwiri wa Jesu; na chila mmwenga ni chilungo cha mwiri hinyo.
- ²⁸Kahi ya makundi ga atue, Mlungu watsambula anjina kpwandza akale mitume, phiri manabii, na hahu alimu. Chisha anjina nao achiatsambula ahende vilinje, anjina akale na chipawa cha kuphoza makongo, anjina aterye ayawao, anjina akale vilongozi, na anjina agombe na luga njeni.
- ²⁹Dze, atu osi ni mitume? Atu osi ni manabii? Atu osi ni alimu? Hata chidide! Dze, atu osi anaweza kuhenda vilinje?
- ³⁰Atu osi ana vipawa vya kuphoza makongo? Atu osi anaweza kugomba na luga njeni? Dze, atu osi anaweza kutafasiri luga? Hata!
- ³¹Phahi azani sana vipawa vinono zaidi. Nami n'ndakuonyesani njira nono kuriko zosi.

1 Akorintho 13

- ¹Phahi nchigomba na luga za anadamu na hata za malaika, lakini ichikala sina mendzwa, napiga kululu za bure dza daba huphu ama kengele.

- ²Nchikala na chipawa cha kutabiri na kumanya siri zosi na marifwa gosi, tsona nchikala na imani inayoweza kutsamiza myango, lakini ichikala sina mendzwa, mimi n'ndakala si chitu.
- ³Tsona nchilavya mali zangu zosi kuapha achiya na kulavya mwiri wangu uphye dza sadaka na moho, lakini ichikala sina mendzwa, tainifwaidi chochosi.
- ⁴Menzwa inavumirira, ina mbazi. Mendzwa taina wivu, kudzivuna wala ngulu.
- ⁵Menzwa taikosa adabu, tailola fwaidaye macheye, taihenda mutu kutsukirwa upesi wala kutambukira mambo mai gosi.
- ⁶Menzwa taihamirwa ni mambo mai, ela nkuhamirwa ni ukpweli.
- ⁷Menzwa nkuvumirira gosi, na nkuamini gosi bila kukata tamaa. Na mendzwa nkuenderera hata ichifikira wakati ambao mambo ni mafu.
- ⁸Menzwa taisika tse-tse-tse. Lakini utabiri una mwisho, kugomba na luga njeni kuna mwisho, na marifwa piya nkusika.
- ⁹Mana vipawa vyehu vya marifwa na kutabiri ni vya seemu ndide tu.
- ¹⁰Lakini ukamilifu ndiphokpwedza siku ya chiyama, vira ambavyo tavikamili vindaangamika.
- ¹¹Hebu sikizani. Nriphokala mwanache, kala nchigomba chanache, kuaza na kufikiri chanache. Ela nriphokala mvyere, mambo ga chanache nágaricha.
- ¹²Mana hipha sambu hunaona mambo chiwiriwiri dza chilolo ambacho tachionyesato, chisha badaye hundaona chila chitu wazi-wazi. Sambu namanya chidide, ela badaye n'ndamanya chikamilifu dza viratu Mlungu animanyavyo.
- ¹³Phahi higa mambo mahahu ganagodumu ni kuluphiro, tumaini, na mendzwa. Ela ra muhimu zaidi kuriko gosi higa ni mendzwa.

1 Akorintho 14

- ¹Enehu, mendzanani na muaze sana vipawa vya chiroho, hasa chipawa cha kutabiri.
- ²Mana mutu achigomba na luga njeni kagomba na atu, ela anagomba na Mlungu. Na kpwa kpweli takuna wanjina ndiyelewa, mana anagomba siri kpwa uwezo wa Roho wa Mlungu.
- ³Lakini mutu anayetabiri anagomba na atu ili kuadzenga chiroho, kuatiya moyo na kuaphoza maroho.
- ⁴Mutu anayegomba na luga njeni anadzipheza chiroho mwenye, ela anayetabiri anapheza chiroho kundi rosi ra afuasi a Jesu.
- ⁵Phahi, nalonda mosi mgombe na luga njeni, lakini zaidi naaza mkale na chipawa cha kutabiri. Mana mutu atabiriye ni mkpwulu kuriko hiye agombaye na luga

njeni, isiphokala phakale phana mutu wa kutafasiri hinyo ujumbe ili afuasi a Jesu afwaidike.

⁶Sambi enehu, nchedza kpwenu na kugomba na luga njeni, indakuteryani viphi? Taindakufwaidini chitu isiphokala nikurehereni maono kula kpwa Mlungu, marifwa, unabii na mafundzo.

⁷Hata vifaya vya mawira dza firimbi au ngephephe, dzagbwe tavina uhai, vinahuonyesa umuhimu wa kugomba na luga ya kueleweka. Mana takuna ndiyeelewa wira uimbwao ichikala vifaya hivyo tavikahumirwa kulavya sauti ya kueleweka vinono.

⁸Kpwa mfwano, gunda risipholavya sauti ya kueleweka, ni ani ndiyedzitarisha kufika barazani?

⁹Vivyo hivyo namwi, takuna mutu ndiyekuelewa uchigomba na luga njeni asiyoimanya. Mana kpwa kpweli manenogo gandaphiya na phepho!

¹⁰Kuna luga nyinji tafwauti tafwauti duniani, ela takuna hata mwenga ambayo taina mana.

¹¹Lakini ichikala simanya luga ya yuya mutu, kpwa kpweli iye anayegomba ni mjeni kpwangu, nami ni mjeni kpwakpwe.

¹²Vivyo hivyo namwi, kpwa vira mnalonda sana vipawa vya chiroho, phahi hendani bidii kpwa kuhumira vipawa vinavyoterya afuasi a Jesu.

¹³Kpwa hivyo, mutu ambaye anagomba na luga njeni, n'lazima avoye Mlungu ili amuphe uwezo wa kutafasiri gara maneno anagogomba.

¹⁴Mana nchivoya Mlungu na luga njeni, roho yangu inavoya kpweli, lakini achili yangu inakala taipho.

¹⁵Sambi nihendedze? N'ndavoya na roho yangu na piya n'ndavoya na achili yangu, tsona n'ndaimba na roho yangu na piya n'ndaimba na achili yangu.

¹⁶Uchimtogola Mlungu mwako rohoni macheyo, atu anjina ario hiphho mkutanoni andawezadze kuamba, "Amina" kpwa sababu ya shukuraniyo, ichikala kaelewere urichogomba?

¹⁷Hata ichikala mavoyogo ni manono, tagaweza kuterya atu anjina hata chidide.

¹⁸Namshukuru Mlungu mana naweza kugomba na luga njeni kuriko mwimwi mosi.

¹⁹Lakini baha nigombe maneno matsano ganagoeleweka ninaphokala phamwenga na afuasi a Jesu, ili niafundze, kuriko kugomba maneno elufu kumi ga luga njeni ambago atu taagaelewa.

²⁰Enehu, msifikiriye mambo chanache. Maazo genu nagakale dza ga atu azima, ela kuhusu kuhenda mai, kalani dza ana atsanga.

- ²¹Mlungu mwakpwe Maandikoni anaamba, "N'ndahumira ajeni a luga tafwauti tafwauti kubisha na atu angu, hata hivyo taandanisikira."
- ²²Phahi kugomba na luga njeni ni dalili kpwa atu asiomkuluphira Jesu. Lakini kutabiri ni kpwa fwaida ya atu amkuluphira, ela si kpwa atu asiomkuluphira.
- ²³Sambi afuasi a Jesu achikutana na osi agombe na luga njeni, alafu phapho phainjire atu asioelewa au asiomkuluphira Jesu, dze taandakuihani atu a koma?
- ²⁴Lakini atu osi achikala anatabiri, alafu phachiinjira mutu asiyelewa au asiyemkuluphira Jesu, mutu hiye andamanya kpweli dambize na andadzihukumu kpwa gara ndigogasikira.
- ²⁵Tsona siri za moyowe zindaikpwa wazi. Kpwa hivyo andachita mavwinda kumuabudu Mlungu, achiamba, "Kpwa kpweli Mlungu a phamwenga namwi."
- ²⁶Phahi enehu, huhendedze? Mnaphokala phamwenga kumuabudu Mlungu, mmwenga ana zaburi, wanjina anafundza, mmwenga ana maono, wanjina naye ana luga njeni na wanjina anatafasiri. N'lazima mhende mambo higa gosi kpwa kuterya atu a Mlungu.
- ²⁷Ichikala phana atu analonda kugomba kpwa luga njeni, phahi naagombe atu airi au ahahu lakini si zaidi, chila mmwenga kpwa zumare ra kugomba. Tsona phakale na mutu wa kutafasiri.
- ²⁸Lakini ichikala taphana mutu wa kutafasiri hipho kundini, n'lazima hiye mutu wa kugomba na luga njeni anyamale, agombe macheye na Mlungu.
- ²⁹Manabii airi ama ahahu naatabiri ujumbe wa Mlungu, nao anjina apime hura ujumbe uchiogombwa.
- ³⁰Sambi mmwenga achikala aimire anatabiri, na wanjina asegereye achiphaha maono kula kpwa Mlungu, phahi yuya anayetabiri ni anyamale.
- ³¹Mana atu osi anaweza kutabiri kpwa mazuma ili atu osi adzifundze na kutiywa moyo.
- ³²Na wakati mutu anatabiri, n'lazima atawale chipawache cha kutabiri,
- ³³mana Mlungu si Mlungu wa fujo, ela wa amani. Kama garivyo makundi gosi ga afuasi a Jesu,
- ³⁴achetu ni anyamale mkutanapho. Mana taaruhusiwa kugomba, ela ni adziike tsini ya mamlaka kama Shariya za Musa ziambavyo.
- ³⁵Na ichikala mchetu analonda kuuza dzambo rorosi, naakauze mlumewe kaya, mana ni waibu mchetu kugomba mbere za kundi ra afuasi.
- ³⁶Hebu mnafikiri ujumbe wa Mlungu wala kpwenu? Ama rino neno ra Mlungu rakpwedza kpwenu bahi? Hata chidide!

³⁷Mutu yeyesi achidziona kukala ni nabii au mutu wa chiroho, naamanye kukala higa nigaandikago ni malagizo kula kpwa Bwana Jesu.

³⁸Phahi mutu asiphosikiza mambo higa, msimsikize.

³⁹Kpwa hivyo enehu, azani sana kutabiri, na piya msiazuwiye atu agombao kpwa luga njeni.

⁴⁰Lakini chila chitu n'lazima chiphiye kpwa njira inayofwaha na kpwa utaratibu mnono.

1 Akorintho 15

¹Sambi enehu, nataka nikutambukizeni hira habari ndzuri kuhusu Jesu nriyokusemurirani, namwi mchiikubali, na mnadinisa kuikuluphira.

²Habari ndzuri hiyo ndiyo inayokuokolani mchigbwira ngi-ngi-ngi hinyo ujumbe nriokufundzani. Ichikala tamhendere hivyo, kuluphiro renu tarindakala na fwaida yoyosi.

³Mana nákufundzani mambo muhimu sana ambago nami náhendafundzwa kukala, Jesu wafwa ili husamehewe dambi zehu, kama Maandiko ganavyoamba.

⁴Tsona wazikpwa na siku ya hahu achifufulwa, kama Maandiko ganavyoamba.

⁵Chisha achimtsembukira Petero na badaye achiatsembukira hara mitume kumi na airi.

⁶Bada ya hipho watsembukira zaidi ya afuasi magana matsano chilimwenga, ambapho anji ao achere azima, ela anjina afwa.

⁷Badaye wantsembukira Jakobo, chisha achiatsembukira mitume osi.

⁸Mwisho kabisa Jesu wanitsembukira mimi dza mutu yevyalwa wakati ambao sio wa kawaida.

⁹Mana ndimi mtume mdide kabisa na sifwaha hata kuihwa mtume kpwa sababu nátesa afuasi a Jesu.

¹⁰Lakini ni mtume kpwa mbazi za Mlungu, nazo mbazize taziyakala za bure. Mana náhenda kazi zaidi kuriko mitume anjina osi. Yo kazi yoihenda, naihenda kpwa sababu Mlungu kala a phamwenga nami, ela siihendere kpwa uwezo wangu mwenye.

¹¹Kpwa hivyo, ikale ni mimi au ni hinyo ayangu ariofundza, dzambo muhimu ni kukala mnaamini higa hunagofundza.

¹²Sambi ichikala mwafundzwa kala Jesu wafufulwa kula kpwa ariofwa, kpwadze atu enu anjina anaamba kala atu a kufwa taandafufuka?

¹³Ichikala atu a kufwa taandafufuka, phahi hata Jesu kayafufuka.

- 14**Na ichikala Jesu kayafufuka, mafundzo gehu ni bure na kuluphiro renu naro piya ni ra bure.
- 15**Zaidi ya hivyo, sisi hunaonekana kama mashahidi ga handzo kuhusu Mlungu, mana hwaamba kala Mlungu wamfufula Jesu. Lakini ichikala kpweli atu a kufwa taafufuka, phahi Mlungu kayamfufula Jesu.
- 16**Mana ichikala atu a kufwa taafufuka, phahi hata Jesu naye kayafufuka.
- 17**Na ichikala Jesu kayafufuka, phahi kuluphiro renu ni ra bure, namwi mchere na dambi zenu.
- 18**Nao atu ariofwa na kuno anamkuluphira Jesu, aangamika.
- 19**Ichikala kuluphiro rehu kpwa Jesu ni kpwa maisha higa bahi, n'lazima hufoserwe mbazi zaidi ya atu osi duniani.
- 20**Lakini kpwa kpweli Jesu wafufuka. Iye ndiye matunda ga kpwandza ga mavuno ga hinyo atu ariofwa.
- 21**Mana dza viratu chifo charehewa ni mutu mmwenga, na kufufuka nako kppurehewa ni mutu mmwenga.
- 22**Yani chila mmwenga nkufwa kpwa vira hosi hu chivyazi cha Adamu, mutu wa kpwandza. Vivyo hivyo sisi hosi hundahendwa hukale moyo kpwa kuungana na Jesu.
- 23**Ela chila mmwenga andafufulwa kpwa wakatiwe, kpwandza ni Jesu ambaye ni matunda ga kpwandza, alafu wakati achiuya, hara ario akpwe.
- 24**Bada ya higo, mwisho wa dunia undakpwedza. Jesu andaangamiza utawala, mamlaka na uwezo wosi wa maaduige, alafu andamupha Baba Mlungu atu osi ambao anaatawala.
- 25**N'lazima Jesu atawale mpaka Mlungu ndiphoshinda maaduige gosi na gangbwerere maguluni.
- 26**Adui wa mwisho kuangamizwa ni chifo.
- 27**Mana Maandiko ganaamba, "Mlungu waika vyosi tsini ya maguluge." Ganaphoamba Mlungu waika, "vyosi" tsini ya Jesu, ni wazi kala Mlungu kamo ndani ya hinyo, mana Mlungu ndiye ariyeika vyosi tsini ya utawala wa Jesu.
- 28**Mana wakati Mlungu Baba ndiphoika chila chitu tsini ya mwana, iye mwana mwenye naye andadziika tsini ya Mlungu, ili Mlungu atawale vitu vyosi kabisa kabisa.
- 29**Sambi fikiriya kuhusu atu anaobatizwa kpwa ajili ya ariofwa. Tsona ichikala ni kpweli atu taafufulwa, kpwa utu wani atu hinyo nkubatizwa kpwa ajili ya atu a kufwa? Takuna sababu!
- 30**Na sisi, kpwa utu wani hunadzizindza chila wakati?

- ³¹Mino nalola chifo na matso gangu chila siku. Dzambo hiri rina ukpweli sawa na ngulu zangu kpweni kpwa kuungana na Jesu Muokoli, Bwana wehu.
- ³²Ichikala mino náheha na atu asiru hiko Efeso kpwa sababu za chibinadamu tu, mnaona náphaha fwaida yani? Siyaphaha rorosi! Kpwa hivyo ichikala atu a kufwa taafufuka, "Nahurye na hunweni mana muhondo hundafwa."
- ³³Msichengbwe ni atu anaogomba hivyo, kpwa sababu, "Usena uyi nkubananga tabiya nono."
- ³⁴Hebu lamukani na mriche kuhenda dambi. Mana anjina enu taamanya Mlungu ambapho ni waibu sana kpweni.
- ³⁵Labuda anjina anadziuza, "Atu a kufwa andafufulwadze? Na andakpwedza na miri ya viphi?"
- ³⁶Hiro ni swali ra chizuzu! Uchiphanda mbeyu mtsangani, taimera mpaka mwandzo iole.
- ³⁷Na uchimwagira mbeyu, kuweza kukumbira muhi mzima ambao undamera badaye, ela nkukumbira mbeyu tu, dza ya nganu ama mbeyu yoyosi yanjina.
- ³⁸Lakini Mlungu nkuipha hira mbeyu umbo ranjina ambaro anataka ye mwenye, na chila aina ya mbeyu nkuipha umbo ra tafwauti.
- ³⁹Vivyo hivyo kuna aina tafwauti tafwauti za miri. Kuna miri ya anadamu, ya nyama, ya nyama a mapha, na ya ng'onda.
- ⁴⁰Vivyo hivyo kuna vitu vya mlunguni na viumbe vya duniani. Unono wa vitu vya mlunguni u chivyakpwe, na unono wa viumbe vya duniani nao u chivyakpwe.
- ⁴¹Dzuwa rina unonowe macheye, nao mwezi una unonowe, na nyenyezi zina unono wanjina. Na hata hizo nyenyezi nazo zina unono tafwauti kula nyenyezi mwenga hadi yanjina.
- ⁴²Phahi indakala vivyo hivyo na atu a kufwa wakati wa kufufuka. Miri yehu ya hipha duniani inabanangika, lakini wakati ichifufuka, taibanangika tsona.
- ⁴³Mwiri nkuzikpwa kpwa njira ya waibu, ela mwiri nkufufuka kpwa njira ya nguma. Wakati uchizikpwa ni mnyonje, lakini ndiphofufuka undakala na nguvu.
- ⁴⁴Wakati uchizikpwa ni mwiri wa chibinadamu, ela wakati uchifufuka undakala mwiri wa chiroho. Hunamanya kuna mwiri wa chibinadamu, na vivyo hivyo kuna mwiri wa chiroho,
- ⁴⁵mana Maandiko ganaamba kukala, Adamu, mutu wa kpwandza, waumbwa akale chiumbe chiricho na uhai. Lakini Adamu wa mwisho, yani Jesu, ni roho iphayo atu uhai.
- ⁴⁶Mwiri uriokpwedza mwandzo ni wa chibinadamu, sio wa chiroho. Ndipho badaye uchedza hinyo mwiri wa chiroho.

- ⁴⁷Adamu, mutu wa kpwandza, waumbwa kula kpwa ulongo wa dunia, ela Jesu, mutu wa phiri, wala mlunguni.
- ⁴⁸Atu a hipha duniani ana miri ya ulongo dza hura wa Adamu, na atu a mlunguni ana miri dza hura wa Jesu.
- ⁴⁹Na viratu hurivyoigana na Adamu, mutu wa ulongo, vivyo hivyo hundaigana na Jesu, mutu yela mlunguni.
- ⁵⁰Enehu, nakuambirani hivi: Chirichoumbwa na nyama na mlatso tachiweza kusagala phamwenga na Mlungu phatuphe pha nguma. Tsona miri yehu inayobanangika taiweza kuishi milele mlunguni.
- ⁵¹Sikizani nikuambireni siri ya ajabu ambayo Mlungu wahufwenurira. Sisi tahundafwa hosi, ela hosi hundagaluzwa.
- ⁵²Indahendeka upesi sana dza viratu kugbwinya, wakati gunda ra mwisho richipigbwa. Mana gunda ndiphopigbwa wakati wa mwisho, hara ariofwa andafufuka na miri isiyobanangika, naswi hurio moyo hundagaluzwa husifwe.
- ⁵³Kpwa mana hino miri yehu ya kubanangika n'lazima igaluzwe isibanangike, tsona miri yehu inayofwa n'lazima igaluzwe isikale ya kufwa.
- ⁵⁴Kpwa hivyo wakati hino miri yehu ya kufwa na kubanangika ichigaluzwa isifwe na kusabanangika, ndipho Maandiko ga Mlungu gandakamilika ganagoamba, "Chifo chikaangamizwa ni ushindi!"
- ⁵⁵"We chifo, ushindio u kuphi? Na utsunguo u phaphi?"
- ⁵⁶Chifo nkuphaha utsunguwe kula kpwa dambi, nayo dambi inaphaha nguvuze kula kpwa Shariya za Musa.
- ⁵⁷Lakini nahumshukuruni Mlungu ariyehupha ushindi kpwa njira ya Bwana wehu Jesu Masihi.
- ⁵⁸Kpwa hivyo enehu amenzwa, dinani chilume na msiyumbe-yumbe. Tsona mzidi kuhenda kazi ya Bwana Jesu, mchimanya kukala kazi yenu kpwa Bwana siyo ya bure.

1 Akorintho 16

- ¹Sambi, kuhusu misada mnayokusanya kuterya atu a Mlungu, nalonda mhende viratu nrivyolagiza makundi ga afuasi a Jesu hiko jimbo ra Galatia.
- ²Siku ya kpwandza ya chila wiki, chila mmwenga naatenge chiasi fulani cha pesa kulengana na mapatoge, na ziikpwe ili siku nchedza kusikale na haja ya kukusanya misada yoyosi.
- ³Chisha siku nchedza hara ambao mndakala mkaatsambula, n'ndaapha baruwa za kudzimanyisa na zawadi apherike hiko mudzi wa Jerusalem.

- ⁴Ichikala inafwaha mimi piya niphiye, phahi n'ndaphiya nao.
- ⁵N'ndakpwedza kpwenu bada ya kutsapa na jimbo ra Makedonia, mana ninapanga kutsupa na hiko.
- ⁶Menzerepho n'ndakala namwi kpwa muda, hata kpwa majira ga mnyevu, ili mniterye vyaro vyangu kokosi ndikophiya.
- ⁷Kpwa vira n'ndakala natsapira kpwenu, sitaki nedze kpwenu sambu kpwa muda mfupi bahi. Mlungu achimendza, napanga kukala namwi kpwa muda wa kukola.
- ⁸Lakini n'ndasagala mudzi wa Efeso mpaka Sukukuu ya Pentekosti isire,
- ⁹mana kuna nafwasi malumu kpwangu ya kuhenda kazi muhimu, hata dzagbwe phana apindzani anji.
- ¹⁰Timothi achedza, mphokereni vinono asiogophe chochosi achikala phamwenga namwi, mana nkuhenda kazi ya Bwana Jesu dza mimi.
- ¹¹Kpwa hivyo phasikale na mutu anayemzarau. Piya mumsindikize salama ili edze hiku Efeso, mana namgodzera auye phamwenga na afuasi anjina.
- ¹²Sambu kuhusu mwenehu wehu Apolo, nám'voya sana edze ko kpwenu na afuasi anjina. Dzagbwe kayamendza kpwedza sambu, andakpwedza achipaha nafwasi.
- ¹³Dzimanyirireni sana na mdine kumkuluphira Bwana Jesu. Dzitiyeni moyo na mkale na nguvu.
- ¹⁴Chila mhendaro, rihendeni na mendzwa.
- ¹⁵Mnamanya enehu, Stefano na atu a mudziwe ndio a kpwandza kukala afuasi a Jesu hiko tsi ya Giriki, nao adzilavya kuahumikira atu a Mlungu anjina. Phahi nakuvoyani,
- ¹⁶vilongozi dza hinyo na osi ahendao kazi kpwa bidii phamwenga nao, muaishimu.
- ¹⁷Náhamirwa kala Stefano, Fotunato na Akaiko akpwedza, mana aniterya sana wakati kala tamupho.
- ¹⁸Piya anitiya moyo sana dza vivyo arivyokutiyani moyo mwimwi. Phahi ishimuni sana atu dza hinyo.
- ¹⁹Makundi ga afuasi a Jesu ga jimbo ra Asia ganakuphozani. Akpwila na Prisila phamwenga na afuasi a Jesu akutanao mwao nyumbani piya akakuphozani dza afuasi a Bwana Jesu.
- ²⁰Atu a Mlungu osi hipha akakuphozani. Lamusanani na mendzwa ya kpweli.
- ²¹Mimi Paulo, naandika salamu hizi na mkpwono wangu mwenye.
- ²²Mutu yeyesi asiyemmendza Bwana Jesu, naalaniwe. Bwana wehu, nakuvoya wedze!

²³Bwana Jesu naakujaliyeni mosi.

²⁴Mwimwi mosi, kalani na mendzwa yangu kama afuasi a Jesu Muokoli. Amina.

2 Akorintho

2 Akorintho 1

- ¹Baruwa hino ila kpwangu mimi Paulo. Nami nátsambulwa nikale mtume wa Jesu kama Mlungu arivyomendza. Mimi na mfuasi myangu Timothy,
- ²hunakuandikirani mwimwi atu a Mlungu hiko mudzi wa Korintho na atu a Mlungu osi hiko tsi ya Giriki. Baba Mlungu na Bwana Jesu Masihi naakujaliyeni na mkale salama.
- ³Naatogolwe Mlungu ambaye piya ni Isengbwa wa Bwana wehu Jesu Masihi. Mlungu ambaye ndiye chandzo cha mbazi na iye ndiye ahuphozaye maroho.
- ⁴Iye nkuhuphoza maroho wakati wa tabu zehu zosi, ili naswi huweze kuphoza maroho ayawehu ario na tabu, dza vira hurivyophozwa maroho ni Mlungu.
- ⁵Kpwa vira mateso ga Jesu, ambago ni manji, ganavyozidi kpwehu, vivyo hivyo kuphozwa maroho kpwehu nako kunazidi.
- ⁶Huchiteseka, hunateseka ili mwimwi mphozwe maroho na kuphaha wokofu. Na huchiphozwa maroho, hunaphozwa maroho ili namwi mphozwe maroho. Na kuphozwa maroho kpweni kunakuhendani mvumirire mateso dza gago huphahago sisi.
- ⁷Huna hakika kpweni kpwa sababu hunamanya kala jinsi mnavyoshiriki mateso gehu, vivyo hivyo piya mnashiriki kuphozwa maroho dza sisi.
- ⁸Enehu, hunataka hukumanyiseni mateso hurigophaha hiko jimbo ra Asia. Hwagaya sana, kutsapa chiasi cha uwezo wehu wa kuvumirira hata huchikata tamaa ya kuenderera kuishi.
- ⁹Kpwa kpweli hwadzisikira mwehu mioyoni kala hukahukumiwa chifo. Lakini higa gahendeka ili husiadamire nguvu zehu, ela huadamire Mlungu ambaye nkufufula atu akufwa.
- ¹⁰Akahutivya na hatari ya chifo, naye andahutivya, tsona hunakuluphira kukala Mlungu andaenderera kuhutivya.
- ¹¹Namwi mnahuterya kpwa mavoyo genu. Mana atu anji andamshukuru Mlungu kpwa jinsi ndivyosikira mavoyo genu manji kpwa kuhujaliya.
- ¹²Hunahenda ngulu kpwa sababu hunaweza kukuambirani bila kusita-sita kala hwaishi kpwa uaminifu na moyo kutsuka. Naswi hwaahendera hivyo atu osi na haswa mwimwi mosi kpwa kuadamira mbazi za Mlungu badala ya marifwa gehu ga hipha duniani.
- ¹³⁻¹⁴Mana tahukuandikirani mambo majeni isiphokala gago ambago mnaweza kugasoma na kugaelewa. Hata ichikala hivi sambu tamuelewa chikamilifu,

naamini kala siku mwenga mndaelewa vinono. Chisha siku Bwana Jesu achiuya, mndahenda ngulu na sisi dza vyo hundi vyokala na ngulu namwi.

¹⁵Kpwa vira kala nina hakika na mambo higo, phahi nápanga kpwedza kpwenu kpwandza ili mphahe baraka mara mbiri.

¹⁶Nápanga kukutsupirani wakati naphiya Jimbo ra Makedonia, na wakati nauya kula hiko, ili mphahe kuniterya wakati nchikala naphiya jimbo ra Judea.

¹⁷Nriphopanga kukutsupirani siyakala na maazo ga kugaluzaga-galuzaga mipango yangu. Sipanga mipango yangu dza atu a dunia hino ambao hivi sambu anaweza kuamba "Ndiyo," na badaye aambe "Sivyo."

¹⁸Kama Mlungu arivyo muaminifu, ujumbe wehu kpwenu tauyakala wa "Ndiyo," na "Sivyo," ela ni wa kuaminika.

¹⁹Kpwa mana Jesu Masihi, ambaye ni Mwana wa Mlungu, na ambaye mimi, Timothy na Sila hwamhubiri kpwenu, siye wa "Ndiyo," na "Sivyo," ela siku zosi iye ni wa "Ndiyo."

²⁰Mana ahadi zosi ambazo Mlungu walaga ni za "Ndiyo" kpwa sababu ya arigohenda Jesu. Ndipho naswi kpwa kuungana naye hukuamba, "Amina" ili Mlungu atogolwe.

²¹Mlungu mwenye ndiye ahuphaye sisi na mwimwi uwezo wa kudina chilume kpwa kuungana na Jesu. Iye ndiye ariyehutsambula,

²²achihutiya mola kuonyesa kala hu akpwe, na achitiya Rohowe mwehu mioyoni dza rubuni kuhakikishirwa gara ndigokpwedza.

²³Phahi sababu kulu ambayo yanihenda nisiuye Korintho ni kukala simendze kukutiyani wasi-wasi zaidi, hata Mlungu ni shahidi wangu.

²⁴Lakini tahulonda kutawala imani zenu, ela hunahenda kazi na mwimwi ili muoneto. Mana hunamanya mwadina chilume kumkuluphira Jesu.

2 Akorintho 2

¹Phahi nákata shauri mi mwenye nchiona baha nsedze nikakusononesani tsona.

²Mana nchikusononesani, takuna atu anjina awezao kunihenda nioneto, siphokala mwimwi ambao n'ndakala nkakukoserani.

³Ndiyo mana nákuandikirani hira baruwa, kala simendze nisononeswe ni atu ambao ndio angenihenda nioneto. Mana nina hakika kala mimi nchionato, phahi hata mwimwi namwi mndaonato phamwenga nami.

⁴Simendzere kukusononesani kpwa baruwa hiyo ambayo nákuandikirani na tabu sana, sonono ya moyo, tsona na matsozi manji. Ela nálonda mmanye vira ninavyozidi kukumendzani.

⁵Sambi ichikala mutu yeyesi wasononesha myawe, kayanihendera mimi, ela wakuphenderani mwimwi mosi kpwa chiasi fulani, nami simendze kuikira uzito zaidi dzambo hiri.

⁶Phahi vivyo ambavyo anji enu andemurira, vinatosha.

⁷Ela inafwaha mumsamehe na kumphoza roho ili asisononeke zaidi na kukata tamaa kamare.

⁸Kpwa hivyo nakuvoyani mumuonyese kala bado mnammendza kpweli.

⁹Nákuandikirani baruwa hiyo kpwa lengo ra kumanya kpwa hakika ichikala mnaniogopha kpwa chila chitu.

¹⁰Mchisamehe mutu yeyesi, nami piya n'ndamsamehe. Na hira dambi ambayo n'ndamsamehe, ichikala kpwakala na dambi ya kusamehe, nami n'ndamsamehe mbere ya Jesu kpwa fwaida yenu.

¹¹Hwahenda hivyo ili Shetani asedze akahushinda kpwa werevu, mana hunamanyato uyi wa mipangoye.

¹²Phahi nriphofika mudzi wa Tirowa ili nikatangaze habari ndzuri kuhusu Jesu, Mlungu achinipha nafwasi ndzuri sana ya kuhenda hivyo.

¹³Ela kala nina wasi-wasi kpwa sababu ya mwenehu Tito, ambaye kala kadzangbwefika. Hipho nálaga nchiuka kuphiya jimbo ra Makedonia.

¹⁴Lakini nahumshukuruni Mlungu ambaye chila wakati anahulongoza kusherekea ushindi wa Jesu. Mlungu nkhumira sisi kueneza chila phahali marifwa kuhusu Jesu dza mafuha ga kunukato.

¹⁵Sisi kpwa Mlungu ni dza harufu nono ya Jesu inayoenea kahi za atu anaookolwa na atu anaorangamika.

¹⁶Kpwa atu anaookoka, hunanuka harufu nono irehayo uzima, lakini kpwa atu anaorangamika, sisi hunanuka lov'u ririhar'o chifo. Ela ni ani awezaye kushiriki mambo higo? Takuna hata mmwenga!

¹⁷Mana tahutangaza ujumbe wa Mlungu ili huphahe pesa, kama atu anjina ahendavyo. Lakini hunagomba moyo kutsuka mbere za Mlungu, naswi hunagomba kpwa uwezo huriohewa ni Jesu kama atu ariohumwa kula kpwa Mlungu.

2 Akorintho 3

¹Dze mnaona kala hukaandza tsona kudzitogola? Tahudzitogola. Sino si dza atu anjina anaokureherani baruwa za kudzimanyisa kpwenu ama avoyao baruwa kula kpwenu kuhumanyisa kpwa atu anjina.

²Mwimwi mu dza baruwa yehu, ambayo yaandikpwa mwehu mioyoni, nayo inasomwa na kumanywa ni chila mutu.

³I wazi kala mwimwi mu dza baruwa yoandikpwa ni Jesu ambayo ni matokeo ga kazi yehu huriyokureherani. Baruwa hiyo taiyaandikpwa na wino, ela na Roho wa Mlungu ariye moyo. Tsona baruwa hiyo taiyaandikpwa dziweni, ela ndani ya mioyo ya atu.

⁴Sisi huna hakika ya mambo higo mbere za Mlungu kpwa sababu ya Jesu.

⁵Si kukala hunaweza kuhenda chochosi na uwezo wehu enye, ela hunaadamira uwezo kula kpwa Mlungu.

⁶Iye ndiye ariyehupha uwezo wa kukala atumishi a lagano dziphya, ambaro chandzoche si shariya ya kuandikpwa, ela chandzoche ni Roho wa Mlungu. Shariya za kuandikpwa nkureha chifo, lakini Roho nkureha uzima.

⁷Shariya za Musa zoandikpwa dzulu ya mawe zakala na utukufu wa Mlungu. Kpwa sababu hiyo Aiziraeli taayaweza kulola uso wa Musa, mana usowe kala unang'ala, dzagbwe kung'alakpwe kala ni kpwa muda tu. Ichikala kazi hiyo ambayo nkusababisha chifo yakpwedza na utukufu,

⁸kpwa kpweli kazi ya Roho wa Mlungu irehayo uhai indakala na utukufu munji zaidi.

⁹Ichikala kazi ya Shariya za Musa ambayo ni kuhukumu atu yakala na utukufu, kpwa kpweli kazi hiyo ambayo inaapha atu haki mbere za Mlungu indakala na utukufu munji zaidi.

¹⁰Mana utukufu wa lagano ra kare tauweza kulenganishwa na utukufu wa lagano dziphya hata chidide.

¹¹Ichikala lagano ra kare ambaro rinaphunguka, rakpwedza na utukufu, dze si zaidi sana nyo utukufu wa lagano dziphya ambaro rinadumu milele?

¹²Kpwa hivyo huna ushujaa kpwa sababu huna hakika kuhusu hiri lagano dziphya.

¹³Sino si dza Musa ambaye wafwinika usowe na chitambara ili Aiziraeli asiuone kung'alakpwe ambako kala kunaphunguka.

¹⁴Achili za hinyo atu zafungbwa, na hata sambu lagano ra kare richisomwa, achili zao bado zikafwinikpwa. Hizo achili zao tazidzangbwefwenulwa kpwa mana zinaweza kufwenulwa tu kpwa kumkuluphira Jesu.

¹⁵Hata sambu wakati atu achisoma Maandiko ga Musa, achili zao zichere kufwinikpwa.

¹⁶Lakini mutu amgalukirapho Bwana, achilize nkufwenulwa.

¹⁷Phahi hiri neno, "Bwana" rina mana ya Roho wa Mlungu. Naye Roho wa Mlungu nkupha atu uhuru.

¹⁸Kpwa hivyo sisi hosi ambao nyuso zehu zafwenulwa, hukueneza nguma ya Bwana dza nuru ya chilolo ili ionewe ni anjina. Na Bwana ambaye ni Roho, anahugaluzwa huigane naye, huphahe kueneza ngumaye zaidi na zaidi.

2 Akorintho 4

¹Phahi tahukata tamaa kpwa sababu Mlungu wahupha kazi hino kpwa mbazize.

²Ela hwaricha mahendo gosi ga siri siri na waibu, na tahulunga mambo ga handzo wala kugaluzwa ukpweli wa mafundzo ga Mlungu. Badalaye hunatangaza ukpweli mbere za Mlungu, na atu amendzao ukpweli anahumanya kukala hu aminifu.

³Na ichikala ni kpweli hiyo habari ndzuri huitangazayo yafwitsika isieleweke kpwa atu o osi, phahi yafwitsika kpwa atu aangamikao.

⁴Naye Shetani, ambaye ni mlungu wa handzo wa dunia hino, watiya jiza achili za atu hinyo asiomkuluphira Jesu, ili asiweze kuona mwangaza wa hiyo habari ndzuri ambao unaang'arira. Piya taaelewa gara hunagohubiri kuhusu utukufu wa Jesu, ambaye ni mfwano haswa wa Mlungu.

⁵Tahudzitangazira si enye, hata! Ela hunatangaza kuhusu Jesu Masihi ambaye ni Bwana, naswi hu atumishi enu kpwa sababuye.

⁶Mana Mlungu ndiye ariyamba, "Mwanga naung'ale kula jizani." Na hinyo mwangawe wauhenda ung'ale mwehu mioyoni ili huphahe mwanga wa kuelewa utukufuwe unaong'ala usoni pha Jesu.

⁷Kpwa hivyo sisi huna amana hiyo ya chiroho ndani ya vyombo vya ulongo, yani miri yehu, kuonyesa kukala hinyo uwezo mkpwulu ula kpwa Mlungu, sio kpwehu sisi.

⁸Tabu zikahuzunguluka chila uphande, lakini tahushindwa tse. Mara nyinji tahumanya ra kuhenda, lakini tahukata tamaa.

⁹Hunateswa, lakini Mlungu kahuricha machiyehu. Hunalumizwa vibaya, lakini tahuangamizwa.

¹⁰Kpwa kugayiswa kpwehu hukushiriki chifo cha Jesu mwehu mirini, ili uhai wa Jesu piya uonekane mirini mwehu.

¹¹Mana sisi hurio moyo hukuishi maisha ga hatari ya chifo kpwa kumhumikira Jesu ili maisha ga Jesu gaonekane wazi ndani ya miri yehu ifwayo.

¹²Kpwa hivyo sisi hunaishi na hatari ya chifo, lakini mwimwi mnaphaha uzima wa milele.

¹³Maandiko ganaamba, "Náamini kpwa hivyo nágomba." Phahi naswi piya huna kuluphiro dza riro, ndiyo mana hunaenderera kugomba.

¹⁴Kpwa mana hunamanya kala Mlungu ariyemfufula Bwana Jesu, andahufufula sisi piya, na andahureha mbereze phamwenga namwi.

¹⁵Higa gosi ni kpwa fwaida yenu, ili mbazi za Mlungu zinaphozidi kufikira atu anji zaidi na zaidi, nao andalavya shukurani zaidi za kumtogola Mlungu.

¹⁶Kpwa hivyo tahukata tamaa. Miri yehu inatsakala na kuphunguka nguvu, lakini roho zehu, zinahendwa nyipha chila siku.

¹⁷Mana tabu zehu chache hunazophaha kpwa muda zinahurehera nguma ya milele inayoshinda tabu hizo zosi.

¹⁸Kpwa hivyo tahuika maazo gehu kpwa vitu vinavyoonekana, ela hukuika maazo gehu kpwa vira visivyoonekana. Mana vitu vinavyoonekana ni vya muda, ela visivyoonekana ni vya milele.

2 Akorintho 5

¹Mana hunamanya kukala vibanda hivi huishimo hipha duniani, yani miri yehu, vichibanangbwa, sisi hundakala na nyumba zanjina kula kpwa Mlungu, yani miri mipha. Nyumba hizo zindadumu milele hiko mlunguni mana tazidzengbwa ni anadamu.

²Hipha sambu sino hunaula hofwi huchiaza kpwa hamu kulu kuvwikpwa nyumba zehu za mlunguni.

³Na hunaaza kuvwikpwa hivyo kpwa sababu tahundakala chitsaha, ela roho zehu zindakala na miri hiyo.

⁴Kpwa mana wakati bado hucheresagala ndani ya vibanda vya hipha duniani, hunapiga hofwi kpwa kuremererwa sana. Si kukala hunalonda kuricha vibanda vyehu ambavyo nkubanangika, hata. Hulondaro ni husagale ndani ya nyumba zisizobanangika ili vira vibanangikavyo vimizwe tse ni uzima wa milele.

⁵Mlungu mwenye ndiye ariyehumba kpwa lengo hiro, na achiupha Rohowe kama rubuni ili kuhuhakikishira higo ndigokpwedza.

⁶Kpwa hivyo huna ushujaa munji wakati wosi hata dzagbwe hunamanya wakati hunaphosagala ndani ya miri hino, hukukala kure na Bwana.

⁷Mana hukuishi kpwa kuluphiro, siyo kpwa kulunga gara huonago.

⁸Phahi huna ushujaa munji na hamu kulu ya kuricha kusagala na miri ihi ili huphiye hukasagale na Bwana.

⁹Kpwa hivyo hunalenga kuhenda mambo ga kumhamira Mlungu, hukale huchere hipha ndani ya miri ihi au hiko na Bwana.

¹⁰Kpwa mana sisi hosi hundaima mbere za Jesu ili huhukumiwe. Naye chila mmwenga andariphiwa kulengana na mambo arigohenda wakati phokala asegere hipha duniani, gakale ni manono au mai.

- ¹¹Hunamanya kala Mlungu andahukumu atu osi, kpwa hivyo hunahenda bidii kuabembeleza atu amkuluphire. Mlungu mwenye anahumanya vinono, na anamanya huhendaro; nami naaza kala mwimwi namwi mnamanya huhendaro.
- ¹²Tahudzitogola tsona mbere zenu, hata. Ela hunalonda kukuphani nafwasi mhende ngulu kpwa sababu yehu, ili muweze kujibu apindzani ehu ambao anahendera ngulu mambo ganagoonekana tu kuriko mambo ga moyoni.
- ¹³Ichikala atu anahuona kama hu atu a koma si chitu kpwehu, mana hunamhumikira Mlungu. Na ichikala atu anahuona kama hu atu azima, phahi ni kpwa fwaida yenu.
- ¹⁴Hunahenda higa kpwa sababu hunalongozwa ni vyo Jesu ahumendzavyo. Hiyo mendzwaye inahulongoza kpwa sababu hunaamini kukala mutu mmwenga wafwerera atu osi, phahi atu osi afwa.
- ¹⁵Tsona wafwerera atu osi ili atu azima asiishi kpwa fwaida yao enye, ela aishi kumhumikira hiye ariyefwa na kufufulwa kpwa fwaida yao.
- ¹⁶Phahi hangu sambu tahupima mutu kama vira atu a dunia ahendavyo. Hata dzagbwe sisi piya hipho mwandzo hwampima Jesu dza atu a dunia amuonavyo, lakini sambu tahumpima hivyo tsona.
- ¹⁷Kpwa mana mutu achiungana na Jesu, iye akakala chiumbe chiphya. Mana higo mambo ge ga kare gakasira na lola, mambo maphya gakedza.
- ¹⁸Higo gosi gala kpwa Mlungu ambaye wamhuma Jesu kpwedzahupatanisha na ye mwenye. Piya achiupha kazi ya kulongoza atu anjina apatanishwe na Mlungu.
- ¹⁹Yani kpwa sababu ya arigohenda Jesu, Mlungu kala anapatanisha anadamu na ye mwenye, bila ya kutala dambi zao. Naye achiupha ujumbe unaohusu kupatanishwa na Mlungu.
- ²⁰Mana sisi hu ahumwa ambao hukuwakilisha Jesu kama avi Mlungu mwenye anakuvoyani kpwa kutsupira sisi. Kpwa hivyo hunakuvoyani kpwa uwezo huriohewa ni Jesu, mpatanishwe na Mlungu.
- ²¹Jesu kayahenda dambi hata chidide! Lakini Mlungu wamhenda avi kala ana dambi, ili kpwa kuungana naye ariphofwa huphahe kukala na haki ya Mlungu.

2 Akorintho 6

- ¹Phahi sisi atu huhendao kazi phamwenga na Mlungu, hunavoya kukala zo mbazi na mendzwa hurizophokera kula kpwa Mlungu zisikale za bure.
- ²Kpwa mana Mlungu anaamba, "Wakati uriofwaha, nákusikiza, na siku ya kuokoka nchikuterya." Phahi, uhu ndio wakati unaofwaha, na rero ndiyo siku ya kuokoka!

- ³Tahuhenda cho chosi chinachosababisha kazi yehu ilaumiwe. Kpwa hivyo hunahenda bidii husikale vikpwazo kpwa mutu yeyesi.
- ⁴Ela kpwa chila njira hunaonyesa kukala hu atumishi kpweli a Mlungu. Mana hunavumirira sana mateso, tabu na wakati mgumu.
- ⁵Sino hwapigbwa, hwafungbwa jela, hwalaphizwa ni makundi ga atu ariokala akareya. Hwahenda kazi ngumu, hwachesa usiku kucha, na huchikala na ndzala.
- ⁶Tsona hunaonyesa kukala hu atumishi a Mlungu kpwa usafi wa moyo, kukala na maarifwa, kuvumirira sana, kuonyesa mbazi, kulongozwa ni Roho wa Mlungu, na kpwa mendzwa ya kpweli isiyo na unafiki.
- ⁷Hukugomba ujumbe wa kpweli na kuhenda gosi kpwa nguvu za Mlungu. Hukugbwiririra silaha yehu ya haki uphande wa kulume na wa kumotso.
- ⁸Atu anjina nkuhuishimu lakini anjina nkuhuzarau. Anjina nkuhuhadza kpwa manono lakini anjina nkuhuhadza na mai. Nkuhuona hunachenga, ela sino hu aaminifu.
- ⁹Atu anjina nkuhumanya na kuhukubali, lakini anjina nkuhuhenda avi taahumanya. Huchere azima, lakini anjina nkuhuona avi hunafwa. Anjina nkuhutiya adabu, lakini tahufwa.
- ¹⁰Hunasononeka, lakini huna raha chila wakati. Hu achiya, lakini hunatajirisha atu chiroho. Hunaonekana tahuna chitu, ela huna vyosi.
- ¹¹Enehu Akorintho, hwagomba namwi wazi-wazi, tsona hwakumendzani mioyo kutsuka.
- ¹²Mendzwa yehu kpwenu taina chizuwizi, lakini mwimwi mnazuwiya mendzwa yenu kpwehu.
- ¹³Phahi nagomba namwi kama anangu, nakuambirani, mvugule mioyo yenu kpwehu dza sisi hunavyohenda kpwenu.
- ¹⁴Msigbwirane na atu asiomkuluphira Jesu. Mana kuna uhusiano wani kahi ya mutu wa haki na mutu mui? Tsona kuna uhusiano wani kahi ya mwanga na jiza? Takuna!
- ¹⁵Jesu anawezadze kuelewana na Beliari? Na mutu ambaye anamkuluphira Jesu ana uhusiano wani na mutu asiyemkuluphira?
- ¹⁶Sanamu zina uhusiano wani na phatu pha kuvoya Mlungu? Mana sisi ndio phatu phatakatifu photengbwa kuvoya Mlungu ariye moyo. Kama Mlungu arivyoamba: "N'ndaishi nao na kunyendeka phamwenga nao. N'ndakala Mlungu wao, nao andakala atu angu."
- ¹⁷Piya Mlungu anaamba, "Kpwa hivyo tulukani kahi yao, tsona mdzitenge nao. Msigute chochosi ambacho ni najisi, ndipho n'ndakuphokerani vinono."

¹⁸Tsona iye Mlungu wa uwezo wosi anaamba, "Mimi n'ndakala sowe yenu, namwi mndakala anangu, alume na achetu."

2 Akorintho 7

¹Enehu, Mlungu wahuikira hizi ahadi. Kpwa hivyo nahudzitakase na chochosi chinachochafuwa mwiri na roho. Tsona nahukaleni bila lawama kpwa kumuogopa Mlungu maishani mwehu.

²Vugulani mioyo yenu ili muweze kuumenda. Tahudzangbwemkosera mutu, kumlongoza mutu vibaya, wala kumchenga mutu yeyesi kpwa fwaida yehu.

³Sigomba hivyo kpwa kukuhukumuni, hata chidide! Mino nákuambirani kare kala hunakumenzani sana kufwa kupona.

⁴Nakuaminini kabisa kabisa, tsona nina ngulu kpwa sababu yenu. Dzagbwe hwakala na tabu chila phahali, ela nikatiywa moyo sana nami nina raha ya kutsapa mphaka.

⁵Mana huriphofika Makedonia, tahuyaphaha amani ama nafwasi ya kuoya. Hwakala na tabu chila phahali. Kondze ya kundi ra atu a Mlungu kpwakala na malumbano, na mwehu mioyoni kala hunayugbwa ni wuoga.

⁶Lakini Mlungu ambaye nkutiya moyo hara ambao akavundzika mioyo, wahutiya moyo sisi kpwa kumreha Tito kpwehu.

⁷Ela si kpwa kutsoloka kpwa Tito bahi, piya hwatiywa moyo kpwa jinsi mwimwi mrivyomtiya moyo wakati mriphomkaribisha. Tito wahueleza mnavyoaza kuniona, vira mrivyo na sonono kpwa sababu ya makosa genu na vira mnavyolonda kuniterya. Nriphosikira hivyo, náhererwa sana.

⁸Hata ichikala baruwa nriyokuandikirani hipho kare yakusononesani, mino siona sababu ya kujuta. Mwandzo kala ninajuta kpwa sababu námanya baruwa hiyo yakusononesani chidide, lakini yakala ni kpwa muda tu.

⁹Lakini hivi sambu nahererwa, si kpwa sababu mwasononeswa, hata, ela ni kpwa sababu sonono zenu zakuhendani mtubu na mchimuuuira Mlungu. Mana mwasononeka kulengana na mpango wa Mlungu ili msiphahe hasara yoyosi kpwa sababu ya mahendo gehu.

¹⁰Mana sonono yedzayo kpwa mendzwa ya Mlungu nkuhenda atu akauyira Mlungu ili aphahe kuokoka, nao nkuhendwa asikale na majuto. Lakini sonono ya himu duniani nkureha chifo.

¹¹Hebu lolani fwaida mrizophaha kpwa sababu ya sonono ihamirayo Mlungu. Wakuhendani mkale atu a bidii, a juhudi ya kudzikanira, a kurema kamare machafu, a kuogopa Mlungu, a kuaza kuniona, a kudzilavya kpwa mendzwa ya atu anjina, na a kukala tayari kuona haki inahendeka. Na kpwa chila njira mkaonyesa kukala tamuna makosa katika dzambo hiro chirobishwa.

¹²Phahi siyakuandikirani baruwa hiyo kpwa sababu ya hiye ariyehenda makosa au hiye ariyekoserwa, hata. Nákuandikirani ili mwi enye muone mbere za Mlungu vira mrivyo na bidii ya kuhuterya.

¹³Na kpwa sababu hiyo, sisi hwatiywa moyo. Phahi, zaidi ya kutiywa moyo, hwaonato sana huriphosikira vira mrivyomhenda Tito ahererwe kpwa kumuusira wasi-wasiwe ariokala nao.

¹⁴Mana nákutogolani mbereze, namwi tamuyanitiya waibu. Hwakuambirani kpweli mara nyinji. Vivyo hivyo vira hurivyokutogolani mbere za Tito piya vyakala kpweli.

¹⁵Naye anazidi kukumendzani chila anaphotambukira vira mrivyomuogopa na kumphokera kpwa wuoga na ishima.

¹⁶Ninahererwa sana kpwa sababu naweza kukuadamirani kpwa mambo gosi.

2 Akorintho 8

¹Enehu, sambu nalonda nikuambireni vira Mlungu arivyoajaliya na mioyo ya mbazi makundi ga afuasi a Jesu hiko Makedonia.

²Hata dzagbwe kala ni achiya sana na kujaribiwa na tabu tafwauti tafwauti, bado avugula mioyo yao kpwa kuhererwa ili aterye atu anjina.

³Mana nashuhudiya kukala alavya kpwa kadiri ya uwezo wao na hata zaidi bila ya kulazimishwa.

⁴Piya avoya sana sisi hukubali kuapha ruhusa ya kushiriki kazi ihi ili aphahe kuterya atu a Mlungu.

⁵Na ahenda hata zaidi ya vira vyofikiriya sisi. Kpwandza adzitolea o enye kpwa Mlungu, chisha achidzitolea kpwehu sisi viratu Mlungu amendzavyo.

⁶Phahi hwamsisitiza Tito, ambaye ndiye ariyeandza kazi hino, edze akutiye ni moyo mmarigize hendo hiro ra mendzwa ya kuterya atu.

⁷Mwimwi mu mbere kpwa mambo gosi. Mna imani, uwezo wa kuelewana, marifwa, bidii yosi ya kuhenda manono, tsona mnahumendza. Kpwa hivyo hunakuvoyani mkale mbere kpwa kulavya ili muonyese mnavyomendza ayawenu.

⁸Sio kala ati nakulagizani kulavya, hata! Ela nataka nipime ukpweli wa mendzwa yenu kpwa kuulinganisha bidii ya makundi ga afuasi ayawenu arivyo.

⁹Mana mnamanya mbazi za Bwana wehu Jesu Masihi. Hata dzagbwe kala ni tajiri, ela waricha utajiri wosi na achikala mchiya kpwa ajili yenu, ili kpwa kutsapira uchiyawe, mwimwi mphahe kukala matajiri.

¹⁰Tambukirani mwaka dzana mwakala a mwandzo kuaza kulavya msada, tsona mwakala a kpwandza kuhenda hivyo. Kpwa hivyo nakushaurini,

- ¹¹marigizani kazi yenu ya kulavya kpwa hamu kulu kama mrivyoandza. Tsona lavyani kulengana na uwezo mrio nao.
- ¹²Mana mutu achilonda kulavya, vinono naalavye kpwa chiasi aricho nacho. Naye Mlungu andaphokera msadawe kpwa chiasi aricho nacho na si kpwa chiasi ambacho kana.
- ¹³Lengo rehu siro kukala anjina aphahe raha wakati mwimwi mnatsukuzwa mizigo, ela ni kukale na usawa.
- ¹⁴Kpwa hivi sambu vira vinji mrivyo navyo vindatosheleza upungufu wao ili wakati wanjina vira vinji arivyo navyo vindatosheleza upungufu wenu. Ndipho hipho phandakala na usawa.
- ¹⁵Kama Maandiko gaambavyo, "Yuya ariyekusanya vinji, kayakala na masaza, na yuya ariyekusanya vichache, kayaphungukirwa."
- ¹⁶Namshukuru Mlungu ariyemupha Tito moyo wa kukujalini dza vivyo nrivyo mimi.
- ¹⁷Huriphomsisitiza edze kpwenu, wakubali moyo kutsuka, tsona ye mwenye kala anaaza sana kpwedza ko kpwenu.
- ¹⁸Naswi hunamhuma phamwenga na mfuasi wa Jesu ambaye anatogolwa sana ni makundi gosi ga afuasi kpwa kazize za kueneza habari ndzuri kuhusu Jesu Muokoli.
- ¹⁹Zaidi ya higo mfuasi hiye watsambulwa ni makundi ga afuasi kuphiya naswi ndiphophirika msada hinyo hiko Jerusalem. Na kpwa njira hiyo ya kuimirira msada hinyo, hunareha nguma kpwa Bwana Jesu na kuonyesa bidii zehu za kuterya anjina.
- ²⁰Tahumendze kulaumiwa ni mutu yeyesi kuhusu vira hunavyoimirira hinyo msada mkpwulu.
- ²¹Mana lengo rehu ni kukala na bidii ya kuhenda haki mbere za Mlungu na mbere za anadamu piya.
- ²²Zaidi ya Tito na hiye myawe, hunaahuma na mfuasi wanjina wa Jesu ambaye hwampima mara nyinji na huchimuona kukala ana hamu kulu ya kuhenda manono. Mana vivi anahenda bidii zaidi kpwa sababu ya kuluphiro kulu arironaro kpwenu.
- ²³Naye Tito ni mhendadzi-kazi myangu anayehenda kazi phamwenga nami kpwa fwaida yenu. Na hinya afuasi anjina airi anawakilisha makundi ga afuasi, nao anamrehera nguma Jesu.
- ²⁴Kpwa hivyo, aonyeseni mendzwa yenu ili makundi gosi ga afuasi gaone sababu za madzivuno gehu kpwenu.

2 Akorintho 9

¹Takuna haja ya mimi kukuandikirani baruwa kuhusu msada unaolaviwa kpwa ajili ya atu a Mlungu hiko Jerusalem.

²Mana namanya kukala mna moyo wa kuterya ayawenu, na mimi nádzivuna mbere za atu a Jimbo ra Makedonia, nchiamba kala mwimwi atu a Jimbo ra Akaya mwakala tayari kuterya hangu mwaka dzana. Na hiyo hamu kulu ya kuterya yaahenda anji ao hiko Makedonia akale tayari kuhenda dza vivyo.

³Ndiyo mana naahuma hinya enehu ili ahakikishe kala madzivuno gehu kpweni kuhusu dzambo hiro gasikale ga maneno mahuphu, ela mkale tayari kama nrivyogomba kukala mu tayari kuterya.

⁴Mana nchedza na afuasi anjina kula Makedonia, na huchikuta tamdzangbwekala tayari, mndahugbwiza waibu kpwa sababu hwakuaminini bure huchiona mndakala tayari. Na hata mwimwi mndaona waibu piya.

⁵Kpwa hivyo náona ni muhimu nihimize hinya enehu anitanguliye kpwedza hiko kpweni ili aike tayari zawadi yenu mriyoahidi. Hino indaonyesa kukala mnalavya kpwa kumendza kpweni na si kpwa kushurutishwa.

⁶N'lazima mmanye kala mkurima achikumbira mbeyu chache, andaphaha mavuno machache, na achikumbira mbeyu nyinji, andaphaha mavuno manji.

⁷Chila mmwenga naalavye chira arichopanga kulavya mwakpwe moyoni. Msilavye kpwa kusita-sita wala kushurutishwa, mana Mlungu anamendza mutu alavyaye kpwa kuhererwa.

⁸Naye anaweza kukujaliyani na baraka nyinji zaidi ya maitaji genu, ili chila wakati mkale na vya kulavya bila chizuwizi kpwa chila kazi nono.

⁹Kama Maandiko ganavyoamba: "Iye nkulavya, akaapha achiya, naye mahendoge ga haki gandaenderera milele."

¹⁰Mlungu ndiye amuphaye mkurima mbeyu na kuapha atu chakurya. Vivyo hivyo Mlungu andakuphani mbeyu, naye andazihenda zizidi na kukuphani mavuno manji ga haki kpwa kulavya kpweni kpwa mbazi.

¹¹Iye andakuhendani mkale matajiri kpwa chila dzambo ili muenderere kulavya bila choyo. Na kpwa njira hiyo atu anji andamshukuru Mlungu kpwa sababu ya msada wenu ndiophaha kutsupira sisi.

¹²Kpwa mana hino kazi mhendayo siyo tu kutimiza maitaji ga atu a Mlungu hiko Jerusalem. Piya indahenda atu anji amshukuru sana Mlungu kpwa kuhererwa.

¹³Tsona kazi yenu inaonyesa kukala mwimwi mu atumishi kpweli a Mlungu. Na kpwa sababu hiyo atu anji andamtogola Mlungu kpwa vira mndakala mkalunga mafundzo kuhusu Jesu Muokoli ambago mwagakubali. Piya andamtogola kpwa vira mndakala mkalavya bila choyo kpwa na kpwa atu anjina.

¹⁴Phahi andakuvoyerani kpwa mendzwa nyinji kpwa sababu ya mbazi za ajabu mrizoajaliwa ni Mlungu.

¹⁵Humshukuruni Mlungu kpwa sababu ya zawadiye ambayo tahuweza kuieleza kpwa maneno bahi.

2 Akorintho 10

¹Mimi Paulo, niambwaye ni mpole ninaphokala phamwenga namwi, ela ni kukala msiru ninaphokala kure namwi. Nakuvoyani kpwa upole na unyenyekevu wa Jesu, mnisikize.

²Nakuvoyani msinihende nkedza nikakala msiru sana kama ninavyotarajiya. Mana kuko kpwenu kuna atu aonao kukala, hunalunga mambo ga chidunia.

³Hata dzagbwe hunaishi hipha duniani, tahupigana viha dza vira atu a chidunia anavyopigana.

⁴Silaha zehu sizo dza za himu duniani, ela zina nguvu kula kpwa Mlungu za kuweza kuvundza ngome za Shetani.

⁵Hukubananga maazo ga handzo na chila aina ya chikpwazo chinachohendesha atu asimanye Mlungu. Tsona hukuchunguza kpwa undani chila wazo rehu ili humuogophe Jesu katika maazo gehu gosi.

⁶Na bada ya kuona kala kuogopha kpwenu kukakamilika, hu tayari kuatiya adabu atu asiomuogopha Jesu kpwa njira yoyosi.

⁷Mwimwi mkulola mambo ga kondze tu. Ichikala kuna yeyesi anayedziona kukala ni wa Jesu, naamanye kukala hata sisi piya hu a Jesu.

⁸Mlungu wahupha uwezo, na uwezo uho ni wa kukuphezani chiroho ela sio wa kukuvomolani. Na hata nkadzikarya kuhusu hinyo uwezo wangu, uho taundanitiya waibu.

⁹Piya sitaki yoonekane kukala nakutishirani na baruwa zangu.

¹⁰Mana anjina anaamba, "Baruwa za Paulo ni ndziho na ngumu, lakini ye mwenye ni mnyonje anaphokala phamwenga naswi, na manenoge ni kuzarauliwa kpwa sababu tagana samani."

¹¹Atu hinyo naamanye kukala, gara niambago katika baruwa zangu ninaphokala kure, ndigo ndigohenda kpwa nguvu wakati ndiphokpwedza ko kpwenu.

¹²Tahulonda kudzilinganisha wala kudziika phamwenga na hara atu anaodzikarya enye. Mmanyeye kukala anaphodzipima kpwa kudziona ana samani, na kudzilinganisha enye kpwa enye, anaonyesa uzuzu wao.

¹³Lakini tahundadzikarya kutsupa chiasi. Ela kudzikarya kpwehu kundakala tu kpwa kazi huriyojaliwa ni Mlungu, kazi zinazokufikirani hata ko kpwenu.

¹⁴Ichikala kpweli tahufikire kpwenu kureha kazi zehu, hungékala hwavuka miphaka. Lakini si hivyo! Sisi hwafika kpwenu kpwa kukureherani habari ndzuri kuhusu Jesu ariyehukola.

¹⁵Wala tahutsupa chiasi kpwa kudzikarya kuhusu kazi yohendwa ni atu anjina. Hunakuluphira kukala kazi zehu kpwenu zindaenderera kupanuka kulengana na vira kuluphiro renu rinavyokula.

¹⁶Hivyo hundaweza kutangaza habari ndzuri kuhusu Jesu seemu zanjina kondze ya seemu yenu, bila kuhendera ngulu kazi ambayo tayari ikahendwa ni mutu wanjina.

¹⁷Dza Maandiko ganavyoamba, "Anayedzikarya naadzikarye kpwa gara ahenderwago ni Mlungu."

¹⁸Mana anayekubalika kukala ni mnono siye yuya anayedzitogola mwenye, ela ni yuya anayetogolwa ni Mlungu.

2 Akorintho 11

¹Naaza mnivumirire nchigomba upumbavu chidide. Namwi kpweli mnanivumirira.

²Nakuonerani wivu dza Mlungu anavyokuonerani wivu. Nákuahidini mlume mmwenga ambaye ni Jesu, ili nikuphirikeni mbereze dza mwanamwali ariyeposwa kulólwa ni hiye.

³Lakini nina wasi-wasi kpwa kukala, dza viratu Hawa arivyochengbwa ni ulachu wa Shetani, vivyo hivyo mndachengbwa maazo genu kusudi mriche mendzwa yenu ya kpweli na usafi wa moyo kpwa Jesu.

⁴Mana mu rahisi kukubali mutu yeyesi edzaye kpwenu kutangaza Jesu ambaye ni tafwauti na yuya huriyetangaza, au kuphokera roho tafwauti na Roho mriyephokera au piya habari tafwauti na hiyo habari ndzuri kuhusu Jesu mriyephokera kula kpwehu.

⁵Ninamanya kala mimi si mdide kuriko hinyo, "mitume akulu" a kpwenu, hata chidide.

⁶Hata ichikala mino si fundi wa kubisha vinono, marifwa ninago. Higa hwakumanyisani wakati wosi katika hali zosi.

⁷Dze, náhenda dambi kudzinyenyekeza ili nikuunuleni nriphotangaza neno ra Mlungu bila maripho?

⁸Náphokera misada kula kpwa makundi ga afuasi anjina ili nikuhumikireni mwimwi. Ni dzavi náaiyira ayawenu nikuteryeni.

⁹Na nriphokala phamwenga namwi na kuphungukirwa, siyakuhikani mizigo, mana kuphungukirwa kpwangu kpwauswa ni afuasi kula Makedonia. Kpwa hivyo siyakala mzigo kwenu, na sindakala hivyo tse.

¹⁰Dza viratu ninavyosemurira ukpweli dzulu ya Jesu Muokoli chila wakati, naahidi kukala takuna mutu kahi ya tsi ya Giriki anayeweza kunizuwiya kudzikarya kuhusu higo.

¹¹Kpwa hivyo, nkurema kukala mzigo kwenu kpwa utu wani? Kpwa sababu sikumendzeni? Hata! Mlungu anamanya nakumendzani.

¹²Nami n'ndaenderera kuhenda nihendago ili niangamize hara "mitume" anjina anaendza nafwasi ya kotalwa sawa na sisi kpwa mambo anagodzikarya nago.

¹³Atu hinyo ni mitume a handzo, anaochenga atu na kudzigaluzwa ili atalwe dza mitume kweli a Jesu.

¹⁴Na higa si ajabu! Amba Shetani piya naye anaweza kudzigaluzwa akaonekana dza malaika wa nuru!

¹⁵Kpwa hivyo siro dzambo kulu atumishie kudzigaluzwa akakala dza atu a haki. Mwishowe andatiywa adabu kulengana na gara arigohenda.

¹⁶Nauyira kukala mutu asinione mimi ni mpumbavu. Lakini ichikala ananiona ni mpumbavu, anisikize dza mpumbavu ili nidzikarye chidide.

¹⁷Gaga nidzikaryago nago bila wasi-wasi hivi sambi ni ga chipumbavu, si kama Bwana Jesu agombavyo.

¹⁸Kpwa vira atu anji anavyodzikarya kpwa vitu vya chibinadamu, phahi piya nami n'ndadzikarya.

¹⁹Mwimwi mkufikiriya mna ikima sana, lakini mkuvumirira atu apumbavu kpwa kuhererwa!

²⁰Kpwa kweli mkuvumirira mutu yeyesi anayekuhendani atumwa, anayekuzulumuni, anayekuhegani, anayekuberani, hata anayekuwangani makofi.

²¹Nichigomba kpwa kuchania tu, naona waibu kpwa sababu sisi hu anyonje na tahuyaweza kuhenda mambo dza higo. Ichikala mutu ana ushujaa wa kudzikarya kuhusu dzambo fulani, hata mimi na ushujaa wa kudzikarya na dzambo riro hiro. Vi sambi nagomba dza mpumbavu!

²²Dze, hinya ni Aebrania? Mimi piya ni Muebrania. Dze, hinya ni Aiziraeli? Nami piya. Achikala ni a chivyazi cha Brahimu, nami ni vivyo.

²³Tsona achikala ni atumishi a Jesu, mino ni zaidi. (Vivi sambi nagomba dza mutu wa koma.) Nikahenda kazi zaidi, nikafungbwa jela mara nyinji zaidi, nikachapwa zaidi sana, na nikaona chifo mara nyinji.

²⁴Mara tsano nikapigbwa vikoto mara arubaini kasoro chimwenga ni Ayahudi.

- ²⁵Mara tahu Arumi akanipiga milawa. Limwenga nikapigbwa mawe, mara tahu nikavudzikirwa ni meli baharini, na nchisala mumo baharini usiku na mutsi.
- ²⁶Katika vyaro vyangu vinji, nikakutana na hatari za miho, za anyang'anyi, za Ayahudi ayangu na za atu asio Ayahudi. Piya nakala na hatari midzini, tsakani, baharini, na kula kpwa atu adzihendao dza afuasi ayangu.
- ²⁷Nikakala na kazi ngumu na tabu, siku nyinji nikakala matso bila usingizi. Nikakala na ndzala na chiru, bila chakurya cha kutosha. Tsona nikapigbwa ni mnyevu bila nguwo za kuvwala.
- ²⁸Higo mbai, nakala na mzigo chila siku kpwa kujali makundi gosi ga afuasi a Jesu.
- ²⁹Mutu anaphokala mnyonje chiroho, nami nkusikira unyonjewe. Mutu anapholongozwa kuhenda dambi, nami nkusononeka sana.
- ³⁰Ichikala n'lazima kudzikarya, richa nidzikarye kuhusu mambo ganagoonyesa unyonje wangu.
- ³¹Mlungu, Baba wa Bwana Jesu atogolwaye milele, anamanya sigomba handzo.
- ³²Niriphokala Damaskasi, mtawala wa jimbo, ariyekala tsini ya Mfalume Areta, waika arindzi katika miryango ya midzi ili anigbwire.
- ³³Lakini nátserezwa na bweko ririrotsupizwa na dzitundu ra ukuta wa mudzi, na kpwa njira hiyo nápona kugbwirwa.

2 Akorintho 12

- ¹Inabidi nienderere kudzikarya, lakini takuna fwaida! Ela n'ndabisha kuhusu ruwiyana na maono nrigophaha kula kpwa Bwana.
- ²Namanya mfuasi wa Jesu ambaye miaka kumi na mine iriyotsupa, wahalwa ni Mlungu kuphiya dzulu mlunguni, yani mlungu wa hahu. Simanya mutu hiye waphiya na umbo ra chimwiri au ra chiroho. Mlungu ndiye amanyaye.
- ³⁻⁴Namanya kukala mutu hiyu waphirikpwa Peponi. Simanya kala a chimwiri au kala a chiroho, Mlungu ndiye amanyaye. Hiko, mutu hiyu wasikira mambo ga siri ga ajabu ambago mwanadamu karuhusiwa agabishe.
- ⁵N'ndadzikarya kpwa sababu ya mutu dza hiyu, lakini sio kpwa sababu yangu mwenye, isiphokala n'ndadzikarya kuhusu unyonje wangu.
- ⁶Lakini nchilonda kudzikarya, sindakala mpumbavu, mana n'ndakala ninabisha kpweli. Hata hivyo sindadzikarya, mana simendze mutu yeyesi anitogole zaidi ya vira nihendavyo na gara nigombago.
- ⁷Náhewa mwiya mwirini mwangu ili unirinde nisihende ngulu kpwa sababu ya maono higo ga ajabu nrigoonyeswa. Mwiya hinyo ni dza mhumwa wa Shetani, unitesao nisihende ngulu.

- ⁸Návoya Bwana mara tahu ili aniusire mwiya hinyu,
- ⁹lakini achiniamba, "Mbazi zangu zinakutosha, mana unaphokala mnyonje, uwezo wangu unahendwa ukamilike." Kpwa hivyo nahererwa kudzikarya na unyonje wangu ili uwezo wa Jesu ukale nami.
- ¹⁰Phahi kpwa ajili ya Jesu ni razi kukala mnyonje, kuzarauliwa, kugaya, kuteswa na kuphaha mashaka, mana ninaphokala mnyonje, ndipho nikalapho na uwezo.
- ¹¹Nikagomba dza mpumbavu! Lakini mwimwi ndimwi mchionihenda nigombe hivyo. Hata dzagbwe mimi si chitu, inabidi mnitogole kpwa sababu mimi si mdide kuriko hara atu anaoihwa, "mitume akulu".
- ¹²Kpwa kuvumirira sana náhenda dalili, maajabu na vilinje kahi yenu ambavyo vyaonyesa wazi kukala mimi ni mtume.
- ¹³Tafwauti yenu na makundi ganjina ga afuasi ni kukala siyakala mzigo kpwa kulonda msada kula kpweni. Kpwa hivyo sivoya msamaha kpweni, mana siyakukoserani nriphodzitegemea.
- ¹⁴Sambi ni tayari kpwedza kpweni mara ya hahu. Nami sindakala mzigo kpweni, wala silonda mali yenu, ela mwi enye. Mana ni kawaida avyazi kuaikira ana ao akiba, lakini si kawaida ana kuaikira akiba avyazi ao.
- ¹⁵Phahi n'ndahererwa kulavya n'richo nacho na hata kudzilavya mi mwenye kpwa fwaida yenu. Dze, mndanimendza chidide kpwa vira mino nakumendzani sana? Hata, sivyo hivyo!
- ¹⁶Sambi mnakubali kukala siyakala mzigo kpweni. Lakini mutu wanjina anaweza kuamba, "Kpwa vira Paulo ni mlachu, wahugbwira kpwa kuhumira handzo."
- ¹⁷Dze, kuna mutu yeyesi nriyemhuma kpweni ariyekuzulumuni? Takuna hata mmwenga!
- ¹⁸Mino námsisitiza Tito edze kpweni phamwenga na mfuasi myawehu wanjina. Dze, Tito wakuzulumuni? Hata! Iye na mimi hukulongozwa ni roho mmwenga na hukukala na tabiya mwenga.
- ¹⁹Mendzerepho hata sambu mnafikiri hukadzitetea mbere ya matso genu. Ela hunagomba higa mbere za Mlungu, kuno hukagbwirana na Jesu. Amendzwa angu, higa gosi ni ga kukutiyani moyo.
- ²⁰Shaka rangu ni kukala ndiphokpwedza hiko kpweni sindahamirwa ni higo muhendago, namwi tamndahamirwa ni vira ndivyokuhenderani. Nami silonda nchedza mkale mchere kuheha, kuonerana chidzitso, kutsukirirwana, kudzimendza, kufyakatsirana, kusengenyana, kudzikarya chipumbavu, na kuhenda fujo.
- ²¹Naogopha kukala ndiphokpwedza tsona, Mlungu andanihenda nione waibu mbere zenu. Na indabidi nisononeke kpwa sababu ya anji enu ambao bado

taadzangbwe kutubu na kuricha dambi za uchafu, udiya na tamaa mbii arizohenda.

2 Akorintho 13

¹Hino ni mara yangu ya hahu kpwedza kpwenu. Maandiko ganaamba kala chila shitaka n'lazima rihakikishwe ni mashahidi airi ama ahahu.

²Nákuonyani kare nriphokala namwi mara ya phiri. Nauyira dzagbwe ni kure namwi. Ndiphokpwedza tsona, sindaricha kutiya adabu hara nríoaonya kuhusu dambi zao nriphokala namwi na piya hara anjina osi anaohenda dambi.

³N'ndahenda hivyo kpwa kukala mnalonda ushahidi wa kpweli kala Jesu anagomba kutsupira mimi. Naye si mnyonje kpwenu, ela nguvuze zinahenda kazi kahi yenu.

⁴Mana hata dzagbwe wakotwa msalabani kpwa hali ya unyonje, anaishi kpwa uwezo wa Mlungu. Vivyo hivyo sisi naswi hu anyonje dza iye, ela hwaungana naye kpwa uwezo wa Mlungu, na kpwa hinyo uwezo hundakpwedza hukutsanganyeni.

⁵Dzilauleni mwimwi enye mmanye ichikala kpweli mna kuluphiro. Dzipimeni enye. Dze, tammanya kukala Jesu Muokoli a phamwenga namwi? Ichikala si hivyo, phahi mkashindwa.

⁶Lakini nakuluphira kukala mndamanya kukala sisi tahushindwa.

⁷Hunavoya Mlungu msihende uyi wowosi, si kpwa lengo ra sisi kutogolwa, ela mphahе kuhenda manono, hata ichikala hundaonekana hukashindwa.

⁸Mana hukarema kupinga kpweli, ela hunahenda bidii ili ienderere.

⁹Sisi hunahererwa wakati hu anyonje na wakati mwimwi mna nguvu. Kpwa hivyo hunakuvoyerani ili kuluphiro renu riphere.

¹⁰Kpwa hivyo nakuandikirani higa kabla ya kpwedza ili nisedzekala msiru kpwa kuhumira uwezo nríoheva ni Mlungu. Mana wanipha uwezo wa kukuphezani chiroho wala si wa kukuvomolani.

¹¹Chimarigizo enehu, kpwaherini. Kuluphiro renu nariphere na mtiyane moyo. Mkale na nia mwenga na mkale salama, naye Mlungu wa mendzwa na amani andakala phamwenga namwi.

¹²Lamusanani na mendzwa ya kpweli.

¹³Mkaphozwa ni atu osi a Mlungu ario hiku.

¹⁴Mbazi za Bwana Jesu Masihi, mendzwa ya Mlungu, na umwenga wa Rohowe, naukale namwi mosi.

Agalatia

Agalatia 1

- ¹⁻²Baruwa hino ila kpwangu mimi mtume Paulo na afuasi ayangu osi ario hiku. Nakuandikirani mwimwi kundi ra afuasi a Jesu mrio seemu za Galatia. Mino siyaphaha utume kpwa uwezo wa mwanadamu wala kutsambulwa ni mutu, ela kpwa uwezo wa Jesu Masihi na Baba Mlungu yemfufula Jesu.
- ³Baba Mlungu na Bwana wehu Jesu Masihi naakujaliyeni na mkale salama.
- ⁴Kama mmanyavyo, Jesu wafwa kpwa sababu ya dambi zehu, ili husitawalwe ni nia na asili mbii za chibinadamu. Wafwa kpwa kulengana na mendzwa ya Mlungu wehu na ambaye ni Baba.
- ⁵Mlungu naatogolwe milele na milele. Amina.
- ⁶Enehu, mbona mnaniangalaza! Mwamricha Mlungu upesi, ambaye kpwa mendzwaye na mbazize wakuihani mshiriki uzima wa milele ambao waulavya kutsapira Jesu. Vivi mnalunga mafundzo ganjina
- ⁷gasigo ga kpweli. Mana atu anjina anataka kukuyugani achili na kubananga habari ndzuri kuhusu Jesu Muokoli.
- ⁸Lakini hata sisi au malaika kula mlunguni huchitangaza mafundzo ga kuokola tafwauti na higo gokutangazirani, phahi mutu hiye naalaniwe ni Mlungu milele!
- ⁹Kama hurivyogomba hipho mwandzo, phahi nauyira tsona: Mutu yeyesi ndiyekutangazirani mafundzo ga kuokola ga tafwauti na higa mafundzo mrigogakubali, phahi mutu hiye naalaniwe ni Mlungu milele!
- ¹⁰Dze, gano nchigogomba ganaonyesa kala nalonda anadamu animendze? Hata chidide! Namendza Mlungu ahamirwe zaidi kuriko anadamu. Kala ncherelonda kufurahisha anadamu, phahi singekala mtumishi wa Jesu.
- ¹¹Enehu, nalonda mmanyeye kukala habari ndzuri kuhusu Jesu yoitangaza mimi, taiyatungbwa ni mwanadamu.
- ¹²Lakini ni Jesu Masihi mwenye ndiye yenimanyisa. Siyaiphaha kula kpwa mutu yeyesi, wala kufundzwa ni mutu.
- ¹³Mnamanya maisha gangu vyokala nriphokala nalunga dini ya Chiyahudi. Nátesa afuasi a Jesu bila ya mbazi tse, na nchitaka kuaangamiza.
- ¹⁴Nálunga dini ya Chiyahudi vinono hata kushinda marika gangu, tsona nchidzilavya sana kulunga mila za akare angu.
- ¹⁵Lakini Mlungu kala analonda chivyanjina. Wanitenga hata kabla sidzangbwevalwa, na achinitsambula kulengana na arivyomendza iye ili nimhumikire, hata dzagbwe kala sifwaha.

¹⁶Wakatiwe ariopanga uriphofika, Mlungu wanionyesa mwanawe, ili nitangazire atu asio Ayahudi habari ndzuri kuhusu mwanawe Jesu. Na wakati hinyo siyaendza ushauri kula kpwa mutu.

¹⁷Wala siyaphiya Jerusalemu kpwa hara ambao kala ni mitume kare, lakini mara mwenga náphiya weru wa Warabuni, chisha badaye ndipho nchiuya Damaskasi.

¹⁸Bada ya miaka mihahu, náphiya Jerusalemu kpwendamuona Petero, na nchisagala naye siku kumi na tsano.

¹⁹Mtume wanjina yemuona hiko kala ni Jakobo bahi, mwanao wa Bwana Jesu.

²⁰Nakuambirani kpweli mbere za Mlungu higa nagokuandikirani sigo ga handzo.

²¹Bada ya kusagala Jerusalemu na Petero, náphiya majimbo ga Siria na Kilikia.

²²Wakati hinyo kala sidzangbwekutana uso kpwa uso na makundi ga afuasi a Jesu ariokala Judea.

²³Kala taadzangbweniona lakini kala ahendasikira kukala, "Ye mutu ambaye kala achihutesa, ndipho anatangaza riro kuluphiro ambaro mwandzo kala analonda kuriangamiza."

²⁴Phahi, hinyo atu amtogola Mlungu kpwa gara ambago Mlungu kala akanihendera.

Agalatia 2

¹Phahi, bada ya miaka kumi na mine náphiya tsona Jerusalemu myangu ni Barinaba, piya namhala Tito nchiphiya naye.

²Náphiya hiko kpwa sababu Mlungu kala akanionyesa niphiye. Nriphokutana chisiri na vilongozi, náaeleza hira habari ndzuri nitangazayo kpwa atu asio Ayahudi. Náhenda hivyo ili kazi hiyo isikale ya bure.

³Myangu Tito, ambaye kala si Myahudi, kala katiirwe tsatsani, lakini hinyo vilongozi a kundi ra afuasi hiko Jerusalemu amukubali. Taayamlazimisha kutiywa tsatsani,

⁴hata dzagbwe atu anjina ariodzhenda afuasi a Jesu kala analonda atiywe tsatsani. Atu hinyo kala akadziunga chisiri dza makachero, kupeleleza uhuru huhewao ni Jesu Muokoli. Kala anataka kubananga uhuru wehu na auhende atumwa a shariya za Chiyahudi.

⁵Naswi tahuyakubaliana nao hata chidide, ili m'baki na ukpweli wa habari ndzuri kuhusu Jesu bila kugaluzwa.

⁶Na hara vilongozi taayaenjereza chochosi hura ujumbe nriokala nahubiri. (Hinyo vilongozi kala anaishimiwa sana, lakini higo si muhimu, kpwa sababu Mlungu kahukumu mutu kpwa kumlola umbore wala cheoche.)

- ⁷Ela sambi kala anamanya kukala náhewa kazi ya kutangaza habari ndzuri kuhusu Jesu kpwa atu asio Ayahudi, dza viratu Petero arivyo hewa kazi ya kuahubiriya Ayahudi.
- ⁸Mlungu iye yemhenda Petero kukala mtume wa Ayahudi, ndiye yenihenda mimi piya kukala mtume wa atu asio Ayahudi.
- ⁹Jakobo, Petero na Johana, ambao ka anamanywa kama ni vilongozi muhimu, akubali kukala nami, naye Mlungu wajaliya kazi yangu. Hipo, ahupha mikono myangu ni Barinaba kuonyesa kala a tayari kuhenda kazi phamwenga naswi. Aho akubali kuhubiri kpwa Ayahudi, naswi kpwa atu asio Ayahudi.
- ¹⁰Chitu arichosisitiza kala ni kuaterya afuasi achiya a Jerusalemu, dzambo ambaro kala nina moyo naro.
- ¹¹Siku yanjina Petero ariphokpwedza Antiokia, mino námpinga wazi-wazi mbere za afuasi ayawehu kpwa sababu kala anahenda makosa makulu.
- ¹²Kabla ya atu fulani kpwedza kula Jerusalemu kpwa Jakobo, Petero kala achirya na atu asio Ayahudi. Lakini atu ariphokpwedza, waricha kurya na atu asio Ayahudi na achidzitenga. Wahenda hivyo kpwa sababu ya kuogopha hara aambao kukala mfuasi wa Jesu n'lazima atiywe tsatsani.
- ¹³Afuasi anjina a Chiyahudi kula Antiokia aungana na unafiki wa Petero, hata Barinaba achilongozwa makosa.
- ¹⁴Phahi, nriphoona maisha gao tagalunga ukpweli wa mafundzo kuhusu Jesu Muokoli, namuambira Petero mbere za atu osi, "Hata dzagbwe uwe u Myahudi, lakini kulunga shariya zosi za Chiyahudi. Sambu kpwa utu wani unalazimisha atu asio Ayahudi alunge mila za Chiyahudi?"
- ¹⁵Sisi ambao hwavyalwa Ayahudi tahudziona huna dambi, kama huaonavyo atu asio Ayahudi.
- ¹⁶Ela hunamanya kala mutu kaphaha haki kpwa kulunga Shariya, lakini kpwa kumkuluphira Jesu Muokoli. Kpwa hivyo sisi naswi hunaphaha haki kpwa kumkuluphira, wala sio kpwa kulunga Shariya, mana takuna hata mmwenga ndiyekala na haki kpwa kulunga Shariya.
- ¹⁷Ayahudi anjina anafikiriya sino hu achina-dambi, kpwa sababu hunamkuluphira Jesu ili kuphaha haki, badala ya kulunga Shariya. Dze, ni kpweli Jesu anahulongoza kuhenda dambi? Sivyo hata chidide!
- ¹⁸Lakini nchiuya tsona kukuluphira mpango wa kare wa kulunga Shariya, ambao náurema, phahi kpwa kpweli nina makosa.
- ¹⁹Mimi piya kala náishi kulunga Shariya, lakini sambu sitawalwa tsona ni Shariya. Mlungu waniika huru ili niishi vira atakavyo. Ni kama avi náolagbwa phamwenga na Jesu msalabani.

²⁰Siye mimi niishiye tsona, lakini Jesu anaishi mwangu moyoni. Vivi naishi kpwa kumkuluphira hiye Mwana wa Mlungu, ariyenimendza hata achidzilavya ili afwe kpwa sababu yangu.

²¹Kala mutu anahewa haki kpwa kulunga Shariya, phahi Jesu angekala wafwa bure. Lakini narema kabisa kukala mbazi na mendzwa ya Mlungu si muhimu.

Agalatia 3

¹Mwi Agalatia! Mbona mnahendwa azuzu? Mwalogbwa ni ani? Mwaelezwa vinono mana ga Jesu Masihi kuolagbwa msalabani.

²Sambi hebu nikuuzeni chitu. Dze, mwaphokera Roho wa Mlungu kpwa kulunga Shariya, hebu kpwa kukuluphira mrigosikira?

³Kpwadze mnahendwa azuzu hivyo? Mwaandza kumkuluphira Jesu kpwa kutegemea nguvu za Roho wa Mlungu, vino mbona mnalonda kuenderera na nguvu zenu enye?

⁴Mambo gosi garigokuphahani gakala ga bure? Kpwa kpweli taiwezekana gakale ga bure!

⁵Dze, Mlungu anakuphani Rohowe na kukuhenderani vilinje kpwa sababu ya kulunga Shariya? Sivyo hivyo, ela ni kpwa sababu mnakuluphira higo mrigosikira kuhusu Jesu.

⁶Nauhaleni mfwano wa Brahimu. Maandiko ganaamba kukala Brahimu wamkuluphira Mlungu na achikubaliwa kukala mutu wa haki.

⁷Phahi, ni mmanye kukala, hinyo amkuluphirao Mlungu ndio uvyazi wa kpweli wa Brahimu mana anakuluphira dza iye.

⁸Maandiko gatabiri kala Mlungu andaapha haki atu asio Ayahudi kpwa kukuluphira. Wamtangazira Brahimu habari ndzuri kuhusu Jesu chimbere achimuamba, "Makabila gosi duniani gandajaliwa kula kpwa uvyazio."

⁹Phahi, atu akuluphirao anajaliwa phamwenga na Brahimu, mutu yejaliwa kpwa sababu ya kukuluphira.

¹⁰Atu osi akuluphirao Shariya ana lana, mana Maandiko ganaamba, "Mutu yeyesi ambaye kandalunga na kuhenda chila chitu choandikpwa ndani ya Chitabu cha Shariya, ana lana!"

¹¹Kpwa kpweli takuna mutu aphahaye haki mbere za Mlungu kpwa kulunga Shariya, kpwa sababu Maandiko ganaamba, "Atu ndioishi ni hara ndiophaha haki kpwa kumkuluphira Mlungu."

¹²Yo Shariya taina uhusiano wowosi na kuluphiro. Ela phahaliphe Maandiko ganaamba, "Mutu ndiyegbwira malagizo gosi ga Shariya andaishi kpwa sababu ya kulunga hizo Shariya."

- ¹³Shariya zinatiya lana, lakini Jesu wahukombola na lana hiyo kpwa kutiywa lana ye mwenye, ariphoolagbwa msalabani. Kama Maandiko gaambavyo, "Mutu yeyesi ndiyekotwa msalabani ana lana."
- ¹⁴Wahenda hivyo ili gara majaliwa arigolagbwa Brahimu, gahewe atu asio Ayahudi piya. Phahi hunaphokera Roho wa Mlungu huriyelagbwa mana hunamkuluphira Jesu Muokoli.
- ¹⁵Enehu, hebu nikupheni mfwano huno wa maisha ga chila siku: Atu airi achipatana, na kutiirana saini, dze, ni ani awezaye kuiusa au kuigaluza? Vilagane vya Mlungu ni dza vivyo, tavigaluka.
- ¹⁶Mlungu waika chilagane hicho na Brahimu na uvyaziwe. Maandiko gachiamba, "uvyaziwe" manage siyo, "atu anji a uvyaziwe", lakini manage ni "mmwenga wa uvyaziwe". Na ye hiye mmwenga niambaye ni Jesu.
- ¹⁷Nataka kuamba hivi: Mlungu waika chilagane na Brahimu. Shariya za Musa ambazo zalaviwa miaka magana mane na salasini bada ya hicho chilagane, tachiweza kuchifuta, wala kuusa chilagane cha Mlungu.
- ¹⁸Mana ichikala zawadi ya Mlungu inaphahikana kpwa kulunga Shariya, phahi si lazima kukuluphira chilaganeche. Lakini Mlungu wamupha Brahimu zawadi kpwa mbazize kpwa sababu ya hicho chilagane.
- ¹⁹Sambi Shariya za Musa kala zina mana yani? Shariya zaikpwa kutawala atu mana kawaida atu kala nkuhenda dambi. Nazo kala ni zikale hadi yuya chivyazi cha Brahimu yekala akalagbwa, edze. Mlungu walavya Shariya na Musa kutsupira kpwa malaika, naye Musa achikala ngudzi wa Mlungu na atu.
- ²⁰Ngudzi anatakikana wakati pande mbiri zinaika mapatano. Ela Mlungu ni mmwenga na ye mwenye waika chilagane na Brahimu bila ya ngudzi.
- ²¹Dze, Shariya kala zinapinga chilagane cha Mlungu? Hata chidide! Kama Shariya inaweza kurehera anadamu uzima wa milele, phahi atu angephaha haki kpwa kuzilunga.
- ²²Lakini Maandiko ganaamba chila mutu nkuhenda dambi na kaweza kuishi kulengana na Shariya. Ndio mana Mlungu walaga kuapha atu amkuluphira Jesu Masihi uzima wa milele.
- ²³Sisi Ayahudi kala hukafungbwa ni Shariya dza mabusu, hadi huriphong'azwa matso kala mutu anaphaha uzima wa milele kpwa kumkuluphira Jesu.
- ²⁴Phahi, Shariya ka ni mtawala wehu hadi Jesu ariphokpwedza, ndipho huphahe haki mbere za Mlungu kpwa kumkuluphira.
- ²⁵Sambi kpwa vira hwamkuluphira Jesu, tahutawalwa tsona ni Shariya.
- ²⁶Mwimwi mosi mu ana a Mlungu kpwa kukala mwamkuluphira Jesu Muokoli.

²⁷Mriphobatizwa kuonyesa kala mu a Jesu, mwaandza maisha maphya kuhenda tabiyaze.

²⁸Taphana tafwauti ya Myahudi na Mgiriki, mtumwa wala mutu huru, mlume wala mchetu, mana mosi mu amwenga kpwa sababu ya Jesu Muokoli.

²⁹Ichikala mu a Jesu, phahi mu vivyazi vya Brahimu, na mndaphokera majaliwa arigolagbwa Brahimu.

Agalatia 4

¹Hebu lolani mfwano huno. Wakati mrisi achere mwanache, kana tafwauti na mtumwa, hata dzagbwe mali yosi ni yakpwe.

²N'lazima aogophe arezie na aimirizi a malize hadi wakati uriopangbwa ni ise.

³Phahi hata sisi huriphokala tahudzangbwekombolwa ni Jesu hwakala dza vivyo. Hwakala atumwa huchitawalwa ni mila na dini za chidunia.

⁴Lakini wakati wa sawa uriphofika, Mlungu wamhuma Mwanawe mwenye. Wavyalwa ni mchetu na achiishi kulunga Shariya za Musa,

⁵ili akombole atu okala akahendwa atumwa ni Shariya hizo, ndipho nao akale ana a Mlungu.

⁶Sambi kpwa sababu hu ana a Mlungu, Mlungu wareha Roho wa Mwanawe mwehu mioyoni, naye Roho nkumuiha Mlungu, "Baba!"

⁷Kpwa hivyo simwi atumwa tsona, ela mu ana a Mlungu, na kpwa vira mu anae, chila chitu aricho nacho ni chenu.

⁸Kare mriphokala tamummanya Mlungu, mwakala atumwa mchihumikira viumbe ambavyo kala si Mlungu.

⁹Lakini sambu mnamanya Mlungu, au kpwa kpweli naamba: Mlungu anakumanyani. Phahi msiuyire tsona mila na dini za chidunia, ambazo tazina nguvu wala mana. Dze, mnataka mhendwe atumwa a mambo higo tsona?

¹⁰Bado mcherelunga sheree za siku malumu, miezi, majira na miaka ili kumhamira Mlungu!

¹¹Nakuonerani mbazi sana. Mana naona kama avi náhenda kazi ya bure kpweni.

¹²Enehu, nakuvoyani mkale dza mimi kpwa sababu sihendwa mtumwa tsona ni Shariya. Mana hata mimi nákala dza vivyo mrivyo pho mwandzo: kalani atu asio na lazima ya kulunga shariya za Chiyahudi. Tamyankosera rorosi.

¹³Mnamanya kala ukongo wangu ndio urionihenda nedze nikutangazireni habari ndzuri kuhusu Jesu mara ya kpwandza.

- 14**Kala mnaweza kunikahala au kunizarau kpwa sababu ya ukongo wangu, lakini tamyahenda hivyo. Ela mwanikaribisha avi ni malaika wa Mlungu, ama dza Jesu Muokoli mwenye.
- 15**Dze, raha yenu mriokala nayo wakati hinyo yaphiyaphi? Nakuambirani kpweli, kala ka inawezekana mngesokola matso genu mkanipha.
- 16**Dze, sambu ni mviha wenu kpwa kukuambirani ukpweli?
- 17**Hinyo atu atakao mlunge shariya za Chiyahudi, anaaza kukuhalani zewe, ili mkale kundi rao. Lakini nia yao sio nono. Anataka akutenganisheni na mimi ili muashugulikiye aho zaidi.
- 18**Ni vinono kuaza kuhenda mambo ambago niaye ni ndzuri. N'lazima mhende hivyo wakati wosi, hata ichikala siphu.
- 19**Enehu, asena angu, hino ni mara ya phiri kusikira utsungu kpwa sababu yenu, dza viratu mchetu wa mimba avyalaye. Na hinyo utsungu undaenderera vivyo hadi maisha genu ndiphoonyesa tabiya za Jesu.
- 20**Naaza kala ni phamwenga namwi, na nikuambireni pore pore. Lakini kpwa sababu siphu, kpweli mnanitiya wasi-wasi sana.
- 21**Hebu niambirani mwimwi mmendzao kulunga Shariya za Musa: Kpwani, tammanya Maandiko ga Musa gaambavyo?
- 22**Maandiko ganaamba kukala Brahimu wavyalwa anae airi alume. Mmwenga wamvyala na mchetu mtumwa na wanjina achimvyala na mchetu ambaye kala siye mtumwa.
- 23**Yuya mwanawe yemvyala na mchetu mtumwa, wavyalwa na mpango wa chibinadamu bahi. Lakini yuya mwana yemvyala na mchetu ambaye kala siye mtumwa, wamvyala kpwa sababu Mlungu watimiza chilaganeche kpwa Brahimu.
- 24**Mambo higa ganaweza kuhendwa dza ndarira, mana hara achetu airi anafananishwa na vilagane viiri. Hagari ambaye kala ni mtumwa ni mfwano wa chilagane chohendwa dzulu ya Mwango wa Sinai; chilagane hichi chahenda atu akale atumwa piya.
- 25**Atu a Jerusalemu ya sambu ni atumwa kpwa sababu ya kulunga shariya za Chiyahudi. Aho ni atumwa dza Hagari ambaye anafananishwa na chilagane chohendwa Mwango wa Sinai hiko Warabuni.
- 26**Lakini Sara, ambaye siye mtumwa, wafananishwa na Jerusalemu yanjina ya mlunguni. Naye ni dza mayo wehu. Naswi hu arisi a hiyo Jerusalemu ya mlunguni, kusiko atumwa.
- 27**Mana Maandiko ganaamba: "Hererwa uwe mchetu mgumba, usiyevyala! Hererwa sana na upige njerejere uwe usiye na utsungu wa kuvyala. Kpwa sababu

mchetu ariyerichwa macheye andaphaha ana anji kuriko hiye ariye na mlumewe.”

²⁸Sambi mwi enehu, mu dza Isaka, mu ana mriovyalwa kpwa sababu ya chilagane cha Mlungu.

²⁹Siku hizo, yuya mwana yevyalwa na mpango wa chibinadamu, wantesa yuya yevyalwa na uwezo wa Roho wa Mlungu, na hata siku hizi ni vivyo.

³⁰Lakini Maandiko ganaambadze? Ganaamba, "Mzole hiye mchetu mtumwa na mwanawe, mana mwana wa mtumwa kandarisi phamwenga na mwana wa mchetu ambaye siye mtumwa.”

³¹Kpwa hivyo, enehu, sisi sio ana a yuya mchetu mtumwa, lakini hu ana a hiye mchetu ambaye siye mtumwa.

Agalatia 5

¹Jesu wahupha uhuru ili hukale huru. Kpwa hivyo dinani chilume dza atu ario huru kpweli, wala msiuye kukala atumwa tsona.

²Sikizani maneno gangu! Mimi Paulo nakuambirani kala mchikubali kutiywa tsatsani kama shariya za Chiyahudi zitakavyo, ili Mlungu akukubalini, phahi chifo cha Jesu tachindakala na mana kpweni bii.

³Nakuonyani sana, mlume yeyesi ndiyekubali kutiywa tsatsani kama Shariya za Musa zitakavyo, phahi n'lazima azilunge zosi.

⁴Atu ambao analonda kuphaha haki kpwa kulunga Shariya, anakata umwenga wao na Jesu, nao anarema mbazi za Mlungu.

⁵Lakini Roho wa Mlungu nkuhumanyisa kukala hakika Mlungu andahupha haki, kpwa sababu hunamkuluphira Jesu.

⁶Mana uchitaka kukala mfuasi wa Jesu Muokoli, kutiywa tsatsani au kusatiywa tsatsani takuhenda tafwauti yoyosi. Ela chitu muhimu ni kumkuluphira na kumendza Mlungu na atu anjina.

⁷Mwandzo kala mnaphiyato sana. Sambu, ni ani yekuyugani na kukuhendani msilunge kpweli?

⁸Lichengo-chengo hiro tariyala kpwa Mlungu, yekutsambulani!

⁹Amira chache nkuumusa unga munji. Sawa na kpwamba mafundzo machache ga handzo ganachenga atu anji.

¹⁰Kpwa vira mu a Bwana Jesu nina hakika tamndagbwira maneno ga atu anjina ela mndalunga maneno gangu. Na ndiyekuyugani andahukumiwa, hata akale ni ani.

- ¹¹Enehu, nahubiri kukala kutiywa tsatsani kama shariya za Chiyahudi zilondavyo si muhimu, na ndio mana bado nateswa ni Ayahudi. Kala nahubiri kuhusu kutiywa tsatsani badala ya msalaba wa Jesu, nisingekala naakosera.
- ¹²Naaza kala hinyo atu ambao anakuyugani kuhusu kutiywa tsatsani angeenderera kabisa hata akadzitula!
- ¹³Enehu, Mlungu wakutsambulani mkale huru. Lakini msihumire uhuru wenu kulunga tamaa za dambi, ela teryanani na mmendzane.
- ¹⁴Mana Shariya zosi zinakamilishwa ni shariya mwenga, nayo inaamba, "Mmendze myao dza vyo udzimendzavyo mwenye."
- ¹⁵Lakini mchilaumiana na kuryana, dzimanyirireni msedze mkaangamizana.
- ¹⁶Phahi naamba, ishini kulunga Roho wa Mlungu, namwi tamndatimiza tamaa za dambi.
- ¹⁷Mana mambo gatakpwago ni asili ya chibinadamu sigo alondago Roho wa Mlungu, na alondago Roho wa Mlungu sigo gatakpwago ni asili ya chibinadamu. Roho wa Mlungu na asili ya chibinadamu vinapingana, kpwa hivyo ni vigumu kuhenda mambo manono utakavyo.
- ¹⁸Lakini uchilongozwa ni Roho, kutawalwa ni shariya za Chiyahudi.
- ¹⁹Mahendo galondwago ni asili ya chibinadamu ga wazi, nago ni higa: udiya, uzembe, tamaa ya achetu ama alume anji,
- ²⁰kuabudu sanamu, utsai, kuzirana, kuheha, kuonerana wivu, tsukizi, uchoyo, kudzitenga na atu, kuganya atu makundi ga kupingana,
- ²¹chidzitso, ulevi, sheree za kunwa uchi na kuvwina chiudiya, na mambo ganjina ga kuigana na higo. Nakuonyani tsona kama nrivyokuonyani awali, atu ahendao mambo higo taandaphokera uzima wa milele ambao Mlungu waapangira anae.
- ²²Lakini Roho wa Mlungu achihulongoza, andareha mambo higa: mendzwa, raha, amani, kuvumirira, mbazi, tabiya nono, uaminifu,
- ²³upole, na kudzikanya. Taphana shariya yoyosi ipingayo mambo higa.
- ²⁴Atu achikala a Jesu Muokoli taatawalwa tsona ni asili zao za chibinadamu. Asili yao ni kama avi yakotwa misumari msalabani.
- ²⁵Kpwa vira Roho wa Mlungu wahupha maisha maphya, phahi n'lazima hulunge njiraze.
- ²⁶Hipho, n'lazima huriche ngulu, husihehe wala husionerane wivu.

Agalatia 6

- ¹Enehu, mutu achihenda dambi, mwimwi mlongozwao ni Roho wa Mlungu n'lazima mumkanye, ela mkanyeni chituwo. Dzimanyirireni, ili namwi msedze mkajezwa.
- ²Teryanani tabu zenu, namwi mndakala mnatimiza malagizo ga Jesu.
- ³Mutu yeyesi achidziona muhimu, na kumbavi si chochosi, phahi anadzichenga mwenye.
- ⁴Chila mmwenga n'lazima adzipime mahendoge. Achikala akahenda manono ndipho ahendere ngulu mahendoge, lakini asipime mahendoge na atu anjina.
- ⁵Mana chila mmwenga n'lazima atsukule mzigowe mwenye.
- ⁶Chila afundzwaye ujumbe wa Mlungu n'lazima aganye rizikize na mwalimuwe.
- ⁷Msidzichenge! Mlungu kachengbwa wala kaphuphizwa. Kpwa kpweli mutu andavuna aphantacho.
- ⁸Mutu achilunga tamaa mbii za asili ya chibinadamu na kuhenda mai, andaangamizwa ni hizo tamaaze. Lakini achilunga Roho wa Mlungu kuhenda manono, andaphaha maisha ga milele kula kpwa Roho wa Mlungu.
- ⁹Phahi, nahusiremweni kuhenda manono, mana husiphokata tamaa, hundavuna manono wakatiwe uchifika.
- ¹⁰Kpwa hivyo chila huphahapho nafwasi, nauhendeni manono kpwa atu osi, hasa kpwa afuasi ayawehu.
- ¹¹Sambi lolani, naandika na harufu kulu na mkpwono wangu wenye!
- ¹²Hinyo ambao anakulazimishani mtiywe tsatsani, anataka aonekane anono kpwa Ayahudi kpwa vira mrivyohenda miiri yenu. Anahenda hivyo ili asiteswe kpwa kuambira atu ategemee msalaba wa Jesu macheye, bila ya kutiywa tsatsani.
- ¹³Hata aho atiywao tsatsani piya taalunga Shariya zosi, lakini bado anakutakani mwimwi mtiywe tsatsani ili adzikutule kpwa Ayahudi kpwa sababu ya miri yenu.
- ¹⁴Lakini mino sina cha kuhendera ngulu isiphokala msalaba wa Jesu Masihi bahi. Mambo ambago atu atawalwao ni asili ya chibinadamu anagaona manono, kpwangu mino tagana mana kpwa sababu ya msalaba. Nami mambo ambago nagaona manono, kpwao tagana mana.
- ¹⁵Takuna tafwauti yoyosi ya mutu kutiywa tsatsani dza shariya za Chiyahudi zitakavyo, au kusatiywa tsatsani. Chitu muhimu ni mutu kuphaha maisha maphya kula kpwa Mlungu.
- ¹⁶Mlungu naonere mbazi atu osi alungao malagizo higa, na akale salama. Phahi hinya ndio atu a Mlungu kpwa kpweli.

¹⁷Chimarigizo nakuambirani, hangu sambi simendze mutu aniyuge-yuge. Mana mwangu mwirini nina makuphyu ga kupigbwa mawe na milawa, kuonyesa kukala ni mtumwa wa Jesu.

¹⁸Enehu, nakuvoyerani Bwana Jesu Masihi akujaliyeni mosi. Amina.

Aefeso

Aefeso 1

- ¹Baruwa hino ila kpwangu mimi Paulo, mtume yetsambulwa ni Mlungu kpwa kumendzakpwe ili nihende kazi ya Jesu Muokoli. Nakuandikirani mwimwi atu a Mlungu mkalao mudzi wa Efeso na ambao mu afuasi aaminifu a Jesu Muokoli.
- ²Baba Mlungu na Bwana Jesu Masihi naakujaliyeni na mkale salama.
- ³Naatogolwe Mlungu ambaye piya ni Isengbwa wa Bwana wehu Jesu Masihi. Mana wahujaliya mambo manono ga chiroho galago dzulu kpwa kuhuunganisha na Jesu.
- ⁴Mlungu wahutsambula hukale atu a Jesu. Wahutsambula hata kabla kadzangbweumba dunia, ili hukale atakatifu na bila lawama mbereze.
- ⁵Mlungu waonato na achikata shauri kuhuhenda anae. Wahenda hivyo kpwa gara hurigohenderwa ni Jesu Masihi, kulengana na mpangowe na vyomhamira.
- ⁶Nahumtogeni Mlungu kpwa mbazize nyinji za ajabu arizohupha kpwa sababu ya arigohenda mwanawe ammendzaye sana.
- ⁷Mana Jesu ariphofwa msalabani hwakombolwa na huchisamehewa dambi zehu. Higa ganaonyesa utajiri wa ajabu na mbazi za Mlungu
- ⁸arizohuonyesa. Mlungu wahupha marifwa gosi ga kuelewa njiraze,
- ⁹na achihumanyisa mpangowe wa siri, arioupanga hangu kare kulengana na viratu arivyoona vinamhamira. Wakata shauri kumhumira Jesu
- ¹⁰kukamilisha mpango hinyo wakatiwe uchifika. Andakusanya vitu vyosi phamwenga, virivyo dzulu mlunguni na duniani. Naye Jesu ndiye ndekala mcpwulu.
- ¹¹Vitu vyosi vinahendeka kulengana na mpango na uamuzi wa Mlungu. Naye wakata shauri chimbere kuhutsambula hukale atue kpwa kuhuunganisha na Jesu.
- ¹²Sambi sisi ambao hu a kpwandza kumtarajiya Jesu, hunatakpwa humtogle Mlungu kpwa ngumaye.
- ¹³Mwimwi ambao simwi Ayahudi mwasikira maneno ga kpweli, yani habari ndzuri kuhusu Jesu, ambazo zakureherani wokofu. Mwamkuluphira Mlungu, naye wakutiyani mola wa Rohowe ariyehulaga kuonyesa kukala mu akpwe.
- ¹⁴Mlungu wahuikira Rohowe rubuni mpaka ndiphohukombola kabisa, hukale atue. Nahutogoleni utakatifu wa Mlungu!
- ¹⁵Enehu, násikira kala mnamkuluphira Bwana Jesu na kumendza atu osi a Mlungu. Kpwa sababu hiyo

- ¹⁶sidzangbwericha kumshukuru Mlungu kpwa sababu yenu wala kuricha kukuvoyerani.
- ¹⁷Navoya Mlungu wa Bwana wehu Jesu Masihi ambaye ni Baba wa nguma, akuelezeni na akumanyiseni arivyo, ili mummanyeye vinono zaidi.
- ¹⁸Piya navoya mng'azwe matso, ili mmanyeto chira mgodzeracho na ambacho wakuihirani. Chitu hichi ni ura urisi wa nguma ariolaga atue.
- ¹⁹Tsona mmanyeye uwezo wa Mlungu urivyo wa ajabu. Uwezo hinyo uhendao kazi kpwehu sisi huriokuluphira ni sawa na uwezowe mkpwulu,
- ²⁰ambao Mlungu wauhumira ariphomfufula Jesu. Kpwa kuhumira uwezo hinyo, wamuika mkpwono wa kulume, phatu pha ishima kulu sana, hiko mlunguni.
- ²¹Phahi Jesu ana uwezo mkpwulu kuriko atawala na viumbe vyosi virivyo na uwezo, kula sambhi hipha duniani na hata milele.
- ²²Mlungu wamupha uwezo wa kutawala chila chitu. Chisha achimhenda akale chitswa cha afuasie,
- ²³ambao ni mwiriwe. Nao afuasie anakamilisha kazi za Jesu, akamilishaye chila chitu chila phahali.

Aefeso 2

- ¹Hipho kare kala mkafwa chiroho kpwa sababu ya dambi zenu na kumpinga Mlungu.
- ²Wakati hinyo, mwalunga mambo mai ga dunia na kumuogopha Shetani. Naye ndiye atawalaye pepho na atu asiomuogopha Mlungu.
- ³Sisi hosi piya hwaishi dza vivyo aho. Hwalunga tamaa zehu za dambi na nia za chibinadamu. Naswi kala hunagodzwa ni adabu kali ya Mlungu dza aho.
- ⁴Lakini Mlungu ana mbazi nyinji. Na kpwa sababu ya kuhumendza sana,
- ⁵wahupha uzima dza viratu Jesu arivyofufulwa. Wahenda hivyo wakati kala hukafwa chiroho kpwa makosa gehu. Phahi, mnaokolwa ni mbazi na mendzwa ya Mlungu.
- ⁶Kpwa kuunganishwa na Jesu Muokoli, hwafufulwa na kuikpwa phamwenga naye hiko dzulu mlunguni.
- ⁷Mlungu wahenda mambo higo gosi ili utajiriwe wa ajabu na mbazize zisizo chipimo zionekane milele. Naye wahuonera mbazi kpwa sababu ya gara hurigohenderwa ni Jesu Muokoli.
- ⁸Mwaokolwa ni mbazi na mendzwa ya Mlungu tu mriphomkuluphira Jesu. Na hinyo wokofu si kazi yenu, ela ni zawadi ya bure kula kpwa Mlungu.
- ⁹Mana tamyahewa tuzo kpwa kazi ndzuri, kpwa hivyo msedze mkahenda ngulu.

- ¹⁰Mlungu wahuumba hivi hurivyo sambu. Achihuunganisha na Jesu Muokoli, ili huhende mahendo manono ambago wahupangira chimbere hugahende.
- ¹¹Phahi mwimwi ambao tavyavyalwa Ayahudi, dzimanyeni mrivyo. Mnamanya kala Ayahudi ana ngulu kpwa sababu ya kutiywa tsatsani kuonyesa kala ni atu muhimu a Mlungu. Nao anakuberani mwimwi msiokala Ayahudi kpwa sababu tamuna dalili yoyosi kuonyesa kala mu atu a Mlungu. Ela hiko kutiywa tsatsani ni kazi ihendwayo ni anadamu bahi.
- ¹²Wakati na hinyo kala tamanya kala Muokoli andakpwedza. Mwakala kama ajeni mana kala tamuna fungu ra manono ga atu a Mlungu, yani Aiziraeli. Aho ajaliwa ni Mlungu kulengana na ahadize, ela mwimwi kala tamumo. Tsona kala mnaishi duniani bila ya kuluphiro wala kumanya Mlungu.
- ¹³Mwakala kure na Mlungu, lakini sambu kpwa sababu ya kuunganishwa na Jesu Muokoli ariyefwa msalabani, mwarehwa phephi.
- ¹⁴Phahi, Jesu mwenye wahurehera amani kpwa kuaunganisha Ayahudi na asiokala Ayahudi. Wahuhenda chitu chimwenga kpwa kuusa uadui huriohuhenda huzirane.
- ¹⁵Shariya za Chiyahudi zina malagizo manji, ela Jesu ariphofwa, waziusa. Chi hivyo wahuunganisha naye ili Ayahudi na asio Ayahudi akale kundi mwenga. Wahurehera amani
- ¹⁶na kuusa uadui ariphofwa msalabani. Chisha achihuuyizira uhusiano mnono na Mlungu.
- ¹⁷Wakpwedzatangaza ujumbe wa kureha amani kpweni mwimwi ambao kala m'kure na Mlungu na hinyo ambao kala a phephi naye.
- ¹⁸Mana gara hurigohenderwa ni Jesu, ganahenda Ayahudi na atu asiokala Ayahudi aweze kufika kpwa Baba kpwa msada wa iye Roho mmwenga.
- ¹⁹Phahi, mwimwi atu msio Ayahudi simwi ajeni tsona. Ela mu ana a Mlungu na enyezi phamwenga na atu a Mlungu.
- ²⁰Hu dza mawe gadzengerwago dzengo dziphya ni mitume na manabii. Na hiro dzengo rinadzengbwa dzulu ya dziwe kulu ra msingi, ambaro ni Jesu Muokoli mwenye.
- ²¹Tsona ndiye azuwiyaye dzengo zima na kurihenda rikamilike. Anarihenda rikale phatu phatakatifu photengbwa kuvoya Mlungu.
- ²²Phahi, kpwa sababu ya kuunganishwa na Bwana Jesu, mwi atu msio Ayahudi, mu seemu ya dzengo ra chiroho risagalaro Mlungu.

Aefeso 3

- ¹Mimi Paulo náfungbwa jela kpwa sababu ya kukutangazirani Jesu Muokoli mwi atu msio Ayahudi.
- ²Nina hakika mwasikira kare kukala Mlungu wanijaliya nikale mtumewe kpwa ajili yenu.
- ³Kama nchivyokuambirani kpwa ufupi hipho mwandzo, Mlungu wanimanyisa mpangowe wa siri.
- ⁴Mchisoma higo nrigoandika, mndaelewa vira nimanyavyo mpango wa siri kuhusu Jesu Muokoli.
- ⁵Hangu kare Mlungu waika mpangowe siri, wala takuna yeyesi yeumanya. Ela badaye wahumira Rohowe kumanyisa mitumee na manabiige matakatifu.
- ⁶Na huno ndio mpango wa siri wa Mlungu: Kuahenda Ayahudi na asio Ayahudi akale anae, dza vilungo vya mwiri mmwenga, kpwa kuamini habari ndzuri kuhusu Jesu Muokoli. Sambu hata atu asio Ayahudi nao anaweza kuphaha ahadi za Mlungu.
- ⁷⁻⁸Mlungu wanipha kazi ya kutangaza hizo habari ndzuri kpwa atu asio Ayahudi. Nazo zina utajiri wa ajabu usiopimika wa Jesu Muokoli. Hata dzagbwe sifwaha kuriko atu osi a Mlungu, lakini Mlungu wahenda hivyo kpwa mbazize na uwezowe mkpwulu.
- ⁹Mlungu muumba wa vitu vyosi wanitsambula kuambira atu osi mpangowe wa kuokola atu, ambao kala anao hangu mwandzo.
- ¹⁰Ela sambu Mlungu anahumira atue kuonyesa viumbe vyosi vitawalavyo na virivyo na uwezo hiko mlunguni vira arivyo na marifwa manji.
- ¹¹Hinyu ni mpango wa Mlungu hangu mwandzo. Nao watimizwa ni kazi yohendwa ni Bwana wehu Jesu Muokoli.
- ¹²Kpwa kumkuluphira na kuunganishwa naye, huna uhakika wa kufika mbere za Mlungu bila ya wuoga.
- ¹³Phahi msifwe moyo kpwa higa ganiphahago kpwa sababu yenu. Higa ganaonyesa kukala mu atu muhimu.
- ¹⁴Nchirikana ukulu na marifwa ga mpango wa Mlungu, nachita mavwinda mbere za Baba,
- ¹⁵Muumba wa vitu vyosi virivyo hiko dzulu mlunguni na duniani.
- ¹⁶Navoya Mlungu akutiye ni nguvu mioyoni kula kpwa hinyo utajiriwe wa ajabu kpwa uwezo wa Rohowe.
- ¹⁷Mtogoleni Jesu mwenu mioyoni kpwa sababu ya kuluphiro mriro naro. Mendzwa ya Mlungu naikale dza mtsanga wa mbolea ili mhende mizi ya kudina.

¹⁸Mlungu naakupheni uwezo, mwimwi phamwenga na atue osi kpwa kuelewa vira Jesu ahumendzavyo. Mana anahumendza na mendzwa isiyo na chipimo.

¹⁹Navoya mmanyeye mendzwa ya Jesu irivyo kulu kutsapa achili zenu, ili mkale kamili viratu Mlungu alondavyo.

²⁰Mlungu naatogolwe kpwa sababu ya uwezowe wa ajabu uhendao kazi mwehu mioyoni! Kpwa kpweli anaweza kuuhendera mambo makulu sana kuriko vira huvoyavyo na kufikiriya!

²¹Mlungu naatogolwe ni atue kpwa sababu ya kazi za Jesu Muokoli, milele na milele! Amina.

Aefeso 4

¹Phahi mimi ni busu kpwa kazi ya Bwana Jesu, nakuvoyani sana mkale na maisha ga kumhamira Mlungu. N'lazima muishi maisha gamhamirago Mlungu, mana wakutsambulani.

²Msihende ngulu tse. Lakini n'lazima mkubali maoni ga ayawenu. Mvumirirane na msameheane mioyo kutsuka.

³Hendani chadi wakati wosi kuika umwenga uriorehwa ni Roho wa Mlungu. Hendani hivyo kpwa kuishi na amani.

⁴Sisi hosi hu mwiri mmwenga, hwaphokera Roho mmwenga, na hwahakikishirwa raha ya ajabu badaye.

⁵Huna Bwana mmwenga, imani mwenga na ubatizo mmwenga.

⁶Mlungu ni mmwenga, naye ndiye Baba wa sisi hosi. Anahutawala, anahumira kuhenda kazi, na anakala mwehu mioyoni.

⁷Lakini chila mmwenga wajaliwa chipawache malumu kulengana na vira Jesu arivyotaka kulavya.

⁸Ndiyo mana Maandiko ganaamba: "Ariphopanda kuphiya dzulu kpwenye, waphiya na mateka anji, na achiaganyira atue vipawa."

⁹(Sambi, "Wapanda kuphiya dzulu" manage ni ni? Manage ni kukala, mwandzo watserera kuphiya kuzimu.

¹⁰Phahi iye ariyetserera kuzimu ndiye ariyepanda ko dzulu kpwenye, ili akamilishe chila chitu chila phahali.)

¹¹Naye ndiye ariyeapha atu vipawa. Anjina waatsambula akale mitume, anjina manabii, na anjina ahubiri. Chisha anjina nao achiatsambula akale achungaji na alimu a atu a Mlungu.

¹²Kazi yao ni kutayarisha atu a Mlungu ili amhumikire na kutiya nguvu mwiri wa Jesu.

- ¹³Phahi higa gandaenderera hadi kuluphiro rehu hosi rikale mwenga na humuelewe hiye Mwana wa Mlungu, ili huphere chiroho na hukale kamili dza viratu Jesu.
- ¹⁴Hipho tahundaphirikpwa hiku na hiko ni mafundzo ga handzo dza anache. Wala tahundachengbwa ni atu ambao nkulongoza ayawao makosa na werevu wao. Hinyo nkuhenda ayawao dza vidau viphirikpwavyo hiku na hiko ni phuto na maimbi.
- ¹⁵Lakini hundalunga kpweli na kumendzana zaidi, ili hukale dza Jesu kpwa chila chitu. Iye ndiye chitswa
- ¹⁶navyo vilungo vyosi nkugbwirana na kukala mwiri mmwenga. Chila chilungo nkuhenda kaziye, nkuterya na kumendza vilungo vyanjina, ili mwiri mzima uzidi kukula.
- ¹⁷Phahi enehu, nakuonyani dza mtume wa Bwana Jesu: Msiishi tsona dza atu asiommanya Mlungu, ambao maazo gao ni ga chipuzi.
- ¹⁸Tsona a jizani taaelewa ukpweli wa Mlungu. Atu hinyo a kure na uzima ambao Mlungu anaapha atue, mana taamanya njiraze na ni visoto.
- ¹⁹Kazi yao ni kuhenda udiya na mambo mai ga chila aina na wala taaona waibu.
- ²⁰Ela mwimwi tamyadzifundza hivyo kula kpwa Jesu,
- ²¹ambaye ni chandzo cha ukpweli. Nina hakika mwafundzwa na mchisikira habarize.
- ²²Mwafundzwa mriche tabiya na njira zenu mbii za asili ya dambi mrizokala nazo. Maazo genu mai gakuyugani na gachibananga tabiya zenu.
- ²³Phahi galuzani maazo genu gakale maphya.
- ²⁴Tsona muonyese tabiya nyiphya kabisa. Mana mwaumbwa kpwa mfwano wa Mlungu, ambaye ni wa haki wala kana lawama.
- ²⁵Phahi richani handzo. Chila mmwenga n'lazima amuambire myawe kpweli, mana hosi hu vilungo vya mwiri mmwenga.
- ²⁶Mchitsukirwa, msihende dambi. Msikale na tsukizi dzuwa dii,
- ²⁷wala msimuphe Shetani nafwasi akakushindani.
- ²⁸Muivi naariche kuiya, ela naahende kazi ya sawa, ili aphahe chitu cha kuganya na ayae ambao taana.
- ²⁹Msigombe maneno gogosi ga kulaphiza, ela gombani maneno ga kuterya ayawenu kulengana na maitaji gao, ili asikizao aphahe fwaida.

³⁰Msimtsukize Roho wa Mlungu ambaye ni mola wa Mlungu kuonyesa mu akpwe. Hiye Rohowe anahakikisha kala kuredza siku ambayo Mlungu andakukombolani.

³¹Phahi richani utsungu, usiru, tsukizi, kuheha, na kulaphizana. Takuna kuzirana tsona wala kuhenderana mambo mai mai.

³²Lakini oneranani mbazi na mhenderane mambo manono. Msameheane dza viratu Mlungu arivyokusameheni kpwa sababu ya Jesu ariyehuokola.

Aefeso 5

¹Phahi, muigeni Mlungu, kpwa vira mu anae mmendzwao sana.

²Mendzanani wakati wosi, dza viratu Jesu arivyohumendza hata achifwa kpwa sababu yehu. Wadzilavya dza sadaka ya kumhamira Mlungu.

³Msihadzwe na mambo ga uzindzi, udiya wala kuaza mali za atu, mana mambo higo tagafwaha kuhendwa ni atu a Mlungu.

⁴Tsona msigombe maneno ga waibu, ga chipuzi wala msihende machani mai mai sigofwaha. Lakini mshukuruni Mlungu wakati wosi.

⁵N'lazima mmanyeye kala mzinifu, mdiya na aazaye mali za atu (badala ya kumuabudu Mlungu) kandaphaha uzima wa Jesu na wa Mlungu.

⁶Msikubali kuchengbwa ni mutu na maneno ga kuphupha, mana Mlungu andaatiya adabu kali atu ambao taamuogopha kpwa sababu ya higo mambo mai nchigokuambirani.

⁷Phahi msigbwirane na atu ayi kabisa.

⁸Kare mwimwi kala mu jizani, ela hangu mkale afuasi a Jesu, mu mwangani.

⁹Na ario mwangani kazi yao ni kukala na tabiya nono, kuhenda mambo ga haki, na kugomba kpweli wakati wosi.

¹⁰Kpwa hivyo dzifundzeni mambo gamhamirago Mlungu, ili muishi dza atu ario mwangani kpweli.

¹¹Msigbwirane na atu a jiza ahendao mambo mai. Lakini higo mambo gao mai ahendago, gaikeni mwangani.

¹²Kpwa kpweli ni waibu hata kugomba kuhusu mambo gahendwago chisiri ni atu asiomuogopha Mlungu.

¹³Ela gachiikpwa mwangani, gandaonekana wazi-wazi, mana mwanga undagang'aza.

¹⁴Mwanga ndio uhendao vitu vionekane. Ndiyo mana atu nkuamba: "Lamuka we urereye! Ng'alwa ni matso, wala usikale dza lufu. Naye Jesu andakung'azira."

- ¹⁵Phahi dzimanyirireni vira msagalavyo, msikale dza azuzu, lakini kalani alachu na muonyese tabiya nono.
- ¹⁶Hendani manono chila mphahapho nafwasi, mana hizi ni siku mbii.
- ¹⁷Kpwa hivyo msikale azuzu, lakini n'lazima mmanyeye gara Mlungu alondago mhende.
- ¹⁸Msilewe uchi, mana ulevi unabananga maisha. Lakini tawalwani ni Roho wa Mlungu.
- ¹⁹Imbiranani Zaburi na mawira ganjina ga kumtogola Mlungu. Muimbireni Bwana Jesu mioyo kutsuka.
- ²⁰Na mumshukuru Baba Mlungu wakati wosi kpwa chila ahendaro, kpwa sababu ya Bwana wehu Jesu Masihi.
- ²¹Enehu, n'lazima msikizane kpwa mana mnamuogopha Jesu.
- ²²Achetu nakuambirani hivi. Chila mchetu n'lazima asikize mlumewe, dza viratu amsikizavyo Bwana Jesu.
- ²³Mana mlume ni mkpwulu wa mchewe dza viratu Jesu arivyo mkpwulu wa atue, naye ndiye muokoli wao.
- ²⁴Phahi chila mchetu n'lazima asikize mlumewe kpwa rorosi, dza viratu afuasi a Jesu amsikizavyo.
- ²⁵Alume namwi, nakuambirani: chila mlume n'lazima amendze mchewe dza viratu Jesu arivyomendza atue hata achidzilavya afwe.
- ²⁶Wafwa ili atakase atue na ubatizo kpwa kuhumira nenore, na kuatenga
- ²⁷akale a haki na bila lawama. Andaphokera atue dza viratu bwana arusi aphokeravyo bibi arusi wa nguma, mana kana dowa wala chochosi chibaya.
- ²⁸Viratu Jesu arivyomendza atue, chila mlume naye n'lazima amendze mchewe. Mana amendzaye mchewe, anadzimendza mwenye.
- ²⁹Takuna yezira mwiriwe, lakini nkuurerato na kuutundza. Vivyo hivyo Jesu naye nkuhutundzato sisi atue,
- ³⁰kpwa vira hu vilungo vya mwiriwe.
- ³¹Kama Maandiko gaambavyo, "Mlume andaricha ise na nine, agbwirane na mchewe, nao osi airi andakala dza mwiri mmwenga."
- ³²Maneno higa gana ukpweli uriodzifwitsa, mana ganahusu Jesu na atue.
- ³³Phahi nakuambirani, chila mlume n'lazima amendze mchewe dza viratu adzimendzavyo mwenye, na chila mchetu naye n'lazima amuogophe mlumewe.

Aefeso 6

- ¹Namwi anache ambao mu afuasi a Jesu, ogophani avyazi enu, mana hiyo ndiyo haki na ni sawa.
- ²Shariya ya kpwandza iriyo na ahadi inaamba, "Ogopha sowe na mayoo,
- ³ili ujaliwe na uishi maisha mare."
- ⁴Ano baba namwi, msichokoze ana enu, lakini arereni na adabu ndzuri na kuafundza mambo ga Bwana Jesu.
- ⁵Mwimwi atumwa n'lazima msikize matajiri genu ga himu duniani. Aogopheni na kuaishimu moyo kutsuka, dza viratu mumsikizavyo Jesu.
- ⁶Msihendere vinono wakati anakuonani bahi, ili akulikeneni. Hata! Lakini hendani vira Mlungu amenzavyo, kpwa mana mu atumishi a Jesu.
- ⁷Ahumikireni moyo kutsuka, kama avi mnamhumikira Mlungu wala si binadamu.
- ⁸N'lazima mmanyane kala Mlungu andamtuza chila mmwenga kpwa kaziye ndzuri ndiyohenda, akale mtumwa au siye mtumwa.
- ⁹Namwi matajiri ahenderenito atumwa enu, wala msiatisheni. Mana mwimwi mosi mkpwulu wenu ni ye mmwenga, naye akala mlunguni. Hukumuye ni ya haki wala kabaguwa mutu.
- ¹⁰Chimarigizo, nalonda uwezo mkpwulu wa Bwana Jesu ukutiyeni nguvu.
- ¹¹Vwalani silaha zosi za viha mhewazo ni Mlungu, ili mdzirinde na mipango mibaya ya Shetani ambayo ni ya chiwerevu.
- ¹²Mana tahuheha na anadamu. Ela hunahaha na pepho a nguvu, atawalao na uwezo himu dunia ya jiza, na majeshi ga pepho ayi ario dzulu.
- ¹³Kpwa hivyo halani silaha zosi za viha mhewazo ni Mlungu, ili hata viha vichichacha msishindwe, na mwisho viha vichisira, mdine.
- ¹⁴Phahi dzimanyirireni kpwa kulunga ukpweli wa Mlungu. Hinyo ukpweli undakala dza mkanda uvwalwao ni asikari. Maisha genu ga kulunga haki nagakurindeni dza chisibao cha chuma.
- ¹⁵Na habari ndzuri kuhusu Jesu zirehazo amani zindakala dza virahu, ili muimeto.
- ¹⁶Phamwenga na hivyo vyosi, gbwirirani imani dza ngao. Nayo indazuwiya mivi ya moho itsuphiwayo ni Shetani.
- ¹⁷Phokerani wokofu ukale dza kofiya ya chuma. Tsona gbwirirani neno ra Mlungu rikale dza fumo rilaviwaro ni Roho wa Mlungu.
- ¹⁸Phahi enehu, voyani wakati wosi vira Roho wa Mlungu ndivyokulongozani. M'voyeni Mlungu akusaidiyeni kpwa mambo gosi. Chisha dinisani msikate tamaa wala msiriche kuvoya Mlungu na kuavoyera atu a Mlungu.

¹⁹Piya nami nivoyerani ili nchiphaha nafwasi ya kutangaza habari ndzuri kuhusu Jesu Muokoli, Mlungu aniphe maneno ga kugomba bila wuoga. Mana hizo habari ndzuri ndizo mpango wa siri ambao Mlungu waning'azira.

²⁰Hivi sambi mino ni jela kama mhumwa wa Mlungu kpwa sababu ya kutangaza hizo habari. Nivoyerani nienderere kuzitangaza chilume kama nilondwavyo.

²¹Msena wangu Tikiko, mtumishi muaminifu wa Bwana Jesu andakuambirani niendereravyo na mambo gosi nihendago.

²²Sababu ya kumhuma kpweni ni kukumanyisani habari zehu na kukutiyani moyo.

²³Enehu, Baba Mlungu na Bwana wehu Jesu Masihi naakujaliyeni amani, na mzidi kumkuluphira na kumendzana.

²⁴Mlungu naamjaliye chila mmwenga amenzaye Bwana wehu Jesu Masihi na mendzwa isiyo na mwisho.

Afilipi

Afilipi 1

- 1** Salamu hizi zila kpwangu mimi Paulo na myangu Timothy, atumishi a Jesu Muokoli. Hunakulamusani mwimwi atu a Mlungu mosi mkalao mudzi wa Filipi. Nakuandikirani mwimwi afuasi a Jesu Muokoli mosi phamwenga na vilongozi enu na asaidizi ao.
- 2** Baba Mlungu na Bwana Jesu Masihi naakujaliyeni na mkale salama.
- 3** Namshukuru Mlungu wakati wosi nchikufikiriyani.
- 4** Nami naona raha mwangu moyoni, chila wakati nchikala nakuvoyerani.
- 5** Mana mwagbwirana nami kutangaza habari ndzuri kuhusu Jesu Muokoli, hangu siku ya mwandzo mriphomkuluphira hadi sambi.
- 6** Mlungu waandza kazi ndzuri mwenu mioyoni. Nami nina hakika andaenderera nayo mpaka Jesu Muokoli achiuya akale akaimala kabisa.
- 7** Nakumendzani sana, ndio mana chila nihendaro nakufikiriyani mwangu moyoni. Hino ni sawa kpwa mana Mlungu wahujaliya kuhenda kazi phamwenga ambayo wahupha. Mwimwi mosi mwaniterya kutangaza habari ndzuri kuhusu Jesu, na kuahakikishira atu kukala ni za kpweli, hata hivi nrivyo jela.
- 8** Mlungu anamanya nagomba kpweli: naaza sana kukala namwi, na mendzwa yangu ila moyoni mwa Jesu Muokoli.
- 9** Nakuvoyerani mzidi kumendzana, mmanyeto Mlungu na muweze kuelewa tafwauti ya sawa na makosa.
- 10** Kpwa njira hiyo mndaweza kutsambula kuhenda ra sawa, ili mkale bila ya makosa wala lawama mpaka Jesu ndiphouya.
- 11** Piya mkale na maisha ga haki na tabiya ndzuri kpwa uwezo wa Jesu Masihi. Atu achiona hivi andamtogola Mlungu na kuona utukufuwe.
- 12** Enehu, nalonda mmanyeye kukala higo garigoniphaha gaterya sana kueneza habari ndzuri kuhusu Jesu Muokoli.
- 13** Matokeoge nkukala asikari osi arindao dzumba ra mfalume na atu anjina osi anamanya kala nafungbwa jela kpwa sababu ya kumhumikira Jesu.
- 14** Kufungbwa kpwangu kukaahenda afuasi anji a Jesu azidi kumkuluphira, na anainjira nguvu zaidi kutangaza chilume ujumbe wa Mlungu.
- 15** Ni kpweli atu anjina anahubiri habari za Jesu na chidzitso, hinyo ni apinzani, mana analonda aphahe afuasi anji kuriko mimi. Lakini anjina anahubiri moyo kutsuka.

- ¹⁶Hinyo ahubirio na nia ndzuri anahenda hivyo kpwa kunimendza, kpwa vira anamanya kala Mlungu wanihuma hipha ili nikanire habari ndzuri kuhusu Jesu.
- ¹⁷Nao ahubirio na lengo ra kunipinga, taahenda hivyo moyo kutsuka. Anaona andanienjerezera mashaka hivi nrivyo jela.
- ¹⁸Ela si chitu! Akale anahubiri na nia nono hebu mbii, kpwangu mino ni sawa, nahamirwa kukala Jesu anahubiriwa. Phahi kpwa sababu hiyo n'ndazidi kuhamirwa.
- ¹⁹Mana namanya mnanivoyera na Roho wa Jesu Masihi andanitereya na mwisho n'ndatuluzwa jela.
- ²⁰Naaza sana na kutumaini nisishindwe nkaphaha waibu. Kula kare sitishirwa ni chitu chochosi. Hata sambu naaza vivi nrivyo vimtogole Jesu, nchikala mzima au nchiolagbwa.
- ²¹Kpwangu mino mana ga kuishi ni kumhumikira Jesu na kufwa ni fwaida zaidi.
- ²²Ichikala ni nienderere kuishi, naweza kumhendera kazi zaidi, ela simanya nitsambuleni!
- ²³Navutwa pande mbiri. Nia yangu baha nifwe ili nikakale na Jesu, mana hiro ndiro nono zaidi kpwangu.
- ²⁴Lakini kpwa fwaida yenu baha nienderere kuishi.
- ²⁵Namanya kpwa kpweli sindafwa sambu, ili nikuteryeni mzidi kumuadamira Mlungu, na kukala na raha kpwa sababu ya kumkuluphira.
- ²⁶Phahi nchedza kpwenu tsona mndakala na sababu kulu ya kumtogola Jesu Muokoli kpwa higo arigonihendera.
- ²⁷Ra muhimu zaidi ni mhende viratu ziambavyo habari ndzuri kuhusu Jesu Muokoli. Phahi nkedza, nkasakpwedza, bado mino n'ndasikira kukala mwadina chilume na roho mwenga. N'ndamanya kukala mnahenda kazi phamwenga na bidii, ili anjina nao aamini habari ndzuri kuhusu Jesu.
- ²⁸Msiogophe atu ambao anakupingani. Kusaogopha kpwenu ni dalili ya wazi kukala atu hinyo andaangamizwa, lakini mwimwi mndaokolwa. Mlungu mwenye ndiye agahendaye.
- ²⁹Mana wakuphani nafwasi ya kumkuluphira Jesu na wakati wanjina kuteswa kpwa sababu ya kumkuluphira.
- ³⁰Mwaniona nagaya hipho mwandzo, na bado mcheresikira kuhusu tabu zangu. Phahi namwi n'lazima mgaye dza vivyo.

Afilipi 2

- ¹Enehu, mwamkuluphira Jesu naye anakutiyani nguvu. Nayo mendzwaye inakuhendani muoneto. Isitoshe, mnashirikiana na Roho wa Mlungu kpwa kumenzana na kuonerana mbazi.
- ²Kpwa vira ni hivyo, phahi gbwiranani mkale chitu chimwenga ili nami nikale na raha tse-tse-tse. Mendzanani na mkale na moyo mmwenga mosi bu.
- ³Msishindane na apinzani enu wala kuhenda ngulu, lakini kalani apole na ayawenu muaone muhimu kuriko mwi enye.
- ⁴Chila mmwenga naasilole mamboge bahi, ela piya n'lazima adzishugulitse na mambo ga ayae.
- ⁵N'lazima mufikiriye mambo gosi dza viratu Jesu Muokoli vyokala achifikiriya.
- ⁶Hata dzagbwe Jesu kala ana asili ya Mlungu, lakini kayagbwirira phapho pha kukala a sawa naye.
- ⁷Ela badala ya hivyo wakubali kuricha vyosi na kukala kama mtumishi. Wavyalwa dza sisi na achikala na umbo ra mwanadamu.
- ⁸Wakala mpole na kumuogopha Mlungu hata achifwa chifo cha waibu kpwa kukotwa misumari Msalabani.
- ⁹Kpwa hivyo Mlungu wamuika pahali pha ishima kulu sana, na achimupha cheo chikulu kuriko vyeo vyosi;
- ¹⁰ili kpwa dzina ra Jesu, chila vwindi ripigbwe, mlunguni, duniani na kuzimu;
- ¹¹na chila lilimi rindagomba kukala Jesu Masihi ni Bwana, kpwa utukufu wa Mlungu Baba.
- ¹²Asena angu, kare huriphokalani phamwenga, kala mchimuogopha Mlungu dii yosi. Phahi sambu zidini kuhenda hivyo hata vivi ambavyo sipo. N'lazima mosi mhende bidii kumuogopha Mlungu kpwa wuoga na ishima, na kuhenda sawa kpwa atu ambao Mlungu waaokola.
- ¹³Mana Mlungu ndiye ahendaye kazi mwenu mioyoni. Nkukuhendani muaze alondago na kuhenda kulengana na mpangowe.
- ¹⁴Phahi, chila mhendaro, rihendeni bila ya kururumika wala kulumba,
- ¹⁵ili atu asiambe kala mu ayi. N'lazima muishi bila lawama tse. Mkale ana a Mlungu akalao dunia ya atu a kufyuka na a kumendza dambi. Mwimwi mndakala dza mwangaza mng'ale jizani.
- ¹⁶Ishini kulengana na neno ra kureha uzima wa milele, ili siku Jesu achiuya, nikale na ngulu dza mutu wa kushinda mairo na kazi yangu ikale taiyakala ya bure.

- ¹⁷Mriphomkuluphira na kumhumikira Jesu, vyakala kama sadaka mrizomupha. Mendzerepho mlatso wangu undamwagbwa phamwenga na sadaka hiyo. Ichikala hivyo hosi hundahererwani phamwenga.
- ¹⁸Vivyo hivyo mwimwi namwi hererwani phamwenga nami.
- ¹⁹Bwana Jesu achimendza, ndamhuma Timothy hiko kpwenu vi sambu sambu, ili wakati achedza hiku na habari zenu, zinitiye moyo.
- ²⁰Sina wanjina zaidi ya iye, ambaye anajali mambo genu chikpweli-kpweli.
- ²¹Mana atu anjina osi anadzishugulisha na mambo gao, wala sigo gara Jesu Masihi alondago.
- ²²Hata mwimwi enye mnamanya Timothy arivyo mutu mnono. Hwahenda kazi ya kutangaza habari ndzuri kuhusu Jesu phamwenga, kama mutu na ise.
- ²³Phahi mara mwenga nchimanya higo ndigoniphaha, natumaini kumhuma,
- ²⁴nami nina kuluphira kukala Bwana andanihenda nedze ko kpwenu vi sambu sambu.
- ²⁵Mwenuhu Epafrodito ni mhendadzi-kazi na asikari myangu wa jeshi ra Bwana Jesu. Nriphotaka msada mwamhuma kpwedzaniterya. Lakini vivi nikaona ni muhimu auye kuko kpwenu,
- ²⁶kpwa sababu anaaza sana kukuonani. Naye ana wasi-wasi kpwa vira mwasikira ni mkpwongo.
- ²⁷Ni kpweli Epafrodito wakala mkpwongo hata achiamba afwe. Lakini Mlungu wamuonera mbazi achimphoza. Na achinionera mbazi hata mimi piya, kpwa vira kayafwa siyaphaha utsungu zaidi ya hura nriokala nao.
- ²⁸Ndiyo mana naaza sana kumhuma, ili mumuone tsona na mkale na raha, na piya nisikale na wasi-wasi.
- ²⁹Phahi mphokerenito na raha kama mfuasi wa Bwana Jesu. Atu dza hinya n'lazima muaishimu,
- ³⁰mana wahatarisha maishage kpwa kazi ya Jesu. Kala bado phadide afwe, kpwa kuniterya. Mana mwimwi kala m'kure nami na tamuwezere kuniterya.

Afilipi 3

- ¹Phahi enehu, zaidi ya hivyo nakuambirani, hererwani kpwa sababu ya Bwana Jesu. Mino siona vibaya kukuandikirani mambo gago kpwa gago. Mana gandakuhendani mkale salama.
- ²Dzimanyirireni na hinyo atu ayi aambirao ayawao n'lazima mutu atiywe tsatsani kama shariya za Musa ziambavyo. Atu hinyo msiagbwire gao, ahendeni atu a koma.

- ³Mana sisi ndio atu a Mlungu kpwa kpweli. Hunamuabudu kpwa msada wa Rohowe, tsona hunadzikarya kuhusu mambo hurigohenderwa ni Jesu Muokoli. Tahuadamira mambo gahendwago ni mwanadamu, wala tsatsa ya mwiri.
- ⁴Ichikala kuna mutu awezaye kuhendera ngulu mahendoge kala ganaweza kumuokola, phahi angekala mimi. Kpwa kpweli mimi ninazo sababu za kutosha kuamba hivyo.
- ⁵Mino nátiywa tsatsani nriphomala sabaa mwenga. Chisha ni chivyazi cha Iziraeli, wa mbari ya Benjamini, nao avyazi angu ni Aebrania, yani mimi ni Muebrania mwenye-mwenye. Tsona, nálunga Shariya za Musa kulengana na mafundzo ga Mafarisayo.
- ⁶Kulengana na hizo shariya za Chiyahudi kala nina haki, bila lawama tse. Phahi kala namendza sana kutesa afuasi a Jesu.
- ⁷Lakini mambo gosi nrigogaona ga mana, hipha sambu nagaona upuzi na tagana fwaida kpwa sababu ya Jesu.
- ⁸Kpwa kpweli, chila chitu nrichokala nchihenda nachiona tachina mana nchifananisha na samani kulu ya kumanya Jesu Muokoli, Bwana wangu. Náricha vitu vyosi kpwa sababuye, na sambu naviona dza uchafu wa kutsupha dzalani. Maazo gangu ni nikale wa Jesu bahi,
- ⁹na nigbwirane naye ngi-ngi-ngi. Sina haki kpwa kulunga Shariya, lakini nina haki kpwa kumkuluphira Jesu. Mana Mlungu anaapha haki atu amkuluphirao.
- ¹⁰Nataka nimmanyeye vinono, chisha nimanyeye uwezo uriomfufula. Tsona nalonda nigaye dza vivyo arivyogaya iye, na nikale dza iye, hata ichikala ni kufwa, nifwe,
- ¹¹ili nami nifufulwe.
- ¹²Siamba kukala nákala kare vira Mlungu alondavyo, a'a sidzangbwekamilisha lengo hiro bii. Ela nawaniya kufika hipho, mana Jesu Muokoli wanitsambula na analonda nihende hivyo.
- ¹³Enehu, sidzitsukula kala nafika lengo hiro, hata chidide. Lakini chitu nihendacho ni kuyala ga kare na kuwaniya kuphiya mbere.
- ¹⁴Phahi nazola mbere kushinda, ili nipahe zawadi. Mana wakati Mlungu achiniha hiko dzulu andanipha zawadi hiyo, kpwa sababu namkuluphira Jesu Muokoli.
- ¹⁵Kpwa hivyo sisi huriophera chiroho nahuazeni dza vivyo. Ela ichikala anjina anaaza tafwauti ya hivyo, Mlungu andaang'aza matso.
- ¹⁶Phahi chitu muhimu n'lazima hulungeni ukpweli hurio nao kare kuhusu Jesu.
- ¹⁷Enehu, nataka mosi mwimwi muishi kuniiga mimi. Tsona sikizani sana atu ambao anaishi kulunga mfwano wa sawa huriokuonyesani.

¹⁸Nákuambirani mara nyinji na vino nakuambirani tsona kuno nasononeka: atu anji anaishi kama maadui ga Jesu wala taajali chifoche msalabani.

¹⁹Analongozwa ni tamaa mbii za miri yao, na kudzikarya na mambo ga waibu ahendago. Kazi yao ni kuaza mambo ga himu duniani bahi. Mwisho wao ni mohoni.

²⁰Lakini sisi hu enyezi a dzulu mlunguni. Naswi hunamgodza Muokoli wehu kula mlunguni kpwa hamu sana, naye ni Bwana Jesu Masihi.

²¹Andahumira uwezowe ambao unaweza kutawala chila chitu, ili agaluze hino miri yehu minyonje ifwayo. Andaihenda kama mwiriwe wa ajabu ariouphaha bada ya kufufulwa.

Afilipi 4

¹Enehu, nakumendzani sana na nina hamu ya kukuonani. Mwimwi mu zawadi ya kazi yangu na nina raha sana kpwa sababu yenu. Phahi asena angu dinani chilume mzidi kumkuluphira Bwana Jesu.

²Sambi kuna gano magoma mairi yani Yodia na Sintike, ambao analumbana. Navoya ariche na akale na nia mwenga, mana osi ni a Bwana Jesu.

³Phahi uwe mtumishi myangu muaminifu, nakuvoya uaterye hano achetu. Mana náhenda nao kazi ya kutangaza habari ndzuri kuhusu Jesu, phamwenga na Kilementi na ahendadzi-kazi ayangu anjina ambao madzina gao gaandikpwa ndani ya chitabu cha uzima.

⁴Phahi chila wakati hererwani kpwa sababu mu a Bwana Jesu! Tsona nakuambirani, hererwani!

⁵Chila mutu naamanye kukala mu apole. Piya mmanyeye kala Bwana Jesu a phephi na kuuya.

⁶Msihende wasi-wasi kuhusu chochosi. Ela maitaji genu gosi mum'voye Mlungu, na mumshukuru kpwa chila chitu.

⁷Phahi Mlungu andakuphani amani ambayo mwanadamu kaweza kuielewa. Amani hiyo naitawale mioyo na achili zenu kpwa sababu mnamkuluphira Jesu Muokoli.

⁸Chimarigizo, enehu nakuambirani, achili zenu nazitawalwe ni mambo higa: mambo ga kpweli, ga ishima, ga haki, na mambo gasigo na lawama. Chila wakati azani mambo gahamirago atu, ga nguma nono, na mambo manono zaidi, ambago ganaweza kulikpwa ni atu.

⁹Hendani chila chitu nrichokufundzani na mchikubali. Nákuambirani mambo manji na mchiniona nihendavyo. Sambi nataka mlunge mfwano hinyo, naye Mlungu arehayeye amani, andakurindani.

- ¹⁰Namshukuru sana na kumtogola Bwana Jesu kpwa kukala mwauya kunishugulikiya tsona. Siamba kala mwaricha kunishugulikiya, a'a! Lakini ni vira kala tamuna nafwasi.
- ¹¹Tsona siamba hivyo kpwa sababu nina shida, hata, ela katika hali yoyosi mino nádzibaza kutosheka.
- ¹²Namanya kuishi bila chitu, na namanya kuishi na vitu vinji. Nádzifundza siri ya kuishi hali zosi, kurya na kusaza, au kukala na ndzala, kukala na vinji au kukosa.
- ¹³Mana naweza kuhenda chila chitu kpwa msada wa iye aniphaye nguvu.
- ¹⁴Lakini náonato mwimwi kugbwirana nami na kuniterya tabu zangu.
- ¹⁵Mwi Afilipi, mnamanya vira irivyokala mwandzo nriphoandza kutangaza habari ndzuri kuhusu Jesu hiko kpwenu. Nriphouka jimbo renu ra Makedonia, ni mwimwi machiyenu ndimwi kala huchiteryana, mana mwanipha msada wa pesa. Takuna kundi ranjina ra afuasi a Jesu ariohenda hivyo.
- ¹⁶Piya nriphokala mudzi wa Thesalonike mwaniterya si mara mwenga si mara mbiri.
- ¹⁷Siamba hivi kpwa nalonda mniterye, ng'oo! Lakini nalonda mphahe zawadi kpwa mbazi zenu.
- ¹⁸Kpwa vi sambu enehu, nina chila chitu n'londacho, hata na zaidi. Mana náphaha vitu vyosi virivyorehwa ni Epafrodito kula kpwenu. Vitu hivyo ni dza sadaka ya kunukato, ambayo Mlungu anaikubali na inamhamira.
- ¹⁹Naye Mlungu wangu andakutimizirani maitaji genu gosi na utajiriwe wa ajabu, kpwa sababu ya vira Jesu Muokoli arivyohenda.
- ²⁰Phahi enehu, Mlungu Baba wehu naatogolwe milele na milele. Amina.
- ²¹Niphozerani atu a Mlungu osi ario a Jesu Muokoli. Piya mkaphozwa ni afuasi ayangu ario hiku.
- ²²Atu a Mlungu osi hipha akakuphozani, hasa atu a nyumba ya Kaisari, Mtawala wa Chirumi.
- ²³Navoya Bwana wehu Jesu Masihi akujaliyeni mosi.

Akolosai

Akolosai 1

¹Baruwa hino ila kpwangu mimi Paulo, ambaye nátsambulwa ni Mlungu kutangaza habari ndzuri kuhusu Jesu Muokoli. Mimi phamwenga na mfuasi myangu Timothi hunakulamusani.

²Nakuandikirani mwimwi atu a Mlungu ambao mu afuasi a Jesu aaminifu mrio mudzi wa Kolosai. Baba Mlungu naakujaliyeni na mkale salama.

³Chila mara huchikala hunakuvoyerani, hukumshukuru Mlungu, Baba wa Bwana wehu Jesu Masihi.

⁴Hukumshukuru kpwa sababu hwasikira vira mkuluphiravyo Jesu Muokoli na vira muamendzavyo atu osi a Mlungu.

⁵Mnahenda hivyo mana mnagodzera kpwa hakika kukala Mlungu andakujaliyani na mambo manono ambago wakatayarishirani kare hiko mlunguni. Mwasikira mambo higa mapema sana mriphosikira habari ndzuri kuhusu Jesu Muokoli, ambazo ni ujumbe wa kpweli.

⁶Hizi habari ndzuri ambazo zarehwa kpwenu zinaenea chila phahali duniani. Zinagaluzi maisha ga atu anji ili aishi maisha ga kumhamira Mlungu. Piya zinagaluzi maisha genu, kuandzira siku ya kpwandza mriphosikira na kuelewa wazi-wazi Mlungu arivyo na mbazi.

⁷Mwafundzwa ni Epafara, mhendadzi-kazi myawehu amendzwaye sana. Anamhumikira Jesu kpwa uaminifu na anakuteryani.

⁸Na ndiye ariyehuambira mmendzavyo atu a Mlungu kpwa msada wa Roho wa Mlungu.

⁹Hangu huriphosikira habari hizi za kukuhusuni mwimwi, hunaenderera kuvoyerani. Chisha hunavoya Mlungu akuteryeni kumanya gosi ambago analonda mhende, na mkale na marifwa gosi ga kuelewa njiraze.

¹⁰Phahi mndadziheshimu dza atu a Mlungu alondwavyo kukala. Namwi mndaenderera kuhenda chila aina ya mahendo manono, piya mndazidi kumanya Mlungu vinono zaidi.

¹¹Na hunakuvoyerani Mlungu akutiyeni nguvuze za ajabu mwenu mioyoni, ili muweze kuvumirira na kukala na raha wakati mnagodzera tabu zisire.

¹²Namwi mshukuruni Baba Mlungu, yekuhendani mphahle fungu ra mambo arigogatayarishira atue aishio mwangani.

¹³Mlungu wahutivya kula kpwa utawala wa Shetani, yani kuishi jizani. Na achihujiza mwangani kuishi ufalume wa Mwanawe ammendzaye.

- ¹⁴Wahukombola na achihusamehe dambi zehu, kpwa sababu ya chifo cha Mwanawe ammendzaye.
- ¹⁵Takuna mutu awezaye kumuona Mlungu, lakini Jesu ni dza iye na nkuhumanyisa vira Mlungu arivyo. Jesu ana uwezo mkpwulu kuriko viumbe vyosi.
- ¹⁶Mana iye ndiye ariyeumba chila chitu chiricho duniani na dzulu mlunguni. Waumba vitu vionekanavyo na visivyoonekana. Hata viumbe vyosi vya uwezo vyaumbwa ni iye, yani malaika, pepho na hata Shetani. Waumba chila chitu ili chimuogophe.
- ¹⁷Wakalako kabla viumbe vyosi kuumbwa. Anatawala vitu vyosi na kpwa hivyo chila chitu chinaenderera phatuphe.
- ¹⁸Analongoza atu amkuluphirao dza viratu chitswa chilongozavyo mwiri. Ndiye chandzo cha maisha maphya ga atue. Tsona ni mkpwulu wa atu osi ndiofufulwa na kuishi milele. Phahi Jesu ni mtawala mkpwulu wa chila chitu tse-tse-tse.
- ¹⁹Mlungu waonato kukala Mwanawe akale na asiliye yosi tse-tse-tse.
- ²⁰Mlungu wamhumira kuuyiza uhusiano mnono na viumbe vyosi, virivyo duniani na dzulu mlunguni. Wahumira mlatso wa Mwanawe uriomwagika msalabani kureha amani.
- ²¹Mwimwi ndimwi mriokala maadui a Mlungu, mchitengbwa kure kpwa sababu ya maazo genu na mahendo genu mai.
- ²²Lakini sambu Mlungu wauyiza uhusiano mnono, mana Mwanawe wakala mwanadamu na achifwa. Wahenda hivyo ili akureheni mbereze bila lawama wala makosa.
- ²³Phahi n'lazima muenderere kumkuluphira Jesu. Naro kuluphiro renu naridine, dza nyumba yodzengebwa na msingi wa kudina. Tsona msigaluke, kalani na uhakika wa mambo mrigolagbwa mriphosikira habari ndzuri kuhusu Jesu Muokoli. Habari hizi zagota dunia ndzima, na mimi Paulo ni mmwenga wa hinyo anaozigoteza.
- ²⁴Hipha sambu mimi nagaya. Lakini nahererwa mana ninagaya kpwa kazi yangu ya kukuteryani mwimwi afuasi ayangu. Mino ni tayari kugaya kpwa vyovyosi ichikala n'lazima, ili nimarigize kazi yangu ya kumhumikira Jesu, dza viratu iye mwenye arivyogaya. Nahenda hivyo ili nisaidiye afuasi a Jesu, ambao ni dza mwiriwe.
- ²⁵Nakala mtumishi wa afuasi a Jesu kpwa sababu Mlungu wanipha jukumu malumu kukuteryani. Jukumu hiri ni kukutangazirani mafundzoge gosi tse-tse-tse.
- ²⁶Hangu kare Mlungu waika mpangowe wa siri wala tauyamanywa ni vivyazi vyotsapa. Lakini sambu siri hizi wazimanyisa atue osi.

²⁷Mlungu wakata shauri kuhueleza kukala atu asio Ayahudi nao andajaliywa na unono wa ajabu wa Jesu. Nao mpangowe wa siri ni hinyu: Jesu a mwenu mioyoni, na kpwa hivyo mna uhakika wa kukala dza iye hiko mlunguni.

²⁸Phahi hunatangaza ujumbe wa Jesu kpwa atu osi, na hunahumira marifwa gehu gosi kuonya na kufundza chila mutu. Lengo rehu ni kumreha chila mmwenga mbere za Mlungu ammanyane na kumwadamira kabisa kabisa.

²⁹Ndiyo mana nahenda kazi na bidii zangu zosi na kuumira uwezo mkpwulu aniphao.

Akolosai 2

¹Nalonda mmanyane kukala nahenda bidii iwezekanavyo kukuteryani mwimwi afuasi a mudzi wa Kolosai, na hinyo ario mudzi wa Laodikia, na hata afuasi anjina osi ambao sidzangbwekutana nao.

²Nahenda hivi ili nikutiyeni moyo na mzidi kumendzana na mkale chitu chimwenga. Piya nalonda mkale na raha sana mana mnamanya kpwa hakika mpango wa siri wa Mlungu, yani kuhusu Jesu ariyehukola.

³Ni iye macheye awezaye kukuphani marifwa ga kumanya chila chitu ambacho Mlungu wakuhenderani.

⁴Nakuambirani hivyo ili mutu asikuchengeni kpwa mafundzo ambago mnaweza kuona ni manono lakini mbavi ni ga handzo.

⁵Mana hata dzagbwe ni kure namwi, lakini nakufikiyani sana. Na ninahererwa kusikira kukala mnaenderera kukala chitu chimwenga na kumkuluphira Jesu kpwa kpweli.

⁶Kpwa vira mwamkuluphira Jesu Muokoli, ambaye ni Bwana wenu, phahi n'lazima muenderere kuhenda alondavyo, mana mwimwi mu akpwe.

⁷Dinisani sana kumkuluphira Jesu, dza viratu muhi urivyo na mizi yophiya ndani na tauzuka bii. Namwi zidini kumkuluphira tse-tse-tse. Tsona dinisani kukuluphira kuhusu ukpweliwe mriofundzwa na chila wakati mshukuru.

⁸Msikubali mutu yeyesi kukulazimishani kuamini mafundzo kuhusu Mlungu ambago ganaonekana ga marifwa lakini sigo. Higa tagana mana na ni ga handzo, nago tagala kpwa Jesu ela ni mila za atu na maoni ga dini zao.

⁹Msiangamizwe ni higa mafundzo ga handzo, kpwa sababu Jesu ariphokala mwanadamu wakala na asili yosi ya Mlungu.

¹⁰Mna vitu vyosi vitakikanavyo kpwa maisha ga chiroho, mana mu atungbwa a Jesu. Iye ni mkpwulu wa atawala osi na viumbe vyosi virivyo na uwezo.

¹¹Mriphomkuluphira ni kama avi mwatiywa tsatsani kpwa njira ya chimacheye. Mutu achitiywa tsatsani seemu ndide ya mwiri ndiyo iuswayo. Lakini

mriphomkuluphira Jesu, wakuusirani uwezo wa asili zenu za chibinadamu ili zisikutawaleni tsona.

¹²Mriphobatizwa ni kama avi mwazikpwa phamwenga naye. Mlungu ariphomfufula, namwi piya mwahewa maisha maphya, mana mwaamini kukala Mlungu wamfufula kpwa uwezowe.

¹³Hipho kala tamdzangbwemkuluphira Jesu, kala mkafwa chiroho kpwa sababu ya dambi, na kala mnatawalwa ni asili zenu za chibinadamu. Lakini bada ya kumkuluphira, Mlungu wakuphani maisha maphya. Naye wahusamehe dambi zehu zosi.

¹⁴Ni kama avi mahendo gehu gosi ga dambi kala gakaandikpwa, huchishitakiwa kotini, na huchiphahikana na makosa. Phahi Mlungu wahufutira makosa gehu phara Jesu ariphokotwa msalabani,

¹⁵na achishinda viumbe vyosi vii vyokala na uwezo. Tsona achivigbwiza haya kpwa kuamanyisa atu osi kuhusu ushindi wa Jesu ariouphaha msalabani.

¹⁶Kpwa hivyo msisikize atu ambao anakuambirani mnakosera kpwa kusalunga shariya kuhusu kurya na kunwa, au kusherekea Sukukuu kama vira Sukukuu ya Kutuluka Mwezi na Siku ya Kuoya.

¹⁷Mila hizi ni alama ambazo Mlungu waapha Ayahudi hipho kare ili kuamanyisa mambo ndigokpwedza badaye. Lakini sambu Jesu wakpwedza na ndiye ahuokolaye.

¹⁸Msikubali mutu yeyesi akuhendeni mkose kujaliwa ni Mlungu kpwa kuamini mafundzo ga handzo, au kukulazimishani mdzizarau au kuabudu malaika. Mutu dza hiye anaphaha mafundzoge kpwa kutafasiri ruwiya. Naye ana ngulu ela siyo sawa, mana higo gosi ni maazo galago mwakpwe achilini, ambayo inalongozwa ni asiliye ya chibinadamu.

¹⁹Waricha kufundza mafundzo ga kpweli na kalongozwa tsona ni Jesu, ambaye analongoza atue dza viratu chitswa chilongozavyo mwiri. Jesu nkuunganisha atue phamwenga, na akaapha nguvu dza viratu kano ziphavyo mwiri nguvu. Atue asiphogbwirana naye taaphera chiroho vira Mlungu amendzavyo.

²⁰Ni kama avi mwafwa phamwenga naye, kpwa hivyo si turi kulunga mila za atu na maoni ga dini za atu asiomkuluphira Jesu. Takuna haja kabisa ya kulunga shariya za dini,

²¹ambazo zinaamba kukala usigbwire wala kuguta vitu fulani na usirye vyakurya fulani.

²²Mana shariya hizi zatungbwa ni atu kuhusu vitu ambavyo tavidumu, vichihumirwa nkusira.

²³Atu anji anaona shariya hizi ni za marifwa, kpwa sababu zinataka atu ahende mambo magumu ili aonyese kukala anadzilavya kumhumikira Mlungu. Tsona

zinataka atu adzizarau, na agayise miri yao. Lakini kpwa kpweli shariya hizi taziterya atu kutawala tamaa zao za asili ya chibinadamu.

Akolosai 3

¹Mlungu ariphomfufula Jesu, ni kama avi wakufufulani mwimwi piya. Kpwa hivyo dzilavyeni mhende alondago Jesu, ariye mlunguni, uphande wa mkpwono wa kulume wa Mlungu, phatu pha ishima kulu sana.

²Wakati wosi n'lazima mririkane kuhusu maisha genu maphya na mambo ga mlunguni, wala msiaze mambo ga asili ya chibinadamu.

³Kpwa sababu maisha ga kare gasira, kama avi mwafwa, na sambu mna maisha maphya. Atu taaelewa kukala maisha genu maphya na Jesu ni chitu chimwenga kpwa Mlungu.

⁴Lakini Jesu ndiye chandzo cha maisha genu maphya, na siku achiuya hipha duniani na mwangaza mkpwulu na utukufu, mndatsembuka naye na mkale dza iye.

⁵Phahi richani mahendo mai ga asili ya chibinadamu. Nago ni udiya, uzembe, na tamaa ya achetu ama alume anji. Piya msiaze mali za atu mana mndaabudu mali badala ya Mlungu.

⁶Kpwa kpweli Mlungu andaatiya adabu kali atu ahendao mambo higo.

⁷Kabla tamdzangbwemkuluphira Jesu, mwimwi enye kala mnahenda mambo higa mai.

⁸Lakini sambu richani higa gosi: tsukizi, utsungu, kuzirana, kuochera atu ngulu, na kugomba maneno mai mai.

⁹Msichengane, mana hino kala ni tabiya yenu ya maisha ga kare, ambago kala mchiishi kabla ya kumkuluphira Jesu.

¹⁰Sambu mna tabiya nyipha kabisa. Mlungu wakuphani maisha higa, na chila wakati anakuhendani muaze na kuhenda dza iye, ili mzidi kumanya kpwa kpweli.

¹¹Phahi takuna tafwauti ya Myahudi na asiyekala Myahudi, wa kutiywa tsatsani au kusatiywa tsatsani. Takuna tafwauti ya ariyesoma wala ambaye kasomere. Takuna tafwauti ya mtumwa wala asiyekala mtumwa. Osi a sawa mana ana maisha maphya kula kpwa Jesu. Ni iye bahi ariye muhimu, na anaishi mioyoni mwa atu amkuluphirao.

¹²Mlungu wakutsambulani mkale atue. Mwatengbwa kumhumikira Mlungu na anakumendzani. Kpwa hivyo mkale apole, n'lazima mkale na mbazi, msihende ngulu, mkubali maoni ga ayawenu, mvumirirane,

¹³na ichikala kuna atu ambao taaelewana, n'lazima asameheane. Dza vivyo Mlungu arivyokusameheni, mwimwi piya sameheni ayawenu.

¹⁴Na zaidi ya gosi mendzanani! Mana mchimendzana mndakala chitu chimwenga kabisa.

¹⁵Jesu wakuhendani mkale na amani, nayo inakuteryani kumanya ra kuhenda. Mlungu wakutsambulani mkale atue na anataka muishi phamwenga na amani, dza vilungo vya mwiri mmwenga. Na mshukuruni Mlungu chila wakati.

¹⁶Ririkanani kuhusu habari za Jesu ili zitawale maisha genu. Fundzanani na mkanyane kpwa marifwa manji. Imbani zaburi na mawira ga chiroho kumtogola Mlungu. Tsona mshukuruni mioyo kutsuka.

¹⁷Kpwa vira hu afuasi a Bwana Jesu, n'lazima chila chitu ndichohenda na gosi ndigogomba gakale kama alondavyo. Na chila wakati mshukuruni Baba Mlungu kpwa gosi ambago Bwana Jesu wakuhenderani.

¹⁸Chila mchetu ariyelólwa n'lazima amsikize mlumewe, kpwa sababu hivyo ndivyo Bwana Jesu atakavyo.

¹⁹Na chila mlume n'lazima amendze mchetuwe, amterye na asimhendere usiru.

²⁰Anache namwi, n'lazima muaogophe avyazi enu chila wakati, kpwa mana hivyo ndivyo Bwana Jesu alondavyo.

²¹Namwi avyazi, msihendere ana enu vibako kpwa kualamu dii yosi. Mana mchihenda hivyo mndaavundza mioyo.

²²Namwi atumwa n'lazima muogophe matajiri genu kpwa chochosi mhendacho. Msiahendere vinono wakati anakuonani bahi, ili akutogoleni. Hata! Lakini hendani vira Mlungu atakavyo moyo kutsuka, kpwa sababu mnamuogopha Bwana Jesu.

²³Kazi yoyosi mhendayo, ihendeni na chadi na moyo mmwenga. Hendani kazi zenu vinono kama avi mnazihenda zimhamire Bwana Jesu, wala sio mwanadamu.

²⁴Mmanyeye kukala Bwana Jesu andakuphani zawadi. Andakuphani mambo manono ambago wagatayarishira atue. Mana Jesu ariyehukola ndiye tajiri mwenye mumhumikiraye.

²⁵Lakini ichikala mnaenderera kuhenda makosa, Mlungu andakutiyani adabu. Hukumu ya Mlungu taionera mutu.

Akolosai 4

¹Namwi matajiri ahendereni atumwa enu haki na sawa, mana mnamanya mnamhumikira Mkwulu hiko mlunguni, yani Jesu.

²Endererani kuvoya Mlungu chila mara, na mchikala mnavoya kalani asikizi, na mumshukuru Mlungu sana.

³Mchikala mnavoya piya naswi huvoyereni Mlungu ahuphe nafwasi ya kutangaza mpango wa siri kuhusu Jesu, ambao ni chisa cha mimi kukala jela.

- ⁴Phahi nivoyerani nienderere kuamanyisa atu siri hiyo, kama nilondwavyo kuhenda.
- ⁵Mchikala mu phamwenga na atu ambao taadzangbwemkuluphira Jesu, onyesani tabiya ndzuri na mhende manono chila mphahapho nafwasi.
- ⁶Phahi wakati wosi bishani nao chituwo. Maneno genu nagakale manono, ili afwahirwe na azidi kugasikiza. Ndipho mndamanya kumjibu vizuri chila mutu.
- ⁷Tikiko ni mfuasi myawehu amendzwaye sana. Hunahenda naye kazi ya Bwana Jesu, tsona ananiterya na ni mutu ambaye naweza kumuadamira. Naye andakuambirani niendereravyo.
- ⁸Sababu ya kumhuma kpwenu ni kukumanyisani habari zehu na kukutiyani moyo.
- ⁹Piya aredza na Onesimasi, mfuasi myawehu amendzwaye sana na ni mutu wa kuadamira. Hiyu ni wa ko kpwenu. Osi airi andakpwedza akuambireni mambo gosi garigo hiku.
- ¹⁰Mfungbwa myangu aihwaye Aristariko, na Mariko ambaye ni m'bari wa Barinaba, akakuphozani. Ichikala Mariko andakpwedza hiko kpwenu, phahi msiyale kumkaribishato kama mrivyoambwa.
- ¹¹Piya Joshuwa ambaye dzina ranjina ni Justo akakuphozani. Aristariko, Mariko na Joshuwa ndio Ayahudi bahi, ambao ananiterya kazi ya kumhumikira Mlungu. Nao ananitiya moyo sana.
- ¹²Piya mkaphozwa ni Epafara, mutu wa ko kpwenu, ambaye anamhumikira Jesu Muokoli. Chila wakati anakuvoyerani sana, mzidi kumkuluphira Mlungu na mkale na uhakika wa gosi ambago anamendza.
- ¹³Nakuambirani kpweli mana námuona vira arivyokuhenderani kazi kpwa bidii, mwimwi na yawenu a midzi ya Laodikia na Hierapoli.
- ¹⁴Na mkaphozwa ni Dema phamwenga na Dakitari Luka, hummendzaye sana.
- ¹⁵Niphozerani afuasi a Jesu ario Laodikia, piya niphozerani Nimufa na kundi rosi ra afuasi akutanao mwakpwe nyumbani.
- ¹⁶Bada ya baruwa hino kusomerwa atu osi hipho Kolosai, hakikishani mnaiphirika ikasomwe kpwa afuasi a Laodikia. Piya náandikira afuasi a Laodikia baruwa, phahi iphaheni na muisome nayo.
- ¹⁷Mwambireni Arikipo: Paulo anaamba hivi, "Kazi hiyo uriyohewa ni Bwana Jesu, n'lazima uimarigize."
- ¹⁸Chimarigizo, mimi Paulo nakuandikirani higa na mkpwono wangu. Enehu, msiyale kunivoyera mana ni jela. Bwana Jesu naakujaliyeni.

1 Athesalonike

1 Athesalonike 1

¹Baruwa hino ila kpwa Paulo, Sila na Timothi. Hunakuandikirani mwimwi afuasi a Jesu mrio hiko mudzi wa Thesalonike, atu a Baba Mlungu na Bwana Jesu Masihi. Mlungu naakujaliyeni na mkale salama.

²Hukumshukuru Mlungu chila wakati kpwa sababu yenu, na wakati wa kuvoya, hukukuvoyerani piya.

³Mana wakati hunavoya Baba Mlungu hukutambukira mahendo manono mhendago kpwa sababu ya kuluphiro renu. Hukutambukira vira mendzwa yenu inavyokuhendani mhende kazi kpwa bidii, na vira muendereravyo kukala na uhakika wa kukala Bwana wehu Jesu Masihi andauya.

⁴Enehu, hunamanya kukala Mlungu anakumendzani, naye wakutsambulani ili mkale atue.

⁵Mana wakati huriphokufundzani habari ndzuri kuhusu Jesu Muokoli, taiyakala ya maneno bahi, lakini piya yakala na Roho wa Mlungu. Mana kala huna hakika kukala ujumbe hinyo ni wa kpweli; na mnamanya hurivyoishi namwi ili hukufundzeni kuishi maisha gamhamirago Mlungu.

⁶Mwimwi mwalunga mfwano wehu na mchiiga Bwana Jesu. Hata dzagbwe mwateswa sana ela mwaphokera ujumbe na raha irehwayo ni Roho wa Mlungu.

⁷Namwi mwakala mfwano wa afuasi osi mrio nao hiko seemu za Makedonia na Akaya.

⁸Mana tamyaeneza ujumbe wa Bwana Jesu hiko Makedonia na Akaya bahi, ela piya habari za kuluphiro renu kpwa Mlungu zaenea chila phahali. Kpwa hivyo tahuna ra kugomba tsona.

⁹Piya o enye anaenderera kugomba kuhusu vira mrivyohukaribisha vinono na mrivyoricha kuabudu vizuka na vinyagu, mchigaluka kumhumikira Mlungu wa kpweli ariye hai.

¹⁰Chisha anagomba kuhusu vira mgodzeravyo Mwanawe edze kula mlunguni. Mlungu wamfufula, naye ndiye ndiyehutivya na hukumu kali yedzayo.

1 Athesalonike 2

¹Enehu, mwimwi enye mnamanya kala charo chehu cha kpwedza kpweni tachiyakala cha bure.

²Mnamanya hurivyozulumiwa ni atu a mudzi wa Filipi na vira hurivyogaya hiko kabla ya kpwedza kpweni. Lakini Mlungu wahupha nguvu za kutangaza nenore bila wuoga, hata dzagbwe kala hukazangirwa ni hinyo ariohupinga.

- ³Mahubiri gehu tagayategemea handzo au nia mbii hipho huriphokuambirani mumkubali Jesu, wala tahutakire kuchenga mutu yeyesi.
- ⁴Badala ya hivyo Mlungu wahuona hu atu a kuaminika na a kufwaha kutangaza habari ndzuri kuhusu Jesu Muokoli. Naswi tahugomba kufurahisha atu, lakini hunalonda kumhamira Mlungu amanyaye hata mioyo yehu.
- ⁵Mana mwi enye mnamanya kukala tahuyahumira maneno ga mtswano ili mkubali. Wala tahuyahumira werevu kudzifwitsa ili hufwaidike kula kpwenu, hata ye Mlungu ni shahidi wehu.
- ⁶Wala tahuyalonda kulikpwa ni atu, akale ni mwimwi au mutu wanjina yeyesi.
- ⁷Kpwa vira hu mitume a Jesu, hungeonyesa uwezo wehu na kuvoya mambo fulani kula kpwenu. Lakini sino hwakala apole kpwenu dza mchetu areravyo anae atsanga.
- ⁸Hwakumendzani sana hata tahuyakushirikishani neno ra Mlungu macheye, ela piya maisha gehu, mana hwaishi phamwenga kama chitu chimwenga.
- ⁹Enehu, ikale tamtambukira hurivyohenda kazi kpwa bidii? Wakati huriphokutangazirani neno ra Mlungu, hwahenda kazi usiku na mutsi, ili maitaji gehu gasikale mzigo kpwenu.
- ¹⁰Mwimwi mu mashahidi gehu dza viratu Mlungu, kukala maisha gehu hiko kpwenu gakala manono na ga haki bila lawama.
- ¹¹Mnamanya vira hurivyohendera chila mmwenga dza viratu baba ahenderavyo anae mwenye.
- ¹²Hwakutiyani moyo, huchikuphani pore na huchizidi kukuambirani muishi maisha gamhamirago Mlungu. Mana wakutsambulani mtawale phamwenga naye na mphahe nguma dza iye.
- ¹³Tsona huna sababu yanjina ya kumshukuru Mlungu chila wakati. Huriphokureherani ujumbe wa Mlungu, tamyausikira na kuuphokera dza ujumbe wa mwanadamu, lakini mwauphokera dza ujumbe wa Mlungu, na kpwa kpweli ndio. Nao unagaluzo maisha genu mwimwi mukuluphirao.
- ¹⁴Enehu, gago garigohendeka kpwenu gahenderwa makundi ga afuasi a Jesu Muokoli ario jimbo ra Judea. Mwimwi mwazulumiswa ni atu enu dza viratu afuasi a hiko Judea arivyozulumiwa ni Ayahudi ayawao.
- ¹⁵Mana Ayahudi anjina aolaga manabii ao, anjina achimuolaga Bwana Jesu. Na hivi sambu anahutesa na anahuzoresa. Phahi anamtsukiza Mlungu, na kupinga atu osi
- ¹⁶kpwa kuhukahaza kutangaza ujumbe wa Jesu kpwa atu asio Ayahudi, mana anaogopa anjina andaokolwa. Chihivyo anadzienjerezera dambu chila siku. Kpwa hivyo vivi sambu hukumu kali ya Mlungu ikaagbwerera.

¹⁷Enehu, huripholazimishwa kukurichani, hwatengbwa chimwiri sisi na mwimwi kpwa muda, lakini maazo gehu gachikala phamwenga namwi. Naswi hwajaribu chila njira kuuya tsona mana kala huna hamu ya kukuonani.

¹⁸Kala hunataka hwedze hukuloleni. Nami nájeza mara nyinji nedze nikuloleni, ela Shetani achinizuwiya.

¹⁹Ndiphoima mbere za Bwana Jesu wakati achedza, huna hakika kukala mndakala mcheremkuluphira. Phahi mndahuenda huphahe zawadi, naswi hundakala na ngulu na raha.

²⁰Kpwa kpweli mnauhenda hukale na ngulu na raha kpwa sababu ya tabiya na mahendo genu manono.

1 Athesalonike 3

¹Mwishowe siyaweza kuvumirira zaidi, náona baha nibaki Atheni machiyangu.

²Lakini nákata shauri kumhuma mwenehu Timothy kpwenu. Naye ni mhumwa wa Mlungu wa kutangaza habari ndzuri kuhusu Jesu ariyehuokola. Nami námhuma ili edze akutiye ni nguvu na akutiye ni moyo.

³Náhenda hivyo ili kusikale na yeyesi ndiyericha kumkuluphira Jesu kpwa sababu ya mateso higa. Mana mnamanya kukala mateso dza higo ni mpango wa Mlungu.

⁴Chisha wakati huriphokala phamwenga hwakuambirani chimbere kukala hundateswa, na kama mmanyavyo, hivyo ndivyo vyokala.

⁵Hino ndiyo sababu ya kumhuma Timothy. Siyaweza kuvumirira, ndiyo mana námhuma ili edze alole ichikala mcheremkuluphira Jesu. Kala nina wasi-wasi chahi Shetani wakuchengani mchiricha kukuluphira, na kazi yehu ikale ya bure!

⁶Sambi Timothy akauya, naye akahurehera habari za kuhutiya moyo kuhusu mendzwa yenu na vira muendereravyo kukuluphira. Akahuambira kukala mnahutambukira chila wakati na mna hamu ya kuhuona dza vivyo hurivyo na hamu ya kukuonani.

⁷Kpwa hivyo enehu, katika tabu na mateso gehu gosi hukatiywa moyo kpwa sababu ya kudina kpwenu chilume.

⁸Mana hipha sambu maroho gehu gakuuya phamwenga kpwa kusikira kala mkadina chilume kpwa kumkuluphira Bwana Jesu.

⁹Tahuweza kuricha kumshukuru Mlungu kpwa sababu ya raha ambayo mnahutiya!

¹⁰Hunazidi kuvoya Mlungu usiku na mutsi, tsona hunavoya na mioyo yehu yosi, ili huphahe nafwasi ya kukuonani matso kpwa matso. Chisha hukufundzeni mambo zaidi ambago ni mgamanye kuhusu kumkuluphira Bwana Jesu.

¹¹Hunavoya Baba Mlungu mwenye na Bwana wehu Jesu ahutengezere njira ili hwedze vi sambu sambu.

¹²Naye Bwana Jesu naakutiyeni mbazi, mmendzane na kumendza atu osi, dza sisi hunavyokumendzani. Namwi hendani hivyo zaidi na zaidi.

¹³Chihivyo andatiya nguvu mioyo yenu, namwi tamndakala na lawama wala makosa mbere za Baba Mlungu, wakati Bwana wehu Jesu ndiphokpwedza na malaikae osi.

1 Athesalonike 4

¹Phahi enehu mwadzifundza kula kpwehu vira ambavyo mnatakpwa muishi, ili kumhamira Mlungu. Na kpwa sababu hu afuasi amwenga a Bwana Jesu, hunakuvoyani na kukukanyani muenderere kuhenda manono zaidi na zaidi.

²Mana mnamanya gara malagizo hurigo kuphani kpwa uwezo wa Bwana Jesu.

³Mlungu anakulondani muishi bila lawama. Kpwa hivyo msikale azembe.

⁴Chila mlume anatakpwa amanye vira anavyoweza kuzuwiya mwiriwe. Ni lazima kuishi maisha ga ishima, maisha gasigo lawama

⁵wala tamaa mbii dza atu asio na dini, au asiommanyanya Mlungu.

⁶Phahi mutu naasimkosere myawe hata chidide kuhusu dzambo hiri. Mana hwakuambirani kare na huchikukanyani kukala Bwana Jesu andaatiya adabu kali ahendao mambo higo.

⁷Mlungu wahuiha huishi maisha gasigo lawama, wala si maisha ga uzembe.

⁸Kpwa hivyo anayezarau mafundzo higa kamzarau mutu, ela anamzarau Mlungu ambaye anakuphani Rohowe.

⁹Enehu, takuna haja ya kukuandikirani kuhusu kumendza afuasi ayawenu. Mana mwimwi enye mwafundzwa ni Mlungu kala n'lazima mmendzane.

¹⁰Namwi mnamendza afuasi ayawenu osi hiko tsi ya Giriki, seemu ya Makedonia. Phahi enehu hunakuvoyani muenderere vivyo zaidi na zaidi.

¹¹Nia yenu naikale kuishi maisha gasigo hoyo na mutu. Tsona chila mutu naashugulikie mambo na ahende kazi na mikonoye dza hurivyokulagizani.

¹²Mchihenda hivyo mndaishimiwa ni atu asiomkuluphira Jesu, na tamndakala na lazima ya kuadamira atu anjina kpwa maitaji genu.

¹³Enehu, hunalonda mmanyane ukpweli kuhusu afuasi a Jesu ariofwa, ili msisononeke dza atu asioamini kukala andafufuka.

¹⁴Sisi hunaamini kukala Jesu wafwa na achifufuka. Kpwa hivyo naswi hunaamini piya kukala, Mlungu andaareha phamwenga na Jesu atu osi ariofwa kuno anamuamini Jesu.

¹⁵Hiri hunarokuambirani ni fundzo ra Bwana Jesu kuhusu siku ndiphouya. Hakika sisi ambao huchere moyo tahundaphiya mlunguni kabla ya hara ariofwa.

¹⁶Mana Bwana Jesu mwenye andatserera kula mlunguni na kulavya malagizo kpwa sauti kulu. Sauti ya malaika mkpwulu indasikirwa na gunda ra Mlungu rindapigbwa. Nao ndiofufuka mwandzo andakala hara ariofwa na kuno anamkuluphira Jesu.

¹⁷Naswi ndiokala huchere moyo wakati hinyo hundakusanywa phamwenga nao hiko mainguni kumchinjira Bwana Jesu. Phahi hundakala phamwenga na Bwana Jesu milele.

¹⁸Kpwa hivyo, atiyeni moyo ayawenu na maneno higa.

1 Athesalonike 5

¹Enehu, takuna haja ya kukuandikirani saa ama siku ndiphohendeka mambo higa.

²Mana mwi enye mnamanyato kukala Bwana Jesu andakpwedza siku ambayo tamuitazamiya dza viratu muivi edzavyo usiku kuiya.

³Atu achikala anaamba, "Chila chitu chi sawa na salama," hipho ndipho ndiphogbwererwa ni mashaka. Nago gandahendeka gafula dza viratu mayo akalavyo na utsungu ichikala mwana a phephi na kuvyalwa. Kpwa hivyo taindawezekana mutu kuchimbira mashaka higa.

⁴Lakini enehu tamujizani; phahi siku hiyo taindakala dulukiza dza vira muivi edzavyo.

⁵Mwimwi mosi mu atu muishio mwangani, atu a mutsi. Hosi hunaomkuluphira Jesu tahu atu a usiku, wala a jizani.

⁶Kpwa hivyo, nahusilaleni dza atu asiomanya kala Jesu andauya. Badala ya hivyo nahukaleni matso na hukale atu a chiasi.

⁷Mana atu alalao alala usiku, na alevi alewa usiku.

⁸Ela sisi hu atu a mutsi, kpwa hivyo ni hukale na chiasi. Mendzwa yehu na kuluphiro rehu narikale dza vwazi ra chuma ra chifuwani. Tumaini rehu ra wokofu narikale dza kofiya ya chuma.

⁹Mana Mlungu kayahutsambula ili ahuangamize na hukumuye kali, ela wahutsambula huokolwe kpwa sababu ya gara ambago Bwana wehu Jesu Masihi wahuhendera.

¹⁰Naye wafwa kpwa fwaida yehu. Kpwa hivyo wakati achiuya, ikale huchere moyo ama hukafwa, andahuhala hukaishi phamwenga naye milele.

¹¹Phahi tiyanani mioyo na mteryane dza mhendavyo sambu ili muweze kumkuluphira Mlungu zaidi.

- ¹²Enehu, hunakuvoyani muishimu vilongozi enu. Atu hinya anahenda kazi ya Bwana Jesu na chadi kpwa fwaida yenu, nao nkukukanyani msihende dambi.
- ¹³Apheni ishima kulu na muamendze kpwa sababu ya kazi ahendayo. Na n'lazima kuishito na afuasi ayawenu.
- ¹⁴Enehu, hunakuhimizani mkanye atu avivu na mtiye moyo atu ambao afwa mioyo. Tsona mterye ayawenu ambao taadzangbwephera chiroho na mvumirire atu osi.
- ¹⁵Mutu naasiriphize, ela chila wakati nia zenu nazikale za kuhenderana manono mwi enye, na hata kpwa atu anjina.
- ¹⁶Hererwani chila wakati,
- ¹⁷na muenderere kuvoya,
- ¹⁸mshukuruni Mlungu kpwa rorosi. Higo ndigo Mlungu alondago mhende, mwimwi mrioungana na Jesu Muokoli.
- ¹⁹Msizuwiye kazi ya Roho wa Mlungu mwenu kundini;
- ²⁰msizarau afuasi ayawenu anapholavya ujumbe wa Roho wa Mlungu.
- ²¹Lakini pimani chochosi chigombwacho; mlunge maneno ga kpweli na manono,
- ²²chisha mdzitenge na chila aina ya uyi.
- ²³Mlungu arehaye amani akutengeni na chila aina ya uyi. Piya naarinde roho zenu, mioyo yenu na miri yenu ikale bila lawama yoyosi hadi Bwana wehu Jesu Masihi ndiphokpwedza.
- ²⁴Kpwa vira Mlungu wakuihani, iye andakuhendani mlunge njiraze, mana ni muaminifu.
- ²⁵Enehu, huvoyereni.
- ²⁶Huphozereni sana afuasi osi a Jesu na mendzwa ya kpweli.
- ²⁷Kpwa dzina ra Bwana Jesu ninakulagizani muasomere baruwa hino afuasi osi.
- ²⁸Nakuvoyerani Bwana Jesu Masihi akujaliyeni mosi.

2 Athesalonike

2 Athesalonike 1

¹Baruwa hino ila kpwa Paulo, phamwenga na Sila na Timothi. Hunakuandikirani mwimwi kundi ra afuasi a Jesu a hiko Thesalonike, atu a Baba Mlungu na Bwana Jesu Masihi.

²Baba Mlungu na Bwana Jesu Masihi naakujaliyeni na mkale salama.

³Enehu, sino n'lazima humshukuru Mlungu wakati wosi kpwa sababu yenu. Ni haki sisi kuhenda hivyo mana mnaenderera kumkuluphira Mlungu na mosi mnamendzana zaidi.

⁴Kpwa hivyo huna ngulu kpwa sababu yenu hata hunaambira afuasi anjina osi a Jesu. Mana phamwenga na mateso na kugaya mgayako, bado mnazidi kumkuluphira Mlungu.

⁵Mlungu andahumira mateso genu kuonyesa kukala hukumuye ni ya haki. Kulengana na hukumuye mndakala mnafwaha kukala phamwenga naye hipho ndiphotawala milele. Hipha sambi mnateswa ni atu kpwa sababu Mlungu anatawala maisha genu.

⁶Kpwa kpweli Mlungu ni wa haki, naye andaariphiza aho anaokutesani.

⁷Tsona andakuoyezani na shida zenu, na zehu piya. Higa gandahendeka wakati Bwana Jesu ndiphola mlunguni phamwenga na malaikae a nguvu.

⁸Andakpwedza na jimbi-jimbi ra moho, edze atiye adabu hara asioogopha Mlungu, na atu aremao habari ndzuri kuhusu Bwana wehu Jesu Muokoli.

⁹Mlungu andaenderera kuatiya adabu milele kpwa kuatenga na Bwana Jesu na utukufu wa uwezowe.

¹⁰Higa gandakala hipho siku Jesu ndiphokpwedza ili aphahe nguma kula kpwa atue. Osi amkuluphirao andaona ajabu achiona vira arivyo. Na sio aho bahi, ela hata mwimwi muaminio ushuhuda wehu.

¹¹Mlungu wakutsambulani ili mkale atue. Naswi hunakuvoyerani chila wakati muishi vira atakavyo, ili aone mnafwaha kutsambulwa. Piya hunavoya akupheni uwezo wa kuhenda manono muazago, kpwa sababu ya kumkuluphira Jesu.

¹²Higa hunagalonda ili dzina ra Bwana wehu Jesu Masihi rikale na nguma kpwa sababu yenu, namwi mdatogolwa kpwa sababuye. Nago gandawezekana kpwa sababu ya mbazi za Mlungu wehu na Bwana Jesu.

2 Athesalonike 2

¹Enehu, sambu hunabisha kuhusu kuuya kpwa Bwana wehu Jesu Masihi, na vira sisi ndivyokusanyika mbereze. Hunakuonyani

- ²msikale atu a kubabaika ovyo ovyo na maneno ga atu kama vira kuambwa siku hiyo yakpwedza kare. Hata mutu akaamba waambirwa ni Roho wa Mlungu, ama wagasikira na sisi, msimuamini. Tsona mutu achikuambirani wagasoma baruwani, ama achikuonyesani baruwa ambayo inaambwa yala kpwehu, piya msimuamini.
- ³Msiphuphizwe ni mutu yeyesi, mana siku hiyo taindafika hadi atu anji ndiphogbwirana kumpinga Mlungu, na yuya mui apingaye Mlungu amanyikane wazi. Hiye ndiye ambaye Mlungu wapanga kare kum'bananga tse-tse-tse.
- ⁴Andadzikutula na azarau chochosi chiihwacho Mlungu au chiabudiwacho. Andasagala ndani ya Nyumba ya Kuvoya Mlungu na kuaambira atu kukala iye ndiye Mlungu.
- ⁵Dze tamtambukira kukala nakuambirani higa huriphokala hosi?
- ⁶Kama mmanyavyo chimzuwiyacho yuya mui hipha sambu ni vira wakatiwe taudzangbwefika. Ela wakatiwe uchifika andamanyikana wazi.
- ⁷Tayari Shetani anahenda kazi chisiri-siri kuhenda atu apinge Mlungu. Nayo indaenderera kukala siri hadi hipho ndiphouka hiye aifwitsaye.
- ⁸Alafu yuya mui andamanyikana wazi, naye Bwana Jesu andakpwedza amuolage chiurahisi kabisa kpwa uwezowe mkpwulu. Mana andakpwedza na mwangaza mkpwulu na utukufu wa ajabu.
- ⁹Yuya mui andakpwedza na nguvu za Shetani na andahenda chila aina ya vilinje na maajabu ga handzo.
- ¹⁰Andakpwedza na chila aina ya handzo kuchenga hara agodzwao ni hukumu ya kutiywa adabu milele. Hinyo anagodzwa ni hukumu kpwa sababu kpweli airema. Kalapho taayairema, phahi Mlungu angeativya.
- ¹¹Ndiyo mana Mlungu waaricha achengbwe sana ni yuya mui na alunge mambo ga handzo.
- ¹²Kpwa hivyo osi arioamini handzo na kuhamirwa ni kuhenda mai andaphaha hukumu ya kutiywa adabu.
- ¹³Lakini sino n'lazima humshukuru Mlungu wakati wosi kpwa sababu yenu mwimwi enehu mmendzwao sana ni Bwana Jesu. Mana Mlungu wakutsambulani kula mwandzo muokolwe. Mnaokolwa ni Rohowe anayekutengani kpwa kazi ya Mlungu na kuamini ukpweli.
- ¹⁴Mlungu wahumira habari ndzuri hurizotangaza kpwenu kama njira ya kukualikani mphaha nguma phamwenga na Bwana wehu Jesu Masihi.
- ¹⁵Kpwa hivyo, enehu dinani chilume na mlunge hurigokufundzani, ikale ni kugomba namwi ama kukuandikirani baruwa.

¹⁶Baba Mlungu wahumendza, na kpwa mbazize achiuhuriza mioyo milele na kuuhenda hukale na uhakika wa kuishi naye milele. Hunakuvoyerani kukala Bwana wehu Jesu Masihi mwenye

¹⁷akutiye ni moyo na akupheni nguvu muweze kuhenda manono na kubishato.

2 Athesalonike 3

¹Chimarigizo, enehu nakuambirani muhuvoyere ili neno ra Mlungu rigote upesi na kuphokerwa na ishima dza ko kpwenu.

²Piya huvoyereni Mlungu ahurinde na atu ayi, mana sio osi ambao andakubali kuamini hiri neno ra Mlungu huribisharo.

³Lakini Bwana Jesu ni muaminifu, na andakutiye ni nguvu na kukurindani na mai.

⁴Iye wahuhenda hukale na hakika kukala mnahenda na mndaenderera kuhenda hurigolagiza.

⁵Mlungu naakulongozeni mmanye mendzwaye na vira Bwana Jesu arivyovumirira mateso.

⁶Enehu, kpwa uwezo wa Bwana Jesu Masihi sino hunakuonyani mdziepushe na afuasi ayawenu ambao ni avivu na taalunga gara hurigokufundzani.

⁷Mana mwimwi enye mnamanya mlondwavyo kuiga mfwano wehu. Huriphokala hiko kpwenu tahuyakala avivu,

⁸wala tahuyarya chakurya cha mutu bila kuchiriphira. Chinyume na hivyo, hwakala na chadi cha kuhenda kazi usiku na mutsi, ili husikale mzigo kpwa mutu yeyesi.

⁹Sisi tahuyahenda hivi kpwa kukala tahuna haki ya msada wenu, ela hwalonda hukale mfwano mzuri ambao mndaulunga.

¹⁰Mana hata huriphokala hosini hwakulagizani hiri: "Yeyesi ambaye ni mvivu wa kazi, naasirye."

¹¹Sababu ya kuamba hivyo, hwasikira kukala ayawenu anjina ni avivu. Taana rorosi ahendaro isiphokala kuinjirira mambo ga atu.

¹²Atu dza hinyo hunaaonya na kuaambira kpwa uwezo huriohewa ni Bwana Jesu Masihi kukala, ahurire na adzitsumire chakurya.

¹³Namwi enehu, msiremwe kuhenda manono.

¹⁴Yeyesi ndiyerema kulunga higa hubishago katika baruwa yehu, dzimanyirireni naye, tsona dzitengeni naye ili agbwirwe ni haya.

¹⁵Hata hivyo msimhende kala ni adui, ela mkanyeni dza myawenu.

¹⁶Hunakuvoyerani ili Bwana wehu Jesu anayehupha amani, akupheni amani chila mara kpwa chila dzambo. Bwana Jesu na akale phamwenga namwi mosi.

17Mimi Paulo naandika salamu hizi na mkpwono wangu. Hivi ndivyo nimarigizavyo baruwa zangu zosi kuonyesa kukala zila kpwangu.

18Nakuvoyerani Bwana Jesu Masihi akujaliyeni mosi.

1 Timothi

1 Timothi 1

- ¹Baruwa hino ila kpwangu mimi Paulo. Nátsambulwa kpwa lagizo ra Mlungu ariyehukola, nikale mtume wa Jesu Muokoli ariye kuluphiro rehu.
- ²Nakuandikira uwe Timothi mwanangu mwenye wa chiroho. Baba Mlungu na Jesu Muokoli, Bwana wehu, naakujaliye, akuonere mbazi na ukale na amani.
- ³Kama nrivyokulagiza nriphokala naphiya Makedonia, nakuambira ubaki kuko Efeso ili ukahaze atu anaofundza mafundzo ga handzo.
- ⁴Nakulagiza waambire ariche kugomba mambo manji ganangoangamiza wakati wa kusikiza adisi nyinji na mlolongo wa madzina ga akare gasigo na mwisho. Mana mambo higo ganareha malumbano ga ovyo, na tagaterya atu kuishi kpwa imani kulengana na mpango wa Mlungu wa kumkuluphira iye.
- ⁵Lengo ra lagizo hiri ni kukala nalonda ufundze atu amendzane mioyo kutsuka, akale na mioyo isiyodzihukumu na kuluphiro ra kpweli.
- ⁶Mana atu anjina aricha kufundza mambo higo, nao analunga malumbano ga chizuzu gasigo mana.
- ⁷Analonda amanyikane ni alimu a kufundza Shariya za Musa, lakini nyo enye taamanya anagomba kuhusuni, hata dzagbwe anagafundza na nguvu sana.
- ⁸Phahi hunamanya kala Shariya za Musa ni nono zichilungbwa na kuhumirwa viratu Mlungu alondavyo.
- ⁹Tsona hukumanya kala Shariya tazirehwa kpwa atu ahendao haki. Ela nkurehwa kpwa atu a kuvundza shariya na atu asiokubali kukala tsini ya mamlaka, atu asiomuogopha Mlungu na achina-dambi osi, atu asio atakatifu na asio na dini, aolagao avyazi ao na ayawao.
- ¹⁰Piya zarehwa kpwa azindzi, ahendao alume ayawao achetu, na ahendao ayawao atumwa, atu a handzo na alaphao na mambo ga handzo, au anjina ahendao gogosi ambago ni chinyume cha mafundzo ga kpweli.
- ¹¹Higo ni gara ganagokubaliana na habari ndzuri kuhusu Jesu Muokoli iriyo na uwezo wa ajabu, iratu nriyoikirwa mikononi ni Mlungu wa nguma zosi.
- ¹²Namshukuru Jesu Muokoli, Bwana wehu, ariyenipha nguvu, achiniona ni muaminifu na achinitsambula nimuhumikire.
- ¹³Hata dzagbwe kare námkufuru Jesu, nchimtesa na nchimzarau. Lakini Mlungu wanionera mbazi kpwa sababu kala simkuluphira na kala simanya nihendaro.
- ¹⁴Phahi náphokera mbazi nyinji za Jesu, Bwana na Muokoli wehu. Achinijaliya maisha ga kukuluphira na mendzwa dza vivyo arivyo ye mwenye.

¹⁵Huno ni msemu wa kpweli, nao atu n'lazima auamini, "Jesu Muokoli wakpwezda duniani kuokola achina-dambi," na kahi yao, mimi Paulo kala ni mwenye dambi kuriko osi.

¹⁶Lakini kpwa sababu hiyo, Mlungu wanionera mbazi, mimi ambaye kala nina dambi kuriko osi. Chihivyo Jesu Muokoli achinihumira na kunivumirira sana dza mfwano kpwa hara ambao andamkuluphira na kuphaha uzima wa milele.

¹⁷Na Mlungu, ambaye ni mfalume wa milele, asiyefwa na asiyeonekana, na ambaye kana myawe, naatogolwe na kuishimiwa milele. Amina.

¹⁸Mwanangu Timothy, lagizo hiri nikupharo ni kulengana na manabii arivyogomba kuhusu uwe hipo kare. Nakupha hiro lagizo ili kpwa kulunga maneno higo, uweze kupigana chilume kondo hino ndzuri ya kumkanira Bwana Jesu.

¹⁹Na kpwa kuenderera kugbwirira kuluphiroro, kala na nia ya kuhenda manono. Atu anjina taayalunga zamiri za aina hiyo, na kpwa njira hiyo aangamiza kuluphiro rao.

²⁰Mfwano wa atu hinyo ni Himenayo na Isikanda, nami náalavya kpwa Shetani ili adzifundze kusakufuru Mlungu.

1 Timothy 2

¹Mwandzo kabisa nakuambirani voyerani chila mutu. M'voyeni Mlungu aterye na kuajaliya atu osi, piya mumshukuru kpwa sababu yao.

²Avoyereni atawala na anjina osi ario na mamlaka, ili huphahe kuishi kpwa utulivu na amani wakati hunadzilavya kpwa Mlungu na kukala bila lawama.

³Mambo dza higa ni manono na ganamhamira Mlungu, Muokoli wehu,

⁴ambaye analonda atu osi aokolwe na aphahe kumanya ukpweli.

⁵Mana Mlungu ni mmwenga, na ngudzi wa kupatanisha atu na Mlungu piya ni mmwenga, naye ni Jesu Muokoli.

⁶Naye wadzilavya afwe ili akombole anadamu osi, na hinyo ni ushahidi wa lengo ra Mlungu ambao watimizwa wakati uriofwaha.

⁷Ndiyo mana Mlungu wanitsambula nikale mhubiri na mtume. Hakika nagomba kpweli wala sigomba handzo. Tsona wanitsambula nifundze atu asio Ayahudi ujumbe wa ukpweli na kumkuluphira Jesu.

⁸Phahi, nalonda alume osi a chila pahali avoye Mlungu moyo kutsuka. Na wakati wa kuvoya Mlungu, aunule mikono isiyo na lawama na akale bila ya tsukizi wala malumbano.

⁹Piya nalonda achetu aonekane kukala na adabu nono na avwale nguwo ndzuri za ishima. Tsona naasidzishugulishe kudzisonga nyere wala kudzipamba kpwa kuhumira vitu vya zahabu, vya lulu, na mavwazi ga gali.

¹⁰Ela achetu anaoamba kukala anamuogopha Mlungu inabidi aonekane wazi kpwa mahendo gao manono.

¹¹Wakati wa kufundzwa, achetu naasikize kpwa makini na akale apole.

¹²Siruhusa mchetu kufundza alume wala asikale na mamlaka dzulu yao, ela ni akale zii.

¹³Mana Mlungu kpwandza waumba Adamu, alafu ndipho Hawa.

¹⁴Na Adamu kayachengbwa ni Shetani. Ela Hawa ndiye ariyechengbwa achikala mwenye dambi.

¹⁵Lakini achetu andaokolwa kpwa kuvyala ana, bora aenderere kukuluphira, kumendza atu, kuishi chitakatifu na kudziishimu.

1 Timothi 3

¹Msemo huno ni wa kpweli. Mutu yeyesi achiaza mwakpwe moyoni kukala chilongozi, phahi analonda kuhenda kazi nono sana.

²Kpwa hivyo chilongozi n'lazima akale bila lawama, mutu wa mchetu mmwenga, awezaye kudzikanya, mwenye achili nono na ishima, akaribishaye ajeni, na awezaye kufundzato.

³N'lazima asikale mlevi wala mutu wa kumendza kondo, ela akale mpole tsona mutu asiyemendza kuheha wala kumendza pesa.

⁴Piya n'lazima amanyirire nyumbaye vinono, na aahende anae amuogophe na ishima zosi.

⁵Mana ichikala mutu anashindwa kumanyirira nyumbaye, vyo kpweli andaweza kutundza atu a Mlungu?

⁶N'lazima asikale mfuasi yemkubali Jesu dzuzi-dzuzi, ili asedze akadzikutula kpwa ngulu na kuhukumiwa dza vira Shetani arivyohendwa.

⁷Piya n'lazima akale na nguma nono kpwa atu asio Afuasi a Jesu, ili asedze akazarauliwa ni atu na akagbwirwa ni muhambo wa Shetani.

⁸Asaidizi a vilongozi piya n'lazima akale a kuishimiwa ni atu na a kuaminika kpwa agombago, tsona asikale alevi wala asimendze pesa.

⁹N'lazima agbwire gara mafundzo ga kpweli huaminigo, na kugalunga mioyo kutsuka.

¹⁰N'lazima ahewe kazi zanjina kama mtihani. Achikala kana lawama, ndipho anaweza kuhenda kazi ya kusaidiya vilongozi.

- ¹¹Vivyo hivyo, mchewe naye n'lazima akale wa kuishimiwa ni atu, asisengenye, akale mutu awezaye kudzikanya na akale muaminifu kpwa mambo gosi.
- ¹²Hiye msaidizi wa chilongozi, piya naye n'lazima akale mlume wa mchetu mmwenga, amanyiriraye anae na nyumbaye vinono.
- ¹³Mana atu ahendao kazi ya msaidizi wa chilongozi vinono, nkuishimiwa sana ni atu, na anaweza kugomba kuhusu kumkuluphira Jesu Muokoli bila ya wuoga.
- ¹⁴Nakuandikira baruwa hino hata dzagbwe ninaaza kpwedza kuko kukuweherani vi sambu sambu.
- ¹⁵Lakini nchichelewa kpwedza, baruwa hino indakumanyisa vira ambavyo atu anatakpwa akale kahi za atu a Mlungu. Na atu a Mlungu ni kanisa ra Mlungu ariye moyo, naro ndiro nguzo na msingi wa kpweli.
- ¹⁶Hunakubali kpweli kukala siri ya dini yehu ni kulu sana: Jesu waonekana na umbo ra chibinadamu, naye Roho wa Mlungu wahakikisha kala Jesu ni wa haki. Waonewa ni malaika, na wahubiriwa kahi ya makabila ga duniani. Atu anjina duniani amkuluphira, naye wahalwa kuphiya dzulu mlunguni na nguma.

1 Timothi 4

- ¹Roho wa Mlungu anagomba wazi-wazi kukala siku za mwisho atu anjina andaricha imani ya kpweli, alunge roho zichengazo na agbwire mafundzo gahandzo galago kpwa mashetani.
- ²Alimu dza hinya ni anafiki na atu a handzo, na zamiri zao zafwa, nazo taziweza kuzuwiya uyi.
- ³Hinyo nkuzuwiya atu asilólane, na tsona asirye vyakurya fulani ambavyo Mlungu waviumba viriwe na shukurani ni atu amkuluphirao na amanyao kpweli.
- ⁴Chila chitu Mlungu arichoumba ni chinono. Kpwa hivyo takuna chitu chinachoremewa bora chiphokerwe na shukurani,
- ⁵mana chinatakaswa uchivoya Mlungu kulengana na nenore.
- ⁶Phahi uchiambira ndugu osi mambo higa, undakala mtumishi mzuri wa Jesu Muokoli unayekuzwa na maelekezo ga imani yehu na mafundzo manono hulungago.
- ⁷Usidzishugulishe kabisa na adisi zisizoreha nguma kpwa Mlungu. Ela dzibaze kpwa makini kudzilavya kpwa Mlungu.
- ⁸Mana mazowezi ga mwiri ganareha fwaida chidide kpwa mutu, lakini kumuogopha Mlungu kuna fwaida zaidi pande zosi. Kunahulaga uzima vi sambu na hata badaye.
- ⁹Msemo hinyo ni wa kpweli na unafwaha kukubaliwa ni chila mutu.

¹⁰Hunahenda bidii na kugaya sana kpwa sababu hwaika tumaini rehu kpwa Mlungu aishiye, ambaye ni Muokoli wa atu osi na haswa kpwa hara amkuluphirao.

¹¹Phahi lagiza na kufundza mambo higa.

¹²Mutu naasikuzarau kpwa sababu u mwanache. Lakini ukale mfwano mbere za afuasi a Jesu kpwa manenogo, maishago, mendzwayo, kuluphiroro na kuishiko bila ya lawama.

¹³Phahi humira wakatio kpwa bidii kusomera atu Maandiko ga Mlungu, kuatiya moyo afuasi na kuafundza mpaka hipho ndiphokwedza.

¹⁴Usiriche chipawacho urichophaha kpwa kutabiriwa na vilongozi achikubandikira mikono.

¹⁵Henda bidii ya kulunga mambo higa, tsona dzilavye kabisa kpwa higa ili chila mutu aone maendererogo.

¹⁶Dzimanyirire uishivyo na gara ufundzago. Dinisa kuhenda hivyo, nawe undadziokola we mwenye na hara akusikizao.

1 Timothi 5

¹Usidemurire mtumia, lakini gomba naye kpwa ishima dza viratu ugombavyo na sowe. Ahendereto barobaro ayao dza viratu ambavyo unahendera nduguzo.

²Ishimu achetu avyere dza viratu uishimuvyo mayoo, na uaishimu moyo kutsuka achetu marika dza viratu enenu achetu.

³Muishimu na mrorome achetu magungu ambao arichwa bila msada.

⁴Lakini gungu achikala wavyala anae ama ana adzukulu, phahi aho ni atimize wajibu wao wa chidini kpwa kumroroma, dza vyo gungu arivyoarera. Hivi ndivyo Mlungu amenzavyo.

⁵Mchetu gungu kpweli asiye na mroromi wala msada wowosi nkumuadamira Mlungu bahi, na nkudinisa kuvoya Mlungu usiku na mutsi ili amterye.

⁶Lakini gungu ambaye andaishi maisha ga kudzimanya ye mwenye bahi, ni kama avi wafwa hata dzagbwe achere mzima.

⁷Nawe lagiza atu alunge mambo higa ili akale bila lawama.

⁸Lakini mfuasi yeyesi ambaye karoroma atue, haswa atu a mwakpwe nyumbani, iye akakahala kuluphiroro, tsona ni mui hata kushinda mutu asiyemkuluphira Jesu.

⁹Usimuandikishe gungu hadi akale ana zaidi ya miaka sitini, na akale walólwa ni mlume mmwenga.

- ¹⁰Piya akale anaishimiwa ni atu kpwa mahendoge manono, kpwa mfwano kurera anae vinono, kukaribisha ajeni phakpwe kaya, kuhumikira atu a Mlungu, kuterya atu ario na tabu na kudzilavya kuhenda manono wakati wosi.
- ¹¹Lakini achetu magungu ambao achere anache, msiatye katika kundi ra magungu, mana tamaa zao za chimwiri zindazidi bidii yao ya kumhumikira Jesu, nao andalonda kulólwa tsona.
- ¹²Kpwa hivyo andakala akadzirehera hukumu enye, mana andakala akavundza ahadi yao ariyoyiika hipho mwanzo.
- ¹³Zaidi ya hivyo, andakala na tabiya za uvivu achizemeheka ovyo ovyo laloni na kusengenya ayawao, kuinjirira mambo gasigoahusu na kugomba mambo gasigofwaha.
- ¹⁴Phahi nalonda magungu anache alólwe, avyale ana ao na aarereto ili adui wehu Shetani asiphahe nafwasi ya kugomba mai kuahusu.
- ¹⁵Mana magungu anjina aricha kare kumkuluphira Jesu na vivi anamlunga Shetani.
- ¹⁶Mchetu ariyemkuluphira Jesu achikala ana nduguze ambao ni magungu, n'lazima aarorome mwenye ili afuasi a Jesu asikale na mzigo hinyo. Kpwa njira hiyo andaphaha nafwasi ya kuterya magungu ambao ana shida na taana mutu wa kuaroroma.
- ¹⁷Vilongozi ambao analongoza atu vizuri anafwaha aishimiwe na kuriphiwa vizuri, haswa hara ambao anahenda kazi ya kuhubiri na kufundza.
- ¹⁸Mana Maandiko ganaamba, "Ng'ombe ichikala inawaga nganu usiifunge mlomo." Piya Maandiko ganaamba, "Mhendadzi-kazi anafwaha kuriphiwa mshaharawe."
- ¹⁹Usikubali kusikiza mashitaka ga kuhusu chilongozi wa afuasi a Jesu isiphokala gakale gakarehwa ni mashahidi airi au ahahu.
- ²⁰Lakini vilongozi anaenderera kuhenda dambi, n'lazima aonywe mbere za atu osi ili rikale fundzo kpwa atu anjina.
- ²¹Nami nakulagiza mbere za Mlungu, Jesu Muokoli na malaika a Mlungu ariotsambulwa, ulunge malagizo higa bila ya kubaguwa wala kupendelea.
- ²²Usihende upesi wa kutsambula chilongozi na kumuikira mikono, wala usiunge mkpwono mutu ahendaye dambi. Na udzirinde ukale bila lawama.
- ²³Usinwe madzi bahi, ela nwa uchi mchache wa zabibu ili kuterya ndaniyo na kuphunguza ukongoo wa chila mara.
- ²⁴Dambi za atu anjina zinaonekana wazi-wazi, hata chila mmwenga amanye kukala andahukumiwa. Lakini anjina dambi zao tazindamanyikana hadi badaye.

²⁵Vivyo hivyo, mahendo manono ganaonekana wazi-wazi, na hata gara ambago tagaonekana wazi-wazi, tagaweza kufwitsika.

1 Timothi 6

¹Atumwa osi ana wajibu wa kuapha matajiri gao ishima zosi ili atu asizarau dzina ra Mlungu na mafundzo gehu.

²Nao atumwa ambao matajiri gao ni afuasi a Jesu, naasiazarau kpwa sababu ni afuasi ayawao. Lakini n'lazima aahumikire vinono kpwa mana hara matajiri ambao anaphaha fwaida ni afuasi ayawao ambao anaamendza. Timothi, fundza mambo higa gosi na waahimize atu agaphokere.

³Ichikala mutu yeyesi anafundza mambo ga handzo na kurema maneno ga kpweli ga Bwana wehu Jesu Masihi na mafundzo ganagohamira Mlungu,

⁴anahenda ngulu za bure wala kana amanyaro. Maazoge ni makongo na anamendza kulumbana na kuheha ovyo kuhusu maneno bahi. Hivyo nkusababisha atu kukala na wivu, kuheha, kulaphizana, kuazirana mai,

⁵na kuvurugana ovyo ovyo. Achili za atu hinyo zabanangika na taana ukpweli, nao anaona kudzilavya kpwa Mlungu ni njira ya kudzitajirisha.

⁶Sambi kudzilavya kpwa Mlungu phamwenga na kutosheka na uricho nacho ni fwaida kulu.

⁷Mana huriphovyalwa, tahuyakpwedza na chitu duniani, wala huchifwa tahundaweza kuuka na chitu.

⁸Kpwa hivyo huchiphaha chakurya na nguwo, hundatosheka.

⁹Ela atu aazao kukala matajiri mwishowe nkuinjira mashakani na kugbwirwa ni muhambo wa tamaa nyinji mbii za chipumbavu ambazo zinaabananga na kuangamiza.

¹⁰Mana tamaa ya pesa ndicho chandzo cha mai gosi. Atu anjina amendza pesa sana hata achiricha imani ya kpweli na kpwa njira hiyo achidziinjiza kpwenye mateso na sonono nyinji.

¹¹Lakini uwe Timothi, mutu wa Mlungu, usilunge kamare mambo higa. Henda garigo ga haki, dzilavye kpwa Mlungu, mkuluphire Jesu Masihi, mendza atu, vumirira na ukale na upole.

¹²Nalonda upigane kpwa bidii hivi viha vinono vya higa huaminigo. Gbwira sana uzima wa milele uriohirwa ni Mlungu, uriphomkubali mbere za mashahidi manji.

¹³Sambi nakulagiza mbere za Mlungu, alavyaye uzima kpwa chila chitu, na mbere za Jesu Muokoli, ambaye wagomba ushahidi wa kpweli mbere za Pontio Pilato:

- 14**Gbwira lagizo hiri na urilunge bila lawama hadi Bwana wehu Jesu Masihi ndiphotsembuka.
- 15**Mlungu andamhenda aonekane wakatiwe ariopanga ndiphofika. Mana iye ni mtawala wa macheye na wa nguma, ni Mfalume wa afalume, na ni Bwana wa mabwana.
- 16**Mlungu macheye ndiye aishiye milele! Naye anaishi mwangani, mwanga ambao mutu kaweza kuusengerera. Wala takuna mutu yeyesi yemuona ama awezaye kumuona. Nguma na uwezo ni kpwa Mlungu milele na milele. Amina.
- 17**Alagize matajiri himu duniani asihende ngulu wala kuadamira mali ambazo zinaweza kuangamika wakati wowosi. Aambire amuadamire Mlungu, ambaye nkuhujaliya na chila chitu ili huishi na raha.
- 18**Piya aambire ahende manono, tsona akale matajiri a higo mahendo manono. Na akale tayari ya kuhumira pesa zao mioyo kutsuka na kuaganyira anjina mali zao.
- 19**Kpwa kuhenda hivyo, andadziikira akiba ambayo ni msingi mnono wa wakati wedzao, ili badaye aphahe maisha ga kpweli.
- 20**Mwanangu Timothy, rinda sana higo gosi urigoikirwa mwako mikononi. Dziepushe na malumbano gasigokala ga Mlungu na maazo ganagoshindana na ambago kpwa makosa nkutsukulwa ni maarifwa.
- 21**Atu anjina ariokubali na kulunga maarifwa higo ga chipumbavu, aricha njira ya kumkuluphira Jesu. Navoya Mlungu akujaliyeni mosi.

2 Timothi

2 Timothi 1

¹Baruwa hino ila kpwangu mimi Paulo, mtume wa Jesu Muokoli. Kpwa mendzwa ya Mlungu náhewa uwezo niatangazire atu uzima ambao waahidiwa kpwa kuungana na Jesu Muokoli.

²Nakuandikira uwe mwanangu Timothi nikumenzaye sana. Baba Mlungu na Bwana wehu Jesu Muokoli naakujaliye, akuonere mbazi na ukale salama.

³Mino namshukuru Mlungu ambaye namhumikira moyo kutsuka dza vyo akare angu arivyohenda. Wakati navoya, nikukutambukira ikale usiku ama mutsi.

⁴Nichitambukira vira urivyotulukpwa ni matsozi, phahi nkuaza sana kukuona tsona, nami n'ndaonato huchikutana.

⁵Piya natambukira vyokala unamkuluphira Jesu chikpweli-kpweli, ambapho mwandzo kuluphiro riro kala rina wawayo Loisi na mayoo Eunike. Hivi sambi nina hakika una kuluphiro dza riro.

⁶Kpwa hivyo, nakutambukiza uhumireto chira chipawa urichohewa ni Mlungu nriphokubandikira mikono.

⁷Mana Mlungu wahupha roho wa kuhuhenda hukale na nguvu, kumenzana na kudzikanya, lakini kayahupha roho wa kuhuhenda hukale aoga.

⁸Phahi usione waibu kulavya ushahidi wa Bwana wehu, wala usinionere waibu mimi mfunbwa kpwa sababuye. Lakini kala tayari kugaya phamwenga nami unaphotangaza habari ndzuri kuhusu Jesu Muokoli kpwa kukuluphira nguvu uhewazo ni Mlungu.

⁹Mlungu mwenye ndiye ariyehukola na achihuiha huishi bila ya lawama. Naye wahenda hivyo si kpwa sababu sisi hwahenda rorosi nono. Ela ni kpwa lengore mwenye, kama arivyopanga kuhuonera mbazi kpwa kuungana na Jesu Muokoli kabla ya dunia kuumbwa.

¹⁰Na sambi Mlungu wahuikira wazi mbazize kpwa kpwedza kpwa Jesu Masihi, Muokoli wehu. Na kutsupira hiyo habari ndzuri, hunamanya kukala waangamiza chifo, achihurehera uzima wa milele.

¹¹Naye Mlungu wanitsambula nikale mtume, mwalimu na mhubiri wa hiyo habari ndzuri.

¹²Ndiyo mana ninagaya, lakini siona waibu. Mana nammanya hiye nriyemkuluphira, tsona nina hakika andarinda hiyo habari ndzuri ariyoniikira mwangu mikononi hadi siku hiyo ya mwisho.

¹³Gbwiririra chielelezo cha mafundzo ga kpweli nrigokufundza, tsona dinisa kukuluphira na kumenzana anjina kpwa kuungana na Jesu Muokoli.

¹⁴Kpwa uwezo wa Roho wa Mlungu akalaye mwehu mioyoni, rinda hinyo ujumbe urioikirwa mwako mikononi.

¹⁵Timothi, unamanya kukala atu osi hiku jimbo ra Asia aniricha machiyangu, atu hinyo ni phamwenga na Figelo na Herimogene.

¹⁶Ela navoya Bwana Jesu aaonere mbazi atu a nyumba ya Onesiforo, kpwa mana wanitiya moyo na achiniterya mara nyinji, wala kayaona waibu kpwa vira ni mfunbwa.

¹⁷Tsona ariphotsoloka Rumi, wahenda chadi cha kuniendza chila phahali hadi achiniphaha.

¹⁸Nawe unamanya vira arivyoniterya na mambo manji nriphokala hiko mudzi wa Efeso. Navoya Mlungu amuonere mbazi Onesiforo siku Bwana Jesu ndiphouya.

2 Timothi 2

¹Mwanangu Timothi, kala imara kpwa kutegemea mbazi na mendzwa ya Mlungu huriyo nayo kpwa kuungana na Jesu Muokoli.

²Na gara mambo ambago wanisikira ninagafundza mbere za mashahidi anji, gaike mikononi mwa atu aaminifu ndioweza kufundza atu anjina.

³Vumirira mateso phamwenga naswi kama asikari mnono wa Jesu Muokoli.

⁴Kpwa mfwano asikari ariye kazini nkulonda kuhamira mkpwuluwe, kpwa hivyo kadzishugulisha na mambo ga maisha ga kawaida.

⁵Vivyo hivyo mutu wa kushindana mairo kaweza kuphaha tuzo bila ya kulunga malagizo ga mairo.

⁶Tsona mkurima ariye na bidii ya kurima ndiye ambaye anafwaha akale wa kpwandza kutophola mavunoge.

⁷Phahi phundza vinono sana hiyo mifwano niilavyayo, mana Bwana andakuterya ueleweto mambo higa gosi.

⁸Usiyale kala Jesu Masihi, ambaye ni chivyazi cha Mfalume Daudi, wafufulwa. Na hizo ndizo habari ndzuri nihubirizo,

⁹na kpwa sababu hiyo nateswa, hata nafunbwa singenge dza mutu mui. Lakini neno ra Mlungu tariweza kufunbwa singenge.

¹⁰Kpwa hivyo mino ninavumirira chochosi kpwa ajili ya atu ariotsambulwa ni Mlungu, ili nao piya aphokere wokofu na utukufu wa milele kpwa kumkuluphira Jesu Muokoli.

¹¹Hinyo ni msemo wa kuaminika: Ichikala hwafwa phamwenga naye, phahi piya hundaishi naye.

- ¹²Huchivumirira hadi mwisho, phahi piya hundatawala naye. Huchimkahala, naye piya andahukahala.
- ¹³Husiphokala aaminifu, iye andakala muaminifu, mana kaweza kudzikahala mwenye.
- ¹⁴Atambukize atu mambo higa na uaonye mbere za Mlungu ariche kulumbana kuhusu maneno ga kuphupha, mana kundaangamiza atu asikizao.
- ¹⁵Henda bidii ueleze vinono neno ra kpweli kuonyesa Mlungu wakukubali kukala u mhendadzi-kazi asiyeona waibu.
- ¹⁶Dziepushe na malumbano ga chijinga, mana atu anaolumbana hivyo anazidi kukala kure na Mlungu.
- ¹⁷Mafundzo gao gandaenea dza chironda cha mrema. Mfwano wa atu afundzao higo ni Himenayo na Fileto,
- ¹⁸ambao aricha kulunga ukpweli. Nao nkuamba kukala kufufulwa kpwa ariofwa kpwatsapa kare, nao anaangamiza imani ya afuasi anjina.
- ¹⁹Lakini msingi wa ukpweli wa Mlungu wadina ndi-ndi-ndi na wapigbwa muhuri wa maneno higa: "Mlungu anamanya atue," na "Chila mutu akubaliye kukala iye ni Bwana, n'lazima ariche mai gosi."
- ²⁰Ndani ya nyumba kulu ya mutu mwenye nafwasi muna miyo ya chila aina. Muna yotengezwa na zahabu na feza, piya muna yanjina yotengezwa na mbao na ulongo. Miyo yanjina ni ya mahumizi ga ishima, na yanjina ni ya mahumizi gasigo na ishima.
- ²¹Phahi mutu achidzitenga na mambo higo mai, andakala mwiyo unaofwaha kpwa mahumizi ga ishima. Mana andakala akatengbwa kpwa Bwanawe na kutayarishwa kpwa chila kazi nono.
- ²²Dziepushe kabisa na tamaa mbii za ubarobaro. Lunga garigo ga haki, gbwiririra kuluphiro, uhende bidii ya kumendza ayao, na usagale na amani. Henda higo gosi phamwenga na atu osi ahadzao Bwana moyo kutsuka.
- ²³Tsona nakuamba, dzitenge na malumbano ga chipumbavu na ga chijinga, kpwa sababu nkuhenda atu kukosana vibaya.
- ²⁴Kpwa mana n'lazima mtumishi wa Bwana Jesu asikale na chibako. Ela ni akale na mbazi kpwa chila mutu, akale anaweza kufundza, tsona akale mvumirizi.
- ²⁵Hinyo atu ambao anakupingani, n'lazima muakanye kpwa upole. Chahi Mlungu andaagaluzwa mioyo ili atubu na kuelewa marifwa ga kpweli.
- ²⁶Kpwa njira hiyo andaphaha kung'alwa ni matso achimbire muhambo wa Shetani, ambaye waagbwira na achiahenda alunge mipangoye.

2 Timothi 3

- ¹Mwanangu Timothy, manya kukala siku za mwisho zindakala za tabu.
- ²Mana atu andadzimendza, andamendza pesa, andakala na ngulu, na andadziona muhimu kuriko anjina. Andalaphiza ovyo ovyo, taandaogopha avyazi ao, tsona andakala atu asio na shukurani na asiomuogopha Mlungu.
- ³Atu andakala asiomendza wala kusamehe ayawao, tsona afyakatsi, asiodzizuwiya, akatili na asiohamirwa ni chitu chochosi chinono.
- ⁴Piya andakala asalatadzi, asiojali chitu, atu a kudzinyobola na kumendza raha za dunia kuriko kumendza Mlungu.
- ⁵Nao andaonekana avi anaogopha Mlungu, lakini andakahala nguvuze. Phahi atu dza hinyo, dzitenge nao.
- ⁶Anjina ao nkudziinjiza midzi ya achetu enye nia nyonje, achahala zewe hara ambao ahendwa atumwa ni dambi na kulongozwa ni tamaa mbii za chila aina.
- ⁷Chila wakati achetu hinyo nkudzifundza mambo maphya, lakini ukpweli taaweza kumanya.
- ⁸Hinyo atu anapinga ukpweli dza viratu Yane na Yambire arivyompinga Musa. Achili zao zabanangika na kukuluphira kpwao ni kpwa bure.
- ⁹Nao taandafika kure, mana upumbavu wao undamanyikana wazi na chila mutu, dza viratu upumbavu wa Yane na Yambire urivyomanyikana.
- ¹⁰Lakini uwe Timothy, unamanya mambo gosi nifundzago, vira ninavyosagala na atu, na lengo ra maisha gangu. Piya unamanya rira ninarokuluphira, n'navyovumirira, na n'navyomendza atu.
- ¹¹Tsona unamanya vira nrivyogaya na kuphaha mateso, hasa gara garigoniphaha hiko midzi ya Antiokia, Ikonio na Listira. Mino kuko náhenderwa mateso makulu, ela Bwana Jesu wanitivya na tabu zosi hizo.
- ¹²Kpwa kweli chila mutu ndiyetaka kusagala masagazi ga kumuogopha Mlungu kpwa kumkuluphira Jesu Muokoli, andateswa.
- ¹³Ela atu ayi na alimu a handzo andaenderera kuchenga ayawao na kuchengbwa, nao andazidi kukala ayi.
- ¹⁴Lakini uwe n'lazima uenderere kugbwira hinyo ukpweli uriofundzwa na kuamini chikpweli-kpweli. Mana we mwenye unaamanya ariokufundza ni ano ani,
- ¹⁵na wamanya Maandiko ga Mlungu hangu wanacheo. Higo ganaweza kukulongoza kpwa busara kuphaha wokofu kpwa kumkuluphira Jesu Muokoli.
- ¹⁶Higo Maandiko gosi galongozwa ni Mlungu kpwa livuho ra Rohowe, nago ganafwaha kpwa mafundzo, kudemurira atu kpwa makosa gao, kualongoza ariche kuhenda dambi, na kuaelekeza aishi maisha gamhamirago Mlungu.

¹⁷Na kpwa njira hiyo, mutu wa Mlungu andakala akakamilishwa na kutayarishwa kpwa kuhenda chila kazi nono.

2 Timothi 4

¹Nami nakulagiza mbere za Mlungu na Jesu Muokoli ambaye andakpwedza na ufalumewe kutawala atu osi na kuahukumu, akale ni azima au afwa:

²Tangaza Neno ra Mlungu na dinisa kuritangaza, wakati ufwahao na usiofwaha. Na kpwa kuafundza atu na kuavumirira sana, uambire wazi makosa gao, uademurire na uatiye moyo.

³Mana kuredza wakati ambapho atu taandavumirira kusikiza mafundzo ga kpweli, ela andalunga tamaa zao. Andadzikusanyira ndulu ya alimu ambao andaambira gara alondago kusikira.

⁴Andarema kabisa kusikiza maneno ga kpweli kpwa kugapha kogo, na kugalukira adisi za handzo.

⁵Lakini uwe kala matso katika chila dzambo, uvumirire tabu, udinise kutangaza habari ndzuri kuhusu Jesu, na umarigize kaziyo nono.

⁶Kpwangu mimi, maisha gangu ganalaviwa dza sadaka, nami wakati wangu wa kufungbwa matso u phephi.

⁷Dza mutu wa kushindana mairo nikazola mairo kpwa bidii na kumala mashindano, nami nikakala muaminifu hadi mwisho.

⁸Phahi Mlungu, waniikira tuzo ya haki ambayo siku ya hukumu, Bwana Jesu, ambaye ni jaji wa haki, andanipha phamwenga na atu osi ariomgodzera kpwa hamu kpwedzakpwe.

⁹Henda bidii wedze kpwangu upesi,

¹⁰mana Dema wahamirwa ni dunia hino ya rero na achinichimbira, achiphiya mudzi wa Thesalonike. Piya Kireske waphiya jimbo ra Galatia, naye Tito achiphiya jimbo ra Dalimatia.

¹¹Luka macheye ndiye yesala phamwenga nami. Kpwa hivyo ndzo na Mariko, mana anaweza kuniterya kuhenda kazi yangu.

¹²Tikiko námhuma mudzi wa Efeso.

¹³Phahi wakati uredza, usiyale koti rangu roriricha kpwa Karipo hiko mudzi wa Tirowa. Piya unirehere vitabu vyangu, haswa vira vya chingo.

¹⁴Yuya fundi wa vyuma aihwaye Isikanda, wanihendera vibaya sana. Bwana andamripha kpwa gara arigonihendera.

¹⁵Uwe nawe dzimanyirire naye, kpwa sababu kala achipinga sana ujumbe wehu.

- ¹⁶Niriphokala nadzikanira mara ya kpwandza kotini, takuna hata mutu mmwenga ariyekala uphande wangu. Atu osi aniricha machiyangu, ela navoya Mlungu aasamehe!
- ¹⁷Lakini Mlungu wakala phamwenga nami na achinipha nguvu, ili niweze kutangaza chikamilifu ujumbewe kpwa atu osi asio Ayahudi, aphahe kuusikira. Phahi wanitivya ili nisiolagbwe.
- ¹⁸Naye Bwana andanitivya na chila hendo ra uyi, na anitsukule salama hadi mlunguni kusagala na atue. Mlungu naatogolwe milele na milele. Amina.
- ¹⁹Niphozera Prisila na Akpwila, na atu osi a nyumbani mwa Onesiforo.
- ²⁰Erasito wasala hiko mudzi wa Korintho, na Tirofimo ambaye kala ni mkpwongo namricha hiko chidzidzi cha Mileto.
- ²¹Henda bidii wedze kabla ya wakati wa mnyevu mkali. Mkaphozwa ni Ebulo, Pude, Lino, Klaudia na afuasi osi.
- ²²Navoya Mlungu akale phamwenga nawe, na akujaliyeni na mbazize mosi.

Tito

Tito 1

¹Baruwa hino ila kpwangu mimi Paulo, mtumishi wa Mlungu na mtume wa Jesu Masihi. Mimi nátsambulwa na kuumwa ni Mlungu niterye atu ariotsambulwa ni Mlungu amkuluphire, na kuafundza ukpweli ndiolongoza atu kuishi maisha gamhamirago.

²Kpwa njira hiyo andaphaha tumaini ra kuishi na Mlungu milele. Na Mlungu ambaye kagomba handzo, waahidi higa kabla ya dunia kuumbwa.

³Wakatiwe uriphofika wamanyisa ujumbewe kpwa njira ya mahubiri. Nami náhewa kazi ya kuatangazira atu dza nrivyolagizwa ni Mlungu muokoli wehu.

⁴Nakuandikira uwe Tito, ambaye nakutsukurira u mwanangu mwenye, kpwa sababu hu phamwenga chiimani. Baba Mlungu na Jesu Masihi, Muokoli wehu, naakujaliye na ukale salama.

⁵Sababu nriyokurichira Chisiwa cha Kirete kala ni umarigize kazi ambayo kala taidzangbwesira, na utsambule vilongozi a atu a Mlungu chila mudzi kama nrivyokulagizira.

⁶Chilongozi wa afuasi a Jesu n'lazima akale bila lawama, akale na mchetu mmwenga. Na anae nao akale afuasi, asiolaumiwa na ario na ishima.

⁷Mana chilongozi ahusikaye na kazi ya Mlungu, n'lazima akale bila lawama. Asikale wa kudziunula, watsukizi, mlevi, mkorofi wala mutu anayedziendzera mali isiyo ya halali.

⁸N'lazima akale mkaribishadzi ajeni, amendzaye mambo manono. Akale wa chiasi, mwenye haki, bila lawama, na awezaye kudzizuwiya.

⁹Ni lazima agbwire ujumbe wa kpweli kama urivyofundzwa ili aweze kutiya moyo anjina kpwa mafundzo ga kpweli na kuonyesa hara apingao mafundzo higo makosa gao.

¹⁰Mana kuna atu anji asiokubali kukala tsini ya mamlaka, haswa hara ambao nkulazimisha chila mfuasi wa Jesu asiyekala Myahudi atiywe tsatsani. Atu hinyo nkugomba maneno ga kuphupha na kuangamiza ayawao kpwa upumbavu wao.

¹¹N'lazima mkomese maneno gao, kpwa sababu anavuruga nyumba za afuasi kpwa kuafundza mafundzo gasigostahili. Nao anahenda hivyo kpwa nia mbii ya kuphaha pesa.

¹²Hata nabii wao mmwenga waamba, "Akirete siku zosi nkugomba handzo, ni dza nyama abaya, avivu amendzao kurya."

¹³Naye wagomba kpweli. Kpwa hivyo, inakubidi uademurire kumala ili akale na kuluphiro ra kudina,

¹⁴na asienderere kugbwirira adisi za Chiyahudi na malagizo ga chibinadamu kula kpwa atu ariorema ukpweli.

¹⁵Chila chitu ni chisafi kpwa atu ario asafi, lakini takuna chiricho chisafi kpwa hara ario najisi na asiokuluphira, mana achili zao na zamiri zao zaodzala uyi.

¹⁶Atu dza hinyo nkudzidai kukala anammanya Mlungu, lakini nkukahala Mlungu kpwa mahendo gao. Ni atu a kutsukiza na asiokala na ishima, nao taafwaha kpwa hendo rorosi nono.

Tito 2

¹Lakini uwe Tito fundza mafundzo ga kpweli.

²Aambire atumia kukala analondwa akale atu awezao kudzikanya, a ishima, na a chiasi. Naadinise kukuluphira, kumendza ayawao, na kuvumirira.

³Vivyo hivyo aambire achetu avyere aishi maisha ga kumhamira Mlungu. Analondwa asikale afyakatsi au kukala atawalwa ni uchi. Tsona afundze mambo manono,

⁴ili aweze kuaelekeza achetu ambao achere adide amendze alume ao na ana ao.

⁵Piya aafundze hinyo achetu adide akale na chiasi na bila lawama, alole vinono mambo gao ga nyumbani, na asikize alume ao ili ujumbe wa Mlungu usedze ukazarauliwa.

⁶Vivyo hivyo ahimizeni barobaro ili akale na chiasi.

⁷Uwe nawe, kala mfwano kpwapo kpwa kuhenda manono katika mambo gosi. Wakati unafundza, manenogo nagakale na uzito na gakale sawa na go uhendago,

⁸tsona gasionekane na makosa, ili maaduigo gaaibike kpwa kukosa neno rorosi ra kugomba dzulu yehu.

⁹Afundze atumwa kuasikiza matajiri gao na aahendese ahamirwe ni chila dzambo. Tsona naasihehe na matajiri gao,

¹⁰au kuiya vitu vyao. Badalaye atumwa anatakpwa kuonyesa kukala ni anono na aaminifu siku zosi, ili kpwa chila njira arehere sifwa mafundzo ga Mlungu, Muokoli wehu.

¹¹Mlungu waonyesa atu osi vira arivyo na mbazi za ajabu ziokolazo.

¹²Mbazi hizo zinahufundza kuricha kuishi bila kujali Mlungu na kuricha tamaa mbii za dunia, na kuishi maisha ga chiasi, ga haki, na ga kumuogopha Mlungu himu duniani.

¹³Higa ndigo maisha ganagolondwa wakati hunagodzera kpwa hakika kuuya kpwa Jesu Masihi na utukufu, iye ambaye ndiye Mlungu mkpwulu na Muokoli wehu.

¹⁴Wadzilavya ili ahukombole na uyi wosi na ahutakase hukale atue mwenye, ario na hamu ya kuhenda manono.

¹⁵Phahi, fundza mambo higo na uhumire uwezoo wosi kuahimiza na kuademurira anaokusikiza. Mutu yeyesi naasikuzarau.

Tito 3

¹Tambukiza atu akale tsini ya atawala na vilongozi, aaogophe na akale tayari kuhenda gosi garigo manono.

²Atambukize asisengenye mutu yeyesi wala asikale na chibako, ela aishi kpwa amani na maelewano na akale apole wakati wosi kpwa chila mmwenga.

³Mana kare sisi hwakala ajinga, asiosikira na ariochengbwa. Hwakala atumwa a tamaa na anasa za chila aina, hwaishi maisha mai ga wivu; atu ahureyera naswi huchiareyera.

⁴Lakini Mlungu Muokoli wehu wahuonera mbazi na achihuonyesa vira ahumendzavyo.

⁵Wahuokola, si kpwa sababu ya dzambo rorosi nono ra haki hurirorihenda, ela kpwa sababu ya mbazize. Wahuokola kpwa kuhutakasa huriphovyalwa mara ya phiri, na kpwa kuhupha maisha maphya kutsupira Roho wa Mlungu.

⁶Wahumwagira Rohowe bila ya chipimo kpwa gara hurigohenderwa ni Jesu Masihi, Muokoli wehu,

⁷ili kpwa mbazi na mendzwa ya Mlungu huphahe kukubaliwa kukala atu a haki na kuishi na Mlungu milele dza arivyohuahidi sisi arisie.

⁸Maneno higo ni ga kpweli. Namendza utiire mkpwazo hinyu ukpweli ili hara anaomkuluphira Mlungu akale na hamu ya kuumira wakati wao kuhenda manono, yani mambo dza higa ni manono na ganafwaha kpwa atu.

⁹Lakini dzitenge na malumbano ga chipumbavu, mlolongo wa madzina ga akare, kuheha, na kupingana kuhusu shariya. Mambo higa tagana fwaida yoyosi.

¹⁰Mutu anayesababisha atu kuheha mkanye ra kpwandza na ra phiri, chisha richana naye.

¹¹Unamanya mutu dza hiyu, achilize zabanangika na ye mwenye anadzihukumu kpwa dambize.

¹²Mimi n'ndahuma Aritema au Tikiko hiko kpweni. Na hiye mutu ndiphofika hiko, henda chadi wedze hukutane mudzi wa Nikopoli, mana nikakata shauri kubaki hiko majira gosi ga mnyevu.

¹³Henda chadi sana kuaterya Apolo na mwanashariya Zena ili aweze kuandza charo chao, na uhakikishe ana chila chitu alondacho.

14N'lazima atu ehu adzifundze kuumira wakati wao kuhenda manono aphahe kuterya ayawao ario na maitaji ga muhimu ili nao asiishi maisha bila ya lengo.

15Mkaphozwa ni atu osi n'rio nao hipha. Huphozereni amendzwa afuasi osi. Mlungu naakujaliyeni mosi.

Filemoni

Filemoni 1

- ¹Baruwa hino ila kpwangu mimi Paulo, ambaye ni busu kpwa sababu ya kutangaza habari ndzuri kuhusu Jesu Muokoli, phamwenga na ndugu yehu Timothi. Kpwa mwenuhu Filemoni, mhendadzi-kazi myawehu, hukumendzaye,
- ²phamwenga na ndugu yehu wa chichetu Afiya, na Arikipo ambaye ni asikari myawehu na kundi rosi ra afuasi ririro phako kaya.
- ³Baba Mlungu na Bwana Jesu Masihi naakujaliyeni na mkale salama.
- ⁴Mwenuhu Filemoni, chila mara nchikala nakuvoyera, nkumshukuru Mlungu kpwa sababuyo.
- ⁵Mana násikira ambavyo unamkuluphira Bwana Jesu na vira umendzavyo atu a Mlungu.
- ⁶Navoya uenderere kuishito na afuasi ayao, ili uelewe mambo gosi manono ambago sisi afuasi a Jesu hunaphaha kpwa kuungana na Masihi.
- ⁷Mwenuhu, mendzwayo ikanifwaha sana na ikanitiya moyo, mana ikaphoza maroho ga atu a Mlungu.
- ⁸Phahi nkaona hivi; Ni wazi kukala unamanya nina uwezo dza mtume wa Jesu wa kukulagiza bila wuoga kuhenda ulondwago.
- ⁹Lakini, kpwa vira hunamendzana, nkaona baha nikuambire. Mimi Paulo, ambaye ni mtumia, tsona hipha sambini busu, kpwa sababu ya Jesu Muokoli,
- ¹⁰nakuvoya umuonere mbazi Onesimasi. Kpwangu namuona sawa na mwanangu, mana námterya akale mfuasi wa Jesu nriphokala naye hipha jela.
- ¹¹Hipho mwandzo Onesimasi kala ni mutu asiyefwaha kwako, lakini sambini mutu wa mana kwako na kpwangu.
- ¹²Ninamhuma edze hiko kwako, dzagbwe kuhenda hivyo ni kama kulavya roho yangu.
- ¹³Mimi nchere jela kpwa sababu ya kutangaza habari ndzuri kuhusu Jesu Muokoli, nami naaza akale kuku aniterye dza vivyo ambavyo ungeniterya uwe.
- ¹⁴Lakini simendze kuhenda rorosi bila ya uwe kukubali. Ichikala undaniterya, isikale kpwa kukulazimisha, ela uhende uonavyo ni sawa.
- ¹⁵Mendzerepho kala ni mpango wa Mlungu Onesimasi kukuchimbira kpwa muda, ili achiuya aishi nawe maisha ga milele.
- ¹⁶Hivi sambini si mtumwa, ela ni zaidi ya mtumwa, mana ni mwenuhu nimmendzaye. Na uwe undammendza zaidi kuriko mimi; mana hata dzagbwe achere mtumwao, ela hivi sambini mfuasi myao.

- ¹⁷Phahi ichikala unaona mimi ni mhendadzi-kazi myao, nakuvoya umphokere dza viratu ambavyo ungeniphokera mimi.
- ¹⁸Ichikala wakukosera ama unamuisa chochosi, nakuvoya uniise mimi.
- ¹⁹Mimi Paulo naandika na mkpwono wangu: "N'ndaripha mimi." Lakini tambukira kukala nákuterya kuphaha uzima wa milele nami sindakuisa.
- ²⁰Phahi mwenehu, n'ndaonato uchihenda hivyo kpwa sababu ya Bwana Jesu. Niphoza roho mana ni mfuasi myao.
- ²¹Nina hakika higa nigandikago undagahenda viratu nikulagizavyo, tsona nina hakika undahenda hata zaidi ya hivyo.
- ²²Kuenjerezera, nakuamba, nitayarishira chumba, mana naona Mlungu andajaliya mavoyo genu afuasi ayangu mrio hiko, nami n'ndakpwedza.
- ²³Ukaphozwa ni Epafara ambaye ni busu myangu kpwa sababu ya kutangaza habari ndzuri za Jesu Muokoli.
- ²⁴Na piya ukaphozwa ni ahendadzi-kazi ayangu Mariko, Aristariko, Dema na Luka.
- ²⁵Bwana Jesu Masihi akujaliyeni mosi.

Aebrania

Aebrania 1

- ¹Hipho kare, Mlungu wabisha na akare ehu kutsupira manabii. Wahenda hivi mara nyinji na kpwa njira tafwauti tafwauti.
- ²Lakini siku hizi za phephi na mwisho, Mlungu wagomba naswi kutsupira Mwanawe. Wamtsambula hiye Mwana arisi vitu vyosi, na kutsupira iye Mlungu waumba dzulu na photsi na vyosi virivyo himo.
- ³Hiye Mwana anang'ala kpwa utukufu wa Mlungu na anaonyesa sura kamili ya vira Mlungu arivyo. Anahenda vitu vyosi vya duniani na vya mlunguni vienderere kukala vyo virivyo kpwa nenore renye uwezo. Aripodzilavya dza sadaka ya kuusira atu dambi, wakpwendasagala mkpwono wa kulume wa Mwenyezi Mlungu, phatu pha ishima kulu hiko mlunguni.
- ⁴Mlungu wamhenda Mwanawe akale mkpwulu kuriko malaika dza vira arivyomupha dzina ririro kulu kutsupa rira ra malaika.
- ⁵Mana takuna malaika ariyeambwa ni Mlungu maneno higa arigoambira Jesu, "Uwe u Mwanangu, rero nkakala sowe." Na Mlungu kagombere kuhusu malaika yeyesi akaamba, "N'ndakala ise, naye andakala mwanangu."
- ⁶Tsona Mlungu aripokala anamreha Mwanawe mvyere duniani, waamba, "Malaika osi a Mlungu ni amuabudu hiye Mwana."
- ⁷Na iye aripogomba kuhusu malaika, waamba, "Malaika angu, nkuahenda akale dza roho, nao atumishi angu, nkuahenda akale dza vimwindi vya moho."
- ⁸Ela kpwa Mwanawe, iye anaamba, "Uwe Mlungu undatawala milele na milele, na utawalao undakala wa haki.
- ⁹Uwe unamendza gara garigo manono, na kuzira gosi garigo mai. Kpwa hivyo Mlungu, Mlunguo, akakusaka mafuha ga kukuhamira kpwa kukuhenda mkpwulu kuriko ayao osi."
- ¹⁰Piya Mlungu anaambira mwanawe, "Uwe Bwana ndiwe uriyeumba dunia pho mwandzo, na piya ndiwe uriyeumba dzulu mlunguni kpwa mikonoyo.
- ¹¹Lakini hata hivyo vya mlunguni na vya duniani vindasira, vindatsakala kama nguwo, ela uwe undakalako siku zosi.
- ¹²Uwe undavikundza-kundza dza demu ra kandzu, vindaparara dza nguwo ya kare. Lakini uwe undakala vivyo urivyo, wala miakayo taindasira."
- ¹³Mlungu kadzangbwemuambira malaika yeyesi, "Sagala mkpwono wangu wa kulume, phatu pha ishima kulu sana, hadi nihende maaduigo gakugbwerere maguluni."

¹⁴Kpwa hivyo malaika ni utu wani? Ni roho ambazo zinamhumikira Mlungu, naye nkuzihuma zichahumikira hara ambao andativiwa.

Aebrania 2

¹Kpwa hivyo gara huchigosikira, nahuzidini kugalunga, husedze hukagaricha na kulunga mambo ganjina.

²Hinyo ujumbe uriorehwa ni malaika kpwa akare ehu wakala ni woogophewe, na osi ariouricha na kurema kuulunga atiywa adabu kulengana na makosa gao.

³Dze sino hundawezadze kuepa kutiywa adabu husiphojali wokofu urio mkwulu namna hino? Bwana Jesu mwenye ndiye ariyeandza kutangaza wokofu hinyo, na hara ariomsikira achihuhakikishira kala ni kpweli.

⁴Mlungu piya walavya ushahidi wa wokofu hinyo kpwa kuhenda dalili, maajabu na vilinje, na kulavya vipawa vya Rohowe kama arivyomendza.

⁵Hunabisha kuhusu dunia nyiphya ndiyokpwedza. Hunamanya kala dunia hiyo taindatawalwa ni malaika,

⁶ela Maandiko ganalavya ushahidi hinyo: "Nyo anadamu ana mana yani, hata ukale uwe Mlungu undaaririkana, na hinyo ambao ni atu bahi, hata ukale undaajali?"

⁷Waahenda anadamu akale tsini kuriko malaika kpwa muda mchache. Nawe waapha utukufu na ishima,

⁸na uchiahenda atawale vitu vyosi." Phahi, wahenda atawale vitu vyosi, manage ni kukala takuna chochosi chosala kutawalwa ni anadamu. Hata hivyo kpwa wakati huno tahuona anadamu achitawala vitu hivyo.

⁹Lakini badalaye hunamuona Jesu, ambaye kpwa muda mchache waikpwa tsini kuriko malaika, wahewa utukufu na ishima kulu kpwa sababu ya kugaya na kufwa. Wakata shauri kuhenda hivyo ili kpwa kutsupira mbazi za Mlungu afwe kpwa ajili ya atu osi.

¹⁰Mana Mlungu waumba vitu vyosi, navyo vyakalapho kpwa ajiliye. Naye anareha ana anji kushiriki utukufuwe. Kpwa hivyo kala inabidi amukamilishe Jesu kpwa njira ya kugaya, iye ambaye ni chandzo cha wokofu wao.

¹¹Iye Jesu atakasaye atu dambi zao akale atakatifu, na hinyo anaohendwa akale atakatifu, osi ise yao ni mmwenga. Ndiyo sababu Jesu kaona waibu kuaiha nduguze,

¹²naye achiamba, "Uwe Mlungu, n'ndaambira enehu ukuluo, ninaphokutana na atuo, n'ndaimba mawira ga kukutogola."

¹³Tsona anaamba, "N'ndamkuluphira Mlungu." Na piya anaamba, "Himi hipha phamwenga na ana nriohewa ni Mlungu."

¹⁴Kpwa vira hano ana ariohewa ni a miri ya kawaida, yani nyama na mlatso, Jesu naye wakpwedza na mwiri dza miri yao. Wahenda hivyo ili kpwa chifoche amuangamize Shetani ariye na uwezo wa kuhenda atu afwe,

¹⁵na waika huru atu osi ariokala atumwa kpwa kuogopa chifo mwao maishani.

¹⁶Hino inaonyesa wazi kukala Jesu kedzereterya malaika, ela atu a chivyazi cha Brahimu.

¹⁷Kpwa hivyo yabidi akale dza nduguze kpwa chila njira ili akale Mlavyadzi-sadaka mkpwulu ariye na mbazi na waminifu katika kumhumikira Mlungu. Na kpwa njira hiyo, waweza kulavya sadaka kuusira atu dambi zao.

¹⁸Phahi anaweza kuaterya anaojzwa ni Shetani kpwa sababu ye mwenye wajejwa na achigaya.

Aebrania 3

¹Kpwa hivyo enehu atakatifu, mwimwi mnaoshiriki mwiiho wa Mlungu phamwenga naswi, ririkanani Jesu ambaye ni mtume na Mlavyadzi-sadaka wehu mkpwulu hunayemkubali.

²Hiye wakala muaminifu kuhenda higo gosi kpwa Mlungu ariyemtsambula, dza Musa piya yekala muaminifu kpwa kulongoza atu osi a Nyumba ya Mlungu.

³Lakini Jesu anafwaha nguma zaidi ya Musa dza viratu fundi wa nyumba nkukala na sifwa zaidi kuriko yo nyumba yenye.

⁴Mana chila nyumba ina fundiwe, lakini Mlungu ndiye aumbaye vitu vyosi.

⁵Musa wahenda kazi ya mtumishi muaminifu kahi za atu a Mlungu. Kaziye yenye kala ni kuonyesa gara Mlungu ndigogomba badaye.

⁶Ela Jesu naye wahenda kazi ya mwana muaminifu ya kulongoza atu a Nyumba ya Mlungu. Naswi hu atu a nyumbaye ichikala hundaenderera kudzitiya moyo na kudina chilume kugbwiririra kuluphiro huriro naro.

⁷Phahi kama Roho wa Mlungu anavyoamba: "Rero, unaphosikira maneno ga Mlungu,

⁸msikale na mioyo mifu dza akare enu arivyokala, ariphorema kulongozwa ni Mlungu, dza wakati hura ariphonijeza hiko weruni.

⁹Mana hiko anijeza na kunipima, hata dzagbwe aona nrivyoahendera kpwa miaka arubaini.

¹⁰Kpwa hivyo náreyezwa ni chivyazi hicho, nchiamba, 'Atu hano ni atu a maazo mai siku zosi, nao taamendze kulunga njira zangu.'

¹¹Kpwa hivyo náreya na nchilapha, nchiamba, 'Hakika atu hano sindaruhusu kuinjira pahali phangu pha kuoya.' "

¹²Enehu, dzimanyirireni sedze hata mmwenga wenu akakala na moyo wenye maazo mai na kusakuluphira, na kpwa kuhenda hivyo, andadzitenga na Mlungu ariye moyo.

¹³Lakini chila mmwenga na amtiye myawe moyo chila siku hunayoyiha, "rero" ili mutu asedze akachengbwa akauya dambini, na akakala na moyo mufu kpwa Mlungu.

¹⁴Mana hunashiriki gosi phamwenga na Jesu, ichikala hunadinisa kugbwiririra kuluphiro hurirokala naro kula mwandzo hadi mwisho.

¹⁵Kama Maandiko ganavyoamba: "Rero, mnaphosikira maneno ga Mlungu, msikale na mioyo mifu dza akare enu arivyokala, ariphorema kulongozwa ni Mlungu."

¹⁶Ni ano ani nyo ariosikira na achirema maneno ga Mlungu? Ni hara ariolongozwa ni Musa kula Misiri.

¹⁷Na dze nyo ariomreyeza Mlungu miaka arubaini nao? Avi ni aho ariohenda dambi hata achifwa weruni.

¹⁸Ni ano ani ambao Mlungu walapha kukala kandaaruhusu kuinjira phahaliphe pha kuoya? Ni hara ariorema kumuogopha.

¹⁹Kpwa hivyo, hunamanya atu hinyo akosa kuinjira phahali hipho kpwa sababu ya kusakuluphira kpwao.

Aebrania 4

¹Phahi ahadi ya Mlungu icherepho ya atu kuinjira phahaliphe pha kuoya. Kpwa hivyo nahudzimanyirireni husedze hata mmwenga wehu akakutwa, akakosa kuinjira phahali hipho.

²Sino hwasikira habari ndzuri kuhusu phahaliphe pha kuoya dza arivyosikira akare ehu. Ela habari hiyo taiyaaterya kpwa sababu taayakuluphira gara arigogomba Mlungu.

³Sisi humkuluphirao Mlungu ndio ndioinjira phahaliphe pha kuoya. Lakini kpwa hinyo asiomkuluphira Mlungu, waamba, "Wakati mino kala nikareyezwa, nálapha nchiamba, 'Hakika atu hano sindaruhusu kuinjira phahali phangu pha kuoya.' " Mlungu waamba hivi hata dzagbwe kaziye na hata hipho phahali kala pha tayari hangu ariphomala kuumba dzulu na photsi.

⁴Mana Maandiko ganaamba, "Phofika siku ya sabaa Mlungu achikala akamala kazi zokala anazihenda, na achioya."

⁵Na tsona seemu yanjina ya Maandiko, Mlungu wagomba, achiamba, "Hakika atu hano sindaruhusu kuinjira phahali phangu pha kuoya."

⁶Hara akare ehu ariokala a mwandzo kuambirwa hizo habari ndzuri, taayainjira phahaliphe pha kuoya kpwa sababu arema kusikiza neno ra Mlungu. Lakini ahadi bado icherepho ya anjina kuinjira phahaliphe pha kuoya.

⁷Kpwa hivyo Mlungu wapanga siku achiyihha, "rero". Mana miaka minji bada ya hara ariokosa nafwasi, Mlungu wagomba tsona kuhusu habari za kuoya. Wagomba kutsupira Mfalume Daudi dza vira huchivyogomba kare, "Rero, mnaphosikira maneno ga Mlungu, msihende mioyo yenu mifu."

⁸Kalapho Joshuwa angeweza kuafisa hara atu hipho phahali pha kuoya, Mlungu kangegomba badaye kuhusu siku yanjina ya kuoya.

⁹Kpwa hivyo bado kuchere na siku ya kuoya kpwa atu a Mlungu.

¹⁰Mutu yeyesi ainjiraye kuoya kpwa Mlungu andaoya kuhenda kazize dza Mlungu arivyooya siku ya sabaa.

¹¹Kpwa hivyo nahuhendeni chadi huinjire phahali hipho pha kuoya, ili husedze hata mmwenga wehu akashindwa kuphainjira kpwa kusaogopha dza akare ehu arivyoohenda.

¹²Mana ujumbe wa Mlungu u moyo na una nguvu sana. Tsona ni dza upanga urio na maso pande zosi mbiri, unaodunga kahi za mioyo na maroho gehu na kuganya vilungo vya mwiri na mafuha ga mifuphani. Piya ujumbe wa Mlungu unaweza kumanya maazo na nia za mioyo yehu.

¹³Takuna chiumbe chochosi chirichofwitsika hata ikale Mlungu kachiona. Chila chitu chi wazi mbereze. Naswi hundalavya isabu ya mahendo gehu mbereze.

¹⁴Enehu, manyani kukala huna Mlavyadzi-sadaka mkpwulu sana ariyephiya pho pharipho Mlungu mwenye. Hiye ndiye Jesu ambaye ni Mwana wa Mlungu. Kpwa hivyo nahugbwire na kudinisa gara hukuluphirago na kugashuhudiya.

¹⁵Mana Mlavyadzi-sadaka wehu mkpwulu anaelewa unyonje wehu. Naye piya wajezwa kpwa chila njira ni Shetani dza vivyo sisi, lakini kayahenda dambi.

¹⁶Phahi nahusengerereni pho pharipho na chihi cha endzi cha Mlungu bila wuoga, mana Mlungu ni mnono. Ndipho andahuterya wakati wa shida kpwa kuhujaliya na kuhuonera mbazi.

Aebrania 5

¹Chila Mlavyadzi-sadaka mkpwulu nkutsambulwa kula kpwa anadamu kuhumikira Mlungu kpwa niaba yao. Naye nkulavya zawadi na sadaka zao za kuausira dambi.

²Anaweza kuaonera mbazi ayae asiomanya na anaoangamika kpwa kuhenda makosa, kpwa vira hata ye mwenye ni mnyonje.

³Ndiyo mana n'lazima alavye sadaka kudziusira dambize mwenye, dza viratu alavyavyo sadaka kuusira dambi ayae.

⁴Tsona, takuna mutu ambaye anaweza kudzipha cheo cha kukala Mlavyadzi-sadaka mkpwulu, ela atsambulwe ni Mlungu dza viratu vyotsambulwa Haruni.

⁵Vivyo hivyo Jesu kayadziunula kpwa kudzipha mwenye nguma ya kukala Mlavyadzi-sadaka mkpwulu, ela watsambulwa ni Mlungu. Mana ye Mlungu wamuamba, "Uwe u Mwanangu, rero nkakala sowe."

⁶Piya himo Maandikoni, waamba, "Uwe u Mlavyadzi-sadaka milele, dza viratu Melikizedeki arivyokala."

⁷Ariphokala hipha duniani, Jesu wavoya sana Mlungu kpwa raka ra dzulu na kurira, mana kala anamanya kukala Mlungu ana uwezo wa kumtivya na chifo. Wamuogopa Mlungu kpwa chila njira, naye achiphokera mavoyoge.

⁸Hata dzagbwe kala akatsambulwa ni Mlungu akale Mwanawe, wadzifundza kuhenda vira Mlungu alondavyo kula kpwa go mateso arigophaha.

⁹⁻¹⁰Ariphokala akahendwa mkamilifu kpwa njira hino, Mlungu wamupha cheo cha Mlavyadzi-sadaka mkpwulu dza Melikizedeki. Hipho ndipho ariphoapha atu osi anaomuogopa uzima wa milele.

¹¹Huna manji ga kubisha kuhusu dzambo hiri ra Jesu kukala ni Mlavyadzi-sadaka mkpwulu, lakini hunashindwa hukuambireni viphi, kpwa sababu tamgbwira upesi.

¹²Ela kala si hivyo, hivi sambu mngakala mu alimu, lakini mwino kula phapho hata vivi bado mchere londa kufundzwa go mafundzo ga mwandzo mwandzo kuhusu neno ra Mlungu. Mwimwi mu dza ana atsanga ambao acheretaka maziya badala ya chakurya chigumu.

¹³Mana yeyesi ambaye ni wa maziya bahi ni dza mwana mtsanga ambaye kamanya rorosi kuhusu mafundzo ga haki.

¹⁴Lakini atu avyere nkurya chakurya chigumu, na kpwa njira hino nkudzifundza sana kutafwautisha manono na mai.

Aebrania 6

¹Kpwa hivyo naahusisalani na go mafundzo hurigodzfundza mwandzo mwandzo kuhusu Jesu, ela nahuenderereni kudzfundza kukala afuasi apevu. Naswi nahusiuyire nyo msingi wa mafundzo ga kutubu mahendo garehago chifo na kumkuluphira Mlungu.

²Piya nahusiuyire kufundza kuhusu kubatizwa, kubandikirwa mikono, kufufulwa kpwa ariofwa na hukumu isiyo na mwisho.

³Na Mlungu achimendza, higo hundagahenda.

- ⁴Mana atu anjina ang'azwa matso achimanya unono wa mambo ga Mlungu, na achishiriki chipawa cha Roho wa Mlungu.
- ⁵Tsona atata unono wa ujumbe wa Mlungu na achimanya nguvu za utawala wa Mlungu katika ulimwengu wedzao,
- ⁶lakini aricha kumkuluphira Mlungu. Hivyo ni kama avi o enye anamuolaga Mwana wa Mlungu kpwa kumkota misumari msalabani mara ya phiri, na kumtiya waibu. Kpwa hivyo atu hinyo taaweza kuhendwa atubu tsona.
- ⁷Mana mtsanga unwao madzi ga mvula na kukuza mimea ambayo nkufwaha mkurima, Mlungu nkuujaliya.
- ⁸Lakini mtsanga ukuzao miya na kpwekpwe, nkukala tauna mana, nao nkukala na hatari ya kulaniwa na mwisho undatiywa moho.
- ⁹Enehu ninaokumendzani, hata dzagbwe nkakuandikirani na maneno makali, mino nina hakika kukala mnaona manono zaidi kpwa sababu mwaokolwa.
- ¹⁰Mana Mlungu ni wa haki na kandaricha kutambukira kazi yenu nono na vira mmendzwavyo kpwa kuterya afuasi ayawenu hangu mwandzo hadi sambi.
- ¹¹Nina hamu kulu sana ya kpwamba chila mmwenga wenu aenderere kuhenda chadi hadi mwisho, ili higo mrigo na tumaini nago mgaphokere chikamilifu.
- ¹²Msikale avivu, ela igizani hara ambao kpwa kukuluphira na kuvumirira nkuphokera gara ambago gaahidiwa ni Mlungu.
- ¹³Hipho kare, Mlungu ariphomuahidi Brahimu, walapha kpwa kudzihadza ye mwenye, kpwa sababu kala takuna ariye mkpwulu kumshinda.
- ¹⁴Hipho Mlungu waamba, "Hakika n'ndakujaliya na n'ndavihenda vivyazivyo vikale vinji."
- ¹⁵Phahi Brahimu wagodza kpwa kuvumirira na mwishowe Mlungu achimhendera gara arigokala akamuahidi.
- ¹⁶Atu achilapha, nkuhadza yuya ariye mkpwulu zaidi, na hiko kulapha kunaonyesa gara gachigogombwa ni ga kpweli, na nkuusa malumbano.
- ¹⁷Naye Mlungu walapha ili ahuhakikishire sisi hundiophokera majaliwa arigolagbwa mkare wehu Brahimu kukala lengore tariweza kubadilika.
- ¹⁸Mlungu achiahidi na kulapha, kagaluzi. Mana kagomba handzo. Iye wahenda higa mambo mairi ili, sisi ambao hunamlunga, hutiywe moyo kpwa kugbwiririra kukuluphira gara Mlungu arigohulagiza.
- ¹⁹Hiro kuluphiro rehu ni kama nanga inayohenda mioyo yehu ikale imara. Naro rinahulongoza kutsupira ndani ya paziya kufika mbere za Mlungu.
- ²⁰Jesu wahutanguliya kare kpwa sababu yehu. Naye ni Mlavyadzi-sadaka mkpwulu wa milele dza viratu Melikizedeki arivyokala.

Aebrania 7

- ¹Hiye Melikizedeki kala ni mfalume wa mudzi uihwao Salemu, piya kala ni Mlavyadzi-sadaka wa Mwenyezi Mlungu. Wakpwendamchinjira Brahimu ariphokala anauya kula vihani arikokala akashinda afalume ane, na achimjaliya.
- ²Naye Brahimu wahala seemu mwenga ya kumi ya vitu vyosi arivyophaha vihani achimupha Melikizedeki. Mana ya dzina hiri ni, "Mfalume wa Haki". Tsona anaihwa Mfalume wa Salemu manage ni, "Mfalume wa Amani".
- ³Melikizedeki kamanyikana ise wala nine, piya takuna amanyaye akaree. Kamanyikana kuvyalwakpwe wala kufwakpwe. Iye ni dza Mwana wa Mlungu mana ni Mlavyadzi-sadaka milele.
- ⁴Hebu lolani Melikizedeki arivyokala mkpwulu. Mana hata Brahimu, mkare wehu, wamupha seemu mwenga ya kumi ya zewe ariyophaha vihani.
- ⁵Shariya za Musa zinaamba, alavyadzi-sadaka, ambao osi ni chivyazi cha Lawi, ahale fungu ra kumi kula kpwa Aiziraeli ayae. Ahenda hivyo hata dzagbwe akala ni ndugu zao, yani atu a chivyazi cha Brahimu.
- ⁶Lakini hiye Melikizedeki kala siye chivyazi cha Lawi, hata hivyo wahala fungu ra kumi kula kpwa Brahimu. Tsona wamjaliya Brahimu ambaye kala ana chilagane na Mlungu.
- ⁷Naswi hunamanya kala mutu ariye na uwezo wa kuajaliya ni mkpwulu kuriko hiye aajaliwaye.
- ⁸Kpwa uphande wa alavyadzi-sadaka ario chivyazi cha Lawi na aphokerao fungu ra kumi, ni atu ambao mwishowe nkufwa. Lakini kpwa uphande wa Melikizedeki ariyephokera fungu ra kumi kula kpwa Brahimu, iye ni mutu ambaye achere moyo hata vivi rero.
- ⁹Piya hunaweza kuamba, hata Lawi mwenye, ambaye chivyaziche chinaphokera fungu ra kumi, iye naye walavya fungu ra kumi kpwa Melikizedeki kutsupira mkarewe Brahimu.
- ¹⁰Mana Lawi wakala kadzangbwevyalwa, na kpwa hivyo wakala achere mwirini mwa Brahimu wakati Melikizedeki ariphomchinjira.
- ¹¹Shariya za Musa zalaviwa kutsupira alavyadzi-sadaka, yani atu a chivyazi cha Lawi. Lakini kazi za alavyadzi-sadaka taziyatosha chikamilifu kpwa malengoge gosi. Kpwa hivyo phakala na haja ya Mlavyadzi-sadaka wanjina dza Melikizedeki ambaye siye dza Haruni
- ¹²Tsona ulavyadzi-sadaka uchigaluka, n'lazima Shariya nazo zigaluke.
- ¹³Sambi yuya anayebishwa hipha ni Jesu, naye ni mutu wa kabila ranjina, wala siye Mlawi. Na takuna mutu wa kabilaye ariyehumikira Mlungu kpwa kumlavira sadaka.

- ¹⁴Mana inamanyikana kukala Bwana wehu Jesu wala kabila ra Juda, na Musa ariphokala anagomba kuhusu alavyadzi-sadaka, kahadzire kabila hiro.
- ¹⁵Na higa nigombago sambu ga wazi zaidi, mana kpwatsembuka Mlavyadzi-sadaka wanjina dza yuyatu Melikizedeki.
- ¹⁶Iye kayahendwa Mlavyadzi-sadaka kpwa kutimiza lagizo ra kukala chivyazi cha kabila ra Lawi, ela wahendwa Mlavyadzi-sadaka kpwa nguvu za uzimawe ambao tauweza kubanangbwa.
- ¹⁷Mana Maandiko ga Mlungu ganaamba: "Uwe u Mlavyadzi-sadaka milele, dza viratu Melikizedeki arivyokala."
- ¹⁸Lagizo ra mwandzo rinaremewa kpwa mana tarina nguvu wala tarifwaha chitu.
- ¹⁹Hizo Shariya za Musa, kala taziweza kukamilisha cho chosi. Lakini sambu kuna kuluphiro nono zaidi, ambaro rinahureha phephi na Mlungu.
- ²⁰Zaidi ya higo, hata dzagbwe Mlungu kayaalaphira atu anjina akale alavyadzi-sadaka,
- ²¹wamlaphira Jesu, achiamba, "Mimi, Bwana Mlungu nálapha, na wala sindagaluzi nia yangu tse: Uwe u Mlavyadzi-sadaka milele."
- ²²Phahi kpwa sababu ya kulaphirwa, Jesu ndiye mzamana wa chilagane chiphya, ambacho ni nchinono zaidi kuriko hicho cha kare.
- ²³Tafwauti yanjina ni kukala hipho kare alavyadzi-sadaka kala ni anji, mana kpwa sababu ya chifo taayaweza kuenderera na kazi yao.
- ²⁴Lakini Jesu andakala Mlavyadzi-sadaka milele kpwa sababu yu moyo hata kare na n'kareni.
- ²⁵Kpwa hivyo ana uwezo wa kutivya milele mutu yeyesi edzaye kpwa Mlungu kutsupira iye, naye anaavoyera wakati wosi.
- ²⁶Mana Jesu ndiye Mlavyadzi-sadaka mkpwulu ambaye anafwaha kpwehu. Ni mtakatifu, bila lawama, na bila ya najisi. Watengbwa na achina-dambi, naye Mlungu wamuunula kuphiya mlunguni.
- ²⁷Jesu kalondwa kulavya sadaka chila siku dza alavyadzi-sadaka a kare vyokala achienda. Aho kala achienda hivyo kpwandza kpwa sababu ya kudziusira dambi zao, alafu kuusira dambi za ayawao. Lakini iye walavya sadaka limwenga ariphodzilavya msalabani na ichitosha wakati wosi.
- ²⁸Mana Shariya nkutsambula alavyadzi-sadaka akulu, atu ambao ni anyonje. Lakini Mlungu, bada ya Shariya kpwedza, wamtsambula Mwana kpwa kumlaphira. Naye Mwana wahendwa akale mkamilifu milele.

Aebrania 8

- ¹Kahi za mambo gosi higo, ra muhimu zaidi ni hiri: Mlavyadzi-sadaka wehu mkpwulu asegere mkpwono wa kulume wa Mlungu, phatu pha ishima kulu sana hiko mlunguni.
- ²Kuko nkuhumikira Mlungu phatu phatakatifu, ndani ya rira hema ra kpweli rotengezwa ni Bwana Mlungu mwenye wala siyo mikono ya anadamu.
- ³Chila Mlavyadzi-sadaka mkpwulu nkutsambulwa alavye zawadi na sadaka, na vivyo hivyo Mlavyadzi-sadaka wehu mkpwulu piya n'lazima akale na chitu cha kulavya.
- ⁴Kalapho Jesu angekala anaishi himu duniani, kangekala Mlavyadzi-sadaka hata chidide, kpwa sababu kuna atu anjina ambao analavya sadaka kulengana na Shariya za Musa.
- ⁵Hinyo alavyadzi-sadaka anamhumikira Mlungu phatu phatakatifu ambapho ni mfwano na chivuri-vuri cha pho phatu phatakatifu hiko mlunguni. Ndiyo mana Musa ariphokala anadzitayarisha kutengeza hema ra kumuabudu Mlungu, Mlungu wamuonya achimuamba, "Hakikisha unatengeza vyosi kulengana na mpango nrikuonyesa kura Mwangi wa Sinai."
- ⁶Lakini Jesu wahewa kazi ambayo ni bora zaidi kuriko hira ya alavyadzi-sadaka a kare. Kaziye ni bora zaidi kpwa sababu iye ni ngudzi wa chilagane chiphya ambacho chadzengbwa dzulu ya ahadi nono zaidi kuriko chira chilagane cha kare.
- ⁷Kala cho chilagane cha mwandzo kala tachina lawama yoyosi, takungekala na haja ya chilagane cha phiri.
- ⁸Lakini Mlungu mwenye wakuta hara akare ehu ana makosa. Kpwa hivyo waambira: "Lolani, wakati uredza, ambapho n'ndahenda chilagane chiphya na atu a Iziraeli na a Juda.
- ⁹Hichi chilagane chiphya tachindakala dza chira cha kare nrichoika na akare ao, nrirhoagbwira mikono kualongoza kutsama Misiri. N'ndahenda chilagane chiphya nao, mana taayakala aaminifu kulunga chilagane changu cha kare. Ndiyo mana siyaajali tsona.
- ¹⁰Hichi ndicho chilagane chiphya n'ndichoika na atu a Iziraeli siku hizo zichifika. N'ndatiya shariya zangu mwao achilini, na n'ndaziandika mwao mioyoni. Nami n'ndakala Mlungu wao, nao andakala atu angu.
- ¹¹Takundakala na haja tsona ya mutu kufundza myawe au wanjina kufundza nduguye kumanya Bwana Mlungu. Mana chila mmwenga, kula mdide hata mvyere, andakala ananimanya.
- ¹²Mana n'ndaaonera mbazi kpwa uyi wao, wala sindatambukira tsona dambi zao."

¹³Mlungu anaphoiha hichi chilagane "chiphya", inaonyesa kukala watsakaza chira cha mwandzo. Utu ambao watsakala na taufwaha tsona, taukure na kuangamika.

Aebrania 9

¹Sambi chilagane cha kpwandza kala china pahali phapha duniani pha kumuabudira Mlungu, na malagizo ga kulongozera hiyo ibada.

²Na hema ra kumuabudira Mlungu ratengezwa na kala rina vyumba viiri. Chumba cha kpwandza kala muna chiguzo cha kuikira taa na meza yokala ichiikirwa mikahе mbere za Mlungu. Chumba hichi kala chichiihwa Phatu Phatakatifu.

³Alafu kala kuna paziya, yoganya chumba cha kpwandza na cha phiri. Chumba cha phiri kala chichiihwa Phatu Phatakatifu Zaidi.

⁴Ndani ya cho chumba cha phiri kala muna chijaja cha zahabu cha kufukizira mavumba, na Sanduku ra Chilagane rozibwa na zahabu pande zosi. Na ndani ya ro sanduku, mwakala muna nyungu ya zahabu yokala ina Mana na ndata ya Haruni yokala ina makodza garigotsephula. Piya kala muna vira vipande viiri vya mawe virivyoandikpwa Shariya kumi za chilagane.

⁵Dzulu ya ro sanduku, phakala na sanamu mbiri za makerubi, viumbe vya mlunguni vyokala vina mapha, navyo kala vinaonyesa kala Mlungu a phapho. Mapha gao kala gatakuduka kufwinika phatu phokala Mlungu achisamehe dambi za atu. Ela, uhu si wakati wa kueleza chila chitu kpwa undani.

⁶Phahi vitu vyosi viriphotengezwa na kuikpwa, chila chitu phatuphe, alavyadzi-sadaka kala nkuinjira chila siku cho chumba cha kpwandza na kuhenda kazi yao ya kuabudu Mlungu.

⁷Lakini Mlavyadzi-sadaka mkpwulu macheye wahurusiwa kuinjira chumba cha phiri, naye kala nkuinjira limwenga bahi kpwa mwaka. Tsona kala n'lazima ainjire na mlatso kpwa kumlavira Mlungu sadaka kpwa kudziusira dambize mwenye na za atu anjina osi arizohenda bila ya kumanya.

⁸Phahi kulengana na mipango hiyo, Roho wa Mlungu anahuonyesa wazi kala ro hema ra kare ra Mlungu richikala richere kuhumika, njira ya kuinjirira Phatu Phatakatifu Zaidi taidzangbwe vugulwa.

⁹Huno mfwano unahusu siku zizi hurizo nazo, mana zawadi na sadaka zinazolaviwa ni anaoabudu taziweza kutakasa mioyo yao ili isiahukumu.

¹⁰Sababu malagizo higa ganahusu marya, vinwadzi, na kudzitakasa chimwiri bahi, na kazi za higo malagizo zindasira pho Mlungu ndiphogaluza mambo gosi gakale maphya.

- ¹¹Phahi Jesu wakpwedza dza Mlavyadzi-sadaka mkpwulu wa mambo gosi manono gokpwedza. Wainjira hema risiro na ila ririro mlunguni, ambaro tariyatengezwa ni binadamu wala si seemu ya dunia hino youmbwa.
- ¹²Iye wamenya hipho phatu phatakatifu limwenga bahi, nayo yatosha siku zosi. Na kayamenya kuno akatsukula mlatso wa mbuzi na wa ana-ng'ombe, ela wahala mlatsowe mwenye. Naye wahuriphira wokofu wehu wa milele kpwa sadakaye.
- ¹³Kulengana na chilagane cha kare, milatso ya mbuzi na ya ndzau na ivu ra ndama kala richitimvirwa ario najisi kuhenda miri yao itakaswe.
- ¹⁴Lakini mlatso wa Jesu una nguvu zaidi sana! Unatakasa mioyo yehu ili husienderere kuhenda gara garehago chifo, ela humhumikire Mlungu aishiye. Mana kpwa nguvu za ye Rohowe, Jesu wadzilavya kpwa Mlungu dza sadaka isiyo na ila yoyosi.
- ¹⁵Kpwa sababu hiyo, Jesu ndiye ngudzi wa chilagane chiphya ili hara ariotsambulwa aphokere uzima wa milele uriolagbwa ni Mlungu. Mana Jesu wafwa ili aakombole kula kpwa dambi zao arizohenda wakati wa chilagane cha kare.
- ¹⁶Mana mutu achiika wasiya wa ufwawe, n'lazima ye ahalwaye ufwa, akale wafwa kpweli.
- ¹⁷Nao wasiya una nguvu ichikala kpweli hiye ahalwaye ufwa, wafwa. Lakini tauna nguvu ichikala ye ariyelagiza kuhalwa ufwa achere moyo.
- ¹⁸Ndiyo mana hata chilagane cha kare chaikpwa na milatso ya nyama yomwagika.
- ¹⁹Musa ariphomala kusomera Aiziraeli shariya zosi za Mlungu, wahala milatso ya ana ng'ombe na mbuzi, phamwenga na madzi, pamba ya kundu, na phungo ra muhusopo. Chisha achitimvira-timvira chitabu cha Shariya za Mlungu phamwenga na atu osi,
- ²⁰achiamba, "Huno ni mlatso unaohakikisha chilagane cha Mlungu ambacho walagiza mchilunge."
- ²¹Vivyo hivyo, Musa watimvira-timvira milatso hema ra Mlungu na vitu vyosi vyokala vinahumirwa wakati wa kumuabudu Mlungu.
- ²²Mana kulengana na Shariya, milatso ndiyo ihumirwayo kutakasa karibu chila chitu, na bila ya milatso kumwagika, dambi taziweza kusamehewa.
- ²³Hema ra phapha duniani na vituvye vyokala vichihumirwa kulavira sadaka ni mfwano wa vira vya mlunguni, na vivyo vyakala vichitakaswa na milatso ya nyama. Lakini vitu vyenye vya hiko mlunguni, n'lazima vitakaswe na sadaka ndzuri zaidi kuriko hiyo milatso ya nyama.

²⁴Mana Jesu kayainjira phatu phatakatifu photengezwa ni binadamu, ambapho ni mfwano tu wa pho phatu pharipho hiko mlunguni. Ela wainjira mlunguni kpwenye, ambako sambia mbere za Mlungu kpwa ajili yehu.

²⁵Tsona Jesu kayainjira mlunguni kudzilavya sadaka mara kpwa mara. Kayakala dza Mlavyadzi-sadaka mkpwulu ambaye nkuinjira Phatu Phatakatifu Zaidi mwaka bada ya mwaka, kpwa kulavya mlatso usiokala wakpwe.

²⁶Kala ni hivyo Jesu angekala wakola mara nyinji hangu kuumbwa kpwa dunia. Ela sivyo! Wakpwedza limwenga siku zizi za mwisho, ili ahuusire dambi zehu kpwa kudzilavya sadaka ye mwenye.

²⁷Na dza viratu ambavyo n'lazima anadamu osi afwe limwenga na badaye ahukumawe,

²⁸vivyo hivyo, Jesu walaviwa sadaka limwenga ili ahale dambi za atu anji. Na andakpwedza mara ya phiri, si kpwa kuusa dambi, ela kuarehera wokofu hara amgodzerao kpwa hamu.

Aebrania 10

¹Shariya za Musa ni mfwano wa mambo manono ambago garedza, lakini sigo higo mambo genye. Shariya hizo na sadaka ambazo n'lazima zilaviwe chila mwaka, taziweza kutivya atu anaolunga Mlungu hata chidide.

²Kala Shariya zingeweza kutivya atu, hizo sadaka zingekala zakoma kulaviwa. Mana anaobudu angetakaswa limwenga bahi na vikatosha. Na mioyo yao isingesikira hukumu kpwa dambi zao.

³Lakini hizo sadaka zaatambukiza dambi zao mwaka hadi mwaka,

⁴kpwa sababu milatso ya ndzau na ya mbuzi taiweza kuusa dambi hata chidide.

⁵Kpwa hivyo, Jesu ariphokpwedza hipha duniani, wagomba na Mlungu achiamba: "Kulonda nikulavire sadaka za nyama na za aina zanjina zolondwa ni Shariya, ela wanitayarishira mwiri.

⁶Kuhamirwa ni sadaka zosi za nyama za kuusira atu dambi.

⁷Chisha nchiamba, 'Haya himi nkedza ili nihende mendzwayo, uwe Mlungu wangu, dza viratu Maandiko gaambavyo kunihusu.' "

⁸Kpwandza ye Jesu waamba, "Uwe kulonda sadaka za nyama na za aina zanjina zolondwa ni Shariya, wala kuhamirwa ni sadaka zosi za nyama za kuusira atu dambi." Hiye waamba hivyo, hata dzagbwe sadaka hizo kala zichilaviwa kulengana na Shariya za Musa.

⁹Chisha achiamba, "Haya himi nkedza ili nihende mendzwayo, uwe Mlungu wangu." Kpwa hivyo Mlungu wausa sadaka hizo za kpwandza na badalaye achiika sadaka ya Jesu.

- ¹⁰Na kpwa mendzwa hiyo ya Mlungu, sisi hwatakaswa kutsupira yo sadaka ya mwiri wa Jesu Masihi arioulavya mara mwenga bahi na ichtosha.
- ¹¹Kulengana na chilagane cha kare, chila Mlavyadzi-sadaka, siku hadi siku, nkuhenda kaziye ya kulavya sadaka zizo kpwa zizo ambazo taziweza kuusa dambi hata chidide.
- ¹²Lakini Jesu wadzilavya sadaka limwenga kuusa dambi, na ichtosha wakati wosi. Aripbola hipho, wakpwendasagala mkpwono wa kulume wa Mlungu, phatu pha ishima kulu sana.
- ¹³Hangu wakati hinyo hata vivi, anagodza hadi maaduige gamgbwerere maguluni.
- ¹⁴Mana hara anaohendwa akale atakatifu, Jesu waakamilisha milele na yo sadakaye mwenga.
- ¹⁵Hata Roho wa Mlungu anahushuhudiya kala mambo higa ni ga kpweli. Kpwandza waamba:
- ¹⁶"Bwana Mlungu anaamba: Hichi ndicho chilagane chiphya n'ndichoika na atu a Iziraeli siku hizo zichifika. N'ndatiya shariya zangu mwao mioyoni na kuziandika mwao achilini."
- ¹⁷Chisha anaamba, "Sindatambukira tsona dambi zao, wala mahendo gao mai."
- ¹⁸Phahi wakati dambi zikasamehewa, takuna haja ya kulavya sadaka tsona.
- ¹⁹Enehu nakuambirani, kpwa sababu ya mlatso wa Jesu, sisi hunaweza kuinjira Phatu Phatakatifu Zaidi bila ya wuoga.
- ²⁰Mana Jesu wahuvugurira njira nyiphya ya uzima kutsapira yo paziya kpwa njira ya chifoche.
- ²¹Phahi, kpwa vira huna Mlavyadzi-sadaka mkpwulu sana ambaye analongoza atu a Mlungu,
- ²²nahumsengerereni Mlungu mioyo kutsuka kuno huna hakika kabisa dzulu ya kuluphiro rehu. Mana mioyo yehu yamwagirwa-mwagirwa mlatso wa Jesu iriche maazo mai, na miri yehu yaogeswa na madzi masafi.
- ²³Phahi nahudiniseni ngi-ngi-ngi hiro kuluphiro hunarorigomba, mana iye yeika ahadi ni muaminifu.
- ²⁴Nahufikiriyeni jinsi ya kutiyana moyo humendzane na huteryane zaidi.
- ²⁵Nahusiricheni kukutana phamwenga dza atu anjina ahendavyo. Lakini sino nahutiyaneni moyo haswa vivi ambavyo siku ya Bwana Jesu kuuya inazidi kusengera phephi.
- ²⁶Huchikala hwaphokera ukpweli na hunaumanya, chisha huenderere kuhenda dambi kusudi, takuna sadaka yanjina iwezayo kuusa dambi.

- ²⁷Ela chirobaki ni kugodza kpwa wuoga hukumu ya Mlungu na moho wa kutisha ambao undaangamiza atu osi ampingao Mlungu.
- ²⁸Mutu yeyesi yerema kulunga Shariya za Musa, waolagbwa bila mbazi ariphophahikana na ushahidi wa atu airi ama ahahu.
- ²⁹Ela fikiriyani dzulu ya mutu ariyemzarau Mwana wa Mlungu. Adabuye indakaladze? Tsona, indakaladze kpwa yuya anayeona milatsoye ya chilagane cha Mlungu iriyomtakasa hata iye si chitu? Na dze! Yuya ariyemlaphiza Roho wa Mlungu aoneraye mbazi atue? Hakika adabu yao indakala kulu na kali zaidi.
- ³⁰Mana, hunamanya Mlungu ariyeamba, "Kuriphiza chisasi ni kazi yangu, mimi n'ndariphiza." Piya Maandiko ganaamba, "Bwana Mlungu andahukumu atue."
- ³¹Kpwa kpweli inaogofya sana kutiywa mkpwononi ni Mlungu ariye moyo.
- ³²Hebu tambukirani siku hizo za mwandzo mriphong'azwa matso. Mwagaya sana mambo manji, lakini mwavumirira mateso gosi.
- ³³Wakati wanjina kala mchiteswa na kulaphizwa mbere za atu anji. Piya mwasononeka phamwenga na ayawenu ambao kala anahenderwa mambo mai dza higo.
- ³⁴Mwaonera mbazi ayawenu ambao kala akafungbwa jela. Tsona mriphofutwa mali zenu, mwakala na raha bila kusononeka. Mana kala mnamanya mna vitu vinono zaidi vinavyodumu milele vyoahidiwa ni Mlungu.
- ³⁵Phahi dinani kumkuluphira Jesu bila kusita-sita, na kpwa njira hiyo mndahewa tuzo kulu.
- ³⁶Mana ra muhimu sana ni mvumirire ili mtimize mendzwa ya Mlungu, namwi mndaphokera chira aricholaga.
- ³⁷Mana Maandiko ganaamba: "Hiye agodzwaye andakpwedza vi sambu sambu, kandakaa.
- ³⁸Na atu angu enye haki andaishi kpwa kunikuluphira. Ela achiuya nyuma, taandanihamira bii."
- ³⁹Lakini sisi si dza atu auyao nyuma na kuangamizwa, ela hu phamwenga na hara amkuluphira Mlungu, naswi hundativiwa.

Aebrania 11

- ¹Asena angu, kukuluphira ni kukala na uhakika kuhusu mambo ambago hunagagodzera gedze, na kukubali ukpweli wa mambo ambago tahugaona.
- ²Na kpwa kuluphiro rao, Mlungu watogola akare ehu.

- ³Kpwa kukuluphira, sisi hunamanya kala Mlungu waumba dunia kpwa kugomba neno. Kpwa hivyo chira chinachoonekana chaumbwa kula kpwa chira ambacho tachionekana.
- ⁴Kpwa kukuluphira, Abeli wamlavira Mlungu sadaka nono kuriko ya nduguye Kaini. Na Mlungu waonyesa kukala Abeli ni mutu wa haki kpwa kuphokera sadakaye. Na hata dzagbwe wafwa ela kuluphirore ni mfwano kpwehu hata rero.
- ⁵Kpwa kukuluphira, Enoko wahalwa kuphiya mlunguni bila ya kufwa, naye kayaonekana tsona kpwa sababu Mlungu kala akamhala. Mana Maandiko ganashuhudiya kukala kabla Enoko kadzangbwehalwa kala akamhamira Mlungu.
- ⁶Kpwa hivyo taiwezekana kumhamira Mlungu bila ya kumkuluphira. Mutu yeyesi edzaye kpwa Mlungu n'lazima aamini kukala a kuko na andatuza atu amuendzao kpwa chadi.
- ⁷Kpwa kukuluphira, Nuhu wamphundza Mlungu ariphoonywa kuhusu mambo ambago gandahendeka badaye. Wamuogopha Mlungu achidzenga safina na kpwa kuhenda hivyo, atu a nyumbaye ativiwa na atu a dunia achihukumiwa. Na kpwa sababu ya kuluphirore, naye Nuhu achikubaliwa ni Mlungu kukala ni mutu wa haki.
- ⁸Kpwa kukuluphira, Brahimu wamuogopha Mlungu ariphoihwa aphiye tsi ambayo Mlungu wamlaga kala andamupha ikale yakpwe. Brahimu achitsama hata dzagbwe kala kamanya aphiyako.
- ⁹Kpwa kukuluphira, wasagala chijeni ariphofika yo tsi yokala akalagbwa ni Mlungu. Wasagala mahemani dza Isaka na Jakobo arivyohenda badaye, atu ambao alagbwa chilagane chicho ambacho chalagbwa Brahimu.
- ¹⁰Wahenda hivyo kpwa kukala ka anagodzera mudzi mkpwulu urio na misingi ambayo inadumu milele. Hinyo ni mudzi uriopangbwa na kudzengbwa ni Mlungu mwenye.
- ¹¹Kpwa kukuluphira, Sara waphaha uwezo wa kuphaha mwana kpwa sababu waamini kala Mlungu ni muaminifu na andatimiza ahadize. Waphaha uwezo hinyo hata dzagbwe kala akatsapira miaka ya kuphaha mwana, na kala ni mgumba.
- ¹²Phahi, kula kpwa Brahimu yekala ni mtumia hata asingeweza kuphaha mwana, lakini kpwatuluka atu anji sana dza viratu nyenyezi na mtsanga wa pwani usivyotalika.
- ¹³Atu hinya osi afwa kuno achere kukuluphira, wala kala taadzangbwephaha gara ambago ka akalagbwa. Ela agaona kpwa kure gachiamira. Nao akubali wazi kukala hipha duniani kala ni ajeni na acharo,
- ¹⁴mana atu anaokubali hivyo anaonyesa wazi kala anaendza tsi yao enye.
- ¹⁵Kala angefikiri kuhusu tsi yao ya kare arikotuluka, angeweza kuuya kpwao.

- ¹⁶Lakini nyo kala anaaza tsi ndzuri zaidi, yani hiko mlunguni. Ndiyo mana Mlungu kaona waibu aho achimuiha Mlungu wao, mana waatayarishira mudzi ko mlunguni.
- ¹⁷Kpwa kukuluphira, Brahimu wakala tayari kumlavya sadaka Isaka, phara kuluphirore ririphopimwa ni Mlungu. Iye ariyephokera ahadi za Mlungu wakala tayari kumlavya mwanawe wa macheye,
- ¹⁸hata dzagbwe Mlungu kala akamuamba, "Uvyazio undala kpwa Isaka."
- ¹⁹Brahimu wamanya kukala Mlungu anaweza kufufula lufu. Na kugomba kpweli ni kama avi waphokera Isaka ariyefwa na kufufuka.
- ²⁰Kpwa kukuluphira, Isaka waajaliya anae, Jakobo na Esau kuhusu mambo ndigoaphaha badaye.
- ²¹Kpwa kukuluphira, Jakobo ariphokala a phephi na kufwa, waajaliya ana osi airi a Yusufu, na kumuabudu Mlungu kuno akadzizuwiya na fwimboye.
- ²²Kpwa kukuluphira, Yusufu ariphokala maishage ga phephi na mwisho, wagomba kuhusu ana a Iziraeli ndivyotuluka Misiri, tsona achilagiza kuhusu kuzika mifuphaye badaye.
- ²³Kpwa kukuluphira, avyazi a Musa amfwitsa miezi mihahu kula ariphovyalwa. Amuona kala ni mwana mzuri wala taayaogopha kurema lagizo rokala rikalaviwa ni Farao.
- ²⁴Kpwa kukuluphira, Musa ariphokala mvyere, warema kuihwa mwana wa mwana mchetu wa Farao.
- ²⁵Iye watsambula kugaya phamwenga na atu a Mlungu kuriko kuona raha dambini kpwa muda.
- ²⁶Wakuta kuteswa kpwa ajili ya Muokoli kuna fwaida zaidi kuriko raha na utajiri wa Misiri, kpwa sababu kala anagodzera tuzo ra siku zedzazo.
- ²⁷Kpwa kukuluphira, Musa wauka Misiri bila ya kuogopha mfalume ndivyotsukirwa. Wavumirira kama avi ka anamuona Mlungu, ambaye kaonekana.
- ²⁸Kpwa kukuluphira, waika sheree ya Pasaka, na achilagiza Aiziraeli apake milatso mimo ya miryango yao, ili hiye malaika wa kubananga asiolage ana ao a kpwandza.
- ²⁹Kpwa kukuluphira, Aiziraeli osi avuka Bahari ya Shamu na magulu viratu atu anyendekavyo tsi kavu. Ela Amisiri ariphojeza kuvuka, achihoha.
- ³⁰Kpwa kukuluphira, Aiziraeli azunguluka kuta za Mudzi wa Jeriko siku sabaa, nazo kuta zichigbwa.

³¹Kpwa kukuluphira, Rahabu yekala malaya, kayaolagbwa phamwenga na atu ambao taayamuogopha Mlungu. Mana waakaribisha vinono apelelezi a Chiiziraeli.

³²Enehu, nigombeni zaidi? Takuna wakati wa kutosha, ela ningesemurira kuluphiro ra Gidioni, Baraka, Samsoni, Jefutha, Daudi, Samueli na manabii anjina.

³³Kpwa kukuluphira, atu hinya apigana na falume zanjina, achitawala na haki, na achiphokera vilagane vyokala akalagbwa ni Mlungu. Piya afunga milomo ya simba,

³⁴achizimya jimbi-jimbi ra moho, na achitiya kuolagbwa na upanga. Kala ni anyonje ela achitiywa nguvu hata achishinda viha na kuzoresa majeshi kula tsi zanjina.

³⁵Achetu anjina afufurirwa atu ao ambao kala akafwa. Na atu anjina aona baha ateswe hadi afwe kuriko kuikpwa huru na kumkosera Mlungu. Ahenda hivyo ili afufulwe akale na maisha manono zaidi.

³⁶Anjina azemererwa na kuchapwa milawa. Anjina nao afungbwa minyororo na kutiywa jela.

³⁷Tsona anjina apigbwa mawe, anjina akatwa na misumeno, na anjina nao aolagbwa na upanga. Anjina kala ni achiya hata achivwala chingo za mang'ondzi na mbuzi, mana kala taana chitu tse. Nao achiteswa na kuhendwa mambo mai sana.

³⁸Achiangaika weruni na myangoni, achisagala mapangoni na madibwani. Atu hinya kala ni anono hata dunia kala taifwaha kuishi atu dza hinyo.

³⁹Atu hinyo osi hunaobishira habari zao, atogolwa kpwa sababu ya kukuluphira kpwao, ela taphana hata mmwenga ariyephaha higo arigolagbwa ni Mlungu.

⁴⁰Higa ni kpwa sababu Mlungu wahupangira mambo manono zaidi, ili hinyo asiweze kuhendwa akamilifu machiyao hadi hukamilishwe nao phamwenga.

Aebrania 12

¹Kpwa vira sisi hukazungulukpwa ni kundi kulu ra mashahidi, nahuuseni chila chizingiti ambacho chinahuzuwiya, na hira dambi inayohugbwira dza mwiya wa chikpwata. Nahudiniseni kuzola mairo ambago ga mbere zehu kpwa kuvumirira,

²kuno hunamlola Jesu ambaye anahulongoza humkuluphire Mlungu. Na ndiye ahutiyaye moyo kumarigiza go mashindano ga mairo. Iye wavumirira chifo msalabani bila kujali waibu kpwa ajili ya furaha yokala inamgodzera, na kusagala mkpwono wa kulume wa chihi cha chifalume cha Mlungu, phatu pha ishima kulu.

³Hebu phundzani vyo Jesu arivyopingbwa ni achina-dambi, ela ye achivumirira gosi. Phahi msivundzike mioyo na mkakata tamaa.

- ⁴Mana hata ko kushindana kpwenu na tamaa za kuhenda dambi, tamdzangbwefika chiwango cha kuangamiza maisha genu.
- ⁵Dze, gara maneno ambago Mlungu wagomba kukala mu anae, ili kukutiyani moyo, mkagayala? Mana Mlungu wagomba achiamba: "Mwanangu, Bwana achikutiya adabu ili kukulongoza vinono, usigatsukurire madide. Na achikukanya, usikate tamaa.
- ⁶Mana Mlungu nkumtiya adabu ili kumlongoza vinono chila mutu ammendzaye, na nkumtiya adabu chila ariyemkubali kukala mwanawe."
- ⁷Phahi vumirirani kutiwa adabu mana Mlungu anakuhenderani kama anae. Mana takuna mwana asiyetiwa adabu ni ise.
- ⁸Mlungu nkutiya anae adabu ili aalongoze vinono, na ichikala kandakutiya adabu, manyani kala mu ana a vuweni, simwi anae enye.
- ⁹Tsona hwakala na baba zehu a himu duniani ariohutiya adabu na bado huchiaishimu. Phahi hunalondwa humuishimu zaidi ye Baba wa roho zehu, ili hukale na uzima.
- ¹⁰Mana hata baba zehu hipha duniani nkuhutiya adabu kpwa muda mchache kulengana na vira aonavyo vinafwaha. Lakini Mlungu nkuhutiya adabu kpwa fwaida yehu enye, ili naswi hushiriki utakatifuwe.
- ¹¹Takuna adabu mtiywayo ikafurahisha wakati inahendeka, ela inasonones. Lakini hara atiywao adabu na akasikira, nkuafundza kukala na maisha ga haki.
- ¹²Kpwa hivyo msigbwire rejereje, gbwirani mdinise. Richani kukakamwa ni magulu ili muime vinono.
- ¹³Gbwirani njira za kugoloka, ili hara ambao magulu gao gapholoza asikpwale akagbwa ela aphole.
- ¹⁴Enehu, hendani bidii msagale vinono na chila mutu, na msagale masagazi ga utakatifu. Mana takuna ndiyeweza kumuona Mlungu bila ya kusagala masagazi dza higo.
- ¹⁵Hakikishani takuna hata mmwenga ndiyekosa mendzwa ya Mlungu. Dzimanyirireni ili kusikale na atu ambao andakala dza mizi ya utsungu kahi-kahi yenu. Mana atu dza hinyo andareha tabu na kuchafuwa maroho ga atu anji.
- ¹⁶Piya n'lazima mdzimanyirire kusikale na adiya ama atu aremao Mlungu dza Esau. Iye waguza uvyerewe kpwa chakurya cha wakati mmwenga bahi.
- ¹⁷Namwi mnamanya vyo vyokala, mana badaye naye wataka kuhaswa ni ise kama mwana mvyere, lakini ise warema. Phahi Esau warira matsozi kumtaka ise amhase, ela gachishinda tse-tse-tse.
- ¹⁸Mwimwi tamwedzere mwango wa Sinai uwezao kugutwa, phatu phokala na jimbi-jimbi ra moho, chilungu-lungu cha jiza na phuto kali.

¹⁹Piya tamwedzere phatu hipho pha sauti za kululu za gunda wala sauti ya Mlungu iriyokala kulu hata hinyo akare eh u ariphoisikira, achim'voya asigombe nao tsona.

²⁰Mana Mlungu kala akalagiza achiamba, "Hata nyama achiguta hinyo mwango, piya ni apigbwe mawe hata afwe." Nao ariphosikira ro lagizo, taayaweza kurivumirira.

²¹Mambo higo kala ganatisha sana, hata Musa mwenye achiamba, "Nikatishirwa hata nakakama kpwa wuoga."

²²Lakini mwimwi mkafika Mwango wa Sayuni ambako ni Jerusalemu ya mlunguni. Hinyu ni mudzi wa Mlungu ariye moyo, nako kuna maelufu na maelufu ga malaika anasherekea.

²³Mkedza kutana na kundi ra ana amenzwao sana ni Mlungu, ambao madzina gao gaandikpwa mlunguni. Mkafika kpwa Mlungu ambaye ndiye jaji wa atu osi. Mkafika mlunguni kuriko na roho za atu a haki ariohendwa akale atakatifu.

²⁴Mkafika kpwa Jesu, ngudzi wa chilagane chiphya apatanishaye atu na Mlungu. Mlatsowe wamwagika kusamehe dambi badala ya kuriphiza dza mlatso wa Abeli.

²⁵Hakikishani mnamphundza ye agombaye, mana akare enu arema kumsikiza Musa ariyeaonya hipha duniani, nao achitiywa adabu kali. Naswi hakika hundatiywa adabu kali sana huchirema kumuogopha ye ahugombekezaye kula mlunguni.

²⁶Wakati hinyo, Mlungu ariphogomba, sautiye yasumbisa dunia. Lakini vivi walaga achiamba, "N'ndasumbisa dunia tsona, na siyo dunia macheye, ela hata mlunguni piya."

²⁷Neno hiri, "tsona" rinaonyesa kukala vitu vyosi vyoumbwa himu duniani vindasumbiswa na kuuswa, ili visale vira visivyoweza kusumbiswa.

²⁸Kpwa hivyo nahumshukuruni Mlungu kpwa kuhupha ufalume usiosumbisika. Na hivyo humuabudu kpwa njira imhamirayo, kpwa unyenyekevu na ishima.

²⁹Mana Mlungu wehu ni dza moho uochao tse-tse-tse!

Aebrania 13

¹Phahi zidini kumendzana dza afuasi a Jesu alondwavyo.

²Tsona msiriche kukaribisha ajeni o osi mwenu madzumbani, mana anjina ariohenda hivyo akaribisha malaika bila kumanya.

³Atambukireni atu ario jela, avi mwimwi namwi mwafungbwa nao. Sononekani na atu ateswao avi mnagaya phamwenga.

⁴Ndowa naihishimiwe ni chila mutu, na atu achilólana naasizinge. Mana Mlungu kandaricha kuatiya adabu kali azinifu na adiya.

- ⁵Msikale na tabiya ya kumendza pesa, ela toshekani na hivyo mrivyo navyo. Mana Mlungu waamba, "Sindakuricha wala sindakutsupha."
- ⁶Ndiyo mana hunaweza kugomba bila wuoga hukaamba, "Bwana ndiye msaidizi wangu, sindaogopha chochosi. Mwanadamu andanihendani?"
- ⁷Ririkanani kuhusu vilongozi enu ariokufundzani ujumbe wa Mlungu. Lolani matokeo ga masagazi gao, namwi mkuluphireni Mlungu dza vivyo aho.
- ⁸Manyani kukala Jesu Masihi kagaluka, a vivyo hangu kare, rero na hata milele.
- ⁹Enehu, msiyazwe njira nono kpwa kulunga mafundzo ga chijeni ga aina yoyosi. Mendzwa ya Mlungu inahupha nguvu za chiroho, lakini mizizo ya vyakurya taihupha fwaida yoyosi.
- ¹⁰Huna sadaka ambayo hata alavyadzi-sadaka ambao nkumhumikira Mlungu ndani ya hema ra kumuabudu, taana ruhusa ya kuirya.
- ¹¹Kulengana na shariya za Chiyahudi, Mlavyadzi-sadaka mkpwulu nkuhala milatso akaiphirika Phatu Phatakatifu Zaidi ikale sadaka ya kuusira atu dambi. Lakini hira miri ya nyama enye nkuhalwa na kuochwa kondze ya kambi.
- ¹²Ndiyo mana Jesu naye wagaya na achiolagbwa kondze ya mudzi ili ausire atue dambi na nyo mlatsowe.
- ¹³Phahi naswi nahumlungeni kuko kondze ya mudzi, hukavumirire waibu dza iye arivyovumirira sana.
- ¹⁴Mana hipha duniani tahuna mudzi wehu wa milele, ela hunarorera kpwendainjira mudzi wa hiko mlunguni siku zedzazo.
- ¹⁵Phahi nahumtogleni Mlungu na kutangaza ngumaze wakati wosi. Mana hiyo ndiyo njira ya kumlavira sadaka zehu kutsupira Jesu.
- ¹⁶Msiriche kuhenda manono na kuganyira ayawenu vitu mrivyo navyo, mana sadaka dza hiyo inamhamira Mlungu.
- ¹⁷Ogophani vilongozi enu na mhende mioyo kutsuka gara mlondwago kuhenda. Mana aho ana jukumu ra kuroroma roho zenu, nao andakpwendalavya isabu mbere za Mlungu. Aogopheni ili ahende kazi yao na kuhererwa. Ela mchikosa kuaogopha andahenda kazi yao kpwa sonono, na indakala taina fwaida kpwenu.
- ¹⁸Naswi huna hakika kukala mioyo yehu taiuhukumu, na hunalonda chila ndirorihenda rikale ra sawa na ra ishima. Phahi endererani kuhuvoyera.
- ¹⁹Zaidi ya higa, nakuvoyani mnivoyere ili Mlungu aniphe nafwasi ya kuuya ko kpwenu vi sambu sambu.
- ²⁰⁻²¹Sambu Mlungu wa amani na ambaye wamfula Bwana wehu Jesu, naakutayarisheni kpwa chila chiricho chinono ili mhende mendzwaye. Tsona naakupheni uwezo wa kuhenda gamhamirago kpwa kuungana na Jesu Masihi.

Iye ndiye mrisa mkpwulu wa mang'ondzi, kpwa sababu wadzilavya sadaka achifwa ili ahakikishe hicho chilagane chisicho na mwisho na mlatsowe. Kpwa hivyo naatogolwe milele na milele. Amina.

²²Phahi enehu, nakuhimizani mgagbwire sana higa maneno ga kutiya moyo ambago nkakuandikirani kpwa ufupi.

²³Nakumanyisani kukala ndugu yehu Timothy watuluzwa jela. Phahi achedza mapema hiku n'riko, n'ndakpwedza naye kuko ili hwedze hukulamuseni.

²⁴Niphozerani vilongozi enu osi na atu osi a Mlungu ario hiko. Afuasi kula Itali akakuphozani.

²⁵Mlungu naakujaliyeni mosi.

Jakobo

Jakobo 1

- ¹Mimi Jakobo, mtumishi wa Mlungu na Bwana Jesu Masihi, nakulamusani kuko mriko. Nakuandikirani mwi afuasi a Jesu a Chiyahudi mriotsamukana.
- ²Enehu, hata mchiphaha mateso ga viphi kukupimani mrivyo, mwi hererwani!
- ³Mana mchienderera kuvumirira na kukuluphira, mndadzifundza kuima imara.
- ⁴Zidini kuvumirira, ili mphere chiroho, mkale kamili, na msikose chitu.
- ⁵Myawenu yeyesi achikosa marifwa, n'lazima avoye Mlungu, naye andahewa. Mana Mlungu ndiye alavyaye kpwa chila mutu moyo kutsuka tsona na mbazi.
- ⁶Lakini achikala anavoya, n'lazima akuluphire bila wasi-wasi. Kpwa mana mutu ariye na wasi-wasi ni dza maimbi ga bahari, ambago ganasukumwa ni phuto chila phahali.
- ⁷Mutu dza hiye asione kala Mlungu andamupha chochosi.
- ⁸Mana ana nia mbiri na kakata shauri ya chila ahendaro. Anagaluka-galuka, mara anamkuluphira Mlungu mara kamkuluphira.
- ⁹Mwi achiya ambao mu afuasi a Jesu, hererwani, mana Mlungu anakufikiriyani sana na anakuikani phatu pha ishima.
- ¹⁰Lakini matajiri naahererwe kutserezwa na asihende ngulu mbere za Mlungu, mana andatsapa dza viratu maruwa ga tsakani ganyalavyo.
- ¹¹Mana dzuwa kali nkuala na rikaumisa mimea, nago maruwa gakanyala na unonowe ukayaya. Tajiri naye dza vivyo, andaangamika wakati wa kuendza utajiri zaidi.
- ¹²Mutu ndiyevumirira majaribu na kushinda, andajaliwa na kuphaha zawadi ya uzima wa milele. Mlungu walaga kuapha hinyu uzima wa milele atu ammendzao.
- ¹³Mutu achienda mambo mai, naasiambe, "Mlungu ananijaribu nihende dambi." Mlungu mwenye kataki kuhenda mai, wala kamjaribu mutu kuhenda mai.
- ¹⁴Lakini mambo gahujaribugo na kuhutiya dambini, ni tamaa zehu enye.
- ¹⁵Alafu tamaa zehu mbii zichiphera, zinavyala dambi, nayo dambi ichiphera inavyala chifo.
- ¹⁶Phahi enehu, msichengbwe asena angu!
- ¹⁷Majaliwa manono gosi na zawadi ndzuri zila dzulu mlunguni, kpwa Baba Mlungu. Iye ni muumba wa mianga ya mlunguni na kagaluka dza pepho ya muhi.
- ¹⁸Mlungu waonato kuuhenda hukale anae kpwa kuhupha nenore ra kpweli, na sambu hu viumbe muhimu kuriko viumbevyeye vyosi.

- ¹⁹Asena angu, n'lazima mmanyeye kukala, chila mmwenga ni akale na upesi wa kusikira, lakini asikale na upesi wa kugomba, tsona naasitsukirwe ovyo ovyo.
- ²⁰Kpwa mana tsukizi za mutu taziweza kumterya kuishi maisha ga sawa atakago Mlungu.
- ²¹Phahi, msihende tabiya mbii na mriche mahendo mai gosi tse! Dziikeni kpwa Mlungu na mkubali nenore kpwa upole. Watiya neno hiro mwenu mioyoni, na rinaweza kukuokolani.
- ²²Msidzichenge mkasikiza neno bahi, lakini hendani viratu neno riambavyo.
- ²³Asikizaye neno na akasahenda vira riambavyo ni dza mutu adzilolaye chiloloni,
- ²⁴ela achiuka chidide bada ya kudzilola, akadziyala arivyo.
- ²⁵Lakini mutu achilolato shariya isiyo na lawama yiikayo atu huru, iye andajaliwa ichikala andavumirira na kusikiza hiyo shariya bila ya kuyala arirorisikira.
- ²⁶Mutu adzihendaye ana dini na kadinisa lilimire kugomba mai, naamanye anadzichenga, na yo dini kpwako taina mana kabisa.
- ²⁷Dini ambayo Baba Mlungu anaikubali na kuiona kala taina makosa ni hino: kuterya anachiya na magungu atakao msada, tsona kudzizuwiya na mai ga dunia hino.

Jakobo 2

- ¹Enehu, mnamkuluphira Jesu Masihi, Mfalume wehu wa ajabu, kpwa hivyo msibaguwane.
- ²Mendzerepho mutu edze phenu mkutanoni akavwala nguwo ndzuri na pete za zahabu, na wanjina naye edze pho mkutanoni akavwala mademu mademu.
- ³Alafu muonyese ishima kpwa yuya achiyevwala nguwo ndzuri na mumuambe, "Tafadhali sagala hipha chihini." Ela yuya mgayi mumuambe, "Uwe ima hipha au usagale photsi."
- ⁴Phahi mndakala mnabaguwana wazi na kuhukumu kpwa maazo genu mai.
- ⁵Sikizani enehu amendzwa, Mlungu watsambula agayi akale matajiri mwao mioyoni, kpwa sababu anamkuluphira Mlungu vinono. Nao ndio ndiojaliwa na mambo mazuri gosi ambago Mlungu waalaga atu ammendzao.
- ⁶Lakini mwazarau achiya. Mmanyeye kala matajiri ndio ambao nkukuzulumuni na kukuphirikani kotini.
- ⁷Tsona aho ndio amlaphizao Jesu ambaye ni mtawala wenu.
- ⁸Shariya muhimu ya Mlungu yoandikpwa ndani ya Maandiko, inaamba, "Mmendze myao dza vyo udzimendzavyo mwenye." Mchiilungato hiyo, mndakala mnahenda sawa-sawa.

- ⁹Ela mchibaguwana, mnahenda dambi na mndahukumiwa kpwa kuvundza shariya hino.
- ¹⁰Kpwa mana yeyesi alungaye shariya zosi lakini akavundza mwenga bahi, ana makosa sawa na mutu avundzaye shariya zosi.
- ¹¹Kpwa sababu iye ariyeamba, "Usizini," piya ndiye ariyeamba, "Usiolage mutu." Phahi hata ichikala kukazini, lakini ukaolaga mutu, bado ukavundza shariya za Mlungu.
- ¹²Kpwa hivyo rorosi mgombaro na mhendaro, hendani mchimanya kukala mndahukumiwa ni shariya yiikayo atu huru.
- ¹³Mana mutu yeyesi ambaye kandamuonera mbazi myawe, naye kandaonerwa mbazi. Ela uchionera mbazi ayao, naye Mlungu andakuonera mbazi siku ya chiyama.
- ¹⁴Enehu, kuna mana yani mutu achiamba anamkuluphira Jesu lakini mahendoge tagaonyesa? Kpwa kpweli kuluphirore tariweza kumuokola.
- ¹⁵Menzerepho mfuasi myao, mlume au mchetu, edze kpwako kana nguwo wala chakurya,
- ¹⁶Alafu mmwenga wenu amuambe, "Phiya salama mwenehu, dzifwinike nguwozo na urye vinono!" Lakini msiphomupha chakurya wala nguwo atakazo, andafwaidikadze?
- ¹⁷Kpwa hivyo, kukuluphira bila ya kuonyesa mahendo manono ni kazi ya bure kabisa.
- ¹⁸Sambi mutu anaweza kuamba kukala atu anjina ana kuluphiro, na anjina nao ana mahendo manono. A'a! Kuweza kunihakikishira kukala unakuluphira bila ya kuhenda mahendo manono. Lakini mahendo gangu manono gandakuhakikishira kala ninakuluphira.
- ¹⁹Unaamini kukala Mlungu ni mmwenga. Hivyo ni sawa kabisa, lakini taitosha! Mana hata pephe nao anaamini kala Mlungu ni mmwenga, tsona nkukakama kpwa wuoga.
- ²⁰U mzuzu uwe! Unalonda kuhakikishirwa kala kuluphiro bila ya mahendo manono tarina mana?
- ²¹Umanye kala mkare wehu Brahimu wahala mwanawe Isaka ili akamlavye sadaka. Naye Mlungu achimuona ana haki kpwa sababu ya mahendoge.
- ²²Sambi ukaona? Brahimu wakubali kuhenda vira Mlungu arivyoamba kpwa sababu wamkuluphira. Phahi kuluphirore rakamilishwa ni mahendoge.
- ²³Na gatimia kama Maandiko gaambavyo, "Brahimu wamkuluphira Mlungu na achikubaliwa kukala mutu wa haki." Ndipho Brahimu achiihwa msena wa Mlungu.

²⁴Mkaona sambi, mutu anahendwa kukala na haki kpwa mahendoge, wala siyo kpwa kukuluphira macheye.

²⁵Mfwano wanjina ni Rahabu ambaye kala ni malaya. Piya naye waphaha haki kpwa mahendoge. Wafwitsa Aiziraeli ambao ka ni apelelezi, na achiaterya kuchimbira na njira yanjina.

²⁶Phahi, hunamanya mwiri bila ya roho unafwa, dza viratu kukuluphira bila ya kuhenda mahendo manono ni kazi ya bure kabisa.

Jakobo 3

¹Enehu, msikale alimu mosi, mana hukumu ya sisi alimu indakala kali zaidi kuriko ya atu osi.

²Atu osi nkuhenda makosa manji. Ela ichikala mutu kagomba makosa, phahi kana lawama ya aina yoyosi. Naye anaweza kudzirinda kamare.

³Uchitaka kumlongoza farasi, unatiya chipande cha chuma mlomoni mwa farasi na kuchifunga na kamba nyire.

⁴Tsona nauhaleni mfwano wa meli. Vyo irivyo kulu nkugaluzwa ni usukani mdide sana na ikaphiya kura dereva alondako, hata dzagbwe kuna phuto kali.

⁵Lilimi naro dza vivyo, hata dzagbwe ni chitu chidide mwirini, lakini rinaweza kudzikarya sana. Hebu lola tsaka kulu sana nkutiywa tsandzala ni tsetse ndide ya moho.

⁶Lilimi naro ni dza tsetse ya moho. Raodzala mambo mai dza dunia irivyo na nkugaeneza vilungo vyosi vya mwiri. Mohowe ula jehanamu na unaweza kubananga maisha gehu gosi, hangu kuvyalwa hadi kufwa.

⁷Sisi anadamu hunaweza kufuga chila aina ya nyama, nyama a mapha, viumbe viambalavyo na viumbe vya baharini.

⁸Lakini takuna mutu awezaye kufuga lilimi. Lilimi ni baya na taritawalika, tsona raodzala sumu kali sana ya kuolaga.

⁹Hukuhumira lilimi kumtologa Baba Mlungu, na hukurikumira kupigira atu bako, ambao aumbwa kpwa mfwano wa Mlungu.

¹⁰Mromo uho hinyo mmwenga, nkujaliya na ukalani. Enehu, higa ni mambo mai sana!

¹¹Dze pula mwenga ya madzi inaweza kulavya madzi ga pepho na ga munyu wakati mmwenga?

¹²Enehu, dze muuyu unaweza kuvyala makpwadzu? Hebu mzabibu unaweza kuvyala mauyu? Phahi hata pula ya madzi ga munyu taiweza kulavya madzi ga pepho.

- ¹³Dze, ni ani ariye na achili na marifwa? Ichikala a kuko naahende mahendo manono kuonyesa marifwage, ela naasihende ngulu kpwa sababu ya mahendoge.
- ¹⁴Lakini ichikala mioyo yenu yaodzala chidzitso, upindzani na utsungu, phahi msidzikutule mkaamba mna marifwa, mnadzichenga.
- ¹⁵Marifwa dza higo tagala mlunguni, ela ni ga hipha duniani. Nago gala kpwa achili za anadamu na mashetani.
- ¹⁶Kpwa mana phophosi pharipho na chidzitso na upindzani, phana fujo na mambo mai ga chila aina.
- ¹⁷Lakini kpwa kpweli atu ario na marifwa galago mlunguni ni asafi. Nao taamendze kuheha, ni apole, a tayari kusikiza ayawao, ana mbazi nyinji na mahendo manono. Tsona taana ubaguzi wala unafiki ela wakati wosi ni aaminifu.
- ¹⁸Nao hinyo asiomendza kuheha, achiphanda mbeyu ya amani, andavuna haki.

Jakobo 4

- ¹Ni utu wani ambao unakuhendani mhehe na kupigana? Ni tamaa mbaya ambazo zinapingana mwenu mioyoni.
- ²Mnataka vitu vya atu lakini tamuweza kuviphaha. Tsona mu tayari hata kuolaga atu. Mnaaza vitu vya ayawenu, wala tamuviphaha, namwi mkuheha na mkapigana ili mviphahe. Ela tamphaha mlondavyo kpwa sababu tamum'voya Mlungu.
- ³Na hata mchivoya piya tamphaha, kpwa sababu tam'voya na nia nono, tsona mnavoya vitu ambavyo ni vya kukustareheshani mwi enye.
- ⁴Mwi adiya! Tammanya kala kumendza dunia ni kumzira Mlungu? Mutu yeyesi adzihendaye msena wa dunia, anakala adui wa Mlungu.
- ⁵Maandiko ganaamba, "Mlungu wamhenda Rohowe aishi mwehu mioyoni naye anamendza hudzilavye kpwa Mlungu bahi." Hebu mwi mnaona tagana mana?
- ⁶Lakini Mlungu anahuonera mbazi zaidi. Ndiyo mana Maandiko ganaamba: "Mlungu anapinga anaodzikarya, na kuaonera mbazi asiodzikarya."
- ⁷Phahi, dzilavyeni kpwa Mlungu. Mpingeni Shetani naye andakuchimbirani.
- ⁸Msengerereni Mlungu naye andakpwedza phephi namwi. Mwimwi achinadambi, richani mahendo genu mai! Na mwimwi mrio na nia mbiri, lungani Mlungu moyo kutsuka!
- ⁹Sononekani, mjute na mrire. Galuzani chitseko chenu chikale chiriro na raha yenu ikale majuto.
- ¹⁰Kalani photsi mbere za Mlungu na mumkuluphire, naye andakuikani phatu pha ishima.

¹¹Enehu, msilaumiane. Yeyesi amlaumuye myawe au kumhukumu analaumu na kuihukumu Shariya. Kazi yenu siyo kuihukumu Shariya ichikala i sawa, ela ni kuilunga.

¹²Kuna mutu mmwenga ambaye ni mlavyadzi-shariya na n'jaji, naye ana uwezo wa kuokola au kulavya hukumu ya chifo. Lakini mwimwi tamuna haki ya kuhukumiana.

¹³Sambi hebu sikizani mwi muambao, "Rero au muhondo hundaphiya mudzi fulani hukasagale hiko mwaka mzima kuhenda bishara na kuphaha pesa nyinji."

¹⁴Mwimwi tammanya maisha genu ndivyokala muhondo! Mana maisha genu ni dza guro ambaro nkutuluka kpwa muda alafu rikayaya.

¹⁵Badala ya hivyo mwimwi ni muambe, "Mlungu achimendza hundaishi na huende chitu fulani."

¹⁶Lakini mbona mnadzikarya na kuhenda ngulu? Kuhenda ngulu dza hivyo ni makosa.

¹⁷Phahi, mutu yeyesi ambaye anamanya rira ra sawa na asirihende, amanye anahenda dambi.

Jakobo 5

¹Sambi sikizani mwi matajiri, nakuambirani, rirani na mjute sana kpwa sababu ya mashaka ndigokuphahani!

²Mali zenu zaola, na nguwo zenu zariwa ni mabamama.

³Zahabu zenu na feza zahenda ng'andu. Hiyo ng'andu indalavya ushahidi kukuhusuni na indakuryani dza viratu moho. Mwadzirundikizira mali siku za mwisho.

⁴Lolani! Mwarema kuripha atu ariokuhenderani kazi mwenu mindani. Nayo mishahara ambayo taiyariphiwa inakuririrani. Chiro cha hinya avunadzi chamfikira Mwenyezi-Mlungu.

⁵Mwaishi duniani maisha ga raha na anasa. Mu dza nyama ambao anona na a tayari kpwa siku ya kutsindzwa.

⁶Mwaahukumu na mchiaolaga atu a haki, ambao kala taana uwezo wa kukupingani.

⁷Phahi enehu, vumirirani mpaka Bwana Jesu ndiphokpwedza. Hebu lola mkurima agodzeravyo mimea ya mwakpwe mndani mpaka ndiphovyala mavuno ga samani! Tsona nkuvumirira kugodza mvula ya vuri na mwaka.

⁸Mwimwi piya vumirirani na msifwe mioyo, mana Bwana Jesu a phephi na kpwedza.

- ⁹Msinung'unikirane msedze mkahukumiwa. Lolani! Jaji mkpwulu a pho mryangoni!
- ¹⁰Enehu, lungani mfwano wa manabii ariotangaza neno ra Bwana Jesu: avumirira hata wakati wa mateso.
- ¹¹Hunaatogola hinyo kpwa sababu avumirira. Mmanyeye mfwano wa Ayubu vira arivyovumirira hadi mwisho, na mnaona vira ambavyo Mlungu kala akampangira Ayubu mambo manono. Mlungu ana mbazi nyinji.
- ¹²Zaidi ya higo gosi enehu, msiape kabisa. Msiape kuhadza Mlungu, dunia wala chitu chochosi. Ichikala neno ni ra kpweli amba "Ni kpweli," na ichikala sivyo amba "Sivyo," lakini msiape au mndahukumiwa.
- ¹³Dze, kuna mutu ariye tabuni? N'lazima avoye Mlungu. Uchikala una raha, phahi imba mawira ga kumtoga Mlungu.
- ¹⁴Kuna mmwenga wenu ni mkpwongo? Naaihe vilongozi a afuasi a Jesu amvoyere na ampake mafuha kpwa dzina ra Bwana Jesu.
- ¹⁵Namwi mchivoya na kuamini kukala hiye mkpwongo andaphola, Mlungu andamphoza. Ichikala wahenda dambi, andasamehewa.
- ¹⁶Kpwa hivyo chila mmwenga naaseme dambize kpwa myawe na m'voyerane ili muweze kuphozwa makongo genu. Mavoyo ga mutu wa haki gana nguvu sana na ganahenda kazi.
- ¹⁷Elia kala ni mwanadamu dza sisi. Wavoya chikpweli-kpweli kusinye mvula, nayo mvula taiyanya duniani kpwa miaka mihahu na miezi sita.
- ¹⁸Badaye Elia wavoya tsona, ndipho mvula ichinya, nayo tsi ichimera mimea.
- ¹⁹Enehu, myawenu achikosa kulunga kpweli, wanjina naamkanye na kumuuyiza njira ya sawa,
- ²⁰mmanyeye, mutu yeyesi ndiyemuuyiza mchina-dambi njira ya sawa, andaokola rohoye isifwe, na andamhenda asamehewe dambize nyinji.

1 Petero

1 Petero 1

¹Baruwa hino ila kpwangu mimi Petero, mtume wa Jesu Masihi. Nakuandikirani mwimwi mriotsambulwa ni Mlungu na kutsamukana tsi ya ujenini, msagalao hiko majimbo ga Ponto, Galatia, Kapadokia, Asia na Bithinia.

²Mwimwi mwatengbwa hangu kare ni Baba Mlungu kpwa uwezo wa Rohowe. Higa gahendeka kulengana na mpango wa Mlungu, ili mumuogophe Jesu Masihi na kusamehewa dambi zenu kpwa sababu ya chifoche. Mlungu naakujaliyeni sana kpwa mbazize na akupheni amani.

³Nahumtogoleni Mlungu ambaye piya ni Isengbwa wa Bwana wehu Jesu Masihi. Mana kpwa mbazize nyinji wahuhenda huvyalwe mara ya phiri, na vivi huna hakika kukala hundaishi na Mlungu milele kpwa sababu wamfula Jesu Masihi.

⁴Kpwa hivyo, hunagodzera kuphaha zawadi ambazo Mlungu waikira atue hiko mlunguni ambako taziweza kubanangika, kuola wala kutsakala.

⁵Majaliwa higa ni genu mwimwi ambao kuluphiro renu rinakuhendani mrindwe kpwa uwezo wa Mlungu, hadi mndiphotiviwa kama Mlungu arivyopanga kuhenda siku ya mwisho.

⁶Phahi hererwani kuhusu gosi ambago Mlungu wakupangirani, hata dzagbwe pha sambu inabidi msononeswe kpwa muda na mateso ga chila aina.

⁷Hipha sambu mnagaya, ili kuluphiro renu ripimwe na kuonekana kukala ri sawa, dza viratu zahabu ipimwavyo kpwa kuhendaochwa na moho. Kumkuluphira Mlungu kuna mana zaidi kuriko zahabu, mana zahabu indabanangika. Kpwa hivyo Jesu Masihi andaapha nguma na ishima atue avumirirao hipho ndiphokpwezadzionyesa wazi.

⁸⁻⁹Vivi tamdzangbwemuona ela mnammendza, tsona mnamkuluphira. Na kpwa vira mnaphokera lengo ra kuluphiro renu ambaro ni kutiviwa roho zenu, mnahererwa sana, raha isiyogombeka.

¹⁰Manabii atabiri kuhusu mbazi za Mlungu ambazo kala anagodza edze akupheni. Hinyo kala anagomba kuhusu huno wokofu wenu, nao achunguza sana ili auelewe.

¹¹Mana Roho wa Jesu ariyekala ndani yao watabiri kukala Jesu andagaya na badaye andaphaha nguma. Phahi hara manabii aendza sana amanye mambo higa gandakala rini na gandamphaha ani.

¹²Mlungu waahenda hara manabii amanye kukala mambo arigokala anatabiri ka sigo ga kuafwaha aho ela mwimwi. Gara arigogomba ndigo mrigotangazirwa ni hinyo ariokureherani habari ndzuri kuhusu Jesu Muokoli. Nao akusemurirani

hizo habari ndzuri kpwa uwezo wa Roho wa Mlungu yekala akahumwa kula mlunguni. Ni mambo ambago hata malaika angemenda sana kugamanya.

¹³Kpwa hivyo kalani atu a kufikiriya kabla ya kuhenda dzambo rorosi na mkale na chiasi. Kalani na tumaini ra wokofu wa Mlungu mndiophaha hipho Jesu Masihi ndiphokpwezadzionyesa wazi.

¹⁴Kpwa vira mu ana a Mlungu, muogopheni wala msikubali tsona kulunga tamaa zenu mbii mrizokala nazo mriphokala tamuelewa ukpweli wa Mlungu.

¹⁵Badala ya hivyo, dza viratu ambavyo Mlungu yekuihani kana lawama, mwimwi namwi ni mukale bila lawama katika rorosi muazaro na mhendaro.

¹⁶Kpwa mana kahi za Maandikoge, Mlungu anaamba, "Kalani bila lawama, kpwa kukala mimi sina lawama."

¹⁷Mlungu, ambaye mnamuiha Baba, anahukumu atu osi kulengana na mahendo gao bila ubaguzi. Kpwa hivyo, muogopheni sana kpwa muda uhu ambao mcheresagala hipha duniani dza ajeni.

¹⁸Mana mnamanya kukala Mlungu, wakukombolani ili msikale na masagazi gasigofwaha dza arivyokala akare enu. Chisha kayahumira vitu vibanangikavyo dza feza na zahabu.

¹⁹Ela wahumira mlatso wa samani wa Jesu ambaye kala ni dza Mwana-ng'ondzi asiye na dowa wala makosa.

²⁰Hangu dunia taidzangbweumbwa, Mlungu kala akamtsambula kare Jesu kpwa lengo hiri. Ela achigodza hadi wakati huno wa mwisho ndipho achimreha na kumuonyesa wazi kpwa atu osi duniani. Higa wagahenda kpwa ajili yenu.

²¹Wakpwedza ili akulongozeni mkuluphire Mlungu ariyemfufula na kumupha nguma. Ndiyo mana mnakuluphira na kumtegemea Mlungu.

²²Kpwa vira mnasagala kulengana na mafundzo ga kpweli kuhusu Jesu, mioyo yenu yatsuka ili muweze kumenda ayawenu chikpweli-kpweli. Phahi mendzanani mioyo kutsuka,

²³mana mwavyalwa mara ya phiri. Kuvyalwa hiku siko kpwa avyazi a chimwiri (mana maisha ga chimwiri, mwishirowe ni chifo), ela ni kukala na uzima wa milele urehwao ni neno ra Mlungu ndirokalako milele.

²⁴Maandiko ganaamba: "Anadamu osi ni dza nyasi, na uzuri wao ni kama maruwa ga weruni. Nyasi nkunyala na maruwa gakagbwa,

²⁵ela neno ra Mlungu ni ra kpweli milele." Neno hiri ni hiyo habari ndzuri kuhusu Jesu mriyosemurirwa.

1 Petero 2

- ¹Kpwa hivyo, richani uyi wosi, handzo, unafiki na chidzitso, wala msilaumiane tse-tse-tse.
- ²⁻³Vivi mkatata kare na mkaandza kumanya kukala Bwana ni mnono. Phahi, dza viratu ana atsanga aazavyo maziya ga nine zao, namwi kalani na chiru ya maziya manono ga chiroho ambago mchinwa mndaweza kuphera kpwa kumanya Mlungu chikpweli-kpweli.
- ⁴Jesu ndiye dziwe ririro hai ra kudzengera. Dziwe hiro atu arirema ela Mlungu waritsambula, tsona ni ra samani phakpwe matsoni. Phahi msengerereni
- ⁵na kubalini Mlungu akuhumireni dza viratu mawe garigo hai, kudzenga dzengo ra chiroho. Tsona akuhendeni mkale alavyadzi-sadaka ariotengbwa kulavya sadaka za chiroho zimhamirazo kpwa uwezo wa Jesu Masihi.
- ⁶Mana Maandiko ganaamba: "Lolani, hiko mudzi wa Sayuni ninaika dziwe, dziwe kulu ra msingi, tsona dziwe ra samani nriroritsambula. Na yeyesi ndiyemkuluphira hiye mutu ambaye ni hiro dziwe, kandaphaha waibu hata chidide!"
- ⁷Dziwe hiri ni ra mana kpweni mwimwi mnaokuluphira; ela kpwa hara asiomkuluphira, "Dziwe roremewa ni adzengi, ndipho rikakala dziwe kulu ra msingi."
- ⁸Tsona, "Hiri ndiro dziwe ambaro atu andadzikipwala, dziwe ambaro rindahenda atu agbwe." Andadzikipwala kpwa sababu taayaamini neno ra Mlungu; na vivyo ndivyo arivyopangirwa ni Mlungu hangu kare.
- ⁹Lakini Mlungu wakutsambulani mkale atue. Kpwa hivyo mwimwi mu alavyadzi-sadaka a chifalume na taifa rihumikiraro Mlungu bahi, yani atu a Mlungu mwenye. Mwatsambulwa ili mkale mndatangaza mahendo manono ga Mlungu, ariyekuihani mtuluke jizani ili mkale phakpwe mwangani, mwangawe mnono.
- ¹⁰Hipho mwandzo kala simwi atu a Mlungu, ela sambu mu akpwe. Tsona kala tamdzangbwemanya mbazi za Mlungu, ela vivi mkaziphokera.
- ¹¹Asena angu, mimi ninaamba, viratu ambavyo mu ajeni na asagazi a duniani dza atu ario tsi ya ujenini, msiruhusu tamaa za miri yenu zikutawaleni. Mana wakati wosi tamaa hizi nkukala zinapingana na mioyo yenu.
- ¹²Kalani na tabiya ndzuri ili hata ichikala atu asiomkuluphira Mlungu andakuzigani kukala mu ayi, aone mahendo genu manono hata aweze kumtoga Mlungu kpwa ajili yenu hipho siku ya kpwedzakupwe.
- ¹³Kpwa sababu ya kumuogopha Mlungu, kalani atu a kulunga shariya za tsi yenu. Muishimuni mtawala wenu, mana iye ndiye chilongozi mkpwulu katika tsi yenu.
- ¹⁴Tsona ishimuni vilongozi a majimbo ariotsambulwa ni ye mkpwulu, akale andatiya adabu atu ahendao makosa na kutogola hara ahendao mambo manono.

- ¹⁵Mana Mlungu analonda mhende mambo manono ili hara asio na achili asikale na rorosi ra kugomba kukulaumuni.
- ¹⁶Dzagbwe mu huru, lakini msihumire uhuru wenu kuhenda mai ela sagalani dza atumishi a Mlungu alondwavyo kusagala.
- ¹⁷Ishimuni atu osi na mmendze afuasi ayawenu. Muogopheni Mlungu na muishimu mtawala wenu.
- ¹⁸Mwi ahendadzi-kazi, ogophani sana matajiri enu, tsona muaishimu, akale ni apole au asiru.
- ¹⁹Mlungu nkuhamirwa sana ni mutu ambaye anavumirira utsungu kpwa sababu akaonerwa na anamanya vira Mlungu alondavyo.
- ²⁰Mutu kandamhamira Mlungu kpwa kuvumirira ichikala anatiywa adabu kpwa sababu ya makosage. Ela ichikala andavumirira agaye kpwa sababu akahenda manono, phahi Mlungu andahamirwa.
- ²¹Mnalondwa mvumirire hivyo, mana Jesu mwenye wagaya kpwa sababu yenu. Tsona achikurichirani mfwano, ili mkale mndamuiga.
- ²²Iye kayahenda dambi, wala kugomba handzo.
- ²³Aripholaphizwa kayauyiza neno rorosi; ariphoteswa kayajeza kuriphiza. Ela gosi wamrichira Mlungu ahukumuye na haki.
- ²⁴Jesu mwenye wahala dambi zehu achizihenda avi ni zakpwe hata achikotwa msalabani, ili sisi husitawalwe tsona ni dambi ela hukale na masagazi gamhamirago Mlungu. Iye walumizwa, ili mphole.
- ²⁵Kala mkaangamika dza mang'ondzi chigoricha njira, ela sambu mkauyira ye mrisa wenu anayekurindani.

1 Petero 3

- ¹⁻²Vivyo hivyo, mwi achetu mriololwa ni msikize alume enu. Kpwa njira hiyo, hinyo ambao taalunga mafundzo ga Jesu, andahamirwa ni tabiya zenu za ishima na adabu, hata aweze kumkubali Mlungu bila kuambirwa neno.
- ³Msikale atu a kudzikpwatuwa kondze bahi, dza vira kusonga nyere, kuvwala zahabu na nguwo za gali,
- ⁴ela unono wenu ni uandzire ndani, urembo usioweza kubanangika wala kutsakala ambao ni kukala na moyo mnono na mpole. Huno ndio urembo urio na samani matsoni pha Mlungu.
- ⁵Mana hipho kare achetu ariomuogopha Mlungu na kumkuluphira amanya kudzikpwatuwa kpwa tabiya ndzuri za kuogopha alume ao.

⁶Mchetu mmwenga ariyehenda hivi ni Sara mkpwaza Brahimu. Hiyu wamphundza mlumewe na kumuishimu, achimwiha "Mlume wangu". Phahi mwimwi namwi, ichikala mndahenda garigo sawa bila kuogopha rorosi, mndakala avi mu anae achetu.

⁷Namwi alume mriolola, mnalondwa msagaletu na achetu enu kpwa vira mnamanya kukala taana mkpwotse dza mwimwi. Piya atundzeni na ishima kpwa sababu ahadi ya Mlungu ya kuphaha uzima ni yenu mosi alume na achetu. Kpwa hivyo alume hendani hivi sedze mavoyo genu gakazuwiywa.

⁸Chimarigizo nakuambirani mosi: gbwiranani mkale na moyo mmwenga mosi bu. Mendzanani na muonerane mbazi, wala msihende ngulu tse.

⁹Msiariphize anaokuhenderani mai, wala kualaphiza anaokulaphizani, ela ahendereni manono. Mana hivyo ndivyo Mlungu alondavyo mhende, ili akale andakujaliyani.

¹⁰Higa ganagbwa sawa na vira Maandiko gaambavyo kukala: "Yeyesi anayetaka kusagala vinono na kukala na raha, ni ariche kuochera atu ngulu na kugomba handzo.

¹¹Ni ariche kuhenda mai, ahende manono. Tsona ahende vyovyosi vira awezavyo asagale na amani na ayae.

¹²Mana Mlungu anaona osi ahendao haki, na nkusikira mavoyo gao. Ela ahendao mai, nkualozera kogo."

¹³Pho kpwani ni ani ndiyeaza kukuhenderani mai ichikala wakati wosi mna chadi cha kuhenda manono?

¹⁴Lakini phahi hata ichikala mnagaya kpwa sababu ya kuhenda haki, Mlungu andakujaliyani. Kpwa hivyo msihende shaka wala kuogopha hara anaokutesani,

¹⁵ela manyani kukala Jesu ndiye mkpwulu wa maisha genu na mumuogophe moyo kutsuka. Kalani tayari wakati wosi kumuelezea yeyesi ndiyeuza sababu ya kuluphiro renu.

¹⁶Lakini hendani hivi kpwa upole na ishima. Kalani na tabiya ndzuri kpwa sababu mu afuasi a Jesu, ili hinyo anaokuocherani ngulu kuhusu hizo tabiya zenu agbwirwe ni haya.

¹⁷Mana ichikala Mlungu anataka ugaye, phahi n'baha ugaye kpwa sababu ya kuhenda sawa kuriko kugaya kpwa kuhenda kosa.

¹⁸Jesu wagaya na achifwa limwenga kpwa sababu ya dambi zehu, ili ahupatanishe na Mlungu, ela ye mwenye kayakala na dambi. Waolagbwa ariphokala na mwiri wa chibinadamu ela wafufulwa ni Roho wa Mlungu.

¹⁹Na kpwa uwezo wa ye Roho achiphiya kuriko na maroho ga atu a kufwa garigofungbwa, achendagasemurira habari za Mlungu.

²⁰Maroho higo ni ga atu ambao taayamuogopha Mlungu hipho kare, wakati Nuhu kala anadzenga meli. Mlungu wavumirira uyi wao hadi meli iriphodzengbwa, ela mwisho atu achache, anane bahi, ndio ariopona madzi.

²¹Hinyo ni mfwano wa ubatizo wenu wa siku hizi. Mana mnaphobatzwa inaonyesa kukala mkativiwa na chifo na hukumu kpwa uwezo wa kufufuka kpwa Jesu Masihi. Kpwa hivyo ubatizo siyo kuoga ili kuusa nongo za mwiri, ela nkudzilavya kpwa Mlungu moyo kutsuka.

²²Hiye Jesu waphiya mlunguni na sambu asegere mkpwono wa kulume wa Mlungu, phatu pha ishima kulu sana. Anatawala malaika phamwenga na viumbe vyosi vitawalavyo na virivyo na uwezo.

1 Petero 4

¹Kpwa vira Jesu wagaya mwakpwe mwirini, mwimwi namwi kalani tayari kugaya dza iye. Mana mutu achigaya mwakpwe mwirini kandatawalwa tsona ni dambi.

²Chihivyo, masagazige gosi andaishi kulengana na vira Mlungu amendzavyo, wala siyo kulunga tamaa za mwiri tsona.

³Hipho kare mwalunga tamaa zenu mbii za kumendza achetu ama alume anji na za kunwa kutsapa chiasi. Tsona mwamendza sheree za kunwa uchi na kufwiha chiudiya, na kuvoya mizuka, dzambo rinaromtsukiza Mlungu zaidi. Mmanye kukala mwalunga vya kutosha masagazi ga atu asiommanya Mlungu, wala taina haja muenderere tsona kuhenda hivyo.

⁴Hivi mnalaphizwa ni hinyo asiommendza Mlungu, kpwa vira taelewa kpwa utu wani tamlungana nao tsona kuhenda higo mai.

⁵Hata hivyo andakpwezadzitetea enye kuhusu hinyo uyi wao mbere za Mlungu, ambaye a tayari kuhukumu atu osi ario moyo na hata ariofwa.

⁶Mana hino ndiyo sababu atu a kufwa asemurirwa habari ndzuri kuhusu Jesu Muokoli, ili hata dzagbwe ahukumiswa kare ariphokala achere hipha duniani, dza chila mutu ahendwavyo, roho zao zikale moyo dza viratu Mlungu arivyo.

⁷Mwisho wa dunia u phephi, kpwa hivyo kalani na chiasi na kudzimanyirira katika gosi mhendago, ili muweze kuvoya.

⁸Zaidi ya gosi, mendzanani chikpweli-kpweli, mana mutu uchimmendza dza hivyo undakala tayari kumsamehe hata achikukosera mara ngaphi.

⁹Kalani atu a kumendza kukaribisha ayawenu mwenu madzumbani bila kururumika.

¹⁰Mlungu nkuapha atu vipawa vya aina tafwauti, na chila mmwenga ni atundze chipawache vinono na achikumire kpwa fwaida ya ayae.

¹¹Yeyesi anayegomba, naagombe dza mutu achiyehumwa ni Mlungu. Naye anayehumikira ayae, naahumikire kpwa uwezo wa Mlungu. Chihivyo Mlungu andaweza kutogolwa kahi za mambo gosi kpwa sababu ya Jesu Masihi ariye na utukufu na uwezo milele na milele. Amina.

¹²Asena angu, mateso mafu mnagophaha ga kupima kuluphiro renu si chitu chisicho cha kawaida. Kpwa hivyo msikale avi tamuelewa kpwa utu wani mnagaya.

¹³Ela hererwani kukala mnagaya dza Jesu arivyogaya, ili mkale na raha tele, hipho ukulu wa Jesu ndiphoonyeswa wazi.

¹⁴Ichikala mndalaphizwa kpwa sababu mu afuasi a Jesu, manyani kukala mndajaliwa, mana ukulu wa Roho wa Mlungu undaonekana wazi kukala u phamwenga namwi.

¹⁵Phahi mwimwi ni msidzirehere hukumu ya kutiywa adabu kpwa sababu ya kukala aolagadzi, aivi au avundzadzi shariya, au hata ambeya.

¹⁶Mutu achigaya kpwa sababu ni mfuasi wa Jesu, naasione waibu ela naamtogole Mlungu kukala anamanyikana kpwa dzina ra Jesu.

¹⁷Wakati wa hukumu ukafika, na Mlungu andaandza na kuhukumu atue. Sambu ichikala hukumu indaandza na sisi atue enye, dze o asiokubali neno ra Mlungu ela hukumu yao taindakala ya kutisha zaidi?

¹⁸Higa ganagbwa sawa na Maandiko gaambago kukala: "Ichikala nyo a haki andaokolwa kpwa tabu, dze nyo achina-dambi asiomanya Mlungu?"

¹⁹Kpwa hivyo anaoteswa kpwa sababu Mlungu waapangira hivyo, naaenderere kuhenda manono na amkuluphire Mlungu, muumba wao ambaye achiika ahadi andaihenda.

1 Petero 5

¹Sambu nagomba na mwimwi vilongozi a afuasi a Jesu. Mimi ni chilongozi myawenu, na náhendaona na matso gangu vira Jesu arivyoteswa. Chisha narorera kuphaha nguma phamwenga naye hipho ukuluwe ndiphoonyeswa. Kpwa hivyo nakuvoyani

²mkale arisa anono a kundi mrirohewa ni Mlungu. Tsona mririnde na moyo mnono wala siyo kpwa kuhendalazimishwa. Msihende kazi yenu kpwa sababu mndariphiwa ela kpwa kukala mnadzilavya.

³Msikale vilongozi katili kpwa atu mnaoalongoza, ela masagazi genu nagakale mfwano mnono kpwao.

⁴Alafu ye mrisa mkpwulu wa atu osi a Mlungu achitsembuka, mndaphaha nguma phamwenga naye milele.

⁵Namwi mnaolongozwa, aogopheni vilongozi enu. Na mosi avyere na adide kalani atu apole na a kuhumikira ayawenu, mana Maandiko ganaamba: "Mlungu anapinga anaodzikarya, na kuaonera mbazi asiodzikarya."

⁶Kpwa hivyo kalani atu apore anaodzitsereza tsini ya uwezo wa Mlungu naye andakuunulani wakatiwe uchifika.

⁷Mrichireni Mlungu mashaka genu gosi mana iye anajali mambo genu.

⁸Dzimanyirireni, tsona mkale matso wakati wosi. Mana Shetani, ambaye ni adui wenu, anaendza mutu amuolage chiroho, dza simba angurumaye na ndzala achiendza mutu amurye.

⁹Phahi mpingeni hiye Shetani kpwa kudinisa kumkuluphira Mlungu, mana kama mmanyavyo, afuasi ayawenu dunia yosi anagaya dza viratu mwimwi.

¹⁰Lakini bada ya mwimwi kugaya kpwa muda, Mlungu andakpwezarekebisha chochosi chophunguzwa, akutiyeni moyo, na kukuphani mkpwotse. Iye ni Mlungu wa mbazi zosi yekuihani mphaha nguma phamwenga na Jesu milele.

¹¹Mlungu naatawale milele! Amina.

¹²Silvano, mfuasi myangu, ambaye chimimi ni mutu muaminifu, ndiye chiyeniterya kuandika baruwa hino ndide. Lengo rangu ni kukutiyani moyo na kukuhakikishirani kukala Mlungu anakumendzani hata ikaledze. Kpwa sababu mnamanya mambo higo, dinisani kumuamini.

¹³Kundi ra afuasi ayawenu a hiku Babeli, ambao piya atsambulwa ni Mlungu, akakuphozani. Piya mkaphozwa ni mwanangu wa chiroho aihwaye Mariko.

¹⁴Lamusanani na mendzwa ya kpweli. Nakuvoyerani mosi ambao mu afuasi a Jesu mkale na amani.

2 Petero

2 Petero 1

¹Baruwa hino ila kpwangu mimi Simoni, ambaye dzina ranjina ni Petero. Mimi ni mtumishi na mtume wa Jesu Masihi. Nakuandikirani mwimwi mosi mnaomkuluphira Jesu dza hurivyo sisi, na kuluphiro rehu ni ra mana kpwa sababu Jesu, Mlungu na Muokoli wehu, ni wa haki.

²Mlungu naazidi kukujaliyani kpwa mbazize akupheni amani kpwa sababu mnamanya Mlungu na piya Bwana wehu Jesu.

³Jesu, kpwa nguvu arizophaha kula kpwa Mlungu, wahupha chila chitu ambacho chinahuterya kuishi maisha gamhamirago Mlungu. Naswi huna mambo higa kpwa sababu hunammanya ariyehuiha ili hushiriki utukufu na unonowe.

⁴Kulengana na mambo manono ambago Mlungu wahuhendera ni kpwamba, wahuikira ahadize nono za chilagane. Huchizophokera moyo kutsuka, hunaweza kudzitivya na tamaa mbii za dunia zinazohenda atu afwe chiroho, na hundakala anono dza ana a Mlungu.

⁵Kpwa utu hinyo, msikolwe na kuko kumkuluphira Mlungu bahi, lakini enjerezani kuishi maisha manono. Mchikala mnaishi maisha manono enjerezani kummanya Mlungu zaidi.

⁶Dzulu ya kummanya Mlungu, dzikanyeni, na zaidi ya kudzirinda kpweni enjerezani kuvumirira shida. Na dzulu ya kuvumirira shida, ishini maisha gamhamirago Mlungu.

⁷Na zaidi ya kuishi maisha ganagomhamira Mlungu, amendzeni afuasi ayawenu. Na chidzarigizoche mendzani atu osi.

⁸Mchikala mndakula chiroho kpwa njira hino, mambo gosi mmanyago kuhusu Bwana wehu Jesu Masihi, gandagaluzza maisha genu gakale ga fwaida.

⁹Lakini yeyesi asiye na togo zizo ni dza mutu ariye na matso na kaona mana kaelewa mambo ga chiroho, tsona akayala kukala Mlungu wamsamehe dambize zosi arizohenda pho kare.

¹⁰Phahi enehu, hendani bidii zaidi ya kuishi maisha manono ili chila mmwenga aone kukala Mlungu wakutsambulani na achikuihani. Mchihenda hivyo enehu, tamndaricha kumkuluphira Jesu bii,

¹¹na vivyo vindakuhendani mkaribishwe vinono ko kuriko Bwana na Muokoli wehu Jesu Masihi, ambaye andatawala milele na milele.

¹²Hata dzagbwe mnagamanya higo malagizo nrigokuandikirani, namwi mkadina kulunga ukpweli mriofundzwa, ela mino naenderera kukutambukizani vivyo.

- ¹³Naona ni vinono kpwangu mimi kuenderera kukutambukizani maneno higa, wakati nchere moyo,
- ¹⁴mana siku zangu za kukala hipha duniani zi phephi na kusira, kama Bwana wehu Jesu Masihi arivyonyesa.
- ¹⁵N'ndahenda niwezavyo, niike mambo higa wazi kpwenu ili mgatambukire bada ya kukala nkafwinya matso.
- ¹⁶Tahuyakuambirani adisi za handzo kpwa werevu, wakati huriphokuambirani kukala Bwana wehu Jesu Masihi andauya kpwa nguvu za Mlungu. Lakini hwaona ukuluwe na matso gehu enye.
- ¹⁷⁻¹⁸Mana hwakala hu phamwenga na Jesu dzulu ya Mwango wa Mlungu ariphohewa nguma na utukufu kula kpwa Baba Mlungu. Wakati hinyo hinyo hwasikira sauti kula mlunguni, sauti ya Mlungu ariye mkpwulu kuriko vyosi. Ichiamba, "Hiyu ni mwanangu; nammendza naye ananihamira sana."
- ¹⁹Kpwa hivyo hunaamini zaidi maneno gotangazwa ni manabii na indakala vinono mchisikizato. Maneno higo ni sawa na taa ilavyayo mwanga wakati wa jiza. Lakini, dza viratu kombezi ionyesavyo kukala kukacha na ni siku yanjina, ndivyo Jesu naye andakpwedza ang'ale mwehu mioyoni.
- ²⁰Lakini kulengana na unabii urio Maandikoni manyani hivi: takuna mutu auelewaye na marifwage mwenye.
- ²¹Sababu hata ao manabii arioandika, taayagafikiriya kula mwao achilini kulengana na atu amendzavyo, lakini alongozwa ni Roho wa Mlungu kugomba manenoge.

2 Petero 2

- ¹Hipho kare piya kpwazembuka manabii ga handzo kahi za atu a Iziraeli, na vivyo hivyo alimu a handzo andazuka kahi-kahi yenu. Atu aha andafundza chisiri mafundzo ga kuabananga aasikizao. Alimu hinya piya andamkahala Bwana Jesu, ariyeakombola. Kpwa sababu ya higa, takuna muda mure andadzirehera kuangamizwa.
- ²Afuasi anji andaiga-iga tabiya za udiya dza za alimu hinya, na kpwa sababu ya mahendo gao mai atu anjina andagomba mai kuhusu ujumbe wa Jesu.
- ³Alimu aha a handzo ana ndani kulu, nao andakuchengani-chengani na adisi za handzo ili aphahe pesa zenu. Lakini hangu kare Mlungu a tayari kuahukumu, nao bila shaka andaangamizwa.
- ⁴Hunatambukira kukala kpwakala na malaika ariohenda dambi, naye Mlungu kayaaricha. Waatsupha mohoni, ndani ya bopo ra jiza ambamo waafunga singenge hadi siku ya chiyama.

- ⁵Piya hunatambukira hipho kare atu anji taayaishi maisha ga kumhamira Mlungu. Hipho Mlungu kayaaricha, wareha mafuriko ambago gahosa chila mutu, isiphokala wamtivya Nuhu na atu anjina sabaa. Nuhu wativwiwa kpwa sababu wakala achiaambira atu alunge njira nono ambazo Mlungu analonda.
- ⁶Phapho hipho hunamanya tsona kuhusu midzi ya Sodoma na Gomora. Mlungu waiocha na moho midzi hino ili rikale fundzo kpwa atu asiolonda kulunga maneno ga Mlungu.
- ⁷⁻⁸Lakini Lutu kala achiishi phamwenga na atu hinyo ayi, na iye kala ni mutu mnono mbere za Mlungu. Chila siku, Lutu kala achiona na kusikira mambo ga waibu, na moyowe kala unaphya sababu ya mambo mai ambago kala ganahendwa. Kpwa hivyo, wakati hinyo Mlungu anaocha midzi hiyo, wamtivya Lutu ariyekala wa haki.
- ⁹Dze, mambo gano ganahuonyesani? Ganaonyesa kukala Mlungu anamanya njira ambazo andativya atue anono ario matesoni. Lakini andaatiya adabu atu ayi kpwenderera hadi siku ya hukumu.
- ¹⁰Chidzarigizo Mlungu andaatiya adabu kali atu osi ambao andalunga tamaa mbii za miri yao na kuricha kuogopa utawalawe. Atu a ngulu na ajeuri asioishimu viumbe vya dzulu mlunguni, lakini nkuvilaphiza.
- ¹¹Hata malaika ario na uwezo zaidi kuriko atu, taalaphiza wala kulavya mashitaka kuhusu viumbe hivyo mbere za Mlungu.
- ¹²Aha alimu a handzo nkulaphiza vitu asivyovimanya. Ni dza nyama a weruni ahendao mambo bila kufikiriya, na ariovyalwa ili agbwirwe na kuolagbwa. Mlungu andaangamiza dza viratu anadamu aolagavyo nyama.
- ¹³Andagaya kpwa sababu agayisa atu anjina. Anahererwa kuhenda sheree za marya, na kuzinga wakati wa mutsi. Nkuhererwa kukuchengani wakati mnarya nao phamwenga, na kpwa njira hino nkukutiyani waibu dza dowra ra nguwo nyereru.
- ¹⁴Atu aha achiona mchetu nkumuaza, na tamaa yao ya kuzinga taisira. Nkurusu atu ambao taadinire chiroho na chila wakati achili zao nkufikiriya kuphaha pesa. Phahi atu aha analaniwa ni Mlungu.
- ¹⁵Aricha njira nono imhamirayo Mlungu, achiangamika dza arivyoangamika Balamu, mwana wa Beori, yemendza kuphaha pesa kpwa kuhenda mambo mai.
- ¹⁶Ela hiye nabii Balamu wademurirwa kpwa dambize. Pundawe wagomba kpwa sauti ya mutu, na achiricha Balamu asihende higo mambo ga koma.
- ¹⁷Hinya alimu a handzo taana rorosi dza vidzuho vyouma, na piya ni dza maingu gophepheruswa ni phuto kali, gasigoreha mvula. Kpwa hivyo Mlungu andaatiya adabu phahali phenye chilungu-lungu cha jiza.

¹⁸Aha nkugomba maneno ga chizuzu na kudzikarya. Kpwa kuhumira tamaa mbii za mwiri anarusa afuasi ambao anaandza kuishi maisha manono chinyume cha hara anaoishi maisha mai.

¹⁹Nkulavya ahadi za handzo kuhusu uhuru wa chiroho kuno nyo enye ni atumwa a tabiya mbii ambazo zinaangamiza. Mana mutu nkuhendwa mtumwa ni chochosi ambacho chinamtawala.

²⁰Hipho mwandzo atu aha aricha kutawalwa ni tamaa mbii za dunia kpwa sababu anamanya Bwana na Muokoli wehu Jesu Masihi. Ela auyirapho garatu ga kare nkuinjira muhamboni, akatawalwa tsona ni tamaa mbii. Vivi sambi a tabuni zaidi kuriko pho mwandzo wakati kala taadzangbwe kummanya Jesu.

²¹Hata hivyo ingekala vinono kalapho taayamany njira za kumhamira Mlungu, kuriko kuzimanya na alafu kugaluka na kuricha kulunga malagizoge matakatifu.

²²Phahi arigohenda atu aha ni sawa na ndarira hizi mbiri. Ya kpwandza inaamba, "Diya nkuuyira kurya mahaphikage," na ya phiri inaamba, "Nguluwe achiyeogeswa nkuuya akagala-gala topeni."

2 Petero 3

¹Enehu, hino ni baruwa yangu ya phiri kukuandikirani. Na baruwa zosi hizi zinakutambukizani mambo higa mrigodzifundza, na kugaririkana vinono kpwa undani.

²Tambukirani maneno ga manabii matakatifu na malagizo ga Bwana na Muokoli wehu, mrigophokera kula kpwa mitumee.

³Ra muhimu ni mmanyeye kukala siku za mwisho kundakala atu anjina ambao maisha gao gandakala ga kulunga tamaa za miri yao. Nao andakufyorerani na kukuzemererani,

⁴achiamba, "Bwana Jesu walaga andauya. Vino yu kuphi? Kula baba zehu ariphofwa takuna chitu chirichogaluka. Chila chitu chinaenderera kukala dza vivyo kula phoumbwa dunia!"

⁵Lakini atu anarema makusudi ukpweli hinyu, kukala hipho kare Mlungu wagomba neno ra kuumba dunia na dzulu mlunguni. Wahenda dunia kula madzini, na achiitenga na madzi,

⁶na kpwa kuhumira madzi piya, waangamiza dunia ariphoreha mafuriko.

⁷Kpwa njira hiyo hiyo ya nenore, Mlungu nkuhenda dzulu mlunguni na duniani hivi sambi vigodze, hadi ndiphoviangamiza na moho. Siku hiyo ya hukumu atu asiolunga malagizo ga Mlungu andahukumiwa na kuangamizwa kabisa.

⁸Lakini enehu, msione kukala Mlungu anafikiriya dza vivyo mwimwi. Mana kpwa Mlungu siku mwenga ni sawa na miaka elufu mwenga, na miaka elufu mwenga ni sawa na siku mwenga.

⁹Atu anjina anafikiri kukala Mlungu ana vwendu kutimiza ahadize. Ela si hivyo, Mlungu nkuchelewa kutimiza ahadize kpwa kukala anakuvumirirani. Mana kamendze mutu yeyesi afwe lakini amenzavyo iye ni chila mmwenga atubu dambize.

¹⁰Lakini siku ya Bwana Jesu kuuya duniani indaangalaza atu kpwa kukala taimanyikana, dza viratu muivi edzavyo. Wakati hinyo kundakala na ngurumo na mlunguni kundayaya na chila chitu chirichohimo chindaphya tse-tse-tse. Na dunia na vyosi virivyomo vindayaya piya.

¹¹Kpwa vira ambavyo vitu vyosi vindaangamizwa hivyo, mwino ni mkale atu a viphi? Dzilavyeni kpwa Mlungu na muishi maisha gamhamirago.

¹²Siku hiyo ya chiyama, mlunguni kundaphya, na vitu vyosi virivyo hiko vindatsatsamuka na moho viangamike. Ela siku hiyo, igodzereni kpwa hamu sana na hendani chadi siku hiyo yedze upesi.

¹³Ela Mlungu walaga kukala kundakala na mlunguni kuphya na dunia nyiphya, ambako chila mmwenga andahenda mambo gamhamirago bahi. Naswi hunagodzera kpwa hamu ahadi hiyo itimizwe.

¹⁴Kpwa hivyo enehu, hali mnagodzera siku hiyo, hendani chadi msikale na kosa wala lawama mbere za Mlungu, mkale na amani naye.

¹⁵Msiyale kukala Mlungu anakuvumirirani ili mkale na nafwasi muokolwe. Mambo gaga higa mwatambukizwa ni mwenehu mmendzwa Paulo yekuandikirani kpwa uwezo ariohewa ni Mlungu.

¹⁶Naye anaandika kuhusu mambo higa katika baruwaze zosi. Lakini maneno ganjina aandikago si rahisi kugaelewa, na ganaelezwa chimakosa ni atu ambao taayafundzwa na kuluphiro rao ni ra kugaluka-galuka. Kpwa kueleza chimakosa maneno higa ga Paulo na Maandiko ganjina atu hinyo andadziangamiza.

¹⁷Lakini mwimwi enehu mnamanyato kare mambo gaga. Phahi dzimanyirireni ili msichengbwe ni handzo ra atu ayi, mkakala na wasi-wasi kuhusu mambo gaga mnagokuluphira.

¹⁸Badala ya hivyo endererani kuhenda vira alondavyo Jesu, ariye Bwana na Muokoli wehu, ili akuonyeseni mendzwaye na kumanya zaidi. Naatogolwe milele na milele. Amina.

1 Johana

1 Johana 1

¹Hunakuambirani mmanyane kala hwamsikira na huchimuona ariyekalako hangu mwandzo. Hwamuona na matso gehu, na huchimguta na mikono yehu, naye ndiye hiro Neno rireharo uzima.

²Hangu mwandzo wakala na Baba Mlungu, lakini sambu wahutsembukira na huchimuona na matso gehu. Naswi hu mashahidi a hiro huriroriona na hunakuambirani habari za uzima wa milele.

³Hunakuhubiriyani huriroriona na kusikira, ili mkuluphire dza sisi na hukaleni chitu chimwenga. Naswi huna umwenga na Baba Mlungu na Mwanawe Jesu Masihi.

⁴Hunakuandikirani mambo higa ili raha yehu ikamilike.

⁵Jesu wahuambira maneno higa, naswi hunakumanyisani kukala Mlungu ni mwangaza, wala kpwakpwe takuna jiza rorosi.

⁶Huchiamba kala huna umwenga naye na kuno hunaishi jizani kpwa kuhenda mai, phahi hundakala na handzo, wala tahulunga njira ya kpweli.

⁷Lakini huchiishi mwangani, dza vivyo iye arivyo mwangani, hundakala na umwenga sisi enye na enye. Nao mlatso wa mwanawe Jesu uriomwagika ariphokotwa misumari msalabani undahuusira dambi zosi.

⁸Huchiamba kala tahuna dambi, humanye kala hunadzichenga, na hunarema kukubali kpweli.

⁹Ela huchikubali na kumuambira Mlungu kala huna dambi, phahi kpwa vira ni muaminifu na wa haki, andahusamehe na kuuhusira uyi wehu wosi.

¹⁰Huchiamba kukala tahudzangbwehenda dambi, hunahenda Mlungu akale na handzo, na hunarema manenoge.

1 Johana 2

¹Anangu, nakuandikirani mambo higa ili msihende dambi. Ela mutu achienda dambi, huna gambera ambaye nkuhuvoyera kpwa Baba Mlungu, naye ni Jesu Masihi mutu asiye na lawama tse.

²Naye ndiye chiryangona cha kuusira dambi zehu, tsona si dambi zehu bahi, ela hata za dunia ndzima.

³Huchilunga malagizo ga Mlungu ndipho hundamanya kpwa kpweli hunamanya.

⁴Mutu yeyesi ndiyeamba, "Namanya Mlungu," lakini kalunga malagizoge, phahi ana handzo na anarema kukubali kpweli.

- ⁵Lakini mutu yeyesi agbwiraye maneno ga Mlungu, ndiye ariye na mendzwa kamili ya Mlungu mwakpwe moyoni. Hivyo ndivyo hundakala na hakika kala hu phamwenga na Mlungu.
- ⁶Mutu achiamba kala a phamwenga na Mlungu, n'lazima aishi dza viratu vyoishi Jesu.
- ⁷Asena angu, higo malagizo ambago nakuandikirani sigo maphya, ela ni ga kare ambapho mwakala nago hangu mwandzo. Higo ni maneno ga Mlungu ambago mwagasikira chitambo.
- ⁸Lakini malagizo higo ni maphya piya. Ganaonyesa wazi vira Jesu arivyoishi na vira muishivyo. Mana mwenu mioyoni jiza ra mambo mai rinauka na mwangaza wa kpweli unang'ala kare.
- ⁹Mutu ndiyeamba kala a mwangani, kuno wamzira mfuasi myawe, phahi naamanye kala achere jizani.
- ¹⁰Mutu yeyesi amendzaye myawe a mwangani, wala takuna chitu ambacho anaweza kukpwala.
- ¹¹Lakini mutu aziraye myawe a jizani; wala kamanya aphiyako, mana jiza ramhenda chipofu.
- ¹²Nakuandikirani mwimwi anangu kpwa mana mwasamehewa dambi zenu kpwa sababu ya Jesu.
- ¹³Nakuandikirani mwimwi ano baba kpwa mana iye yekalako hangu mwandzo mnamanya. Nakuandikirani mwimwi barobaro mana mwamshinda Shetani.
- ¹⁴Nakuandikirani mwimwi anache kpwa mana mnamanya Baba Mlungu. Nakuandikirani mwimwi ano baba mana mnamanya iye yekalako hangu mwandzo. Nakuandikirani mwimwi barobaro mana mna nguvu; mwagbwira maneno ga Mlungu mwenu mioyoni, tsona mwamshinda Shetani.
- ¹⁵Msimendze dunia wala chochosi chii chiricho himu duniani. Mana mutu achimendza mambo mai ga dunia, kaweza kummendza Mlungu.
- ¹⁶Kpwa mana duniani atu nkukala na tamaa mbii, nkuaza vitu avionavyo na kuhenda ngulu kpwa sababu ya mali. Mambo higa gosi tagala kpwa Baba, ela gala duniani.
- ¹⁷Dunia na vituvye vyosi ambavyo mutu anaweza kuviaza vinatsapa. Ela mutu ndiyehenda mendzwa ya Mlungu andaishi milele.
- ¹⁸Anangu, mwisho u phephi! Mwasikira kala mpindzani wa Jesu Masihi andakpwedza, vivi apindzani anji a Jesu akpwedza kare. Kpwa hivyo hunamanya kala mwisho u phephi.

- ¹⁹Hata dzagbwe atu hinyo ala mwehu kundini, ela kala sio ayawehu. Mana kala ka ni ayawehu, angekala abaki naswi. Ela ariphotuluka amanyikana wazi kala sio ayawehu.
- ²⁰Lakini Roho wa Mlungu wainjira mwenu mioyoni, na mosi mnamanya kpweli.
- ²¹Phahi sikuandikirani kpwa kukala tammanya kpweli, hata. Ela nakuandikirani kpwa kukala mnamanya kpweli, tsona mnamanya tafwauti ya kpweli na handzo.
- ²²Mutu wa handzo ni yuphi? Ni yuya aremaye kala Jesu ndiye Muokoli. Mutu ambaye anarema Baba Mlungu na Mwanawe Jesu ni mpindzani wa Jesu.
- ²³Mutu achimkahala Mwana, piya anamkahala Baba. Na mutu achimkubali Mwana, piya anamkubali Baba.
- ²⁴Phahi higo maneno mrigogasikira hangu mwandzo gagbwireni mwenu mioyoni. Mchigagbwira mwenu mioyoni, wakati wosi mndakala phamwenga na Mwana na Baba.
- ²⁵Huchigbwira maneno higa mwehu mioyoni, Jesu andahupha uzima wa milele ariohulaga.
- ²⁶Nakuandikirani mambo higa kuhusu atu ambao analonda kukuchengani.
- ²⁷Lakini Jesu watiya Roho wa Mlungu mwenu mioyoni. Kpwa vira Rohowe a mwenu mioyoni, phahi tamuna haja ya kufundzwa ni mutu. Mana iye Rohowe anakufundzani chila chitu, na higo ambago anakufundzani ni ga kpweli, wala si handzo. Phahi, lungani mafundzoge, na mzidi kukala phamwenga naye.
- ²⁸Sambi anangu, zidini kukala phamwenga na Jesu, ili siku achedza hukale bila ya wuoga, wala husikale na sababu ya kudzifwitsa kpwa waibu.
- ²⁹Kpwa vira mnamanya kala Jesu ni wa haki, phahi piya manyani kukala osi ahendao haki ni ana a Mlungu.

1 Johana 3

- ¹Fikiriyani vira Baba Mlungu arivyohumendza hata hunaihwa anae. Na kpweli hu anae, lakini atu a dunia hino higo taagamanya, mana taamanya Mlungu.
- ²Asena angu, vivi naswi hu ana a Mlungu, lakini taimanyikana vira ndivyokala badaye. Ela hunamanya kala Jesu ndiphokpwedza, hundakala dza iye, mana hundamuona vira arivyo.
- ³Phahi chila mwenga wenu anayetarajiya kukala dza Jesu, ni akale bila ya lawama, dza viratu arivyo bila ya lawama.
- ⁴Mutu yeyesi ahendaye dambi anavundza Shariya za Mlungu, mana kuhenda dambi ni kurema kulunga shariya.

- ⁵Lakini mwimwi mnamanya kala Jesu wakpwedza kuusa dambi zenu, ela ye mwenye kana dambi yoyosi.
- ⁶Phahi mutu yeyesi ariye phamwenga naye kahenda dambi, ela ahendaye dambi kamanya Jesu wala kumuelewa.
- ⁷Anangu, msichengbwe. Mutu ahendaye mahendo ga haki, ana haki dza viratu Jesu arivyo.
- ⁸Lakini mutu ahendaye dambi ni wa Shetani, mana Shetani wahenda dambi hangu mwandzo. Ela hiye Mwana wa Mlungu wakpwedza himu duniani ili abanange kazi za Shetani.
- ⁹Kpwa hivyo, ana a Mlungu taahenda dambi, mana ana asili ya Mlungu mwao mioyoni. Nao taaweza kuhenda dambi mana ni ana a Mlungu.
- ¹⁰Yeyesi asiyehenda mahendo ga haki au asiyemmendza mfuasi myawe, siye mwana wa Mungu. Hiyo ndiyo tafwauti ya ana a Mlungu na a Shetani.
- ¹¹Mwasikira habari hizi hangu mwandzo kukala hunalondwa humendzane.
- ¹²Msikale dza Kaini, kpwa mana Kaini kala ni wa Shetani, achimuolaga nduguye mwenye. Waolaga nduguye kpwa utu wani? Wamuolaga kpwa sababu nduguye wahenda mambo ga sawa, ela Kaini achihenda mambo mai.
- ¹³Phahi enehu, atu a duniani achikuzirani, msiangalale.
- ¹⁴Kumendzana kpwehu kunaonyesa kala hwatuluka chifoni na huchiinjira uzimani. Mutu yeyesi asiyemmendza mfuasi myawe, bado achere chifoni.
- ¹⁵Yeyesi aziraye myawe ni muolagadzi, namwi mnamanya kala muolagadzi kana uzima wa milele.
- ¹⁶Jesu Masihi wadzilavya aolagbwe kpwa sababu yehu; hivyo ndivyo hunamanya mendzwa irivyo. Hata sisi naswi hunalondwa humendze ayawehu, hata ichikala ni kufwa, hudzilavye huolagbwe kpwa sababu ya ayawehu.
- ¹⁷Mutu achikala na mali himu duniani, na aone mfuasi myawe ni mgayi kana chitu, ela asimunere mbazi, kpwa kpweli mutu hiye kaweza kuamba ana mendzwa ya Mlungu mwakpwe moyoni.
- ¹⁸Anangu, mendzwa yehu naisikale ya maneno mahuphu, ela nahumendzaneni na mendzwa ya kpweli ya mahendo.
- ¹⁹⁻²⁰Huchikala na mendzwa ya mahendo, hundamanya kala hunalunga njira ya kpweli. Na hata huchimanya kala mwehu mioyoni huna makosa, hundaweza kuima mbere za Mlungu bila ya wuoga. Mana Mlungu ni mkpwulu kuriko maazo gehu, tsona anamanya chila chitu.
- ²¹Asena angu, ichikala maazo gehu tagana lawama, phahi, hunaweza kukala bila ya wuoga mbere za Mlungu.

²²Naswi hunaweza kuvoya Mlungu chochosi, na akahupha kpwa sababu hunalunga malagizoge na kuhenda mambo gamhamirago.

²³Na hivi ndivyo Mlungu arivyolagiza: humkuluphire Mwanawe Jesu Masihi na humendzane kama arivyolagiza.

²⁴Atu alungao malagizo ga Mlungu a phamwenga na Mlungu, naye Mlungu a phamwenga nao. Naswi huna hakika kala Mlungu a phamwenga naswi kpwa sababu Rohowe anaishi mwenu mioyoni.

1 Johana 4

¹Asena angu, kpwazuka manabii manji ga handzo himu duniani. Kpwa hivyo, msimuamini chila mutu hata akaamba ana Roho wa Mlungu. Lakini n'lazima mumpime na mmanye ichikala kpweli ana Roho wa Mlungu.

²Hino ndiyo njira ya kukumanyisa kala mutu ana Roho wa Mungu: yeyesi ndiyekubali kala Jesu Masihi wakala mwanadamu na wakpwedza duniani, ana Roho wa Mlungu.

³Lakini mutu yeyesi asiyekubali, kana Roho wa Mlungu, ela ana roho wa kupinga Jesu. Namwi mwasikira kala roho hiye andakpwedza, na vivi wakpwedza kare.

⁴Anangu, mwimwi mu a Mlungu, na mwashinda higo manabii ga handzo, kpwa mana Roho ariye mwenu mioyoni ni mkpwulu kuriko roho ariye duniani.

⁵Higo manabii ga handzo tagamanya Mlungu. Kpwa hivyo higo agombago ni ga chidunia, nao atu a dunia asiomanya Mlungu nkualunga gao.

⁶Sisi hu a Mlungu. Yeyesi amanyaye Mlungu nkuhulunga, ela asiye wa Mlungu kahulunga. Phahi kpwa sababu hiyo, hunaweza kumanya tafwauti ya Roho wa kpweli na roho wa handzo.

⁷Asena angu, nahumendzaneni, mana kumendzana kula kpwa Mlungu. Mutu yeyesi amendzaye mfuasi myawe ni mwana wa Mlungu na anamanya Mlungu.

⁸Mutu yeyesi asiyemendza myawe kammanya Mlungu, mana Mlungu ni mendzwa.

⁹Naye Mlungu wahuonyesa mendzwaye ariphomhuma Mwanawe wa macheye kpwedza himu duniani, ili huphahe uzima wa milele kpwa sababuye.

¹⁰Hivi ndivyo mendzwa ya kpweli irivyo: sio kukala sisi hwammendza Mlungu, ng'oo! Ela Mlungu ndiye ariyehumendza sisi hata achimlavya Mwanawe akale chiryangona cha kuusira dambi zehu.

¹¹Asena angu, kpwa vira Mlungu wahumendza hivyo, phahi naswi piya n'lazima humendzane.

¹²Takuna mutu yeyesi yemuona Mlungu, lakini huchimendzana, Mlungu a phamwenga naswi na maisha gehu gandaonyesa mendzwaye viratu arivyopanga.

- ¹³Naswi huna hakika kukala hu phamwenga na Mlungu, naye Mlungu a phamwenga naswi kpwa sababu wahupha Rohowe.
- ¹⁴Hunamanya kala Mlungu wamhuma Mwanawe ili akale Muokoli wa atu. Naswi hu mashahidi a hiro huriroriona.
- ¹⁵Mutu yeyesi ndiyekubali kala Jesu ndiye Mwana wa Mlungu, a phamwenga na Mlungu, na Mlungu a phamwenga naye.
- ¹⁶Phahi, sisi hunamanya na kuhakikisha kala Mlungu anahumendza chikpweli-kpweli. Mlungu ni mendzwa, naye mutu ariye na mendzwa wakati wosi, a phamwenga na Mlungu, naye Mlungu a phamwenga naye.
- ¹⁷Huchiishi himu duniani vira Jesu arivyoishi, phahi tahundakala na wuoga siku ya hukumu. Hiphohi maisha gehu gandakala ganaonyesa mendzwa ya Mlungu viratu arivyopanga.
- ¹⁸Menzwa na wuoga taviweza kukala phamwenga. Maisha gehu gachionyesa mendzwa ya Mlungu viratu arivyopanga, phahi tahundaogopha hukumu. Huchiogopha kutiywa adabu, manage tahudzangbweruhusu mendzwa ya Mlungu igaluze maisha gehu vira arivyopanga.
- ¹⁹Sisi hunamendza Mlungu na ayawehu, kpwa sababu Mlungu ndiye ariyeandza kuhumendza.
- ²⁰Mutu achiamba, "Mino nammendza Mlungu," kuno ye wazira mfuasi myawe, ana handzo. Mana ichikala mutu kammendze myawe amuonaye, phahi Mlungu ambaye kamuona, andammendzadze?
- ²¹Mlungu wahupha lagizo ambaro rinaamba, "Yeyesi amenzaye Mlungu n'lazima ammendze myawe piya."

1 Johana 5

- ¹Chila mutu aaminiye kala Jesu ndiye Muokoli, Mlungu andamuiha mwanawe. Mutu yeyesi amenzaye Baba Mlungu anamendza anae piya.
- ²Huchimendza Mlungu na kulunga malagizoge ndipho hundamanya kpwa kpweli hunamendza ana a Mlungu.
- ³Kpwa mana kummendza Mlungu ni kulunga malagizoge. Nago malagizoge sigo magumu kugalunga,
- ⁴mana achimuiha mutu mwanawe, Mlungu nkumupha uwezo wa kushinda mambo mai ga dunia. Naswi hukuhewa uwezo wa kushinda higo mambo mai kpwa kumkuluphira Jesu.
- ⁵Dze, ni ani ambaye anaweza kushinda mambo mai ga dunia? Ni chila mutu akuluphiraye kala Jesu ndiye Mwana wa Mlungu.

⁶Hiye Jesu Masihi wakpwedza duniani achibatizwa na madzi na achimwaga mlatso ariphofwa. Kedzere na madzi bahi, ela wakpwedza na madzi na mlatso piya. Naye Roho wa Mlungu anashuhudiya kala mambo higa ni ga kpweli, mana Roho mwenye ni wa kpweli.

⁷Phahi kuna mashahidi ahahu ambao

⁸ni Roho wa Mlungu, madzi na mlatso. Hano ahahu anakubaliana.

⁹Ichikala hunaweza kukubali ushahidi wa atu, dze, ushahidi wa Mlungu si mkwulu zaidi? Mana Mlungu mwenye ni shahidi kuhusu Mwanawe.

¹⁰Mutu yeyesi akuluphiraye kala Jesu ndiye Mwana wa Mlungu anakubali ushahidi wa Mlungu. Ela asiyekuluphira, anahenda Mlungu akale na handzo, mana kaamini ushahidi wa Mlungu wa kuhusu Mwanawe.

¹¹Nao ushahidi wenye unaamba: Mlungu wahupha uzima wa milele, nao uzima ula kpwa Mwanawe.

¹²Phahi mutu yeyesi yemkubali ye Mwana ana hinyo uzima; lakini mutu asiyemkubali, kana uzima hinyo.

¹³Nakuandikirani mwimwi mumkuluphirao Jesu, Mwana wa Mlungu, ili mkale na hakika kala mna uzima wa milele.

¹⁴Naswi huna hakika kala huchim'voya Mlungu chochosi kulengana na alondavyo, andahusikira.

¹⁵Phahi kpwa vira hunamanya Mlungu anahusikira huchim'voya, piya hunamanya kala hukuphaha huvoyago.

¹⁶Kuna dambi ambazo nkumtanya mutu na Mlungu milele na kuhenda rohore rifwe. Uchiona myao anahenda dambi ambayo taiolaga roho, m'voyere na Mlungu andamtivya. Ela ichikala ni dambi iolagayo roho, siamba uvoye kuhusu dambi hiyo.

¹⁷Uyi wosi ni dambi, lakini kuna dambi ambayo taiolaga roho.

¹⁸Hunamanya kala ana osi a Mlungu taahenda dambi, mana Jesu nkuarinda, naye Shetani kaweza kuahenda rorosi.

¹⁹Hunamanya kala hu ana a Mlungu, ela atu anjina osi duniani anatawalwa ni Shetani.

²⁰Piya hunamanya kala Mlungu wahuma Mwanawe, naye wakpwezahumanyisa Mlungu wa kpweli. Phahi sisi hu phamwenga na Mlungu wa kpweli, na hu phamwenga na Mwanawe Jesu Masihi. Iye ni Mlungu wa kpweli, na ndiye arehay uzima wa milele.

²¹Anangu, dzimanyirireni msedze mkaabudu chitu chochosi isiphokala Mlungu macheye.

2 Johana

2 Johana 1

- ¹Salamu kula kpwa chiongozi wa afuasi a Jesu. Nakuandikira uwe mayo yetsambulwa ni Mlungu phamwenga na anao, nkumenzaye kpwa kpweli. Wala siye mimi bahi nikumenzaye, ela ni atu osi amanyao kpweli,
- ²kpwa sababu hwagbwira kpweli mwehu mioyoni na indakala mumo milele.
- ³Baba Mlungu na Mwanawe Jesu Masihi, naakujaliyeni, akuonereni mbazi na mkale salama, kpwa sababu ya kukala hunamanya nyo ukpweli wa Mlungu na hundamenzana.
- ⁴Náhererwa sana kusikira kala ana enu anjina analunga njira ya kpweli viratu Baba Mlungu arivyohulagiza.
- ⁵Phahi mayo navoya humendzaneni. Sikuandikirani lagizo dziphya, ela riro ambaro hunaro hangu mwandzo.
- ⁶Na kuonyesa hunamenzana, ni hulunge malagizo ga Mlungu. Naro hiri ndiro lagizo mrirosikira kula mwandzo kukala, n'lazima muenderere kumenzana.
- ⁷Kpwazuka alimu anji a handzo himu duniani, ambao taakubali kukala Jesu Masihi wavyalwa kama mwanadamu. Mutu asiyekubali kala Jesu ka ni mwanadamu ni mutu wa handzo chisha ni mpinzani wa Jesu.
- ⁸Dzimanyirireni msedze mkayaza higo mrigogabagalikira, ela mtuzwe tuzo renu kamili.
- ⁹Mutu yeyesi ndiyeenjereza mafundzoge kpwa katosheka na mafundzo ga Jesu, ka phamwenga na Mlungu. Ela mutu agbwiraye mafundzoge anamkubali Baba Mlungu na Mwana.
- ¹⁰Phahi mutu achedza kpwenu na mafundzo mbali na ga Jesu, msimkaribishe mwenu madzumbani wala msimlunge gakpwe.
- ¹¹Mana yeyesi alungaye gakpwe, anagbwirana naye kuhenda mai.
- ¹²Nina manji ga kukuambirani, lakini simenze kuhumira karatasi na wino. Natumaini kpwedzakuonani hubisheni ili hukale na raha tse-tse-tse.
- ¹³Ana a mwenenu mchetu yetsambulwa ni Mlungu, akakuphoza.

3 Johana

3 Johana 1

- ¹Salamu kula kpwa chilongozi wa afuasi a Jesu. Nakuandikira uwe msena wangu Gayo, nikumendzaye kpwa kpweli.
- ²Msena wangu, nakuvoyera Mlungu ukale mzima, na mambogo gosi gaenderere vinono dza vivyo uendereravyo vinono chiroho.
- ³Kpwa kpweli násikirato sana enehu ariphokpwedza kpwangu na kuniambira vira ulungavyo njira ya kpweli. Maishago na mahendogo ni ga kpweli chila wakati.
- ⁴Takuna chitu ambacho chinanihamira sana kuriko kusikira kala anache angu analunga njira ya kpweli.
- ⁵Chila mara unaphoterya afuasi ayao na hasa ajeni, unaonyesa vira ambavyo unaweza kuaminika.
- ⁶Hinyo ajeni asemurira afuasi a Jesu hipha vira umendzavyo ayao. Tafadhali aterye ajeni osi dza hinyo aenderere na charo chao kpwa njira inayomhamira Mlungu.
- ⁷Mana aandza charo ili amhumikire Jesu bila ya kuvoya msada kula kpwa atu asiomkuluphira Jesu.
- ⁸Phahi, sisi hunaomkuluphira n'lazima huaterye hinyo atu ili hukale hunaungana nao kuhenda kazi ya kuaambira atu ukpweli wa Mlungu.
- ⁹Mwimwi afuasi hiko nákuandikirani baruwa, lakini Diotirefe wadzihenda chimbere-mbere na kamendze kunisikiza kabisa.
- ¹⁰Phahi, siku nchedza n'ndabisha na kundi ra afuasi kuhusu mambo ahendago. Ananisingizira mambo mai. Lakini higo mambo mai, Diotirefe katosheka vivyo. Ye mwenye kakaribisha enehu, tsona anaakahaza na anaazola kundini ayae anaolonda kukaribisha ajeni.
- ¹¹Msena wangu Gayo, usimuige hiye mutu mui. Ela iga tabiya za atu anono. Mutu yeyesi ahendaye mambo manono ni mwana wa Mlungu. Lakini yeyesi ahendaye mambo mai kamanya Mlungu.
- ¹²Demetirio anatogolwa ni chila mutu kpwa mahendo manono, na asiliye ni ya kpweli. Mimi piya namanya kala ni mutu mzuri, nawe unamanya kala ushahidi wangu ni wa kpweli.
- ¹³Nina manji ga kukuambira, lakini simendze kuhumira karatasi na kalamu.
- ¹⁴Natumaini hundakutana vi sambu sambu, naswi hundabisha.
- ¹⁵Asenao osi a hiku akakuphoza. Huphozere asena ehu osi hiko. Kala salama.

Juda

Juda 1

¹Mimi Juda, mtumishi wa Jesu Masihi na ndugungbwa wa Jakobo, nakuandikirani mwimwi mrioihwa ni Baba Mlungu. Mmanyeye kukala mnamendzwa ni Mlungu na kurindwa ni Jesu Masihi.

²Nakuvoyerani Mlungu akupheni mbazi, amani na mendzwa nyinji.

³Asena angu, nákala na mpango wa kukuandikirani kuhusu wokofu hunaoshiriki phamwenga. Lakini náona n'lazima nikuandikireni kukutiyani moyo ili mrinde mafundzo ga habari ndzuri kuhusu Jesu. Hizo habari, Mlungu wazilavya kpwa atue, nazo zinatoshia siku zosi.

⁴Mana atu asiojali Mlungu adziiya-iyá achiinjira mwenu kundini. Atu hinyo anadzichenga kpwa vira anaamba ati kuzinga ni sawa, mana Mlungu ana mbazi na nkusamehe. Kuhenda hivyo ni kutiya ndzili ujumbe wa mbazi za Mlungu na kurema Jesu Masihi, Mtawala na Bwana wehu. Mlungu wapanga kuaatiya adabu kali atu hinyo.

⁵Hivi sambí nalonda nikutambukizeni mambo machache, dzagbwe mwagaambirwa kare. Mnamanya kukala Mlungu waatsamiza Aiziraéli kula Misiri ambako kala akahendwa atumwa, lakini badaye achiaangamiza hara ambao kala taamkuluphira.

⁶Piya mnamanya hadisi ya malaika ambao alonda uwezo kuriko hura kala akahewa ni Mlungu, achiricha kuishi mlunguni ambako ni phahali phao pha asili. Mlungu waafunga jizani na singenge ambayo taindavuguka hadi ahukumiwe siku ya mwisho.

⁷Tsona tambukirani atu a Sodoma na Gomora na midzi iriyokala phephi, ahenda dza hara malaika. Ahenda uzindzi na alume kuhendwa achetu; mambo higa ni chinyume cha mipango ya Mlungu. Achihukumiwa mohó wa milele, ikale fundzo kpwa atu osi.

⁸Vivyo hivyo hinya alimu a handzo ni kulongozwa ni ndoso zao kuhenda mai na miri yao. Nkuzarau uwezo wa Mlungu na kulaphiza viumbe vya dzulu mlunguni.

⁹Siku mwenga Mikaeli, malaika mkpwulu, wakala anaheha na Shetani kuhusu ni ani ndiyehala mwiri wa Musa. Dzagbwe Mikaeli ni mkpwulu wa malaika osi, kayalaphiza wala kuhukumu Shetani, ela waamba, "Mlungu mwenye andakudemurira!"

¹⁰Lakini atu hinya nkulaphiza chochosi asichochimanya. Nao ni dza nyama a weruni ambao nkuhenda mambo asigoelewa; nao andaangamizwa kpwa kuhenda hivyo.

¹¹Shauri yao! Atu hinyo alunga mfwano uratu wa Kaini. Kpwa sababu ya kumendza pesa adzitiya lawama dza iratu ya Balamu. Chisha akosera dza viratu Kora arivyompinga Mlungu. Nao bila shaka andaangamizwa dza iye!

¹²Atu hinya nkusherekea karamu za Bwana Jesu na mwimwi, lakini ni dza madowa machafu mana nkudzimanya enye bahi, wala taana haya. Ni dza maingu gasukumwago ni phuto gasigo na dalili ya mvula. Ni dza mihi isiyovyala matunda wakatiwe uchifika; mihi ambayo yafwa kamare mana yang'olwa na miziye.

¹³Atu hinyo ni dza maimbi ga bahari, na mahendo gao ga waibu ganatuluka dza povu. Hinyo ni dza nyenyezi zigbwazo na nkuikpwa milele phahali pharipho na chilungu-lungu cha jiza.

¹⁴Enoko, ambaye ni chivyazi cha sabaa kula Adamu, watabiri higa kuhusu atu hinya, achiamba, "Sikizani, Bwana Jesu aredza phamwenga na maelufu ga malaikae

¹⁵kuhukumu atu osi. Mlungu andaatiya adabu osi ambao taamjali, kpwa sababu ya mahendo gao mai arigohenda bila kumjali, na maneno gao mai ga kumkufuru Mlungu."

¹⁶Atu hinya nkunung'unika siku zosi na kulaumu, na kulunga tamaa zao mbii. Nkugomba maneno manji ga kudzikarya, na kutogola atu anjina sana kpwa fwaida yao enye.

¹⁷Lakini asena angu tambukirani gara mrigoambirwa ni mitume a Bwana wehu Jesu Masihi.

¹⁸Akuambirani, "Siku za mwisho, kundazembuka atu ndiokuzemererani, atu alungao tamaa zao bila kujali Mlungu."

¹⁹Hinyo ndio atu anaokuganyani makundi makundi, atu alongozwao ni tamaa zao mbii, atu asio na Roho wa Mlungu.

²⁰Lakini mwimwi asena angu, dinisani kulunga mafundzo ga habari ndzuri mrigophaha kula kpwa Mlungu, ili gakale msingi wa maisha genu. Wakati mnavoya mricheni Roho wa Mlungu akulongozeni.

²¹Kalani atu alongozwao ni mendzwa ya Mlungu, kuno mnagodzera uzima wa milele. Hinyo uzima ni wenu kpwa sababu ya mbazi za Bwana wehu Jesu Masihi.

²²Phahi, atiyeni moyo ayawenu ario na wasi-wasi kuhusu gara aaminigo.

²³Awanieni afuasi ayawenu anjina muaokole wakati anainjira mohoni. Chisha anjina aonerani mbazi, lakini namwi dzimanyirireni! Zirani hata zo nguwo zotiywa uchafu kpwa sababu ya mahendo gao mai.

²⁴Naatogolwe iye awezaye kukurindani msedze mkagbwa chiroho ili akureheni mbereze hiko mlunguni. Phapho mbere za Mwenyezi Mlungu mndakala na raha mana mndakala tamuna dowala makosa.

²⁵Kpwa sababu ya Bwana wehu Jesu Masihi nahumtogeni Mlungu kpwa mana iye macheye ndiye Mlungu wa kpweli, na Muokoli wehu. Nahumlikeni kpwa kukala iye ni Mfalume Mkwulu, ana nguvu na uwezo, ariokala nao hangu mwandzo, na andaenderera kukala nao hadi milele! Amina.

Maono

Maono 1

¹Mlungu wamuonyesa Jesu Masihi mambo ambago kala n'lazima gahendeke vi sambu sambu. Naye Jesu wanikumira malaikawe kunirehera ujumbe huno mimi mtumishiwe, Johana.

²Nami nágaandika mambo gosi nrigogaona. Mambo higo nágaona, nago ni kuhusu ukpweli uriong'azwa ni Jesu Masihi, yani neno ra Mlungu.

³Mlungu andajaliya atu osi ndioasomera ayawao ujumbe huno wa unabii, nao ndiosikiza na kuulunga piya andajaliwa. Mana wakati ambao ni gahendeke u phephi.

⁴⁻⁵Baruwa hino ila kpwangu mimi Johana. Nakuandikirani mwimwi makundi sabaa ga afuasi a Jesu mrio jimbo ra Asia. Navoya Mlungu akuonereni mbazi na mkale salama. Mjaliwe ni hiye yekalako, ariyeko, na ndiyekalako, phamwenga na roho sabaa akalao mbere za chihi cha chifalume, na Jesu Masihi. Naye Jesu ni shahidi muaminifu tsona wakala wa kpwandza kufufulwa ili akale mtawala wa atu osi, na mfalume wa afalume osi duniani. Iye ndiye ariyehumenda hangu mwandzo na achihuusira dambi zehu kpwa kuhufwerera.

⁶Wahuhenda hukale amwenga a ufalumewe na hukale alavyadzi-sadaka kumhumikira Mlungu ambaye ni Ise. Mtogoleni Jesu, Mtawala wa Uwezo wosi milele na milele! Amina.

⁷Lolani! Aredza na maingu! Chila mmwenga andamuona, hata hara atu ariomdunga fumo piya andamuona. Makabila gosi duniani gandamririra. Hakika higa ni ga kpweli na gandahendeka. Amina.

⁸Mwenyezi Mlungu, yekalako, ariyeko, na ndiyekalako, anaamba hivi, "Mimi ndimi Mwandzo na Mwisho wala takuna wanjina. Ndimi niandzaye mambo gosi na nkagamarigiza."

⁹Enehu, mimi Johana ni mfuasi myawenu. Kpwa hivyo hunashirikiana kugaya kpwa sababu ya Jesu ambaye ni Mfalume wehu, lakini iye nkuhupha nguvu za kuvumirira. Mino náfungbwa jela chisiwa chiihwacho Patimo kpwa sababu ya kutangaza ujumbe wa Mlungu na kulavya ushahidi kuhusu Jesu.

¹⁰Siku mwenga kala ni Jumapili, siku hiyo kala ninalongozwa ni Roho wa Mlungu. Gafula ko nyuma zangu nchisikira sauti kulu dza ya gunda.

¹¹Sauti hiyo yaamba, "Andika chitabuni higa gosi ugaonago na ugaphirikire higa makundi ga afuasi asagalao midzi sabaa, midzi hiyo ni Efeso, Simurina, Perigamo, Thiatira, Saridi, Filadelfia, na Laodikia."

¹²Nriphogaluka kulola ye agombaye, náona vyombo sabaa vya zahabu vya kuikira taa.

¹³Hipho kahi-kahi ya taa hizo, náona mutu, "dza Mutu Yela Mlunguni" akavwala kandzu iriyofika nyayoni na mkanda mpana wa zahabu chifuwani.

¹⁴Nyereze kala ni nyereru dza pamba ama bafuta, na matsoge kala ni dza jimbi-jimbi ra moho.

¹⁵Nazo nyayoze kala zinang'ala-ng'ala dza shaba ya kuera ichiyosafishwa mohoni. Rakare kala ni dza madzi manji gajerago na nguvu.

¹⁶Tsona kala ana nyenyezi sabaa mkpwono wa kulume. Mwakpwe mlomoni ka mchituluka upanga wa kurya sana, chisha wa maso kosi-kosi. Usowe kala unang'ala dza viratu dzuwa kali.

¹⁷Nriphomuona, nágbwa phakpwe maguluni nchikala avi nkafwa. Lakini wanibandikira mkpwonowe wa kulume na achiniamba, "Usiogophe! Mimi ni Mwandzo na Mwisho.

¹⁸Sikiza, mimi ndimi uzima! Kala nkafwa ela vino ni mzima hata milele na milele! Na ndimi n'riye na funguwo za Chifo na kuzimu.

¹⁹Phahi andika higa uonago, yani mambo gahendekago hivi sambu na piya higo ndigohendeka badaye.

²⁰Zira nyenyezi sabaa uchizoziona mkpwono wangu wa kulume na vira vyombo vya zahabu vya kuikira taa, manage ni higa: Vira vyombo vya zahabu vya kuikira taa ni gara makundi sabaa ga afuasi a Jesu; na zira nyenyezi sabaa ni malaika ao."

Maono 2

¹Phahi ye mutu, "dza Mutu Yela Mlunguni" waenderera kugomba, achiniamba, "Hiyu malaika wa kundi ra afuasi hiko Efeso muandikire hivi: Mimi ndimi n'riye na nyenyezi sabaa mkpwono wangu wa kulume na ambaye nkunyendeka kahi-kahi ya vira vyombo sabaa vya zahabu vya kuikira taa. Hebu sikizani nagokuambirani!

²Namanya mambo gosi mhendago, namanya bidii yenu na kuvumirira mriko nako. Piya namanya kukala tamgbwirana na atu ayi, hata mwapima atu adziihao mitume, na kumbavi sio na mchimanya kala ana handzo.

³Namanya piya kala mwagaya sana kpwa sababu yangu, ela mchivumirira wala tamdzangbweremwa.

⁴Hata hivyo, muna utu ambao unanisononeso. Utu wenye ni kukala tamnimendze dza hipho mwandzo mriphookoka.

⁵Hebu tambukirani mrivyonimendza sana na mtubu, na mhende gara mrigogahenda hipho mwandzo. Ela msiphotubu, hicho chombo cha kuikira taa hipho chiripho, n'ndakpwezanchiuse.

⁶Lakini kuna chitu chimwenga ambacho mnahendato: Mnazira mambo mai gahendwago ni Anikolai ambago hata mimi piya taganihamira bii.

⁷Mwenye masikiro naasikire higa muambirwago ni Roho wa Mlungu. Mutu ndiyeshinda, n'ndamruhusu kurya matunda ga muhi wa uzima, urio munda wa Mlungu kuko Peponi.”

⁸Chisha achiamba, "Na hiye malaika wa kundi ra afuasi hiko Simurina muandikire hivi: Mimi ni Mwandzo na Mwisho. Náfwa nchifufuka na vino ni mzima! Hebu sikizani nagokuambirani!

⁹Namanya mateso genu na uchiya wenu, ela mbona mu matajiri. Piya namanya zarau mhenderwazo ni apinzani enu. Aho anaamba ni Ayahudi, lakini sio, ni afuasi a Shetani.

¹⁰Phahi gasikutishireni higo mateso ndigokuphahani. Lolani, Shetani andakupimani kpwa kuatiya anjina enu jela, namwi mndateswa siku kumi. Lakini kalani aaminifu kpwangu; hata ichikala ni kufwa, fwani. Nami n'ndakuphani tuzo ra uzima wa milele.

¹¹'Mwenye masikiro naasikire higa muambirwago ni Roho wa Mlungu. Mutu ndiyeshinda mateso gago, siku ya mwisho kandatsuphiwa mohoni tse, moho wa milele urio ni chifo cha phiri.' “

¹²Achienderera kugomba achiamba, "Na hiye malaika wa kundi ra afuasi hiko Perigamo muandikire hivi: 'Nina upanga wa kurya urio na maso kosi-kosi. Hebu sikizani nagokuambirani!

¹³Mimi namanya mudzi mkalao unatawalwa ni atu a Shetani, ela bado mnanigbwira kudinisa ngi-ngi-ngi. Hata wakati Antipasi, shahidi wangu muaminifu, ariphoolagbwa kpwenu mudzini, hinyo mudzi wa Shetani, tamyanikahala.

¹⁴Ela muna utu ambao unanisononeso. Ayawenu anjina analunga mafundzo ga Balamu. Hiye Balamu ndiye ariyemfundza Balaki kuhenda Aiziraeli ahende dambi ra kurya vitu vyolaviwa sadaka kpwa sanamu, na kuhenda udiya.

¹⁵Vivyo hivyo mwimwi namwi kuna ayawenu anjina ambao analunga mafundzo ga Anikolai, na kuhenda dambi zao. Mafundzo gao ni sawa-sawa na go mafundzo ga Balamu.

¹⁶Phahi tubuni! Ela msiphotubu, n'redza pha sambu nedze niapige hinyo atu na upanga wa mwangu mromoni.

¹⁷Mwenye masikiro naasikire higa muambirwago ni Roho wa Mlungu. Mutu ndiyeshinda, n'ndamupha tuzo ra mnyahu wa chakurya cha mana yofwitswa. Piya n'ndamupha dziwe dzereru, ambaro raandikpwa dzina dziphya. Lakini takuna mutu ndiyemanya dzina hiro siphokala iye achiyehewa dzina hiro.' “

¹⁸Chisha achiaambira hiye malaika wa kundi ra afuasi hiko Thiatira muandikire hivi: "Mimi ndimi Mwana wa Mlungu. Nina matso dza jimbi-jimbi ra moho na nyayo za kung'ala-ng'ala dza shaba ya kuera. Hebu sikizani nagokuambirani!

¹⁹Namanya mambo gosi mhendago. Namanya mendzwa yenu, kuluphiro renu, kuhumika kpwenu, na kuvumirira mriko nako. Tsona nakuonani mnahendato, mwazidi kuriko hipho mwandzo.

²⁰Lakini muna utu ambao unanisononesha, kpwa sababu ya hiye mchetu Jezebeli, ambaye anadziiha nabii. Mnamricha anachenga atu angu na kuafundza udiya, na kurya vyakurya vyolavirwa sadaka sanamu.

²¹Námupha wakati akatubu dambize, lakini kataki kuricha udiya.

²²Kpwa hivyo n'ndamtiya mashaka ambago gandamuika chitandani. Na atu osi ambao anahenda naye udiya nindaagayisa sana isiphokala ariche kuhenda mahendoge mai.

²³Tsona n'ndaolaga afuasie. Ndipho afuasi osi a Jesu andamanya kala mimi namanya moyo na achili za chila mutu. Chila mmwenga n'ndamripha kulengana na mahendoge.

²⁴Lakini kuna anjina ko Thiatira ambao taayalunga mafundzo ga hiye Jezebeli wala taamanya go ambago anjina anaamba ni mafundzo ga ndani ga Shetani. Phahi mwimwi sindakuenjerezerani mzigo.

²⁵Ela gagbwireni vinono higo manono mrigo nago mpaka ndiphokpwedza.

²⁶Aho ndioshinda na kulunga malagizo gangu hadi mwisho, n'ndaapha uwezo wa kutawala atu a mataifa gosi.

²⁷'Andaatawala na usiru kuachapa fwimbo na kuavundza-vundza dza nyungu.' Andaphaha uwezo dza viratu mimi nrivyo hewa uwezo ni Baba.

²⁸Atu ndioshinda, n'ndaapha kombezi.

²⁹Mwenye masikiro naasikire higa muambirwago ni Roho wa Mlungu."

Maono 3

¹Phahi ye mutu, "dza Mutu Yela Mlunguni" waenderera kugomba achiamba, "Hiye malaika wa kundi ra afuasi hiko Saridi muandikire hivi: Mimi nina roho sabaa za Mlungu na nyenyezi sabaa. Hebu sikizani nagokuambirani! Namanya mambo gosi mhendago. Mnaonewa kala mu azima, lakini mwafwa.

²Hebu lamukani! Gafufuleni higo gosala ambago ga phephi na kufwa. Mana mahendo genu tagadzangbwefikira vira Mlungu wangu alondavyo.

³Hebu garirikaneni higo mrigofundzwa mchigagbwira na mchiamini. Galungeni vinono higo na mtubu. Msipholamuka, n'ndakpwedza gafula, dza viratu muivi edzavyo, na tamdamanya bii n'ndakpwedza kpwenu rini.

⁴Lakini kuna afuasi achache ko Saridi ambao taagalunga higo mahendo ga dambi. Phahi andakala phamwenga nami, nao andavwikipwa nguwo nyereru, mana atu hinyo anafwaha.

⁵Atu ndioshinda, andavwikipwa nguwo nyereru dza aho. Sindafuta madzina gao bii ndani ya chitabu cha uzima. Nami n'ndaakubali mbere za Baba Mlungu na malaikae kukala ni angu.

⁶Mwenye masikiro naasikire higa muambirwago ni Roho wa Mlungu.”

⁷Chisha achiamba, "Hiye malaika wa kundi ra afuasi hiko Filadelfia muandikire hivi: Mimi ndiye wa haki na wa kpweli, tsona ndiye ariye na funguwo za Daudi. Nchifunga mryango takuna avugulaye, na nchivugula takuna afungaye. Hebu sikizani nagokuambirani!

⁸Mahendo genu gosi mhendago nagamanya. Sikizani! Mino nákurichirani mryango wazi, wala takuna mutu awezaye kuufunga. Hata dzagbwe nguvu zenu kala nchache, lakini mwagbwira mafundzo gangu, wala tamuyanikahala kala mu afuasi angu.

⁹Sikizani! Hara afuasi a Shetani ko sinagogini, ambao anadziamba ni Ayahudi na mbavi sio, ana handzo, phahi n'ndaahenda edze akugbwerereni maguluni. Aho osi andamanya kala nakumenzani.

¹⁰Sambi kpwa vira mwavumirira kama nrivyokulagizani, wakati wa mashaka ndigoreherwa kupima atu dunia ndzima, mino n'ndakurindani.

¹¹Kpwa kpweli n'redza vi sambu! Phahi gagbwireni vinono higo manono mrigo nago, ili mutu asedze akakufutani tuzo renu.

¹²Mutu ndiyeshinda, n'ndamhenda nguzo ya Nyumba ya Kuvoya Mlungu wangu naye kandaituluka tsona. Chisha kwakpwe n'ndaandika dzina ra Mlungu wangu na dzina rangu dziphya. Na piya n'ndaandika dzina ra mudzi wa Mlungu wangu (yani Jerusalemu mbiphya, na mudzi uho undatserera kula mlunguni kpwa Mlungu wangu).

¹³Mwenye masikiro naasikire higa muambirwago ni Roho wa Mlungu.”

¹⁴Alafu achiamba, "Na hiye malaika wa kundi ra afuasi hiko Laodikia muandikire hivi: 'Mimi ndimi niihwaye Amina, Shahidi wa haki na wa kpweli. Tsona viumbe vyosi vyaumbwa ni Mlungu kutsupira mimi. Hebu sikizani nagokuambirani!

¹⁵Mimi namanya mahendo genu ni ga loho-loho. Phahi mino nakuambirani kukala baha mkale moho, ama pepo kabisa!

¹⁶Lakini kpwa vira muloho-loho, tamumoho wala pepo, mino n'ndakuhaphikani.

¹⁷Mnaamba ati mu matajiri na mna chila chitu, hata tamuna mutsowacho! Kumbavi tammanya rorosi, mna mashaka ndulu ndzima! Tamdzimanya kala mnafwaha kuonerwa mbazi kpwa vira mu achiya, mu vipofu, tsona mu vitsaha.

¹⁸Kpwa hivyo nakuambirani mgule vitu vivi kula kpwangu: Zahabu nono ya zosi ili mkale matajiri, kandzu nyereru mvwale ili mzibe vitsaha vyenu, na muhaso wa kutiya matsoni ili muone.

¹⁹Mimi nkudemurira na kutiya adabu atu niamendzao. Phahi kalani na chadi, na mriche dambi.

²⁰Hebu sikizani! Mino niimire mryangoni n'napiga hodi. Mutu ndiyenisikira achinivugurira, n'ndainjira mwakpwe nyumbani na hurye hosi.

²¹Mutu ndiyeshinda, n'ndamruhusu kusagala nami chihi changu cha chifalume, dza vivyo nami nrivyoshinda nchisagala na Baba chihiche cha chifalume.

²²Mwenye masikiro naasikire higa muambirwago ni Roho wa Mlungu.' "

Maono 4

¹Bada ya higo, nátsupha matso na lola, nchiona mryango u wazi mlunguni! Alafu nchisikira iratu sauti dza ya gunda yonigombekeza kpwandza ichiamba, "Ndzoo hiku dzulu, ili nikuonyese mambo ambago n'lazima gahendeke badaye."

²Gafula vivi nchikala ninalongozwa ni Roho, na phapho nchiona chihi cha chifalume ko mlunguni. Na iye achisagariraye

³⁻⁴kala anameka-meka dza dziwe zuri ra rangi ya kodza itsi na ya kundu. Chihi hicho kala chikazungulukpwa ni likore rong'ala-ng'ala phamwenga na vihi vyanjina ishirini na vine vya chifalume. Nao o kala akasagarira vihi hivyo kala ni azehe ishirini na ane okala akavwala nguwo nyereru na virembe vyopambwa na zahabu.

⁵Hicho chihi cha chifalume ka chinalavya limeme na mngurumo wa chiguruguru. Mbereze kala phana taa sabaa ziakazo ambazo kala ni zira roho sabaa za Mlungu.

⁶Hipho mbere za chihi kala phana utu dza bahari ya chilolo, avi ni dziwe ra kung'ala-ng'ala. Hipho kahi-kahi kuzunguluka chihi cha chifalume kala phana viumbe vine. Navyo kala vina matso chila phahali.

⁷Chiumbe cha kpwandza kala ni dza simba, cha phiri ka ni dza ndzau, cha hahu ka china sura dza mutu, nacho cha nne kala ni dza kozi aurukaye.

⁸Hivyo viumbe vine, chila chimwenga kala china mapha sita. Nago mapha kala gana matso chila phahali. Kala vinaimba usiku na mutsi bila ya kunyamala, nao wira wenye kala ni hinyu: "Mwenyezi Mlungu wa uwezo wosi, ni mtakatifu tse-tse-tse! Wakalako, ariyeko, na ndiyekalako, wakati wosi iye ni mtakatifu tse-tse-tse!"

⁹Vira viumbe vine kala vinamtogola, kumuishimu na kumshukuru hiye asegereye chihi cha chifalume, na aishiye milele.

¹⁰Chila wakati Mlungu kala anatogolwa ni vira viumbe, hinyo azehe ishirini na ane kala achimbgwerera mbereze na kumuabudu aishiye milele. Nao kala achitsupha viremba vyao mbere za chira chihi cha chifalume na kuno anaamba hivi:

¹¹"Bwana na Mlungu wehu, unafwaha kutogolwa, kuishimiwa na kukala na uwezo wosi. Mana uwe ndiwe yeumba vitu vyosi, navyo vyaumbwa na vinaishi kpwa kumendzako."

Maono 5

¹Alafu nátsupha matso mkpwono wa kulume wa yuya asegereye chihi cha chifalume, na nchiona chitabu. Nacho kala chikaandikpwa kosi-kosi, tsona kala chikafungbwa na ukaka mwahali sabaa.

²Chisha nchiona malaika wa nguvu sana anagomba na hoyo, kuuza, "Ni ani ambaye anafwaha kugandula ukaka hinyu na kuvugula chitabu hichi?"

³Lakini takuna mutu hiko mlunguni, duniani, wala kuzimu yekala anafwaha kuchivugula na kuchisoma.

⁴Phahi nárira sana kpwa sababu takuyaphahikana yeyesi ambaye anafwaha kuchivugula wala kuchisoma.

⁵Ndipho mmwenga wa hara azehe achiniamba, "Usirire! Hebu lola! Simba wa Mbari ya Juda, na ambaye ni chivyazi chikulu cha Mfalume Daudi, washinda. Kpwa hivyo anaweza kugandula ukaka mwahali sabaa mwa hicho chitabu na kuchivugula."

⁶Alafu hipho kahi-kahi phokala na chihi cha chifalume, náona Mwana-ng'ondzi aimire. Naye kala akazungulukpwa ni viumbe vine na hara azehe ishirini na ane. Kala uchimuona hiye Mwana-ng'ondzi avi akaolagbwa. Kala ana pembe sabaa na matso sabaa, na higo matso ka ni zira roho sabaa za Mlungu zokala zikahumwa chila phatu dunia ndzima.

⁷Phahi yuya Mwana-ng'ondzi wakpwendahala chira chitabu kula mkpwono wa kulume wa yuya yekala asegere chihi cha chifalume.

⁸Ariphohala chira chitabu, vira viumbe na hara azehe amgbwerera maguluni. Nao chila mmwenga kala ana ngephephe na ndzele ya zahabu tele ubani, ambao ka ni mavoyo ga atu a Mlungu.

⁹Hivyo amuimbira wira muphya ye Mwana-ng'ondzi nyokala unaamba: "Uwe unafwaha kuchihala hicho chitabu na kugandula ukakawe. Mana uwe watsindzwa na uchimgurira Mlungu atu a tsi zosi na chila kabila dunia ndzima na mlatsoo.

¹⁰Uwe waahenda akale amwenga a ufalume wa Mlungu na akale alavyadzi-sadaka kumhumikira, nao andatawala duniani dza afalume."

¹¹Alafu nátsupha matso, nchiona malaika anji sana, maelufu na maelufu, hata achikala taaolangika. Na hinyo malaika kala akazunguluka chira chihi cha chifalume, vira viumbe na hara azehe.

¹²Nchiasikira anaimba na hoyo, anaamba: "Hiye Mwana-ng'ondzi ariyetsindzwa, nguma ni yakpwe, anafwaha kuishimiwa na kutogolwa, mana utajiri wosi na marifwa ni gakpwe, piya uwezo wosi ni wakpwe."

¹³Hipho, násikira viumbe vyosi hiko mlunguni, duniani, kuzimu na baharini vinaimba chilimwenga, "Iye asagalaye chihi cha chifalume, na ye Mwana-ng'ondzi, naatogolwe, aishimiwe, ahewe nguma na uwezo milele na milele."

¹⁴Na vira viumbe vine vyakubali vichiamba, "Amina!" Nao hara azehe achigbwa chimabumabu na achiabudu.

Maono 6

¹Chisha nchiona hiye Mwana-ng'ondzi anagandula hura ukaka wa kpwandza. Alafu chiumbe chimwenga chapiga kululu avi ni sauti ya chiguruguru, achiamba, "Tuluka!"

²Alafu nchilola, na phapho nchiona farasi mwereru. Na mutu dzuluye yekala anamphirika kala akagbwira uha, naye kala akahewa chiremba cha chifalume. Mana kala akashinda viha na ka anaphiya akashinde vyanjina.

³Hiye Mwana-ng'ondzi wagandula ukaka wa phiri. Ndipho nchisikira chira chiumbe cha phiri chinaamba, "Tuluka!"

⁴Phahi phatuluka farasi wanjina ambaye kala a kundu do. Na mutu yekala dzuluye anamphirika wahewa upanga mkpwulu na uwezo wa kureha viha duniani, ili atu aolagane.

⁵Ndipho Mwana-ng'ondzi wagandula ukaka wa hahu, nami nchisikira chira chiumbe cha hahu chinaamba, "Tuluka!" Nriphotsupha matso, náona farasi mwiru. Mutu yekala anamphirika kala ana pishi mkpwononi.

⁶Nchisikira dza sauti kula kahi-kahi ya phara phokala na vira viumbe vine, ichiamba, "Maripho ga kutwa ndzima gandagula pishi mwenga tu ya nganu. Na maripho ga kutwa ndzima gandagula pishi tahu za muhama bahi. Lakini usibanange mafuha wala uchi wa zabibu."

⁷Mwana-ng'ondzi ariphogandula ukaka wa nne, nchisikira chira chiumbe cha nne chinaamba, "Tuluka!"

⁸Phahi nátsupha matso nchiona farasi wa ivu-ivu. Na hiye yekala anamphirika ka aihwa Chifo, na kuzimu kala inamlunga-lunga phephi nyumaze. Nao kala akahewa uwezo wa kuolaga robo ya atu duniani na viha, ndzala, makongo na nyama a weruni.

⁹Mwana-ng'ondzi wagandula ukaka wa tsano, na tsini ya phatu pha kulavira sadaka nchiona roho za atu. Atu hinyo osi kala akaolagbwa kpwa sababu ya kushuhudiya atu kuhusu Jesu na kutangaza ujumbe wa Mlungu.

¹⁰Phahi hizo roho zakota likululu zichianza, "Bwana wa uwezo wosi, uriye wa haki na wa kpweli, mbona unakaa? Undaahukumu rini atu a dunia na kuariphiza kpwa kuhuolaga?"

¹¹Ndipho chila mmwenga wa hinyo arioolagbwa wahewa kandzu nyereru. Achiambwa agodze kpwa muda mpaka ndugu zao, yani atumishi ayawao, aolagbwe dza aho, ili isabu yao ikamilike.

¹²Chisha nchiona ye Mwana-ng'ondzi anagandula hura ukaka wa sita. Phahi tsi yasumba sana, na dzuwa richigaluka rangi richikala dziru pi-pi-pi dza makala. Mwezi uchikala kundu dododo dza mlatso

¹³na nyenyezi zagbwa duniani, ovyo ovyo dza maembe gazugbwago ni phuto kali.

¹⁴Hiko mainguni kpwakundzwa dza jamvi. Myango yosi na visiwa vyosi vyauswa mura mwatu virimo kala.

¹⁵Alafu afalume himu duniani, na vilongozi na akulu a viha, matajiri na atu a vyeo, phamwenga na atu osi anjina, atumwa na ario huru, adzifwitsa mapangoni na mawe ga myangoni.

¹⁶Apiga kululu osi achiaambira hira myango na mawe, "Hugbwerereni! Hufwitseni husedze hukaonewa ni hiye asagalaye chihi cha chifalume wala husedze hukaona nyo utsungu wa ye Mwana-ng'ondzi.

¹⁷Mana siku ya mateso makali kula kpwa Mlungu na Mwana-ng'ondzi ikafika! Kpwa kpweli takuna yeyesi awezaye kuiturya."

Maono 7

¹Bada ya higa, náangirwa tsona, náona malaika ane chila mmwenga akaima pembe mwenga ya zira pembe nne za dunia. Nao kala anazuwiya phuto kula pembe zosi nne za dunia ili risipige kpwedza tsi kavu ama kuphiya baharini ama kusukuma muhi wowosi.

²Alafu nchiona malaika wanjina anapanda dzulu kula mlairo wa dzuwa akatsukula muhuri wa Mlungu ariye moyo. Wapigira kululu hara malaika ane ambao ka akahewa uwezo wa kubananga tsi kavu na bahari achianza,

³"Godzani! Msibanange tsi kavu, bahari wala mihi mpaka hutiyeye mola vilanguni mwa atumishi osi a Mlungu wehu."

⁴Badaye náambirwa isabu ya atu okala akatiywa mola wa Mlungu vilanguni. Nao osi kala ni laki mwenga elufu arubaini na nne, kula mbari zosi kumi na mbiri za Aiziraeli.

⁵Atu otiywa mola wa Mlungu kala ni elufu kumi na mbiri kula kpwa chila mbari. Nazo mbari zenye kala ni za Juda, Rubeni, Gadi,

⁶Asheri, Naftali, Manase,

⁷Simioni, Lawi, Isakari,

⁸Zabuloni, Yusufu na Benjamini.

⁹Bada ya hivyo, násupha matso na lola, nchiona umati mkpwulu wa atu ambao kala tautalika, atu a tsi zosi na chila kabila dunia ndzima, aimire mbere za chihi cha chifalume na ye Mwana-ng'ondzi. Nao kala akavwala kandzu nyereru na ka akagbwira makalala ga mitende.

¹⁰Achikala anapiga kululu kuno anaamba, "Wokofu ula kpwa Mlungu wehu asagalaye chihi cha chifalume, na kpwa Mwana-ng'ondzi."

¹¹Phahi malaika osi aima kuzunguluka hicho chihi cha chifalume. Hara azehe na vira viumbe vine achigbwa chimabumabu mbere za cho chihi achimuabudu Mlungu,

¹²achiamba, "Amina! Mlungu wehu naatogolwe, naahewe nguma. Mshukuruni, naakale na marifwa, naaishimiwe, tsona naakale na uwezo wosi na nguvu milele na milele. Amina!"

¹³Alafu mzehe mmwenga waniuza, "Hano atu achiovwala kandzu nyereru ni ano ani? Unaamanya alako?"

¹⁴Nami nchimuamba, "Bwana uwe ndiwe umanyaye." Naye achiniamba, "Hano ni atu ambao ashinda gara mateso makulu. Afula kandzu zao na mlatso wa yuya Mwana-ng'ondzi, na zichikala nyereru tse-tse-tse.

¹⁵Ndiyo mana a mbere za chihi cha chifalume cha Mlungu kumhumikira usiku na mutsi ndani ya Nyumba ya Kuvoya Mlungu. Naye Mlungu atawalaye andakala phamwenga nao na kuarinda.

¹⁶Nao taandakala na ndzala ama chiru tsona, wala taandapigbwa ni dzuwa kali ama kuphya na dzoho rorosi.

¹⁷Mana Mwana-ng'ondzi phara kahi-kahi ya chihi cha chifalume andakala mrisa wao. Andaalongoza osi kuphiya kuriko na pula za madzi ga uzima. Naye Mlungu andaafuta matsozi gao."

Maono 8

¹Phahi yuya Mwana-ng'ondzi wagandula hura ukaka wa sabaa, na hiko mlunguni kpwahurira zi-zi-zi kpwa muda wa nusu saa.

²Chisha nchiona hara malaika sabaa aimire mbere za Mlungu, na chila mmwenga achihewa gunda.

³Tsona nchiona malaika wanjina yekala akagbwira liga ra zahabu ra kufukizira ubani. Wakpwezaima mbere za chihi cha chifalume, phephi na phatu pha kulavira sadaka photengezwa na zahabu. Achihewa ubani munji alavye sadaka atsanganye na mavoyo ga atu osi a Mlungu.

⁴Ndipho hinyo mosi wa ubani phamwenga na gara mavoyo ga atu a Mlungu gafuka kula mkpwononi mwa yuya malaika, mpaka dzulu mbere za Mlungu.

⁵Badaye yuya malaika wahala makala ga moho kula phara phatu pha kulavira sadaka, achigatiya himo ligani na achigatsupha duniani. Alafu kuchikala na mngurumo wa chiguruguru na limeme, na dunia ichisumba.

⁶Chisha hara malaika sabaa ambao ka ana magunda sabaa adzitayarisha kupiga magunda gao.

⁷Yuya malaika wa kpwandza wapiga gundare, ndipho mvula ya mawe ga barafu, na moho kutsanganya na mlatso watsuphiwa duniani. Moho uchiocha seemu mwenga ya hahu ya dunia, uchibananga mihi na nyasi seemu hiyo.

⁸Naye malaika wa phiri wapiga gundare, na kpwatuluka utu dza mwango mkpwulu sana waakao moho. Watsuphiwa baharini, na seemu mwenga ya hahu ya bahari ichigaluka mlatso.

⁹Phahi viumbe vyosi seemu hiyo ya baharini vyafwa, na meli zokala seemu hiyo zichivundzika-vundzika.

¹⁰Malaika wa hahu naye wapiga gundare, na dzinyota dzikulu sana ragbwa kula mlunguni. Kala rinaaka dza chimwindi, naro ragbwerera seemu mwenga ya hahu ya myuho, pula za madzi na mwahali mosi murimokala na madzi.

¹¹Hiro dzinyota kala rinaihwa Utsungu, naro ragaluza seemu ya madzi gachikala utsungu. Phahi atu anji afwa kpwa sababu madzi kala ga utsungu.

¹²Naye malaika wa nne ariphopiga gundare, seemu ya dzuwa, ya mwezi na ya nyenyezi zapigbwa. Hizo seemu za dzuwa, mwezi na nyenyezi zopigbwa taziyaala. Hipho seemu ya mutsi yakosa mwanga na seemu ya usiku nayo ichikosa mwanga.

¹³Chisha nátsupha matso nchiona dzikozi rinauruka ko mainguni kuno rinarira rinaamba, "Shaka rani ro! Shaka rani ro! Shaka rani ro mwimwi mrio duniani! Mwimwi mndamanya enye wakati gara magunda mahahu gosala ndiphopigbwa. Nao nyo malaika a tayari kugapiga vi samb!"

Maono 9

¹Yuya malaika wa tsano wapiga gundare, nchiona nyenyezi ikagbwa duniani kula dzulu. Nayo kala ikahewa funguwo ivugulayo dibwa riinjiraro kuzimu.

²Ariphovugula hira kuzimu, mwatuluka dzimosi avi ni ra tanu kulu sana hata dzuwa na maingu vichikala tavioneka kpwa hura mosi.

- ³Alafu mo mosini mwatuluka ndzije achimwagikana duniani. Ahewa uwezo wa kupashira na kung'ata dza viratu visuse virivyo.
- ⁴Hinyo ndzije aambwa asiangamize nyasi wala mihi yoyosi. Kala ni atiye adabu atu ambao kala taana mola wa Mlungu mwao vilanguni.
- ⁵Hinyo ndzije ahewa uwezo wa kutesa atu kpwa miezi mitsano bahi, lakini asiaolage. Nao utsunguwe kala ni dza viratu utsungu wa kupashirwa ni chisuse.
- ⁶Siku hizo atu andaamba baha kufwa, ela taandafwa; andaaza chifo chedze chiahale, lakini chifo chindaachimbira.
- ⁷Hinyo ndzije kala a dza viratu farasi ario tayari kuphiya vihani. Mwao vitswani avwala vihunde dza virembe vya zahabu, na nyuso zao ka zikaigana na nyuso za anadamu.
- ⁸Nyere zao kala ni nyire dza za achetu, nago meno gao kala ni dza ga simba.
- ⁹Tsona vifuwani kala akavwala visibao vya chuma. Mapha gao chamba anauruka ganavuma dza viratu magari manji gavwehago ni farasi ambago ganaphiya vihani mairo.
- ¹⁰Na michira yao kala inapashira dza viratu visuse. Na hiyo michira kala ina sumu ya kulumiza atu miezi mitsano.
- ¹¹Mfalume wao kala ni malaika mkpwulu wa kuzimu. Hiye malaika Chiebrania aihwa Abadoni na Chigiriki anaihwa Apolioni, manage ni, "M'banangi."
- ¹²Shaka ra kpwandza rikasira, lakini manyani kukala bado kuna mashaka mairi garedza.
- ¹³Alafu yuya malaika wa sita wapiga gundare. Nchisikira sauti inagomba kula zira pembe nne za phatu pha kufukizira ubani. Phatu phapho kala phakatengezwa na zahabu na phachikala mbere za Mlungu.
- ¹⁴Hiyo sauti yagomba na hiye malaika wa sita yekala na gundare mkpwononi, ichiamba, "Avuguleni hinyo malaika ane ariofungbwa hiko muho mkpwulu wa Yufurati."
- ¹⁵Hinyo malaika ane avugulwa ili aolage seemu mwenga ya hahu ya atu osi duniani. Kala akaikpwa tayari kpwa wakati uho, saa hiyo na siku hiyo na mwezi hinyo hinyo na mwaka hinyo hinyo.
- ¹⁶Na kpwakpwedza majeshi manji apandao farasi, nchisikira kukala jumula yao kala ni milioni magana mairi.
- ¹⁷Pho wakati náonyeswa higo maono, hinyo okala anaphirika farasi kala akavwala visibao vya moho vifuwani, vya rangi ya kundu dododo, buluu na mandano. Nchiona vitswa vya hara farasi kala ni dza vitswa vya simba. Milomo yao kala inatuluka jimbi-jimbi ra moho, mosi na unga wa chibiriti.

¹⁸Seemu mwenga ya hahu ya anadamu aolagbwa ni gara mashaka mahahu gorehwa ni jimbi-jimbi ra moho, mosi na unga wa chibiriti kula kpwa milomo yao.

¹⁹Hara farasi, nguvu zao ka zi milomoni na piya michirani. Mana michira yao kala ni dza nyoka zenye vitswa vya kulumizira atu.

²⁰Anadamu ambao taayafwa na gara mashaka gopiga atu, taayatubu akaricha kuabudu sanamu arizositengeza enye. Kpwa hivyo taayaricha kuabudu pepho na sanamu arizotengeza na zahabu, feza, shaba, mawe na mbao. Na hata vitu vyosi vivi ni vitu ambavyo taviona, tavisikira wala tavinyendeka.

²¹Tsona taayatubu akaricha kuolagana, taayaricha utsai, kuricha udiya wala wivi.

Maono 10

¹Gariphosira higo, náona malaika wanjina wa uwezo anatsereera kula mlunguni. Hiye malaika kala akazungulukpwa ni ingu na dzulu ya chitswache kala phana likore. Usowe kala unang'ala dza dzuwa, na maguluge kala ni dza nguzo ziakazo moho.

²Kala ana chidzitabu mkpwononi ambacho ka chikafwenulwa. Waima chigulu chimwenga baharini na chanjina tsi kavu,

³achiiha na likululu avi ni simba anaye nguruma. Yuya malaika ariphoiha, chiguruguru chajibu kpwa kubanda mara sabaa.

⁴Chiguruguru chiriphajibu, kala nataka kuandika gara chigogombwa ni chiguruguru, lakini kuchituluka sauti kula mlunguni ichiamba, "Higo maneno ga chiguruguru usigaandike, ni siri!"

⁵Chisha yuya malaika ambaye kala akaima chigulu chimwenga baharini na chanjina tsi kavu achigolosa mkpwonowe wa kulume dzulu mlunguni.

⁶Walapha kpwa dzina ra Mlungu aishiye milele na ambaye waumba dzulu mlunguni, duniani, baharini na viumbe vyosi virivyo ndani yao. Achiamba, "Wakati wa kugodzera ukasira.

⁷Lakini hiye malaika wa sabaa ndiphopiga gundare, Mlungu andakamilisha mpangowe wa siri sawa na viratu arivyoatangazira atumishie, ambao ni manabii."

⁸Alafu hira sauti kula mlunguni yaniha tsona, ichiniamba, "Phiya ukahale chira chidzitabu chofwenulwa. Chidzitabu hicho undachiphaha mkpwononi mwa yuya malaika aimireye chigulu chimwenga baharini na chanjina tsi kavu."

⁹Phahi náphiya na nchendamuamba aniphe chira chidzitabu, naye achiamba, "Hichi! Hala urye. Mwako mromoni chindakala mtswano dza asali, lakini mo ndanini chindakala utsungu."

¹⁰Náchihala chira chidzitabu kula mkpwononi mwa yuya malaika na nchichirya. Kala chimtswano dza asali, ela nrphochimiza himo ndanini chakala utsungu.

¹¹Chisha nchiambwa, "N'lazima utabiri tsona kuhusu atu a tsi nyinji na makabila manji, na kuhusu afalume ao."

Maono 11

¹Ndipho náhewa mwandzi chikale chigongo cha kupimira, nchiambwa, "Phiya ukapime Nyumba ya Kuvoya Mlungu na phatu pha kulavira sadaka, na utale atu osi aabuduo himo.

²Ela usipime muhala wa hiyo Nyumba ya Kuvoya Mlungu, mana hinyo muhala warichirwa atu asiojali Mlungu. Nao andavyoga-vyoga mudzi wa Mlungu miezi arubaini na miiri,

³yani muda wa siku elufu mwenga magana mairi na sitini. Na kundakpwedza mashahidi angu airi ambao n'ndaapha uwezo wa kutabiri siku hizo zosi kuno anasononeka kpwa sababu ya mudzi wa Mlungu kubanangbwa."

⁴Hinyo mashahidi airi ni mizeituni miiri na vyombo viiri vya kuikira taa, ambazo nkukala mbere za Bwana Mlungu atawalaye dunia.

⁵Mutu yeyesi achitaka kualumiza andaolagbwa ni moho ulao mwao miromoni. Mutu dza hiye, n'lazima aolagbwe dza hivyo.

⁶Hara mashahidi airi ana uwezo wa kuzuwiya mvula isinye wakati anatabiri. Na wakati wowosi ndiotaka, anaweza kugaluzza madzi kukala mlatso na kureha mashaka ga aina yoyosi himu duniani.

⁷Ela hinyo mashahidi achimala kutangaza ujumbe wa Mlungu, hiro dzinyama ripandaro kula kuzimu, rindapigana nao na riashinde tsona riaolage.

⁸Na hizo maiti zao zindarichwa barabara ya mudzi mkpwulu, ambako Bwana wao wakotwa misumari msalabani. Na mudzi hinyo kpwa chiroho ni dza mudzi wa Sodom na tsi ya Misiri.

⁹Atu a tsi zosi na chila kabila dunia ndzima andalola hizo maiti za hara mashahidi airi siku tahu na nusu. Takuna mutu ndiyeruhusiwa kuazika hara mashahidi.

¹⁰Kpwa sababu ya aho mashahidi kufwa, atu osi duniani andahererwa na ahende karamu na kuphana zawadi. Andahenda hivi mana hara mashahidi ayuga sana atu asiomkuluphira Mlungu himu duniani.

¹¹Lakini bada ya hizo siku tahu na nusu, Mlungu achiavuvurira pumuzi za uhai nao achikala moyo, na osi arioaona atishirwa sana.

¹²Badaye hinyo mashahidi airi asikira likululu kula mlunguni rinaamba, "Ndzoni hiku dzulu!" Phahi achiuruka kuphiya mlunguni ndani ya ingu kuno maadui gao analola.

¹³Saa iyo-iyo dunia ichisumba sana hata ichibananga seemu mwenga ya kumi ya mudzi wosi. Atu elufu sabaa achifwa, na anjina osi ariosala achitishirwa na achimtogola Mlungu akalaye dzulu mlunguni.

¹⁴Phahi hiro shaka ra phiri richikala rikasira! Ela vi sambu bado ra hahu ambaro naro tarikure.

¹⁵Phahi yuya malaika wa sabaa wapiga gundare. Alafu násikira sauti za likululu hiko mlunguni, ambazo ka zinaamba, "Uwezo wa kutawala dunia ukahalwa ni Bwana Mlungu wehu na hiye Ariyetsambula Kuokola Atu. Naye andatawala milele na milele."

¹⁶Phahi hara azehe ishirini na ane, ambao ka asegere mwao vihini mbere za Mlungu, agbwa chimabumabu achimuabudu Mlungu

¹⁷na kuno anaamba, "Mwenyezi Mlungu wa uwezo wosi, uriyekalako hangu mwandzo na hata vivi u kuko, hunakushukuru mana ukahumira uwezoo mkpwulu na sambu unatawala.

¹⁸Atu asiokujali akuzira, nawe wakati wa kuriphiza ukafika. Sambu ni wakati wa atu a kufwa ahukumawe. Ndio wakati wa kuuatua atumishio manabii, na atuosi ariokuogopa, ario na vyeo na asiokala na vyeo. Na ndio wakati wa kubananga atuosi ambao abananga dunia."

¹⁹Alafu mryango wa kuinjirira Nyumba ya Kuvoya Mlungu wavugulwa, na Sanduku ra Chilagane kala ri mumo. Nchiona limeme na nchisikira mngurumo wa chiguruguru. Dunia yasumba na kuchikala na mvula ya mawe makulu ga barafu.

Maono 12

¹Phahi hiko mlunguni kpwatuluka chiline cha kpwaangalaza. Kuko kala kuna mchetu ambaye kala akavwala dzuwa, nao mwezi kala u tsini ya maguluge. Piya kala akavwala chiremba cha chifalume cha nyenyezi kumi na mbiri.

²Mchetu hiye kala akaandzwa ni ndani ya uvyazi hata achikala anarira kpwa utsungu.

³Badaye ko mlunguni kuchituluka chiline chanjina cha kpwaangalaza. Náona dzoka kulu ra rangi ya kundu, na richikala na vitswa sabaa, pembe kumi, na chila chitswa chichikala na chiremba.

⁴Ro dzoka kpwa kuzungulusa mchirawe, raphyera seemu mwenga ya hahu ya nyenyezi richizitsupha duniani. Richidziimisa mbere za yuya mchetu yekala a phephi kudzivugula ili rimurye ye mwana achivyulwa.

⁵Phahi yuya mchetu wadzivugula mwana mlume ambaye kala andatawala mataifa gosi ga dunia na uwezo mkpwulu. Ela ye mwanawe wavwatulwa achiphirikpwa kpwa Mlungu yekala akasagarira chihiche cha chifalume.

⁶Yuya mchetu wachimbirira weruni ambako Mlungu kala akamtengezera phatu ili atundzwe siku elufu mwenga magana mairi na sitini.

⁷Chisha kuchizuka viha kuko mlunguni. Malaika mkpwulu aihwaye Mikaeli na malaikae apigana na ro dzoka na malaikae.

⁸Ela ro dzoka na malaikae ashindwa na achikala taana nafwasi tsona hiko mlunguni.

⁹Kpwa hivyo riro dzoka richitsuphiwa duniani. Naro ndiro rira dzoka ra kare riihwaro Ibilisi au Shetani richengaro atu osi ahende dambi. Richitsuphiwa duniani phamwenga na malaikae.

¹⁰Chisha nchisikira sauti kulu kula mlunguni yoamba, "Vivi Mlungu wehu andaokola atue. Andahumira uwezowe kutawala dza mfalume! Naye hiye Muokoli andaonyesa uwezowe phapha duniani, kpwa sababu hiye Shetani ariyekala mbere za Mlungu kushitaki atumishi ayawehu usiku na mutsi vivi sambu wazolwa hiko mlunguni.

¹¹Kpwa sababu ya milatso ya Mwana-ng'ondzi yomwagbwa na ushahidi wao ariolavya, aho aweza kumshinda Shetani. Mana akala tayari kufwa kpwa sababu ya kumkuluphira Jesu.

¹²Kpwa hivyo hererwani, mwimwi mosi muishio hiko dzulu mlunguni! Ela shaka hiro dunia na bahari mana Shetani akatsuphiwa kuko tsini mriko. Vivi akatsukirwa sana, sababu akamanya kukala sikuze chizosala ni chache."

¹³Ro dzoka ririphoona rikatsuphiwa duniani, ramwindza yuya mchetu yekala akadzivugula mwana wa chilume.

¹⁴Lakini Mlungu wamupha yuya mchetu mapha mairi dza ga dzikozi, ili aurukire kuphiya ko weruni kpwatu ambako Mlungu kala akamtengezera, akakale kure na dzoka. Kuko kala andatundzwa kpwa zo siku elufu mwenga magana mairi na sitini.

¹⁵Ro dzoka richilavya madzi manji dza muho kula mwakpwe kanwani ili gamhale yuya mchetu na kumuhosa. Gara madzi gachimlunga-lunga,

¹⁶lakini tsi ichimterya ye mchetu. Tsi yakatika nyari na madzi gosi kula kanwani mwa rira dzoka gachiinjira mo ndani.

¹⁷Higo gahenda rira dzoka rimzire yuya mchetu na richendapigana na ana anjina a yuya mchetu osala. Atu aho ni aratu alungao shariya za Mlungu na kushuhudiya kuhusu Jesu.

¹⁸Chisha ro dzoka richiima kanda-kanda ya bahari.

Maono 13

- ¹Chisha nchiona dzinyama rinatuluka kula baharini. Naro kala rina vitswa sabaa na pembe kumi, na chila pembe kala ikavwikipwa chiremba. Na dzulu ya chila chitswa kala chikaandikpwa dzina ra kumkufuru Mlungu.
- ²Dzinyama hiro roriona kala rikaigana na tsui, ela maguluge kala ni dza ga dubu na mlomowe kala ni dza wa simba. Naro dzoka richiripha rira dzinyama nguvuze, chihi cha ufalumewe na uwezo munji.
- ³Chitswa chimwenga chaonekana avi china chironda cha chirema, ela chichikala chikaphola hata ni kuphyu. Nao atu osi duniani achilunga rira dzinyama kpwa kuangalala.
- ⁴Atu aabudu ro dzoka kpwa vira kala rikaripha rira dzinyama uwezowe wa kutawala. Tsona achiabudu ro dzinyama kuno anaamba, "Taphana ariye na uwezo dza ro dzinyama, wala taphana awezaye kurishinda."
- ⁵Ro dzinyama richihewa ruhusa ya kudzitogola na kugomba maneno ga kumkufuru Mlungu. Richihewa uwezo wa kutawala miezi arubaini na miiri.
- ⁶Ndipho ro dzinyama richiandza kumkufuru Mlungu kpwa kuifya dzinare na ko kpwakpwe mlunguni akalako, yani osi amuabuduo kuko.
- ⁷Richihewa ruhusa ya kupigana na atu a Mlungu na kuashinda. Piya richihewa uwezo wa kutawala atu a tsi zosi na chila kabila dunia ndzima.
- ⁸Atu osi dunia ndzima andaabudu ro dzinyama, yani osi ambao madzina gao tagayaandikpwa chitabu cha uzima kabla ya dunia kuumbwa. Chitabu hicho kala ni cha ye Mwana-ng'ondzi ariyeolagbwa.
- ⁹Phahi ariye na masikiro naasikire.
- ¹⁰Mutu yeyesi yepangirwa kahalwa mateka, n'lazima akale mateka. Na yepangirwa kuolagbwa na upanga, n'lazima aolagbwe na upanga. Phahi atu a Mlungu analondwa avumirire na kudina kukuluphira wakati wa mateso dza hinyu.
- ¹¹Chisha náona dzinyamaranjina rotsembuka kula mtsangani. Dzinyama riro kala rina pembe mbiri avi ni za Mwana-ng'ondzi, ela kala rinagomba na sauti dza ya rira dzoka.
- ¹²Dzinyama riri naro rahumira uwezo wosi wa rira dzinyama rotuluka kula baharini, na richihumira hinyo uwezo kpwa sababuye. Riro dzinyama rola mtsangani ralazimisha dunia yosi na atu osi aishio mumo aabudu ro dzinyama ra kpwandza rokala na chironda cha chirema chirichophola.
- ¹³Ro dzinyama ra phiri rahenda vilinje vya ajabu, hata kuhenda moho ugbwe kula mlunguni hadi duniani na chila mutu achiona.
- ¹⁴Na kpwa vira rahewa uwezo wa kuhenda vilinje kpwa ajili ya rira dzinyama ra kpwandza, rachenga atu osi aishio duniani. Raambira atu atsonge sanamu kpwa

kuishimu rira dzinyama ra kpwandza rolumizwa na upanga, ela richienderera kuishi.

¹⁵Ro dzinyama ra phiri rahewa uwezo wa kuvuvurira pumuzi za uzima yo sanamu ili ipate kugomba. Na yo sanamu yalagiza atu osi ariorema kuiabudu aolagbwe.

¹⁶Piya ralazimisha atu osi, ario na vyeo na asiokala na vyeo, matajiri na achiya, ario huru na atumwa, atiwe mola mikono ya kulume ama vilanguni.

¹⁷Mana mutu bila ya kutiywa mola kandaweza kugula ama kuguza. Mola uhu ni dzina ra ro dzinyama, ama ni jumula ya harufu zosi za dzinare.

¹⁸Kpwa hivyo dzambo riri rinataka marifwa galago kpwa Mlungu ndipho mutu amanye higa. Mutu ariye na marifwa naatale isabu ya dzinyama riro, sababu ni isabu ya chibinadamu. Isabuye ni magana sita sitini na sita.

Maono 14

¹Chisha nátsupha matso nchiona Mwana-ng'ondzi aimire dzulu ya Mwango wa Sayuni phamwenga na atu laki mwenga elufu arubaini na nne. Aho kala akaandikpwa dzina ra Mwana-ng'ondzi na ra Ise vilanguni.

²Nchisikira sauti kula mlunguni ambayo yavuma dza madzi manji gajerago na nguvu maweni, na yakala kulu dza ya chiguruguru. Tsona yo sauti yasikirika dza atu apigao ngephephe.

³Aho atu laki mwenga elufu arubaini na nne kala aimire mbere za chihi cha chifalume, na mbere za viratu viumbe vine vyokala moyo na aratu azehe. Kala anaimba wira muphya, na taphana mutu wanjina yeweza kudzifundza wira hinyo isiphokala aratu atu ariokombolwa kula duniani.

⁴Atu aha ni aratu alungao Mwana-ng'ondzi kokosi aphyako, na ni atu ambao kala taadzangbwedzitiya najisi kpwa kuonana chimwiri na achetu. Atu aho akombolwa kula kpwa anadamu, nao achilaviwa kama sadaka ya mavuno ga mwandzo kpwa Mlungu na Mwana-ng'ondzi.

⁵Nao taayagomba handzo, wala taana lawama yoyosi.

⁶Chisha nchiona malaika wanjina anauruka ko mainguni. Malaika hiye kala ana ujumbe mnono wa milele kuambira atu akalao duniani, atu a tsi zosi na chila kabila dunia ndzima.

⁷Phahi hiye malaika wakota likululu achiamba, "Muogopheni Mlungu na kumtogola iye, mana wakatiwe wa kuhukumu atu ukafika. Piya muabuduni iye yeumba mlunguni, tsi, bahari, na pula za madzi."

⁸Chisha phakpwedza malaika wa phiri yelungana na wa kpwandza. Achiamba, "Mudzi mkpwulu wa Babeli ukagbwa tse! Mudzi uriohenda atu a makabila gosi duniani anwe chikombe cha uchi mufu wa udiyawe, ukagbwa."

⁹Chisha phachitsembuka malaika wa hahu yelungana na hara anjina. Naye piya wakota likululu, achiamba, "Atu osi ndioabudu ro dzinyama na sanamuye, na kutiwa mola vilanguni ama mikononi,

¹⁰andatiywa adabu ni Mlungu. Adabu hiyo indakala kali dza uchi mufu ambao taukabiganywa, na Mlungu mwenye andajerera ndani ya chikombe cha tsukizize aunwe. Mlungu andaatiya hinyo atu ndani ya moho mkali sana, ili ateswe mbere za malaika atakatifu na mbere za Mwana-ng'ondzi.

¹¹Na moho ndiotiwa, mosiwe undafuka kuphiya mlunguni milele. Hinyo atu aabuduo ro dzinyama na sanamuye, yani ario na mola wa dzinare, andachesa na kusinda bila ya kuoya."

¹²Kpwa hivyo, atu a Mlungu alungao malagizoge na kumkuluphira Jesu, avumirire na adinise kumkuluphira.

¹³Nchisikira sauti kula mlunguni yogomba ichiamba, "Andika higa: Kuandzira vivi sambu, atu osi andaajaliwa afwao kuno anamkuluphira Jesu." Chisha Roho wa Mlungu achiamba, "Ehe, andajaliwa sana. Bada ya kazi yao ngumu andapata kuoya, mana andatuzwa kpwa mahendo gao manono."

¹⁴Náunula uso kulola dzulu, nchiona ingu dzereru. Dzulu ya ro ingu kala phasegere mutu, "dza Mutu Yela Mlunguni." Mutu hiye kala akavwala chiremba cha chifalume chotengezwa na zahabu, na mkpwononi kala akagbwira rumu ra kurya sana.

¹⁵Na phachituluka malaika kula Nyumba ya Kuvoya Mlungu. Naye achedzakota likululu kumuambira yuya kala asegere dzulu-dzulu ya ingu, "Mavuno ga dunia ga tayari na wakati wa kuvuna ukafika, kpwa hivyo andza kuvuna na ro rumuro."

¹⁶Phahi ye mutu kala asegere inguni achiandza kuvuna, na dunia yosi ichivunwa.

¹⁷Gago gariphotsapa nchiona malaika wanjina anatuluka kula Nyumba ya Kuvoya Mlungu ko mlunguni. Naye piya kala akagbwira rumu ra kurya sana.

¹⁸Badaye kuchitsembuka malaika wanjina. Malaika hiye watuluka kula phatu pha kufukizira ubani, naye kala anaimirira moho. Achikota likululu kumuiha yuya malaika yekala akagbwira rumu ra kurya achimuamba, "Humira ro rumuro kuvuna zabibu zosi dunia ndzima, mana zaivwa."

¹⁹Phahi hiye malaika waandza kuvuna zo zabibu za dunia na rumure, achizitiya ndani ya phatu phapana pha kuziminyira. Higa ganaonyesa tsukizi za Mlungu.

²⁰Zabibu zizo zaminywa phatu phokala kondze ya nyo mudzi mkpwulu. Zabibu ziriphokala zinaminywa zatuluka milatso, na milatso iyo ichikala muho ambao urewe kala ni kilomita magana mahahu na uchikala na china cha mita mwenga na nusu.

Maono 15

¹Higa gariphosira, náunula uso nchiona chilinje chanjina cha kutisha tsona cha kpwaangalaza. Nchiona malaika sabaa anareha mashaka sabaa ga mwisho, ambago kala gandamarigiza tsukizi za Mlungu.

²Na nchiona utu ambao kala ni dza bahari ya chilolo yotsanganywa na moho. Na phapho kanda-kanda phachikala phaimire hara atu ambao kala akashinda rira dzinyama, sanamuye, phamwenga na isabu ya dzinare. Atu aha kala akagbwira ngephephe mwao mikononi ambazo kala akahewa ni Mlungu ili amuabudu.

³Nao achiimba wira wa Mwana-ng'ondzi na Musa mtumishi wa Mlungu, uambao: "Mwenyezi Mlungu wa uwezo wosi, mahendogo ni makulu na ga ajabu. Uwe ndiwe Mfalume wa makabila gosi duniani, na njirazo ni za haki na za kpweli.

⁴Bwana Mlungu, ni ani asiyekuogopa na kutogola dzinaro? Uwe macheyo ndiwe mtakatifu, na atu a makabila gosi andakpwedza kpwako kukuabudu, mana mahendogo ga haki ganaonekana wazi."

⁵Bada ya hipho nálola dzulu mlunguni nchiona Nyumba ya Kuvoya Mlungu i wazi, yani hema ambaro kala ni ushahidi kama Mlungu a kuko.

⁶Nao hara malaika sabaa ariokala anareha mashaka sabaa atuluka kula mumo. Malaika aho kala akavwala nguwo nono za kung'ala-ng'ala zisizo na dow, na kala akadzifunga mikanda mipana yotengezwa na zahabu mwao vifuwani.

⁷Mmwenga wa hara viumbe vine waapha chila mmwenga wa hara malaika sabaa liga ra zahabu roodzala tsukizi za Mlungu aishiye hata milele.

⁸Mo ndani Mlungu achifwinika mosi kuonyesa utukufuwe na uwezowe. Kpwa hivyo takuna ariyeweza kuinjira Nyumba ya Kuvoya Mlungu tsona hadi mashaka go sabaa ga hara malaika gariphokamilika.

Maono 16

¹Kula mo Nyumba ya Kuvoya Mlungu násikira sauti kulu ichiambira hara malaika sabaa, "Hizo tsukizi za Mlungu zirizo ndani ya mbiga sabaa, phiyani mkazimwage duniani."

²Yuya malaika wa kpwandza wahenda viratu arivyolagizwa. Waphiya achendamwaga zo tsukizi za Mlungu zokala ndani ya ligare. Phapho hipho kare, atu osi ariokala na mola na kuabudu sanamu ya ro dzinyama agbwirwa ni virona vyokala vinatuluzwa ufira na kuluma sana.

³Chisha malaika wa phiri naye achendamwaga baharini tsukizi zirizokala mwakpwe ligani, nago madzi gachigaluka pi-pi-pi dza milatso ya mutu wa kufwa. Navyo viumbe vyosi vyokala mo baharini vichifwa.

⁴Malaika wa hahu naye wamwaga tsukizi zirizokala mwakpwe ligani myuhoni, pula za madzi na mwahali mosi murimokala na madzi, nago madzi gosi gachigaluka milatso.

- ⁵Phapho násikira malaika aimiriraye madzi anaamba, "Mlungu Mtakatifu uriyekalako na uriyeko vivi, uwe ndiwe haki, na hizi hukumuzo ni za haki.
- ⁶Mana atu ayi amwaga mlatso wa atuo na manabiigo, nawe Bwana undaapha milatso anwe. Hivyo ndiyo adabu anayofwaha kuphaha."
- ⁷Bada ya higa kusira, phapho phatu pha kufukizira ubani phatuluka sauti ichikubali ichiamba, "Ehe, Bwana Mlungu Mwenyezi, hukumuzo ni za haki na za kpweli."
- ⁸Malaika wa nne wamwagira dzuwa zo tsukizi za Mlungu zokala mwakpwe ligani. Naro dzuwa richihewa uwezo wa kuocha atu
- ⁹nao aochwa ni hura moho mkali. Atu amulani Mlungu mana ndiye yekala na uwezo wa go mashaka, ela taayatubu na kuricha dambi zao, wala taayamtogola Mlungu.
- ¹⁰Malaika wa tsano naye wakpwendamwaga tsukizi za Mlungu zokala mwakpwe ligani phenye chihi cha chifalume cha rira dzinyama. Mara mwenga jiza richibwiningiza ufalume wa rira dzinyama na atu achigbwa photsi na kugala-gala kpwa utsungu.
- ¹¹Nao achimulani Mwenyezi Mlungu kpwa hura utsungu na vira vironda arivyokala navyo, ela hata vivyo taayatubu mahendo gao mai.
- ¹²Malaika wa sita naye wamwaga tsukizi za Mlungu zokala mwakpwe ligani muho mkpwulu wa Yufurati. Nago madzige gachiuma, kutengezera afalume kula mlairiro wa dzuwa njira.
- ¹³Chisha nchiona pepho ahahu ambao kala ni dza magula. Nago gatuluka mwenga kula mlomo wa ro dzoka, ranjina kula mlomo wa ro dzinyama, na ranjina kula mlomo wa ye nabii wa handzo.
- ¹⁴Pepho aha kala ana uwezo wa kuhenda vilinje, na kazi zao ni kuphiya kpwa chila mfalume duniani kuakusanya phamwenga, ili arehe kondo siku hiyo kulu ya Mwenyezi Mlungu.
- ¹⁵⁻¹⁶Phahi hara pepho akusanya afalume osi na majeshi gao phahali ambapho Chiebrania phanaihwa Arimagedoni. Bwana Jesu anaamba, "Sikizani, mimi n'ndakpwedza dza viratu muivi edzavyo bila ya kusema. Ela waajaliwa iye achesaye matso kuika nguwoze tayari ili asedze akanyendeka chihuphu na kuphaha waibu."
- ¹⁷Chisha malaika wa sabaa naye achimwaga tsukizi za Mlungu zirizokala mwakpwe ligani, hewani. Nami nchisikira sauti yogomba likululu kula chihi cha chifalume cha hiyo Nyumba ya Kuvoya Mlungu, inaamba, "Gosi gakasira."
- ¹⁸Tsona kpwakala na limeme, na mngurumo wa chiguruguru, na dunia ichisumba sana. Msumbo mkpwulu dza hinyo taudzangbweonekana hangu mwanadamu aumbwe.

¹⁹Ndipho mudzi mkpwulu wa Babeli uchiganyika seemu tahu na midzi mikulu ya mataifa ichibanangbwa-banangbwa yosi. Naye Mlungu kayayala kutiya adabu nyo mudzi wa Babeli. Mana waulazimisha ugbwabire chikombe cha uchi mufu wa tsukizize.

²⁰Tsi iriphosumba chila chisiwa chichiangamika na chila mwango tauyaonekana tsona.

²¹Mawe makulu ga barafu, gokala gana kilo hamsini chila mwenga, gagbwerera atu kula mlunguni. Atu achimulani Mlungu kpwa sababu ya shaka hiro ra mvula ya mawe ga barafu, mana kala ni pigo kulu sana.

Maono 17

¹Mmwenga wa hara malaika sabaa ariokala na zira mbiga wakpwedza kpwangu achedzaniamba, "Ndzoo nikuonyese yo adabu ndiyohewa yuya mdiya mkpwulu ariyesagarira madzi manji.

²Afalume a dunia azinga naye, na atu a dunia nao akala akaayuswa ni nyo udiyawe dza mutu achiyelewa uchi."

³Phahi Roho wa Mlungu wanitsererera, naye malaika achinilongoza hadi ko weruni. Nriphofika hiko náona mchetu asegere dzulu ya dzinyama ra rangi ya kundu. Naro kala rina vitswa sabaa na pembe kumi, tsona kala rikaodzala madzina manji ga kumkufuru Mlungu.

⁴Mchetu hiye kala akavwala nguwo za rangi ya zambarau na rangi ya kundu. Tsona kala akadzipamba na lulu na zahabu na vingojo-ngojo vya gali sana. Mwakpwe mkpwononi kala akagbwira chikombe cha zahabu ambacho kala chikaodzala vitu vikolo vya nyo udiyawe.

⁵Na phakpwe chilanguni kala phakaandikpwa dzina ambaro manage kala ikafwitsika. Dzina renye ni hiri: Mudzi Mkwulu wa Babeli Mayo wa Adiya Osi na wa Vitu Vikolo hipha Duniani.

⁶Chisha nchimuona ye mchetu akalewa kpwa kunwa milatso ya atu a Mlungu; atu ambao aolagbwa kpwa sababu ya kushuhudiya kuhusu Jesu. Nami nriphomuona náangalala sana.

⁷Ela ye malaika achiniuza, "Kpwa utu wani ukaangalala? Godzera nikuambire siri ya yuya mchetu na ya ro dzinyama achiropanda ririro na vitswa sabaa na pembe kumi.

⁸Ro dzinyama uchiroriona kala rinaishi lakini vivi rafwa. Vivi ro dzinyama ri phephi na kutuluka kula kuzimu, ela Mlungu andariangamiza. Na atu osi duniani ambao madzina gao tagayaandikpwa ndani ya chitabu cha uzima kabla ya kuumbwa dunia, andaangalala kuona ro dzinyama mana rakalako, vivi taripho ela rindauya.

⁹Dzambo hiri rinataka marifwa ndipho mutu arielewe. Mana vitswa sabaa ni sawa na myango sabaa ambayo ye mchetu kala akasagarira. Piya vyo vitswa sabaa ni sawa na afalume sabaa,

¹⁰ambao atsano afwa, mmwenga anatawala, naye wanjina bado andatawala. Iye ndiphokpwedza, Mlungu wapanga kare kukala andatawala kpwa muda mchache tu.

¹¹Na ro dzinyama rokala rinaishi ela richifwa, ni mmwengawapho wa hara afalume sabaa na rorenye ni mfalume wa nane. Naro piya Mlungu andariangamiza.

¹²Zira pembe kumi uchizoziona ni afalume kumi ambao taadzangbwetawala, nao osi andahewa uwezo wa kutawala phamwenga na ro dzinyama, ela kpwa muda wa dzisaa dzimwenga bahi.

¹³Nyo afalume kumi andakala na lengo mwenga, ra kupha ro dzinyama vyeo vyao na uwezo wao wosi.

¹⁴Andaungana narokupigana viha na Mwana-ng'ondzi. Ela Mwana-ng'ondzi na atue andaashinda mana iye ni Bwana wa mabwana na Mfalume wa afalume. Nao atue ni hara arioihwa na kutsambulwa ni Mlungu, nao ni aaminifu."

¹⁵Malaika wagomba nami tsona, achiamba, "Gara madzi manji urigogaona pho phasegerepho yuya mchetu mdiya, ni makundi ga atu a chila kabila dunia ndzima.

¹⁶Hizo pembe kumi uchizoziona na ro dzinyama andamreyera yuya mchetu mdiya. Chisha andahala chila chitu aricho nacho na amriche chihuphu. Andamurya, na masaza ga nyamazeyandagatsupha mohoni.

¹⁷Mlungu mwenye ndiye ariyehenda akale na lengo mwenga ra kupha ro dzinyama uwezo wao wa kutawala ariokala nao. Aho andahenda hivyo mpaka gara Mlungu arigogomba gatimie.

¹⁸Na iye mchetu uchiyemuona ni nyo mudzi mkpwulu utawalao afalume osi a dunia."

Maono 18

¹Mambo higo gariphosira, náunula uso nchiona malaika wanjina ariye na uwezo mkpwulu anaterera kula mlunguni. Naye kala anang'ala na hinyo mwangawe kala unaing'arira dunia yosi.

²Naye achigomba na raka ra dzulu, achiamba, "Mudzi mkpwulu wa Babeli ukagbwa, nyo mudzi mkpwulu he, ukagbwa! Mudzi hinyo vivi ukakala mwamdzifwitso wa chila aina ya mashetani na pepho. Piya ukakala phahali pha chila aina ya nyama a mapha achafu asiolondwa ni atu.

- ³Mana atu a makabila gosi anwa uchi mufu wa tamaa za udiyawe, na afalume a dunia akala akazinga naye. Na ahendadzi-bishara hipha duniani atajirika kpwa tamaaze mbii zisizo na miphaka.”
- ⁴Chisha nchisikira sauti yanjina kula mlunguni, yoamba, "Atu angu, tulukani hiko kpwakpwe msedze mkagbwirana naye kuhenda dambize. Mana mchituluka tamndatiywa adabu naye.
- ⁵Mana dambize zakala tsumbi hata zikafika mlunguni, naye Mlungu a tayari kumtiya adabu kpwa mahendoge mai.
- ⁶Vivyo arivyoahendera anjina, namwi mhendereni vivyo. Tsona naahenderwe kano mbiri ya gara mai arigoahendera anjina. Halani cho chikombeche mumtiire mara mbiri ya nyo ukali ariokutiyani.
- ⁷Iye mtiyeni adabu na mumtese chiasi chicho arichohumira kudzipha nguma na utajiri. Kpwani iye anadziamba chimoyo-moyo, 'Nisegere kutawala dza malikia, wala simi gungu, sindarira tse mana sindafwererwa.'
- ⁸Phahi andaphaha mashaka gosi siku mwenga tu, mashaka ga chifo, ga chiriro na ga ndzala. Andatsomwa na moho, mana Bwana Mlungu ahukumuye ndiye wa uwezo wosi.”
- ⁹Na aho afalume a dunia ariozinga naye na kushiriki utajiriwe, andarira na kuusononekera nyo mudzi ndiphoona unafuka mosi.
- ¹⁰Aho afalume andaima kure na nyo mudzi kpwa kuogopha go mateso. Nao andarira aambe, "Shaka rani ro, shaka rani ro, uwe mudzi mkpwulu, Babeli, mudzi urio na nguvu! Mana hukumuyo ikakufikira nawe kutiywa adabu muda wa dzisaa dzimwenga bahi.”
- ¹¹Ahendadzi-bishara andamririra, kpwa sababu takuna atu a kugula miyo yao.
- ¹²Takuna mutu tsona wa kugula miyo yao ya zahabu, feza, lulu wala mawe ga samani. Takuna agulaye nguwo za zambarau, za kundu na za hariri. Tsona takuna agulaye udi, wala vitu vya aina yoyosi vitengezwavyo na pembe za ndzovu, vya mbao za gali, wala vya shaba, chuma ama marumaru.
- ¹³Takuna agulaye mdalasini, iliki, mavumba, manemane ama ubani, wala uchi, mafuha ga kujitira, unga safi, na nganu. Tsona takuna agulaye ng'ombe, mang'ondzi, farasi, magari ga kuvwehwa ni farasi, na atumwa. Kpwa kpweli, atue kala anahenda bishara ya anadamu ayawao.
- ¹⁴Phahi aho ahendadzi-bishara andaamba, "Ehe Babeli! Vi phaphi vyo vitu urivyokala unavimendza sana, vitu vyosi vya gali na vinono vyokuhenda uishito? Tavipho wala kundaviphaha tsona milele.”
- ¹⁵Hara atu ariophaha utajiri kpwa kuhenda bishara na nyo mudzi, andaima kure kpwa kuogopha go mateso. Andasononeka kuno anarira likululu.

¹⁶Nao andaamba, "Shaka rani ro, shaka rani ro, nyo mudzi mkpwulu, Babeli, mudzi ambao kala uchidzivwika nguwo za gali sana na kudzipamba na zahabu, mawe ga samani na lulu.

¹⁷Ela nyo utajiri wosi ukaangamizwa kpwa dzisaa dzimwenga bahi." Akulu a meli, acharo, mabahariya, na osi ahendao kazi melini, andaima kure.

¹⁸Na ariphoona mosi kpwa mudzi unaphya, arira likululu achiamba, "Takuna mudzi mkpwulu wanjina dza huno!"

¹⁹Atu aha arira kusunoneka sana hata achidzimwagira mitsanga ya vitswa na kuamba, "Shaka rani ro mudzi mkpwulu! Kala ni mudzi ambao wauhenda hosi hurio na meli hukale matajiri kpwa sababu ya utajiriwe. Lakini mudzi wosi ukaphya kpwa dzisaa dzimwenga bahi."

²⁰Hererwani mwimwi muishio ko mlunguni, atu a Mlungu, mitume na manabii, mana Mlungu akauhukumu hinyo mudzi kpwa sababu yenu.

²¹Chisha phachituluka malaika wa mkpwotse, achitsola dziwe dza lala kulu, achiritsupha mo baharini, achiamba, "Hinyo mudzi mkpwulu wa Babeli undatserera ugbwe na msindo dza vivi, na taundaonekana tsona.

²²Na himo mudzini sauti za atu kuimba, na kupiga ngephephe, ndzumari, vivoti na magunda, tazindasikirika tsona bii! Wala takundakala na fundi wa aina yoyosi, wala takundasikirika lala rinasaga tsona bii!

²³Phapho taphandaaka taa tsona. Wala takundakala na sheree za bwana arusi wala bibi arusi, yani takundalólwana tsona bii. Mudzi wa Babeli undahendwa hivi kpwa kukala ahendadzi-bishara himo akala atu akulu na abaya a dunia. Na sababu ya atu hinyo kukala matajiri ni sababu mataifa gosi gachengbwa ni utsai wa nyo mudzi.

²⁴Mumo mudzini mwaonewa milatso ya manabii na atu anjina a Mlungu, phamwenga na milatso ya atu osi arioolagbwa duniani."

Maono 19

¹Chisha bada ya higa, násikira dza sauti nyinji za kundi kulu hiko mlunguni ambazo kala zinakota likululu zinaamba: "Naatogolwe Mlungu! Mlungu ndiye Muokoli wehu. Nguma na uwezo ni wa Mlungu wehu,

²mana hukumuye ni ya kpweli na ya haki. Mlungu akamuhukumu yuya mdiya mkpwulu ariyebananga atu na udiyawe himu duniani. Mlungu akamriphiza kpwa sababu ya milatso ya nyo atumishie."

³Hara atu apiga kululu tsona, achiamba, "Naatogolwe Mlungu! Hinyo mosi utulukao kula kpwa ye mchetu mdiya aphyaye unaphiya dzulu milele."

- ⁴Hara azehe ishirini na ane na hara viumbe vine agbwa chimabumabu achimuabudu Mlungu asegereye chihi cha chifalume. Navyo vyapiga likululu vichiamba, "Amina! Naatogolwe Mlungu!"
- ⁵Na nchisikira sauti yanjina kula pho phokala chihi cha chifalume, yoamba, "Mtogoleni Mlungu wehu, mwimwi atumishie. Mtogoleni mwimwi mumuogophao, a vyeo na msiokala na vyeo!"
- ⁶Chisha nchisikira sauti kulu dza sauti ya kundi kulu ra atu rinagomba. Sauti hiyo yavuma dza madzi manji gajerago kpwa nguvu maweni, na dza sauti kulu ya chiguruguru. Hiyo sauti yaamba, "Naatogolwe Mlungu! Mana iye Bwana Mlungu wehu ana uwezo wosi na anatawala.
- ⁷Nahukaleni na raha, humpigireni njerejere na humuphe nguma. Mana arusi ya Mwana-ng'ondzi ikafika phephi, na bibi arusi akadzitayarisha kare.
- ⁸Iye bibi arusi akahewa nguwo nono za kung'ala-ng'ala zisizo na dowa." (Hizo nguwo nono manage ni mahendo manono ga atu a Mlungu.)
- ⁹Chisha ye malaika achiniamba, "Andika maneno higa: Baha aho arioalikipwa yo sheree ya arusi ya ye Mwana-ng'ondzi." Tsona achiniamba, "Higa nchigogomba ni maneno ga kpweli ga Mlungu."
- ¹⁰Ndipho nádzibwaga chimabumabu maguluni pha yuya malaika ili nimuabudu, lakini achiniamba, "Usihende hivyo bii! Mimi nami ni mtumishi dza uwe phamwenga na nduguzo amshuhudiyao Jesu. Uwe muabudu Mlungu bahi! Mana ushahidi wa Jesu ndio chandzo cha unabii wa chiroho."
- ¹¹Hebu niphundzani! Náona mlunguni kuchifwenuka, nako nchiona farasi mwereru. Mutu yekala akapanda farasi anaihwa, "Wa Haki na Wa Kpweli." Naye nkuhukumu na kupigana viha kpwa ajili ya haki.
- ¹²Matsoge kala ni dza jimbi-jimbi ra moho, na kala ana virembe vinji mo chitswani. Kala akaandikipwa dzina ambaro takuna mutu yemanya manage isiphokala ye mwenye.
- ¹³Naye kala akavwala kandzu ya dododo mana kala ikavwikipwa mlatsoni, na dzinare ndiye, "Neno ra Mlungu."
- ¹⁴Nago majeshi ga mlunguni kala ganamlunga-lunga nyuma. Kala gakavwala nguwo nono, nyereru tse-tse-tse zisizo na madowa, nao kala akapanda farasi ereru.
- ¹⁵Mwakpwe kanwani mwatuluka upanga wa kurya sana. Andauhumira kushinda mataifa gosi duniani naye andagatawala na uwezo mkpwulu. Tsona aminye uchi mufu wa tsukizi za Mwenyezi Mlungu.
- ¹⁶Na phakpwe nyongani, kandzuye kala phakaandikipwa dzina hiri: Mfalume wa afalume na Bwana wa mabwana.

¹⁷Na chisha nchiona malaika aimire dzulu ya dzuwa. Malaika hiye wakota likululu achiha nderi osi arukao dzulu, achiamba, "Ndzoni mwedze murye karamu kulu ya Mlungu.

¹⁸Ndzoni mwedze murye nyama za afalume, za akulu a viha, za atu a nguvu, nyama za farasi na apandadzi farasi, nyama za atu osi, atumwa na ario huru, asiokala na vyeo na ario na vyeo."

¹⁹Chisha nchiona ro dzinyama na afalume a dunia na majeshi gao achikusanyika phamwenga. Aho alonda kupigana na ye ariyekala asegere dzulu ya farasi phamwenga na jeshire.

²⁰Lakini dzinyama, phamwenga na nabiiwe wa handzo ariyehenda vilinje kpwa sababuye, ahalwa mateka. Nabii hiye wachenga hinyo okala akatiywa mola wa hiro dzinyama na kuabudu sanamuye kpwa kuhenda vilinje. Osi airi atsuphiwa azima ziya ra moho mkali sana.

²¹Hiye mutu yekala asegere dzulu ya farasi, wahumira upangawe utulukao kula kanwani kuolagira majeshi garigosala. Na nyo nderi achirya zo nyama hata achisinywa.

Maono 20

¹Badaye náona malaika anatsrerera kula mlunguni, naye kala akagbwira funguwo za kuzimu na mnyororo mkpwulu.

²⁻³Phahi ye malaika warigbwira ro dzoka, yani yuyatu nyoka wa kare aihwaye Ibilisi hebu Shetani, achirifunga minyororo na achiritsupha kuzimu. Pho mryangoni achiphafunga kufuli na kuphatiya ukaka, ili asedze akachenga tsona atu a mataifa gosi duniani. Naye Shetani andafungbwa miaka elufu mwenga. Bada ya muda hinyo kusira, n'lazima avugulwe kpwa muda mchache tu.

⁴Higo gariphosira, náona vihi vya chifalume, vihi ambavyo kala vikasagarirwa ni hinyo okala akahewa uwezo wa kutawala. Aho akala ni roho za hara okatwa vitswa kpwa kushuhudiya kuhusu Jesu na kutangaza ujumbe wa Mlungu. Atu hinya kala taakaabudu rira dzinyama hebu sanamuye. Wala taayakubali kutiywa mola wa hiro dzinyama vilanguni hebu mwao mikononi. Atu hinya afufuka na achedzatawala phamwenga na Jesu miaka elufu mwenga.

⁵Atu anjina ariofwa taandafufuka hadi miaka elufu mwenga isire. Sambu kuku ndiko kufufulwa kpwa kpwandza.

⁶Aho ndiofufulwa mara ya kpwandza, aajaliwa na ni atakatifu. Mana chifo cha phiri tachindakala na nguvu kpwao. Nao andakala alavyadzi-sadaka a Mlungu na Jesu, yetsambulwa ni Mlungu kutawala atu. Tsona andatawala naye muda hinyo wa miaka elufu mwenga.

⁷Bada ya miaka elufu mwenga kusira Shetani andarichirwa hiko ndikokala akafungirwa.

⁸Naye achirichirwa andakpwedza achenge atu a makabila pembe zosi za dunia, yani Gogu na Magogu. Andakusanya atu kuatayarisha kpwa viha, nao andakala na afuasi anji dza mtsanga wa baharini.

⁹Nao anyendeka seemu zosi za dunia na kuzunguluka mudzi umendzwao ni Mlungu, ambapho ndipho phasagalapho atue. Lakini wakati ariphohenda vivyo kpwatuluka moho kula mlunguni uchedzaangamiza.

¹⁰Ye Shetani ariyeachenga watsuphiwa ziya ra moho mkali sana, phahali phariphotsuphiwa ro dzinyama na ye nabii wa handzo. Nao kuko andateswa usiku na mutsi, milele.

¹¹Chisha náona Mlungu asegere chihiche chikulu tsona chereru. Mlunguni na tsi kuchiyaya mbereze na takuyaonekana tsona.

¹²Nchiona afwadzi osi, ario na vyeo na asiokala na vyeo aimire mbere za chira chihi cha chifalume. Ndipho vitabu vyokala vichiandikpwa mahendo ga atu osi vichivugulwa. Na phavugulwa chitabu chanjina, na hicho kala ni chitabu cha uzima. Aho afwadzi ahukumiswa kulengana na mahendo gao goandikpwa mumo vitabuni.

¹³Bahari yalavya afwadzi ariola himo. Chifo na kuzimu nazo zichilavya atue. Chila mmwenga achihukumiswa kulengana na mahendoge.

¹⁴Bada ya kusira higo, chifo na kuzimu zatsuphiwa ziya ra moho. Ro ziya ra moho ndiro chifo cha phiri.

¹⁵Na mutu yeyesi ambaye dzinare tariandikirwe himo chitabu cha uzima, naye piya watsuphiwa ziya ra moho.

Maono 21

¹Higo gariphosira, náona mlunguni kuphya na dunia nyiphya, mana mlungu wa kpwandza na dunia ya kpwandza kala ikaangamizwa, na kuchikala takuna bahari tsona.

²Chisha nchiona mudzi mtakatifu, yani Jerusalemu nyiphya, inatserera kula mlunguni kpwa Mlungu. Mudzi hinyo kala ukapambwa dza bibi arusi apambwavyo, achikala anaphirikpwa kpwa mlumewe.

³Alafu nchisikira likululu kula pho pharipho na chihi cha chifalume, richiamba, "Vivi Mlungu andasagala phamwenga na atu. Phakpwe kaya andakala phamwenga na anadamu, nao andakala atue. Mlungu mwenye andakala phamwenga nao, naye andakala Mlungu wao.

⁴Andafuta matsozi gao gosi. Wakati hinyo atu taandafwa wala kusononeka. Takundakala na chiriro wala kulumwa, mana zo hali za kare zindakala zatsupa."

⁵Chisha yekala akasagarira cho chihi cha chifalume waamba, "Vivi sambi chila chitu nachihenda chiphya!" Piya achiniambira, "Gaandike higa, mana ni maneno ga kpweli na ga kukuluphirika."

⁶Phahi achiniamba tsona, "Mambo vivi gakahendeka. Mimi ndimi Mwandzo na Mwisho; mimi ndimi niandzaye mambo gosi na kugamarigiza. Chila mutu ariye na chiru n'ndamupha madzi ga bure anwe kula pula za madzi garehago uzima.

⁷Mutu ndiyeshinda, n'ndamupha vitu hivi vyosi, iye andakala mwanangu, nami n'ndakala Mlunguwe.

⁸Ela phahi aoga, asiomkuluphira Mlungu, akora, aolagadzi, adiya, atsai, aabuduo sanamu, na a handzo, aho osi phatu phao ni ziya ra moho mkali. Na chicho ndicho chifo cha phiri."

⁹Chisha malaika mmwenga wa hara sabaa okala na mbiga za mashaka sabaa ga mwisho wakpwezaniamba, "Ndzoo nikuonyese ye bibi arusi, hiye ndiyekala mkpwaza Mwana-ng'ondzi."

¹⁰Phapho achiniphirika hadi dzulu ya mwango mkpwulu tsona mure, wakati kala nalongozwa ni Roho wa Mlungu. Kuko yuya malaika achinionyesa mudzi mtakatifu wa Jerusalemu unatserera kula dzulu mlunguni kpwa Mlungu.

¹¹Mudzi hinyo kala una mwangaza mkpwulu wa Mlungu, mana wakala unang'ala-ng'ala dza chilolo na dza dziwe ra samani kulu riihwaro jasipa.

¹²Tsona kala ukazungulusirwa ukuta mkpwulu wa dzulu. Piya kala una miryango kumi na miiri na chila mryango kala una malaika. Na chila mryango kala ukaandikpwa dzina ra mbari mwenga ya zira mbari kumi na mbiri za Iziraeli.

¹³Chila uphande kala kuna miryango mihahu; mlairo wa dzuwa, vurini, mwakani, na mtswerero wa dzuwa.

¹⁴Na hinyo ukuta wa mudzi kala ukadzengbwa dzulu ya mawe kumi na mairi ga msingi. Na chila dziwe kala rikaandikpwa dzina ra mmwengawapho wa hara mitume kumi na airi a Mwana-ng'ondzi.

¹⁵Phahi ye malaika yekala anagomba nami kala akagbwira chigongo cha kupimira. Chigongo hicho kala chikatengezwa na zahabu, nacho kala ni cha kupimira nyo mudzi, miryangoye na nyo ukutawe.

¹⁶Ye malaika wapima hura mudzi na hicho chigongo, nago mare na mapana na chimo kala ga sawa kpwa sawa. Achiphaha kukala ni kilomita elufu mbiri na magana mane.

¹⁷Alafu ye malaika achipima upana wa nyo ukuta, nao uchikala ni mita sitini. Naye wakala anahumira chipimo chihumirwacho ni anadamu.

¹⁸Nyo ukuta kala ukadzengbwa na mawe ga samani ga jasipa. Mudzi nao kala ukadzengbwa na zahabu safi ya kung'ala-ng'ala dza chilolo.

¹⁹Msingi wa hinyo ukuta wa mudzi kala ukapambwa na mawe kumi na mairi manono sana ga samani. Na gaga gakala na rangi tafwauti tafwauti. Dziwe ra kpwandza kala ni jasipa, na ra phiri richikala ni yakuti samawi. Ra hahu rakala dziwe riihwaro kalikedoni na ra nne richikala zumaridi.

²⁰Dziwe ra tsano kala ni dziwe riihwaro saridoniki, ra sita richikala akiki. Dziwe ra sabaa kala ni kirisolito, ra nane kala ni zabarajadi. Dziwe ra tisiya kala ni yakuti ya manjano, ra kumi ni kirisopirasu, ra kumi na mwenga richikala hiakinitho na ra kumi na mbiri ni amethisito.

²¹Yo miryango kumi na miiri yosi kala ikatengezwa na lulu. Chila mryango kala ukatengezwa na lulu mwenga bahi! Barabara kulu ya nyo mudzi kala ukatengezwa na zahabu safi, yokala inang'ala-ng'aala dza chilolo.

²²Mimi sionere Nyumba ya Kuvoya Mlungu himo mudzini mana ye Bwana Mwenyezi Mlungu na ye Mwana-ng'ondzi anasagala mo mudzini. Kpwa hivyo taphana phatu phanjina pha kuvoya Mlungu.

²³Mudzi hinyo tauna haja ya mwangaza wa dzuwa ama mwezi, mana nkung'arirwa ni utukufu wa Mlungu, na Mwana-ng'ondzi ndiye taa ya nyo mudzi.

²⁴Atu a makabila gosi andaishi na kuno anang'arirwa ni nyo mwangaza wa hinyo mudzi, na afalume a dunia andainjira himo kuphirika vitu vyao vya samani.

²⁵Miryango yosi ya mudzi indakala wazi wakati wosi, mana takundakala na usiku.

²⁶Atu a makabila gosi duniani andareha utajiri wao na vitu vyao vya samani mumo mudzini.

²⁷Ela takuna chochosi chiricho najisi ndichoinjira himo mudzini, wala mutu yeyesi ahendaye mambo ga waibu ama ga handzo. Atu ndioinjira mudzi hinyo ni aratu ambao madzina gao gaandikpwa chitabu cha uzima cha ye Mwana-ng'ondzi.

Maono 22

¹Chisha ye malaika wanionyesa muho wa madzi garehago uzima, utulukao phara phenye chihi cha chifalume cha Mlungu na Mwana-ng'ondzi. Nyo muho kala unang'ala-ng'ala dza chilolo.

²Muho wenye kala unajera kahi-kahi ya yo barabara kulu ya nyo mudzi. Chila uphande wa muho kala phana muhi urehao uzima ambao kala unavyala mara mwenga kpwa mwezi, kpwa hivyo kpwa mwaka kala unavyala mara kumi na mbiri. Makodza ga muhi hinyo ganahumirwa kama dawa ya kuphoza atu a makabila gosi.

³Mudzi hinyo taundakala na chitu chochosi cholaniwa ni Mlungu. Na chihi cha chifalume cha Mlungu na ye Mwana-ng'ondzi chindakala mumo mudzini. Nao atumishie andamuabudu Mlungu,

⁴andamuona, na dzinare rindaandikpwa mwao vilanguni.

⁵Ndani ya mudzi hinyo takundakala na usiku tsona; atu taandakala na haja ya taa wala dzuwa, mana Bwana Mlungu ndiye ndekala mwanga wao. Atu hinyo andatawala milele na milele.

⁶Chisha hiye malaika achiniamba, "Hakika maneno higa ni ga kpweli na ga kukuluphirika. Tsona Bwana Mlungu aaphaye manabii Rohowe, wahuma malaikawe kuaonyesa atumishie mambo ambago kala n'lazima gahendeke vi sambi-sambi."

⁷Bwana Jesu anaamba, "Hebu niphundza vinono, mino n'redza vi sambi. Baha aho aogophao na kulunga maneno ga unabii garigo ndani chitabu hichi."

⁸Mimi Johana nágaona na nchigasikira mwenye, mambo higo. Na nriphokala nkagaona na kugasikira, nádzibwaga chimabumabu mbere za ye malaika ambaye akanionyesa mambo higa ili nimuabudu.

⁹Ela achiniamba, "Usihende hivyo! Mimi nami ni mtumishi tu, dza vivyo urivyo uwe, nduguzo manabii, na anjina osi alungao ujumbe wa chitabu hichi. Kpwa hivyo uwe muabudu Mlungu macheye!"

¹⁰Chisha ye malaika achiniamba, "Maneno higa ga unabii garigo mu chitabuni usigafwitse, mana gosi gogombwa mumo gandahendeka vivi sambi-sambi.

¹¹Phahi mutu ahendaye mai, naenderere kuhenda mai, na ahendaye waibu naenderere kuhenda waibu. Tsona mutu ahendaye haki, naye naazidi kuhenda haki, na mutu ariye bila ya lawama, naazidi kukala bila ya lawama."

¹²Chisha nchiambwa, "Jesu anaamba, 'Hebu niphundza vinono, mino n'redza vi sambi. Nami niredza nimriphe chila mutu kulengana na mahendoge.

¹³Mimi ndimi Mwandzo na Mwisho; mimi ndimi niandzaye mambo gosi na nkagamarigiza.' "

¹⁴Baha atu afulao kandzu zao na kuzitsusa, ili aphahe ruhusa ya kuinjira nyo mudzi muphya kutsupira miryangoye na arye matunda ga muhi urehao uzima.

¹⁵Ela atsai osi, adiya, aolagadzi, aabuduo sanamu na anjina osi amendzao kugomba handzo, andakala kondze ya hinyo mudzi dza viratu madiya.

¹⁶"Mimi Jesu, ndimi chivyazi chikulu cha Mfalume Daudi, na ndimi ning'alaye dza kombezi. Mimi ndimi yehuma malaika wangu edze akuambireni mwimwi afuasi angu mambo higa garigo himu chitabuni."

¹⁷Roho wa Mlungu na hiye bibi arusi wa Mwana-ng'ondzi anamuiha Bwana anaamba, "Ndzoo!" Na atu osi ndiosikira mambo higo naambe, "Ndzoo!" Yeyesi ariye na chiru alondaye madzi, naaedze anwe bure madzi ga uzima.

¹⁸Nakukanyani chimbere chila mmwenga ndiyesikira maneno higa ga unabii garigo himu chitabuni. Mutu ndiyeenjereza maneno, Mlungu naye andamuenjereza go mashaka gohadzwa himu chitabuni.

¹⁹Na mutu yeyesi ndiyephunguza neno rorosi kula maneno ga unabii wa chitabu hichi, Mlungu naye andamphunguzira baraka zoandikpwa mo chitabuni. Andamphunguzira hakiye ya kusagala mudzi mtakatifu, na hakiye ya kurya matunda ga muhi wa uzima.

²⁰Na iye alavyaye ushahidiwe kuhusu mambo higa anaamba, "Hakika sichelewa, n'redza vi sambu." Amina. Ndzoo Bwana Jesu!

²¹Bwana Jesu naakujaliyeni mwimwi mosi. Amina.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil